


Yuse chichame aarmauri; Yaanchuik, Chicham;

Yamaram Chicham



New Testament and portions of the Old Testament in the
Achuar-shiwiar of Peru

Yuse chichame aarmauri; Yaanchuik, Chicham; Yamaram Chicham
New Testament and portions of the Old Testament in the Achuar-shiwiari of Peru
Sumario del Antiguo Testamento y El Nuevo Testamento de nuestro Señor Jesucristo en el idioma
Achuar-Shiwiari

copyright © 2008 Wycliffe Bible Translators, Inc.

Language: Achuar-shiwiari

Translation by: Wycliffe Bible Translators, Inc.

Achuar-shiwiari

Peru

[acu]

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Achuar-shiwiari

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-21

PDF generated using Haiola and XeLaTeX on 4 Mar 2019 from source files dated 20 Jul 2017
b598ccd0-0e22-5832-8030-1436bc7bf73c

Contents

Mateo	1
Marcos	63
Lucas	99
Juan	162
Hechos	209
Romanam	263
1 Corintonam	288
2 Corintonam	313
Gálatas	328
Efesonam	337
Filiposnum	346
Colosasnum	352
1 Tesalónicanam	358
2 Tesalónicanam	363
1 Timoteo	366
2 Timoteo	373
Tito	378
Filemón	381
Hebreos	383
Santiago	401
1 Pedro	407
2 Pedro	414
1 Juan	418
2 Juan	424
3 Juan	425
Judas	426
Apocalipsis	428

Yamaram Chicham Mateo Aarmauri

Jesucristo Abrahamama wearintai
(Luc. 3.23-38)

¹ Ju papikia Jesucristo pachisar aarmawaitai. Jesucristo Davidta weari ayayi. Tura Davidcha Abrahamama weari ayayi. Tura Abrahamama weari ainau, tura Davidta weari ainau naaringkia ju papinum aarmawaitai.

² Abraham Isaacan yajutmarmiayi. Tura Isaac Jacobon yajutmarmiayi. Tura Jacob Judán tura Judá yachí ainauncha yajutmarmiayi. ³ Tura Judá Tamaran nuwatak, ni uchirin Faresan tura chikich uchirin Zara naartinun yajutmarmiayi. Tura Fares Esroman yajutmarmiayi. ⁴ Tura Esrom Araman yajutmarmiayi. Tura Aram Aminadaban yajutmarmiayi. Tura Aminadab Naasónkan yajutmarmiayi. Tura Naasón Salmónkan yajutmarmiayi. ⁵ Tura Salmón Rahaban nuwatak Boozan yajutmarmiayi.✠ Tura Booz Rutan nuwatak Obedan yajutmarmiayi. Tura Obed Isaín yajutmarmiayi.✠ ⁶ Tura Isaí apu Davidtan yajutmarmiayi. Davidka Israela apuri ayayi. Tura David Uríasa nuwarin nuwatak, ni uchirin Salomónkan yajutmarmiayi.✠

⁷ Tura Salomón Roboaman yajutmarmiayi. Tura Roboam Abíasan yajutmarmiayi. Tura Abías Asan yajutmarmiayi. ⁸ Tura Asa Josafatan yajutmarmiayi. Tura Josafat Joraman yajutmarmiayi. Tura Joram Oseasan yajutmarmiayi. ⁹ Tura Oseas Jotaman yajutmarmiayi. Tura Jotam Acazan yajutmarmiayi. Tura Acaz Ezequíasan yajutmarmiayi. ¹⁰ Tura Ezequías Manasésan yajutmarmiayi. Tura Manasés Amónkan yajutmarmiayi. Tura Amón Josíasan yajutmarmiayi. ¹¹ Tura Josías Jeconíasan tura Jeconíasa yachí ainaun yajutmarmiayi. Tura Babilonianmaya apuri Israel ainaun nepetkau asantai, Israel ainaun achikiar Babilonianam jukiarmiayi.

¹² Tura Jeconías nuni pujus Salatielan yajutmarmiayi. Tura Salatiel Zorobabelan yajutmarmiayi. ¹³ Tura Zorobabel Abiudan yajutmarmiayi. Tura Abiud Eliaquiman yajutmarmiayi. Tura Eliaquim Azoran yajutmarmiayi. ¹⁴ Tura Azor Sadócan yajutmarmiayi. Tura Sadóc Aquiman yajutmarmiayi. Tura Aquim Eliudan yajutmarmiayi. ¹⁵ Tura Eliud Eleazaran yajutmarmiayi. Tura Eleazar Matánan yajutmarmiayi. Tura Matán Jacobon yajutmarmiayi. ¹⁶ Tura Jacob Josén, Marí aishrin yajutmarmiayi. Marísha Jesúsán jurermiayi. Tura Jesúska Yus akupkamu asantai Mesías inaikiamuitai.

¹⁷ Tura Jesúsá weari Abrahamnumia nángkamas Davidnum jeatak catorce (14) weari inaikiamu armiayi. Tura Davidnumia nángkamas Israel ainau Babilonianam achikmau jeakuri catorce (14) wearisha inaikiamu armiayi. Nuni nángkamas Mesíasjai mash irumram ataksha catorce (14) weari inaikiamu armiayi.

Jesucristo akiinamuri etserkamuri
(Luc. 2.1-7)

¹⁸ Jesucristo tu akiinamiayi. Jesúsá nukuri Marín nuwatkataj tusa, José niin chichasmiayi. Tu chichasar kanakar pujuinai, Yuse Wakani kakarmarijai Marí japrukmiayi.✠ ¹⁹ Marí japrukamtai, José nuna nekaa, pengker nintintin asa, aints ainau nuna nekaawarai tusa, takamtaik uuk inaisatas wakerimiayi. ²⁰ Tu nintimias pujamtai, Yuse awemamuri Josén karanam wantintukmiayi. Tura chicharak:

—Joséya Davidta weariya, ame chichasmaurum María japruku wainiatmek natsaamtuk jeemin jukita. Yuse Wakani aitkamu asa japruki. ²¹ Tura asantai uchin jurertatui. Turamtai nu uchikia aints ainaun tunaanumia uwemtikratin asantai, nu uchikia Jesús inaikiatatme, —timiayi. Nuna naaringkia Uwemtikiartin taku tawai.✠

✠ 1:5 (Josué 2.1;6.17; Hebr. 11.31; Sant. 2.25) ✠ 1:5 (Rut 4.13-17) ✠ 1:6 (2.Sam. 12.24) ✠ 1:18 (Luc. 1.27-38) ✠ 1:21 (Luc. 1.31)

²² Nu turunatnunka yaanchuik Yuse chichamen etserin aarmia nunisang umikmiayi. Nu aarmauka nuwaitai:

²³ “Antuktaram. Nawan aintsjai tumichu japruktinuitai. Tura asa uchin jurertinuitai. Tura uchin Emanuel inaikiatnuitai.” Nuna ta nuka “Yus iijai pujawai” taku tawai.✠

²⁴ Turamtai José shintar, Yuse awemamuri timiaun miatrusang umikmiayi. Tura Marín ni jeen jukimiayi. ²⁵ Tura uchi eemkauri akiintsang, ni jeen jukiyat, nijaingkia tumatsuk pujus, Marí uchin jurermiayi. Tura uchin jurer, naarin Jesúsán inaikiamiayi.✠

2

Nekau ainau irasmauri

¹ Herodes Judea nungkanam apu pujai, Jesús Belén yaktanam Judea nungkanam akiinamiayi. Jesús akiinau asamtai, nekau aints ainu tsa taakmanumanini jiinkiar Jerusalénnum jearmiayi. Tura apu Herodes pujamunam jear, ² Herodesan iniinak:

—¿Judío apuri akiina nusha tuning puja? Iikia tsa taakmanumanini angkuaji wainkau asar, apu akiinayi tusar: Ameka Apu wajastatme titasar winiji, —tiarmiayi.

³ Tinamtai apu Herodes nuna antuk: Wikitjai apunka tusa, napchau nintimramiayi. Turamtai Jerusalénnum pujuinausha mash napchau nintimrarmiayi. ⁴ Tura asamtai apu Herodeska sacerdote juuntri ainaun mash untsuk, tura Moisésa chichame nuikiartin ainauncha mash irur:

—¿Tuning akiinatnuita Cristoa? —tu iniasmiayi. ⁵ Tu iniam, Yuse chichamen etserin tu aarmau asamtai aiminak:

—Belén yaktanam Judá nungkanam nuni akiinatnuitai. Cristo akiinatniuri pachis aarmauka nuwaitai:

⁶ Yus chichaak: “Judá nungkanam yakat Belén tutai mianchauka achatnuitai. Antsu nu yaktanam juun apu akiinatnua nuka Israela weari ainaun inartinuitai. Tura asamtai nu yaktaka chikich yakat Judá nungkanam aa nuna nangkamasang juun atinuitai,”

Yus timiayi. Tu aarmawaitai, —tutar aimkarmiayi.✠

⁷ Tu aiminamtai, apu Herodes nekataj tusa, nekau ainaun tsa taakmanumanini winiarmia nunaka akanak juki:

—¿Angkuajisha nekasrumsha warutia wainkamarume? —tu iniasmiayi. ⁸ Tura nuna nekaa, Belén yaktanam awemak:

—Nuni wetaram. Turaram uchi pujatsuash tusaram, tenapkesrum nekaataram. Tura wainkaram umisrum waketkiram winasha ujakataram. Turakrumin wisha wena uchin: Ameka apu wajastatme, titasan wakerajai, —anangkak timiayi.

⁹⁻¹⁰ Apu Herodes tu akatramu asar, nekau ainu apu jeenia jiinkiar, Belénnum wearmiayi. Tura jinta weenak, angkuajin tsa taakmanumanini wainkarmia nunaka ataksha wainkarmiayi. Tura nuna wainkar nukap warasarmiayi. Tura uchi pujamunam tupnik angkuaji ketun jiisar, nuke wear jean wainkarmiayi. ¹¹ Tura jean wainkar nuni wayaawar, uchi nukuri Maríjai pujuinaun wainkarmiayi. Tura wainkar tikishmatrar:

—Ameka apu atatme, —tiarmiayi. Tura kichik kichik ni kajurin urakar, ni kajurinia kurin, tura keematai kungkurman, nunia shirikpin mirra tutain uchin susarmiayi.

¹² Tura arum kashi kaninamtai, Yus nu nekau aints ainaun karanam chicharak:

—Judío apuringkia ujatsuk, tupnik atumi nungkari waketkitaram, —timiayi. Tu timiau asar, chikich jintak ni nungkarin waketkiarmiayi.

Egipto nungkanam wemaui

¹³ Nekau ainu waketkiaramtai, Yuse awemamuri Joséán karanam aneachmau wantintukmiayi. Tura chicharak:

—Joséya nantakta. Tura nantakim uchi nukurijai jukim, Egipto nungkanam weta. Apu Herodes uchin eak maatas wakerau asamtai turata. Tura nuni pujakmin, waketkita tusan ujaktatjame, —timiayi.

¹⁴ Tamati Josés sha wári nantaki, uchin nukurijai juki, kashi Egipto nungkanam wearmiayi. ¹⁵ Tura Egiptonam jear: Herodes jakamtai waketkimi tusar nakasarmiayi. Nu turatnunka pachis yaanchuik Yus ni chichamen etsernun aamtikramiayi. Yus nuna miatrusang umikti tusa turamiayi. Nu aarmauka nuwaitai: “Egipto nungkanmaya wina Uchirun untsukmiajai.”[✠]

Uchi ainau maamuri

¹⁶ Apu Herodes nekau ainaun taarti tusa naka nakaka ni tacharamtai, wina anangkrua tusa, nukap kajekmiayi. Tura nekau ainaun: ¿Angkuajin warutia wainkamarume? nuwik tu iniasu asa, nuna paan nekaa, ni suntarin akupak: “Uchi aishmang yamai akiinau ainau tura yamai wekaarau ainausha, tura yamai chicharu ainausha, tres musach jeatak Belén yaktanam pujuinau, tura arakchichu pujuinausha mash amuktaram,” tusa akupkamiayi. ¹⁷ Tu akatramu asar, uchi ainaun mash maawarmiayi. Nu uchi ainaun maamurin pachis Yuse chichamen etserin Jeremías yaanchuik aarmia nuna miatrusarang umikiarmiayi. Nu aarmauka nuwaitai:

¹⁸ “Ramá yaktanam nuwa kakar juutmau antuukatnuitai. Nuwa juutu puja nuka Raquelaitai. Ni uchiri mash amutkamu asa, jikiamak kakar juutui. Antsu jikiamtsuk asata tinamaitiat antatsui.” Tu aarmawaitai. Nu aarmauka apu Herodeska akiintsang, ukunam atiniun pachis aarmawaitai.

¹⁹ Tura apu Herodes jakamtai, José Egiptonam pujai, Yuse awemamuri nayaimpinmaya ataksha tari, karanam wantintuk chicharak:

²⁰ “José ya nantakta. Uchin maatas wakerimia nuka yanchuk jakau asamtai, uchi nukurijai jukim Israel nungkanam waketkita,” timiayi.

²¹ Tamati José nantaki uchin nukurijai juki, Israel nungkanam waketkimiayi. ²² Tura nuni jear, ni aparai jakau asamtai, Herodesa uchiri Arequelao naartin Judea nungkanam aints ainaun inawai tamaun antuk, José nuni wetan shamiayi. Tura karanam: Israel nungkanam weep timiaun antuku asa, Galilea nungkanam wemiayi. ²³ Tura Galilea nungkanam pujustas, Nazaret yaktanam wemiayi. Nu turunamuka yaanchuik Yuse chichamen etserin timiaun miatrusang umikmiayi. Nu Jesús an pachis timiauka nuwaitai: “Nazaretnumia aintsuitai tiartinuitai.”[✠]

3

Imiakratin Juanku etserkamuri

(*Marc. 1.1-8; Luc. 3.1-9, 15-17; Juan 1.19-28*)

¹ Jesús tuke Nazaretnum pujamtai, imiakratin Juan Judea nungkanam taa, numi atsamunam Yuse chichamen etsermiayi.[✠]

² Tura aints ainaun chicharak:

—Yus aints ainaun nayaimpinmaya inartin kinta jeau asamtai, atumi tunaari inaisaram tuke Yus nemarkataram, —timiayi.[✠]

³ Yaanchuik Juankun pachis Yuse chichame etserin Isaías aarmia nuna miatrusang umikmiayi. Nu aarmauka nuwaitai:

Numi atsamunam aints taa kakar chichaak:

“Aints ainau apu wekaasatniun jintan tupin iwiarina nunisrumek atumi ninti iwiarataram,” timiayi. Tu aarmawaitai.[✠]

⁴ Juan kamiyu uren kachumnuyayi. Tura peetirincha nuwap najanamun peeyayi. Tura manchincha yuyayi. Tura wapasa yumirincha uminuyayi. ⁵ Tura Yuse chichamen etsermatai, Jerusalénnumia aints ainau, tura Judea nungkanmaya ainausha, tura Jordán entsanam arakchichu pujuinausha untsuri Juan etsermaun antukartas kaunkarmiayi.

⁶ Tura aints ainau: Yus wina tunaarun sakturat tusar ni tunaarin etserkaramtai, Juan nu aints ainaun Jordánnum imaimiayi.

⁷ Turamtai fariseo ainau, tura saduceo ainausha untsuri Juan aints ainaun imiaamun jiisartas kaunkarmiayi. Tura kaunkaramtai, Juan nu aints ainaun chicharak:

—Atumka napia tumau ainarmincha ¿yaachia atumin mairam uwemratatrume turamiarume? Atumka nangkamrum: Wisha mainka uwemrainjapi, tura Yuska winaka wait wajaktinnaka suruschaintapi ¿tu nintimsarmesha pujarme? ⁸ Nekasrum uwemratarum wakerakrumka, atumi tunaaringkia inaisaram ukuktaram. ⁹ Atumka nangkamrum: Iikia Abrahamama uchirinji, tura asar Yuse aintsri ainiaji tarume. Antsu wikia tajarme: Yuska ju kaya tepa junaka juki: Juka Abrahamama weari ati tusa, ningki wakerakka turamnawaitai. ¹⁰ Atumka numi nerechua nunisketrume. Tura aints jachan juki numi nerechun ajak nuna kanawen charur epeawai. Yuska nu aintsua nunisketai. Atumi tunaari inait nakitakrumka, nekasrum wait wajaktinuitrume. ¹¹ Atumi tunaari inaisaram Yus umirkataram tusan, wikia aya entsanmak imiajrume. Antsu wína ukurun winitata nuka wína nangkatusang kakaram atatui. Wikia mianchau asan, natsaamakun ni sapatrin takuschatnuitjai. Yuse Wakani Yusnau ainautirmi nintin piatramkatatrume. Antsu Yus umirchau ainautirminka ji kajintrashtinum japramatatrume. ¹² Niisha Yusnau ainaun, tura Yusen umirchau ainauncha akantratnuitai. Aints trigon pakawa nunisang turatnuitai. Trigo jingkiajincha, tura saapencha akankatas pear su su umpui jingkiajinak juwawai tura jeansam ukuawai. Antsu saapen epeawai. Yuscha nunisang niinu ainaunka ni jeen jukiartinuitai. Antsu niin umirchau ainaunka ji kajintrashtinum japatnuitai, —Juan etserak timiayi.

Jesúsa maimuri

(*Marc. 1.9-11; Luc. 3.21-22*)

¹³ Nunia Jesús Galilea nungkanmaya jiinki, Jordán entsanam wína imiatti tusa Juankun werimiayi. ¹⁴ Tura wainiat Juan Jesúsan imaichmin nekapeak chicharak:

—Ame nekasam wína imiatmin ayatum ¿wína imiatit tusam winam? —timiayi.

¹⁵ Tu iniam Jesús ayaak:

—Ja ai, yamaikia imiatia. Yus turataram turamin asamtai, nuka mash umikminuitji, —timiayi. Tamati Juan Jesúsan imaimiayi. ¹⁶ Tura imiaim, Jesús entsanmaya jiinki, nayaim uranniun wainkamiayi. Turamtai Yuse Wakani yapangma tumau Jesúsa muuken winitmiayi. ¹⁷ Turamtai nayaimpinmaya chichaman antukarmiayi. Nu chichamka nuwaitai.

—Juka wína Uchiruitai, wína aneetiruitai. Niin pengker nintimtusan pujajai, —Yus timiayi.

4

Jesúsa nekapsamuri

(*Marc. 1.12-13; Luc. 4.1-13*)

¹ Yuse Wakani Jesúsan engkemtuau asa, aints atsamunam Jesús Satanásjai nekapsamur naitai tusa akupkamiayi. ²

² Tura akupkamu asa, nu nungkanam cuarenta (40) kinta ijiarma pujus yaparmiayi.

³ Tura timiá tsukamak pujamtai, Satanás nuna wainak: Watska, wína chichamrun umirtukchatpiash tusa, Jesúsan nekapsatas chicharak:

—Nekasam Yuse Uchiritkumka ¿waruka nangkamisha yaparusha pujame? ¿Warukaya kaya tepa ju jukim yuwatasam pang najantsume? —timiayi. ⁴ Tamaitiat Jesús ayaak:

—Atsa, turashtatjai. Yuse chichame tu aarmawaitai: “Aints aya yutanak yutanak nintimtinauka tukeka pujuschartinuitai. Antsu Yuse chichamen nintimtinauka nekasar tuke pujusartinuitai,” —timiayi. ⁵

⁵ Nuniangka Satanás Jesúsan ayas, pengker yaktanam Jerusalén tutainum umamiayi. Tura Yus seatai juun jea yakí wajakmanum iwiak, ⁶ ataksha nekapsatas chicharak:

☆ 3:7 (Luc. 3.7) ☆ 3:10 (Mat. 7.19) ☆ 3:11 (Hech. 1.5) ☆ 4:1 (Hebr. 2.18;4.15) ☆ 4:4 (Deut. 8.3)

—Nekasam Yuse Uchiritkumka, tsekengkim yakiiya ayaarta. Yuse chichamesha tu aarmawaitai: “Yus ni awemamuri irunun amin waitmakarti tusa inartinuitai. Turamtai nawemin kayan tukumkai tusar, Yuse awemamuri ainau ni uwejejai achirmakartatui” tu aarmau asamtai, tsekengkim yakiiya ayaarta, —timiayi.✠

⁷ Tamaitiat Jesús ayaak:

—Atsa, turashtatjai. Chikich aarmausha tu aarmawaitai: “Atumi Yusri atumi Apuri asamtai, nangkamrum nekapsatasrum wakerukairap,” —timiayi.✠

⁸ Tamati nunia Satanás Jesúsán ataksha ayas, mura nekas juunnum iwiakmiayi. Tura nuni mash nungka aa nuna, tura nu nungkanmaya yakat ainauncha, nekas pengker aa nunasha mash inaktusmiayi. ⁹ Tura Satanás chicharak:

—Ju nungka ainau mash winaruitai. Turayatun tikishmatruram: Ameka wína Apuruitme turutkumningkia, junaka mash aminu ati tusan susatatjame, —anangkak timiayi.

¹⁰ Tamaitiat Jesús ayaak:

—Satanása weta. Yuse chichame tu aarmawaitai: “Atumi Yusri atumi Apuri asamtai: Ameketme Apum titaram. Turaram atumi Yusri nuke umirkataram,” —timiayi.✠

¹¹ Tamati Satanás Jesúsán nepetkatatkama tujintak ukukmiayi. Turamtai Yuse awemamuri nayaimpinmaya Jesúsán kakamtikrartas kautkarmiayi.✠

Jesús Galilea nungkanam wekaasamuri
(Marc. 1.14-15; Luc. 4.14-15)

¹² Imiakratin Juankun achikiar kársernum engkewaramtai, Jesús Galilea nungkanam waketkimiayi.✠

¹³ Tura Nazaretnum jea, nuningkia pujuschamiayi, antsu nunia jiinki Zabolón nungkanam, tura Neftalí nungkanmasha Capernaum yaktanam juun kucha yantamen pujustas wemiayi.✠

¹⁴ Tura asa yaanchuik Yuse chichamen etserin Isaías naartin nu nungkanmaya ainaun pachis aarmia nunaka miatrusang umikmiayi. Nu aarmauka nuwaitai:

¹⁵ “Yaanchuik Israela uchiri Zabolón naartinu weari ainausha nunia Neftalí weari ainausha juun kucha yantamen puju armiayi. Nu nungkasha Galilea tutayi. Nuni Israelchau ainau untsuri pujusar, Jordán entsa majincha untsuri pujuinawai.

¹⁶ Nunia aints ainau tunau asar, teenam pujuinawa nunisarang pujú armiayi. Tura nuni pujuinawa yamaikia uwemratin chichaman antukar, aints paaniun waininawa nunisarang pujusarmiayi. Nu aints ainau jakawa nunisarang teenam pujuinayat, nu paaniunka wainkarmiayi.”

Tu aarmawaitai.✠

¹⁷ Nunia Jesús Yuse chichamen etsertan nangkamamiayi. Tura chichaak:

—Yus nayaimpinmaya aints ainaun inartin kinta jeatak wajasi. Tura asamtai atumi tunaari inaisaram tuke Yus nemarkataram, —timiayi.✠

Namakan achiun untsukmauri
(Marc. 1.16-20; Luc. 5.1-11)

¹⁸ Jesús Galilea nungkanam juun kucha kaanmatkarin wekaas, namakan achiun jimiaran wainkamiayi. Nuka namakan achikiartas reden juun kuchanam ujungkarmiayi. Nu aintsu naaringkia Simón Pedroyayi. Nuna yachí naaringkia Andrésuyayi. ¹⁹ Tura Jesús nu aintsun wainak chicharak:

—Wína nemartustaram. Tura namak achiarme nutiksarmek aints ainau wina chichamur ujakmintrum, —timiayi.

²⁰ Tamati nuna antukar, ni rederin japawar ukukiar, Jesúsjai tsaniasar wearmiayi.

✠ 4:6 (Sal. 91.11-12) ✠ 4:7 (Deut. 6.16) ✠ 4:10 (Deut. 6.13) ✠ 4:11 (Hebr. 1.14) ✠ 4:12 (Mat. 14.3; Marc. 6.17; Luc. 3.19-20) ✠ 4:13 (Juan 2.12) ✠ 4:16 (Isa. 9.1-2) ✠ 4:17 (Mat. 3.2)

²¹ Tura arakchichu wekaasar, juun Zebedeo naartiniun ni uchiri Santiagojai, tura Juanjai ni rederin kanunam apainak pujuinaun wainkamiayi. Tura wainak Jesús chicharak:

—Wína nemartustaram, —timiayi. ²² Tamati Santiagosha, tura Juansha ayu tusar, kanunmaya jiinkiar ni aparinka ukukiar, Jesúsjai tsaniasar wekaasarmiayi.

Jesús aintsun untsurin nuiniarmauri

(Luc. 6.17-19)

²³ Tura Jesús Galilea nungkanam wekaas, chikich chikich yaktanam iruntai jeans waya, nunia aints ainaun nuiniarmiayi. Tura nuiniak: Yus aints ainaun tu inartinuitai tusa, Yusnum uwemratin chichaman etserkamiayi. Tura aints sungkurmakar pujuinaun, tura najaiminak pujuinauncha mash tsuwarniayi. ²⁴ Tura asamtai Siria nungkanam pujuinausha Jesús tsuwakratmaun nekawarmiayi. Tura nuna nekawar, jainauncha tura sungkurintin ainauncha, tura najaiminak pujuinauncha, tura iwianchrintin ainauncha, tura waurinak pujuinauncha, tura wekaichau ainauncha Jesúsnum itaarmiayi. Tura itaaramtai Jesús nu aints ainaun tsuwarniayi.

²⁵ Tura asamtai Galilea nungkanmaya ainau, tura Decápolis yaktanmaya ainausha, tura Jerusalén yaktanmaya ainausha, tura Judea nungkanmaya ainausha, tura Jordán entsa amajin pujuinausha untsuri Jesúsnum nemariarmiayi.

5

Jesús muranam aints ainaun nuiniarmauri

¹ Aints timiá untsuri kaunkaru asaramtai, Jesús nu aints ainaun ukuki, mura waka nuni keemsamiayi. Turamtai ni nuiniatiri ainausha nuni wakaar, nijai tsaniasar keemsarmiayi. ² Tura keemsaramtai, Jesús nuiniatan nangkamamiayi.

Aints warastinun pachis etserkamuri

(Luc. 6.20-23)

³ Nunia Jesús ni nuiniatirin nuiniak:

“Aints ainau: Iikia nekasar Yuse Wakani yuumaji, tu nintimsar pujuinauka Yusnum tuke pujusartin asar warasartinuitai.

⁴ Tura ni tunaarin nintimsar wake mesekar juutinak pujuinauka Yus ni tunaarin tsangkuramu asar warasartinuitai.

⁵ Tura jampechu ainaun Yus yamaram nungkanam pujusarti timiau asar warasartinuitai.✠

⁶ Tura yaparinawa nunisarang tura kitaminawa nunisarang Yuse wakeramurin najanawartas wakerinauka, Yus turuwarti tusa yaingmau asar warasartinuitai.

⁷ Tura chikich ainaun wait anentin ainaunka Yuscha niincha nunisang wait anentamu asar warasartinuitai.

⁸ Tura péngke nintintin ainau Yusnum jear, Yusen wainkartin asar warasartinuitai.✠

⁹ Tura aints chikich ainaun: Maanitsuk asataram tinu ainaunka pachis Yus: Wína uchir ainawai timiau asar warasartinuitai.

¹⁰ Tura aints Yuse wakeramurin najaninak wait wajainauka tuke nangkantsuk Yusnum pujusartin asar warasartinuitai.✠

¹¹ Atumka wína umirtuku asakrumin, aints ainau atumin jiyatminak, tura pasé awajtaminak, atumin pachitmasar waitrinak pasé chichainamtaisha warastinuitrume.✠

¹² Yaanchuik atum akiintsurmining, Yuse chichamen etserin ainauncha nunisarang pasé awajin armiayi. Tura asar atumnasha nunisarang pasé awajtaminamtaisha, atumsha nunisrumek wait wajau asaram, nayaimpinam Yusnum pujustinuitrume. Tura asaram pengker nintimsaram pujustaram. Tura nukap warastaram,” Jesús timiayi.✠

Weea tumawaitrume tusa nuikiartamuri

(Marc. 9.50; Luc. 14.34-35)

✠ 5:5 (Sal. 25.9;37.11) ✠ 5:8 (Sal. 15.1-2;24.3-4) ✠ 5:10 (1.Ped. 3.14) ✠ 5:11 (1.Ped. 3.14;4.14) ✠ 5:12 (Hech. 7.52)

¹³ Nunia Jesús ataksha nuiniak:

“Atumka weea tumawaitrume. Weesha tuke wakeruktinuitai. Tura wee michumangka ¿itiur ataksha yapaktinuita? Wee michumangka, waríksha itiurkachmin asantai, aints ainau nuna anum aints wekaatainum japawar ukukmiaun nawejai najainawai. Turamu asaramtai atumsha Yus umirtsuk pujakrumningkia, Yuska atumin wee michu anum japamua nunisang japrama ukurmaktinuitrume.

¹⁴ “Atumka ju nungkanam paaniua nunisrumek pujau asaram, aints ainaun paan nintimtikratnuitrume. Atumka yakat muranam aa nusha paan wainkatnuitrume. Tura asantai atumsha yakta nunisrumek anumkachminuitrume.✠ ¹⁵ Aints ainau kantiin akawar chingnanmaka engkeenatsui, antsu yakí kentsar jeanam pujuinaun mash paan wainmantikinawai. ¹⁶ Atumsha nunisrumek nekas pengker aa nu turau asaram, aints ainau atumi pengker pujamurmin waitmakar, Yuska juuntaitai tiarat, tu nintimsaram pujustaram,” Jesús timiayi.✠

Moisésa chichamen pachis etserkamuri

¹⁷ Nunia Jesús ataksha nuiniak:

“Atumka wína pachitsaram: Nuka Moisésa chichamen sakartas taawitai, tuuka nintimrairap. Tura Yuse chichamen etserin ainau armaaurincha sakartas taawitai, tuuka nintimrairap. Wikia nunaka turashtatjai. Antsu Moisésa armaaurin tura Yuse chichame etserin ainau armaaurincha nekas an umiktasan taawitjai. ¹⁸ Nunasha tajarme: Nayaimpisha tura nungkasha meseatsaing, Moisésa armaaurincha pengké kichkisha yapajnaiyashtinuitai. Antsu mash armawa nunisang umiktinuitai.✠ ¹⁹ Tura aints Moisésa chichamen pengké tuupchincha pachischauka, tura chikich ainaun nuiniak: Nu chicham pachischatnuitrume tauka Yusnum jea, nekas mianchau atinuitai. Antsu Moisésa armaaurincha umirak, tura chikich aints ainaun nuiniak: Nu chicham umirkataram tauka Yusnum jea nekas juun atinuitai. ²⁰ Nunia atumka fariseo ainau tura Moisésa chichamen nuikiartin ainausha nangkamasrumek pengker pujachkurmeka, Yuse puju-tirinka wayaashtinuitrume,” Jesús timiayi.

Kajernaikiamun pachis etserkamu

(Luc. 12.57-59)

²¹ Nunia Jesús ataksha nuiniak:

“Yaanchuik juun ainau Moisésa chichamen etserin: Aints maawairap. Antsu aintsun maunaka yapajkiartinuitai tiarmiayi. Nu tamauka antukmiarume. ²² Tura wainiatnak wikia atumin tajarme: Aints ni yachiin kajerak pujakka, wait wajaktiniun jukitnuitai. Tura ni yachiin suwirpiaku jiis, pasé chichaman chichaunaka junia apu ainausha wait wajaktiniun susartinuitai. Tura aints kichan kajerak katsekeak pujauka ji nekas kajintrashinum engkema tuke wait wajaktinuitai.✠

²³ “Atumka Yus maaketai titasrum, Yusen waring achat susatasrumsha ni jeen wayaakrumningkia, nuni wayaaram, atumi yachí kajertaminak pujuinau aneakrumka, ²⁴ Yus susatasrum wakerarme nuka ukukrum, atumi yachí jiistaram. Tura nijai chichasrum tsangkurnairataram. Nuniangka waketkiram, Yus susatasrum wakerarme nuka Ni susataram.

²⁵ “Atumka tumaashitkurmeka, chikich aints atumin: Akirkata tusa, apu pujamunam jeetamiartas achirmakaramtaikia, nijai tsaniasrum jinta weakrum chicham iwiarataram. Nu turachkurmeka, apu achirmak suntar ainaun akupturmak: Ju aints kársernum engkeataram titinuitai. ²⁶ Nekasan tajarme: Atumi tumaashri mash metek akiimiatsuk pujakrumka, nuniangka pengké jiinkishtinuitrume,” Jesús timiayi. *

Aishrinuka takaschatnuitai timiauri
(Marc. 9.43,47)

✠ 5:14 (Juan 8.12;9.5) ✠ 5:16 (Marc. 4.21-23; Luc. 8.16-17; 11.33; 1.Ped. 2.12) ✠ 5:18 (Luc. 16.17) ✠ 5:22 (Ex. 20.13; Lev. 24.17; Deut. 5.17) * 5:26 (Yus tunau jiistin kinta jeatsaing, atumi tunaaringkia inaisaram tsangkuturra titaram, taku timiayi.)

²⁷ Nunia Jesús ataksha nuiniak: “Yaanchuik juun ainau chichaman etserinak: ‘Nuwa aishrinujai tsanirmawairap,’ tinamuka antukmiarume.✠ ²⁸ Tura wainiatnak wikia atumin tajarme: Aints nuwan jiis, nijai tsanitan wakerau asa, ni nintijai yanchuk tunaun turawai.

²⁹ “Tura asamtai atumi jiisha atumin tunau nintimtikramataikia, atumi jii untsurnu-manini kut kuinkawa nunisrumek tunaarum japaram ukuktaram. Jii kichik mengkaku wainiatrumek, nayaimpinam tuke pujustinka timiá pengkeraitai. Antsu mai jiintukka namangmesha pengker ayat, ji kajintrashtinum engkematnuka nekas pengké paseetai. ³⁰ Tura untsur uwejmijai tunau takastasrum wakerakrumka, tunau takasai tusaram, atumi uweje met charawa nunisrumek tunaarum japaram ukuktaram. Uwej kichik met charukmau wainiatrumek, nayaimpinam tuke pujustinka timiá pengkeraitai. Antsu namangmeka pengker ayat, mai uwejtukka ji kajintrashtinum engkematnuka nekas paseetai,” Jesús timiayi.✠

Nuwa japamun pachis etserkamuri

³¹ Nunia Jesús ataksha nuiniak: “Tura yaanchuik juun ainau etserinak: ‘Aints nuwarin ukuktias wakerakka, papin aar: Nuwarun ukuajai tusa, nu papinka nuwarin susatnuitai,’ tinu armiayi. ³² Antsu wikia tajarme: Nuwari kichjai pujachu wainiat, aints ni nuwarin ukuakka, chikich aintsun ninumkamtai, nu aintska nuwarin ukukin asa, nuwarin tunau takantikui. Tura nuwa japamun nuwatkausha nunisang tunau wajawai,” Jesús timiayi.✠

Yusjai tajai nangkamriki tichatnuitai

³³ Nunia Jesús ataksha nuiniak: “Yaanchuik juun ainau etserinak: ‘Atumka ii Apuri naarin pachisrum: Yusjai tajai, nunaka turatatjai, tarume nuka umitskeka inaisairap,’ tinu armiayi. Nu tamauka antukmiarume. ³⁴ Tura wainiatnak wikia atumin tajarme: Nangkamrumka Yusjai tajai, pengké tiirap. Yusjai tajai, nayaimpinmasha tuke nunisang au asamtai, wisha nunisnak waitrutsuk chichaajai takurmeka, nayaimpisha Yuse pujutiri asamtai nusha tiirap. ³⁵ Tura Yusjai tajai, ju nungkasha tuke nunisang au asamtai, wisha waitrutsuk chichaajai takurmeka, ju nungkancha Yus wainu asamtai nuka tiirap. Tura Jerusalén yaktasha pachisrum: Jerusalén nekas Juun Apu yaktari asamtai, wisha waitrutsuk chichaajai, Yusjai tajai tiirap.✠ ³⁶ Atumka jemperuktaj takurmesha, atumkeka jemperukchatnuitrume. Tura atumi jemperi ataksha tuke shuwin ati tayatrume nusha turachminuitrume. Tura atumi muuken pachisrum: Nekasnak waitrutsuk Yusjai tajai tiirap. Tura asaram atumek nintimsaram: Wi wakeraknaka nuna turatatjai titasrum: Yusjai tajai tiirap. ³⁷ Tura atumin ininminamtaikia: Ja ai titasrum wakerakrumka tupnik: Ja ai titaram. Antsu atsa titasrum wakerakrumka tupnik: Atsa titaram. Nuna nangkamasrumek: Yusjai tajai takurmeka nuka paseetai,” Jesús timiayi.✠

Yapajkiatnun pachis etserkamu

(Luc. 6.29-30)

³⁸ Nunia Jesús ataksha nuiniak: “Yaanchuik juun ainau Moisésa chichamen etserinak: ‘Aints ijutminak jiimin mesturmaramtaikia, amesha nunismek yapaijkum ni jii mesturta. Tura ni ijutminak naimin akartamkamtaikia, amesha nunismek yapaijkum ni naisha akarkata,’ tinu armiayi. Atumka nu etsermau antukmiarume. ³⁹ Antsu wikia atumin tajarme: Pasé aints ainau yapaijtsuk asataram. Antsu aints atumi yapiin awaturminamtaisha, atumka yapaijtsuk atusha awatita tusaram tsangkatkataram.✠ ⁴⁰ Aints tumaashnum akirkata tusa, atumi wejmakri jurutramataikia, atumi punchurisha jukiti tusaram tsangkatkataram. ⁴¹ Tura aints atumin inatmak: ‘Ju mermaka kichik kilómetro entsatrukta,’ turamataikia, jimiarchik kilometrosha pengker nintimsaram nuka entsatkataram. ⁴² Tura aints: Yuumamur surusta turamataikia, ni yuumamuri

✠ 5:27 (Ex. 20.14; Deut. 5.18) ✠ 5:30 (Mat. 18.8-9) ✠ 5:32 (Mat. 19.9; Marc. 10.11-12; Luc. 16.18; 1.Cor. 7.10-11) ✠ 5:35 (Lev. 19.12) ✠ 5:37 (Mat. 23.16-22; Sant. 5.12) ✠ 5:39 (Lam. 3.30)

surittsuk susataram. Tura aints atumin: Warirmesha tsangkatrakta turamataisha, surittsuk ikiastaram,” Jesús timiayi.

Nemasem aneeta timiauri
(Luc. 6.27-28, 32-36)

⁴³ Nunia Jesús ataksha nuiniak: “Yaanchuikia aints ainau chichainak: ‘Ame irutka-murmek aneeta. Antsu nemasmeka suwirpiaku jiista,’ tinu armiyai. Atumka nu tamau antukmiarume. ⁴⁴ Antsu wikia tajarme: Atumi nemase ainau aneetaram. Tura atumin pasé chichartaminamtaisha, Yus yainmakti titaram. Tura atumin suwirpiaku jirminamtaisha pengker awajsataram. Tura atumin jiyatminamtaisha, tura pasé awajtaminamtaisha, nu aints pachisrum Yus seattiarum. ⁴⁵ Tu pujakrumka atumi Apaachiri nayaimpinam puja nuna wakeramuri umiu asaram, nekasrum ni uchiri ainarme. Yus aints ainau mash wait anentau asa, pasé aints ainamunmasha, tura pengke aints ainamunmasha tsa tsantrati tusa tuke tsangkatawai. Tura Yusen umirin ainamunmasha, tura Yusen umirchau ainamunmasha yumi jiturti tusa yumincha tuke akupawai. ⁴⁶ Tura asamtai atumin anenminak pujuinau nuke anekrumningkia, ¿Yus atumin: ‘Nekasrum pengke aintsuitrume,’ turamtatuak? Atsa. Antsu kuikian juu ainau tunau ainayat, niin aneenauncha nunisarang aneenawai. ⁴⁷ Tura atumi weari ainaujaing chichaakrumka ¿Yusen umirchau ainau nuna nangkamasrumek pengker nintimsarmek pujaram? Atsa, Yusen umirchau ainausha ni weari ainaujai chichainawai. ⁴⁸ Tura asamtai atumi Apaachiri nayaimpinam puja nujai metek nekas pengker ataram,” Jesús timiayi. [✠]

6

Pengker aa nu turataram timiauri

¹ Nunia Jesús ataksha nuiniak: “Atumka: Aints ainau wina pengker turamurun wainkarat tu nintimsarmeka pengker aa nuka turuwairap. Tu nintimsaram chikich ainan pengker awajsamin wainiat, atumi Apaachiri nayaimpinam puja nuka atumin pengkerka awajtamsashtinuitrume. [✠]

² “Tura asamtai yuuminak pujuinau yaingkrumsha, chikich ainausha antukarat tusaram etserkairap. Antsu aints ainau wina mash jiisar: Pengke aintsuitme, turutiarat tu nintimsar, iruntai jeansam wajasar tura jinta wekaasar: Yuuminak pujuinaun yayaajai, tusar etserinawai. Antsu wikia nekasan tajarme: Chikich ainau nuna jiisar: Nuka pengke aintsuitai tinan asaramtai, Yuska nu aintsnaka pengkerka awajsashtinuitai. ³ Tura asamtai yuuminak pujuinaun yuumamuri susamsha: ‘Yuumamurin susamjai,’ tutsuk, aints kichkisha ujakairap. ⁴ Antsu takamtaik uukrum chikich ainau yuumamuringkia susataram. Turakrumningkia atumi Apaachiri mash aintsun wainua nuka atum turamuncha wainak, atumin pengker awajtamsatnuitrume,” Jesús timiayi.

Yus seatai nuikiartamu
(Luc. 11.2-4)

⁵ Nunia Jesús ataksha nuiniak: “Tura Yus seakrum, anangkartin ainau Yusen seaina nunisrumka Yuska seairap. Anangkartin ainau wina jiisarat tusar, iruntai jeansam tura aints untsuri wekaatainmasha wajasar Yusen seainawai. Nekasan tajarme: Aints nuna jiisar: Nekas pengke aintsuitai, tu nintimtinan asaramtai, tu seau ainauka Yuska pengkerka awajsachartinuitai. ⁶ Tura Yus seakrum, aints atsamunmasha atumi kanutirincha atumek pujusrum, atumi Apaachiri Yus seatarum. Turakrumningkia atumi Apaachiri mash aintsun wainua nuka atum turamuncha wainak, atumin pengker awajtamsatatrume. [✠]

⁷ “Yus seakrum nangkamrum nukap chichaj pujuirap. Nuka Yusen nekachu ainau tuminawai. Nuka ningki nintimsar: Wikia nukap chichaamtaikia Yuska anturtawapi,

[✠] 5:44 (Rom. 12.14) [✠] 5:46 (1.Juan 4.21) [✠] 5:48 (Deut. 18.13) [✠] 6:1 (Mat. 23.5-7) [✠] 6:6 (Luc. 18.10-14)

tu nintiminawai. ⁸ Antsu nu aints ainau Yusen seainawa nunisrumka Yuska seairap. Atumka seatsrumning, atumi Apaachiri Yus atum yuumamuncha mash nekawai. ⁹ Tura asamtai atumka Yus tu seataram:

Ii Apaachiri Yus,

nayaimpinam pujame nu

ii nekas Apaachirinme. Aints mash amin naarmin pachisar: Ameketme pengkeram turamiarti.

¹⁰ Ame aints inartin kinta wári jeati.

Ame wakeramuram nayaimpinmasha tura nungkanmasha tuke ati.

¹¹ Ju kintaka ii yutairi yuumaji nu sukartusta.

¹² Tura chikich aints

iin pasé awajtamsaru ainau

tsangkurau akurningkia,

ii tunaarisha iincha nunismek tsangkukratkata.

¹³ Tura tunaanum jearai tusam

japkartuam ukukratkiip,

antsu iwianchnumia uwemtikiartukta. Maaketai.

Tu Yuska seataram.✠

¹⁴ “Nuniasha tajarme: Atumin pasé awajtaminausha tsangkurakrumningkia, atumi Apaachiri nayaimpinam puja nusha nunisang atumin tsangkutramratatrum. ¹⁵ Antsu atumin pasé awajtaminausha tsangkurchakrumningkia, atumi Apaachiri nayaimpinam puja nusha atumin tsangkutramrashtatrum,” Jesús timiayi.✠

Ijarmar pujustinun pachis etserkamu

¹⁶ Nunia Jesús ataksha nuiniak: “Ataksha tajarme: Atum Yus seatasrum ijarmarmesha wake mesekairap. Anangkartin ainau: Aints wína jiirsar: Ijarmayapi turutiarat tusar tuminawai. Tura asamtai wikia nekasan tajarme: Chikich aints: Pengke aintsuitai tu nintimursarat tusar, ijarmawar pujuinaunka Yuska pengkerka awajsashtinuitai. ¹⁷⁻¹⁸ Antsu atumka ijarmaram pujakrumsha, aints nekarawai tusaram, atumi yapi nijarum pengker temashmiartaram. Aints ijarmayapi turutiarai tusaram nuka turataram. Chikich aintska nekarminachu wainiat, atumi Apaachiri Yus mash aa nuna nekau asa, atumin pengker awajtamsatratrum,” Jesús timiayi.

Kuikiartin wajastaj tu nintimtsuk asataram timiauri

(Luc. 12.33-34)

¹⁹ Nunia Jesús ataksha chichaak: “Wikia nunasha tajarme: Ju nungkanam warinchu ainau sengka wári mesratin asaramtai, tura warinchusha mengkakartin asaramtai, tura kasa ainau jea wayaawar kasamkartin asaramtai, kuik kiaungkairap. ²⁰⁻²¹ Antsu nayaimpinmaka warinchu atsuinaw asaramtai nuningkia mamurchatnuitrum, tura warinchurmesha mengkakashtinuitai. Tura kasa ainau kasamkatas wayaachartinuitai. Tura asamtai atumka nukap wakerarme nuka atumi nintijai tuke nintimsaram pujarme. Tura asaram ¿itiurak nekasan nayaimpinam jeataj? tu nintimsaram pujustaram,” Jesús timiayi.✠

Aintsu jiingkia kantii kapaawa nunisketai timiauri

(Luc. 11.34-36)

²²⁻²³ Nunia Jesús ataksha nuiniak: “Atumi jiingkia kantii kapaawa nunisketai. Atumi jii pengkeraitmataikia, paan wainmaktinuitrum. Antsu atumi jii paseetmataikia, teenam pujawa nunisketrum. Atum waintrume nuka atumi nintijai nintimu wearme. Atumi ninti pengkeraitmataikia paan nintimratnuitrum. Antsu atumi jiingkia pengker ayat, atumi ninti paseetmataikia, atumsha teenam pujawa nunisrumek nintimuwearme. Atum tu nintimsaram pujakrumka, nekasrum timiá pasé pujarme,” Jesús timiayi.

✠ 6:13 (1.Cor. 10.13) ✠ 6:15 (Mat. 18.23-35; Marc. 11.25-26) ✠ 6:20-21 (Sant. 5.2-3)

Apu jimiar tenap umirkashtinuitai timiauri
(Luc. 16.13)

²⁴ Nunia Jesús ataksha nuiniak: “Apu jimiar metek nintimtsuk pujuinaunka aints kichkisha umirkartatkama tujintinawai. Antsu kichnaka nakitak, kichan aneetnuitai. Tura kichkin umirak kichnaka pachischatnuitai. Tura asantai atumka warincha ainau aneakrumka, aya nuke aneetaram. Tura Yus aneakrumka, aya Yusek aneetaram. Antsu mai aneakrumka nuka yumtinuitai,” Jesús timiayi.

Yus ni uchirin wainui
(Luc. 12.22-31)

²⁵ Nunia Jesús ataksha nuiniak: “Tura asantai tajarme: Warinak yuwataj, tura warinak umurtaj, tura warinak entsartaj tusaram, nuke nintimsarmeka pujusairap. Yus tuke iwiaaku pujustaram tusa, pujutan suramu asa, atumi yutairincha, tura atumi entsatirincha suramsatatrume. ²⁶ Chingki yakí nanamin ainau itiur pujuinawa tusaram nintimratararam. Nuka araknaka arainatsui. Tura arakan juukar jeanmasha ukuinat-sui. Tu pujuinawainiat, atumi Apaachiri nayaimpinam puja nuka ni yuwatniurin suwawai. Yus atumin chingkin nangkamasang nukap anenmau asa ¿atum yuumamunka itiur suramsashting? ²⁷ Tura untsuri kinta pujustaj takurmesha kichik horaksha inangkakchamnawaitrume.

²⁸ “Tura ¿warukaya atumi entsatiri pachisrum: Warinak entsartaj tusaram, nangkam-rumsha nintimsarmesha pujarme? Yangkur ainau nangkamiar yangkurkar wajainau nintimratararam. Nuka takakminatsui. Tura uruchnasha kutaminatsui. ²⁹ Tura apu Salomón yaanchuik pujumia nuka entsatirin timiá pengker entsariat, yangkura nuniskeka timiá pengkerka iwiarmamrachmiayi, tusan tajarme. ³⁰ Nupaa ainau yamaikia shiiram au waininayat, kashin aints charukar jinum epeawartinun wainiat, Yuska shiirman iwiarmamtikin asa, atumnasha yangkuran nangkamasang entsatincha shiirman suramsatnuitrume. Tura asantai ¿warukaya Yuska nekasrum nintimtsurme? ³¹ Tura asaram warinak yuwataj, tura warinak umurtaj, tura warinak entsartaj tusaram napchau nintimtsuk asatararam. ³² Yusen nekachu ainau tuke inaitsuk tu nintimsar pujuinawai. Antsu atumi Apaachiri nayaimpinam puja nuka atumi yuumamurmin mash nekau asantai, tuuka nintimtsuk asatararam. ³³ Antsu Yuse wakeramuri tura ni nekas pengker awajtamsamuri nuwá eemkaram nintimratararam. Turakrumningkia atumi yuumamurin mash suramsatatrume. ³⁴ Tura asantai kinta tsawaatsaing eemkaram: ¿Kashin wi warukatjak? tuuka nintimtsuk asatararam. Kashin yumtin atin wainiatrum, yamaikikia nintimtsuk pujustaram. Chikich kinta yumtin amataikia, Yuska winaka waitui, tu nintimsaram pujustaram,” Jesús timiayi.✠

7

Chikich ainau pachisrum paseeka chichartsuk asatararam
(Luc. 6.37-38, 41-42)

¹ Nunia Jesús ataksha nuiniak: “Yus wínaka wait wajaktiniun surusai tusaram, chikich aints pachisrum pasé chichakairap. ² Atumka chikich ainau pachisrum pasé chichaakrumningkia, Yuska atumin wait wajaktiniun suramsatnuitrume. Tura atum chikich ainau pengker awajkurminkia Yuscha nunisang atumin pengker awajtamsatatrume. ³ Tura chikich aints tunaun jumchik takau asantai, atumka tunau nukap takau-tiatrumsha ¿waruka nu aintcha tunaawaitai tarume? Tunau pachisrum chichaakrumka, aints ni jiin tsetsee juun engketu wainiat, nunaka waintsuk chikich aintsu jiin tsetseen tuupchin engketun wainak, nuna jiij pujurua tumawaitrume. ⁴ Tura atumi tunaari nukap aa nu nintimtsuk pujayatrum ¿chikicha tunaari jumchik aa nuka pachisrumsha atumsha itiur chichastarmek? Tu pujakrumka aints ni jiin tsetsee juun engketun wainiat, nunaka waintsuk, chikich aintsu jiin tsetseen tuupchin engketun wainak: “Tsetsee

✠ 6:34 (1.Ped. 5.7)

jiimin engketun ashiitjai. Wait aneam tsangkatrukta,' tu chichaawa tumawaitrume.
⁵ Tu chichaakrumka chikich ainau anangkum: 'Auka péngke aintsuitai turutiarat,' tu nintimsaram pujarme. Tura asaram nuwá eemkaram atumi tunaari nukap aa nu inaisaram, nuniangka paan nintimraram, chikich aints chicharkum: Tunaari jumchik aa nuna inaisati tusaram chichastinuitrume. Tu pujakrumka aints nuwá eemak ni jiinian tsetsee juuntan ashii japa, nunia paan jiimias, chikich aintsu jiinia tsetsee tuupchin ashiawa tumawaitrume.

⁶ "Nuniangka ataksha tajarme: Aints Yuse chichamen nakitinauka Yuse chichamengka ujakairap. Antsu nu aints ainau Yuse chichame ujaakrumningkia, nuka atumin kajertamkatnuitrume. Nu aints ainau yawaa kajeewa nunisarang ainawai. Yawaa kajeu yutan pengker aa nunaka suamaitiat, aintsun esaitas wakerawai. Tura Yuse chichamen antutan nakitinau kúchia nunisarang ainawai. Kúchi nintinchau asar, shaakun najarar tsurungmin ainawai. Tura asantai kúchi ainau shaak akik aa nuka susashtinuitai," Jesús timiayi.

Yus tuke seataram timiauri
(Luc. 11.9-13;6.31)

⁷⁻⁸ Nunia Jesús ataksha chichaak: "Aints warinak seamina nunaka juwinawai. Tura warinak eaina nunasha waininawai. Tura winájai tinaunaka waitin uratinawai. Tura asantai tuke Yus seataram. Turakrumningkia atumi yuumamurmin suramsatnuitrume. Tura Yuse wakeramurin nekaatasrum wakerakrumningkia, Yuska nunasha nekamtikramatnuitrume. Tura Yus pujamunam jeatasrum wakerakrumningkia, Yuska waitin uratramtinuitrume.

⁹ "Nusha nintimrataram. ¿Yaachia uchiri yaparak yurumkan seamaitiat kayan sua?
¹⁰ Tura ¿yaachia uchiri namakan seamaitiat napin sua? ¹¹ Atumka tunau ayatrumek, nekasrum atumi uchiri pengker aa nuke suwarme. Atumka Yus seakrumningkia ¿atumi Apaachiri nayaimpinam puja nu nekas pengker asa, itiur suritramkating?✠

¹² "Aints ainau wína pengker awajtusarat tusaram nu wakerau asaram, atumsha nunisrumek chikich aints ainausha pengker awajsataram. Nu chichamnaka Moiséscha, tura yaanchuik Yuse chichame etserin puju armia nusha mash umiktaram tusar aararmiayi," Jesús timiayi.✠

Waiti tuupchin pachis etserkamuri
(Luc. 13.24)

¹³⁻¹⁴ Nunia Jesús ataksha chichaak: "Wikia ataksha tajarme: Yusnum pujustasrum wakerakrumka, waiti tuupchinam wayaatararam. Waiti tuupich asantai, aints ainau nuni wayaawar, jinta tsererchinam tuke iwiaaku pujustinum weenauka untsurinchuitai. Antsu chikich waiti wangkaram asantai, aints nuni wayaawar, tungkajin jintanam wait wajaktinum jeartinka untsurintai," timiayi.✠

Anangkartin ainaun pachis etserkamuri
(Luc. 6.43-44)

¹⁵ Nunia Jesús ataksha chichaak: "Wikia nunasha tajarme: Wait chichaman etserin ainau nangkamiar: Wikia Yuse chichamen etsernuitjai tinauka wina anangkruwai tusaram aneartaram. Nuka uwijaya nunisarang winitraminayat, yawaa kajeewa nunisarang atumin mestamrartas winitramiartinuitai.✠ ¹⁶ Atumka numi neré jiisrum: ¿Warí numita? tusaram nekaatnuitrume. Tura asaram nu aints ainau turamurisha jiisrum: ¿Warí aintski? tusaram nekaatnuitrume. Numi jangkirtincha jiisrum, uva yurangkenka juukchamnawaitrume. Tura higo ainau narajnumianka juukchamnawaitrume. ¹⁷ Numi nekas pengker ainia nuka neren pengkeran nerenawai. Antsu numi pasé ainau neren paseen nerenawai. ¹⁸ Tura numi pengker ainauka paseenaka nerenatsui. Tura numi pasé ainauka pengkernaka nerenatsui. ¹⁹ Tura numi nere pasé amataikia, aints ainau numin

✠ 7:11 (Juan 14.13-14;15.7,16;16.23-24) ✠ 7:12 (Luc. 6.31) ✠ 7:13-14 (Sal. 1.6) ✠ 7:15 (1Juan 4.1-3)

ajakar kanawen jinum epeenawai. ²⁰ Tura aints ainau numi neren jiisar: ¿Warí numiki? tusar nekainawa nunisrumek atumka aints ainau turamurisha jiisrum: ¿Warí aintski? tusaram nekaatnuitrume,” Jesús timiayi.✠

Aints mash nayaimpinmaka jeachartinuitai timiauri
(Luc. 13.25-27)

²¹ Nunia Jesús ataksha chichaak: “Wikia nunasha tajarme: Aints ainau nangkamiar: ‘Apurua, Apurua,’ turutinauka mash Yuse pujutirin nayaimpinmaka jeachartinuitai, antsu wina Apaachir nayaimpinam puja nuna wakeramurin najanin ainauka ni pujutirin jeartinuitai. ²² Nungka amukatin kinta jeamtai, aints untsuri wina chichartinak: ‘Apurua, Apurua, iikia amin pachisar ami chichamim etsernuyaji, tura ami naaram pachisar aintsnumia iwianch ainau jiirnuyaji. Tura ami kakarmarmijai wainchati takatcha takakmasmijai,’ turutiartinuitai. ²³ Tura wainiatnak wikia ayaakun: ‘Atumin pengké wainchawaitjarme. Tunau takau ainautiram, winiangka jiinkiram wetaram,’ titinuitjai,” Jesús timiayi.✠

Jea jimiar jeamkamun pachis etserkamuri
(Marc. 1.22; Luc. 6.47-49)

²⁴ Nunia Jesús ataksha chichaak: “Wikia nunasha tajarme. Aints wina chichamrun antuk, tura miatrusang umirtak pujauka aints jea jeamtan nekau nungka pisu amanum jea jeamkamua tumawaitai. ²⁵ Tura yumi nukap jituriat, tura entsasha nujangkruayat, tura nasesha kakarman nasentiat, nu jea nungka pisunam jeamkamun asamtai, yumpung-tatkama tujinkatnuitai. ²⁶ Tura aints wina chichamrun antukiat, umirtutsuk pujauka aints nintinchau jean yaikminam jeamua tumawaitai. ²⁷ Tura yumi nukap jitak, entsasha nujangkrak, tura nasesha kakarman nasentak nu jeanka pukuuktinuitai. Turamtai nu jeaka mengkakatnuitai,” —timiayi.

²⁸⁻²⁹ Tura chichas umisamtai, Moisésa chichame nuikiartin ainaujai metekchau, antsu Yuse kakarmarijai nuikiartau asamtai, aints Jesús a chichamen antukaruka nukap nintimrarmiayi.✠

8

Kuchapruku tsuwarmauri
(Marc. 1.40-45; Luc. 5.12-16)

¹ Jesús nu muranmaya wangkenmatai, aints ainau untsuri nemariarmiayi. ² Turinai aints kuchapruku tari, Jesús wekaamunam tikishmatar seak:

—Apuru, ame wakerutakmeke wina tsuwaramnawaitme, —timiayi.

³ Tamati Jesús ni uwejejai kuchapruku namangken takas:

—Ja ai, wakerajme. Pengker wajasta, —timiayi. Tamati nu tamaujai metek tsaar pengker wajasmiai. ⁴ Turamtai Jesús chicharak:

—Antukta. Ami turunamuram pengké etserkaip. Antsu sacerdotenam weta. Nuni weme namangkem pengker tsuwamaru asam inakmasta. Tura aints ainau mash pengker wajasmaurun nekaawarat tusam, Moisés tímia nunismek turata, —timiayi.✠

Apu inatiri tsuwaramuri
(Luc. 7.1-10)

⁵ Tura ukuki, Capernaum yaktanam jeamtai, Romanmaya kapitán tari, Jesús an seak:

⁶ —Apuru, wina inatir jaawai. Pengké nantakchamin kakarman najaimiak jearun juutu tepawai, —timiayi.

⁷ Tamati Jesús chicharak:

—Wikia tsuwartasan winitatjai, —timiayi.

⁸⁻⁹ Tamaitiat kapitán ayaak:

—Apuru, wikia judíochu asan, ameka wína jearun wayaata tichamin nintimjai. Wikia suntara apuri umirnuítjai. Tura wikia suntar ainaun inau asan, kichan: Weta, tama nusha weawai. Tura kichan: Winiti, tama nusha winawai. Tura wina inatirun takatan inamka, miatrusarang umirtinawai. Tura asantai amesha nunismek apu asam, juni wajasam chichaamning inatirka tsaartatui, —timiayi.

¹⁰ Tamati Jesús nuna antuk, nukap nintimias niin nemarinaun chicharak:

—Nekasan tajarme. Ju aintsua nunisarang Yus nekas tujinkachuitai tinaunka kich-isha wainkachuitjai. ¹¹ Nunasha tajarme: Israel ainau untsuri tsaa taakmanumanini, tura tsaa jeamunmaninisha Yuse pujutirin nayaimpinam kaunkar Abrahamjai, tura Isaacjai, tura Jacobjaisha iruntrar yuwaartinuitai. ¹² Antsu Israela weari ainau Yuse pujutirin wayaamin ainayat, wína nekasampita turutchau asar, nekasar teenam japar ukukmiawa nunisarang wait wajakartinuitai. Tura asar nuni juutinak, nain esainiar katertinak matsamiartinuitai, —Jesús timiayi.✠

¹³ Tura kapitanin chicharak:

—Jeemin yamaikia waketkita. Ame wína inatir nekasampi tsuwartinuitme turutu asakmin nuke ati tajame, —Jesús timiayi. Tamati ni tamaujai metek kapitani inatiri pengker wajasmiayi.

Jesús Pedro tsatsarin tsuwarmauri
(*Marc. 1.29-31; Luc. 4.38-39*)

¹⁴ Nunia Pedro jeen waya, Jesús Pedro tsatsarin tsuweak peaknum tepaun wainkamiayi. ¹⁵ Tura nu nuwan wainak Jesús uwejen achikiam, tsuweamurin michatramiayi. Tura michatar wajaki, irasartas taarun yurtan nangkamamiayi.

Jau ainaun untsuri tsuwarmauri
(*Marc. 1.32-34; Luc. 4.40-41*)

¹⁶ Tsaa jeamtai iwianchrintin ainaun, tura jau ainauncha untsuri Jesúsnum itaarmiayi. Tura itarim Jesús aya chichasang iwianch ainaun jiikmiayi. Tura jau ainau itamuncha mash tsuwarmiayi. ¹⁷ Yuse chichame etserin Isaías yaanchuik chichaak: “Ii pimpirmaurincha tura ii najaimiamurincha ningki jurutramkimiaji,” tímia nuna umiktas Jesús aints ainaun tsuwarmiayi.✠

Jesúsán nemartan wakerinaun chicharkamuri
(*Luc. 9.57-62*)

¹⁸ Aints ainau timiá untsuri tentakaram, Jesús ni nuiniatiri ainaun akatar akupak: —Tumajin katingmi tusaram kanu umistaram, —timiayi. ¹⁹ Tamati Moisésa chichame nuikiartin tari Jesúsán chicharak:

—Nuikiartinu, ame tuning wekaasatme nunisha amin nemarsatjame, —timiayi.

²⁰ Tamati Jesús ayaak:

—Kujancharu ainau waanam kaninawai. Tura chingki ainausha keemtairin keemsar kaninawai. Antsu wikia Yus akupkamutiatak, aints ayatun kanurmintruksa atsawai, —timiayi.

²¹ Nunia chikich nemarnuri Jesúsán chicharak:

—Apuru, jeemin waketkita tusam tsangkamrukta. Antsu wína apar jakamtai, iwiarsan umisan nuniangka amincha nemarsatjame, —timiayi.

²² Tamati Jesús ayaak:

—Atsa, wina umirtukcharu ainau jakawa nunisarang pujuinaw asar, ni weari jakaram-tai iwiarsarti. Antsu ameka yamaik wína nemartusta, —timiayi.

Kucha tamparaun miaku awajsamuri
(*Marc. 4.35-41; Luc. 8.22-25*)

²³ Nunia ukuki Jesús kanunam engkemramtai, ni nuiniatiri ainau nijai tsaniasar engkemawar kuchan katiniarmiayi. ²⁴ Tura katinai nase kakarman nasenmiayi. Timiá

✠ 8:12 (Mat. 22.13;25.30; Luc. 13.28-29) ✠ 8:17 (Isa. 53.4)

nasenmatai, yumi kanunam yaranak piakmiayi. Turamaitiat Jesúska kanur tepemiayi.

²⁵ Kanuramtai Jesúsán shintinak:

—Apurua, uwemtikiarturta. Ukantatji, —tiarmiayi.

²⁶ Tinamtai Jesús ayaak:

—¿Waruka timiatcha shamarme? ¿Waruka Yus nekasampita tutsuksha? —timiayi.

Nunia nantaki nasencha tura kucha tamparauncha chicharkamiayi.

Turamtai nasesha, tura kuchasha miaaku wajasmiai. ²⁷ Turamtai kanunam engkem-rar pujuinau nintiminak:

—¿Ausha warí aints asamtaiya nasesha tura tampaasha umirinawa? —tunaiarmiayi.

Iwianch jiikir kuchinam engkeamuri

(*Marc. 5.1-20; Luc. 8.26-39*)

²⁸ Nunia Jesús ni nuiniatiri ainaujai kuchan katingkar, tumajin jear Gadara nungkanam nujamkar kanunmaya jiinkiarantai, jimia aints jakau iwiartainumia jiinkiar Jesúsnum winiarmiayi. Nu mai iwianchrintin timiá kajeu asamtai, aints ainau nuke nangkamata nasha shamarmiayi. ²⁹ Tura asaramtai nu jimia iwianchrintin kakarar untsuminak:

—Jesúsa, Yuse uchiriya ¿waruka iincha waitkartuktasmesha winame? Ii wait waktin kinta jeatsaing, ¿waruka iincha wait waktinnum akupkartuktasmesha junisha winame? —tiarmiayi.

³⁰ Tinamtai arakchichu kúchi untsuri shushungminak wajaarmiayi. ³¹ Turinamtai iwianch ainau nu aintsu namangkenia Jesúsán seainak:

—Ju aintsnumia jikratkumka, au kuchinam engkematararam tusam akupkartukta, —tiarmiayi.

³² Tinamtai Jesús ayaak:

—Ayu, nuni engkematararam, —tamati iwianch ainau nu aintsnumia jiinkiar kuchinam engkemawaramtai, kúchi ainau wakenam mash pisarar, kuchanam ayangkar kajingkiarmiayi.

³³ Tuminamtai kuchi wainin nuna wainkar, shamkar ampukiar yaktanam jear, ni wainkamurin, tura iwianchrintin turunamurinja mash etserkarmiayi. ³⁴ Tura etserinamtai, nunia aints ainau mash ni yaktarinia jiinkiar, Jesúsnum jear niincha jiisar chicharinak:

—Wait aneam, ii nungkarinia jiinkim weta, —tusar Jesúsán searmiayi.

9

Pimpurun tsuwarmauri

(*Marc. 2.2-12; Luc. 5.17-26*)

¹ Tu tinam Jesús nunia aints ainaun ukuki, kanunam engkema tumajin kating ni pujamu yaktanam wemiayi. ² Tura nuni jeantai aints pimpurun Jesús pujamunam itaarmiayi. Tura pimpurun itaarmia nuka: Jesús nekasampi tsuwaratatua, tu nintiminau asaramtai, Jesús nuna nekaa pimpurun chicharak:

—Natsachi, napchauka nintimtsuk asata. Tunaarumka yamaikia tsangkuramuitme, —timiayi.

³ Tamati Moisésa chichame nuikiartin ainau nu chichaman antukar napchau nintiminak: “¿Juka nangkami Yusetjai tumamtsuash? Nu titinka paseetai,” tu nintimrarmiayi.

⁴ Tu nintimraru asaramtai, Jesús nuna nekau asa chicharak:

—¿Waruka timiá napchau nintimsarmesha pujarme? ⁵ ¿Warí timiá yumtinuita? ¿Tunaarum tsangkuramuitme titin yumtinkai? Antsu nu turachkursha pimpurun: ¿Wajakim wekaasata titinka yumtinkai? ⁶ Wikia aints ayatnak Yus akuptuku asamtai, ju nungkanmaya ainau tunaarin tsangkuratnuitjai. Tura wi turamnawaitjai tusan yamaikia nekamtikiatjarme, —timiayi.

Tura pimpurun chicharak: —Amin tajame:

Nantakim tampuram jukim jeemin waketkita, —timiayi.

⁷ Tamati pimpiru wajaki ni jeen waketkimiayi. ⁸ Tura waketkiamtai Yus ni kakarmarin aintsun susau asamtai, nuna wainkaru asar shaminak: Yus juuntaitai tiarmiayi.

Jesús Mateon untsukmauri
(*Marc. 2.13-17; Luc. 5.27-32*)

⁹ Jesús nunia jiinki jinta weak winasha waitkamiayi. Wikia Mateowaitjai. Wikia apu akupkamu asan, apu akitinam keemsan, aints ainau kuikiarin apun susatasan juyajai. Wi turamtai Jesús nangkamak wína waitak:

—Wína nemartusam wina nuiniatir ata, —turutmiayi.

Turutmatai wikia: Ayu tusan wajakin Jesúsán nemarkamijai.

¹⁰ Tura asan wi Jesúsán: Yuwita tusan wína jearun jeemiajai. Turamtai wína jearun yuwinak pujuinai, Jesúsjai tsaniasar kuikian juu ainau untsuri, tura judío umirkatin chichaman umikchau ainausha, tura Jesúsá nuiniatiri ainausha nijai iruntrar yuwaarmi-ayi. ¹¹ Yuwaar umisaramtai, fariseo ainau wína jearun Jesús iruntramunam yuwaun wainkaru asar, Jesúsá nuiniatiri ainaun iniinak:

—¿Atumin nuitamin warukaya kuikian juu ainaujai iruntrar yuwawa? Tura ¿waruka judío umirkatin chichaman umikchau ainaujai iruntrarsha yuwawa? —tiarmiayi.✠

¹² Tu tinam Jesús nuna antuk aimiak:

—Aints pengker pujuinauka tsuwakratnunka yuuminatsui. Antsu najaiminak pujuinauka tsuwakratnun yuuminawai. ¹³ Wikia pengke aintsuitjai tinaunka: Nintimaurum yapajiaram titasnaka tachawitjai, antsu tunaawitjai tinaun: Nintimaurum yapajiaram Yus umirkataram titasan tawitjai. Tura asamtai atumsha werum Yuse chichame aarmawa nu nekaaram, nunaka taku tawai tusaram nuimiartaram. Nu chichamka nuwaitai. Yus chichaak: ‘Tangku ainauka maaram wina surustaram tusanka wakeratsjai. Antsu aints ainau wait anentraram tusan wikia wakerajai,’ timiayi. Tu aarmawaitai, —Jesús timiayi.✠

Ijarmar pujustin pachisar Jesúsán iniasmauri
(*Marc. 2.18-22; Luc. 5.33-39*)

¹⁴ Tura Imiakratnu Juanku nuiniatiri Jesúsán jeariar iniinak:

—Iikia Juanku nuiniatiri ainautikia fariseo ainaujai metek Yus nintimrami tusar ijarmar yutsuk pujaji. ¿Antsu ami nuiniatirmeka waruka jarminatsua? —tiarmiayi.

¹⁵ Tu iniinam Jesús aimkatas nuikiartamun etserkamiayi. Tura etserak:

—Aints yamai nuwan nuwatak ni amikrijai tsanias pujamtai ¿ni amikri ijarmawar wake mesekar pujusarminkai? Atsa, antsu aints yamai nuwan nuwatkaun jukiartin kinta jeamtai, nuniangka ni amikri wake mesekar ijarmawartinuitai. Wikia wína nuiniatiri ainaujai iruntran pujamtai, nuka jarminatsui. Antsu wína jurukiamtai, nuniangka ijarmawartinuitai.

¹⁶ “Chikich chichamsha antuktaram: Wejmak arut jaankamtai, ju nungkanam aints kichkisha tarachin yamarman nujtuk aparchamnawaitai. Nu turamka nunia nijaram, yamaram tarach setur tuupich wajayi. Tura asa arutri chingkiana, nuna nangkamasang nukap jaankatnuitai. ¹⁷ Umuti vino tutai yamai kariauka nuwap aparmau mamurunam yarakchatnuitai. Nu turamka, vino kariak wapakrak nuwap aparmaun pujkatnuitai. Tura pujak nuwap aparmau mesertnuitai, tura vino ukaratnuitai. Antsu vino yamaram aa nu nuwap najanamu yamarmanam kantsejai kantsermanum yaktinuitai. Turamka vino yamaram ayat, nuwapen pujkashtinuitai, tura vino ukarashtinuitai,” Jesús timi-ayi.✠*

Jairo nawantri inankimuri tura chikich nuwasha tsuwarmauri
(*Marc. 5.21-43; Luc. 8.40-56*)

¹⁸ Jesús chichaak pujai, judío juuntri taa, Jesúsán wainak tikishmatramiayi. Tura seak:

✠ 9:11 (Luc. 15.1-2) ✠ 9:13 (Mat. 12.7) ✠ 9:17 (Josué 9.4) * 9:17 (Nu nuikiartutai chichaman etserak, yamaram chichaman wi nuiniarja nunaka arut chichamjaingkia pachimrachminuitai taku timiayi.)

—Nawantur yamai jakaun ukukjai. Tura wainiatum ame winim uwejmijai ni anting-maka iwiaaku pujustatui, —timiayi.

¹⁹ Tamati Jesús: Ayu tusa wári wajaki, ni nuiniatiri ainautijai tsaniasar judío juuntrijai wemiaji. ²⁰ Jinta wearin nuwa doce (12) musach numpan nangkantsuk pujumia nuka Jesús a wejmakrin antingtas tuntupenini winitmiayi. ²¹ Tura wejmakrin antingnaka pengkerapi wajasainja, tu nintimias wejmakrin antimiakmiayi. ²² Tura antingkiem Jesús pajas jiis nuwan wainak:

—Nawantru, napchau nintimtsuk asata. Ameka wína nekasampita turutu asam pengker wajasume, —timiayi.

Nu tamaujai metek nu nuwaka tsaarmiayi.

²³ Tura pengker wajasamtai, Jesús judío juuntri jeen jea, aints nuni pujuinau wake mesekar nangkun umpuinaun wainak, tura untsuminak juutinak pujuinaun wainak, ²⁴ nu aints ainaun chicharak:

—Mash jiinkitaram. Nuwachikia jakachi, antsu kanuri, —timiayi.

Tamati aints ainau: “Nangkami tawai,” tusar wishikiarmiayi. ²⁵ Antsu Jesús aints ainaun jiiki nuwawach tepamunam waya uwejen achirkam nuwachikia nantakmiayi. ²⁶ Nuwawach jaka nantakin asamtai, nu nungkanmaya ainau nuna pachisar untsuri etserkarmiayi.

Jesús wainmichun jimiaran tsuwarmauri

²⁷ Tura nuwachin inanki ukuki, jinta wekai aints wainmichu jimiar Jesús an nemarsar weenak:

—Apu Davidta weariya, wait anengkratkata, —tu untsuminaun antukmiayi.

²⁸ Tu untsuminaun wainiat Jesús jeanam wayaamiayi. Tura jeanam wayaamtai, wainmichu irunu nemarkaram Jesús chicharak:

—¿Atumka nekasampi iincha pengker tsuwarmartatji turutrume? —tu iniam aiminak:

—Ja ai, Apuru, —tiarmiayi.

²⁹ Tinamtai Jesús nu aintsu jiin antintak chicharak:

—Atum nekasampita turutu asaram, pengker wainmaktaram, —timiayi.

³⁰ Tamati pengker wajasar paan wainmakaramtai, Jesús akatar akupak:

—Pengké kichkisha etserkairap, —timiayi.

³¹ Tamaitiat jeanmaya jiinkiar, nu nungkanmaya ainaun mash Jesús a turamurin pachisar etserkarmiayi.

Aints chichachun tsuwarmauri

³² Nunia jiinkiaramtai, aints chichachun iwianchrukun Jesúsnum itaarmiayi. ³³ Tura itaaramtai Jesús iwianchin jiiki akupkau asamtai, nu chichachu aints chichatan nangkamiami. Tura asamtai aints ainau nuna wainkar nintimrar:

—Israel nungkanam pujautikia nu turamuka kichkisha wainchawaitji, —tiarmiayi.

³⁴ Tinau waininayat fariseo ainau chichainak:

—Iwianchi apuri kakarmarijai iwianchin jiiki akupawai, —tiarmiayi.✠

Jesús aints ainaun wait anentramuri

³⁵ Jesús wekaa wekaaka chikich chikich yakat juunnumsha, tura tuupchinmasha iruntai jeanam waya, nuni aints ainaun nuiniarmiayi. Tura Yus aints ainaun tu inartinuitai tusa, Yusnum uwemratin chichaman etserkamiayi. Tura sungkurintin ainaun, tura najaiminak pujuinauncha tsuwarmauri.✠

³⁶ Tura uwijaya nunisarang pujuinau asaramtai, uwija wainin atsawa nunisarang wait wajainauncha, tura kuntuchu nintimsar pujuinauncha Jesús wainkau asa, wait anentramiayi.✠

³⁷ Tura aints ainaun wait anentak ni nuiniatiri ainautin chichartamak:

✠ 9:34 (Mat. 10.25;12.24; Marc. 3.22; Luc. 11.15) ✠ 9:35 (Mat. 4.23; Marc. 1.39; Luc. 4.44) ✠ 9:36 (Marc. 6.34)

—Ju aints ainau nekasar trigo tsamakua nunisarang ainawai. Tura juuktin kinta jeau waininayat, juukartin jumchik ainawa nunisarang Yuse chichame etserin jumchik ainawai. ³⁸ Tura asamtai Yus ni chichamen etserin ainaun akupkati tusaram Yus seataram, —Jesús turammiaji.✠

10

Jesús ni nuiniatirin inaikiamuri

(*Marc. 3.13-19; Luc. 6.12-16*)

¹ Tura Jesús ni nuiniatiri doce (12) ainautin untsurmak: “Iwianchrintin jiirkiram akupkataram, tura sungkurintin ainausha, tura najaiminak pujuinausha mash tsuwartaram,” tusa ni kakarmarin suramsamiaji.

² Jesúsua nuiniatiri ainautikia ii naaringkia nuwaitji: Simón chikich naari Pedron Jesús inaikiamiayi, tura Pedro yachí Andrés, tura Zebedeo uchiri Santiago, tura Santiago yachí Juan, ³ tura Felipe, tura Bartolomé, tura Tomás, tura wi, kuikian juyaja nuwaitjai. Tura Alfeo uchiri Santiago, tura Tadeo, ⁴ tura Simón yaanhuik mesetan najanin amia nu, tura Judas Iscariote, Jesúsuan ukunam anangka surukmia nuwaitai. Ainchik: Wi akupkatnuitjarne tusa Jesús inaitamkamiaji.✠

Jesús ni nuiniatirin akatar akupkamuri

(*Marc. 6.7-13; Luc. 9.1-6*)

⁵ Tura Jesús ni nuiniatiri doce (12) ainautin chichartamak:

“Judíochu nungkarin wekaasairap. Tura Samaria yaktanmasha weerap. ⁶ Antsu Israel ainau uwija mengkakawa nunisarang pujuinamunam wína chichamur etserkatasrum wetaram. ⁷ Tura werum: Yus yamaikia nayaimpinmaya aints ainaun inartin kinta jeayi tusaram etserkataram. ⁸ Turaram jau ainausha tsuwartaram. Tura jakau ainausha inankitaram. Tura kuchaprintin ainausha tsuwartaram. Tura iwianchrintin ainausha jiirkitaram. Yuse kakarmari akikchaujai jukin asaram akikchaujai turataram.

⁹ “Tura jinta weakrum, kuik engkearam jukirap. Kurisha, tura jiru kuikiasha jukirap. ¹⁰ Tura pitakrumsha jukirap. Tura wejmak kichik entsarum wekaasataram. Tura sapatrumsha takutsuk tura waisha takutsuk aintsarmek wetaram. Atumka Yuse chichame takau asakrumin, aints ainau atumnasha ayurtamatnuitrume.✠

¹¹ “Tura asaram chikich yaktanam werum: ¿Yaachia juni pengke nintintin puja? tusaram nekaataram. Tura nekaaram nu yaktanmasha pujusrum, ¹² nu aintsu jeen wayaaram nuning tuke pujustaram. ¹³ Tura asakrumin nu jeanam pengke nintintin pujamtaikia atum: ‘Pengker pujustaram,’ tarume nunisang Yus nu aints ainaun pengker awajsatnuitai. Antsu nu jeanam pasé nintintin atumin pengker awajtamtsuk pujuinamtaikia: Yus atumin pengkerka awajtamsashtatui titaram. ¹⁴ Tura atumin: Juni wayaawairap turaminamtaikia, tura atumi chichamen antutan nakitinamtaikia, nu jeanmayangka tura nu yaktanmayangka jiinkiram ukuktaram. Tura ukuakrum atumi nawe japirum: Nu aints ainaun Yus jiisti tusaram, aints ainau mash nekamtikiataram.✠

¹⁵ “Nekasan tajarme: Wait wajakartin kinta jeamtai, yaanhuik Sodoma yaktanam pujuinau, tura Gomorra yaktanam pujuinausha tunau asar, wait wajakarmia nuna nangkamasarang nu yaktanam pujuinausha nukap wait wajakartin ainawai,” Jesús turammiaji.✠

Yusen umirkaru ainaunka nakitartinuitai timiauri

¹⁶ Nunia ataksha iin chichartamak: “Aneartaram. Wisha atumin uwijaya nunisrumek arumin, juun yawaa pujamunam akupajrume. Tura asaram napia nunisrumek nintip ataram. Tura yapangma nunisrumek chikich ainau pasé awajtsuk asataram.✠ ¹⁷ Aints ainau atumin achirmakar, apu ainamunam surutmakartinuitai. Turinamtai iruntai jea ainamunam numijai awatamrartinuitai. Tura asaramtai wainkataram. ¹⁸ Tura wína

✠ 9:38 (Luc. 10.2) ✠ 10:4 (Hech. 1.13) ✠ 10:10 (1.Cor. 9.14; 1.Tim. 5.18) ✠ 10:14 (Hech. 13.51-52)

✠ 10:15 (Gén. 19.24-28; Mat. 11.24; Luc. 10.4-12) ✠ 10:16 (Luc. 10.3)

umirtin asakrumin, romano apuri ainausha, tura atumi apuri ainausha atumin wait wajaktiniun suramsarat tusar juramkiartinuitai. Tura asaramtai judío apuri ainau, tura judíocho apuri ainausha wína pachitsaram ujaktinuitrume. ¹⁹Tura wína aintsur asakrumin atumin achirmakar, apu ainamunam juraminamtaikia ¿itiurak chichaktaj? tura ¿warintuk aiktaj? tuuka nintimrairap. Antsu aneachmau Yus chichamtikramkatatrume. ²⁰Tura asaram atumka chichaakrumsha atumek nintimsarmeka chichakchatatrume, antsu atumi Apaachiri Wakani atumin chichamtikramkatatrume.✠

²¹“Aints ainau ni yachiin waininayat: Maawarat tusar surukartinuitai. Nunia uchirtin ainausha ni uchirin waininayat: Maawarat tusar surukartinuitai. Nuniasha chikich aints ni aparin waininayat: Maawarat tusar surukartinuitai. ²²Atumka wina aintsur asakrumin, aints ainau atumin mash kajertamartinuitai. Antsu tunaun nepetkaram jakarmeka, atumka tuke Yusnum pujustinuitrume.✠

²³“Chikich yaktanmaya ainau atumin mantamawartas wakerutminamtaikia, chikich yaktanam tupikiaktaram. Atumka Israel yakat ainamunam wína chichamur etserat umiatsrumning, wisha aintsutiatnak Yus akupkamu asan ataksha taratnuitjai. Wi taja nuka nekasaintai.

²⁴“Nuniasha tajarme: Aintsu nuiniatiri ni nuikiartinaka nangkakashtinuitai. Tura aintsu inatiri ni inamurin nangkakashtinuitai. ²⁵Aints nuikiartiniun nakitinamtaikia, ni nuiniatirincha nakitrartinuitai. Tura aints inakratnuncha nakitinamtaikia, ni inatiri ainauncha nakitrartinuitai. Tura asamtai wína pachitsar aujmatrinak: Iwianchi apurintai tinauka wína umirtin ainauncha nunisarang aujmatinak pasé chichasartinuitai,” Jesús turammiaji.✠

¿Yaachia shamkatnuitji? timiauri
(Luc. 12.2-7)

²⁶Nunia Jesús ataksha iin chichartamak: “Tura asamtai aints ainau shamkairap. Yamai ukar chichakmauncha ukunam paan nekaawartinuitai. Tura yamaikia aintsu turamurin nekaachminun waininayat, ukunam paan nekaawartinuitai.✠

²⁷“Wikia kashi atumin shishkamsan nekamtikiamiajrume nuka, aints ainau mash antukarti tusaram, tsawaisha paan etserkataram. ²⁸Aints atumin mantaminamtaisha shamkairap. Atumi namangkenka mantaminayat, atumi wakaninka maachartinuitai. Antsu Yuska ni umirchau ainau namangkencha, tura wakanincha ji kajintrashtinum tuke chumpiatin asamtai, aya Yusek shamkataram.

²⁹“Atumka chingki jimiarchik kichik jiru kuikijai sumakminuitrume. Chingki timiá akikchau sumakminun wainiat, atumi Apaachiri surimiamtaikia, chingki kichkisha nungká ayaarchamnawaitai. ³⁰⁻³¹Tura Yuska atumin chingkin nangkamasang timiá anenmau asa, atumi intashi warutmak awa tusa nekapmarmawaitai. Tura asamtai atumin mantamawartas wakerutminamtaisha shamtsuk asataram,” Jesús turammiaji.

Wikia Jesúsawaitjai titaram timiauri
(Luc. 12.8-9)

³²Nunia ataksha iin chichartamak: “Nunasha tajarme: Aints ainau wína pachitsar aints antinamunam: Wikia Jesúsawaitjai taunka wisha nunisnak wína Apaachirun nayaimpinam pujaun ujaakun: Juka wína aintsruitai titinuitjai. ³³Antsu aints chikich ainau antinamunam wína pachitsar: Wikia Jesúsawaitjai taunka wisha nunisnak wína Apaachirun nayaimpinam pujaun ujaakun: Juka wína aintsruitai titinuitjai,” Jesús turammiaji.✠

Jesús aints ainaun akankatnuitjai timiauri
(Luc. 12.51-53;14.26-27)

✠ 10:20 (Marc. 13.9-11; Luc. 12.11-12;21.12-15) ✠ 10:22 (Mat. 24.9; Marc. 13.12-13; Luc. 21.16-19) ✠ 10:25 (Mat. 9.34;12.24; Marc. 3.22; Luc. 6.40;11.15) ✠ 10:26 (Marc. 4.22; Luc. 8.17) ✠ 10:33 (2.Tim. 2.12)

³⁴ Nunia Jesús ataksha iin chichartamak: “Atumka wína pachitsaram: Ju nungkanam pujuinau maanitsuk pengker nintimtunis arangan pujusarat tusa tamiayi, tuuka nintimsairap. Wikia ju nungkanam tau asamtai, aints ainau maanikiartinuitai. ³⁵ Wi tau asamtai, aints ni aparijai kajernaikiartinuitai, tura nuwasha ni nukurijai kajernaikiartinuitai. Tura najatisha ni tsatsarijai kajernaikiartinuitai. ³⁶ Tura asamtai aints ainau ni wearijai nemasnaikiartinuitai.

³⁷ “Aints ni aparincha, tura nukurincha wína nangkatusang aneauka wína aintsur achatnuitai. Tura aints ni uchirincha, tura ni nawantrincha wína nangkatusang aneauka wína aintsur achatnuitai. ³⁸ Tura aints wína nemartustas wakerayat, wait wajaktiniun shamauka wína aintsruchuitai. ³⁹ Nunasha tajarme: Aints wína umirtukiat, jatan shamak wína pachitas: Nuna umirchawaitjai tauka tuke mengkakatnuitai. Antsu wína umirtukuka maawarmaitiat, tuke iwiaaku pujusartinuitai,” Jesús turammiaji.✠

Yus ni aintsrin pengker awajsatnuri
(*Marc. 9.41*)

⁴⁰ Nunia Jesús ataksha chichartamak: “Nunasha tajarme: Wína umirtuku asakrumin, atumin anturtaminauka winasha anturtinawai. Tura winasha anturtinauka wína akup-tukuncha anturinawai.✠

⁴¹ “Aints Yuse chichamen etsernun Yus akupkamu asamtai, ni jeen wayaati taunaka Yus ni chichamen etsernun pengker awaja nunisang nu aintsun pengker awajui. Tura aints chikich aints pengke nintinnun: Jearun wayaata taunaka Yus pengke nintinnun pengker awaja nunisang nu aintsun pengker awajui. ⁴² Tura aints mianchaun wainiat, wina nemartin asamtai, nu aintsun yumin shikirak aramtaikia, Yus nu aintsnasha nekas pengker awajsatnuitai,” Jesús turammiaji.

11

Imiakratin Juan ni nuiniatirin akupkamuri
(*Luc. 7.18-35*)

¹ Jesús ni nuiniatiri doce (12) ainautin nuikiartutai chichaman akatamar umisu asa, nunia jiinki nu nungkanam yakat ainamunam aints ainaun nuiniartas tura Yuse chichamen etserkatas wemiayi.

² Imiakratin Juan kársernum engkeamu pujus, Cristo turamurin pachis chichaman antuku asa, ni nuiniatirin chicharak:

—Jesús wainkaram chicham nekartuataram, —tusa akupkamiayi. ³ Akupkamu asar Jesús an jeariar iniinak:

—¿Yus uwemtikiartinun akupkatnuitjai tímia nuka amekitam? ¿Amechuitkumningkia chikichash nakastaj? —tiarmiayi.

⁴ Tinamtai Jesús ayaak: “Atumka waketkiram atum wainkarume tura antukmarume nuka Juan mash ujaktaram. ⁵ Tura ujaakrum: Wainmichu ainau paan ataksha wainminawai. Tura wekaichau ainausha ataksha wekainawai. Tura kuchaprintin ainausha tsaarar pengker wajainawai. Tura antichu ainausha paan antinawai. Tura jakau ainausha ataksha nantakiar iwiaaku pujuinawai. Tura mianchau ainauncha Yusnum uwemratin chichaman ujaawai titaram. ⁶ Aints wína turamurun wainkar, nekasampita turutin ainauka nekasar warasartinuitai tusaram Juan ujaktaram,” Jesús timiayi.

⁷ Tamati Juanku nuiniatiri waketkiamtai, Jesús aints nuni juwarku ainaun Juankun pachis nuikiartutan nangkamamiayi. Tura etserak: “Aints atsamunam Juan wainkatarum ¿waruka wemiarume? Karis nase umpuam, mai we mai we waja nunisang ¿aints tu pujau wainkatarumek wemiarum? Atsa. ⁸ Turachkurmesha ¿aints wejmakan shiirman akikian entsaru wainkatarumek wemiarum? Atsa. Aints wejmakan akikian entsaruka apu jeen pujuinawai. ⁹ ¿Tura warí wainkatarumea wemiarum? Atumka nekasrum Yuse chichamen etserin wainkatarum wemiarume. Tura Juan wainkaram, chikich aints

✠ 10:39 (Mat. 16.24-25; Marc. 8.34-35; Luc. 9.23-24;17.33; Juan 12.24-25) ✠ 10:40 (Luc. 10.16; Juan 13.20)

Yuse chichamen etsernun nangkamasang pengke aints wainkamarume. ¹⁰ Juankun pachis yaanchuik Yuse chichame etserin armia nuka nuwaitai: ‘Nintimrataram. Yus Mesíasan chicharak: Ame weatsmining jintimin iwiarati tusan, wína akupamurun eemkan akupajai timiayi.’ Tu aarmawaitai.✠

¹¹ “Nekasan tajarme: Yuse chichame etserin ju nungkanam puju armia nuka kichkisha Juankun nangkamaska atsumiayi. Antsu yamaikia Yuse umirin mianchau ainausha wi turatnun wainkartin asar, Juankun nangkamasarang Yuse pujutirin jeartin ainawai, tajarme.

¹² “Nuniasha tajarme: Imiakratin Juan aints ainaun Yus inartinun pachis chichaman etsermia nuni nangkamsar, yamaisha nunisarang kajeu ainausha nu chichaman pengké nakitinawai. Tura kajeu ainu nu chichamnaka nakitinau asar, chikich ainausha Yusnum jeacharti tusar suriminawai. ¹³ Yaanchuik Juan akiintsang, Yuse chichame etserin ainu tura Moiséscha: Yus aints ainaun tu inartinuitai tusar etserkarmiayi. ¹⁴ Tura asaramtai yaanchuik Yuse chichame etserin: ‘Cristo taatsang, Elías eemak tatinuitai,’ timiayi. Tura nu chichaman nekaatasrum wakerakrumka: Juanka Elíasa tumawaitai titinuitrume. ¹⁵ Ju chichaman antinauka nintimrarti.✠

¹⁶ “Junia aints ainu itiu nintiminawa nunaka nekamtikiatjarme. Junia aints ainu uchua nunisarang nintiminawai. Uchi ainu ni amikrijai nakurusmi tusar aints aanum iruntramunam chicharnainak: ¹⁷ ‘Iikia nangkuwach umpuarnisha ¿waruka yaamt-surme? Tura nangkamir nakurusmi tusar, aints jakamunam nampearnisha ¿waruka juuttsurme?’ Uchi tu nintimina nunisrumek pujarme. ¹⁸ Juan pangnaka yutsuk, tura vinoncha umutsuk pujamtai, atumka ni chichame antut nakitau asaram: Iwianchrinuitai tarume. ¹⁹ Tura wikia Yus akupkamutiatak, chikich aintsua nunisnak yutancha pachitsuk yuwan, tura umutnasha pachitsuk umin asamtai, wína nakitrin ainu: Ushuitai tura nampewitai turutinawai. Tura tunaarintin ainu amikrintai, tura kuikian juu ainu amikrintai turutinawai. Tura waininayat Yusen umirin ainu Yuse nekamtairin jukin asar: ¿Warukaya nunasha tinawa? tusar nekainawai,” Jesús timiayi.

Pasé yaktanmaya ainaun chicharkamuri

(Luc. 10.13-15)

²⁰ Nuniangka Jesús chikich chikich yaktanam Yuse kakarmarijai wainchatai takatan untsuri takasu waininayat, nu yaktanmaya ainu ni tunaarin inaisacharu asaramtai, Jesús nu aints ainaun chicharkamiayi. Tura chicharak:

²¹ “Corazín yaktanmaya ainautirmin, Betsaida yaktanmaya ainautirmincha aneartaram tajarme. Atumka nukap wait wajaktinuitrume. Tiro yaktanmaya ainu, tura Sidón yaktanmaya ainausha Yusen umirchau ainayat, Yuse kakarmarijai wainchati takatan atum wainkamarume nunaka wainkachariat, nu wainkarkia yaanchuik: Yus tunaarun japitrurti tusar, entsatin pushun entsarar, tura muuken yukuujai yukuarar Yusnum uwemin armiayi. ²² Tura atumsha wainchati takatcha wainkayatrume, atumi tunaari inait nakitau asaram, tunau jiistin kinta jeamtai, atumka Tironmaya ainu, tura Sidónnumia ainu nangkamasrumek nukap wait wajaktinuitrume.✠

²³ “Capernaum yaktanmaya ainautirmincha tajarme: Atumka anangmamkuram: Iikia nayaimpinam pujustatjiapi, ¿tu nintimsarmek pujaram? Antsu atumka jakau matsam-tainum mengkakatnuitrume tajarme. Sodoma yaktanmaya ainu Yuse kakarmarijai wainchati takatan wainkachu ainayat, nuna wainkaramtaikia, ni yaktari yumpuntsuk yamaisha tuke atinuyayi. ²⁴ Tura asamtai tajarme: Tunau ainu jiistin kinta jeamtai, atumka Sodoma yaktanmaya ainu nangkamasrumek nukap wait wajaktinuitrume,” Jesús timiayi.✠

Wini winiram ayamsataram timiauri

(Luc. 10.21-22)

✠ 11:10 (Mal. 3.1) ✠ 11:15 (Mal. 4.5; Mat. 17.10-13; Marc. 9.11-13) ✠ 11:22 (Am. 1.9-10) ✠ 11:24 (Gén. 19.24-28; Mat. 10.15; Luc. 10.12)

²⁵ Nuniangka Jesús Yusen seak: “Apaachiru, ameka mash nayaimpinmaya ainau Apurinme. Tura mash nungkanmaya ainau Apurinme. Tura asam aints ningki nintimsar: ‘Wikia nekau aintsuitjai,’ tinauka ju chichaman nekaacharti tusam uukuitme. Antsu uchua nunisarang nintiminu ju chichaman paan nekaawarti tusam nekamtikiawaitme. Tura asakmin maaketajajame. ²⁶ Apaachiru, tu ati tau asakmin, maaketajajame,” timiayi.

²⁷ Tura Yusen sea umis, ataksha aints ainaun chicharak: “Wína Apaachir mash aa nuna wina surusmiayi. Aints kichkisha Yuse Uchiri itiurak awa tusarka nekainatsui. Tura wína Apaachir itiurak awa tusarsha nunasha nekainatsui. Antsu Yuse Uchiri asan, tu awai tusan paan nekajai. Tura aints ainaun: Wína Apaachirka tu awai tusan, wi nekamtikiatasan wakeraknaka nekamtikiatnuitjai. ☆

²⁸ “Mash pimpikniutirmesha, tura itiurkachmin pujautirmesha wini winitaram. Turakrumningkia wikia ayamtiksatatjarme. ²⁹⁻³⁰ Wikia pengké kajechu asan, miajuitjai tumamtsuk pujajai. Tura asamtai wini winiram nuimiartaram. Tura wína chichamrun miatrusarang umirtukartinka yumtichuitai. Tura wína takatrun takainauka itiurkachmin ainawai,” Jesús timiayi. ☆

12

Ayamtai kintati trigo majurar yuwamuri

(*Marc. 2.23-28; Luc. 6.1-5*)

¹ Ayamtai kinta tsawaaramtai, Jesús ni nuiniatirijai aja japen nangkaaminak, ni nuiniatiri ainauti yaparakur trigo jingkiain achikiar majurar yukir wemiaji. ² Turarin fariseo irunu nuna wainkar, Jesús chicharinak:

—Jiisia, Moisés ayamtai kintati takakmasairap tusa, surimkau waininayat, ami nuiniram ainau aunka aitkinawai, —tiarmiayi. ³ Tinamtai Jesús chicharak:

—¿Waruka tuusha chichaarme? ¿Yaanchuik apu Davidta turamuri pachisrum aujchaukitrum? Nuka ni aintsri ainaujai tsukaminak, ⁴ Yus seati juun jeanam wayaawar, Yus inaktustin pang aya sacerdote yutairi asamtai, chikich aintska nunaka yuwachminun wainiat, Davidcha nuna yuwak ni aintsri ainauncha susamiayi. ☆

⁵ ¿Atumsha Moisés umirkatin chichaman aarmia nuka aujchaukitrum? Sacerdote ainauka ayamtai kintati Yus seatai juun jeanam ayamtsuk takainau wainiat, Yuska nuna pachis tunaawitai tatsui. ☆ ⁶ Tura asamtai nekasam tajarme: Atumka Yus seatai juun jean nintimtarame nuna nangkamasrumek wína nintimtursatnuitrume. ⁷ Yuse chichamesha tu aarmawaitai. Yus chichaak: ‘Tangku ainauka maaram wina surustaram tusanka wakeratsjai. Antsu aints ainau wait anentratarame tusan wikia wakerajai,’ timiayi. Nu aarmau antukuitkurmeka, aints tunau takachu ainaun: Nuka tunau turayi tichamnawaitrume. ☆ ⁸ Wi aints ayatun Yus akupkamu asan, ayamtai kintati tu pujusarti tusan, aints ainaun inartinuitjai, —Jesús timiayi.

Uwejen mutchaun tsuwarmauri

(*Marc. 3.1-6; Luc. 6.6-11*)

⁹ Nunia jiinki, Jesús iruntai jeanam wayaamiayi. ¹⁰ Tura nuni waya, aints uwejen mutchaun wainkamiayi. Turamtai fariseo ainau: Ju aintsun tsuwaramtaikia, nuka tunau wajasi timi, tu nintimsar Jesús iniinak:

—¿Ayamtai kintati aints tsuwartin pengkerkai? —tiarmiayi.

¹¹ Tu iniinam Jesús aimiak:

—¿Atumi uwijari waanam ayaaramtaikia atum ainautirmesha ayamtai kintati ashiitai tusarmeka wechaintrumek? Atumka nekasrum nu uwijaka ashiitnuitrume tajarme. ☆

¹² Tura aints uwijan nangkamasketai. Tura asamtai ayamtai kintati aints wait anentamuka nekas pengkeraitai, —timiayi.

☆ 11:27 (Juan 1.18;10.14-16) ☆ 11:29-30 (Juan 14.15; 1.Juan 5.1-3) ☆ 12:4 (Lev. 24.9; 1.Sam. 21.1-6) ☆ 12:5 (Núm. 28.9-10) ☆ 12:7 (Mat. 9.13) ☆ 12:11 (Luc. 14.5)

¹³ Nunia uwejen mutchau aintsun chicharak:

—Uwejem kutsmarta, —timiayi.

Tamati ni uwejen kutsmaramtai, chikich uwejejai metek pengker wajasmiayi.

¹⁴ Turamtai fariseo ainu iruntai jeanmaya jiinkiar iruntrar chichainak: Jesús maami tusar chichaman najatiarmiayi.

Isaías Jesúsán pachis timiauri

¹⁵ Turinamtai Jesús nuna nekaa, nunia jiinki weai, aints untsuri niin nemariarmiayi. Turinamtai jinauncha mash tsuwarmiayi. ¹⁶ Tura aints ainaun akatar akupak: “Wi turamurka aints kichkisha nekaawarai tusaram, pengké etserkairap,” timiayi. ¹⁷ Jesúsá turamuringkia yaanchuik Yuse chichame etserin Isaías aarmia nunisang umikmiayi. Nu aarmauka nuwaitai:

¹⁸ Yus chichaak: “Juwaitai wína inatir, wi akupkamiaja nuka wína aneetiruitai. Tura asan niin wainkan waraajai. Ni nintin Wakantrun engketatatjai. Wi turamu asa, mash nungkanmaya ainaun uwemratin chichaman etserkatnuitai. Tura nu chichaman umirkaru ainaun uwentikratnuitai. Tura nu chichaman umikchau ainaunka uwentikrashtnuitai.

¹⁹ “Wína inatirka aints ainaun jiyakchatnuitai. Tura anturtuktaram tusangka untsumkashtnuitai. Tura asamtai jintanam wekainausha ni etsermataisha anturkachartinuitai.

²⁰ “Tunau jiistin kinta jeatsaing, kakaichau ainaun yaingtínuitai, tura niin jumchikesh umirinak pujuinaunka japashtnuitai. ²¹ Turatin asamtai mash nungkanmaya ainu niin pachisar: Wári tati tusar nakasartinuitai.” Tu aarmawaitai.

Jesúsán pachisar: Satanása kakarmarijai takaawai timiauri

(*Marc. 3.20-30; Luc. 11.14-23;12.10*)

²² Nunia aints iwianchrinun Jesús pujamunam itaarmiayi. Nu aintska wainmichu tura chichachuyayi. Tura itarim Jesús niin tsuwarmiayi. Tsuwaaram niisha paan wainmak, chichatnasha paan chichakmiayi. ²³ Tura pengker wajakiamtai, aints ainu nuna wainkar mash nintimrar: “¿Davidta wearin pachis Yuse chichame etserin: Uwentikiartin tatinuitai tiarmia nuchawashi?” tiarmiayi.

²⁴ Tinamtai fariseo ainu nuna antukar chicharnainak:

—Juka iwianchi apuri Beelzebún umirnuitai. Tura asa nuna kakarmarijai aintsu iwianchrin jiiru weawai, —tu nintimrarmiayi.[✠]

²⁵ Tu nintiminamtai, Jesús nuna nekau asa chicharak:

—Nintimrataram. Chikich nungkanmaya apu ainu kajernaikiar kanakar pujasar maaninamtaikia, nu nungkanka wári mesratnuitai. Tura aints ainu chikich yaktanam, tura chikich jeanam iruntrar kajernaikiar pujuinauka, nu jeancha tura nu yaktancha wári ukukiartinuitai. ²⁶ Tura ¿itiurak Satanása kakarmarijaingkia Satanása inatiri ainaun jiiki akupkatnuita? Nuka pengké turashtnuitai. Antsu atumka wina pachitsaram: Nuka Satanása kakarmarijai iwianch ainaun jiiru weawai turutrume nuka nekaschawaitai. Nuka nekasainmatikia, Satanáska ningki nepetmamkatnuitai. Tura nuka nekasainmatikia, Satanása kakarmari wári mengkakatnuitai. ²⁷ Atumka wína pachitsaram: Nuka Beelzebú naartinu kakarmarijai aintsu iwianchrin jiiru weawai turutrume. Antsu nuka nekasainmatikia ¿atumi nuiniatiri ainu yana kakarmarija iwianch ainaun jiiru weenawa? ¿Atumka nusha Satanása kakarmarijai iwianch ainaun jiiru weenawai tatsurmeash? Tura nisha: Satanása kakarmarijai turichuitji tinu asaramtai ¿itiurak winasha: Satanása kakarmarijai turawai turutiarum? Atumka tau asaram nuwaarme. ²⁸ Antsu wikia Yuse kakarmarijai iwianch ainaun jiikin asamtai, atumsha paan nintimsaram: Yuska aints ainaun tu inawai tusaram nekaamnawaitrume.

²⁹ “Aints nekas kakaram aa nuka jea waitirin naka pujamtai ¿nu aints jingkiatskeka, ni jeen wayaar wariri jurukminkai? Atsa, antsu nu aints jingkiar wariri jurukminuitai. Tura asamtai Satanás jingkiatskeka ninu aa nuka jurukchamnawaitai.

✠ 12:24 (Mat. 9.34;10.25)

³⁰ “Wína amikruchuka wína nemasruitai. Tura wína yaintsuk pujauka aints araka jingkiain irumtsuk aya mengkakarti tusa, japua nunisang iwianchin yayaawai.✠

³¹ “Tura asamtai atumin tajarme: Aintsu tunaari ainia nunaka mash Yus tsangkuratnuitai. Tura Yusen pachisar pasé chichainaunka Yus mash tsangkuratnuitai. Antsu Yuse Wakanin pachisar pasé chichainaunka pengké tsangkurashtinuitai. ³² Tura wi aints ayatun, Yus akuptuku waitinayat, wína pachisar pasé chichainamtaisha, nu tunaunasha tsangkuratnuitai. Antsu Yuse Wakanin pachisar pasé chichainaunka yamaisha tuke nu tunaunaka pengké tsangkurashtinuitai,” Jesús timiayi.

Numi jiisar nerekuashi tusar nekaatnuitai timiauri
(Luc. 6.43-45)

³³ Nunia ataksha Jesús chichaak: “Nunasha tajarme: ¿Numi jiisrum nerekuashi? tusaram paan nekaatnuitrume. Numi tenap piantramka pengker nereeyi. Antsu numi piantrachmauka mianchaun nereeyi. Atumsha nunisketrume.✠ ³⁴ Atumka napi uchiriya tumau asaram ¿itiurak pengker aa nusha chichastarme? Aints ni nintijai nintimina nunaka páchitsuk chichainawai.✠

³⁵ “Aints pengker aa nuna nintimu asa, nekas pengker aa nunak chichaawai. Tura aints pasé aa nuna nintimu asa pasé aa nunak chichaawai. ³⁶ Nunasha tajarme: Tunau jiistin kinta jeamtai, aints nangkamiar chichau armia nu chichamnaka mash Yusen paan ujakartin ainawai. ³⁷ Tura asamtai atumsha pengker aa nu chichaakrumningkia, Yuska atumin pengker awajtamsatnuitrume. Antsu pasé aa nu chichaakrumka wait wajaktinuitrume,” Jesús timiayi.

Pasé aints ainau: Wainchati takat jiismi timiauri
(Marc. 8.12; Luc. 11.29-32)

³⁸ Tamati fariseo ainau, tura Moisésa chichame nuikiartin ainausha Jesúsán chichari-nak:

—Nuikiartinu, ame wainchati takat turata tusar, iikia wainkatar wakeraji, —tiarmiayi.

³⁹ Tinamtai Jesús aimiak:

—Junia pasé nintintin ainau Yusen umirchau ainayat, wainchati takatan wainkartas wakerinawai. Tura wainiatun wainchati takatnaka turashtatjai. Antsu Yuse chichame etserin Jonás turunamia nunisang wainchati takatnaka wainkartinuitai.✠

⁴⁰ “Jonás kempatam kinta tsawaisha tura kashisha juun namaka ampujen engkema, jakawa nunisang pujumia nunisnak wikia Yus akupkamutiatak aints asan, jakan kempatam kinta tsawaisha tura kashisha iwiarsamunam tepestinuitjai. ⁴¹ Jonás Nínive yaktanam Yuse chichamen etsermatal, nunia aints ainau ni tunaarin mash inaisarmiayi. Wi Jonásan nangkamasnak pujai waitinayat, junia aints ainau wi etsermaurunka antinatsui. Tura Yus tunau jiistin kinta jeamtai, Nínive yaktanmaya jakaru ainau nantakiar, yamai pujuinaun pachisar Yusen: Nu aints tunau armiayi tiartinuitai.✠

⁴² “Nuniasha yaanchuik Yus Salomónkan ni nekamtairin susamu asamtai, chikich nungkanmaya apu nawantri arakia Salomónka chichamen antuktas tarimiayi. Wikia Salomónka nangkamasnak ai waitinayat, junia nungkanmaya ainau wi etsermaunaka antinatsui. Antsu Yus tunau ainaun jiistin kinta jeamtai, nu nuwaka jakamunmaya nantaki, yamai pujuinaun pachis Yusen ujaak: Nu aints ainau tunau ainawai titinuitai,” Jesús timiayi.

Iwianch jiinkisha ataksha waketonuitai timiauri
(Luc. 11.24-26)

⁴³ Tura Jesús ataksha chichaak:

—Iwianch aintsnum engkema pujuu nunia jiinkin asa, aints atsamunam wekaas nuni ayamsatatkama tujintak: Ataksha waketitaj tu nintimratnuitai. ⁴⁴ Tura asa

✠ 12:30 (Marc. 9.40) ✠ 12:33 (Mat. 7.20) ✠ 12:34 (Mat. 3.7;15.18;23.33) ✠ 12:39 (Mat. 16.1,4; Luc. 11.16,29)

✠ 12:41 (Jon. 3.3-5; Luc. 11.30)

chichaak: Wi jiinkimiaja nuni waketkitjai tusa nu aintsnum waketki, jea itarka tumaun pakuichau pengker iwiamua nunisang nu aintsu nintin wainak, ⁴⁵ nunia waketki, chikich siete (7) iwianchin niin nangkamasarang timiá pasé ainaun juki, tura nujai nu aintsu nintin engkemawartinuitai. Tura engkemtuam nu aintska nuwik pasé pujumia nuna nangkamasang pasé pujustinuitai. Tura asamtai junia nungkanmaya ainau wína nakitrinau asar, yaanchuik pasé puju armia nuna nangkamasarang timiá pasé pujusartin ainawai, —Jesús timiayi.✠

Jesúsa nukuri ni yachí ainaujai tarimuri

(Marc. 3.31-35; Luc. 8.19-21)

⁴⁶ Jesús aints ainaun nuiniak pujai, ni nukuri ni yachí ainaujai tariarmiayi. Tura tariar aanum wajasar Jesúsán aujsartas wakeriarmiayi. ⁴⁷ Tura aanum wajasaramtai, chikich aints Jesúsán ujaak:

—Nukuram yachim ainaujai aanum wajasar, amijai chichasartas wakerinawai, —timiayi.

⁴⁸ Tamaitiat Jesús nu aintsun chicharak:

—¿Yaa ainawa wína nukursha, tura wína yatsursha? —timiayi.

⁴⁹ Tu iniam aimkacharamtai, ni nuiniatiri ainaun inakmas:

—Juka wína yatsur tura wína nukur ainawai. ⁵⁰ Aints wína Apaachir nayaimpinam puja nuna wakeramurin umirinauka wína yatsur nunia wína umaar nunia wína nukur ainawai, —Jesús timiayi.

13

Arakan pachis nuikiartamu

(Marc. 4.1-9; Luc. 8.4-8)

¹ Nu kintati Jesús jeanmaya jiinki, juun kucha yantamen keemsamiayi. ² Tura aints untsuri kautkaram, Jesús kanunam engkema nuni keemsamtai, aints ainau kucha kaanmatkarin wajasarmiayi.✠

³ Turinamtai untsuri nuikiartutai chichamjai aints ainaun nuiniartas chicharak:

“Anturtuktaram. Aints arakan tsaamratas ni jeenia jiinkimiayi. ⁴ Tura arak tsaamam, araka jingkiaji jintá kakeekamiayi. Jintá kakeekamtai, chingki kautkar jingkiajin yuwaarmiayi. ⁵ Chikich jingkiaji kayanam nungka jumchik amanum kakeekamiayi. Tura kakeak nungka jumchik ayat kakarmachu tsapaimiayi. ⁶ Tura tsapaiyat, tsaa yakí waakak sukuam kaarmiayi.

“Tura kangkape atsau asamtai jakamiayi. ⁷ Chikich jingkiajisha jangki amanum kakeekamiayi. Jangki tsakar pempearan, araksha nerekchamiayi. ⁸ Chikich jingkiajisha nungka pengkernum kakeekamiayi. Tura nekas pengker tsapai nerekmiayi. Chikich jingkiaji cien (100) nerekmiayi, tura kitcha sesenta (60) nerekmiayi, tura kitcha treinta (30) jingkiajin nerekmiayi. ⁹ Aints ainautiram ju chicham antukrum nintimrataram,” Jesús timiayi.

¿Jesús waruka nuikiartamuncha etserkamiayi?

(Marc. 4.10-12; Luc. 8.9-10)

¹⁰ Chichas umisamtai ni nuiniatiri ainauti Jesús chicharkur:

—¿Waruka aints ainausha nuikiartutai chichamsha ujaa weame? —timiayi.

¹¹ Takurin Jesús iin chichartamak:

—Yus nayaimpinmaya aints ainaun itiur inartinuita tusar, chikich ainau paan nekaachmin wainiatrum, atumka paan nekamtikiamuitrume. ¹² Tura asamtai Yuse chichamen antinak nekasar pengker nintinam ukusar, nukap nintimrar pujuinaunka chikich chichamnasha nuna nangkamasang Yus paan nekamtikiatnuitai. Antsu chikich ainau wina chichamrun jumchik antinayat, antutan nakitinau asar, jumchik antukarmia nuka ataksha wári kajinmakiartinuitai.✠

✠ 12:45 (2.Ped. 2.20) ✠ 13:2 (Luc. 5.1-3) ✠ 13:12 (Mat. 25.29; Marc. 4.25; Luc. 8.18;19.26)

¹³ “Tura asamtai nu aints ainau wína chichamrun paan nekatan nakitinau asar, ni jiijangkia paan waininayat, wainmichua nunisarang ainawai. Tura antutnasha antinayat jampekua nunisarang: Warintua tusar nekaawartatkamawar yuuminawai. Turinau asaramtai, nu aints ainaun wikia aya nuikiartutai chichaman ujainajai. ¹⁴ Nu aints ainaun pachis Yuse chichame etserin Isafas tímia nunaka mash umikuitai. Nu aarmauka nuwaitai. “Yus Isafasan chicharak:

‘Nu aints ainau jiisam chicharkata: Atumka paan antayatrume antukchatnuitrume. Tura paan wainmatcha wainmayatrume nekaashtinuitrume. ¹⁵ Nu aints ainau katuram nintintin asar, kuwishi epekua nunisarang antukartatkamawar tujintinawai. Tura wainmichua nunisarang wainmaktatkamawar tujintinawai. Tu ainiachkungka paan nekaawarminuitai. Tura nekasar antukarminuitai. Tura nintijai paan nintimsar ni tunaarin inaisaramtaikia, wikia nu aints ainaun uwentikratnuitjai,’

Yus Isafasan timiayi. ✠

¹⁶⁻¹⁷ “Nekasan tajarme: Yaanchuik Yuse chichame etserin ainau, tura pengké aints ainau untsuri atum waintrume nunasha wainkartas wakerinayat wainkacharmiayi. Tura atum antuwearme nunasha antukartas wakerinayat antukcharmiayi. Tura atumka wi turamu wainkau asaram, tura wína chichamur antuku asaram, nekasrum warastinuitrume,” Jesús turammiaji. ✠

Arak tsaamramun taja nunaka takun tajai tusa etserkamuri
(Marc. 4.13-20; Luc. 8.11-15)

¹⁸ Nunia Jesús ataksha iin chichartamak: “Yamaikia nuikiartutai chichamjai arak tsaamramun pachisan wi takun tajai tamati anturtuktaram. ¹⁹ Yus aints ainaun nayaimpinmaya inartinun pachisar etsermaun antinayat ¿warina takua tawa? tusar, tenapka nekainachu asaramtai, iwianch tari, ni antukmaurin nintin ukuscharti, antsu wári kajinmakiarti tusa kajinmamtikui. Nu aintska árak jinta kakeekaun chingki kautkar yuwamua nunisketai. ²⁰⁻²¹ Arak kayanam kakeekamia nuka chikich aintsua nunisarang ainawai. Nu nangkamtaik nu aints ainau Yuse chichamen pengker nintimsar antinayat, nuniangka itiurkachmin amatai, Yusen nakitin ainau wishikinam, Yuse chichamen umirkachmin nintiminak umirtan wári inainawai. Tura asar árak kayanam kakeekamia nunisarang ainawai. ²² Arak jangki amanum kakeekamia nuka chikich aintsua nunisarang ainawai. Nuka Yuse chichamen paan antinayat, ju nungkanmaya aa nuna nintiminawai. Tura kuikiartin wajastaj tu nintimsar, Yuse chichamen nintimsuk pujuinawai. Tura asar árak jangki amanum kakeekamia nuka pengké nerekchatnuitai. ²³ Antsu árak pengke nungkanam kakeekamia nuka chikich aintsua nunisarang ainawai. Nu aints ainau Yuse chichamen antukar nintinam ukuinawai. Tura miatrusarang umirinak, Yusen nintimsar pujuinawai. Tura asar cien (100), tura kitcha sesenta (60), tura kitcha treinta (30) nerekuwa nunisarang ainawai,” Jesús turammiaji.

Nupaa trigojai pachimramun pachis nuikiartamuri

²⁴ Nunia Jesús chikich nuikiartutai chichaman nuitamak: “Yus aints ainaun nayaimpinmaya inartinka aints ni ajarin trigon pengkeran araamua nunisketai. ²⁵ Tura aints ainauka mash kaninamtai, ajartinu nemase kashi tari, nu ajanam nupaa jingkiijin trigoa nunisang tsapaiti tusa araamiayi. Tura araa umis waketkimiayi. ²⁶⁻²⁷ Tura trigo tsapaamtai, nupaasha tsapaimiayi. Tura nupaa tsapaamtai, aja takau ainau nuna wainkar, ajartinun weriar iniinak: ‘Apua ¿ameka pengke trigo araachmakum? ¿Tura nupaasha pasé aa nusha itiurak tsapaiya?’ tiarmiayi. ²⁸ Tu iniinam ajartin aimiak: ‘Wína nemasur aitkayi,’ timiayi. Tamati ni inatiri ainau ataksha iniinak: ‘¿Tura nu nupaa pasé aa nuka waruka uwertaram tatsume?’ ²⁹ Tu iniinam nuka aimiak: ‘Atsa, turuwairap. Nupaa uweakrum trigo uweni tusaram inaisataram. ³⁰ Mai metek tsakararti

✠ 13:15 (Isa. 6.9-10; Juan 12.39-40; Hech. 28.26-27) ✠ 13:16-17 (Luc. 10.23-24)

tajarme. Tura mai metek tsakaramtai, juuktin kinta jeamtai, chikich ajan takau ainaun akupkan: Nupaa eemkar uwerar irumrar jingkiawar epeewarti. Nuniasha trigon juukar chumpiwar, jeanam ukusarti tusan akupkatatjai, ajartin timiayi.” Jesús tu nuikiartutai chichamjai iin nuitamramiaji.

Mostaza jingkiaji pachis etserkamuri

(*Marc. 4.30-32; Luc. 13.18-19*)

³¹⁻³² Nunia Jesús ataksha chikich nuikiartutai chichaman ujatmak:

“Yuse aintsri itiu yujainawa tusan, chikich nuikiartutai chichamnasha nekamtikiat-jarme. Anturtuktaram. Mostaza jingkiaji chikich jingkiaji nangkamasang tuupchitai. Aints nuna ni ajarin araam, tsapai tura tsakar chikich arakan nangkamasang numia nunisang juun wajaayi. Tura kanawe timiá saram asamtai, chingki yakiiya kaunkar, mostaza kanawen pasungminawai,” Jesús turammiaji. *

Pang pachimtain pachis etserkamuri

(*Luc. 13.20-21*)

³³ Nunia ataksha chikich nuikiartutai chichaman ujatmak:

“Nuwa pangkan najanatas trigo sairin nekapmar, pang pachimtaijai pachimui. Yus aints ainaun nayaimpinmaya ina nuka nu nuwa turawa nunisang turawai,” turammiaji.

Jesús nuikiartamun untsuri aints ainaun ujakmau

(*Marc. 4.33-34*)

³⁴ Jesús nuikiartutai chichaman untsuri aints ainaun nuinimiayi. Antsu nuikiartutai chichamchaujaingkia aints ainaun nuinichmiayi. ³⁵ Jesús aints ainaun tu nuiniaru asa, yaanchuik Yuse chichame etserin aarmaurin miatrusang umikmiayi. Nu aarmauka nuwaitai:

“Aints ainaun nuikiartutai chichamjai ujaktinuitjai. Yus nu nangkamtaik nintimramia nuna aints pengké nekaachminun wainiatnak, wikia aints ainaun chichasan nekamtiki-atnuitjai,” tu aarmawaitai.

Nupaa trigojai pachimramun pachis taku tawai tusa etserkamuri

³⁶ Jesús aints ainaun ukuki, jea wayaamtai, ni nuiniatiri ainautisha jea wayaar Jesús chicharkur: “Nupaa trigojai pachimramu ajanam araamu nuikiartutai chichamka nuwaitai tusam ujakratkata,” timiaji.

³⁷ Takurin Jesús iin airmak:

“Ayu, anturtuktaram. Wikia aints ayatun Yus akupkamu asan, aints trigo jingkiajin araawa nunisketjai. ³⁸ Tura ajan pachisan taja nunaka mash nungkanmaya ainaun takun tajai. Tura trigo jingkiaji taja nunaka Yusen nekasampita tinu ainaun takun tajai. Antsu nupaa pasé aa nuna pachisan taja nunaka Satanásan umirkaru ainaun takun tajai. ³⁹ Aints nupaan pasé araamia nuna pachisan taja nunaka Satanásan takun tajai. Tura trigon juukmaun pachisan taja nunaka nungka amuamunam Yus aints ainaun mash irurmanum ni takatrin jiistin takun tajai. Tura ajan takau ainaun pachisan taja nunaka Yuse awemamuri ainu aints pasé ainaun, tura pengker ainauncha irurtinuitai takun tajai. ⁴⁰⁻⁴¹ Wikia aints ayatun Yus akupkamu asan, Yuse awemamuri ainaun akupkan, chikich aintsun tunau takamtikin ainaun, tura tunau takau ainauncha mash irurarti tusan awematnuitjai. Ajan takau ainu nupaan yaruakar keemakartas jinum japinawa nunisarang Yuse awemamuri ainu tunau ainaun irurartinuitai. Nungka amuamunam tu atinuitai. ⁴² Tura tunau ainaun ji tuke kajintrashtinum chumpiawaram, nuni wait wajainak juutinak tura nain katertinak matsamsartinuitai. ⁴³ Tura Yuse wakeramuri umirkaru ainu ni Apaachiri Yuse pujutirin jear, tsaajitsumir tsantua nunisarang pujusartinuitai. Atumka wi etsermaur antuku asaram nintimrataram,” Jesús turammiaji.

Kuri uukmaun pachis etserkamuri

* 13:31-32 (Yuse aintsri ainausha mianchau ainayat, mostaza nunisarang nukap yujartinuitai, taku timiayi.)

⁴⁴ Nunia Jesús ataksha iin nuitamak: “Yusnum pujustinun pachis chikich nuikiartutai chicham antuktaram. Yusnum pujustinka kuri kajunam chumpiar nungka taimunam uukmawa tumawaitai. Tura asamtai nu kajun uukmia nuka jakamtai, chikich aints nungkan tai kajun aneachmaun wainak urak jiis waras, nunia ataksha epeni nungkajai yukuar ni jeen waketki, ninu aa nuna mash suruk, nunia kuikiancha mash irur, nu kuikijai ajanka sumawai. Tura ajan sumaku asa, nu kajuka niinuitai,” Jesús turammiaji. †

Shaak akikian pachis etserkamuri

⁴⁵ Nunia Jesús ataksha nuitamak: “Kichnasha tajarme: Yusnum pujustin pachisrum chicham antuktaram. Aints shaakun sumin shaak nekas akik shiiram wawiknumia jukimun eaktinuitai. ⁴⁶ Tura wekaa wekaaka kichik shaakun timiá akikian wainak, sumaktatkama kuikiari jeachu asamtai, ninu aa nunaka mash suruk, nujai nu shaakun sumaktinuitai. Nu shaakun timiá akikian aints wakerina nuna nangkamasarang Yusnum pujustinnaka nekasar wakerukartinuitai,” Jesús turammiaji.

Reden pachis etserkamuri

⁴⁷ Nunia Jesús ataksha iin nuitamak: “Kichnasha tajarme: Yusnum pujustinka red sarma tumawaitai. Kuchanam reden nangkimiawar namaknasha mash pachitsuk achi-inawai. ⁴⁸ Nunia red piakamtai, namakan achiu ainau japikiar kaanmatkanam tuksar, namakan jiisar, pengker ainaun changkinnum chumpinawai. Antsu yuchatai ainaun kuchanam japinawai. ⁴⁹ Nungka amumanum aints namakan achiinawa nunisarang Yuse awemamuri tunau nintintin ainaun akankar, tura pengke nintintin ainauncha akankar irurartinuitai. ⁵⁰ Tura tunau ainaun ji tuke kajintrashtinnum chumpiawaram, nuni wait wajainak juutinak tura nain katertinak matsamsartinuitai,” Jesús turammiaji.

Yaanchuik antukmiarume tura yamai antukurme nusha nuiniartaram

⁵¹ Nunia ni nuiniatiri ainauti ininmak:

—¿Atumsha wi etserkaja nu paantak antukuram? —turammiaji.

Tu ininmamtai:

—Ja ai, Apuru, —timiaji.

⁵² Tu aimkau asakrin ataksha chichartamak:

—Yus aints ainaun nayaimpinmaya inawa nuna pachis Yuse chichame nekau chichaman nuimiaru asa, chikich ainaun nuiniartas wakerakka, jeenua tumawaitai. Jeentin ni aintsrin yuumamurin suwak, yaanchuik sumakmia nuna, tura yamai sumakma nunasha ni aintsri yuumamurijai metek suawai, —Jesús turammiaji. ‡

Jesús Nazaretnum pujusmauri

(Marc. 6.1-6; Luc. 4.16-30)

⁵³ Nu nuikiartutai chichaman mash umis, Jesús nunia jiinki, ⁵⁴ ni tsakarmaurin wemiayi. Tura nuni jea, iruntai jeenam waya, aints ainaun nuiniatan nangkamamiayi. Tura nuininam aints ainau untsuri Jesús a chichamen antukar nintiminak:

—¿Junasha yáki ni nekamtairincha nuiniaria? ¿Wainchati takatan turati tusasha, yáki kakarmarincha susaya? ⁵⁵ ¿Juka tau takakminu uchirinchukai? ¿Ni nukuri Maríchukai? ¿Tura ni yachí Santiago, tura José, tura Simón, tura Judas naartinchukai? ⁵⁶ Ni umaji iijai pujuinauka mash wainiaji. ¿Tuniana jusha nekamtairincha tura kakarmarincha juwawa? —tunaiarmiayi.

⁵⁷ Tura asar Jesús an suwirpiaku jiiinak pachischarmiayi. Pachischaram Jesús chicharak:

—Yuse chichame etsernun aints mash anturinawai. Antsu ni nungkarin pujuinausha ni weari ainausha anturinatsui, —timiayi. ✠

† 13:44 (Nu kajuka Yusnum pujustinua tumawaitai. Yusnum pujustinka mash nungkanam aa nuna nangkamasang timiá pengkeraitai, taku timiayi.) ‡ 13:52 (Atumsha wina chichamur paan antuku asaram, nu aintsua nunisrumek yaanchuik antukmiarume nusha, tura yamai antukurme nusha chikich ainu nuiniartaram, taku timiayi.) ✠ 13:57 (Juan 4.44)

⁵⁸ Tura nunia aints ainau niin nekasampita tichau asaramtai, Jesús nuningkia wainchati takatnaka untsurinka turachmiayi.

14

Imiakratin Juankun maamuri

(*Marc. 6.14-29; Luc. 9.7-9*)

¹ Jesús an pachisar untsuri chichainamtai, Galilea apuri Herodes nu chichamnasha antukmiayi. ² Tura asa ni inatiri ainaun chicharak: “Nekas Imiakratin Juankuitai. Nuka jakayat jakamunmaya nantakin asa, Yuse kakarmarijai wainchati takatan takaawai,” ningki nintimias timiayi.

³⁻⁵ Herodes ni yachí Felipe iwiaaku pujaun wainiat, yachí nuwarin nuwatkamiayi. Nu nuwaka Herodías naartinuyayi. Tura asamtai Juan apu Herodesan chicharak: “Yachim iwiaaku pujau wainiatum, ni nuwari nuwatkamiame nunaka Yus surimiawai,” timiayi. Tamati apu Herodes: Turutam tusa, Juankun maatas wakerayat, aints ainau chichainak: “Juan nekas Yus akupkamu asa, Yuse chichamen etserui,” tinu asaramtai, Herodes aints ainaun shamak: Juankun maataj tutsuk ni suntari ainaun akupak: “Aya achikrum kársernum engkeataram,” tama suntar ainau Juankun achikar kársernum engkewarmiayi. ☆

⁶ Turuwaramtai apu Herodesa akiinamuri kinta tsawaaramtai, Herodes: Jiiritaram tusa, ni aintsri ainaun untsukmau asar, mash Herodes pujamunam iruntraramtai, Herodías nawantri waya ningki jiaamramiayi. Tura jiaamak apu Herodesan timiá pengker awajam, ⁷ nuka nawantan chicharak: “Yusjai nekasan tajame: Waring achat ame seatkumningkia, nunaka nekasan surittsuk susatatjame,” timiayi. ⁸ Tamati ni nukurin weri:

—¿Warinak seataj? —tu iniam, tu tita tusa akatramu asa, nu nawanka apu Herodesan weri:

—Imiakratin Juanku muuke puwatnum engkeam surusta, —timiayi.

⁹ Tama nuna antuk, apu Herodes wake mesekiat, irau ainausha mash antinamunam Yusjai tajai tinu asa, ayu timiayi. ¹⁰ Tura ni suntarin akatar akupak:

—Juanku muuke akakrum itataram, —tama suntar ainau kársernum weriar muuken akakar, ¹¹ puwatnum engkewar nawantan susarmiayi. Tura susam nawan puwatun juki nukurin susamiayi.

¹² Turamtai Juanku nuiniatiri ainau kaunkar ni namangken jukiar, aints iwiartainum iwiarsarmiayi. Nuna turuwar Jesús an ujakartas wearmiayi.

Jesús cinco warang aintsun yuramuri

(*Marc. 6.30-44; Luc. 9.10-17; Juan 6.1-14*)

¹³ Jesús Galilea nungkanam pujus, Juan maamun chichaman antuk kanunam engkema, ningki aints atsamunam wemiayi. Weamtai aints ainau nuna nekaawar, kucha yantamen Jesús nujamkatnunam wearmiayi. ¹⁴ Tura nuni jearamtai, Jesús nujamak aints timiá untsurin wainak wait anentrarmiayi. Tura asa jaun itaarmia nuna tsuwarmiayi. ¹⁵ Tsaa akaamtai, ni nuiniatiri ainauti Jesús chicharkur:

—Tsaa akaawai. Juni aintsu pujutiri atsau asamtai, yakat arakchichu amaunum werum, yurumak sumaataram tusam aints ainau akupkarta, —timiayi.

¹⁶ Tu takurin Jesús chichartamak:

—Ju aints ainauka wecharminuitai. Antsu atumek ni yuwatniuri susataram, —turammiaji.

¹⁷ Turammatai iikia chicharkur:

—Pang iinuka ju uwejchik nuke arutramji. Namaksha jimiarichik nuke arutramji, —timiayi.

¹⁸ Tu takurin Jesús chichartamak:

—Nuka wina surustaram, —turammiaji.

☆ 14:3-5 (Mat. 4.12; Luc. 3.19-20)

¹⁹ Tura aints ainau chirichrinam pujusarat tusa akatram, mash chirichrinam pujusaramtai, Jesús pangkan ju uwejchik takus, tura namaknasha jimiaarchik takus nayaimpinmanini pangkai jiimias, Yusen maaketai timiayi. Nunia pangkan puuk, ni nuiniatiri ainautin suramsamtai, iisha aints ainau mash susarmiaji. ²⁰⁻²¹ Tura susaram mash yuwaar tutuararmiayi. Nuna yuwaruka nuwa ainausha, tura uchi ainausha nekapmatsuk aishmangkuk aishmangkuk cinco warang (5,000) yuwarmiayi. Tura yuwaar umisaramtai, ampintrausha doce (12) changkin chumpiar jukimiaji.

Jesús kucha japen nawejai wekaasamuri

(Marc. 6.45-52; Juan 6.16-21)

²² Nunia Jesús ni nuiniatiri ainautin chichartamak: “Kanunam engkemaram katingkrum eemajatararam. Wikia aints ainaun aujsan umisan winitatjai,” turammiaji. ²³ Tura aints ainaun aujas ukuki, ningki Yusjai chichastas muranam wakamiayi. Tura kashi japeng ningki Yusen seak pujai, ²⁴ kanuka kucha japen wemiayi. Tura weai, nase nujinmanini kakar nasenmatai, kucha tamparamuri chaker chaker wajamtai, kanu ukantias wakerimiayi. ²⁵ Atash shinutnak wajai, Jesús juun kuchanam nungkanma nunisang nawejai najamas wekaas winimiayi. ²⁶ Jesús winamtai, ni nuiniatiri ainauti nu wainkar shamakur kakarar chichaakur:

—Wakanchawashi, —tunaimiaji.

²⁷ Tu takurin Jesús chichartamak:

—Kakaram wajastaram. Wiitjai shamrukairap, —turammiaji.

²⁸ Tama Pedro chicharak:

—Apuru, nekasam ametkumka, ame wekaame ani winasha winita turutta, —timiayi.

²⁹ Tama Jesús ayaak:

—Ayu, winita, —timiayi.

Tama Pedro kanunmaya jiinki, kuchanam nawejai najamas wekaas, Jesúsnum jeatas wemiayi. ³⁰ Turayat nase kakaram nasentun wainak Pedroka shamkamiayi. Tura shamau asa, kuchanam wayaak untsamak:

—Apuru, uwemtikrurta, —timiayi.

³¹ Nu tamaujai metek Jesús ni uwejen achik chicharak:

—¿Waruka nekasampita turutsume? ¿Waruka tujinkachuitme tu nintimturtsume? —timiayi.

³² Tura Jesús Pedrojai kanunam engkemawaramtai, nasengka nangkamarmiayi.

³³ Turamtai ni nuiniatiri ainauti Jesús naka tikishmatrar:

—Nekasam Yuse Uchirinme, —timiayi.

Jesús jau ainaun tsuwarmauri

(Marc. 6.53-56)

³⁴ Tura juun kuchan katingkiar, Genesaret nungkanam nujamkamiayi. ³⁵ Tura nunjamkakin nunia aints ainau nuna wainkar: “Auka Jesúsaitai,” tusar nuna nekaawar, nu nungkanmaya ainausha mash nekaawarat tusar chichaman akupkaramtai, jau ainaun Jesús pujamunam itarmiayi. ³⁶ Tura asaramtai jau ainau Jesús seainak: “Wejmakrumi ninukmaurinak antingtasan wakerajai. Nu tsangkatrukta,” tiarmiayi. Tura nuna antingkiaruka mash tsaararmiayi.

15

¿Aintsu tunaari warutmak awa? tusa etserkamuri

(Marc. 7.1-23)

¹ Tura fariseo ainau Moisésa chichame nuikiartin ainaujai Jerusalénnumia tariar, Jesús iniinak:

² —Ami nuiniatiram ainau ¿waruka yaanchuik ii juuntrin akupkamu umirtsuksha uwejen ikimiatskesha yuwinawa? —tiarmiayi. ³ Tinamtai Jesús aimiak:

—Yus: Wina chichamur umirtuktaram tusa, atumin akupturmakmia nu umirtsuk pujayatrumsa ¿waruka aintsu chichamesha juun ainau tinu armia nusha umirume?

⁴ Yus chichaak: ‘Aparmesha tura nukurmesha pengker awajsataram. Tura aints ni aparincha, tura ni nukurincha pachis pasé chichaamtaikia, nu aintsnaka maawarti,’ Yus timiayi. ⁵ Antsu atumka chichaakrum: Aints ni aparincha, tura ni nukurincha chicharak: ‘Wikia winar aa nunaka mash Yusen susamjai. Tura asan atumin susatasan wakerayatun yamaikia tujintajai.’ ⁶ Tu tinu ainauka ni aparincha, tura ni nukurincha yaaitsuk pujusartinuitai tarume. Tu tinu asaram atumi juuntri tinu armia nu umiktasrum, Yus winia chichamur umirtuktaram tímia nuka inaiyarme. ⁷ Waitrin ainautiram, yaanchuik Yuse chichame etserin Isaías atumin pachis aarmia nuka nekasaintai. Nu aarmauka nuwaitai:

⁸ Yus chichaak: ‘Nu aints ainauka aya chichasarang: Ameketme juuntam turutinawai. Antsu nintijai yaja nintimsar, wínaka nintimturinatsui.

⁹ Tura aintsu akupamurinak nuininayat wínaka nangkamiar: Ameketme juuntam turutinawai,’ timiayi. Isaías tu aarmiayi, —Jesús timiayi.

¹⁰ Nunia fariseo ainaujai tura Moisésa chichamen nuikiartin ainaujaisha chichas umis, ataksha aints ainaun untasuk chicharak:

—Anturtuktaram. Tura wi taja nuka nekaataram. ¹¹ Aintsu jangken waring achat waya nujangkia tunauka wajaschatnuitai. Antsu aintsu nintinia jiinua nuka aints ainaun tunau awajmamtikui, —Jesús timiayi.

¹² Tama ni nuiniatiri ainauti Jesús aujsatar tarir chicharkur:

—¿Fariseo ainau chicharkum tame nuna antukar kajertamina nu nekamek? —timiaji.

¹³ Tu tama Jesús iin airmak:

—Ja ai, nekajai. Nuka wína Apaachir nayaimpinam puja nuna aintsrinchu asaramtai, nupaa kangkaptuk uwerar japatnua nunisarang artinuitai. ¹⁴ Inaisataram. Nuka wína chichamrun umitan nakitinau asar, aints wainmichua nunisarang ainawai. Aints wainmichu ayat, chikich wainmichun jintan inaktustas wakera nunisarang ainawai. Aints wainmichu chikich wainmichun jintan inaktustas wakerayat, jinta weenak mai waanam iyaartinuitai, —turammiaji.✠

¹⁵ Turammatai Pedro Jesús an chicharak:

—Aintsu jangken waring achat waya nujangkia tunauka wajaschatnuitai, tame nuka ¿warí pachismeame tame? Nuka paan ujakratkata, —timiayi.

¹⁶ Tama Jesús chichartamak:

—¿Atumka nuka nekatsrumek? ¹⁷ Aints yurumkan yuwamu jangkenam wayaangka nintinam wayaachu asamtai tunauka wajatsui. Tura wakenam wayau asa, nuniangka ataksha jiini. ¿Nuka nintimtsurmek? ¹⁸ Antsu aintsu chichame ni jangkenia jiina nuka nintinia jiinkin asa, nuka aintsun tunau awajmamtikui.✠

¹⁹ “Tunau nintimtai ainauka aintsu nintinia jiinui. Tura aints maatnusha, tura aishrintin wakeruktincha, tura nuwentin wakeruktincha, tura tsanirmatnusha, tura kasamkatnusha, tura anangkartuatnusha, tura Yusen pachis, nunia aintsun pachisar pasé chichastincha nintinmaya jiinu asa, ²⁰ aintsun tunau awajmamtikui. Antsu ikimiatsuk yuta yuwatniuka aintsu nintin tunau awajmamtiksui, —Jesús turammiaji.

Chikich nungkanmaya nuwa Jesús an nekasampita timiauri

(Marc. 7.24-30)

²¹ Jesús ni nuiniatiri ainaujai nu nungkanmaya jiinki, chikich nungkanam Tiro yaktanam, tura Sidón yaktanmasha wemiayi. ²² Tura nuni jea, Canaánumia nuwa judíochutiat, Jesús an jiistas tari untsuak:

—Apu Davidta weariya, wait anentrurta. Iwianch nawantru namangken engkentu-
amu asa, nukap wait wajawai, —timiayi.

²³ Tamaitiat Jesúska aimtsuke wajamiayi. Turamtai ni nuiniatiri ainauti tarir chicharkur:

—Iin nemartamas untsuamkinij waja juka akupkata, —timiaji.

²⁴ Tu takurin Jesús nuwan chicharak:

✠ 15:14 (Luc. 6.39) ✠ 15:18 (Mat. 12.34)

—Israel ainau uwija mengkakawa nunisarang pujuinau asaramtai, Israelnumak wína Yus akuptukmiayi, —timiayi.

²⁵ Tama nu nuwaka Jesús naka tikishmatar seak:

—Apuru, yainkata, —timiayi.

²⁶ Tu seamaitiat Jesús nuikiartutai chichamjai ayaak:

—Uchi pangkan yuwinau atankir yawaa uchiri suamuka napchawaitai, —timiayi.

²⁷ Tamaitiat nu nuwaka ayaak:

—Nekasam tame, Apuru. Antsu uchi yutairi misa wamketin ayaarunka yawaa uchiri nekasar yuwinawai, —timiayi. *

²⁸ Tama Jesús chicharak:

—Nuwachi, wína nekasampita turutu asam, ame wakerame nunisang ati, —timiayi.

Tama nu chichaamujai metek ni nawantri pengker wajasmiayi.

Jesús jau ainaun untsuri tsuwarmauri

²⁹ Jesús nu nungkanmaya jiinki, Galilea nungkanam wekaas, juun kucha yantamen nangkamaki, mura waka nuni keemsamiayi. ³⁰ Turamtai aints wekaichau ainauncha, tura wainmichu ainauncha, tura chichachu ainauncha, tura uweje kupirkamu ainauncha, tura chikich najaiminak pujuinauncha Jesús pujamunam itaar, nawen ayaamsar pujsarmiayi. Nu jau ainaun itaaramtai, Jesús mash tsuwarmiayi. ³¹ Turamtai aints ainu nuna wainkar chichachu ainausha chichainamtai, tura uweje kupirkamu pengker wajainamtai, tura wekaichau ainausha pengker wekainamtai, tura wainmichu ainausha pengker wainminamtai, nuna mash wainkar nintimrarmiayi. Tura Israel ainu Yusri nekas kakarmaitai tiarmiayi.

Jesús cuatro warang ainaun yuramuri

(Marc. 8.1-10)

³² Nunia Jesús ni nuiniatiri ainautin untsurmak mash irutmar chichartamak:

—Ju aints ainaun wait anentajai. Kampatam kinta wijai iruntrar pujuinau asar, yutanha yutsuk pujuinawai. Tura asar jinta weenak, tsukarijai juwikcharai tusan, yurtsuk ni jeen awematnaka nakitajai, —turammiaji.

³³ Turamatai ni nuiniatiri ainauti chicharkur:

—Tura juni aints atsamunmasha aints timiá untsuri yuratasrisha ¿tuniang yurumkasha sumaktaj? —timiaji.

³⁴ Tu takurin Jesús ininmak:

—¿Pangsha warutma takakrume? —tu ininmamtai iikia aimkur:

—Siete (7) takakji, namakchisha jumchik takakji, —timiaji.

³⁵ Tu takurin aints ainaun chicharak:

—Nungkanam mash pujustaram, —tamati ni tímia nunisarang pujusaramtai, ³⁶ Jesús pangkan siete (7) amia nuna takus, tura namaknasha takus, Yusen maaketai tusa, pangkan puuk ni nuiniatiri ainautin suramsamiaji. Turamtai iisha aints ainu kichik kichik mash susamiaji. ³⁷ Turakrin mash yuwaar tutuararmiayi. Tura ampintramuri changkin siete (7) amia nuni chumpiamiaji. ³⁸ Tura nuna yuwaaruka nuwa ainausha tura uchi ainausha nekapmatsuk, aishmangkuk aishmangkuk cuatro warang (4,000) armiai.

³⁹ Nunia Jesús nu aintsun: Weajai tusa kanunam engkema Magdala nungkanam wemiayi.

16

Fariseo ainu saduceo ainuajai: Wainchati takat wainkatasar wakeraji timiauri

(Marc. 8.11-13; Luc. 12.54-56)

¹ Jesús nuni jeamtai, fariseo ainu saduceo ainuajai iisha nekaatai tusar taarmiayi. Tura taar Jesús seainak:

* 15:27 (Nu chichamka Israel ainu Yuse aintsri asaramtai, Israel ainaun yaingtinka inaitsuk winasha yainkata, taku timiayi.)

—Nayaimpinmaya kakarmarijai wainchati takat turata. Iisha wainkatasar wakeraji, —tiarmiayi.✠

² Tu tinam Jesús ayaak: “Atum chichaakrum: ‘Tsaajaak nayaim kapantin wajasamtai, kashin kinta pengker tsawartatui,’ tinuitrume. ³ Tura tsawaarkuram: ‘Mukunit nukap au asamtai, tura nayaim kapantin wajasamtai yumi jiturtatui,’ tinuitrume. Nayaim jiisrumka: Kinta tu atatui tusaram nekaamnawaitrume. Antsu wi turaja nuka wainkay-atrumek, Yus atumin nekantikramatas wakera nuka nintimtsurme. ⁴ Junia pasé nintintin ainau Yusen umirchau ainayat, wainchati takatan wainkartas wakerinawai. Tura wainiatnak wainchati takatnaka turashtatjai. Antsu Jonása turunamuriya tumau wainchatai takatnaka nunak wainkartinuitai,” tusa ukuki tumajin katingmiayi.✠

*Fariseo ainau pasé nintimaurin pachis etserkamuri
(Marc. 8.14-21)*

⁵ Tura Jesús ni nuiniatiri ainautijai tumajin katingkiar, pang kajinmakir jukichmiaji.✠
⁶ Turakrin Jesús chichartamak:

—Fariseo pang pachimtairi jurukirap, tura saduceo pang pachimtairisha jurukirap, —turammiaji.

⁷ Turamkurin ni nuiniatiri ainauti chicharnaiyakur:

—Pang kajinmakin asakrin turamtsujiash, —tunaimiaji.

⁸ Tu chichaakur pujarin Jesús nuna antuk iin chichartamak:

—¿Waruka pang kajinmakmiau pachisrumsha chichaarme? ¿Waruka wína chicham-rusha nintimtsuksha pujarme? ⁹ ¿Pang cinco (5) amia nujai cinco warang (5,000) aints yuramuka nuka aneakturmek? Tura ampinramuri ¿warutam changkina jukimiarume nusha aneakturmek?✠

¹⁰ “¿Nuniasha pang siete (7) amia nujai cuatro warang (4,000) aints yuramuka nuka aneakturmek? ¿Tura ampinramuri warutam changkina jukimiarume nuka aneakturmek?✠

¹¹ “¿Waruka wína chichamur nintimtsuksha pujarme? Fariseo pang pachimtairi jurukirap, tura saduceo pang pachimtairisha jurukirap, taja nuka wikia pangnaka tatsujrume, —Jesús turammiaji.

¹² Turammatai ni nuiniatiri ainauti paan nintimrar: “Pang pachimtai pachiska turamtsuji, antsu fariseo ainau, tura saduceo ainauka anangkartin asaramtai, ni nuikiartamuka anturkairap tusa turamji,” tusar nekaamiaji.

*Pedro Jesúsán: Mesíasaitme timiauri
(Marc. 8.27-30; Luc. 9.18-21)*

¹³ Nunia Jesús ni nuiniatiri ainautijai Cesarea Filipos nungkanam jinta weamunam Jesús iin ininmak:

—Wikia aints ayatun Yus akupkamu asan, chikich aints ainau wína pachitsar: ¿Warí aintsuita turutinawa? —tu ininmasmiaji.

¹⁴ Tu iningkratmatai aimkur:

—Chikich ainau amin pachitmasar: Imiakratin Juankun maawarmia nuchawashi turaminawai. Tura chikitcha Elíaschawashi turaminawai. Tura chikitcha: Jeremíaschawashi turaminawai, antsu nuchawaitkusha, chikich yaanchuik Yuse chichame etserin pujumia nuwashi turaminawai, —timiaji.

¹⁵ Tu tinu asakrin Jesús ataksha ininmak:

—¿Tura atumsha winasha warintrurume? —turammiaji.

¹⁶ Tu iniam Simón Pedro aimiak:

—Ameka Mesíasaitme. Yus tuke iwiaaku puja nuna Uchirinme, —timiayi.✠

¹⁷ Tama Jesús chicharak:

✠ 16:1 (Mat. 12.38; Luc. 11.16) ✠ 16:4 (Mat. 12.39; Luc. 11.29) ✠ 16:5 (Luc. 12.1) ✠ 16:9 (Mat. 14.17-21)
✠ 16:10 (Mat. 15.34-38) ✠ 16:16 (Juan 1.49;6.68-69)

—Nekasam tame, Jonása uchiri Simónka. Aints kichkisha aminka nunaka nekamtikramacharmayi, antsu wina Apaachir nayaimpinam puja nu amin nekamtikramau asamtai tame. Ame turutin asakmin, Yus amincha waramtikramsati tajame. ¹⁸ Tura nunasha tajame: Ameka kaya tumau asakmin Pedro inaikiamuitme. * Tura aints ainau kaya pisujai jean jeamina nunisnak wina nekasampita turutin ainauka wina aintsur arti tusan inaikiatnuitjai. Tura Yuse nemase ainausha tuke mengkakatnununam weenausha wina aintsur ainaun maawartin ainayat, niin nepetkartatkamawar pengké tujinkartinuitai.

¹⁹ Tura asamtai ameka aints waiti yawikmaun urawa nunismek ju nungkanam pujuinau wina chichamur nayaimpinam jeatin pachisam etserkunningkia, aints ainau nu chichaman nekasampita tinauka nayaimpinmasha jeartinuitai. Tura nayaimpisha yawikmawa nunisang au asamtai, ju nungkanam nu chichaman nekasampita ticharu ainauka nayaimpinmaka jeachartin ainawai, —Jesús timiayi. ☆

²⁰ Nunia ni nuiniatiri ainautin chichartamak:

—Wina pachitsaram: Auka Mesíasaitai tusarmeka aints kichkisha ujakairap, —turammiaji.

Jesús ni jakatniurin pachis etserkamuri

(Marc. 8.31-9.1; Luc. 9.22-27)

²¹ Nu kintati Jesús ni nuiniatiri ainautin ni jakatniurin pachis ujatmatan nangkamamiayi. Tura ujatmak:

—Wikia Jerusalénnum wetin ajai. Tura nuni wi jeamtai, judío juuntri ainau, tura sacerdote juuntri ainausha, tura Moisésa chichame nuikiartin ainausha nukap wait wajakti tusar, wina mantuwartatui. Tura wainiatnak kempatam kinta jakan tepayatun, ataksha nantaktatjai, —turammiaji. ☆

²² Tama Pedro Jesúsán akanak juki chicharak:

—Apuru, Yus surimramkati. Aminka nunaka turutmacharti, —timiayi. ²³ Pedro Satanása nunisang chichau asamtai, Jesús Pedron ayanmatar chicharak:

—Satanása weta. Ameka winaka itit awajtame. Ameka Yuse wakeramuringkia nintimtsume, antsu aints wakerina nuke nintimme, —timiayi.

²⁴ Nunia ni nuiniatiri ainautin chichartamak:

—Aints wina nemartustas wakerakka ni wakeramurinka inais, wikia mianchawaitjai tusa, aya winak nemartusti. Tura wina nemartakka, aints ni krusrin juwawa nunisang ni jakatniurin shamtsuk winak nemartusti. ²⁵ Aints ningki nintimias: Wikia jakashtatjai tauka jakatnuitai. Antsu aints wina anentak jakatata nuka jakayat tuke iwiaaku pujustinuitai. ☆

²⁶ “Nintimratarame. Aints ju nungkanam aa nuna mash sumak, pengké yuumatsuk pujayat, ni wakani tuke mengkakamtaikia, ¿itiurak tuke iwiaakusha pujusting? Tura aints nekas uwemratas wakerakka, tura tuke Yusnum pujustas wakerakka ¿warutam kuikianak akiimiak uwemratnuita? ²⁷ Wisha aintsutiatnak Yus akupkamu asan, wina Apaachiru kakarmarijai winakun, tura ni awemamurijai winakun, aints ainaun mash ni turamurijai metek pengker ainauncha pengker awajsartinuitjai, tura tunau ainauncha wait wajaktinnasha susartinuitjai. ☆

²⁸ “Nekasan tajarme: Wikia aints ayatun Yus akupkamu asan, Yuse kakarmarijai aints ainaun inartatja nunaka wijai juni tsaniasar pujuinauka jatsuk waitkartatui, —Jesús turammiaji.

17

Jesúsá yapajmiamamuri

(Marc. 9.2-13; Luc. 9.28-36)

* 16:18 (Pedroka kaya taku tawai.) ☆ 16:19 (Juan 20.23) ☆ 16:21 (Mat. 17.23;20.19;27.63; Marc. 8.31;9.31;10.33-34; Luc. 9.22;18.31-32) ☆ 16:25 (Mat. 10.38-39; Luc. 14.27) ☆ 16:27 (Sal. 62.11-12; Eze. 33-20; Mat. 25.31; Rom. 2.6)

¹ Seis (6) kinta nangkamaramtai, Jesús Pedroncha, tura Santiagoncha, tura ni yachiin Juannasha akanak juki, mura juunnum wakarmiayi. ² Tura wakaarai, Jesús aneachmau yapaijmiamia jiitsumir wajaun wainkarmiayi. Tura yapiisha tsa tsantua nunisang tura entsatirisha nekas puju tsa tsantua nunisang jiitsumir amiayi. ³ Nunia Moisésnasha, tura Elíasnasha, Jesúsjai chichainaun wainkarmiayi. ⁴ Nuna wainak Pedro Jesúsán chicharak:

—Apuru, juni ii pujustincha nekas pengkeritai. Ame wakerakminkia, kempatam jeawach jeamkami, kichik aminu, tura kitcha Moisésnau, tura kitcha Elíasnau ati, —timiayi.

⁵ Pedro tu chichaak wakai, yurankim nekas puju winimiayi. Turamtai mikinum wajainai, nu yurangminmaya chichaun antukarmiayi. Yus niin chicharak:

—Juka wína Uchiruitai, wína aneetiruitai. Junaka pengker nintimtusán pujajai. Juka nekasrum anturkataram, —timiayi.✠

⁶ —Yus tamati nu chichaman antukar, Jesúsá nuiniatiri ainu nukap shaminak pinakumrar tepesarmiayi. ⁷ Tuminamtai Jesús taa, ni nuiniatiri namangkén anting chicharak:

—Shamkairap, antsu wajakaram, —timiayi.

⁸ Tama pangkainiar jiisar, aya Jesúsna wainkarmiayi.

⁹ Nunia muranmaya kuankiar, Jesús ni nuiniatiri ainu akatar akupak:

—Aints ayatun Yus akupkamu asan, wikia jakamunmaya nantaatsain atum waitkarume nuka pengké etserkairap, —timiayi.

¹⁰ Tama ni nuiniatiri ainausha Jesúsán iniinak:

—¿Moisésa chichame nuikiartin ainausha warukaya Mesfaska taatsaing, Elías eemak tatinuitai tinawa? —tiarmiayi.

¹¹ Tu tinam Jesús aimiak:

—Nekas Elías eemak taa mash iwiaratnuitai. ¹² Tura wisha atumin tajarme: Elfaska yaanchuik tamiayi. Tura waininayat aints ainu: Juwaapita tusar pengké nekaacharmiayi. Antsu pasé asar, niin pasé awajartas wakeriarmia nunaka mash turuwarmiayi. Tura wínaka Yus akuptuku waitinayat aints asamtai, winasha nunisarang wait wajakti tusar, pasé awajtukartatui, —Jesús timiayi.✠

¹³ Tama ni nuiniatiri ainu nintimsar: Imiakratin Juankun pachisampi tawa tusar nekaawarmiayi.✠

Jesús uchinmaya iwianch jiikmiauri

(Marc. 9.14-29; Luc. 9.37-43)

¹⁴ Ataksha aints pujuinamunam jearamtai, aints tari Jesúsán naka tikishmatramiayi. Tura chicharak:

¹⁵ —Apuru, uchir wait anentrata. Nukap wait wajawai. Tuke wichi wajak, nuniangka ji kapaamunam ayaaweawai. Tura entsanmasha pe ayaaweawai. ¹⁶ Tura asamtai ami nuiniatiram ainu uchirun tsuwatrurarat tusan itarmiajai. Turayat tujinkari, —timiayi.

¹⁷ Tama Jesús chicharak:

—Maj, Yus nintimchau asaram, winasha nekasampita turutaram tusanka ¿warutam musachik atumjaisha pujustaj? Tura tupin nintimrataram tusanka ¿warutam musachik atumnasha nakastajrume? Watska, uchi itartitaram, —timiayi.

¹⁸ Tama uchin itarim, Jesús uchi namangkenia iwianchin jiiki jiyak akupkamiayi. Turam nu uchikia pengker wajasmiai.

¹⁹ Turamtai jumchik arus ni nuiniatiri ainauti Jesúsjai kanakar iik pujusar Jesús chicharkur:

—¿Warukakrik iikia iwianch jiiktatkamarsha tujinkamji? —timiaji.

²⁰ Tu takurin Jesús chichartamak:

✠ 17:5 (Mat. 3.17; 2.Ped. 1.17-18) ✠ 17:12 (Mal. 4.5) ✠ 17:13 (Mat. 11.14; Marc. 9.11-13)

—Yus miatrusrumek nintimtachu asaram, iwianch jiiktatkamaram tujintarme. Nekasan tajarme: Mostaza jingkiaji timiá tuupich ayat nuka tsapai, chikich nupaa nangkamasang nekas juun wajaayi. Atumsha mianchau ayatrumek, winaka nintim-tursaram: Nekasam tujinkachuitme turutkurminkia, wi turataram tinu asamtai, mura nekas juun wainkaram, nu mura chicharkuram: ‘Juni mengkakam ataksha atu tsapuitia,’ takurminkia turunamnawaitai. Aints wína: Nekasampi tujinkachuitme turutuka ni tujinkamuringkia pengké atsutnuitai. ²¹ Antsu ijiarmaram Yus nukap seatkuram nu iwianch ainau jiiktinuitrume, —turammiaji. ✠

Jesús ataksha ni jakatniurin pachis etserkamuri

(Marc. 9.30-32; Luc. 9.43-45)

²² Nunia jiinkir Galilea nungkanam iruntrar wekaasar, Jesús ni nuiniatiri ainautin chichartamak:

—Wikia Yus akupkamutiatnak aints asamtai, aints ainau wína mantuwartas achirkar-tatui. ²³ Tura maamaitiatnak kempatam kinta tepayatun ataksha nantaktatjai, —turammiaji. ✠

Turamin asamtai ni nuiniatiri ainauti nu chicham antukar nukap wake mesekmiaji.

Yuse jee iwiarami tusar akiimiakmauri

²⁴ Nunia jiinkir Jesús ni nuiniatiri ainautijai Capernaum yaktanam jeamiaji. Tura nuni jearin, Yus seatai juun jea iwiarami tusar kuikian juu ainau Pedron jiisar iniinak:

—¿Yuse jee iwiaratnun akiimina nunasha atumi nuitamnusha akiimiaktimpiash? —tiarmiayi.

²⁵ Tu iniinam Pedro:

—Ja ai, —timiayi.

Tura jea waya chichaatsaing, Jesús niin chicharak:

—Simónka ¿amesha itieur nintime? ¿Junia apu ainausha yana kuikiarina juwinawa? ¿Ninu aintsri kuikiarinak juriina? ¿Antsu turachkungka chikich aintsu kuikiarinak juriina? —timiayi.

²⁶ Tu iniam Pedro aimiak:

—Nekasar chikich ainau kuikiarin juriinawai, —tamati Jesús chicharak:

—Nekasam tame. Ii nungkarin akiinautikia akiimiakchatnuitji. ²⁷ Antsu iin kajer-tamkarai tusar akiimiakmi. Ame tsau jukim kuchanam weta. Tura nangkimiam namak nu nangkamtaik tsaun yuwa nu wakemim, jangke iwiankam kuik engketu wainkatatme. Nu kuik jukim, Yus seatai jeanam weme, jean iwiararti tusam, aminusha tura winarusha ati tusam akiimiakta, —Jesús timiayi.

18

Yaachita chikich ainaun nangkamaskesha timiauri

(Marc. 9.33-37; Luc. 9.46-48)

¹ Nu kintati ni nuiniatiri ainauti Jesús tarir chicharkur:

—¿Yuse pujutiri nayaimpinmaka aints ainau jeartinua nuka chikich ainaun nangkamasarkesha ya ainia? —timiaji. ✠

² Tu iniam Jesús uchin untsuk japen awajas ni nuiniatiri ainautin ³ chichartamak:

—Nekasan tajarme: Atumi nintimtai yapajiam uchia nunisrumek wína nintimturhakrumka, Yuse pujutirin nayaimpinmaka jeashtinuitrume. ⁴ Tura asamtai aints miajuitjai tutsuk, antsu ju uchia nunisang nintimturas pujauka chikich ainaun nangkamasang Yuse pujutirin jeatnuitai. ⁵ Aints wína nintimturas pujauka ju uchia nunisang aints mianchau ainaun nekas pengker awajuka winasha nunisang pengker awajawai, —Jesús turammiaji. ✠

✠ 17:21 (Mat. 21.21; Marc. 11.23) ✠ 17:23 (Mat. 16.21;20.19;27.63) ✠ 18:1 (Luc. 22.24) ✠ 18:5 (Marc. 10.15; Luc. 18.17)

Tunaanum jeai tusaram aneartaram
(Marc. 9.42-48; Luc. 17.1-2)

⁶ Nunia Jesús nuikiartutai chichamjai iin nuitamak: “Tura aints uchin wína umirtinak pujuinaun tunaun takamtikmataikia, nuna turashti tusar, tunau takamtiknu kuntujen kaya juuntan jingkiatawar, juun kunanam ujugkaramtaikia, timiá pengker atinuitai. ⁷ Chikichan tunau takamtikin ainauka tuke irunui. Antsu tunau takamtikin ainau tuke wait wajakartin ainawai.

⁸ “Tura asamtai atumi uweje tunau takamtikramataikia, ataksha tunau takasai tusaram, atumi uweje met charawa nunisrumek tunaarum japaram ukuktaram. Tura tunaanum wekaakurmeka, atumi nawe met charawa nunisrumek tunaarum japaram ukuktaram. Nekasrum kichik uwejjai, tura kichik nawejaisha tuke iwiaaku pujustinnum jeatin timiá pengkeraitai. Antsu mai uwejtuk, tura mai nawentuk ji kajintrashtinnum jeatnuka timiá paseetai. ⁹ Tura atumi jiijaisha tunau aa nu jiiakrumka, atumi jii kuinua nunisrumek tunaarum japaram ukuktaram. Nekasrum kichik jijjai tuke iwiaaku pujustinnum jeatnuka timiá pengkeraitai. Antsu mai jiintuk ji kajintrashtinnum jeatnuka timiá paseetai,” Jesús turammiaji.✠

Uwija mengkakaun pachis nuikiartamuri
(Luc. 15.3-7)

¹⁰ Nunia Jesús ataksha iin nuitamak: “Tura asamtai atumin tajarme: Yuse awemamuri aints mianchau ainaun wainin asar, wína Apaachir nayaimpinam puja nuna nakaj pujuinawai. Tura asar atumi turamurinha wína Apaachirnasha ujainawai. Tura asaramtai mianchau ainau ju uchua nunisarang pujuinauka nakitraitap. ¹¹ Wisha aints ayatun Yus akuptuku asamtai, aints mengkakarua ainaun uwentikratasan tamiajai.✠

¹² “Nintimrataram. Aints cien (100) uwijartin ayat, uwijari kichik menakmtai, chikich noventa y nueve (99) mengkakarua ainau muranam pujusarat tusa ukuki, kichik mengkakaun wainkataj tusa eawai. ¹³ Tura nu uwija mengkakaun wainak nukap waraawai. Antsu chikich noventa y nueve (99) mengkakarua ainaun wainkangka miatruska waraatsui. ¹⁴ Tura atumi Apaachiri nayaimpinam puja nusha nunisang aints mianchau kichkisha mengkakarta tusangka wakeratsui,” Jesús turammiaji.

¿Cristo nemarkin ititurak tsangkuratnuita? timiauri
(Luc. 17.3-4)

¹⁵ Nunia ataksha Jesús iin nuitamak: “Aints Yusen nemarkin amin pasé awajtamatikia, amek ningki akankam chichasta. Tura nijai chichaakum, ni pasé turamuri ujakta. Turakum ni anturtamkamtaikia, nu aintska uwemrati tusam yaingkume. ¹⁶ Antsu amin anturtamkachamtaikia, aints kichik tura jimiarchiksha jukim, ataksha jiistarium weritaram. Tura chichaman paan nekaati tusaram iruntramam chicharkataram. ¹⁷ Tura pengké anturtamkachamtaikia, Yuse aintsri iruntramunam nu aints pachisrum chicharkataram. Tura nuni chicharmaitiat, tuke antukchamtaikia, nuka Yusen umirkachua nunisketai tusaram, tura kuikian kasamnua nunisketai, tu nintimsaram inaisataram.

¹⁸ “Nekasan tajarme: Atumka ju nungkanmaya ainau tunaari tsangkurakrumningkia, nayaimpinmasha ni tunaarisha tsangkuratnuitai. Tura ju nungkanmaya ainau tunaarin tsangkurchakrumningkia, nayaimpinmasha ni tunaarinka tsangkurashitnuitai.✠

¹⁹⁻²⁰ “Ataksha tajarme: Aints jimiarchiksha, tura kampatmaksha wína nintimtursar iruntrar pujuinamtaikia, wisha nijai tsaniasan pujustinitjai. Tura asamtai ju nungkanmasha wína nintimtursaram pujautirmeka, jimiarchiksha metek nintimsaram pujusrum wína Apaachir nayaimpinam puja nu seakrumningkia, atum searme nunaka mash umiktinuitai,” Jesús turammiaji.

²¹ Tama nunia Pedro Jesúsán weri iniak:

✠ 18:9 (Mat. 5.29-30) ✠ 18:11 (Luc. 19.10) ✠ 18:18 (Mat. 16.19; Juan 20.23)

—Apuru, wína yatsur pasé awajtus pujamtaisha ¿warutmanak tsangkurataj? ¿Sietenkeash tsangkurataj? —timiayi.

²² Tu iniam Jesús ayaak:

—Atsa. Sietik tsangkurata tatsujme, antsu pachitsuk tsangkurata tajame, —timiayi.

Aints tsangkukratan nakitaun pachis nuikiartamu

²³ Nunia Jesús ataksha nuitamak: “Tura asamtai Yus aints ainaun nayaimpinmaya inawa nuka junia apua tumawaitai. Nu apuka ni inatiri ainaun untzuk: ‘Tumashnum akirkataram,’ timiayi. ²⁴ Tura untsuam, nu nangkamtaik nukap tumashmiaun itaarmiayi. Nuka pengké akiimiakchamniaun tumashmiamiayi. ²⁵ Tura itaaram nu aints ni tumashrin akiimiaktatkama tujinkau asamtai, nu apuka chikich inatiri ainaun chicharak: ‘Tumashrin akiimiakti tusaram, nuwartuk tura uchirtuk, tura warinchurtuk mash surutkataram,’ timiayi. ²⁶ Tama nu aintska apurin nakaj tikishmatar: ‘Apuru, wait aneamam nakarsata. Tumashnumka mash akiktatjame,’ timiayi. ²⁷ Tama nu aintsun wait anentar tumashrin mash tsangkur: ‘Akirtsuksha weta,’ tusa inatirin angkan akupkamiayi.

²⁸ “Akupamu asa, nu aintska jiinki, aneachmau ni apuri inatirin kichan wainkamiayi. Tura wainak, nu aintska jumchik tumashmiau asamtai, tsekengki suwenam achik chicharak: ‘Tumashmiamé nuka yamaik akirkata,’ timiayi. ²⁹ Tama nu aintska tikishmatar: ‘Wait aneamam nakarsata. Tumashnumka mash akiktatjame,’ timiayi. ³⁰ Tamaitiat pachischamiayi, antsu wait anentsuk nu aintsun juki: ‘Tumashnum mash akiimiak jiinkiti,’ tusa kársernum engkeamiayi. ³¹ Turamtai nu apu inatiri chikich ainu nuna wainkar napchau nintimrarmiayi. Tura apurin weriar, nu aintsu turamurin mash ujakarmiayi. ³² Mash ujakaram, apuka nuna antuk, nu aints utitaram tusa, ni aintsrin akupkamiayi. Tura itaaramtai, nu aintsun chicharak: ‘Netsetme. Wína wait anentrurta turutu asakmin, tumashnum mash akirtsuk asata tusan inaisamjame. ³³ ¿Wi amin wait anentajme aintsamek chikich amin tumashmiarmausha waruka wait anentsuksha waitkame?’ timiayi. ³⁴ Tura nu aintsun kajerak suntarin untsurak: ‘Juka achikrum tumashrin akiimiakchau asamtai, tuke wait wajakti tusaram awatrataram,’ tusa ni aintsrin akatar akupkamiayi,” Jesús turammiaji. ³⁵ Nunia inangnamunam chichaak:

—Atumnasha tajarme: Nu aintsua nunisrumek atumi yachí ainu tuke napchau nintimtusrum tsangkurtsuk pujakrumningkia, nu apua nunisang wína Apaachir nayaimpinam puja nuka atumnasha tsangkutramrashtinuitrume, —Jesús turammiaji.

19

Nuwa japashtinun pachis etserkamuri

(*Marc. 10.1-12; Luc. 16.18*)

¹ Jesús nuna tina ukuki Galilea nungkanmaya jiinki, Jordán entsa amajin Judea nungkanam wemiayi. ² Tura nuni jeamtai, aints untsuri Jesúsán nemarkarmiayi. Turinamtai Jesús jau ainauncha tsuwarmiayi. ³ Tura fariseo ainu Jesúsán nekapsartas iniinak:

—¿Aints ni nuwarin pachitsuk japa ukukminkai? —tiarmiayi.

⁴ Tu iniinam Jesús ayaak:

—Atsa. ¿Atumka Yuse papiri aarmauringkia aujchaukitrum? Tu aarmawaitai: ‘Nu nangkamtaik Yus aishmangnasha, tura nuwancha najanamiayi.’[☆]

⁵ “Tura nusha aarmawaitai: ‘Tura asamtai aishmang ni aparincha, tura ni nukurincha ukuki, nuwarijai tsaning jimiaraitiat kichkia nunisang atinuitai.’ ⁶ Tu aarmau asamtai, jimiar ayat kichkia nunisketai. Tura Yus tu tinu asamtai, aints kichkisha nuwarin japashtinuitai, tura nuwasha kichkisha aishrin ukukchatnuitai, —Jesús timiayi.[☆]

⁷ Tama chicharinak:

[☆] 19:4 (Gén. 1.27;5.2) [☆] 19:6 (Gén. 2.24)

—Tura Moisés chichaak: Aints papin aar: Nuwarun ukuajai tusa, nuna nuwarin nu papin susa ukuktinuitai ¿waruka nuka timiayi? —tiarmiayi.

⁸ Tu tinam Jesús aimiak:

—Atumi nintijai timiá katuram nintimu asakrumin, Moisés nunaka tsangka-tramkamarume. Antsu nu nangkamtaikia nuniska achamiayi. ⁹ Tura asamtai atumin tajarme: Aints ni nuwarin kichjai pujachu wainiat, niin ajapa ukuki chikich nuwan nuwatkungka, tunau wajastinuitai. Tura aints nuwan ajapamun nuwatkungka, nusha nunisang tunau wajastinuitai, —Jesús timiayi.✠

¹⁰ Tama ni nuiniatiri ainauti Jesús chicharkur:

—Nekas nuwa ajapar ukukchamnawaitmatikia, nuwasha nuwatkachminuitai, —timiaji.

¹¹ Tu takurin Jesús airmak:

—Nuwan nuwatsuk pujustin pachis chichamnaka aints mash antukminka ainatsui. Antsu Yus nekamtikiamu ainauka ju chichaman antukmin ainawai. ¹² Chikich aints uchin yajutmarchamnausha akiinawaru ainawai. Tura kitcha uchin yajutmarchami tusar kaamtikiamu ainawai. Antsu kitcha Yuse takatrin takakmasartas nuwan tuke nuwatsuk pujuinawai. Ju chichaman antukarmin ainauka antukarti tajarme, —turammiaji.

Uchi ainau wini winiarti timiauri
(Marc. 10.13-16; Luc. 18.15-17)

¹³ Nunia aints ainau uchi irunun itariar, Jesúsán seainak:

—Ame uchi muuken achikiam Yus seatrita, —tusar itariarmiayi. Tinamtai ni nuiniatiri ainauti chicharkur:

—¿Waruka apusha waitkarme? —timiaji. ¹⁴ Tu tarin wainiat Jesús chichartamak:

—Uchi irunu wini winiarat tusaram tsangkatraktaram. Aints ju uchua nunisarang nintimsar pujuinauka Yuse pujutirin nayaimpinam jeartinuitai. Tura asaramtai suritrukairap, —turammiaji.

¹⁵ Tura uchi muuken kichnasha kichnasha achik, Yusen seati umis, nuniangka jiinki wemiayi.

Natsa kuikiartin Jesúsjai chichasmauri
(Marc. 10.17-31; Luc. 18.18-30)

¹⁶ Nunia natsa Jesúsán jiistas jeari chicharak:

—Nuikiartinu, nekas pengkeraitme. Tura asakmin iniajme: Pujut nangkankashtinun jukitashasha ¿warí pengker aa nuna takakmasminuitja? Nu ujatkata, —timiayi.

¹⁷ Tama Jesús ayaak:

—¿Waruka pengkeraitme turutme? Nekas pengker aa nuka kichkitai. Nuka Yusketai. Ameka tuke iwiaaku pujusmi takumka Yus: Wína chichamur umirtuktaram tímia nuka miatrusmek umirkata, —timiayi.

¹⁸ Jesús tama nu natsaka iniak:

—¿Tu chichama nekas umiktinuita? —tama Jesús ayaak:

—Nu umiktin chichamka nuwaitai: Mangkartuwairap. Tura tsanirmawairap. Tura kasamkairap. Tura aints kichkisha pachisrum tsanurairap. ¹⁹ Tura aparmesha tura nukurmesha umirkataram. Tura atumi namangke anearme nunisrumek chikich aints ainausha aneetaram, tu aarmawaitai, —timiayi.✠

²⁰ Jesús tama nu natsa chicharak:

—Ame tame nunaka uchiwach asanak tuke mash umikuitjai. ¿Nuniasha warina umiktinuitja? —timiayi. ²¹ Tu iniam Jesús ayaak:

—Nekas pengker ata takumka, ame wariram aa nu mash surukta. Tura kuikian yuuminau susata. Nunia wína nemartusta. Turakum nekasam nayaimpinam yuumatsuk pujustinuitme, —timiayi.

²² Jesús tama nu natsaka nuna antuk, nekas kuikiartin asa, kuikiarin aneak wake mesek nunia jiinki wemiayi.

✠ 19:9 (Mat. 5.31-32) ✠ 19:19 (Ex. 20.12-16; Lev. 19.18; Deut. 5.16-20)

²³ Tura ukukim Jesús ni nuiniatiri ainautin chichartamak:

—Nekasan tajarme: Kuikiartin ainau Yus pujamunam wayaawartatkamawar nekasar tujinkartinuitai. ²⁴ Ataksha tajarme: ¿Kamiyusha juun asa, akusha jiin wayaamnaukai? Atsa, nuka pengké yumtinueitai. Tura kuikiartinka Yus pujamunam wayaatnuka timiá yumtinueitai, —turammiaji.

²⁵ Tu turamin asamtai ni nuiniatiri ainauti nu antukar nukap nintimrar chicharkur:

—Tu amataisha ¿yaachik nuniasha uwemramnawaita? —timiaji. ²⁶ Tu iniam Jesús mash jiiimas chichartamak:

—Aints ningki nintimsangka uwemrachminuitai. Antsu Yuska pengké tujinkachu asa, aints ainaun uwemtikratnuitai, —turammiaji.

²⁷ Turammatai Pedro chicharak:

—Apuu, iinu amia nuka mash ukukir, ame nemarkamiaji. ¿Iincha waring arutramtaij? —timiayi.

²⁸ Tu iniam Jesús ayaak:

—Nekasan tajame: Ukunam ju nungka aa nuka mash yamaram najanatin awai. Nuniangka wikia aints ayatun, Yus akupkamu asan, mash aints ainaun inartinuitjai. Tura wikia juun apu keemtairin keemsamta, atumsha wina nemartuku asaram, Israela uchiri doce (12) amia nuna weari ainau inartasrum, atumsha nunisrumek apu keemtairin doce (12) atinua nuni keemsatnuitrume.✠

²⁹ Tura aints ainau wina anentu asar, ni jeencha ukukiar, tura yachiincha, tura umajincha, tura aparincha, tura nukurincha, tura uchirincha, tura nungkarincha ukukin asar, ni ukukiarmia nuna nangkamasarang untsuri wainkartin ainawai, tura ukunmasha pujut nangkankashtinun jukiartin ainawai. ³⁰ Aints untsuri ningki nintimsar: Wikia chikich ainaun nangkamasketjai tinu ainau nu kinta jeamtai mianchau artinueitai. Tura yamai mianchau ainauka ukunam chikich ainaun nangkamasarang artinueitai, —Jesús timiayi.✠

20

Aja takau ainaun pachis nuikiartamu

¹ Nunia Jesús ataksha nuitamak: “Yus aints ainaun nayaimpinmaya inawa nuka ajartinua tumawaitai. Uva yurangke tsamaramtai, ajartin uva yurangkan juuktas, aints ainaun ipiaatas kashik jiinkimiayi. ² Tura jiinki aints ainaun wainak: ‘Ju kinta wina ajarun takakmastaram tusan, kichik kuik denario tutain akiktatjarme,’ tama niisha ‘ayu’ tusar ajanam takakmasartas wearmiayi. ³ Tura nuni wearamtai, tsaa yakí wajasai, ataksha jiinki yaktanam weak, jea aarin nangkamiar wajainaun wainak chicharak: ⁴ ‘Atumsha wina ajarun werum, uva yurangke juwaakrum yainkataram. Turakrumningkia atumi takatrin metek akiktatjarme,’ tama nusha nunisarang ‘ayu,’ tusar takakmasartas wearmiayi. ⁵ Wearamtai tsaa tupin wajasamtai, nunia tsaa yantantiamtai, ajartin ataksha jiinki aints ainaun: ‘Atumsha takakmastaram,’ tusa akupkamiayi. ⁶ Nunia tsaa nungka wajasai, ataksha ajanmaya jiinki yaktanam we, nuni aints nangkamiar wajainaun wainak: ‘¿Waruka pengké takakmatskesha wajarme?’ tu iniasmiayi. ⁷ Tu iniam aiminak: ‘Maj, aints kichkisha ipiatminachu asaramtai takakmatsji,’ tinamtai ajartin chicharak: ‘Atumsha wina ajarun werum takatur yainkataram. Turakrumningkia atumi takatrincha metek akiktatjarme,’ tama nusha nunisarang ajanam wearmiayi.

⁸ “Kintamramtai ajartin ajan wainiun untsuk: ‘Ajan takau ainau untsukam akikiarta. Tsaa nungká wajasai nangkamawaru ainau nuwá eemkam akikiarta, tura kashik nangkamawaru ainauka inangnamunam akikiarta,’ tusa akupkamiayi. ⁹ Tama ajan takau ainaun untsuk, angkuanmatai nangkamawaru ainaun nuná eemak kichik kichik kuikian denario tutain akikmiayi. ¹⁰ Nuniasha takatan kashik nangkamawaru ainau: Iiyá takatka nangkamau asakrin, ¿iincha nukap akirmakchatjiash? tu nintimnau wainiat, chikich ainaun akikmia nunisang nu aints ainauncha kichik kuikianak akikmiayi. ¹¹ Tura nunak

✠ 19:28 (Mat. 25.31) ✠ 19:30 (Mat. 20.16; Marc. 10.31; Luc. 13.30)

jukiaru asar, napchau nintimrar ajartinun jiisartas weriarmiayi, tura jeariar ajartinun jiyainak: ¹² ‘¿Waruka aitkame? Uku takakmasaru ainau aya kichik uranak takakmasaru wainiatmesha ¿warukaya meteksha akikratkame? Antsu iikia kintajai metek tsaasukutmau wainiatur takakmakur wait wajakmaji,’ tu jiyakarmiayi. ¹³ Tinamtai ajartin nu aintsun chicharak: ‘Sairua, wikia aminka pengké kasartsujme. Kichik denario akiktatjame, wi tama ¿ameka ayu tichamkum? ¹⁴ Pai, kuikiaram jukim weta. Tura wi ukunam takakmasaru ainaun amijai metek akiktasan wakerajai. ¹⁵ Wina kuikiar asamtai, wi wakeramurun turamnawaitjai. Wikia pengker asan, chikich ainaun wait anentrai wainiatmesha ¿waruka winasha suwirpiaku jiirsamsha napchau nintimtusamsha pujame?’ timiayi,” Jesús turammiaji.

¹⁶ Jesús nu nuikiartamun iin nuitamak: “Yuse aintsri ainausha aja takakminua nunisarang ainawai. Eemkar Yusen nemarkaru ainau ukunam nayaimpinam jeartinuitai. Tura ukunam Yusen nemarkaru ainau nuwá eemkar nayaimpinam jeartinuitai,” taku turammiaji.✠

Jesús ni jakatniurin ataksha etserkamuri

(Marc. 10.32-34; Luc. 18.31-34)

¹⁷ Jesús Jerusalénnum jinta wekaak, ni nuiniatiri ainautin akantamak chichartamak:

¹⁸ —Anturtuktaram. Jerusalénnum weaji. Tura Yus akupkamutiatak aints asan, sacerdote juuntri ainamunam tura Moisésa chichame nuikiartin ainamunam wina surutkar: Maataram turutiartatui. ¹⁹ Tura romano ainau wina wishikrurar, nunia katsumrukar numi winangmanum maawarti tusar surutkartatui. Tura mantuwaramtai kempatam kinta jakan tepayatun ataksha nantaktatjai, —turammiaji.✠

Santiago nukuri Jesús san seamuri

(Marc. 10.35-45)

²⁰ Nunia Zebedeo uchiri Santiago, nunia Juansha ni nukurijai Jesúsnum jear, ni nukuri Jesús san seatas tikishmatramiayi. ²¹ Turamtai Jesús iniak:

—¿Warí itiurtukat tusamea wakerutame? —timiayi. Tu iniam ni ayaak:

—Wi wakeramurka nuwaitai: Ami pujutrumin Apu pujakminkia wina uchir kichka ami untsurumnini pujus, kitcha menarminini pujus, mai apu arti tusan seajme, —timiayi.

²² Tamaitiat Jesús Santiagon, tura Juannasha chicharak:

—Atumka wina seatrume nuka warimpita tusaram nekatsrume. ¿Wi wait wajaktatja nunisrumeash atumsha wait wajaktaram? —tu iniam:

—Ja ai, turunamnawaitji, —tiarmiayi.

²³ Tu aimkaramtai, Jesús chicharak:

—Nekasrum tarume. Wi wait wajaktatja nunisrumek atumsha wait wajaktinuitrume. Antsu wina untsuruninisha, tura wina menarninisha atum keemsatnunka tsangkatkashinuitjarme. Antsu wina Apaachir nuni keemsartinun tsangkatkamu ainauk keemsartin ainawai, —timiayi.

²⁴ Jesús tama chikich diez (10) nuiniatiri ainauti nu antukar, Santiagosha tura Juansha kajerkamiaji. ²⁵ Tura kajerakrin Jesús ni nuiniatiri ainautin mash untsurmak, irutmar chichartamak:

—Atumka nekarme: Mash nungkanmaya apu ainau ni aintsrin akatrar pe akupinawai. Tura ni juuntri ainausha miajuitjai tusar, ni aintsri ainauncha tuke inarartas wakerinawai. ²⁶ Antsu atumka nuka turashtinuitrume. Tura chikich ainau nangkakatasrum wakerakrumka, chikich aintsu inatiria nunisrumek atinuitrume. ²⁷ Tura apu wajastarum wakerakrumka, chikich ainau umirin atinuitrume.✠

²⁸ “Wikia Yus akupkamutiatak aints asan, aints ainau wina yainkarat tusanka tachamiajai, antsu aints ainaun yaingtaj tusan taawitjai. Tura aintsun untsuri angkanmantikiawartasan mantuwarti tusan taawitjai, —Jesús turammiaji.✠

✠ 20:16 (Mat. 19.30; Marc. 10.31; Luc. 13.30)

✠ 20:19 (Mat. 16.21;17.23;27.63)

✠ 20:27 (Luc. 22.25-26)

✠ 20:28 (Luc. 22.27; Juan 13.12-15)

Wainmichun jimiar tsuwarmauri
(*Marc. 10.46-52; Luc. 18.35-43*)

²⁹ Jesús Jericó yaktanmaya jijnmatai, aints untsuri niin nemarkarmiayi. ³⁰ Nuni wekaamunam aints wainmichu jimiar jinta yantamen keemsar, Jesús winawai tamaun antukar untsuminak:

—Apurua, Davidta weariya, iincha wait anengkratkata, —tiarmiayi.

³¹ Tu untsuminamta aints irunu niin jiyainak: Itatkataram tinamaitiat nuna nangka-masarang kakar untsuminak:

—Apurua, Davidta weariya, iincha wait anengkratkata, —tiarmiayi.

³² Miatrusar untsumkaramtai, Jesús nuni wajas, wainmichun mai winiarti tusa untsuk-miayi. Tura iniak:

—¿Itiurtukat tusar mea wakerutarme? —timiayi.

³³ Tamati aiminak:

—Apuru, wainmachkur wainmaktasar wakeraji, —tiarmiayi.

³⁴ Tinamta Jesús wait anentar ni jijn antinkamiayi. Turam mai paan wainmakarmiayi. Tura Jesús an nemarkarmiayi.

21

Jesús Jerusalénnum wemaui
(*Marc. 11.1-11; Luc. 19.28-40; Juan 12.12-19*)

¹ Jesús ni nuiniatiri ainautijai Jerusalénnum weakur Betfagé yaktanam jeamiaji. Nu yaktaka Olivo Muranam yaatkauyayi. Tura nuni jear, Jesús ni nuiniatiri jimieran akupak:

² —Atunini yaktachinam werum, nuni jearam burro juun jingkiamu, tura uchiri yama tsakamach wainkatatruma. Nu wainkaram atiaran mai itataram. ³ Nu turakrumin aints kichkisha ininminak: ‘¿Warukaya atiar me?’ turaminamtaikia: ‘Ii Apuri yuumau asamtai juwaji. Tura wári wainkitatui,’ titaram, —Jesús timiayi.

⁴ Yuse chichame etserin yaanchuik Jesús an pachis tímia nunaka miatrusnak umiktaj tusa, nunaka timiayi. Ni timiauri tu aarmawaitai:

⁵ “Sión yaktanmaya ainan antukarat tusaram titaram: Jiistaram. Atumi Apuri wikia miajuitjai tumamtsuk, burrochinam keemas winitramui. Nuka apua nuniska winitramt-sui, antsu burro uchiri warin chu jutainum keemas winitramui,” tu aarmawaitai. [☆]

⁶ Tura akupkamu asar ni nuiniatiri wear, Jesús tímia nunisarang turuwarmiayi. ⁷ Tura yaktanam wear burron wainkar, uchirtuk mai jukiar Jesúsnum itaar, ni wejmakrin aimi-akar burronam awantsarmiayi. Turuwaramtai Jesús keemsamiayi. ⁸ Tura jinta weamta, aints untsuri jintanam wajainau: Ii Apurinme tiartas, ni wejmakrin aimiakar, jinta jepen burro wetinum aitkarmiayi. Chikich ainausha chapi nukea tumaun charukar jintanam aitkarmiayi. ⁹ Tura eemkar wear mia nusha tura uku winiarmia nusha warainak Jesús an pachisar untsumiarmiayi. Tura untsuminak:

—Ii juuntri Davidta weari nekas juuntaitai. Yus akupkamu winá nuka nekas pengk-eritai. Yus nayaimpinam puja nuka nekas juuntaitai, —tiarmiayi.

¹⁰ Tura Jesús Jerusalénnum jeamta, aints mash taetet wajainak inintrinak:

—¿Ausha yaachita? —tiarmiayi.

¹¹ Tu inintrinamta chikich aints aiminak:

—Auka Yuse chichame etserin Jesúsaitai. Nazaret yaktanmayaintai. Tura Galilea nungkanmayaintai, —tiarmiayi.

Yuse jeengka kasa jeenchuitai timiauri
(*Marc. 11.15-19; Luc. 19.45-48; Juan 2.13-22*)

¹² Jesús Yus seatai juun jeanam waya, aints ainan nuni surinak tura suminak wajainaun aanum jiiki akupkamiayi. Tura kuikian yapajinau misarin ayanturmiayi. Tura kayak suwen surinaun tutangkrincha ayanturmiayi. ¹³ Tura chicharak:

☆ 21:5 (Zac. 9.9)

—Yuse chichame tu aarmawaitai. Yus chichaak: ‘Wína jearka Yus seatai jeaitai,’ tu aarmau wainiatrum atumka kasa aints juni kuikian kasamkarat tusaram tsangkatkarume, —Jesús timiayi.

¹⁴ Nuna tura inais nuni wajai, wainmichu ainou tura wekaichau ainausha wayaawaramtai, Jesús mash tsuwarmiayi. ¹⁵ Turamtaí sacerdote juuntri ainausha, tura Moisésa chichame nuikiartin ainausha Jesús wainchati takatan turaun wainkar, tura uchi ainou Yuse jeen wayaawaru asar: Juun apu Davidta weari nekas juuntaitai tu untsuminamtaí Jesúsán kajerarmiayi. ¹⁶ Tura iniinak:

—¿Ju uchi tina nu antamek? —tiarmiayi.

Tu tinam Jesús ayaak:

—Ja ai, antajai. ¿Atumka Yuse chichame juna pachis aarmawa nuka aujchaukitrum? Tu aarmawaitai. David Yusen chicharak: ‘Uchi ainou tura kuwirach ainausha amin nekasar pengker awajtamsartas maaketai turamiarti tusam tsangkatu weame,’ timiayi.

Tu aarmawaitai, —Jesús timiayi.✠

¹⁷ Nuna tusa ukuki, Jerusalénnumia jiinki, Betania yaktanam we nuni kanurmiayi.

Jesús higuera n yumingkramuri

(Marc. 11.12-14, 20-26)

¹⁸ Kashin tsawaar, Jesús Jerusalénnum wetaj tusa jinta weak yaparmiayi. ¹⁹ Tura numi higuera tutain jinta yantamen wajaun wainak, neren akarmaktaj tusa werimiayi. Turamaitiat nukak nukak nerenchaun wainkamiayi. Tura numin chicharak:

—Ameka tuke nerechu atatme, —timiayi.

Tu tinu asamtaí nu tamaujai metek numikia kukarmiayi. ²⁰ Turamtaí ni nuiniatiri ainauti nu wainkar Jesús chicharkur:

—¿Warukaya kakarmachusha kukari? —timiaji.

²¹ Tu iniam Jesús chichartamak:

—Nekasan tajarme: Yus nekasrum nintimtakrumka tura: Nekasash turat, tu nintimtsuk pujakrumka, higuera aatkaja aintsarmek atumsha ainkamnawaitrume. Tura ju murasha chicharkuram: ‘Juni wajatsuk juun entsanam ayangta,’ takurmeka nusha turamnawaitrume. ²² Tura Yus nekas turuatatuapi, tu nintimsaram seakrumningkia, nunaka mash turuatnuitai, —turammiaji.✠

¿Yáki Jesúsán ni kakarmarin susaya?

(Marc. 11.27-33; Luc. 20.1-8)

²³ Nunia Yus seatai juun jeenam waya, Jesús aints ainaun nuiniak pujamtaí, sacerdote juuntri ainou, tura judío juuntri ainausha Jesúsán tariar chicharinak:

—¿Ame aítkame jusha yana chichamejiya aítkame? ¿Tura yaachia aítkata tusasha amincha akuptamkama? —tiarmiayi.

²⁴ Tu iniinam Jesús aimiak:

—Wisha atumnasha kichan iniastajrume. Nu aimkakrumningkia, yaki winasha akuptukma tusan nunasha ujaktatjarme. ²⁵ Watska ¿yáki Juankun aints imaita tusasha akupkaya? ¿Yuseash akupkaya? ¿Turachkusha aintsuash akupkaya? —tu iniam mai nuwamtak chicharnainak:

—¿Ilisha warintajik? Yus akupkamuitai takurningkia ¿waruka ni nekasampita tichamiarume? iincha turami tusar tichamnawaitji. ²⁶ Antsu aints akupkamuitai takurningkia, aints mash: Juan Yus akupkamuitai tinau asar, iin kajertamkarai tusar shamaji, —tunaiarmiayi.

²⁷ Tura Jesúsán aiinak:

—¿Juan aints ainou imaita tusasha yáki akupkaya? tusarsha iikia nekatsji, —tiarmiayi.

Tinamtaí Jesús aimiak:

✠ 21:16 (Sal. 8.2) ✠ 21:22 (Mat. 17.20)

—Ayu, tu tau asakrumin, yáki wina akuptukia tusancha, wisha nunisnak atumnasha ujakchatatjarne, —timiayi.

Uchi jimiaran pachis timiauri

²⁸ Tura Jesús ataksha chicharak:

—Ju nuikiartutai chicham nintimrataram. Aintsu uchiri jimiar pujú armiaiyi. Tura asaramtai nu aintska uchirin kichkin chicharak: ‘Uchiru, ajarun weme uva yurangke juuta,’ tusa akupkamiayi. ²⁹ Tu akupam uchiri ayaak: ‘Atsa, nakimiajai,’ tayat atak nintimiar ajanam wemiayi. ³⁰ Turamtai chikich uchirin nunasha nunisang: ‘Amesha ajarun weme uva yurangke juuta,’ tamati nuka: ‘Ayu apaachi, wetajai,’ tayat wechamiayi. ³¹ Nu uchi jimiaran pachisan taja nuna ¿tua ni apari wakeramurin umirkamia? —tu iniam aiminak:

—Eemak nakimiajai tayat, nunia wemia nuwaitai, —tiarmiayi.

Tinamtai Jesús chicharak:

—Nekasan tajarme: Kuikian juu ainau, tura kungkatip ainausha ni tunaarin mash inaisar, atumin nangkamasarang Yuse pujutirin wayaawartin ainawai. ³² Imiakratin Juan chichaak: ‘Pujutrum tu yapajiarum uwemratnuitrume,’ tusa atumin nuitamratas winitramu wainiatrum nekasampita tichamiarume. Aintsu kuikian juu ainau tura kungkatip ainausha Juanku chichamen antukar nekasampita tiarmiayi. Atumka nuka nekayatrume, ni umirkatasrumka atumi tunaaringkia inaisachmiarume, —Jesús timiayi. ☆

Pasé takau ainaun pachis nuikiartamu

(*Marc. 12.1-12; Luc. 20.9-19*)

³³ Nunia Jesús ataksha aints ainaun nuiniak: “Chikich nuikiartamu antuktaram: Aints uva naekrin ni ajarin araamiayi. Tura ajanka wenurmiayi. Tura uva yumiri juutai nu ajanmak najanamiayi. Tura ajan wainkatnun wenurmaunum yakí wajatirin najatamiayi. Tura mash pengker iwiar, aints ainaun eak: ‘Ajar waitruktaram,’ tusa ukuki, chikich nungkanam wemiayi. ³⁴ Tura juuktin kinta jeamtai, ni inatiri ainaun akatar akuptak: ‘Yamaikia werum, ajarun takau ainau uva yumiri winar aa nunaka akupturkarti,’ tawai tita tusa akupkamiayi. ³⁵ Akuptukmaitiat ajan takau ainau ajartinu inatiri ainaun achikiar, kichnaka katsumkar, tura kichnasha maawar, tura kichnasha kayajai tukuarmiayi. ³⁶ Turinamtai ajartin ataksha ni inatirin nuna nangkamasang untsurin akuptukmiayi. Akuptukmaitiat nu ajan takau ainau nunisarang turuawarmiayi.

³⁷ “Nuna turuawaramtai nuniangka: ‘Wína uchirnaka nekasar anturkarchanpiash,’ tu nintimias ni uchirin akupkamiayi. ³⁸ Apari akupkamu waininayat, ajan takau ainau ajartinu uchirin wainkar chicharnainak: ‘Auka ajartinu uchirintai. Apari jakamtai, ju ajaka ninu atatui. Watska maatai. Au maarkia ajaka iinu achaintak,’ tunaiarmiayi. ³⁹ Tura ajartinu uchirin achikiar ajanmaya jiikiar maawarmiayi,” Jesús timiayi.

⁴⁰ Tura nu nuikiartamun antukaru ainaun iniak:

—¿Atumsha itiur nintimrume? ¿Ajartin taa, nu ajan takau ainaun itiurkatnuita? —timiayi.

⁴¹ Tu iniam aiminak:

—Nu aints timiá pasé asaramtai, wait anentsuk maawartinuitai. Nunia nu ajartin chikich ajan takau ainaun eak: ‘Ajar waitruktaram. Tura juuktin kinta jeamtai, winar aa nuka surustaram,’ tusa ajarin takakmasarti tusa akupkatnuitai, —tiarmiayi.

⁴² Tinamtai Jesús chicharak:

—Nekasrum tarume. ¿Nu pasé aints ainau pachisrum atumka Yuse papirin aujchaukitrum? Tu aarmawaitai:

‘Jeamin ainau kaya jean jeamkar, chikich kayan wainkar chichainak: Ju kayaka paseetai tusar japawarmiayi. Japinau wainiat Yuska: Nu kayaka timiá pengkeraitai timiayi. Apu Yus nunaka wakeruku asamtai, iisha nu nintimsar pujaji.’ Tu aarmawaitai. ⁴³ Tura asamtai tajarme: Yusnum tuke pujustinka atumin suritramak, chikich nungkanmaya

☆ 21:32 (Luc. 7.29-30)

ainau tuke Yusnum pujustinka tsangkamkamuitai. ⁴⁴ Aints ainau nu kaya nekas pengker aa nunaka tukumkar kupinakartinuitai. Tura nu kaya aintsnum ayaarkungka, nu aintsun tsairtinuitai, —Jesús timiayi.

⁴⁵ Tama sacerdote juuntri ainau, tura fariseo ainausha Jesús nuikiartamun antukar: Iin pachitmas turamji tusar nintimrarmiayi. ⁴⁶ Tura yamaik achiktai tinayat, chikich aints ainau Jesús an pachisar: Yus akupkamu asa, nu chichamnaka etserui tinau asaramtai, shamkar inaisarmiayi.

22

Nuwa nuwatkamun fiestan pachis nuikiartutai chicham

(Luc. 14.15-24)

¹ Nunia Jesús ataksha nuikiartutai chichamjai etsertan nangkamamiayi. Tura chichaak:

² —Yus aints ainaun inawa nuka junia apua nunisketai. Apu uchiri nuwan nuwatkatina asamtai, fiestan najanamiayi. ³ Tura ni inatiri irunun aints ainau untsukarti tusa akupkamiayi. Untsuamaitiat nakiararmiayi. ⁴ Ataksha chikich inatiri ainaun akatar akupak: Ataksha werum untsukmau ainau ujatruktaram: Waaka ainausha mau asar, tura tangku jaerusha mau asar, atum yuwatin yanchuk mash umismawaitai. Tura asamtai nuwenmaunum winiarti, tawai titaram timiayi. ⁵ Tamaitiat untsukmau ainau nakiararmiayi. Antsu chikich ni ajarin jistas wemiayi. Tura kitcha sumatinam wemiayi. ⁶ Tura chikich ainauka apu inatiri ainaun achikiar pasé awajsarmiayi, tura kichnasha maawarmiayi. ⁷ Turinamtai apu nuna antuk kajek, ni suntari ainaun chicharak: ‘Wina aintsrun mau irunu mash maataran. Tura ni jeesha mash keematkataram,’ tusa akupkamiayi. ⁸ Ni suntari ainaun akupkam jiinkiarantai, nunia ni inatiri ainaun ataksha chicharak: ‘Nuwenmau fiesta mash umismawaitai. Antsu nuwik untsukmau ainauka pasé aints asar winicharmin ainawai. ⁹ Tura asaramtai yakta jinti ainamunam werum, aints atum wainmauka: Nuwenmaunum winiarti tusaram untsuktaram,’ timiayi. ¹⁰ Tama ni inatiri ainau jiinkiar, yakta jintin wekajinaun pasé ainauncha tura pengker ainauncha mash untsukarmiayi. Tura asar apu jeen piakarmiayi.

¹¹ Jea piakaramtai nu apuka untsukmau ainaun jistaj tusa wayaamiayi. Nuni waya jiiis, aints nuwenkur entsatinka entsatsuk pujaun wainkamiayi. ¹² Tura nu aintsun chicharak: ‘Sairua ¿waruka nuwenkur entsati entsatskesha junisha wayaame?’ timiayi. Tamaitiat nu aintska aimtsuke pujumiayi. ¹³ Turamtai apu yurumkan surin ainaun untsuk: ‘Juka achikrum, nawencha tura uwejencha jingkiaram aanum jiiikrum, tee amanum japataram. Nuni juutak, tura nain katertak nintimratatui,’ timiayi. ✠

¹⁴ Nu nuikiartutai chichaman wi taja nuka: ¿Warina takua tawa? tusaram yamaikia nekaataran. Aints untsuri nayaimpinam wayaawarti tusa Yus untsukmau ainayat jumchik wayaawartin ainawai, —Jesús timiayi.

¿Juun apu akikchatnukai? timiauri

(Marc. 12.13-17; Luc. 20.20-26)

¹⁵ Tama fariseo ainau nuna antukar, nunia jiinkiar kanakar pujusar, chichaman najatawar: Aints ainau Jesús a chichamen antukar: Nunaka timiayi tusar tsanumrarmi, tu nintimtiarmiayi. ¹⁶ Tura ni aintsri ainausha tura apu Herodesa namarin ainausha Jesús iniam, ¿nisha warintintak? tusar, ni chichamen anturkar, nuna jukiarat tusar akupkarmiayi. Tura akupkamu asar, Jesús an jeariar chicharinak:

—Nuikiartinu, ameka nekas chicham chichaame. Iikia nuka nekaji. Chikich ainauka antutsuk, ameka nekasam Yuse jinti tu awai tusam tupin nuikiartame. Tura aints ainau wina pengker nintimtusarat tusamka ameka pachiatisme. ¹⁷ Tura asakmin itiur nintime tusar, nekaataran taji. ¿Apu César ni aintsrin akupak: Kuik irumrataram tamati, ii kuikiari akiimiaktin pengkerkai? ¿Antsu akiimiatsuk pujustinka timiá pengkerkai? Nu nekaataran wakeraji, —tiarmiayi.

✠ 22:13 (Mat. 8.12;25.30; Luc. 13.28)

¹⁸ Tu iniinam Jesús ni pasé nintimaurincha nekau asa chicharak:
—Anangkartin ainautiram ¿waruka winasha anangkruaram nekaprustasrumsha wak-
erarme? ¹⁹ Watska, apu César akiktin kuik itataram, —timiayi.

Tama nu kuikian itarmiayi. ²⁰ Itaaramtai nuna jiis, Jesús iniak:

—¿Jusha yana yapiya nakumkamuita? Tura ¿yana naariya aarmawaita? —timiayi.

²¹ Tu iniam aiminak:

—Apu Césarnawaitai, —tiarmiayi.

Tinamtai Jesús chicharak:

—Tu tinu asaram, juun apu Césarnau aa nuka ni susataram. Tura Yusnau aa nuka Yus
susataram, —timiayi.

²² Tama nuna antukar nukap nintimrarmiayi. Tura Jesúsán ukukiar waketkiarmiayi.

¿Aints jakau nantaktinuashi? timiauri

(Marc. 12.18-27; Luc. 20.27-40)

²³ Nu kintati saduceo ainau: Aints jakamunmaya nantakchatnuitai, tinu ainauka
Jesúsán tariarmiayi. ✠ Tura Jesús warintintak tusar chicharinak:

²⁴ —Nuikiartinu, Moisés chichaman aarmia nu chichamka nuwaitai: ‘Aints uchin
yajutmatsuk jakamtaikia, yachí uchin yajutmartas wajerin nuwatkati. Tura uchin
yajutmarsa nuka ni yachí jakau uchiriyá nunisang atinuitai,’ tu aarmawaitai. ✠

²⁵ Ayu, juni iijai iruntrar siete (7) yachintin pujú armiayi. Tura eemkauri nuwan
nuwatak, uchin yajutmatsuk jakamtai, chikich yachiisha wajerin nuwatkayat, ²⁶ nusha
nunisang uchin yajutmatsuk jakamiayi. Tura nusha nunisang jakamtai, chikich yachí
wajerin nuwatkayat, nusha nunisang uchin yajutmatsuk jakamiayi. Tura kitcha kitcha
siete (7) yachintin nu nuwan nuwatinayat, mash uchin yajutmatsuk kajingkiarmiayi.

²⁷ Nunia nuwasha ukunam jakamiayi. ²⁸ Tura nu siete (7) yachintin mash nu nuwan
nuwataru asar ¿jakamunmaya nantakiar nu nuwaka yana nuwariya atinuita? —tu
iniasarmiayi.

²⁹ Tu iniinam Jesús ayaak:

—Yuse chichame nekachu asaram, tura Yuse kakarmarisha wainkachu asaram,
jakamunmaya nantaktin atsawai takuram pe nuwaarme. ³⁰ Nintimrataram. Jaka-
munmaya nantakiaru ainauka nuwanka nuwatkachartinuitai. Tura nuwasha aintsun
ninumkachartinuitai. Antsu Yuse awemamuri nayaimpinam pujuina nunisarang
nuwartichu artinuitai. ³¹ Tura ¿Yus jakau ainau nantakiartinun pachis turammia nuka
aujchaukitrum? Yus chichaak: ³² ‘Abrahama Yusrinka wiitjai. Tura Isaaca Yusrinka
wiitjai. Tura Jacobo Yusrinka wiitjai,’ timiayi. Tura Yus nu aints yaanchuik jakaru
ainayat, tuke iwiaaku ainawai timiayi. Tu tinu asamtai, Yuska jakau ainau Yusrintai
tarume nuka tuchuitai. Antsu tuke iwiaaku ainau Yusrintai, —Jesús timiayi. ✠

³³ Tama aints ni nuikiartamun antukar nukap nintimrarmiayi.

Chicham umiktin nekas pengker aa nuna pachis etserkamuri

(Marc. 12.28-34)

³⁴ Jesús saduceo ainaun itatmamtikiau asamtai, fariseo ainau nuna antukar irun-
trarmiayi. ³⁵ Turuwar kichik fariseo Moisésa chichamen nuikiartin asa, Jesúsán nekap-
satas yuumatkat tusa iniastas werimiayi. Tura Jesúsán jeari iniak:

³⁶ —Nuikiartinu ¿chicham umiktin chikich chichaman nangkamasang pengker aa
nuka tuni aarmawaita? —timiayi.

³⁷ Tu iniam Jesús ayaak:

—Chikich umiktin chicham ainia nuna nangkamasang nuná eemak umiktinka
juwaitai: ‘Ami Yusrum aminu Apuram asamtai, tuke nintimaurumjai aneen ata. Tura
asam tuke inaitsuk Yus nintimsam aneeta.’ ✠

✠ 22:23 (Hech. 23.8) ✠ 22:24 (Deut. 25.5) ✠ 22:32 (Ex. 3.6) ✠ 22:37 (Deut. 6.5)

³⁸ Juka chikich umiktin chicham ainia nuna nangkamasketai. Nuwá eemkar umiktinka juwaitai. ³⁹ Tura chikich chicham jujai metek tausha juwaitai: ‘Ami namangkem aneame nunismek chikich aints ainausha aneeta.’[☆]

⁴⁰ Ju jimiari umiktin chicham umirkamka, Moisés chichaman akupkamia nusha, tura yaanchuik Yuse chichame etserin ainau tiarmia nusha pachitsuk umirkatnuitrume, — Jesús timiayi.[☆]

¿Mesíascha yana wearinta? timiauri

(Marc. 12.35-37; Luc. 20.41-44)

⁴¹ Tura fariseo ainau tuke iruntrar pujuinai, ⁴² Jesús iniak:

—¿Yuse chichame etserin ainau Yus akupkatnun Mesías tutain pachisar aararmia nuka yana weariya atinuita? ¿Atumsha warintrume? —timiayi.

Tu iniam aiminak:

—Mesíaska Davidta weara atinuitai, —tiarmiayi.

⁴³ Tinamtai Jesús chicharak:

—Tura Yuse Wakani tu aamtikramu asa, Davidcha papinum aak: ¿Yus akupkatnun Mesíasan warukaya Apuru timiayi? Mesías ni Apuri asamtai nunaka timiayi. Tura papinum aak:

⁴⁴ Apu Yus wína Apurun chicharak: ‘Juni wína untsurunini apu keemtainum keemsam nakarsata. Tura nakarkumin ami nemasem ainaun mash nepetkatatjai,’ timiayi.

⁴⁵ Davidka Yus akupkatnun Mesíasan pachis: Wina Apuru itai tinu wainiatrumsha ¿waruka Davidta uchirintai tarume? —tu iniasmiayi.

⁴⁶ Tu iniamaitiat, aints kichkisha aimkacharmiayi. Tura nuniangka aints kichkisha Jesúsnekapsartas chichaman pengké iniascharmiayi.

23

Fariseon tura Moisésa chichame nuikiartin ainauncha Jesús chicharkamuri

(Marc. 12.38-40; Luc. 11.37-54; 20.45-47)

¹ Nunia Jesús ni nuiniatiri ainautin tura chikich aints ainauncha chicharak:

² —Moisésa aarmauri nuikiartin ainausha, tura fariseo ainausha: ¿Moisésa aarmauri warina takua tawa? tusar nekamtikin ainawai. ³ Tura asaramtai ni timiauri mash umirkuram atumin turamina nuka mash turataram. Antsu ni timiaurin ningki umitsuk pujuinamtaisha, ni pujuina nunisrumka pujusairap. ⁴ Ni chikich ainaun: Nu chicham umirkataram tinayat, nu chichaman umitsuk pujuinawai. Tura asar aints chikich ainaun: Ju meram aa juka entsastaram tinayat, kichik uwejejaisha yaiitan nakitinawai. ⁵ Antsu tuke mash wína jiirsarat tusar, ni turina nunaka turinawai. Turinau asar, Yuse chichame aarmaurincha sarman ni nijajin nujkar, tura ni kunturincha jingkiawar wekainawai. Tura ni wejmakrin chikich ainaun nangkamasarang sarman entsainawai. ⁶ Tura miajuitjai tusar, iruntrar yutai yuwamunmasha apu keemtairin keemsartas wakerinawai. Tura iruntai jeanmasha wayaawar, keemtai pengkernum keemsartas wakerinawai. ⁷ Tura junta ingkungkar, chikich ainausha mash: Wína jiirsar aujtusarat tusar, tura nuikiartinu turutiarti tusar wakerinawai.[☆]

⁸ Tura mash aints ainau atumi yachiiya nunisarang asaramtai: Nuikiartinu turutiarat tuuka nintimsairap. Atumin nuitamnuka kichkitai. ⁹ Tura nuikiartin ainau kichkisha: Apaachi tiirap. Atumi Apaachiri kichkitai: Nayaimpinam puja nuketai. ¹⁰ Tura Apuru turutiarat tusaram wakerukairap. Atumi Apuringkia Cristoketai. ¹¹ Antsu atumin nangkamakuka mash chikich ainau inatiri atinuitai. ¹² Tura asamtai aints ningki nintimias miajuitjai tumamunka Yuska mianchawaitai tawai. Antsu mianchawaitjai tumamunka Yuska miajuitai tawai.[☆]

¹³ “Maj, Moisésa chichame nuikiartin ainautiram, fariseo ainautirmesha aneartaram. Atumka anangkartin asaram, chikich aints uwemrarai tusaram, tura chikich aints

[☆] 22:39 (Lev. 19.18) [☆] 22:40 (Luc. 10.25-28) [☆] 23:7 (Mat. 6.1) [☆] 23:12 (Mat. 20.26-27; Marc. 9.35; 10.43-44; Luc. 14.11; 18.14; 22.26; Sant. 4.6; 1.Ped. 5.5)

nayaimpinam wayaawarai tusaram, waiti epenmiawa nunisketrume. Tura atumka nayaimpinam wayaashtin asaram, chikich ainausha wayaawarai tusaram suritarme.

¹⁴ “Maj, Moisésa chichame nuikiartin ainautiram, fariseo ainautirmesha aneartaram. Atumka anangkartin asaram, waje jee atantin aiyatrume, aints ainau wina pengker nintimtursarat tusaram, Yus seakrum saram searmé. Tura asaram nukap wait wajakti-nuitrume.

¹⁵ “Maj, Moisésa chichame nuikiartin ainautiram, fariseo ainautirmesha aneartaram. Atumka anangkartin asaram, chikich aints wina nemartusarat tusaram, yaja nungkan-masha arák wekainuitrume. Tura atumin nemartamsaruka atumin nangkamasarang ji kajintrashtinum engkemawar wait wajakarti tusaram pasemamtikrume.

¹⁶ “Atumka aneartaram. Chikich aints nuinin ayatrume, Yuse chichame nintimtichu asaram wainmichua tumawaitrume. Atumka nuikiartakrum: ‘Aints: Yusjai tajai, Yuse jeen pachisan: Nunaka wikia turatatjai tayat, nunaka umitsuk ukukminuitai’ tarume. Antsu Yusjai tajai titas, Yuse jee kuri aa nuna pachis: ‘Ju kurikia Yus susamu asamtai, wikia nuna turatatjai tauka nunaka miatrusang umiktinuitai’ tarume. ¹⁷ Nintinchau asaram, wainmichua tumawaitrume. Kuri Yuse jeen pujsamu aa nuka mash Yusnawaitai. Tura asamtai kuri Yuse jeen nangkamasketai, tuuka nintimtsuk pujusminuitrume tajarme. ¹⁸ Tura atumsha chichaakrum: ‘Aints tangku epeatniun pachis: Nekasan nunaka turatatjai, Yusjai tajai tayatrum, nu chichamka umitsuk ukukminuitrume,’ tarume. Antsu tangku Yus susatniun pachis chichaakrum: ‘Yusjai tajai: Tangku epetinam patasmau asamtai, nunaka turatatjai tauka nu chichamka miatrusumek umiktinuitrume,’ tarume. ¹⁹ Tu tinu asaram wainmichua tumawaitrume. Tangku Yus susamu aa nuka Yusnawaitai. Tura tangku epetisha nunisang Yusnawaitai. Tura asamtai tangku Yus susamu tangku epetin nangkamasketai, tuuka nintimtsuk pujusminuitrume tajarme. ²⁰ Nintimrataram. Aints chichaak: ‘Yuse jeen tangku epetin tuke au asamtai, wikia nunaka turatatjai, Yusjai tajai,’ tauka nuka tangku epetinka pachiska tatsui, antsu tangku epetinam patasmau asamtai, nunasha pachis tawai. ²¹ Tura aints Yuse jeen pachis chichaak: ‘Yuse jee tuke au asamtai, wikia nunaka turatatjai, Yusjai tajai,’ tauka Yuse jeenkeka pachis tatsui, antsu Yus ni jeen tuke au asamtai, Yusnasha pachis tawai. ²² Tura aints nayaimpin pachis chichaak: ‘Nayaim Yuse pujutiri asamtai, wikia nunaka turatatjai, Yusjai tajai,’ tauka nayaimpinkeka pachiska tatsui, antsu Yusnasha pachis tawai. ✠

²³ “Maj, Moisésa chichame nuikiartin ainautiram, fariseo ainautirmesha aneartaram. Atumi ajarinia árak menta tutain, tura chikich áraksha anís tutain, tura chikich áraksha cominos tutain timiá tuupich au wainiatrum, diez (10) juukrum kichik Yus susatasrum akanuwearme. Nuka tuke inaitsuk turataram. Turayatrum nuna nangkamasrumek chikich chichaman Yus umiktaram tímia nuka umiatrum. Nekas Yus nintimtustincha, tura chikich aints wait anentratnusha, tura nekas pengker aa nu turatnusha umiktinuitrume. ²⁴ Atum chikich aints ainausha nuiniayatrume, Yuse chichamen nintimtichu asaram wainmichua tumawaitrume. Tura asaram atumi umutiri teté tuupich engketu wainkuram, nuna umurai tusaram japrumé. Antsu kamiyu nekas juun wainiatrumek, nuka kujarua tumawaitrume.

²⁵ “Maj, Moisésa chichame nuikiartin ainautiram, nunia fariseo ainautirmesha aneartaram. Atumka anangkartin asaram, aints piningkia nitkari nijatsuk, tura puwatu nitkarisha nijatsuk, aya patatkeng nijarmawa tumawaitrume. Tura aints wina jiirsar: Auka pengke aintsuitai, turutiarat tu nintimsaram pujayatrum, atumi nintin tunau piaku asamtai, kichnau aa nu timiá wakerarau asaram, pachitsuk kasamrume. ²⁶ Fariseo ainautiram, atumka wainmichua tumau asaram, atumi tunaari nintimtsurme. Piningkia nitkari, tura puwatu nitkarisha nijarmawa nunisrumek nuwá eemkaram tunau nintim-tairum inaisaram iwiarataram. Turakrumningkia aints ainau atumi pujutrin wainkar: Juka nekas pengke aintsuitai turamiartinuitai.

✠ 23:22 (Mat. 5.34-35)

²⁷ “Maj, Moisésa chichame nuikiartin ainautiram, fariseo ainautirmesha aneartaram. Atumka anangkartin asaram, jakau iwiartaiya tumawaitrume. Jakau iwiartai aari nekas shiiram at tusar iwiarin armiayi. Antsu aints iwiartai nitkarinka jakau ukunchi piakuitai, tura jakau namangke kauru piakuitai. ²⁸ Atumka jakau iwiartaiya tumawaitrume. Aints ainau atumi pujutrin wainkar: Pengke aintsuitai, tu nintimturmasar pujuinawai. Tura wainiatrumek atumi nintin tunau piaku asamtai, aints ainau tuke anangkuwearme.

²⁹ “Maj, Moisésa chichame nuikiartin ainautiram, fariseo ainautirmesha aneartaram.

Atumka anangkartin asaram, yaanchuik atumi juuntri Yuse chichame etserin ainaun mau wainiatrumek, nu iwiarsamu pengker nintimsaram iwiaruwearme. Tura pengke aints ainaun yaanchuik mau wainiatrumek, nu iwiarsamu ainausha nekas shiiram at tusaram iwiaruwearme. ³⁰ Tura nangkamrum chichaakrum: ‘Iikia ii juuntrijai pujuwaitkurkia, iikia Yuse chichame etserin ainau maawarti tusarkia yaingchatnuyaji,’ tarume. ³¹ Tu tayatrum Yuse chichame etsernun maawarmia nunisrumek turin asakrumin: Nijai metek ainawai tusar, paan nekarmawartin ainawai. ³² Watska, atumi juuntri jakaru ainau nangkamawarmia nuka atumka umiktaram.” Jesús ni jakatniurin pachis tumammiai.

³³ Nunia ataksha chicharak:

“Atumka napia tumawaitrume. Tu pujau asaram ¿Yus aints ainaun ji kajintrashtinum akupamtaisha itiurak uwemratrume?☆

³⁴ “Tura wainiatun wikia atumin Yuse chichame etserin ainaun, tura Yuse chichame nekau ainauncha, tura Yuse chichame nuikiartin ainauncha akuptuktatjarme. Turamaitiatrum chikich ainausha numinam ajintaram maatnuitrume. Tura chikich ainausha iruntai jeanam awatratnuitrume. Tura chikich yaktanam tupikiakiamtaisha atumka papeektinuitrume. ³⁵ Turatin asaram, wait wajaktinuitrume. Nu nangkamtaik Caín ni yachí Abel péngke aintsun wainiat maamiayi. Nuniasha ukunam Berequíasa uchiri Zacarías naartin Yuse jeen tangku epetinam ayaamas wajaun waininayat maawarmiai. Tura atumi juuntri péngke aints ainau numpen ukararu asaramtai, atumsha nunisrumek turatin asaram wait wajaktinuitrume. ³⁶ Tura atumi wearu yamai iwiaaku ainausha wait wajakartin ainawai. Nunaka nekasan tajarme,” Jesús timiayi.

Jesús Jerusalénnum pujuinaun aneak juutmiauri

(Luc. 13.34-35)

³⁷ Nunia Jesús Jerusalénnumia aints ainaun chicharak:

—Jerusalénnumia ainautirmin tajarme: Atumka Yuse chichame etserin main ai-yarume. Tura Yus wína chichamur etserkataram tusa, akupturmaku wainiatrumek, kayajai tukuram mainuyarume. Atash ni uchirin nanapejai tektuktas untsuawa nunisnak: Uwemratarum tusan ¿wikia warutmak untsuyajrum? Turai wainiatrumek nakitrinuyarme. ³⁸⁻³⁹ Antsu wi ukukmiaka, atumi yaktaringkia itiarak atinuitai. Tura asamtai aneartaram. Nunasha nekasan tajarme. Atumka: Yus akupkamu wináuka nekas pengkeraitai tutsuk pujakrumka, wínaka pengké waitkashtinuitrume, —Jesús timiayi.

24

Yus seatai juun jea yumpunkatnun pachis etserkamuri

(Marc. 13.1-2; Luc. 21.5-6)

¹ Jesús Yus seatai jeanmaya jiinki weai, ni nuiniatiri ainauti tarir, Yus seatai jea jiisar: Juka nekas juuntapita tusar, Jesús inaktusmiaji. ² Takurin Jesús iin chichartamak:

—Nekasan tajarme: Ju waintrume juka ukunmaka mash yumpunkatnuitai. Tura yumpunkamtai kaya kichkisha chikich kayanmasha patamkashtinuitai, —turammiaji.

Nungka mesertinun pachisar etserkamu

(Marc. 13.3-23; Luc. 21.7-24; 17.22-24)

³ Nunia olivo muranam weri, nuni Jesús waka keemsamta, ni nuiniatiri ainautisha nuni jearir, nijai kanakar pujusar iniakur:

☆ 23:33 (Mat. 3.7; 12.34)

—¿Ju jea yumpunkatnusha warutik at, tura ame tatintrumsha warutik at? Tura ju nungka amukatin kinta jeatak wajasamtaisha, nekas jeatak wajasi tusarsha ¿itiurak nekaataij? Tu atinuitai tusam ujakratkata, —timiaji.

⁴ Takurin Jesús chichartamak:

—Aints kichkisha wína anangkruwai tusaram aneartaram. ⁵ Aints untsuri chichainak: ‘Wiitjai Mesíasaitjai, Yus akupkamuitjai,’ tusar aints untsuri anangmawartinuitai. ⁶ Turinamtai maaniamu pachisrum chicham antakrumsha, tura mesetan najaninawai tamau antakrumsha shamkairap. Nungka meseatsaing maaniamuka untsuri artinuitai. Antsu nungka mesertinka tewarikia achatnuitai. ⁷ Aints ainau chikich nungkanmaya ainaujai maaniawartinuitai. Tura apu ainausha kajernaikiar mesetan najanawartinuitai. Nuniasha tsukasha nukap atinuitai. Tura sungkur jatai ainausha yujarartinuitai. Nuniasha uusha untsuri uurkatnuitai. Nuka chikich chikich nungkanmasha turunatnuitai. ⁸ Antsu nu turunatniun nangkamawar, aints ainau wait wajainayat, nuna nangkamasarang wait wajakartiniun yamaik nangkamawartinuitai.

⁹ “Nunia atumnasha achirmakar pasé awajtamsarat tusar surutmakartinuitai. Tura mantamawartinuitai. Tura wína umirtau asakrumin, aints ainau mash kajertamkartinuitai. ¹⁰ Nu kinta jeamtai, aints untsuri wína umirtutan inaisartinuitai, tura mai nuwamtak kajernaikiar: Achiktaram tusar surunikiartinuitai. ¹¹ Tura anangkartin ainau untsuri waitrinak: Wikia Yuse chichamen etsernuitjai tusar, aintsun untsurin tsanurartinuitai. ¹² Tura tunau nukap atin asamtai, aints ainau aneenitan inaisartinuitai. ¹³ Antsu aints ainau Yusen tuke inaitsuk umirkaruka uwemrartinuitai. ☆

¹⁴ “Yus aints ainaun inartinuitai tusar Yusnum uwemratin chichaman mash nungkanmaya ainau nekaawarat tusar etserkartinuitai. Turinamtai nuniangka nungka amukatin kinta jeatnuitai.

¹⁵ “Aints ju chichaman aujinauka nintimrarti: Yuse chichame etserin Daniel naartin nekas pasemamtikiartinun pachis nunia aints ainaun mesratniuncha pachis aarmiayi. Nu pasemamtikiartin Yus seatai juun jeanam wayaamtai, ¹⁶ aints Judea nungkanam pujuinauka muranam tupikiakiartinuitai. ¹⁷ Tura wári tupikiakiartin asar, aints jea jimia pata jeamkamunam yakí pujauka wári kuanak warincha jutsuk tupikiakiartinuitai. ¹⁸ Tura ajanam takakminausha jeanmasha waketsuk, tura entsatirincha jutsuk wári tupikiakiartinuitai. ¹⁹ Nu wait wajaktin kinta jeamtai, nuwa jamtin ainausha tura kuwirchin muntsak pujuinausha nukap wait wajakartin asaramtai wait anentinajai,” Jesús timiayi. ☆

²⁰⁻²¹ Nunia ataksha chicharak:

“Nu tupikiakiartin kinta yumanch ahati tusaram, tura ayamtai kinta ahati tusaram Yus seataram. Maj, nu kintati aints ainau nukap wait wajakartinuitai. Nu nangkamtaik nungka najanamunmayangka timiá wait wajamuka atsuyayi. Tura ukunmasha ataksha timiá wait wajaktinka atsutnuitai. ²² Tura asamtai nu wait wajaktinaka Yusek: Ainik ati tusa amuktinuitai. Nuna turachmataikia aints kichkisha uwemrachminuitai. Antsu Yus ni aintsri uwemrartin ainaun aneau asa, nu wait wajaktinaka amuktinuitai.

²³ “Turamtai aints atumin chichartaminak: ‘Jiista, juwaitai Mesías,’ turaminamtaikia tura: ‘Ani Mesías pujawai,’ turaminamtaisha anturkairap. ²⁴ Aints untsuri anangkraminak: Mesíasaitjai tusar wantinkartinuitai. Chikich ainausha anangkraminak: Yus akupkamu asan, Yuse chichame etsernuitjai turamiartinuitai. Tura aints ainaun anangkataj tusar, aints tujintamu takatnasha, tura aints wainchati takatnasha takasar, Yuse aintsri ainaun anangkamin amataikia anangkawartinuitai. ²⁵ Nu aints ainau atumin anangkramawarai tusan, eemkin yamaik ujaajrume. ☆

²⁶ “Tura asamtai aints atumin chichartaminak: ‘Jiistaram, Mesías ani aints atsamunam pujawai,’ turaminamtaisha nuka jiisairap. Tura: ‘Jiistaram, juni jea tesaamunam uumak pujawai,’ turaminamtaisha nuka anturkairap. ²⁷ Wi aints ayatun Yus akupkamu asan, peem newarat tsantar tsa taakmanumanini, tura tsa jeamunmaninisha mash

☆ 24:13 (Mat. 10.19-22) ☆ 24:19 (Luc. 17.31) ☆ 24:25 (2.Tes. 2.9)

nungkanam wainta nunisnak paan wantinkatnuitjai. ²⁸ Jakau tepamunam chiwiang kautinawai,” Jesús turammiaji. ☆

Jesús ni tatintrin pachis etserkamuri

(*Marc. 13.24-37; Luc. 21.25-33; 17.26-30, 34-36*)

²⁹ Nunia ataksha iin chichartamak:

“Nu wait wajaktiniun wi etserja nu nangkamaramtai, tsaangka tsantrashtinuitai. Tura nantusha kajinratnuitai. Yaa ainausha nayaimpinmaya kakeerartinuitai. Tura nayaimpinam muchichu ainausha muchitrartinuitai. ☆

³⁰ “Nunia aints ayatun, Yus akupkamu asan wi wantinmatai, mash nungkanmaya ainan ni wait wajaktintrin shaminak juutiartinuitai. Tura yurangmijai Yuse kakarmar-ijai, nunia Yuse paaniurijai nayaimpinmaya winamtai, wínaka paan waitkartinuitai. ☆

³¹ Nunia wi winakun, wína umirtukaru ainaun wi uwemtikrartasan wakerau asan, wína awemamur ainaun akupkan: Pupun kakaram pupuntruataram tusan, mash nungkanmayan irurat tusan akupkartinuitjai. ☆

³² “Numi higuera tutai nintimrataram: Numi tsaraptur ataksha nukarmatai ju nungkanam pujuinautiram: ‘Esat jeatak wajasi,’ tarume. ³³ Tura atumsha wi tajarmena nusha mash wainkurmeka: ‘Tatintri jeatak wajasi,’ tusaram nekaamnawaitrume.

³⁴ Nekasan tajarme: Wi taja nunaka mash umiatsaing, aints juni iwiaaku pujuinauka pengké jakachartinuitai. ³⁵ Nayaimpisha tura nungkasha mengkakartinuitai. Antsu wína chichamruka pengké mengkakashtinuitai.

³⁶ “Tura nu turunatin kinta warutik at tusarka aints kichkisha nekainatsui. Yuse awemamuri ainausha nunaka nekainatsui. Wisha Yuse Uchiri ayatnak nekatsjai. Antsu wína Apaachiruk nuke nekawai.

³⁷ “Wi tatin kintar jeamtai, yaanchuik Noé pujumia nuni aints ainan pasé puju armia nunisarang pujusartinuitai. ☆ ³⁸ Nu kintati yumi jitatsaing, aints ainan Yusen nintimtsuk yutanacha yuj, tura umutincha umuj puju armiayi. Tura nuwatnaikiarmiayi. Tura nawantrincha aintsun ninumkarat tusar surin armiayi. Tumaj pujuinai, Noé juun kanunam engkemamiayi. ³⁹ Tura waininayat, nu aints ainauka tuke Yusen pachischaru asaramtai, nujang aneachmau mash amukmiayi. Wi tatin kintasha nunisang atinuitai. ☆

⁴⁰ “Nu kinta jeamtai, jimia aints ajanam tsaniasar takakminamtaisha kichik jukitnuitai, antsu kichka juwaktinuitai. ⁴¹ Nuwasha jimiar tsaniasar trigo jingkiain nekenak pujuinauncha kichik jukitnuitai, antsu kichka juwaktinuitai.

⁴² “Turunatin asamtai, atumka winaka kajinmatrutsuk: ¿Apuu tatintri warutik at? tusaram nekachu asaram aneartaram. ⁴³ Nusha nintimrataram: Jeeniuka kasa aints tatinun nuna eemak nekawaitkungka kanutsuk anear, kasartukai tusa, tura jearun wayaawai tusa nakastinuitai. ⁴⁴ Tura wikia aints ayatun, Yus akupkamu asan, aneachmau tatin asamtai, atumsha nunisrumek anearum pujustaram,” Jesús turammiaji. ☆

Aintsu inatiri jimiaran pachis etserkamuri

(*Luc. 12.41-48*)

⁴⁵ Nunia Jesús ataksha iin chichartamak:

“Ju nuikiartutai chichamsha nintimrataram. Aints arák irastas wetanak wajak: Wína jearun pujuinau yurumatin jeamtai ¿yáki ni yuwatniurin susat? tusa aintsun eawai. Tura nekas pengker umiun, tura paan nintimniun eak: Nu turati titinuitai. ⁴⁶ Nu aintsu inatiri ni takatrin miatrusang umirak pujamtaikia, ni inamin taa nuna wainak, ni inatirin waramtiksatnuitai. ⁴⁷ Nekasan tajarme: Nu aintsu inatiri ni apurin miatrusang umirmau asa, mash ninu aa nuna wainin ati tusa inaikiatnuitai. ⁴⁸ Antsu takatan wainin pasé aints asa: Apurka wárikia tachatnuitai, tu nintimias pujakka, ⁴⁹ chikich takau ainaun pasé awajak, tura nampeku ainaujai iruntrar yutanacha nukap yuwar, tura umutincha nukap

☆ 24:28 (Luc. 17.23-24, 37; Apoc. 19.17-18) ☆ 24:29 (Apoc. 6.12-13) ☆ 24:30 (Apoc. 1.7) ☆ 24:31 (1.Tes. 4.15-17) ☆ 24:37 (Gén. 6.5-8) ☆ 24:39 (Gén. 7.6-24) ☆ 24:44 (Luc. 12.39-40)

umurar niisha nampea nampeaka, ⁵⁰ ¿ni apuri warí kintatik tat? tura ¿warí uratik tat? tusa nekachu asamtai, aneachmau tari ni inatirin nakachmaun wainak, ⁵¹ anangkartin ainau ji kajintrashtinum wait wajakarti tusa akupawa nunisang nu pasé aintsun nuni akupkatnuitai. Turamtai pasé ainau nuni engkemawar, wait wajainak juutinak, tura nai katertinak matsamsartinuitai,” Jesús turammiaji.

25

Nawan diez amia nuna pachis nuikiartamu

¹ Nunia Jesús ataksha iin nuitamak: “Yusnum nayaimpinam jeatnuka nunisketai tusan, ju nuikiartutai chichaman ujaajrume: ‘Umaar nuwan nuwatmatai jiiistai,’ tusa ni umaji diez (10) armia nuka untsukmau asar, namparingkian takusar: ‘Umaar nakastai,’ tusa wearmiayi. ²⁻⁴ Tura nawan cinco (5) irunuka umikcharu asar, namparingkian takusar weenayat olivo machari amukamtai, ataksha yarakmi tutsuk kajinmakiar aintsarang wearmiayi. Antsu chikich nawan cinco (5) irunu kajinmakcharu asar, namparingkian umisar, olivo macharin mutinam yarakar takuarmiayi. ⁵ Tura nákainak umaji wári tachau asamtai, kari nepetinam mash kanurarmiayi. ⁶ Nunia kashi japeng aints untsamak: ‘Pai, nuwan nuwatkatnuka winawai. Jiinkiram ingkungtaram,’ timiayi. ⁷ Tamati umaji irunu nuna antukar wári nantakiar, namparingkian keematan umisarmiayi. ⁸ Nunia nawan cinco (5) irunu olivo macharin kajinmakiaru asar, chikich nawan cinco (5) kajinmakcharu ainaun seainak: ‘Kaichirua, winasha olivo machari jumchiksha yaratrutaram. Ii namparingkri kajinui,’ tiarmiayi. ⁹ Tu seainamaitiat chikich kajinmakcharu ainau ainaak: ‘Atsa, japchirin japchirin yarakrikia, iincha jeartamkashtatji. Tura atumnausha wári kajintratatu. Nekasrum sumatinam werum nuni sumaatarum,’ tiarmiayi. ¹⁰ Tinam cinco (5) nawan irunu olivo macharin sumakartas wearai, ukunam nuwan nuwatkatnuka amia nuka tamiayi. Taamtai nawan kajinmakcharu ainauka nijai jeanam wayaawaramtai waitin epeniarmiayi. ¹¹ Turuawarai chikich nawan olivo macharin sumakartas wearusha taar: ‘Apurua, Apurua, waiti uratrita,’ tiarmiayi. ¹² Tinamaitiat jeentin nitkaya ayaak: ‘¿Yaachitume atumsha? Nekasan tajarme: Atumin pengké nekatsjarne,’ timiayi, —Jesús turammiaji.✠

¹³ Nu nuikiartuti chichamnasha pachis ataksha iin chichartamak:

—Atumsha winasha kajinmatrutsuk, atumi Apuri tatintri ¿warutik at? tusarmeka nekachu asaram aneartaram, —turammiaji.✠

Kuik suwamu pachis nuikiartamu

(Luc. 19.11-27)

¹⁴ Ataksha Jesús iin nuitamak: “Yus aints ainaun inawa nuka kuikiartinua nunisketai. Kuikiartin arák nungkanam wetas, ni inatiri ainaun untsuk, ni kuikiarin kichik kichik akantuk susamiayi. ¹⁵ Tura kichkin cinco warangkan susa, tura kichnasha jimia warangkan susa, tura kichnasha kichik warangkan susa: ‘Ju kuikijai sumakrum, tura surukrum kuik kiaungkataram,’ tusa ukuki, chikich nungkanam yaja wemiayi. ¹⁶ Tura nu aintsu inatiri kuikian cinco warang jukimia nuka nu kuikijai sumak tura suruk takaa takaaka, ataksha kuikian cinco warangkan juki irurmiayi. ¹⁷ Chikitsha nunisang kuikian jimia warangkan jukimia nuka nu kuikijai sumak, tura suruk takaa takaaka, ataksha kuikian jimia warangkan juki irurmiayi. ¹⁸ Antsu chikich aints kichik warangkan jukimia nuka ni apuri kuikiarin waa taimunam uuk inaisamiayi.

¹⁹ “Tura nukap arus ni apuri ataksha jeamiayi. Tura jea ni inatiri ainaun untsuk: ‘¿Kuikian wi susamiajume nusha itiurkamiarume?’ tu iniasmiayi. ²⁰ Tu iniam nu nangkamtaik cinco warangkan jukimia nuka nuna wangtak: ‘Pai apuru, kuik cinco warang surusmiame nuna ataksha cinco warangkan kiaungkajai. Juna kiauntukjame ju jukita,’ timiayi. ²¹ Tamati ni apuri chicharak: ‘Ayu, maaketai. Nekasam pengker takatrusume. Tura nekasam miatrusmek umirtukume. Wikia jumchik susamiajme

✠ 25:12 (Luc. 13.25) ✠ 25:13 (Luc. 12.35-40)

nujai pengker takakmasume. Tura asakmin nuna nangkamasnak nukap susatatjame. Jearun wayaata. Tura wayaam wijai nukap warasta,' timiayi. ²² Nunia chikich inatiri jimia warangkan jukimia nusha nunisang apurin wangtak: 'Pai apuru, kuik jimia warang surusmiam nuna ataksha jimia warangkan kiaungkajai. Juna kiauntukjame ju jukita,' timiayi. ²³ Tamati ni apuri nu aintsnasha nunisang chicharak: 'Ayu, maaketai. Nekasam pengker takatrusume. Tura nekasam miatrusmek umirtukume. Wikia jumchik susamiajme nujai pengker takakmasume. Tura asakmin nuna nangkamasnak nukap susatatjame. Jearun wayaata. Tura wayaam wijai nukap warasta,' timiayi.

²⁴ "Nunia chikich aints kichik warangkan nunak jukimia nuka tari, ni apurin chicharak: 'Apuru, ameka nekasam kakaram takamtikin asam, árak araachiatum: Juurtuktaram tinu asakmin, wisha nunaka nekau asan, ²⁵ shamakun ami kuikiarmin nungkan tain uukmiajai. Pai juwaitai. Ame surusmiam ju jukita,' timiayi. ²⁶ Tamati ni apuri chicharak: 'Maj, ameka paseetme. Tura nakitme. Wi arakan araachiatnak: Juurtuktaram taja nuka nekayatmesha, ²⁷ ¿waruka kuik irumtainum kuikiarka ukurtuschamiam? Turakminkia chikich aints ainau wina kuikiarjai takakminamtai, wisha ataksha tana kuikian susamiajme nuna nangkamasnak nukap jukimnawaitjai. ²⁸⁻²⁹ Aints nekas nukap takakmasu asa nukap tákakui. Tura nukap takakmasu asa, nuna nangkamasang nukap jukitnuitai. Tura asa ampirtinuitai. Antsu tákakchauka takatan jumchiksha nakitau asamtai, jumchik tákaka nuka juruktinuitai. Tura asamtai ju aintsu kuikiari jurukrum, chikich aints diez (10) warangkan takaku susataram. ✧ ³⁰ Antsu ju takatan umichu aints jukiram, aanum tee amaunum japataram. Nuni wait wajak nain esai katertak juutinuitai,' apu timiayi." Jesús nu nuikiartutai chichaman nuitamak turammiaji. ✧

Nungka meseamunam aints ainau akankatnun pachis etserkamuri

³¹ Jesús ataksha iin nuitamak:

"Wikia aints ayatun, Yus akupkamu asan, Yuse awemamuri ainau wina tentatkaramtai, wi winaknaka apu wajasan, Yuse keemtairin nekas juunnum keemsatnuitjai. ✧

³²⁻³³ "Turamtai mash nungkanmaya ainau wini winíar iruntrartinuitai. Turinamtai uwija wainin uwija ainaunka untsurinini mash irur, tura chipu ainaunka menanmanini mash irur akanua nunisnak wína aintsur ainauncha, tura wina aintsruchu ainauncha akankartinuitjai. ³⁴ Tura Apu asan, wina untsurunini wajainaun chicharkun: 'Wína Apaachir atumin pengker awajtamsau asamtai, atumka winitaram. Yus nungkan najanak atum pujustinaka yaanchuik umismawaitai. ³⁵ Wi tsukamamtaisha, atum yuwatniur surusmiarume. Tura wi kitamamtaisha, wína umutirsha surusmiarume. Tura wi jeenchau wekaamtaisha, atumi jeen jeetiram: Iijai pujusmi turutmiarume. ³⁶ Tura entsatir atsamtaisha atumka surusmiarume. Wi jaakun tepamtaisha, wína jiirsatasrum winitrimiarume. Tura wína achirkar kársernum engketawaramtaisha, atumka winiram jiirsamiarume,' titinuitjai. ✧

³⁷ "Wi tamati nusha inintinak: 'Apuru ¿warutia yaparackmincha yuramiamje? ¿Tura warutia kitamamnisha umutinja aarmiamje? ³⁸ ¿Tura warutia irackmincha, ii jeen pujusta timiaji? ¿Tura entsatiram yuumamnisha warutia susamiamje? ³⁹ Tura jaakun tepamnisha, tura kársernum achirmakar engketminamtaisha, ¿warutia amin jiistasrisha winimiaji?' ⁴⁰ Turutinamtai wikia Apu asan ayaakun: 'Nekasan tajarme: Wína yatsur mianchau irunu juni wajaina nuna kichkinak wait anentakrum nu turutau asaram, nekasrum wína anentu asaram turamiarme,' titinuitjai.

⁴¹ "Tura Apu asan, wína menarnini wajainaun chicharkun: 'Pasé takau ainautiram, wini iruntsuk junia jiinkiram, tuke ji kajintrashtinum wetaram. Satanás ni awemamuri ainaujai tuke wait waktin umismanum nujai iruntrataram. ⁴² Wi tsukamamtaisha, atumka wínaka yurtuachmiarume. Tura wi kitamamtaisha umutisha aatrachmiarume. ⁴³ Tura wi jeenchau wekaamtaisha atumka: Iijai pujusmi turutchamiarume. Tura wi

✧ 25:28-29 (Mat. 13.12; Marc. 4.25; Luc. 8.18)

✧ 25:30 (Mat. 8.12;22.13; Luc. 13.28)

✧ 25:31 (Mat.

16.27;19.28;25.31) ✧ 25:36 (Hebr. 3.13)

entsatirun yuumamtaisha, atumka suruschamiarume. Wi jaakun tepamtaisha, tura wína achirkar kársernum engketawaramtaisha, atumka jiirsachmiarume,' titinuitjai. ⁴⁴ Wi tamati nusha inintinak: 'Apu, ame tsukamamnisha, tura ame kitamamnisha, tura jeenchau irakmincha, tura entsatiram yuumamnisha, tura jaamnisha, tura kársernum engketkumnisha ¿warutia wisha yaaitskesha pachischamiajme?' turutiartinuitai. ⁴⁵ Turutinamtai wikia Apu asan ayaakun: 'Nekasan tajarme, ju mianchau ainau juni wajaina ju wait anentsuk yaingchau asaram, nekasrum winasha umirtukchamiarume,' titinuitjai. ⁴⁶ Nu aints tuke wait wajakartinum weartinuitai. Antsu wini wayaatarum timiau ainauka tuke Yusnum iwiaaku pujustinum wayaawartinuitai," Jesús turammiaji.

26

Jesús maatar chicham najatamuri

(*Marc. 14.1-2; Luc. 22.1-2; Juan 11.45-53*)

¹ Jesús nu nuikiartutai chichaman mash umis, ni nuiniatiri ainautin ataksha chichartamak:

² —Atumsha nekarme: Pascua fiesta jeatin jimiaarchik kinta wajasi. Nunia wi Yus akupkamutiatak aints asamtai, numi winangmanum mantuwartas achirkar surutkartatui, —turammiaji.

³ Nu kintati sacerdote juuntri ainau, tura Moisésa chichame nuikiartin ainausha, tura judío juuntri ainausha, sacerdote apuri Caifása jeen kaunkar, jea aarin iruntrararmiayi.

⁴ Tura nuni iruntrar Jesús anangkawar achikiar maawarat tusar chichaman najatiarmiayi. ⁵ Tura chicharnainak:

—Aints untsuri iruntrar jiyaaninak maanitan wakerukarai tusar, fiesta kintatikia turachminuitai, —tunaiarmiayi.

Nuwa Jesús kungkutijai ukatramuri

(*Marc. 14.3-9; Juan 12.1-8*)

⁶ Jesús Betania yaktanam we, Simónka jeen pujumiayi. Nu Simónka yaanchuik kuchapruk pujutiat nuniangka tsaarmiayi. ⁷ Tura nuni pujai nuwa taa, muti kaya alabastro tutai najanamunam kungkuti nekas akikian engkea itiamiayi. Tura Jesús misanam yuwatas pujamtai, Jesús muuken nu kungkutijai mash ukatramiayi. ⁸

⁸ Turamtai Jesús nuiniatiri ainauti nu wainkar kajerakur chicharnaiyakur:

—¿Waruka kungkuti timiá akiknasha nangkamisha ajapua? ⁹ Au surukrikia kuik nukap jukir, ¿kuikiartichu ainau susamka pengkerchaukai? —tunaimiaji.

¹⁰ Tu takurin Jesús nuna antuk iin chichartamak:

—¿Waruka ju nuwasha kajerarme? Wína aitkara juka nekas pengker aitkarayi.

¹¹ Kuikiartichuka tuke atumjai pujuinawai. Antsu wikia atumjaingkia tukeka pujuschatatjai. ¹² Ju nuwaka kungkutijai ukatrura juka wi iwiarnatnurun umistas, iwiaaku pujaing ukatruri. ¹³ Nekasan tajarme: Mash nungkanam Yusnum uwemratin chichaman etserinauka tuke ju nuwa turamurinha etserkartinuitai. Tura asamtai ju turamunka pengké kajinmakchartinuitai, —Jesús turammiaji.

Judas Jesús surukmauri

(*Marc. 14.10-11; Luc. 22.3-6*)

¹⁴ Tamati Jesús nuiniatiri doce (12) ainamunmaya kichik Judas Iscariote naartin Jesús anangka suruktaj tusa, sacerdote juuntri ainau chichastas wemiayi. ¹⁵ Tura nuni jea chicharak:

—Wi Jesús achikian atumin surukamtaikia ¿warutmak akirkaintrum? —tu iniam treinta (30) kuikian akiimiakarmiayi. ¹⁶ Nu akikiam Judas: ¿Itiurak Jesús anangkan surukaintaj? tu nintimias pujumiayi.

Jesús Pascua fiestatin yuwamuri

(*Marc. 14.12-25; Luc. 22.7-23; Juan 13.21-30; 1.Cor. 11.23-26*)

☆ 26:7 (Luc. 7.37-38)

¹⁷ Pang pachimrachmau yuwatin fiesta nu kinta atin asamtai, ni nuiniatiri ainauti Jesús iniakur:

—¿Pascua fiestati ame yuwatin tuni umismi tusamea wakerame? —timiaji. ☆

¹⁸ Tu iniam Jesús iin chichartamak:

—Juun yaktanam wetaram. Tura nuni werum, nunia aints wainkaram ni jeen wayaaram: ‘Iin nuitamin amin chichaman akupturmak: Wína kintar jeatak wajasi. Tura asan wina nuiniatir ainaujai Pascua fiestatin ami jeemin yuwatasan wakerajai turamui,’ titaram, —turammiaji.

¹⁹ Turammatai ni nuiniatiri ainauti weri, Jesús tímia nunisrik Pascua fiestatin yuwatin umismiaji.

²⁰ Kintamatai Jesús ni doce (12) nuiniatiri ainautijai misanam yuwatar keemsamiaji.

²¹ Tura yuwakur pujarin Jesús iin chichartamak:

—Anturtuktaram, nekasan tajarme: Kichik aints atumniang wína anangkrua surutkatatui, —turammiaji.

²² Turammatai nu antukar wake mesekar nintimrar, kichik kichik iniakur:

—Apuru ¿wiyashitaj? —timiaji.

²³ Tu iniam Jesús chichartamak:

—Wi nu tachaunumak tsaniasan yuwaja juwaitai. Ju wína anangkrua surutkatatui. ☆

²⁴ Wi Yus akupkamutiatak aints asan, Yuse chichame aarmaun miatrusnak umiktinuitjai. Turayatnak wína surutkatnunka nukap wait anentajai. Ju aintska akiinachuitkungka wait wajakchamin ayat, akiinaw asa nukap wait wajaktinuitai, —turammiaji.

²⁵ Turammatai Judas ni nekas suruktin ayat iniak:

—Nuikiartinu ¿nusha yaita? ¿Wikaitaj? —timiayi.

Tu iniam Jesús ayaak:

—Ja ai, ametme, —timiayi.

²⁶ Tura yuwakur pujarin Jesús yurumkan achik Yusen maaketai timiayi. Nunia puuk ni nuiniatiri ainautin suramak:

—Ju yuwatar. Juka wína namangkrua tumawaitai, —turammiaji.

²⁷ Tura piningnasha achik, Yusen maaketai tusa, ni nuiniatiri ainautin suramak:

—Jusha mash umurtaram. ²⁸ Juka wína numparua tumawaitai. Wína mantinamtai, untsuri aints ainaw tunaarin sakartaj tusan numpartatjai. Tura wina numpar numparamtai, yamaram chichaman wi etserkaja nunaka nekasan umiktatjai. ☆

²⁹ Yamaikia atumin ujaajrume: Wikia ju uva yumirin yamaikikia ataksha umurchatatai. Antsu wína Apaachiru pujutirin jean atumjai iruntran, nuni uva yumirin nekas yamarman umurtinuitjai, —turammiaji.

Pedron: Wína natsantrurtatme tusa ujakmauri

(Marc. 14.26-31; Luc. 22.31-34; Juan 13.36-38)

³⁰ Tura kanta kantamar umisar, Olivo Muranam wemiaji. ³¹ Tura nuni jearin Jesús iin chichartamak:

—Ju kashia juwi atum wína mash natsantrurtatume. Yuse chichame nunaka pachis tu aarmawaitai: ‘Uwija wainiun maawartinuitai. Turamtaiw uwija irunu tupikiarartinuitai.’ ☆ ³² Antsu jakan nantakin Galilea nungkanam weatsrumning wiyá eemkitatjai, —turammiaji.

³³ Turammatai Pedro Jesús an chicharak:

—Mash amin natsantraminamtaisha, wikia pengké natsantrashtatjame, —timiayi.

³⁴ Tamaitiat Jesús ayaak:

—Nekasan tajame: Ju kashia juwi atash shinatsaing, ame kampakam waitrakum wína pachitsam: Nu aintsnaka wainchawaitjai tusam uurtuktatme, —timiayi.

³⁵ Tamaitiat Pedro chicharak:

—Atsa, amin mantaminamtaisha wikia: Iijai jakami tau asan nekasan nunaka tichatatjai, —timiayi. Pedro tamati, chikich ainautisha nunisrik timiaji.

☆ 26:17 (Ex. 12.1-15) ☆ 26:23 (Sal. 41.9) ☆ 26:28 (Ex. 24.8; Jer. 31.31) ☆ 26:31 (Zac. 13.7; Marc. 14.28; 16.7)

Jesús arakmau Getsemaní tutainum Yus seamuri
(*Marc. 14.32-42; Luc. 22.39-46*)

³⁶ Tura numi arakmau Getsemaní tutainum wemiaji. Tura nuni jearin, Jesús ni nuiniatiri ainautin chichartamak:

—Juni pujusrum nakarsataram. Turakrumin wikia auni Apaachirun aujsatasan weajai, —turammiaji.

³⁷ Tura Pedroncha, tura Zebedeo uchirin mai ayas juki, arakchichu wear, Jesús napchau nintimias wake mesekmiayi. ³⁸ Tura chicharak:

—Timiá wake meseakun jata nekapeajai. Atumsha wijai pujusrum kanutsuk asataram, —timiayi.

³⁹ Tura arakchichu we, nungka pinakumar tepes, Yusen seak: “Apaachi, ame wakerak-meka, wi wait wajaktinka tsangkamrukaip. Turayat wi wakeramurka achati, antsu ame wakerame nuke ati,” Jesús timiayi.

⁴⁰ Tura ni nuiniatiri pujuinamunam waketki taa, kanú tepeenaun wainak, Pedron shintar chicharak:

—¿Atumka kichik horaksha wijai kanutsuk pujutka tujintarmek? ⁴¹ Tunau nepetukai tusaram, kanutsuk Yus seataram. Atumi nintijai nintimsaram: Tunaanaka nepetkatatjai tayatrumek, atumkeka tunau nepetkashtatrumek, —Jesús timiayi.

⁴² Tura ataksha we Yusen seak: “Apaachi, wi wait wajaktin jurutchakmeka, ame wakeramuram miatrusmek umikta,” timiayi.

⁴³ Nunia waketki, ni nuiniatiri ainaun ataksha kari nepetnam, kanú tepeenaun wainkamiayi. ⁴⁴ Kaninamtai Jesús jiis ukuki, ataksha Yusen seatas we, nuwik Yusen seamia nunisang ataksha seamiai. ⁴⁵ Tura sea umis, ni nuiniatiri ainauti tepamunam taa iin shintamar chichartamak:

—¿Yamaikia tuke kanurtasrum tura ayamratarum wakerarmek? Wikia Yus akupka-mutiarnak aints asamtai, tunaarintin ainamunam wina surutkartin hora yanchuk jeayi.

⁴⁶ Nantaktaram. Wina surutkatnuka yanchuk winitrawai. Nijai ingkiunikmi, —Jesús turammiaji.✠

Jesús achikiar jukimuri
(*Marc. 14.43-50; Luc. 22.47-53; Juan 18.2-11*)

⁴⁷ Jesús tuke chichaak wajai, Judas ni nuiniatiritiat Jesús anangka suruktas tarim-iaiyi. Tura nijai wininauka saapin takusar, tura numin takusar winiarmiayi. Nu aints ainauka sacerdote juuntri ainau, tura judío juuntri ainausha akupkamu armiai.

⁴⁸ Kauninamtai Jesúsnum jeainatsaing Judas nu aints ainaun chicharak:

—Wi juwaitai tusan mejeetatjai. Turamtai achikrum jukitaram, —timiayi.

⁴⁹ Tu tinu asa, Jesús wajamunam jea Jesús anangka mejeak:

—Nuikiartinu winajai, —timiayi. ⁵⁰ Tamati Jesús chicharak:

—Amiku, ame wina achirkatasam winame nuka yamaikia achirkata, —timiayi.

Tamati kautkaru ainau Jesús tap achikiar metawarmiayi.

⁵¹ Metawaramtai Jesús nuiniatiri kichik ni saapirin kuinak sacerdote juuntri inatirin kuwishin met charutkamiayi. ⁵² Turamtai Jesús ni nuiniatirin chicharak:

—Saapiram engketirin engkeata. Saapijai maanin ainauka saapijai jakartin ainawai.

⁵³ Wi wakeraknaka, wina Apaachirun seamka, yamaik ni awemamuri ainaun untsuri warangkan uchir ayamruktaram tusa akupturkamnawaitai. ¿Nuka nekatsmek? ⁵⁴ Antsu wi Apaachirun tu seanka, ¿yamai wi jakatniun pachisar Yuse chichame etserin yaanchuik aararmia nunaka itiurak umiktaj? —timiayi.

⁵⁵ Nunia Jesús nu aints ainaun chicharak:

—¿Waruka kasa aints achiktasrum winitua nunisrumsha, saapisha tura numisha takusrumsha tarutniurme? Wikia kashincha kashincha Yus seatai juun jeanam atumjai pujusan aints ainaun nuininuyajai. Tura waitiatrum nuningkia achirkachmarume.

✠ 26:46 (Hebr. 5.7)

⁵⁶ Tura yaanchuik Yuse chichame etserin aararmia nu umiktasrum aitkararme, — timiayi. [☆]

Tamati ni nuiniatiri ainautikia mash Jesúska ukukir tupikiakmiaji.

Sacerdote juuntri pujamunam jukimuri

(*Marc. 14.53-65; Luc. 22.54-55, 63-71; Juan 18.12-14, 19-24*)

⁵⁷ Antsu Jesúsán achikiaru ainau sacerdote apuri Caifás naartinu jeen umaarmiayi. Moisésa chichame nuikiartin ainau, tura judío juuntri ainausha nuni iruntrararmiayi.

⁵⁸ Tura Jesúsán ayasar weenamunam Pedroscha uku nemas sacerdote apuri jeen jeamiayi. Tura jeanmaka waaitsuk wenuknumak waya ¿Jesúsán itiurkarting? tusa, Yus seati jea wainujai tsanias pujusmiayi.

⁵⁹ Nunia sacerdote juuntri ainau, tura judío apuri ainaujaisha mash iruntrar: Nekas Jesús tunau turayi tiarat tusar, chichaman tsanumin ainaun eakarmiayi. Tura nu antukrikia maatai tu nintimrarmiayi. ⁶⁰ Aints untsuri Jesúsán tsanuminayat, Jesús maatnunka nekaacharmiayi. Nunia nukap arus inangnamunam jimia aints taar, ⁶¹ etserinak: —Ju aintska chichaak: ‘Yus seatai juun jean yumpungnasha, ataksha kampakam kintatik jeamkawnawaitjai,’ tu chichasmayi, —Jesúsán tsanuminak tiarmiayi. [☆]

⁶² Tinamtai sacerdote apuri wajaki Jesúsán chicharak:

—¿Waruka airtsume? ¿Amin pachitmasar etserturmina nuka warimpita? —timiayi.

⁶³ Tamaitiat Jesúska aimkachmiayi. Tura aimtsuk wajamtai, sacerdote apuri ataksha chicharak:

—Yus nekas iwiaaku puja nuna naarin pachisan nekasan tajame: Waitruakminka Yus jiirmastatui. Wi iniastatjame nuka yamaikia ujakata: ¿Nekasmek Mesíasaitam? ¿Yuse Uchirintam? —tu iniasmiayi.

⁶⁴ Tu iniam Jesús ayaak:

—Ja ai, ame tame nuka nuwaitjai. Tura asan nunasha tajame: Aints ayatun Yus akupkamu asan, nekas kakaram aa nuna untsurinini keemsan, nunia nayaimpinmaya yurangmijai winamtai, winaka waitkatnuitrume, —timiayi.

⁶⁵ Tamati sacerdote juuntri nuna antuk kajerak wejmakrin japiki jaak:

—Pai, ju aintska Yusen pachis: Nuna Uchirinjai nangkami tinu asa pasé chichasi. ¿Tura warí chicham antuktasrik nakastaij? Atumsha Yusen pachis pasé chichaamuka antukurme. ⁶⁶ ¿Itiur nintimtarame? —tu iniam mash aiminak:

—Juka Yuse Uchirinjai tinu asamtai maawarti, —tiarmiayi.

⁶⁷ Tura yapiin usukrarmiayi. Tura awatrarmiayi. Tura tarachjai jiin jingkiatawar yapiin awatinak tura wishikinak:

⁶⁸ —¿Ame Mesíasaitam? Watska, ame nekamin akumka ¿yáki aitkara? tusam nekaata, —tiarmiayi. [☆]

Pedro: Jesúsna wainchajai timiauri

(*Marc. 14.66-72; Luc. 22.56-62; Juan 18.15-18, 25-27*)

⁶⁹ Jesúsán awatinamtai, Pedroka aanum wajai, nuwa sacerdote inatiri amia nu tari Pedron wainak chicharak:

—Amesha Galileanmaya aints Jesús naartinjai wekainuyame nuwaapitme, —timiayi.

⁷⁰ Tamaitiat Pedro mash aints antinamunam chichaak:

—Atsa, antsu ame turutme nunaka pengké nekatsjai, —timiayi.

⁷¹ Nunia jiinkitas waitinam wajamtai, chikich nuwa nuni wajainaun chicharak:

—Ju aintska Nazaretnumia Jesúsjai wekainuyayi, —timiayi.

⁷² Tamaitiat Pedro ataksha kakar chicharak:

—Atsa, Yusjai tajai: Nu aintsna naka pengké wainchawaitjai, —timiayi.

⁷³ Tamati jumchik arus nuni wajainau Pedron tariar chicharinak:

—Galileanmaya aintsua nunismek chichau asakmin, nekasmepi amesha aujai wekainuyame tusar nekaji, —tiarmiayi. ⁷⁴ Tinamaitiat Pedro aimiak:

[☆] 26:56 (Luc. 19.47) [☆] 26:61 (Juan 2.19) [☆] 26:68 (Isa. 50.6)

—Wikia nekasam Yusjai tajarme: Nu aintsnaka pengké wainchawaitjai. Yusjai tajai, waitchawaitjai, —nangkami waitrak timiayi.

Nu tamaujai metek atash shinimiayi. ⁷⁵ Atash shinamtai, Jesús tímia nunaka Pedro nintimramiayi. “Atash shinatsaing, ame kempatam waitrakum wína pachitsam: Nu aintsnaka wainchawaitjai tusam uurtuktatme,” Jesús tinu asamtai, Pedro nu chichaman nintimiar, nunia jiinki kakar juutmiayi.

27

Pilato pujamunam jukimuri

(*Marc. 15.1; Luc. 23.1-2; Juan 18.28-32*)

¹ Tura tsawaarai sacerdote juuntri ainau judío apuri ainaujai mash: Jesús maatai tusar chichaman najanawartas iruntrarmiayi. ² Tura chichaman najanawar Jesúsán jingkiawar, romano apuri Pilato pujamunam jeeniarmiayi.

Judasa jakamuri

³ Judas Jesúsán surukmia nuka Jesúsán maatai tinamun antuk napchau nintimias, sacerdote juuntri irunu judío apuri irunujai pujuinamunam taa, treinta (30) kuikian wainkimiayi. ⁴ Tura chicharak:

—Wikia aints tunaarinchau wainiatun: Achiktaram tusan suruku asan, tunaun turajai, —timiayi.

Tamaitiat aiminak:

—¿Ilisha itiurkatjik? Amek nintimrata, —tiarmiayi.

⁵ Tinamtai Judas Yus seatai juun jeanam nu kuikian nangkimiá japa ukuki, nunia jiinki we, naekjai kuntujen jingkiana, nunia tsekengki nema iyaar jakamiayi.

⁶ Judas kuikian Yus seatai jeanam japa ukukin asamtai, sacerdote juuntri ainau nu kuikian jukiar chicharnainak:

—Ju kuikijai aints maataram tusa suruku asamtai, kuik engketinam engkeachminuitai, —tunaiarmiayi.

⁷ Tura chikich nungkanmaya ainau ju yaktanam jakaramtai, nuni iwiarsami tusar, nu kuikijai nungka Nuwe Najantai tutain sumakarmiayi. ⁸ Tura aints maataram tusar, kuik jukimujai nu nungkan sumakaru asaramtai, yamaisha tuke ‘Numpa Nungka’ tinawai.✠

⁹ Nu nungka sumaktinun pachis yaanchuik Yuse chichame etserin Jeremías naartin eemak aarmia nunaka miatrusang umikmiayi. Nu aarmauka nuwaitai: ¹⁰ “Israela weari ainau treinta (30) kuikian akiimiaktinuitai timiau asar, nu kuikian jukiar, Apu Yus tímia nunisarang nujai Nuwe Najantai nungkan sumakarmiayi,” tu aarmawaitai.✠

Pilato Jesúsán iniasmauri

(*Marc. 15.2-5; Luc. 23.3-5; Juan 18.33-38*)

¹¹ Tura Jesúsán jukiar, romano apuri Pilato pujamunam jeeniaramtai, nuka Jesúsán iniak:

—¿Nekasmek judío apurintam? —tu iniam Jesús ayaak:

—Ame turutme nuka nekasam tame, —timiayi.

¹² Tamati sacerdote juuntri ainau, tura judío apuri ainausha Jesúska tsanuminamaitiat aintsuk wajamiayi. ¹³ Turamtai Pilato iniak:

—¿Amin chichaman untsurin aujmatramina nuka antatsmek? —timiayi.

¹⁴ Tamaitiat Jesús pengké aikchamiayi. Tura asamtai romano apuri nukap nintimias: ¿Warinak titaj? takusha nintimrachmiayi.

Pilato Jesúsán maawarti tusa tsangkamkamuri

(*Marc. 15.6-20; Luc. 23.13-25; Juan 18.38-19.16*)

¹⁵ Tura Pascua fiesta jeatak wajai, musachjai metek romano apuri aints achikmau kársernum engketun kichik jiiki akupnuyayi. ¿Tura yáki jiinkit? tu iniam: Nu aintska jiikim akupkata tu seainamka jiiki akupnuyayi. ¹⁶ Nu kársernum aints juun tunau

✠ 27:8 (Hech. 1.18-19) ✠ 27:10 (Zac. 11.12-13)

Barrabás naartin engketu asamtai, nu aintsu turamurin aints mash nekaawarmiayi.

¹⁷ Tura asamtai Pilato nu aints iruntrarun iniak:

—¿Yana jikkit tusarme wakerarme? ¿Barrabásnash jiikin akupkataj? Antsu nu nakitakrumningkia, ¿Jesús Mesíasaitai tina nunash jiikin akupkataj? —timiayi.

¹⁸ Sacerdote juuntri ainau Jesúsán nangkamiar suwirpiaku jiiinak niin itaarmia nunaka nekau asa, Pilato nuna timiayi.

¹⁹ Tura Pilato chichaman nekaatas inintrak pujai, ni nuwari aishrin chichaman akuptak: “Nu aintska nekas tunaarinchau waininayat pasé awajinamtaisha ameka pachinkaip. Kashi nu aintsun pachis mesekran ipiatrukmayi,” timiayi.

²⁰ Tura sacerdote juuntri ainau, tura judío apuri ainausha aints irunun akatinak:

—Barrabásan jikkiti, antsu Jesúsán maawarti titaram, —tu chichaarmiayi. ²¹ Tinamtai romano apuri ataksha iniak:

—Ju jimiar aints pachisrum ¿yanak akupkataj? ¿Atumsha warintrume? —tu iniam:

—Barrabás jiiikim akupkata, —tiarmiayi.

²² Tinamtai Pilato ataksha iniak:

—¿Tura Jesúsán Mesíasaitai tina nunasha itiurkatjak? —timiayi.

Tu iniam mash aiminak:

—Numi winangmanum ajinkam maata, —tiarmiayi.

²³ Tinamtai Pilato chicharak:

—¿Warí tunauna turini? —tu iniamaitiat ataksha kakarar chichainak:

—Numi winangmanum ajinkam maata, —tiarmiayi.

²⁴ Tura aints ainau Pilaton pachítsuk timiá kakarar chichakaramtai, Pilato yumi ikimiartin itataram tusa akupkamiayi. Tura yumin itaaramtai, aints ainau mash jiiiminai ikimiak:

—Ju aints nekas tunaarinchau maatniunka wikia pachinkashtatjai. Nuka atum-nawaitai. Tura atumka ju nekaataram tusan, uwejrún ikimiajai, —timiayi.

²⁵ Tamati aints ainau mash aiminak:

—Iikia ii weatak ju aints maamuka jiiistatji. Tura asamtai nu aintsu numpe numpara-mtai, iisha ii weari ainausha wiasmantikiatati, —tiarmiayi. ✠

²⁶ Tinamtai Pilato Barrabásan karsernumia jiiiki akupkamiayi. Tura suntar ainau Jesúsán katsumkarat tusa, tura numi winangmanum ajinkarti tusa akupkamiayi. ✠

²⁷ Akupkamtai suntar ainau ni pujutirin Jesúsán jukiar, ni wajamunam suntar ainau mash irunturarmiayi. ²⁸ Tura wejmakrin aitkar wishikinak, yamaikia apu ati tusar, apu wejmakrin kapantakun antsrarmiayi. ²⁹ Tura tsengkrutin jangkin najatawar tsengkrumtikiar tura nangkia tumaun karisan untsurinini taksarmiayi. Nunia nangkamiar wishikrami tusar tikishmatrar:

—Judío apuriya, pengker pujusta, —tiarmiayi.

³⁰ Tura usukrarmiayi. Tura karisan jurukiar muuken awatiarmiayi. ³¹ Nuna turuwar wishikrar umisar, apu wejmakrin aitkar, ni wejmakrin ataksha antsrarmiayi. Tura numi winangmanum maatai tusar Jesúsán jukiarmiayi.

Numi winangmanum maamuri

(Marc. 15.21-32; Luc. 23.26-43; Juan 19.17-27)

³² Tura Jesúsán jukiar jinta weenak, Cirene nungkanmaya aintsun Simón naartinun wainkar, Jesúsá krusrin nanarsat tusar achikiarmiayi.

³³ Nunia mura Gólgota tutainum wearmiayi. Gólgotaka ii chichamejaingkia muuk ukunch taku tawai. ³⁴ Tura nuni jear, najaimiashti tusar, umuti vino tutain yapaujai pachimrar umurat tusar susarmiayi. Jesús suamaitiat nuna nekapés nakitak umurchamiayi.

³⁵ Turamtai numi winangmanum jinkar umisar, yakí takuiniar nenaawar suntar ainau nakuruti suerten tutain nakurinak: ¿Yáki iin nepetamak Jesúsá entsatirin jukit? tusar nakurusarmiayi. ✠ ³⁶ Tura: Nakasmi tusar, Jesúsán jiiij pujuriarmiayi. ³⁷ Tura aints ainau:

✠ 27:25 (Hech. 5.28) ✠ 27:26 (Hech. 3.14) ✠ 27:35 (Sal. 22.18)

¿Waruka maamuita? tu inintrinauka mash nekaawarat tusar tatangkan aarar, Jesúsá muuke yakinini numi winangmanum nujtukarmiayi. Nu aarmauka nuwaitai: “Juka Jesúsaitai, judío apurintai.”

³⁸ Nuniasha kasa aintsun jimianan, kichik Jesúsá untsurinini, tura kichnasha Jesúsá menarininisha numi winangmanum nenaawarmiayi. ³⁹ Turuwaramtai aints ainau nangkaaminak Jesúsán wishikinak muuken pearar pasé chicharinak:

⁴⁰ —¿Ame Yus seati juun jean yumpungtatjai, turan kempatam kintati ataksha jeamkatatjai tichamkum? Watska, yamaikia amek uwemrata. Yuse Uchirinkumka, numinmaya kuankita, —tiarmiayi.✠

⁴¹ Sacerdote juuntri ainau, tura Moisésá chichame nuikiartin ainausha, tura fariseo ainausha, tura judío apuri ainausha mash Jesúsán wishikinak, mai nuwamtak chicharainak:

⁴² —Chikich ainaun uwemtiknuyayi, antsu ningki uwemratatkama tujintawai. Israela apurinkungka, nekas numinmaya kuankiamtaikia, iikia nekasampita tiinji. ⁴³ Yusnaka nekas nintimnuyayi. ¿Nangkami wikia Yuse Uchirinjai tichamasha? Watska, Yus nekas wakerakka, yamaikia uwemtikrati, —tiarmiayi.✠

⁴⁴ Kasa aintcha nijai metek ajintamuka nunisang Jesúsán pasé chicharkamiayi.

Jesúsá jakamuri

(*Marc. 15.33-41; Luc. 23.44-49; Juan 19.28-30; Hebr. 9.1-10.22*)

⁴⁵ Tsaa tupin wajasamtai, mash nungka te wajasmiayi. Tura kempatam hora nangkamaramtai, tsaa yantanti ataksha tsantramiayi. ⁴⁶ Turamtai Jesús hébreo chichamejai kakar untsamak:

—Elí, Elí, lema sabactani, —timiayi. Nuka ii chichamejai “Yusru, Yusru ¿waruka ajapruamsha ukurme?” taku timiayi.✠

⁴⁷ Tamati aints nuni wajainau nuna antukar:

—Antuktaram. Yuse chichame etserin Elías yaanchuik pujumia nu tati tusa untsuwai, —tiarmiayi.

⁴⁸ Tinamtai aints kichik ampuki we, vino churiniun uruchjai chupir sapapjai iju, mukunat tusa áapamiayi. ⁴⁹ Turamtai chikich aints ainau chicharinak:

—Inaisata. ¿Elías taa uwemtikrashtimpiash? Nu wainkami, —tiarmiayi.

⁵⁰ Tinamtai Jesús ataksha kakar untsamak nuniangka jakamiayi. ⁵¹ Jesús jakamtai, Yus seatai juun jeanam aparmau netimia nu ningki yakíya tseu jaankamiayi. Tura nungka uurkamiayi. Uurmatai pampa ainausha puuntrarmiayi. ⁵² Tura aints iwiartai ainausha ningki urankaru asaramtai, Yuse umirin jakaru ainau untsuri nantakiarmiayi. ⁵³ Tura kempatam kinta nangkamarai, Yus Jesúsán eemak inankiamtai, nu jakaru ainau iwiarsamunmaya jiinkiar, Yuse yaktarin Jerusalénnum wayaawaramtai, aints untsuri niin wainkarmiayi.

⁵⁴ Jesús jakamtai nungka uurmatai, suntar ainau Jesúsán nakarmia nusha, tura ni kapitangkrisha nuna wainkar, tura chikich shamrumtin amia nunasha wainkar shamkarmiayi. Tura shaminak:

—Juka nekas Yuse Uchiri ayayi, —tiarmiayi.

⁵⁵ Tura nuwa ainau untsuri arák jijj wajatiarmiayi. Nu nuwa ainau Galilea nungkanmaya taar, Jesúsán nemarsar yaingkiarmiayi. ⁵⁶ Nu nuwa irunu Magdalanmaya Maríjai, tura José nukuri Maríjai, tura Zebedeo nuwaríjai nuni wajaarmiayi.✠

Jesúsá iwiarsamuri

(*Marc. 15.42-47; Luc. 23.50-56; Juan 19.38-42*)

⁵⁷ Kintamati Arimateanmaya aints kuikiartin José naartin tamiayi. Nusha Jesúsán nemarnuyayi. ⁵⁸ Tura Pilatonam we, Jesúsá namangken iwiarsatas iniimiayi. Tamati Pilato: Susataram tusa chichaman akuptukmiayi. ⁵⁹ Turamtai José Jesúsá namangken

✠ 27:40 (Mat. 26.61; Juan 2.19) ✠ 27:43 (Sal. 22.7-8) ✠ 27:46 (Sal. 22.1) ✠ 27:56 (Luc. 8.2-3)

juki, tarach yamarmajai kangkarmiayi. ⁶⁰ Tura ni iwiarsatnunam pampa taimu yamarmanam iwiarsamiayi. Tura nuni iwiaras umis, waiitirin kaya juun najanamujai epenmiayi. ⁶¹ Turamtai nuni Magdalanmaya Marí chikich Maríjái iwiarsamun ná kainak jiij pujuriarmiayi.

Suntar ainau Jesús iwiarsamun nakasmauri

⁶² Kashin tsawaar, ayamtai kinta kintamaunum sacerdote ainau fariseo ainaujai Pilaton jii Sartas weriarmiayi. ⁶³ Tura chicharinak:

—Apua, nu wait chichaman etserin yaanchuik iwiaaku pujak chichaak: ‘Wi jakan kempatam kinta tepayatun ataksha nantaktatjai,’ tinuyayi. [☆]

⁶⁴ “Tu tinu asamtai ni nuiniatiri ainau kashi tariar, ni namangken kasamkarai tusam, kempatam kinta suntarum iwiarsamun wainkarti tusam akupkarta. Nu turachkumn- ingkia, ni namangken kasamkar, aints ainau anangminak: ‘Nekas jakamunmaya nantakni,’ tiarai tusam turata. Nu chichamjaingkia aints ainaun yaanchuik anangmawarmia nuna nangkamasarang anangmawartinuitai, —tiarmiayi.

⁶⁵ Tinamtai Pilato aimiak:

—Atum wakerakrumka aints ainau iwiarsamun urakarai tusaram suntar ainau atumek akupkataram, —timiayi.

⁶⁶ Tamati ayu tusar weriar, iwiarsamun urakarai tusar, epentairin kaya najanamun sentajai kantserar, apu aarmaurin sello tutajjai nujtukarmiayi. Tura suntar ainau iwiarsamun wainkarat tusar ukurkiarmiayi.

28

Jesúsa nantakmiauri

(*Marc. 16.1-8; Luc. 24.1-12; Juan 20.1-10*)

¹ Judío ayamtai kinta nangkamaramtai, tumíng kintati kashik Magdalanmaya Marí chikich Maríjái iwiarsamun jii Sartas wearmiayi. ² Tura weenai nungka kakarman uurkamiayi. Tura uurmatai Yuse awemamuri nayaimpinmaya tari, epenmiaurin kaya ututun urak nuni keemsamiayi. ³ Yuse awemamuri peema timianu paan tsantramiayi. Tura ni entsatiri nekas puju jii tsumir amiayi.

⁴ Tumamtai suntar ainau nuna wainkar shaminak kura kura wajaarmiayi. Tura jakawa nunisarang ayaarar nungkanam tepesarmiayi. ⁵ Turinamtai Yuse awemamuri nuwa taaru ainaun chicharak:

—Shamrukairap. Atumka nekasrum Jesús numi winangmanum maawarma nu earme tusan nekajrume. ⁶ Juningkia tepatsui. Jakayat ni tímia nunisang nantakni. Ni iwiarsamuri jii staram. ⁷ Turaram wári werum ni nuiniatiri ainau jii srum: ‘Jesús jakayat jakamunmaya nantakni. Tura atum weatsrumning, niyá eemak Galilea nungkanam wetatui. Tura asamtai nuni weriram wainkatatrume tawai, ni ujatruktaram.’ Nunak tajarme, —timiayi.

⁸ Tamati nu nuwa ainau shaminayat, nukap warasar iwiarsamun ukukiar: Jesús nuiniatiri ainau ujakmi tusar ampukiar waketkiarmiayi. ⁹ Waketinai Jesús wantintukmiayi. Tura wantintuk:

—¿Pujarmek? —tamati, Jesús tariar tikishmatrar nawencha takarsar:

—Ameketme juuntam, —tiarmiayi. ¹⁰ Tinamtai Jesús chicharak:

—Shamrukairap. Yamaikia werum wína yatsur ainau ujatruktaram: Galileanam wearti. Tura nuni jear wína waitkartatui tawai tusaram ni ujatruktaram, —timiayi.

Suntar ainau etserkamuri

¹¹ Nuwa ainau waketkiaramtai, suntar iwiarsamu wainin ainau yaktanam wear, sacerdote juuntri ainaun ni wainkamurin mash ujakarmiayi. ¹² Ujakaram niisha nuna antukar ¿itiurkamnawaita? tusar, judío juuntri ainaun jii Sartas weriarmiayi. Tura chichasar umisar metek nintimrar, suntar ainaun kuikian nukap susar chicharinak:

[☆] 27:63 (Mat. 16.21;17.23;20.19)

¹³ —Anturtuktaram. Aints ininminamtai tu ujaakrum: Kashi ii kanakur teparin, ni nuiniatiri ainau tariar Jesúsá namangken kasamkar jukiari, anangkuram titaram. ¹⁴ Turakrumningkia juun apu Pilato nu chichaman antuk, atumin pasé awajtamsarai tusar, ii weri chichamka iwiaratatji, —tiarmiayi. ¹⁵ Tinamtai suntar ainau ayu tusar kuikian jukiari, judío juuntri tina nunisrik titai tusar wearmiayi. Tura asar judío ainau yamaisha tuke nunisarang tu etserin ainawai.

Jesús ni nuiniatiri ainaun akatar akupkamuri

(Marc. 16.14-18; Luc. 24.36-49; Juan 20.19-23)

¹⁶ Nunia Jesúsá nuiniatiri once (11) ainauti Galileanam wemiaji. Tura Jesús nu muranam wakatar timiau asar, nuni wakamiaji.✠

¹⁷ Tura Jesús wainkar tikishmatrar: “Ameketme juuntam,” timiaji. Antsu chikich ainausha: ¿Nekasash Jesúsai? tu nintimrarmiayi. ¹⁸ Tuminamtai Jesús ni nuiniatiri ainauti wajainamunam tejuwach taa iin chichartamak:

—Yus wína chichartak: Nayaimpinam tura nungkanmasha wína kakarmarjai mash ainia nu inarta turutmiayi. ¹⁹ Turutin asamtai, mash nungka ainamunam werum, wína nuiniatir wajasarti tusaram, aints ainau nuiniartaram. Tura wína Apaachiru Yuse naari pachisrum, tura Yuse Uchiri naari pachisrum, tura Yuse Wakani naari pachisrum aints ainau imiaitaram. ²⁰ Turaram wína chichamur wi akupkamiajrume nuka chikich aints ainau miatrusarang umirkarat tusaram nuiniartaram. Tura nusha kajinmakirap: Nungka amuachmataikia wikia kintajai metek, kashincha kashincha tuke atumjai tsaniasan pujustinuitjai tajarme, —Jesús akatamak turammiaji.

✠ 28:16 (Mat. 26.32; Marc. 14.28)

Yamaram Chicham Marcosa Aarmauri

Imiakratin Juan Yuse Chichamen etserkamuri

(Mat. 3.1-12; Luc. 3.1-9, 15-17; Juan 1.19-28)

¹ Yuse Uchiri Jesucriston pachis pengker etserkamu tu nangkamamiayi.

² Yaanchuik imiakratin Juan akiintsang, Yuska niin pachis ni chichamen etsernun Isaías naartinun ni chichamen aamtikramiayi. Nu aarmauka nuwaitai:

“Nintimrataram. Yus chichaak: Ami wetintrumin weti tusan, tura ami jintimin iwiarati tusan, wína akupamurun eemkan akupajai,” timiayi.

³ Nisha numi atsamunam taa aints ainaun chicharak: “Juun Apu wekaasatniun jintan tupin iwiarina nunisrumek atumi nintisha iwiarataram.” Tu aarmawaitai.✠

⁴ Yaanchuik aarmawa nunisang Juan numi atsamunam aints ainaun entsanam imaimiayi, tura chicharak:

—Wína tunaarun Yus sakturati tusaram, atumi nintimauri yapajataram. Tu nintimraram maaitaram, —timiayi. ⁵ Tura Yuse chichamen etserkau asantai, Judea nungkanmaya ainau mash anturkatai tusar, Juan pujamunam wearmiayi. Tura Jerusalén yaktanmayasha aints untsuri kaunkarmiayi. Tura Jordán entsanam taar ni tunaarin etserkaramtai, Juan nu aints ainaun imaimiayi.

⁶ Juan kamiyu uren kachumnuyayi. Peetirinha nuwap najanamun peeyayi. Tura manchinha yuyayi. Tura wapasa yumirinha uminuyayi. ⁷ Tura aints ainaun ujaak:

“Wína ukurun winá nuka nekas wína nangkatusang kakaram atatui. Wikia nekasan mianchau asan, tsuntsumruan sapatri jingkiaturin atiatay tayatun, natsaamau asan atiachminuitjai. ⁸ Wikia aya entsanmak imiajrume, antsu ningkia Yuse Wakani atumi nintin engketramatnuitrume,” Juan timiayi.✠

Jesúsa maimuri

(Mat. 3.13-17; Luc. 3.21-22)

⁹ Juan aints ainaun imiaak pujai, Jesús Nazaret yaktanmaya Galilea nungkanmaya jiinki: Jordán entsanam wína imiatti tusa Juankun werimiayi. ¹⁰ Tura maai entsanmaya jiinki, nayaim uranniun wainkamiayi. Tura Yuse Wakani yapangma tumau ni muuken winaun wainkamiayi. ¹¹ Tura nayaimpinmaya chichaman antukmiayi. Nu chichamka nuwaitai:

“Ameka wína uchiruitme, wína anetiruitme. Amin pengker nintimtusana pujajme,” timiayi.✠

Jesúsan nekapsamuri

(Mat. 4.1-11; Luc. 4.1-13)

¹² Nunia Yuse Wakani Jesúsán aints atsamunam ayamiayi. ¹³ Nuni pachim pujuinamunam cuarenta (40) kinta iwianchi apuri Satanásjai nekapnaisatas pujumiayi. Turamtai Yuse awemamuri ainau Jesúsán wainkartas tariarmiayi.

Jesús Galilea nungkanam ni takatrin nangkamamuri

(Mat. 4.12-17; Luc. 4.14-15)

¹⁴ Santar ainau Juankun achikiar, kársernum engkewaramtai, Jesús: Yus aints ainaun tu inartinuitai tusa, Yusnum uwemratin chichaman etserkatas Galilea nungkanam tamiayi. ¹⁵ Tura chichaak: “Yuse kintari jeayi. Tura ni aintsri inartin kinta jeatak wajasu asantai, yaanchuik pasé nintimtaingkia yapajiararam, Yusnum uwemratin chicham nekasampita tusaram umirkataram,” Jesús timiayi.✠

Namakan achiu ainaun untsukmauri

(Mat. 4.18-22; Luc. 5.1-11)

✠ 1:3 (Isa. 40.3; Mal. 3.1) ✠ 1:8 (Juan 1.6-8, 32-34; Hech. 1.5) ✠ 1:11 (Mat. 17.5; Marc. 9.7) ✠ 1:15 (Mat. 3.2;4.17)

¹⁶ Jesús Galileanam juun kucha kaanmatkarin wekaas, namakan achiun Simón naart-inun ni yachí Andrésjai nuni pujuinaun wainkamiayi. ¹⁷ Tura wainak chicharak:

—Wína nemartustaram. Turaram namak achiarme nunisrumek aints ainau wína chichamur ujakmintrum, —timiayi.

¹⁸ Tamati nuna antukar arutsuk ni rederin japawar ukukiar Jesúsán nemarkarmiayi.

¹⁹ Turinamtai Jesús kucha kaanmatkarin arakchichu wekaas, Zebedeo uchirin Santiagon ni yachí Juanjai kanunam engkemsar rederin apainak pujuinaun wainkamiayi.

²⁰ Tura wainak:

“Wína nemartustaram,” tusa untsukmiayi. Tamati ni aparin tura ni aintsri ainauncha kanunam ukukiar Jesúsán nemarkarmiayi.

Jesús iwianchin aintsnumia jiiki akupkamuri

(Luc. 4.31-37)

²¹ Nunia Capernaum yaktanam jearmiayi. Tura ayamtai kinta asamtai, Jesús iruntai jeanam waya, aints ainaun Yuse chichamen nuiniarmiayi. ²² Tura nuiniamtai aints ainau ni chichamen antukar nintiminak: “Juka Moisésa chichamen nuikiartin ainaun nangkamasang iincha Yuse kakarmarijai timiá pengker nuitamji,” tiarmiayi.☆

²³ Nu iruntai jeanam aints iwianchrintin pujus kakar untsamak:

²⁴ —Nazaretnumia Jesúsá ¿warukaya iincha amukratkatasmesha winame? Wikia nekajme. Yus akupkamuitme. Nekasam pengké tunaarinchau aa nuwaitme, —tu jiyakmiayi.

²⁵ Tamati Jesús iwianchin kakar chicharak:

—Chichatsuk asata. Tura ju aintska ukuktia, —timiayi.

²⁶ Tama iwianchkia nu aintsnaka kura kura awajki, kakar untsamak jiinkimiayi. ²⁷ Tura jiinkiamtai aints ainau nuna wainkar nintimrar mai nuamtak iniininak:

—¿Ausha waringki? ¿Ju yamaram chichamsha waringki? Juka timiá kakaram asa, iwianch ainaun jiiki akupawapi. Tura akupamu asar, niincha umirinawapi, —tunaiyarmiayi.

²⁸ Tura asaramtai wári Galilea nungkanam Jesúsá turamurin pachisar etserkarmiayi.

Jesús Pedro tsatsarin tsuwarmauri

(Mat. 8.14-15; Luc. 4.38-39)

²⁹ Nunia iruntai jeanmaya jiinkiar Jesús Simónjai, nunia Andrésjai Simónka jeen wayaawarmiayi. Santiagosha tura Juansha Jesúsán nemariarmiayi. Nu jeaka Simónka pujutiri, tura yachí Andrésu pujutiri ayayi. ³⁰ Jesús jea wayaamtai: Simónka tsatsari tsuweak peaknum tepawai tusar ujakarmiayi. ³¹ Tura ujakaram Jesús ni tepamunam weri, uwejen tap achik inankimiayi. Turamtai tsuweamuri karmachu michatramiayi. Tura michatar wajaki irasartas taarun yuramiayi.

Untsuri aints ainaun pengker tsuwarmauri

(Mat. 8.16-17; Luc. 4.40-41)

³² Tsaa nungká wajasai, jau ainauncha tura iwianchrintin ainauncha mash Jesúsán itiararmiayi. ³³ Tura Jesús pujamunam waiti aarin nu yaktanmaya ainau mash kaunkarmiayi. ³⁴ Tura kaunkaramtai Jesús najaiminauncha untsuri tsuwarmauri. Tura iwianchrintin ainauncha iwianchnasha untsuri jiirkimiayi. Tura iwianch ainau Jesúsán pachisar: Juka Yuse Uchirintai tusar nekainau asaramtai, ni naarin pachisar chichakarai tusa:

—Chichatsuk jiinkitaram, —timiayi.

Judío iruntai jeanam Yuse chichame etserkamuri

(Luc. 4.42-44)

³⁵ Nunia kashin tsawaatsaing Jesús nantakmiayi. Tura jeanmaya jiinki aints atsamunam Yusen seatas wemiayi. ³⁶ Turamtai Simón ni amikri ainaujai ¿tuning puja? tusar eakartas jiinkiararmiayi. ³⁷ Tura Jesúsán wainkar:

☆ 1:22 (Mat. 7.28-29)

—Amin mash eatminawai, —tiarmiayi.

³⁸ Tinamtai Jesús chicharak:

—Chikich chikich yaktanam tejuwach ainamunam Yuse chichame etserkatar weartai. Nuna turatasan taawitjai, —timiayi.

³⁹ Nunia Galilea nungkanam mash iruntai jea ainamunam Yuse chichamen etserka-maikiak wekaikinij, tura iwianch ainauncha jiiki akupkamaikiak wekaimiayi. ☆

Jesús aints kuchaprinun tsuwarmauri

(Mat. 8.1-4; Luc. 5.12-16)

⁴⁰ Nunia aints kuchaprintin Jesús an seatas tarimiayi. Tura taa tikishmatar seak:

—Ame wakerutakmeke namangkruha tsuwaramnawaitme, —timiayi.

⁴¹ Tamati Jesús wait anentar uwejejai ni namangken takaras chicharak:

—Ja ai, wakerajme. Pengker wajasta, —timiayi.

⁴² Tamati nu tamaujai metek tsaar pengker wajasmaiayi. ⁴³⁻⁴⁴ Turamtai Jesús akatak:

—Antukta. Ameka juka kichkisha etserkaip. Antsu sacerdotenam weta. Tura nuni weme namangkem inakmasta. Tura pengker wajasu asam, aints ainu pengker wajas-maurumin nekaawarat tusam, Moisés tímia nunismek turata, —Jesús tusa akupkamiayi.

⁴⁵ Tamaitiat ni Jesúsnumia jiinki ni turunamurin pachitsuk aints ainaun mash ujak-miayi. Tura nuna mash antukaru asaramtai, Jesús kichik yaktanmasha paan wainkaram wayaatatkama tujinkamiayi. Antsu yakta aarin aints atsamunam pujumiayi. Turamtai mash yaktanmaya aints ainu jiinkiar Jesúsnum taarmiayi.

2

Jesús pimpirun tsuwarmauri

(Mat. 9.1-8; Luc. 5.17-26)

¹ Jumchik kinta nangkamaramtai, Jesús ataksha Capernaum yaktanam jeamiayi. Tura jeamtai aints ainu ni amikri jeen pujaun nekaawarmiayi. ² Tura asaramtai aints untsuri jeanam wári kautkarmiayi. Tura jeanam kak piakaramtai, waaitinmasha wayaachmin angkanchauyayi. Tura Jesús Yuse chichamen nu aints ainu ujaak pujurmiayi. ³ Tura ujaak pujai, cuatro aints pimpirun tampumruwar itaarmiayi.

⁴ Tuminamtai aints untsuri jeanam iruntraru asaramtai, Jesúsnum jeatatkamar tujinkar jea yakí wakaar patan urakar, pimpirun tampunam engketun Jesús pujamunam yakiya itaarmiayi. ⁵ Tura nu cuatro aints pimpirun akupinak: Jesús nekasampi tsuwartatua, tu nintimraru asaramtai, Jesús nuna nekaa, pimpirun chicharak:

—Natsachi, tunaarum mash tsangkuramuitme, —timiayi.

⁶ Tamati Moisésa chichamen nuikiartin ainu nuna antú pujuarmiayi. Tura ni nintijai nintiminak: ⁷ “¿Jusha waruka tuusha chichaawa? ¿Ningki Yusetjai tumamtsuash? ¿Yusek tunaunaka sakarminchakai?” tu nintimrarmiayi. ⁸ Tuminamtai Jesús ni nintimaurin nekaamiayi. Tura chicharak:

—¿Waruka tuusha nintimsarmesha pujarme? ⁹ ¿Warí timiá yumtinuita? ¿Ami tunaarum tsangkuramuitme titin yumtinkai? Antsu nu tachakrishsha pimpiru: ¿Wajakim wekaasata titin yumtinkai? ¹⁰ Tura wikia aints ayatun Yus akupkamu asan, ju nungkanam aints ainu tunaarun tsangkuratnuitjai. Tura wi turamnawaitjai tusan, yamaikia nekamtikiatjarne, —timiayi.

Tura pimpirun chicharak:

¹¹ —Amin tajame: Nantakim tampuram jukim jeemin waketkita, —Jesús timiayi.

¹² Tamati nu tamaujai metek aints ainu mash jiminai, pimpiru wajakim tampurin juki jiinkimiayi. Turamtai aints ainu mash nintiminak:

—Yus nekas kakarmaitai. Ju turamuka pengké kichkisha wainchawaitji, —tiarmiayi.

Jesús Levín wína nuiniatir ata timiauri

(Mat. 9.9-13; Luc. 5.27-32)

☆ 1:39 (Mat. 4.23;9.35)

¹³ Jesús jeanmaya jiinki, ataksha kucha kaanmatkarin wekaimiayi. Tura asamtai aints ainau mash niin kautkaram nuiniarmiayi. ¹⁴ Nunia ukuki, apu akitinam nangkamak, Alfeo uchiri Leví naartinun nuni pujaun wainkamiayi. Nuka romano apuri akatramu asa, aints ainau apun akikiarti tusa kuikian juyayi. Tura Levín wainak Jesús chicharak:

—Wína nuiniatir ata, —tama Leví ayu tusa wajaki ni takatrinka mash ukuki Jesúsán nemarsamiayi.

¹⁵ Tura Leví Jesúsán: Yuwita tusa ni jeen jeemiayi. Turamtai Jesús nuni yuwak pujai, kuikian juu untsuri, tura chikich tunaarintin ainausha untsuri nijai iruntrar misanam yuwiarmiayi. Ni nuiniatiri ainausha Jesúsjai tsaniasar wekajiarmla nusha untsuri nuni yuwaarmiayi. ¹⁶ Tura Jesús kuikian juu ainaujai, tura chikich tunaarintin ainajaisha iruntrar yuwinamtai, fariseo ainausha, tura Moisésa chichame nuikiartin ainausha nuna wainkar, Jesúsá nuiniatiri ainaun iniinak:

—¿Maj atumi nuitamin waruka kuikian juu ainaujai tura chikich tunaarintin ainajaisha yuwawa? —tiarmiayi. ¹⁷ Tinamtai Jesús nuna antuk aimiak:

—Aints pengker pujuinaka tsuwakratnunka yuuminatsui. Antsu najaimin pujuinau tsuwakratnun yuuminawai. Wikia pengke aintsuitjai tinaunka: Pasé nintimaurum yapajiaram titasnaka tachawitjai, antsu tunaawitjai tinaun: Pasé nintimaurum yapajiaram Yus umirkataram titasan tawitjai, —timiayi.

Ijarmatin pachisar Jesúsán iniasmauri
(Mat. 9.14-17; Luc. 5.33-39)

¹⁸ Juanku nuiniatiri ainau, tura fariseo nuiniatiri ainausha Yus seami tusar yutsuk pujuarmiayi. Turinamtai chikich aints ainau tariar, Jesúsán iniinak:

—Juanku nuiniatiri tura fariseo nuiniatiri ainausha ijarmawar yutsuk Yusen seinawai. ¿Antsu ami nuiniatiram ainau Yus seami tusar waruka ijarmatskesha pujuinawa? —tiarmiayi.

¹⁹ Tu iniinam Jesús nuikiartamun nuikiartak:

—¿Aints yamai nuwan nuwatkau ni untsukmau ainaujai iruntrar pujuinaka yutsukek pujuina? Atsa, nunaka tuminatsui. Antsu aints nuwan nuwatak ni untsukmau ainaujai pujamtai, untsukmau ainau warainak yutanka yutsukka pujuschartinuitai. ²⁰ Antsu aints nuwan yamai nuwatkamun jukiartin kinta jeamtai, nuniangka untsukmau ainau wake mesekar ijarmawartinuitai. Wikia wína nuiniatir ainaujai pujamtai, nusha nunisarang warainak yutsukka pujuschartin ainawai. Antsu wína jurukiarantai, nuniangka ijarmawartinuitai, —timiayi.

²¹ Nunia Jesús yamaram chichaman ni nuiniarmia nuna pachis ataksha etserak: “Wejmak arut jaankamtai, ju nungkanam aints kichkisha tarachin yamarman nujtuk apainatsui. Antsu nu turamka, nunia nijaram yamaram tarach setur tuupich wajaayi, tura asa arutrin chingkiana nuna nangkamasang nukap jaankatnuitai. ²² Nuniangka amuti, vino tutai, yamai kariauka nuwap aparmau mamurunmaka yarakchatnuitai. Nu turamka vino kariak wapakrak nuwap aparmaunaka pujkatnuitai. Tura vino ukaratnuitai, tura nuwap aparmausha pasemartinuitai. Antsu vino yamaram aa nu nuwap aparmau yamarmanam yaratayi,” Jesús timiayi. *

Ayamtai kintati trigo majurar yuwamuri
(Mat. 12.1-8; Luc. 6.1-5)

²³ Chikich ayamtai kintati Jesús ni nuiniatiri ainaujai aja japeng nangkaminak, ni nuiniatiri trigo jingkiain achikiar majurar yukiar wearmiayi. ²⁴ Turinamtai fariseo nuna wainkar, Jesúsán chicharinak:

—Ayamtai kintati Moisés takakmatsuk asataram tusa surimkau wainiatcha ¿warukaya ami nuiniatirmeka aitkinawa? —tiarmiayi.

* 2:22 (Tura asa yamaram chicham umirkurmeka, arut chicham etsermauka inaisatnuitrume, taku timiayi.)

²⁵ Tinamtai Jesús aimiak: —¿Atumka ii juuntri Davidta turamuri pachisrum Yuse Papiri aujchaukitrum? ¿Nuka yurumkan yuumak ni aintsri ainaujai tsukaminak turuwarmia nuka aujchaukitrum? ²⁶ Sacerdote apuri, Abiatar naartin pujai, David Yus seatai juun jeanam waya, nuni Yus inaktustin pang Yus susamu, aya sacerdote yutairi au wainiat, nisha sacerdotechutiat yuwamiayi. Tura nijai wekainauncha: Yuwataram tusa susamiayi. Antsu Yus nu turamu pachiska tunaawitai tichamiayi, —timiayi.

²⁷ Tura ataksha chicharak:

—Yus ayamtai kinta aints ainu ayamrarti tusa najanamiayi. Antsu aints ainu wait wajakarti tusangka, Yus ayamtai kintanka najanachmiayi. ²⁸ Wi aints ayatun Yus akupkamu asan, aints ainaun ayamtai kintati tu pujusarti tusan inartinuitjai, —Jesús timiayi.✠

3

Uwejen mutchaun tsuwarmauri

(Mat. 12.9-14; Luc. 6.6-11)

¹ Chikich ayamtai kintati Jesús ataksha iruntai jeanam wayaamiayi. Tura nuni waya, aints uwejen mutchaun wankamiayi. ² Turamtai fariseo ainu Jesús an jiiis: Ayamtai kintati ju aintsun tsuwaramtaikia, Jesús tunau wajasi timi, tu nintimsar jiiij pujuriarmiayi. ³ Tuminamtai Jesús uwejen mutchaun chicharak:

—Wajakim japen wajasta, —timiayi. ⁴ Tura nu aints japen wajasamtai, Jesús aints ainaun iniak:

—¿Ayamtai kintatisha pengker aa nuka turatnukai? ¿Nu turachkursha pasé aa nuka turatnukai? ¿Tura ju kintatisha aints jakashti tusarsha uwemtikratnukai? ¿Nu turachkursha ju kintatisha aints maatnukai? ¿Atumsha itiur nintimrume? —Tu iniamaitiat Jesús an aitske pujuarmiayi. ⁵ Tura nu aints pasé nintintin asaramtai, Jesús mash jiiis kajerak wake mesekmiayi. Tura uwejen mutchaun chicharak:

—Uwejem kutsmarta, —timiayi. Tama uwejen kutsmar pengker wajasmiayi. ⁶ Turamtai fariseo ainu jiiinkiar, arutsuk Herodesa nemanin ainaujai iruntrar: Jesús maami tusar chichaman najatiarmiayi.

Aints Jesúsnum untsuri kaunkamuri

⁷ Nunia Jesús ni nuiniatiri ainaujai kucha kaanmatkarin wemiayi. Turamtai Galilea nungkanmaya ainu untsuri Jesús an nemariarmiayi. ⁸ Tura Judea nungkanmayasha, tura Jerusalén yaktanmayasha, tura Idumea nungkanmayasha, tura Jordán entsa majiniasha, tura Tiro yaktanmayasha, tura Sidón yaktanmayasha aints untsuri Jesús wainchatai takat turamun nekaawaru asar, Jesúsnum kaunkarmiayi. ⁹⁻¹⁰ Jesús untsuri aintsun tsuwaru asamtai, jau ainu mash: Jesús antingmi tusar shitanikiar wajarmiayi. Aints untsuri kautkaram, chanuntawarai tusa, Jesús ni nuiniatiri ainaun: Kanu umistaram tusa akupkamiayi.✠

¹¹ Tura iwianchrintin ainu Jesús an wainkar, naka tikishmatrar untsuminak:

—Ameka nekasam Yuse Uchirinme, —tiarmiayi.

¹² Tinamtai Jesús iwianch ainaun surimiak:

—Nuka pengké etserkairap, —tusa chicharkamiayi.

Jesús ni nuiniatiri inaikiamuri

(Mat. 10.1-4; Luc. 6.12-16)

¹³ Nunia Jesús mura waka: Aints wina nuiniatir arti tusa, aints ainaun ni wakerimia nuna untsukmiayi. Tura untsukaram Jesús an tariarmiayi. ¹⁴ Tura asamtai doce (12) aints irunun nijai wekaasarat tusa, tura Yuse chichamen etserkarat tusa akupkatas inaikiamiayi. ¹⁵ Tura jau ainauncha tsuwararat tusa, tura iwianchrintin ainauncha iwianchrin jiiirkiar akupkarat tusa, Jesús ni nuiniatiri ainaun ni kakarmarin susamiayi.

¹⁶ Nu doce (12) aintsu naaringkia nu ainawai: Simón, chikich naari Pedron Jesús

✠ 2:28 (Gén. 2.2-3; Ex. 20.8-11; Lev. 19.3) ✠ 3:9-10 (Marc. 4.1; Luc. 5.1-3)

inaikiamiayi. ¹⁷ Nuniasha Zebedeo uchiri Santiago, nuna yachí Juanjai, mai Boanerges inaikiamiayi. Nuka “ipiamta tumau ainiarme” taku tawai. ¹⁸ Nunia Andrésnasha, nunia Felipencha, nunia Bartoloméncia, nunia Mateoncha, nunia Tomásnasha, nunia Alfeo uchirin Santiagoncha, nunia Tadeoncha, nunia Simón yaanchuik mesetan najanin amianu, ¹⁹ nunia Judas Iscariotencha: Wina nuiniatir ata tusa Jesús inaikiamiayi. Antsu nu Judaska ukunam Jesús anangka surukmiayi.✠

Jesús pachis pasé chichasmauri
(*Mat. 12.22-32; Luc. 11.14-23;12.10*)

²⁰ Tura jeansam waketkiaramtai, aints ainu ataksha kaunkaru asaramtai, Jesús ni nuiniatiri ainaujai yuwartatkamawar tujinkarmiayi. ²¹ Turinamtai Jesús wearisha nuna nekaawar: ¿Waurtsuash? tu nintimsar Jesús jukiartas tariarmiayi.

²² Turinamtai Moisésa chichamen nuikiartin ainu Jerusalénnumia taar pasé chicharinak:

—Iwianchi apuri Beelzebú kakarmarijai iwianch ainuun jiiru weawai, —tiarmiayi.✠

²³ Tu tinamtai, Jesús nu aints ainu winitaram tusa untsukmiayi. Tura nuikiartutai chichaman nuiniak:

“¿Iwianchi apuri Satanáska itiur ningkisha japmamating? ²⁴ Nintimrataram. Chikich nungkanmaya apu ainu kajernaikar kanakar pujusar maaninamtaikia, nu nungkaka wári mesertinuitai. ²⁵ Tura aints ainu kichik jeansasha iruntrar kajernaikar pujuinakka nu jeansha wári ukukiartinuitai. ²⁶ Tura Satanás ni inatiri ainaujai kajernaikar maaninakka ¿itiur tukesha pujusarting? Nekasar amunikiartinuitai.

²⁷ “Nintimrataram. Aints nekas kakaram ni jeen pujamtaikia, jeentin jingkiatskeka ni waririn ainu nunaka pengké kichkisha kasarkachartinuitai. Antsu jeeniun jingkiawar waririn jurukiartinuitai.

²⁸ “Nekasan tajarme: Antsu tunaari ainu nunaka mash tsangkuratnuitai. Tura Yusen pachisar pasé chichaamuncha tsangkuratnuitai. ²⁹ Antsu Yuse Wakanin pachisar pasé chichainaunka pengké tsangkurashtinuitai, antsu nu aintska tuke wait wajakartinuitai,” Jesús timiayi. ³⁰ Jesús iwianchrinuitai tinu asaramtai nunaka timiayi.

Jesús nukuri ni yachí ainaujai tarimuri
(*Mat. 12.46-50; Luc. 8.19-21*)

³¹ Nunia Jesús yachí ainu ni nukurijai Jesús pujamunam taarmiayi. Tura aanum wajasar, Jesús untsutruta tusar, chikich aintsun akupkarmiayi. ³² Turinamtai aints niin tentewarmia nu Jesús chicharinak:

—Nukuram yachim ainaujai aanum wajasar amin aujtamsartas untsurminawai, —tiarmiayi.

³³ Tu tinam Jesús chicharak:

—¿Yaa ainawa wina nukursha tura wina yatsursha? —timiayi.

³⁴ Tu iniam aimkacharamtai, niin tentewarmia nuna jiis chicharak:

—Juka wina yatsur ainawai. Tura wina nukur ainawai. ³⁵ Aints Yuse wakeramurin mirinawuka wina yatsur tura wina umaar tura wina nukur ainawai, —Jesús timiayi.

4

Arakan pachis nuikiartamu
(*Mat. 13.1-9; Luc. 8.4-8*)

¹ Jesús ataksha kucha kaanmatkarin aints ainu nuiniartas nangkamamiayi. Aints untsuri iruntraramtai, kanunam engkema pujamtai, aints ainu kucha kaanmatkarin pujusarmiayi.✠

² Turinamtai Jesús nuikiartutai chichaman untsuri ujakmiayi. Tura aints ainu nuiniartas chicharak:

✠ 3:19 (Hech. 1.13) ✠ 3:22 (Mat. 9.34;10.25) ✠ 4:1 (Marc. 3.9-10; Luc. 5.1-3)

³ “Anturtuktaram. Aints arakan tsaamratas jiinkimiayi. ⁴ Tura tsaamam, araka jingkiayi junta kakeekamtai, chingki yakiiya kautkar yuwarmiayi. ⁵ Chikich araka jingkiayi kayanam nungka jumchik amanum kakeekamiayi. Tura kakeek nungka jumchik ayat kakarmachu tsapaiamiayi. ⁶ Antsu tsapaiyat tsaa sukuam kaarmiayi. Tura kangkape atsau asamtai jakamiayi. ⁷ Chikich araka jingkiayisha jangki amanum kakeekamiayi. Tura jangki pempearan araksha nerekchamiayi. ⁸ Chikitcha nungka pengkernum kakeekamiayi. Tura tsapai pengker nerekmiayi. Tura nu árakka treinta (30), tura kitcha sesenta (60), tura kitcha cien (100) nerekmiayi. ⁹ Aints ainautiram, ju chicham antukrum nintimrataram,” Jesús timiayi.

¿Waruka Jesús nuikiartamuncha etserkamiayi?

(Mat. 13.10-17; Luc. 8.9-10)

¹⁰ Nunia aints untsuri jiinkiamtai, Jesúsjai juwakarmia nu tura ni nuiniatiri ainausha Jesúsani iniinak: “¿Nu nuikiartutai chichamsha warimpita?” tiarmiayi. ¹¹ Tu tinam Jesús aimiak: “Yus aints ainaun itiu inartinuita tusar, chikich aints ainu paan nekaacharmin wainiatrum, atumka paan nekamtikiamuitrume. Antsu Yusen umirtan nakitinauka nuikiartutai chichamak ujakmawaitai. ¹² Nuka Yusen umirtan nakitinau asar, ni jiijaingka paan waininayat, wainmichua nunisarang wajasarti tusan, tura antutnasha antinayat nekaacharti tusan, ni tunaurin tsangkurai tusan tu ujarajarai,” Jesús timiayi.✠

Arak tsaamramu taja nunaka takun tajai tusa etserkamuri

(Mat. 13.18-23; Luc. 8.11-15)

¹³ Jesús ataksha chicharak: “¿Ju nuikiartutai chichamka wi taja juka warinkung taj tusaram nekatsrumek? Ju nekachurmeka ¿itiur chikich nuikiartutai chichamsha mashcha nekaatrume? ¹⁴ Aints arakan tsaamramia nuka Yuse chichamen etsernua nunisketai. ¹⁵ Tura árak junta kakeeramia nuka chikich aintsua nunisarang ainawai. Nuka chichaman antinayat, iwianchi apuri Satanás naartin wári tari, nu chichamnaka ni nintinian jurawai. ¹⁶⁻¹⁷ Chikich árak kayanam kakeeramia nuka chikich aintsua nunisarang ainawai. Nuka Yuse chichamen antukar, warasar wári umirinawai. Antsu árak kayanam kakeeramia nuka, kangkape atsau asamtai, wári jaawa nunisarang nintiminawai. Tura itiuirkachmin amatai tura Yusen nakitin ainu wishikinam, Yuse chichamen umirkachmin nintiminak umirtan wári inainawai. ¹⁸ Tura árak jangki amanum kakeeramia nuka chikich aintsua nunisarang ainawai. Nu aints ainausha Yuse chichamen antinawai. ¹⁹ Tura paan antinayat ju nungkanmaya aa nuna nintiminawai. Tura kuikiartin wajastaj tu nintimsar, mash iruna nuna wakerinawai. Tura asar Yuse chichamen nintimtsuk pujuinawai. Jangki amanum árak kakeeramia nuka nerekchatnuitai. Nu aintska jangki amanum árak kakeerawa nunisarang ainawai. ²⁰ Antsu árak pengke nungkanam kakeeramia nuka chikich aintsua nunisarang ainawai. Nuka Yuse chichamen antukar pengker umirinawai. Tura asar chikich aints ainu treinta (30), tura kitcha sesenta (60), tura kitcha cien (100) nerekua nunisarang ainawai,” Jesús timiayi.

Kantiin keemakmaun pachis nuikiartamu

(Luc. 8.16-18)

²¹ Ataksha Jesús chikich nuikiartamun etserak: “¿Aints kichkisha kantii keemak itaa muitsnum engkeawak? Atsa, tura paan ati tusa, ¿peaka wamketin pujsatnukai? Atsa, antsu paan ati tusa, yakí kentsatnuitai.✠ ²² Tura yamai uukmau aa nunaka ukunam mash paan inakmastinuitai. Tura yamai nekaachmin ainia nunaka ukunam mash paan nekaawartinuitai.✠ ²³ Aints ainautiram, ju chicham antukrum nintimrataram,” Jesús timiayi.✠

²⁴ Tura ataksha chicharak: “Atum antu wearme nu nintimrataram. Yuse chichame jumchik antukrumka jumchik nekaatnuitrume. Antsu Yuse chichame nukap antukakrumningka, Yuska atumin nuna nangkamasang nukap nekaataram tusa

✠ 4:12 (Isa. 6.9-10) ✠ 4:21 (Mat. 5.15; Luc. 11.33) ✠ 4:22 (Mat. 10.26) ✠ 4:23 (Mat. 5.15; Luc. 11.33)

nekamtikramatnuitrume. ²⁵ Tura asamtai Yuse chichamen nekas pengker nintim-tusar pujuinaunka Yuska nuna nangkamasang paan nekamtikiatnuitai. Antsu Yuse chichamen nintimtachunka antukmaurin kajinmamtikui,” Jesús timiayi.✠

Arak tsapaamun pachis nuikiartamu

²⁶ Nunia Jesús ataksha chicharak: “Yus aints ainaun inawa nuka aints arakan tsaamua nunisketai. Aints arakan arakmak tsaamui. ²⁷ Tura arak tsaamrar umisam, kanaisha tura iwiaisha kashisha tura tsawaisha árak tuke tsakaawai. Tura itiur tsakaawa tusangka nekatsui. ²⁸ Arak nungkanam tsaamram, ningki pengker tsapaayi. Tura tsapai nukarui, nunia chiikruk árakka katsuawai. ²⁹ Tura mash katsuaramtai, juuktin kinta jeayi tusar, aints ainau arakan juwinawai,” Jesús timiayi.

Mostaza jingkiaji pachis nuikiartamu

(Mat. 13.31-32; Luc. 13.18-19)

³⁰ Ataksha Jesús chicharak: “¿Yuse aintsri ainau itiur yujainawa? tusan, nuikiartutai chichamjai nuiniartajrume. Anturtuktaram. ³¹ Mostaza jingkiajiya tumawaitai. Nuka chikich araka jingkiajia nuna nangkamasang tuupchitai. ³² Antsu nuka araam tsapai, chikich arakan nangkamasang juuntaitai. Tura kanawe saram tsakaramtai, nuna kanawen mikin amanum chingki pasungminawai,” Jesús timiayi.

Jesús nuikiartamun ni nuiniatiri ainaun nekamtikiamuri

(Mat. 13.34-35)

³³⁻³⁴ Tura nuna antukmin ainau nekaawarti tusa, Jesús nuikiartutai chichamchau-jaingkia aints ainaunka pengké ujakchamiayi. Antsu ni nuiniatiri ainaujai kanakar pujusar: Nuna takun tajai tusa, nuikiartutai chichaman nekamtiknuayayi.

Jesús kucha tamparaun miaaku awajsamuri

(Mat. 8.23-27; Luc. 8.22-25)

³⁵ Chikich kintati kiarai Jesús ni nuiniatiri ainaun chicharak:
—Atumajin katingtai, —timiayi.

³⁶ Tamati ayu tusar, aints ainaun ukukiar kanunam engkemawar, Jesús an jukiar katingkiarmiayi. Turinamtai chikich aints ainausha kanunam engkemawar wearmiayi. ³⁷ Tura katinai nasesha nukap nasentan nangkamamiayi. Tura yumi kanunam yaranak ukantias wajamiayi. ³⁸ Turai Jesús kanu tatangken kanur tepemiayi. Kanuru asamtai Jesús an shintinak:

—Nuikiartinua, ukantiatji. ¿Ameka nuka pachiatmek? —tiarmiayi.

³⁹ Tinamtai Jesús nantaki nasen chicharkamiayi. Tura kucha tamparaun chicharak:
—Miaaku asata, —timiayi.

Tama nasesha majanmiayi. Tura kuchasha miaaku wajasmiayi. ⁴⁰ Turamtai Jesús ni nuiniatiri ainaun chicharak:

—¿Waruka timiatsha shamarme? ¿Waruka wína nintimturtsurme? —timiayi.

⁴¹ Tama timiá shaminak:

—¿Ausha warí aints asamtaiya nasesha, tura tampaasha umirinawa? —tiarmiayi.

5

Iwianch jiikir kuchinam engkeamuri

(Mat. 8.28-34; Luc. 8.26-39)

¹ Kucha atumajin katingkiar Gerasa nungkanam nujamkarmiayi. ² Tura nuni nu-jamkar Jesús kanunmaya jiinkiamtai, aints iwianchrintin jakau iwiartainumia waurki winimiayi. ³ Nu iwianchrinnuka jakau iwiartainum tuke pujuyayi. Tura asamtai jirujai jingkiawartatkamawar tujinkarmiayi. ⁴ Tura timiá kakaram asamtai, aints ainau nepetkamniauka atsuyayi. Jirujai nawencha tura uwejencha jingkiatamaitiat tuke nepetmakmiayi. Tura ataksha jirujai jingkiawarmaitiat, ataksha putirkaja tsurinuyayi. ⁵ Tura tuke tsawaisha, tura kashisha aints jakau iwiartainum tura muranmasha kayajai

✠ 4:25 (Mat. 13.12;25.29; Luc. 19.26)

tukumakmaikiak wekainuyayi. ⁶ Tura Jesúsan arák winaun wainak, ampuki tari naka tikishmatramiayi. ⁷⁻⁸ Tikishmatram Jesús chicharak:

—Iwianchia, ju aintsnumia jiinkita tajame, —timiayi. Tama iwianchkia aintsnumia kakar chicharak:

—Jesúsa, Yus yakí puja nuna Uchiriya, ¿waruka winasha tarutniume? Yusjai tajame: Winaka waitkaip, —tu jiyamiayi. ⁹ Tu untsumkamtai Jesús iniak:

—¿Amesha yaachitme? —tu iniam nu aintsu namangken engkemau aimiak:

—Untsuri asar, wikia untsuri naartinuitjai, —timiayi.

¹⁰ Tura iwianch ainu nu nungkanmaya akuptukai tusa, Jesúsan nukap seamiayi. ¹¹ Nu muranmasha ayaamsar kuchi untsuri shushungminak wajaarmiayi. ¹² Tura asaramtai iwianch ainu Jesúsan chicharinak:

—Au kuchinam engkemataram tusam akupkartukta, —tu searmiayi.

¹³ Tinamtai Jesús ayu tusa tsangkatkamiayi. Turamtai iwianch ainu nu aintsnumia jiinkiar, kuchinam engkemawaramtai, nuka wakenam pisarar, kuchanam ayangkar, kijiakar mash kajingkiarmiayi. Nu kuchikia jimia warang achayawash.

¹⁴ Tuminamtai kuchi wainin ainu nuna wainkar ampukiar wear, yaktanam pujuinauncha tura ajanam pujuinauncha kuchi turunamurin etserkarmiayi. Tura asamtai aints ainu: Nekaami tusar nu yaktanmaya jiinkiarimiayi. ¹⁵ Tura jiinkiar Jesúsnum taar, aints nuwik iwianchrintin pujuya nu pengker wajas wejmakan entsar, pengker nintimias pujaun wainkar shamkarmiayi. ¹⁶ Tura iniinam iwianchruku pujuun turunamuncha, tura kuchi turunamuncha wainkaru ainu mash etserkarmiayi. ¹⁷ Tura asamtai nunia aints ainu: Jesús ii nungkarinia jiinkiti tusar searmiayi.

¹⁸ Tu seainam, Jesús ayu tusa wetas kanunam engkemamiayi. Engkemamtai nuwik iwianchrintin pujuya nuka pengker wajasu asa, Jesúsan chicharak:

—Wisha winitjai, —tusa iniimiayi. ¹⁹ Tu iniamaitiat Jesús surimiak:

—Atsa, antsu jeemin waketkim Apu Yus amin wait anentramra nuka, ami wearam mash ujakarta, —timiayi.

²⁰ Tama nu aintska ayu tusa, Decápolis nungkanam waketki, Jesús niin pengker awajsamurin etserkamiayi. Turamtai nu nungkanmaya ainu nuna antukar mash nukap nintimrarmiayi.

Jairo nawantri inankimuri, tura chikich nuwasha tsuwarmauri
(Mat. 9.18-26; Luc. 8.40-56)

²¹ Jesús ataksha kanujai katingkiamtai, aints untsuri nijai iruntrarmiayi. Tura kucha kaanmatkarin iruntraramtai, Jesús nuni wajasmiayi. ²² Tura nuni wajamtai, iruntai jea wainu apuri, Jairo naartin tamiayi. Tura taa Jesúsan wainak pinakumar tepesmiayi.

²³ Tura pinakumar Jesúsan nukap seak:

—Wína nawantur jarutui. Tura asamtai wait aneam wári winita. Tura tsaar pengker pujusat tusam, uwejmijai antinrukta, —timiayi.

²⁴ Tama Jesús nijai wemiayi. Weamtai aints untsuri niin nemarkiar Jesúsna teawar wearmiayi. ²⁵ Nu aints ainamunam nuwa doce (12) musach numpan nangkaantsuk numpamia nusha pachinkamiayi. ²⁶ Nuka tsuwakratin ainaun untsuri jiiutiat numpan nangkantsuk nukap wait wajayayi. Tura kuikiarin mash japiat pengké tsuwamichuyayi. ²⁷⁻²⁸ Nu nuwaka Jesúsa turamurin antuku asa, tuntupenini taa: “Wejmakrin antingnaka pengkerapi wajasaintja,” tu nintimias Jesúsa wejmakrin antingmiayi. ²⁹ Tura anting numpamurinka nangkankamiayi. Numpamuri nangkankau asa, pengker nekapramiayi. ³⁰ Turamtai Jesús ni kakarmarijai nu nuwa tsuwarmaurin nekapmamramiayi. Tura nekaa pajas jiis:

—¿Yáki wejmakrun antinkama? —tu inintrimiayi.

³¹ Tu iniam ni nuiniatiri ainu Jesúsan chicharinak:

—Aints timiá untsuri amin etenmawaru wainiatmesha ¿waruka yáki antinkama tame? —tiarmiayi.

³² Tinamaitiat Jesús aints ainaun: ¿Yáki antinkama? tusa mash jiimsamiayi.
³³ Turamtai nu nuwaka ni numpe nangkankau asamtai, shamak kuraimiayi. Tura Jesús wajamunam tikishmatramiayi. Tura tikishmatar ni turunamurin Jesúsán mash paan ujakmiayi. ³⁴ Turamtai Jesús chicharak:

—Nawantru, wína nekasampita turutu asam, pengker wajasume. Pengker nintimsam weta. Numpem yamaikia numparchatatu, —timiayi.

³⁵ Tu chichaak wajai, Jairo aintsri ainu tariar chicharinak:

—Nawantrumka yanchuk jakayi. Nuikiartin nemarkini awajip, —tiarmiayi.

³⁶ Tu tinamtai Jesús ni tiarmia nuna antayat, iruntai jea wainu apurin chicharak:

—Shamkaip, antsu nekasampita tusam wína nintimtursata, —timiayi.

³⁷ Tura untsuri aints: Iijai jiismi tinamaitiat, Jesús surimkamiayi. Antsu Pedron, nunia Santiagoncha, nunia Santiago yachí Juannasha: Wijai wayaawarti tusa tsangkatkamiayi.

³⁸ Tura iruntai jea wainu apuri jeen jear, aints juutkamaikiak untsuminaun wainkarmiayi. ³⁹ Tura Jesús jeanam waya, nuna jiis:

—¿Waruka timiá juutusha pujarme? Nuwachikia jakachi, antsu kanuri, —timiayi.

⁴⁰ Tamaitiat Jesúsán: Nangkami tawai tusar wishikiarmiayi. Tinamtai Jesús aintsnaka mash aanum jiar akupkamiayi. Antsu aparincha, tura nukurincha, tura nijai taaruncha: Iijai wayaami tusa nuwawach tepamunam wayaawarmiayi. ⁴¹ Tura nuwachi uwejen achirak:

—Talita kum, —timiayi. Nuka ii chichamejaingkia: “Nawantru, nantaktia tajame,” taku tawai.

⁴² Tu chicharam nu nuwachikia nantakmiayi. Tura nantaki wekaasamiayi. Nuka doce (12) musachrinuyayi. Tura asamtai aints nuna wainkar nukap nintimrarmiayi. ⁴³ Tura Jesús chicharak:

—Ju aitkamuka aints kichkisha pengké ujakairap, —timiayi. Nuniasha:

—Nuwawach yurataram, —timiayi.

6

Jesús Nazaretnum pujusmauri

(Mat. 13.53-58; Luc. 4.16-30)

¹ Jesús nunia jiinki Nazaret yaktanam ni tsakarmaurin wemiayi. Tura weamtai, ni nuiniatiri ainausha nemariarmiayi. ² Tura ayamtai kinta jeamtai, iruntai jeanam waya, aints ainaun nuiniatan nangkamamiayi. Tura nuininam aints untsuri Jesúsá chichamen anturkar nintiminak:

—¿Junasha yáki ni nekamtairincha nuiniaria? ¿Wainchatai takatan turati tusasha yáki kakarmarincha susaya? ³ ¿Juka tau takakminchakai? ¿Marí uchirinchkakai? ¿Tura ni yachí Santiago, nunia José, nunia Judas, nunia Simón naartinchakai? Ni umajisha iijai pujuinauka wainiaji, —tiarmiayi. Tura asar Jesúsán suwirpiaku jiiinak pachischarmamiayi.

⁴ Tura pachischaram Jesús chicharak:

—Aints ainu Yuse chichame etsernun mash anturinawai. Antsu ni nungkarin pujuinausha, tura ni weari ainausha anturinatsui, —timiayi.✠

⁵ Aints pachischarmau asa, Jesús ni nungkarinka Yuse kakarmarijaingkia wainchatai takatan turachmiayi. Antsu jau ainaun jumchik ni uwejejai achik tsuwarmiayi. ⁶ Tura ¿warukaya wínaka nekasampita turutinatsua? tu nintimramiayi.

Jesús Yuse chichame etserutaram tusa ni nuiniatirin akupkamuri

(Mat. 10.5-15; Luc. 9.1-6)

Nunia Jesús chikich chikich yaktachinam aints ainaun Yuse chichamen nuiniak wekaimiayi. ⁷ Tura nuni wekaas ni nuiniatiri doce (12) amia nuna untsuk:

—Jimiarichik jimiarichik werum, Yuse chichame etserutaram, —timiayi. Tura iwianch ainaun nepetkarat tusa, ni kakarmarin susamiayi. ⁸ Tura chicharak:

✠ 6:4 (Juan 4.44)

—Jinta weakrumsha pang nunia pitakrumsha jukirap. Tura uyuntrumin kuikiasha engketsuk wetaram. Antsu aintsarmek wai takusrum wetaram. ⁹Tura sapat wampuwach wejkrum, wejmak kichik entsarum wetaram. ¹⁰Tura chikich yaktanam werum nuni pujusrum, jea wayaarmeka tuke nuning kanurtaram. ¹¹Antsu chikich yaktanam werum, aints nuni pujuinau ni jeen suritraminak: Juni wayaawairap turaminamtaikia, tura atumi chichamen antutan nakitinamtaikia, nunia jiinkuram atumi nawe japimiarum nu yaktaka ukuktaram. Turaram ju aints ainaun Yus jiisti tusaram, mash nuna nekaawarti tusaram turataram, —Jesús timiayi. [☆]

¹²Tamati Jesúsa nuiniatiri ainau Jesúsan ukukiar wekaasar: Aints ainau ni pasé ninti-maurin yapajiwarti tusar Yuse chichamen etserkarmiayi. ¹³Nunia aints ainamunmaya iwianchin untsuri jiikiar akupkarmiayi. Tura jau ainauncha olivo macharijai yakarar tsuwararmiayi.

Imiakratin Juankun maamuri
(Mat. 14.1-12; Luc. 9.7-9)

¹⁴Jesúsa naarin pachisar aints mash etserinau asaramtai, apu Herodescha nuna antukmiayi. Tura chichaak:

—¿Imiakratin Juan jakamunmaya nantakchayash? Tura asa nu wainchatu takatan takaawai, —timiayi.

¹⁵Antsu chikich ainau:

—Yuse chichame etserin Elíasaitai, —tiarmiayi. Tura chikich ainausha chichainak:

—Atsa, yaanchuik Yuse chichamen etserin pujuarmia tumawaitai, —tunaiyarmiayi.

¹⁶Tu tinamtai Herodes nuna antuk:

—Atsa, nuka nekas Juankuitai. Wi nuwik muuken akarkataram tusan, aintsun akuptukmiaja nuka nekasampi ataksha jakamunmaya nantaki, —timiayi.

¹⁷⁻¹⁹Herodeska ni yachí Felipen iwiaaku pujau wainiat, nuna nuwarin nuwatkamiayi. Nu nuwaka Herodías naartinuyayi. Tura asamtai Juan apu Herodesan chicharak: “Yachim iwiaaku pujau wainiatum, ni nuwari nuwatkamiame nunaka Yuska surimi-awai,” timiayi.

Nuna tama nu nuwaka, Herodías naartin, nuna antuk Juankun kakerkamiayi, tura maawarat tusa wakerimiayi. Tura wainiat apu Herodes surimkamiayi. Antsu: “Juan achikrum kársernum engkeataram,” tusa ni suntarin akupkamiayi. ²⁰Juan nekas pengke aints asa, nunia Yusen miatrusang umirkau asamtai, Herodes nuna nekas asa, Juankun shammiayi. Tura asa ni nuwarin pachischamiayi. Tura Juanku chichamen pengker nintimias anturkamiayi. Tura Juanku etsermaurin antayat: Itiurkainjak tusangka nintimrachmiayi. ²¹Turamtai nu nuwaka Herodías naartin: ¿Juankun itiurkanak maamtikiawaintja? tu nintimias pujai, apu Herodesa akiinamuri kinta jeamiayi. Turam-tai Herodes juun ainauncha, tura suntara apuri ainauncha, tura Galilea nungkanmaya kuikiartin ainauncha: Mash yuwitaram tusa chichaman akupkamiayi. ²²Mash iruntrar yuwinai, Herodías nawantri ningki waya yaamramiayi. Tura yaamak apu Herodesan pengker awajsamiayi. Tura nijai tsaniasar yuwinak pujuinauncha pengker awajsamiayi. Tura asamtai apu nu nawantan chicharak:

—Ame warí wakerame nuka pachitsuk seattia. Turakminka susatatjame. ²³Wi Yusjai nekasan tajame: Ame waring achat mash seatkumningkia, nunaka nekasan suritkashtatjame. Tura nungkar wakerakminkia japen akan susatatjame, —timiayi.

²⁴Tama Herodías nawantri jiinki ni nukuri pujamunam waya iniak:

—¿Warinak seataj? —timiayi.

Tu iniam nukuri chicharak:

—Imiakratin Juanku muuken wakerajai tita, —timiayi.

²⁵Tama nu nuwachikia wári waketki, apu Herodesan chicharak:

—Imiakratin Juanku muuke puwatnum engkeam yamaik surusta tusan wakerajai, —timiayi.

[☆] 6:11 (Luc. 10.4-11; Hech. 13.51)

²⁶ Nuna tama apu napchau nintimramiayi. Turayat: Yusjai nekasan tajame tinu asa, tura ni untsukarmau ainau mash nuna antukaru asaramtai, surimkatatkama yuumatkamiayi. ²⁷ Tura ni suntarin wári untsuk:

—Juanku muuke akakam itata, —tusa akupkamiayi. ²⁸ Turamtai suntar kársernum we, Juanku muuken chik akak puwatnum engkea itamiayi, tura pai tusa nawantan susamiayi. Tura susam nawan puwatun juki nukurin susamiayi.

²⁹ Turamtai Juanku nuiniatiri ainau: Juankun maawari tamaun antukar tariar, ni namangken iwiarsatai tusar jukiarmiayi.

Jesús aints cinco warang yuramuri

(*Mat. 14.13-21; Luc. 9.10-17; Juan 6.1-14*)

³⁰ Jesús akupkamu ainau Jesúsnum ataksha iruntrarmiayi. Tura ni turamurin, tura aints ainaun nuiniarmaurinha Jesúsnum mash ujakarmiayi. ³¹ Tura aints untsuri nijai chichasartas kauninamtai, nisha angkaan pujusartatkamawar tujinkarmiayi. Tura yuwartatkamawar tujinkarmiayi. Tura asaramtai Jesús ni nuiniatiri ainaun chicharak:

—Aints atsamunam iijai wemi. Auni jumchik ayamrami, —timiayi. ³² Tura Jesús ni nuiniatiri ainaujai kanunam engkemawar aints atsamunam wearmiayi. ³³ Tura weenam-tai aints untsuri jiisar: “Au weana auka Jesúsaitai,” tusar ampukiar chikich chikich yak-tanmaya jiinkiar, eemkiar Jesús nujamkatnunam jear nakasarmiayi. ³⁴ Tuminamtai Jesús nujamak kanunmaya jiinki, aints untsuri uwijaya nunisarang pujuinaun wainkamiayi. Tura ni wainin atsurmawa nunisarang ainamtai wait anentramiayi. Tura asa nukap nuiniarmiayi. [☆]

³⁵ Tsaa akaamatai, ni nuiniatiri Jesúsnum tariar chicharinak:

—Yanchuk tsaa akaawai, antsu juni aintsu pujutiri pengké atsawai. ³⁶ Tura asamtai ju aints ainau wári akupkam, yakat arakchichu amanum aints pujuinamunam yurumkan sumakarat tusam akupkarta, —tiarmiayi.

³⁷ Tinamtai Jesús ayaak:

—Atumek ni yutairi susataram, —timiayi.

Tama niisha aiminak:

—Amesha ju aints ainau yuratin ¿jimia pachak kuikijai yurumak sumaataram tamek? —tiarmiayi.

³⁸ Tinamtai Jesús iniak:

—¿Pang warutma takakrume? Jiistaram, —timiayi.

Tamati niisha nekapmarar:

—Pangka cincoitai. Tura namaksha jimiarchikitai, —tiarmiayi.

³⁹ Tinamtai Jesús: Aints ainau angkaan angkaan chirichrinam pujusarti tusa akatram, ⁴⁰ aints kichik pachak junini, tura chikich pachaksha atunini pujusar, tura cincuenta (50) cincuenta (50) kanakar pujusarmiayi. ⁴¹ Mash pujusaramtai, Jesús pangkan cinco (5) achik, nunia namaknasha jimiarchik takus, nayaimpinmanini jiimias Yusen maaketai timiayi. Tura pangkan puuk, ni nuiniatiri ainaun susa, nunia namaknasha puuk: Aints mash susataram tusa, ni nuiniatiri ainaun susamiayi. ⁴² Tura susaram mash yuwaar tutuararmiayi. ⁴³⁻⁴⁴ Nuna yuwaruka nuwa ainausha, tura uchi ainausha nekapmatsuk aishmangkuk aishmangkuk cinco warang yuwaarmiayi. Tura yuwaar umisar, pang ampintrauncha tura namak ampintrauncha changkin doce (12) amia nuni chumpiawar jukiarmiayi.

Jesús kucha japen nawejai wekaasamuri

(*Mat. 14.22-27; Juan 6.16-21*)

⁴⁵ Nunia ni nuiniatiri ainaun chicharak: “Kanunam engkemaram katingkrum tumajin Betsaida yaktanam eemajataran. Wikia ju aints ainaun ausan akupkartatjai,” timiayi.

⁴⁶ Tura aints ainaun aujas umis, ningki Yusjai chichastas muranam wakamiayi. ⁴⁷ Tura kashi aing, Jesús ningki kukarnum wajai, kanu juun kucha japen wemiayi. ⁴⁸ Tura nase

[☆] 6:34 (Mat. 9.36)

nujinmanini kakar nasenmatai, Jesúsá nuiniatiri ainau kawi kawinmaka pimpikiarmiayi. Tuminamtai Jesús muranam wajas nuna wainkamiayi. Tura atash shinutnak wajai, Jesús juun kuchanam nungkanma nunisang nawejai najamas wekaas, aints nangkamaktias wea nunisang wemiayi. ⁴⁹ Tura Jesús juun kuchanam winamtai, ni nuiniatiri ainau nuna wainkar: ¿Wakanchawashi? tu nintimrar untsumkarmiayi. ⁵⁰ Tura nuna wainkar mash nukap shamkarmiayi. Tuminamtai Jesús chicharak:

—Kakaram wajastaram. Wiitjai, shamrukairap, —timiayi.

⁵¹ Tura Jesús kanunam engkemamtai, nasengka nangkamarmiayi. Turamtai ni nuiniatiri ainau nukap nintimrar shamkarmiayi. ⁵² Antsu nintinchau asar, aints timiá untsuri pangkan yuwinak mash tutuararmia nunaka nintimtsuk: Jesúska pengké tujinkachuitai ticharmiayi.

Jesús Genesaretnumia ainau tsuwarmauri
(Mat. 14.34-36)

⁵³ Tura juun kuchan katingkiar Genesaret nungkanam nujamkarmiayi. Tura nuni nujamkar, kanun jingkiawarmiayi. ⁵⁴ Tura kanunmaya jiinkiamamtai, nunia aints ainau Jesúsán wainkar: Auka Jesúsaitai tusar nekaawarmiayi. ⁵⁵ Tura chikich ainau: Jesús iinu nungkarin tayi tinamun antukar, jau ainaun tampumruwar Jesús pujamunam itaarmiayi. ⁵⁶ Tura Jesús wekaasamia nuni yakat tuupich ainamunam, tura yakat juun ainamunmasha, tura aints ajanam pujuinamunmasha jau ainaun itaar jintanam pujsarmiayi. Tura ni wejmakri ninukmaurin antingtaj tusar, Jesúsán searmiayi. Tura nuna antingkiaruka pengker wajasarmiayi.

7

¿Aintsu tunaari warutmak awa?
(Mat. 15.1-20)

¹ Fariseo ainausha, tura Moisésa chichame nuikiartin ainausha Jerusalénnumia Jesúsán tariarmiayi. ² Tura Jesúsá nuiniatiri ainau uwejen kijmiatsuk yutan yuwinamun wainkar: Nuka paseetai tiarmiayi. ³ Fariseo ainau tura chikich judío ainausha mash ni juuntri tuke nuiniarmun asar, tunaarinchau pujusartas tu pujutayi tusar, nukap kijmiarar yuwinawai. ⁴ Tura sumatinmaya waketkiar, nekasar pakuichau wajastaj tusar, maatskeka yuwashtinuitji tu weenawai. Nunia pining ainaun, tura muits ainauncha, tura jirumang ainauncha, tura peaknasha tu nijarartinuitai tinawai. Tura judío ainau chikich turamun untsuri tu nuiniarmun asar, nunaka tuke mash umirinawai. ⁵ Tura asar fariseo ainau, tura Moisésa chichame nuikiartin ainausha Jesúsán iniinak:

—¿Ami nuiniatiram ainau waruka ii juuntri nuikiarturmaurincha umirinatsua? ¿Tura waruka kijmiatskesha yuwinawa? Nuka tunaawitai, —tiarmiayi.

⁶ Tinamtai Jesús aimiak:

—Waitrin ainautiram, yaanchuik Yuse chichame etserin Isaías aarmia nunaka atumin pachitmas nekas tu aarmiayi:

Yus chichaak: ‘Nu aints ainauka nangkamiar aya chichasarang wínaka: Ameketme juuntam turutinawai. Antsu ni nintijai yaja nintimsar wínaka nintimturinatsui.

⁷ Nangkamiar Yus juuntaitai tinayat, tura aintsu chichamen nuininayat: Yuse chichamen nuinajai tinawai,’ Yus timiayi. Tu aarmawaitai. ⁸ Tura atumka Yuse chichame inaisaram, aintsu chichame atumi juuntri tinu aarmia nu umirume.

⁹ Tura atumi juuntri chichame umirkatai tusaram, Yus wína chichamur umirtuktaram tusa akupkamia nuka inaisarume. ¹⁰ Moisés nekas chichaak: ‘Aparam tura nukurmesha pengker awajsataram. Tura aints ni aparincha tura ni nukurincha pachis pasé chichaamtaikia, nu aintsnaka maawarti,’ timiayi. ¹¹ Antsu atumka chichaakrum: Aints ni aparincha tura ni nukurincha chicharak: ‘Winar aa nuka corbánaitai,’ tawai. Nuka Yus susamuitai taku tawai. Tura Yus susamu asamtai, atumin susatasan wakerayatun, susatatkaman tujintajai ta nuka, ¹² ni aparin tura ni nukurincha yaingtawakerau wainiatrumek atumka suritu wearme. ¹³ Tura asaram, atumi juuntri ainau tinu armia nu

chichamka nekas umirkatnuitai takayatrum Yuse chichamengka umirtsuk pujusminuitji tarume. Tura aintsu chichame wainiatrumek, nu chichamka Yuse chichame nangkamasrumek umirume tajarme, —Jesús fariseo ainaun tura Moisésa chichame nuikiartin ainauncha timiayi.

¹⁴ Nunia Jesús aints ainaun ataksha untsuk:

—Mash wína anturtuktaram. Tura wi taja nuka nekaataram. ¹⁵ Aintsu jangken waring achat waya nujaingkia tunauka wajaschatnuitai. Antsu aintsu nintinia jiina nuka aints ainaun tunau awajmamtikui. ¹⁶ Aints ainau ju chichaman antukar nintimrarti, —timiayi.

¹⁷ Nunia aints ainaun ukuak, jea wayaamtai ni nuiniatiri ainau Jesúsani iniinak:

—¿Ju nuikiartutai chichamsha warimpita? —tiarmiayi. ¹⁸⁻¹⁹ Tu iniinam Jesús aimiak:

—¿Atumka nuka nekatsrumek? Aints yurumkan yuwamu jangkenam wayaangka, nintinam wayaachu asamtai, nujaingkia tunauka wajaschatnuitai. Antsu wakenam waya, ataksha jiinkitnuitai, —timiayi.

Tu tinu asa, yurumkaka waring achat mash pachitsuk yuwamnawaitai, Jesús timiayi.

²⁰ Tura ataksha chichaak:

—Aintsu nintinia jiina nuka aintsun tunau awajmamtikui. ²¹ Tunau nintimtai ainauka aintsu nintinia jiinui. Nuniangka natsanpiaku nintimratnusha, tura tsanirmatnusha, tura kasamkatnusha, tura aints maatnusha, ²² tura aishrintin wakeruktincha, tura nuwentin wakeruktincha, tura kichnau aa nu wakeruktincha, tura pasé aa nu turatnusha, tura anangkartuatnusha, tura ni wakeramurin tuke nintimratnusha, tura chikich ainaun suwirpiaku jiistincha, tura Yusen pachis nunia aintsun pachisar pasé chichastincha, tura nangkamiar: Wikia miajuitjai tumamtincha, tura nintimchamu turatnusha nuka mash aintsu nintinia jiinui. ²³ Nu tunau ainauka mash aintsu nintinia jiinu asar, aintsun tunau awajmamtikui, —Jesús timiayi.

*Chikich nungkanmaya nuwa Jesúsani nekasampita timiauri
(Mat. 15.21-28)*

²⁴ Nunia Galilea nungkanmaya jiinki, Jesús chikich nungkanam Tiro yaktanam, tura Sidón yaktanmasha wemiayi. Tura nuni jea, jeanam waya nuni pujus, nu nungkanmaya ainau: Pujamurun nekarawarai tusa nakitmiayi. Turayat anumkatatkama tujinkamiayi.

²⁵ Tura nu nungkanmaya nuwa: Jesús tayi tamaun antuk, arumak Jesúsani weri, ni nawenini pinakumar tepesmiayi. Tura nu nuwa nawantri iwianchrinuyayi. ²⁶ Nu nuwaka Sirofenicia nungkanmaya asa judíocho ayayi. Tura Jesúsani seak:

—Wait aneam, nawantrunia iwianch jiiktia, —timiayi. ²⁷ Tamaitiat Jesús nuikiartutai chichamjai chicharak:

—Uchi pangkan yuwinau atankir yawaa uchiri suamuka napchawaitai. Tura asamtai uchiá eemkar yuwaarti tusam tsangatkata, —timiayi.

²⁸ Tama nu nuwasha nunisang nuikiartutai chichamjai ayaak:

—Apuru, nekasam tame. Tura uchi yutairi misa wamketin ayaaramtaikia, nekasar yawaa uchiri yuwinawai, —timiayi. * ²⁹ Tamati Jesús chicharak:

—Tu tinu asam, pengker nintimsam waketkita. Nawantrumniangka iwianch yanchuk jiinkini, —timiayi.

³⁰ Tamati nu nuwaka ni jeen waketkimiayi. Tura ni jeen waketki, iwianch nawantrinia jiinkin asamtai, nawantrin peaknum pengker nintimias tepaun wainkamiayi.

Jesús antichun tura chichachun tsuwarmauri

³¹ Nunia Jesús ataksha Tiro yaktanmaya jiinki, Sidón yaktan nangkaiki, Decápolis nungkanam wekaas, Galilea kuchanam wemiayi. ³² Nuni aints antichu, tura tenap chichachu pujumiayi. Tura nu aintsun Jesús tsuwarat tusar itarmiayi. Tura itaar:

—Uwejmijai antingta, —tusar searmiayi. ³³ Tu seainam, Jesús nu aintsnasha akanak juki, tsaranchikijai kuwishin mai inurkamiayi. Nunia tsaranchikin usukir, nu aintsu

* 7:28 (Nu chichamka Israel ainau Yuse aintsri asaramtai, Israel ainaun yaingtinka inaitsuk winasha yainkata taku timiayi.)

inajin antinkamiayi. ³⁴ Tura nayaimpinmanini jiiimias wait anentak mayairuk: “Efata,” timiayi. Nuka “uraita” taku tawai.

³⁵ Nu tamaujai metek kuwishi uranin asamtai, nu aintska pengker antukmiayi. Tura ni inaji wewe ayat pengker wajasantai paan chichakmiayi. ³⁶ Turamtai aints irunun Jesús chicharak:

—Ju aintsu turunamuri kichkisha etserkairap, —tu akatramiayi. Tamaitiat aints ainau pachischarmiayi. Antsu nuna nangkamasarang untsurin ujakarmiayi. ³⁷ Tu ujakaram, aints ainau nuna antukar nukap nintimrar:

—Tuke mash pengker turayi. Antichu ainauncha antumtikiayi. Tura chichachu ainauncha chichamtikiayi, —tiarmiayi.

8

Cuatro warang ainaun yuramuri

(*Mat. 15.32-39*)

¹ Chikich kintati aints timiá untsuri iruntrar pujuinamtai, ni yutairi atsumiayi. Tura asamtai, Jesús ni nuiniatiri ainaun untsuk mash irur chicharak:

² —Ju aints ainaun wait anentajai. Kampatam kinta wijai iruntrar pujuinau asar yutsuk pujuinawai. ³ Tura ju aints arakia kaunkaru asar, jinta weenak tsukarijai juwikcharai tusan, yurtsuk ni jeen wematnaka nakitajai, —timiayi.

⁴ Tamati ni nuiniatiri ainak:

—¿Tura juni aints atsamunmasha ju aints yuratasrisha tuning yurumkasha sumaktai? —tiarmiayi.

⁵ Tinamtai Jesús chicharak:

—¿Pang warutma takakrume? —tu iniam:

—Siete (7) takakji, —tiarmiayi.

⁶ Tinamtai Jesús aints ainaun chicharak:

—Nungkanam pujustaram, —timiayi. Tura pangkan siete (7) amia nuna takus, Yusen maaketai tusa, pangkan puuk ni nuiniatiri ainaun:

—Ju aints ainau mash susataram, —tusa susamiayi. Turamtai niisha aints irunun mash susarmiayi. ⁷ Nunia namaknasha jumchik wainkarmia nunasha Jesús takus, Yusen maaketai tusa: Aints ainau mash susarat tusa, ni nuiniatiri ainauncha susamiayi.

⁸ Turamtai mash yuwaar tutuararmiayi. Tura ampintramurin changkin siete (7) amia nuni chumpiwar pasuiniarmiayi. ⁹ Tura nuna yuwaaruka cuatro warang armiayi. Tura yuwaar umisaramtai, Jesús nu aints ainaun: Atumi jeen waketkitaram tusa akupkamiayi.

¹⁰ Nunia ni nuiniatiri ainaujai kanunam engkemrar, Dalmanuta nungkanam wearmiayi.

Fariseo ainau: Wainchatai takat wainkatar wakeraji timiauri

(*Mat. 16.1-4; Luc. 12.54-56*)

¹¹ Jesús nuni jeamtai, fariseo ainau tariar, iisha nekaatai tusar Jesúsán chicharinak:

—Yus nayaimpinam puja nuna kakarmarijai wainchatai takat turata. Iisha nu wainkatar wakeraji, —tiarmiayi. ¹² Tinamtai Jesús napchau nintimias mayairuk:

—¿Waruka ju aints ainauka Yuse kakarmarijai wainchatai takatan wainkatar wakeri-nawa? Nekasan atumin tajarme: Nuka pengké wainkashtatrume, —timiayi. ✠

¹³ Nunia fariseo ainaun ukuki, ataksha kanunam engkema tumajin katingmiayi.

Fariseo ainau pasé nintimaurin pachis etserkamuri

(*Mat. 16.5-12*)

¹⁴ Tura yutan sumatnasha kajinmakiaru asar, kanunam kichik pangkan takainakuyayi.

¹⁵ Turinamtai Jesús ni nuiniatiri ainaun chicharak:

—Fariseo pang pachimtai jukii tusaram, tura Herodesa aintsri pang pachimtai jukii tusaram wainkataram, —timiayi. ✠

¹⁶ Tama ni nuiniatiri ainau chicharnainak:

✠ 8:12 (*Mat. 12.38-39; Luc. 11.16, 29*) ✠ 8:15 (*Luc. 12.1*)

—¿Pang kajinmakin asakrin turamtsujiash? —tunaiyarmiayi.

¹⁷ Tunainamtai nuna nekaa Jesús chicharak:

—¿Warukaya pang atsawai tunaiyarme? ¿Yamaisha tuke nintimu weatsrumek? ¿Tura asaram nekatsrumek? ¿Atumi nintinkia mengkakaikai? ¹⁸ Tura atumi jii au wainiatrumsha ¿warukaya wainmatsrume? ¿Tura atumi kuwishi au wainiatrumsha warukaya antatsrume? ¿Atumka aneaktsurmek? ¹⁹ Wi pangkan cinco (5) puuran, cinco warang aintsun yuramtai ¿ampintrau warutam changkina jukimiarume? —tu iniam:

—Doce (12) changkin jukimji, —tiarmiayi.

²⁰ Tinamtai Jesús ataksha chicharak:

—Tura wi pangkan siete (7) puuran, cuatro warang aintsun yuramtai, ¿ampintrau waruta changkina jukimiarume? —tu iniam:

—Siete (7) changkin jukimji, —tiarmiayi.

²¹ Tinamtai Jesús chicharak:

—Wikia pang pachimtai pachisnaka chichaatsjai. ¿Tura wainiatrumsha waruka nintimu weatsrume? —timiayi.

Jesús wainmichun wainmamtikiamuri

²² Nunia Betsaida yaktanam jearamtai, wainmichun tsuwarat tusar, Jesúsnum itaarmiayi, tura Jesús an chicharinak: “Antingta,” tusar searmiayi. ²³ Turinamtai Jesús wainmichu uwejen tap achik, yaktanmaya jiiki ayamiayi. Nunia ni uwejen usukir, mai uwejejai wainmichu jii antintak: “¿Wainmamek?” tu iniasmiayi. ²⁴ Tu iniam pangkai jiiimias:

—Aintsun wainiatun numi wekainawa tumaun wainjai, —timiayi.

²⁵ Tamati Jesús mai uwejejai wainmichu jii ataksha antinkamiayi. Tura antinkam ataksha pangkai jiiimias, nuniangka tsaar mash paan wainmakmiayi. ²⁶ Paan wainmakamtai, Jesús chicharak:

—Yaktanmaka waitsuk, tura aintcha kichkisha ujatsuk, jeemin tupnik waketskita, —tusa akupkamiayi.

Pedro Jesús an: Mesíasaitme timiauri

(Mat. 16.13-20; Luc. 9.18-20)

²⁷ Nunia ni nuiniatirijai yakat Cesarea Filipos tutainum jintá weenak, Jesús ni nuiniatiri ainaun iniak:

—Tura aints ainau wina pachitsar: ¿warí aintsuita turutinawa? —tu iniasmiayi.

²⁸ Tu iniam aiminak:

—Chikich ainauka: Imiakratin Juanchawashi turaminawai. Tura chikich ainauka: Elíaschawashi turaminawai. Tura chikich ainauka: Yaanchuik Yuse chichamen etserin irunmia nuwaashi turaminawai, —tiarmiayi.

²⁹ Tu tinam Jesús iniak:

—¿Tura atumsha winasha warintrutrume? —timiayi.

Tu iniam Pedro ayaak:

—Ameke Mesíasaitme. Yus akupkamuitme, —timiayi.

³⁰ Tamati Jesús chicharak:

—Nuka pengké etserkairap, —timiayi.

Jesús ni jakatniurin pachis etserkamuri

(Mat. 16.21-28; Luc. 9.22-27)

³¹ Nunia ataksha ni nuiniatiri ainaun nuiniak:

—Wikia Yus akupkamutiatnak aints asan, nukap wait wajaktatjai. Wi turamtai judío juuntri ainau, tura sacerdote juuntri ainausha, tura Moisésa chichame nuikiartin ainausha wina nakitrinak mantuwartatui. Turayatnak kempatam kinta jakan tepayatun ataksha nantaktatjai, —timiayi. ☆

☆ 8:31 (Mat. 17.23;20.19;27.63; Marc 9.31; 10.33-34)

³² Paan etseru asamtai, Pedro Jesúsán akanak juki: “Tuuka chichatsuk asata,” tusa chicharkamiayi. ³³ Turamtai Jesús chikich nuiniatiri ainaun ayanmatar jiis, Pedronka jiitsuk chicharak:

—Satanása weta. Ameka Yuse wakeramuringkia nintimtsume, antsu aints ainau wakerina nuke nintime, —timiayi.

³⁴⁻³⁵ Nunia aints ainau mash untsuk, tura ni nuiniatirincha mash untsuk chicharak: —Aints wína umirtuktas wakerakka, ni wakeramurinka inais, tura wikia mianchawait-jai tusa, aints ni krusrin juwawa nunisang ni jakatniurin shamtsuk wínak nemartusti. Aints ningki nintimias: Wikia jakashtatjai tauka jakatnuitai. Antsu aints wína anentu asa, tura uwemratin chichaman aneau asa, jakatata nuka jakayat tuke iwiaaku pujusti-nuitai.✠

³⁶ Nintimrataram. Aints ju nungkanam aa nunaka mash sumak pengké yuumatsuk pujayat, ni wakani tuke mengkakamtaikia ¿itiurak tuke iwiaakusha pujusting? ³⁷ Tura aints nekas uwemratas wakerakka, tura tuke Yusnum pujustas wakerakka, ¿warutam kuikianak akiimiak uwemratnuita? ³⁸ Aints wína natsantrinak, tura wína chicham-runcha natsantinamtaikia, wi Yus akupkamu asan, wína Apaachir pujamunmaya ni kakarmarijai winakun, tura ni awemamuri ainaujai tsaniasan paaniunam winakun, wína natsantrurmia nuna pachisan: Nuka wína aintsruchuitai titinuitjai, —Jesús timiayi.

9

¹ Nunia ataksha ni nuiniatirin chicharak:

—Nekasan tajarme: Aints juni wijai tsaniasar pujuinauka Yus ni kakarmarijai ni aintsri ainaun inartata nunaka jatsuk wainkartatui, —timiayi.

Jesúsa yapajmiamamuri

(*Mat. 17.1-13; Luc. 9.28-36*)

² Tura seis (6) kinta nangkamaramtai, Jesús Pedron nunia Santiagoncha, nunia Juannasha akanak juki, mura juunnum wakarmiayi. Tura wakarai, aneachmau Jesús yapajmiamama jiitsumir wajasun wainkarmiayi. ³ Tura ni wejmakrincha jiitsumir aun wainkarmiayi. Ju nungkanam wejmak timiá pújuka atsawai. ⁴ Nuni Elías tura Moiséscha Jesúsán wantintuk nijai chichaun wainkarmiayi.✠

⁵⁻⁶ Tura nuna wainkar Jesúsá nuiniatiri shamkarmiayi. Tura Pedrosha ¿warintajak? tusa nintimrachmiayi. Tura asa Jesúsán chicharak:

—Nuikiartinu, juni ii pujustincha nekas pengkeraitai. Juni kempatam jeawach jeamkami, kichka aminu, tura kitcha Moisésnau, tura kitcha Elíasnau ati, —timiayi.

⁷ Tamati yurankim mikin wajasmiayi. Tura mikinum wajainai, yurangminmaya Yus chicharak: “Juka wína uchiruitai, wína aneetiruitai. Juka nekasrum anturkataram,” timiayi. ⁸ Tama Jesúsá nuiniatiri pangkainiar jiisar, aya Jesúsán wainkarmiayi.✠

⁹ Tura muranmaya kuankiar, Jesús ni nuiniatiri ainaun akatar akupak:

—Wikia aints ayatun Yus akupkamu asan, jakamunmaya nantaatsaing atum yamai wainkarume nuka pengké etserkairap, —timiayi. ¹⁰ Tamati miatrusarang umikiarmiayi. Antsu mai nuwamtak:

—¿Jakamunmaya nantaktincha warimpita? —tu ininisarmiayi. ¹¹ Tura Jesúsán iniinak:

—Moisésa chichame nuikiartin ainausha ¿warukaya Mesíaska taatsaing, Elías eemak tatinuitai tinawa? —tiarmiayi.

¹² Tu iniinam Jesús aimiak:

—Nekas Elías eemak taa mash iwiaratnuitai. ¿Yus akupkamun pachis Yuse chichame itiur aarmawaita? Nukap wait wajaktinuitai. Tura niin suwirpiaku jiisar nakitrartinuitai. ¿Tu aarchamukai? ¹³ Tura wisha atumin tajarme: Elíaska yaanchuik tamiayi. Tura

✠ 8:34-35 (Mat. 10.38-39; Luc. 17.33; Juan 12.24-25) ✠ 9:4 (Marc. 9.2-7; Luc. 9.28-35; 1.Ped. 1.17-18) ✠ 9:8 (Mat. 3.17; Marc. 1.11; Luc. 3.22)

waininayat aints ainau Yuse chichame aarmawa nunisarang niin nekasar pasé awajsartas wakeriarmia nunaka mash turuwarmiayi, —Jesús timiayi.✠

Iwianch uchinmaya jiikmiauri
(Mat. 17.14-21; Luc. 9.37-43)

¹⁴ Tura muranmaya kuankiar wakеткиar, chikich nuiniatiri pujuinamunam jear, aints untsuri niin tenteawar wajainaun wainkarmiayi. Tura Moisésa chichame nuikiartin ainausha Jesús a nuiniatiri ainaujai chichainaun wainkarmiayi. ¹⁵ Tura Jesús winamtai, aints ainau niin wainkar warasar mash pengker nintimsar Jesús chichasmi tusar ampukiar wearmiayi. ¹⁶ Turinamtai Jesús chicharak:

—¿Warimpia aujaisha chichaarme? —timiayi.

¹⁷ Tu iniinam chikich aints nuni wajau ayaak:

—Nuikiartinu, uchir iwianchrintin asa chichachuitai. Tura asamtai amin itiarjame.

¹⁸ Tura iwianch uchirun engkemtua nungkanam ujuweawai. Tura jangkenia sauran itaweawai. Tura nain te esaweawai. Tura asa pimpi pimpi wajaweawai. Turamtai ami nuiniatirmin uchirun iwianchrin jiitrukiarat tusan searmajai. Turamaitiat tujintrutkari, —timiayi.

¹⁹ Tama Jesús chicharak:

—Maj, Yus nintimtichu ainautiram: ¿Winasha nekasampita turutaram tusancha warutam musachik atumjaisha pujustaj? ¿Tura warutam musachik atumniasha nakas-tajrume? Uchikia itartitaram, —timiayi.

²⁰ Tamati uchin itariarmiayi. Tura itaramtai iwianch Jesús an wainak, uchin wewerkaja jakramiayi. Turamtai wichiatur nungkanam ayaarmiayi. Tura nungkanam tepes, mai yanta mai yanta wajak, sauran jangkenia itakmiayi. ²¹ Turamtai Jesús uchi aparin iniak:

—¿Ju aintancha warutia nangkamamia? —tu iniam:

—Uchichik ainkawaitai. ²² Tura asamtai maataj tusa, jinum tura entsanam untsuri ujuinuitai. Ame ni yaingtín tujintachkumka, wait anentrurta tura yaingta, —timiayi.

²³ Tama Jesús ayaak:

—¿Waruka tujintachkumka yaingta turutme? Aints Yusen nekasampita tauka mash tujinkachminuitai, —timiayi.

²⁴ Tura uchi apari Jesús an kakar chicharak:

—Nekasan amin nintimtajme. Yus tujinkashtimpiash tayatun, amin nuna nangkamas-nak nekasampita titasan yainkata tajame, —timiayi.

²⁵ Tama aints untsuri kaunkaru asaramtai, Jesús nuna wainak iwianchin jiyak:

—Iwianchi, ameka ju uchi jampeku tura chichachu awajsau asam, ni namangkenia jiinkimka, nuniangka ataksha engkemawaip, —timiayi.

²⁶ Tamati iwianch uchin wewerkaja, ataksha wewerkaja untsuri jakramiayi. Tura nuniangka untsamak jiinkimiayi. Tura jiinkiamtai uchikia jakawa nunisang tepesmiayi. Turamtai aints untsuri: Jakayi tiarmiayi. ²⁷ Tinamtai Jesús uchi uwejen tap achik inankimiayi. Turamtai uchikia nantaki wajasmiai.

²⁸ Turamtai ni nuiniatiri ainau Jesúsjai jeansam wayaawar, kanakar pujasar Jesús an iniinak:

—¿Warukarik iikia iwianch jiiktatkamarsha tujinkamji? —tiarmiayi.

²⁹ Tu iniinam Jesús aimiak:

—Ju iwianch jiiktasrum wakerakrumka, Yus seatkuram jiiktinuitrume, —timiayi.

Jesús ataksha ni jakatniurin pachis etserkamuri
(Mat. 17.22-23; Luc. 9.43-45)

³⁰ Nunia jiinkiar Galilea nungkanam nangkamakiar wearmiayi. Tura weenak Jesús chikich aints ainau wi pujamurun nekarawarai tusa nakitmiayi. ³¹ Tura wekaasar Jesús ni nuiniatirin ainan nuiniak:

✠ 9:13 (Mal. 4.5; Mat. 11.14)

—Wikia Yus akupkamutiatnak aints asamtai, wína mantuwartas aints ainau achirkar-tatui. Tura maamaitiatnak kempatam kinta tepayatun ataksha nantaktatjai, —timiayi.✠

³² Tamati nu chichamnaka antinayat ¿warinkung taj? tusar pengké nekaacharmiayi. Tura nekainachiat ¿waringki? tusar iniasartatkamawar arantukarmiayi.

¿Yaachita chikich ainaun nangkamakesha? timiauri
(Mat. 18.1-5; Luc. 9.46-48)

³³ Nunia Capernaum yaktanam jearmiayi. Tura Jesús jea pujus ni nuiniatiri ainaun iniak:

—¿Jinta weakrumsha warí chichasmarume? —timiayi.

³⁴ Tamaitiat jinta weenak: ¿Yaachita chikich ainaun nangkamakesha? tiaru asar natsaaminak aimkacharmiayi.✠ ³⁵ Aimkacharamtai Jesús keemas ni nuiniatiri doce (12) amia nuna: Antuitaram tusa untsukmiayi. Tura kaunkaramtai chicharak:

—Aints nekas juun wajastas wakerakka, uchía nunisang nintimrati, tura mash aints ainau inatiri ati tajarme, —timiayi.✠

³⁶ Tura uchin wainak japen pujsamiai. Tura uchin minakas ni nuiniatiri ainaun chicharak:

³⁷ —Aints winia nintimturas pujauka ju uchía nunisang aints mianchau ainaun pengker awajuka winasha nunisang pengker awajawai. Tura wína pengker awajtauka, wína akuptukmia nunasha nunisang pengker awajui, —timiayi.✠

Aints iin nakitramachkungka iincha yainmaktinuitji
(Mat. 10.42; Luc. 9.49-50)

³⁸ Tama Juan Jesúsán chicharak:

—Nuikiartinu, chikich aints amin naarmin pachis iwianchin jiiki akupausha wainkamji. Tura iijai tsanias wekaachu asamtai, iwianch jiikim akupkaip tusar suritkamji, —timiayi.

³⁹ Tamaitiat Jesús chicharak:

—Antsu suritkairap. Aints wína naarun pachis wainchati takatan turakka, wína pachit-as pasé chichakchatnuitai. ⁴⁰ Aints iin nakitramachkungka iincha yainmaktinuitji.✠

⁴¹ Nekasan tajarme: Atum wína umirtuku asakrumin, aints yumi amurtinun atumin suramsamtaikia, Yus nu aintsnaka nekas pengker awajsatatui, —Jesús timiayi.

Tunaanum jeairam tusaram aneartaram timiauri
(Mat. 18.6-9; Luc. 17.1-2)

⁴² Nunia ataksha chichaak: “Uchi wína umirtak pujaun aints tunau takamtikmatikia, nuna turashti tusar, tunau takamtiknu kuntujen kaya juuntan jingkiatawar, juun kuananam ujungkaramtaikia, timiá pengker atinuitai. ⁴³ Atumi uwejejai tunau takastarum wakerakrumka, tunau takasai tusaram, atumi uweje met charawa nunisrumek tunaarum japaram ukuktaram. Nekasrum kichik uwejmijai juni pujusrum, nunia jakaram nayaimpinam wetinka timiá pengkeraitai. Antsu ji kajintrashtinum mai uwejtuk jeatnuka nekas paseetai. ⁴⁴ Nuningkia akasha jakachartinuitai. Tura jisha tuke kajintrashtinuitai. ⁴⁵ Tura tunaanum wekaakurmeka, atumi nawe charawa nunisrumek tunaarum japaram ukuktaram. Nekasrum kichik nawejai juni pujusrum, nunia jakaram nayaimpinam wetinka timiá pengkeraitai. Antsu ji kajintrashtinum mai nawentuk jeatnuka nekas paseetai. ⁴⁶ Nuningkia akasha jakachartinuitai. Tura jisha tuke kajintrashtinuitai. ⁴⁷ Tura atumi jiisha atumin tunau nintimtikramataikia, atumi jii kuinkawa nunisrumek tunaarum japaram ukuktaram. Nekasrum kichik jiijai Yuse pujutirin jeatnuka timiá pengkeraitai. Antsu ji kajintrashtinum mai jiiintuk jeatnuka nekas paseetai. ⁴⁸ Akasha nuningkia jakachartinuitai. Tura jisha tuke kajintrashtinuitai.

✠ 9:31 (Mat. 16.21;20.19;27.63; Marc. 8.31;10.33-34; Luc. 9.22;18.31-33) ✠ 9:34 (Luc. 22.24) ✠ 9:35 (Mat. 20.26-27;23.11; Marc. 10.43-44; Luc. 22.25-26) ✠ 9:37 (Mat. 10.40; Luc. 10.16) ✠ 9:40 (Mat. 12.30; Luc. 11.23)

⁴⁹“Tura asamtai nuni engkemawaru ainauka mash jinum epenawartinuitai. ⁵⁰Weesha nekas pengkeraitai. Tura weesha michumarka, ¿itiur ataksha yapakting? Kuntinu namangke kaurai tusaram, weejai yakaarme nunisrumek atumsha mengkakai tusaram, pengker nintimtunisrum maanitsuk pujustaram,” Jesús timiayi.✠

10

Nuwa japashtinun pachis etserkamuri

(*Mat. 19.1-12; Luc. 16.18*)

¹ Jesús Capernaum yaktanmaya jiinki, Judea nungkanam nangkamaki, Jordán entsa tumajin katingmiayi. Tura nuni pujai, aints untsuri ataksha ni pujamunam iruntrarmiayi. Turinamtai Jesús tuke turin asa, aints ainaun ataksha nuinimiayi. ² Turamtai fariseo ainau Jesúsán jeariar nekapsartas iniinak:

—¿Aints ni nuwarin pachitsuk ajapa ukuktinkai? —tiarmiayi. ³ Tu iniinam Jesús chicharak:

—¿Moisés nuna pachischa warí chichamna akupkamia? —timiayi.

⁴ Tama chicharinak:

—Moisés chichaak: ‘Aints papin aar: Nuwarun ukuajai tusa, nuwarin nu papin susa ukuktinuitai,’ tusa tsangkamkamiayi, —tiarmiayi.

⁵ Tinamtai Jesús ayaak:

—Atumi nintijai timiá katuram nintimsaram pujau asakrumin, Moisés nunaka tsangkamkamiayi. ⁶ Antsu nu nangkamtaik Yus mash najanamia nuni aishmangnasha tura nuwancha najanamiayi.✠

⁷ Tura asamtai aishmangka ni aparincha, tura ni nukurincha ukuki, ni nuwarijai tsaningtinuitai. ⁸ Tura aishmang ni nuwarijai jimiaraitiat kichkia nunisang atinuitai.

⁹ Yus tu tinu asamtai, aints ni nuwarinka ukukchatnuitai, —timiayi.✠

¹⁰ Tura ataksha jeanam wayaawar, ni nuiniatiri ainau nu chichaman nekaawartas Jesúsán iniasarmiayi. ¹¹ Tu iniinam Jesús chicharak:

—Aints ni nuwarin ajapa ukuki, nunia chikich nuwan nuwatkungka, eemak nuwatkamia nuna ukukin asa tunau turawai. ¹² Tura nuwasha aishrin ajapa ukuki, nunia chikich aintsun ninumkau asa, nusha nunisang tunau turawai, —Jesús timiayi.✠

Jesús: Uchi ainau wini winiarti timiauri

(*Mat. 19.13-15; Luc. 18.15-17*)

¹³ Tura aints ainau Jesúsán: Uchin takasat tusar itiararmiayi. Turinamtai ni nuiniatiri ainau nu aints ainaun jiyainak:

—¿Waruka aitkarme? —tiarmiayi. ¹⁴ Tinamtai Jesús nuna antuk kajekmiayi. Tura chicharak:

—Uchi ainau wini winiarti tusaram tsangkatructaram. Aints ju uchua nunisarang nintimsar pujuinauka Yuse pujutirin jeartin ainawai. Tura asaramtai suritrukairap.

¹⁵ Nekasan tajarme: Aints Yuse pujutirin wayaawartas wakerinauka ju uchua nunisarang nekasampita turutin ainauka Yuse pujutirin jeartin ainawai, —Jesús timiayi.✠

¹⁶ Tura uchi ainaun minakas muuken achik:

—Yus yainmakarti, —timiayi.

Kuikiartin Jesúsjai chichasmauri

(*Mat. 19.16-30; Luc. 18.18-30*)

¹⁷ Nunia Jesús ataksha jiinki weai, aints ampuki tarimiayi. Tura tari tikishmatar Jesúsán aujak:

—Nuikiartinu, ameka pengkeraitme. Tura asakmin iniajme: ¿Pujut nangkankashtinun jukitasnasha warinak itiurkataj? nu ujatkata, —timiayi.

¹⁸ Tama Jesús chicharak:

✠ 9:50 (Mat. 5.13; Luc. 14.34-35) ✠ 10:6 (Gén. 1.27;5.2) ✠ 10:9 (Gén. 2.24; Mal. 2.14-16) ✠ 10:12 (Mat. 5.32; 1.Cor. 7.10-11) ✠ 10:15 (Mat. 18.3; Luc. 18.17)

—¿Waruka winasha pengkeraitme turutme? Nekas pengker aa nuka kichkitai. Nuka Yusketai. ¹⁹Yus aints ainaun: Wína chichamur umirtuktaram, tímia nuna chichamengka ameka nekame. Nu aarmauka nuwaitai: Mangkartuwairap, tura tsanirmawairap, tura kasamkairap, tura chikich aintcha tsanurairap, tura anangkawairap, tura aparmesha tura nukurmesha umirkataram, tu aarmawaitai, —timiayi.✠

²⁰Tama nu aintska chicharak:

—Nuikiartinu, ame tame nunaka uchiwach asanak tuke mash umikuitjai, —timiayi.

²¹Tama Jesús niin jiis aneemiayi, tura chicharak:

—Kichik chicham umikchau asam, yamaikia waketkim, ami wariram aa nu mash surukam, kuikian yuuminau susata. Turakum nekasam nayaimpinam yuumatsuk pujustinuitme. Nunia wína nemartustasam winita, —timiayi.

²²Tama nu aintska nuna antuk kuikiartin asa, nukap wake mesekmiayi. Tura Jesúsán ukukmiayi.

²³Tura ukukim Jesús niin tentakarman mash jiis, ni nuiniatiri ainaun chicharak:

—Kuikiartin ainau ni kuikiarin aneenu asar, Yus umirtan nekasar yuumatinawai, —timiayi.

²⁴Tama ni nuiniatiri ainau nuna antukar nukap nintimrarmiayi. Tura asaramtai Jesús ataksha chicharak:

—Uchir ainautiram anturtuktaram. Ni kuikiarinak nintimtinauka Yusen umirtan nekasar yuumatinawai. ²⁵¿Kamiyusha akusha jiin wayaamnaukai? Atsa, nuka pengké yumtinueitai. Tura kuikiartinka Yus pujamunam wayaatnuka timiá yumtinueitai, —timiayi.

²⁶Tama nuna antukaru ainau nukap shamkarmiayi, tura iniinak:

—¿Tu amataisha yaachik nuniasha uwemramnawaita? —tiarmiayi.

²⁷Tu iniinam Jesús mash jiis chichaak:

—Aints ningki nintimsangka uwemrachminuitai. Antsu Yuska pengké tujinkachu asa, aints ainaun uwemtikratnuitai, —timiayi.

²⁸Tama Pedro Jesúsán chicharak:

—Inu amia nuka mash ukukir ame nemarkamiaji, —timiayi.

²⁹Tama Jesús ayaak:

—Nekasam tame. Antsu wikia atumin tajarme: Aints wína anentu asa, Yusnum uwemratin chichaman etserkatas ni pujutirin ukuki, tura yachiincha, tura umajincha, tura nukurincha, tura aparincha, tura uchirincha, tura ajarincha ukuki, ³⁰iwiaaku pujus ni pujustintrincha kichik pachak wainkatnuitai. Tura yachiincha, tura umajincha, tura nukurincha, tura uchirincha kichik pachak wainkatnuitai, tura ajarincha untsuri wainkatnuitai. Turamtai Yusen nakitin ainau niincha pasé awajsartinuitai. Nunia jaka nantaki Yusnum tuke iwiaaku pujustinuitai. ³¹Tura aints untsuri ningki nintimsar: Wikia miajuitjai tinu ainauka nu kinta jeamtai, ukunam mianchau artinuitai. Tura yamai mianchau ainauka ukunam chikich ainaun nangkamasarang pengker pujusartinuitai, —Jesús timiayi.✠

Jesús ni jakatniurin pachis ataksha etserkamuri

(Mat. 20.17-19; Luc. 18.31-34)

³²Tura ni nuiniatiri ainaujai Jerusalénnum wetai tusar, jinta wekaasar, Jesús eemak weamtai, ni nuiniatiri ainau nintimrarmiayi. Tura chikich ainau namarinayat shamkarmiayi. Tura ni nuiniatiri ainaun kanak pujas Jesús ni turunatnurin ujakmiayi.

³³Tura ujaak:

—Anturtuktaram. Jerusalénnum weaji. Wikia Yus akupkamutiatnak aints asan, sacerdote juuntri ainamunam, tura Moisésa chichame nuikiartin ainamunam wína surutkaramtai, maataram tusar judóochu ainamunam surutkartatui. ³⁴Tura wishikrurar,

✠ 10:19 (Ex. 20.12-16; Deut. 5.16-20) ✠ 10:31 (Mat. 19.30;20.16; Luc. 13.30)

tura usukrurar, tura katsumrukar wína mantuwaramtai kempatam kinta jakan tepay-atun ataksha nantaktatjai, —timiayi.✠

Santiago Juanjai Jesús san seamuri
(Mat. 20.20-28)

³⁵ Nunia Zebedeo uchiri Santiago Juanjai Jesús san jeariar chicharinak:

—Nuikiartinu, ¿ii seatatji nuka ame nutiksamek turamnaukitam? —tiarmiayi.

³⁶ Tu iniinam Jesús chicharak:

—¿Warí itiurtukat tusarme wakerutarme? —timiayi.

³⁷ Tu iniam aiminak:

—Ami pujutirmin Apu pujakminkia, iisha apu naamkar amijai tsaniasar ami untsurumninisha, tura menarmininisha pujustasar wakeraji. Nu tsangkamkartukta, —tiarmiayi.

³⁸ Tinamtai Jesús ayaak:

—Atum wína seatrume nuka warimpita tusaram nekatsrume. ¿Wi wait wajaktatja nunisrumeash atumsha wait wajaktaram? —tu iniasmiayi.✠

³⁹ Tu iniam aiminak:

—Ja ai, turunamnawaitji, —tiarmiayi.

Tu tinam Jesús chicharak:

—Nekasrum tarume. Wi wait wajaktatja nunisrumek atumsha wait wajaktinuitrume. ⁴⁰ Antsu wína untsuruninisha, tura wína menarmininisha atum keemsatnunka tsangkatkashtinuitjarme. Antsu Yus nuni keemsartinun tsangkatkamu ainauk keem-sartin ainawai, —timiayi.

⁴¹ Tamati chikich diez (10) nuiniatiri nuna antukar, Santiagoncha tura Juannasha kajerarmiayi. ⁴² Turinamtai Jesús ni nuiniatirin mash untsuk irur chicharak:

—Mash nungkanmaya apu ainau ni aintsrin akatrar pe akupinawai. Tura ni juuntri ainausha miajuitjai tusar, ni aintsri ainauncha tuke inarartas wakerinawai. Atumsha nuka nekarme. ⁴³ Antsu atumka nuka turashtinuitrume. Tura chikich ainau nangkakatasrum wakerakrumka, mash aintsu inatiria nunisrumek atinuitrume. ⁴⁴⁻⁴⁵ Nintimrataram. Wikia Yus akupkamutiatnak aints asan, aints ainau wína yainkarat tusanka tachamiajai, antsu aints ainaun yaingtaj tusan taawitjai. Nuniasha aints ainau wína mantuwarat tusan, aints ainaun untsurin angkanmamtikiawartasan taawitjai. Tura asamtai aints apu wajastas wakerakka, mash aints ainau inatiri atinuitai, —Jesús timiayi.✠

Jii kusurun Bartimeo naartinun tsuwarmauri
(Mat. 20.29-34; Luc. 18.35-43)

⁴⁶ Nunia Jesús ni nuiniatiri ainaujai Jericó yaktanam jearmiayi. Tura nunia jiinkiar, aints untsuri Jesús san nemarkarmiayi. Tura jinta weenai, aints wainmichun, Timeo uchiri Bartimeo naartinun jinta yantamen pujaun wainkarmiayi. Nu aintska tuke aints nangkaaminaun kuikiarin seauyayi. ⁴⁷ Turinamtai nusha: Nazarenumia Jesús winawai tamaun antuk untsamak:

—Jesúsa, Davidta weariya, wína wait anentrurta, —timiayi.

⁴⁸ Tu untsumatai aints ainau untsuri:

—Itatkata, —tiarmiayi. Tinamaitiat nuna nangkamasang kakar untsamak:

—Davidta weariya, wait anentrurta, —timiayi.

⁴⁹ Tamati nuna Jesús antuk wajas:

—Untsuktaram, —timiayi. Tama jii kusurun untsukar:

—Pengker nintimsam wajakta. Jesús untsurmawai, —tiarmiayi.

⁵⁰ Tinamtai nisha tsekengki wajaki, punchurin japa ukuki, Jesúsnum winimiayi.

⁵¹ Tura winamtai Jesús iniak:

—¿Itiurtukat tusamea wakerutame? —timiayi. Tu iniam wainmichu aimiak:

✠ 10:34 (Mat. 16.21;17.23;27.63; Marc. 8.31;9.31; Luc. 9.22) ✠ 10:38 (Luc. 12.50) ✠ 10:44-45 (Mat. 23.11; 20.25-28; Marc. 9.35; Luc. 22.25-27; Juan 13.12-15)

—Nuikiartinu, wainmachkun wainmaktasan wakerajai, —timiayi.

⁵² Tama Jesús chicharak:

—Ayu, yamaikia weta. Wína nekasampita turutu asam, pengker wajasume, —timiayi.
Nu chichamuik paan wainmakmiayi. Tura Jesúsán nemarkamiayi.

11

Jesús Jerusalénnum wemaui

(Mat. 21.1-11; Luc. 19.28-40; Juan 12.12-19)

¹ Nunia Jerusalén yaktanam arakchichu wear, Betfagé yaktanmasha, tura Betania yaktanmasha arakchichu Olivo Mura tutainum jeatak wajasar, Jesús ni nuiniatirin jimiaran akupkamiayi. ² Tura chicharak:

—Atunini yaktachinam wetaram. Tura nuni jearam, burro jingkiamu wainkatatrume. Nuka entsakrachawaitai. Nu atiaran juni itataram. ³ Tura ininminak: ¿waruka atiarne? turaminamtaisha: Apu yumau asamtai juwaji. Tura wári wainkitatui titaram, —Jesús timiayi.

⁴ Tama ayu tusar wearmiayi. Tura wear burron jinta yantamen jea waiitiri yantamen jingkiamun wainkarmiayi. Tura wainkar atiwarmiayi.

⁵ Turinamtai aints nuni pujuinau chicharinak:

—¿Warukaya burrosha atiarne? —tiarmiayi.

⁶ Tinamtai Jesús tímia nunisarang ujakaram suritkacharmiayi. ⁷ Turinamtai burron jukiar Jesúsnum jear, ni wejmakrin aimiakar Jesús keemsati tusar awantsam keemsamiayi. ⁸ Tura Jesús jinta weamtai: Ilinu Apurinme tiartas, aints untsuri ni wejmakrin aimiakar jinta jafen aitkarmiayi. Chikich ainausha chapi nukea tumaun charukar jintanam aitkarmiayi. ⁹ Tura Jesúsjai eemkiar wearmia nusha, tura ukunam winiarmia nusha warasar untsuminak:

—Yus juuntaitai. Yus akupkamu winá nuka nekas pengkeraitai. ¹⁰ Ii juuntri David aints ainaun inarmia nunisang juka aints ainaun inartatui. Yus nayaimpinam puja nuka nekas juuntaitai, —tiarmiayi.

¹¹ Nunia Jesús Jerusalénnum jea, Yus seatai juun jeansam wayaamiayi. Tura mash jiis umis, kintamrai tusa, ni doce (12) nuiniatiri ainaujai Betania yaktanam wearmiayi.

Jesús higuera numin yumingkramuri

(Mat. 21.18-19)

¹² Kashin tsawaar Betanianmaya jiinkiar, Jesús jinta weak yaparmiayi. ¹³ Tura numi higuera tutain arák wajaun wainak: Nerekchayash tusa, jiistas werimiayi. Turayat higuera neretiri jeachu asamtai, aya nukak nukak nerenchauun wainkamiayi. ¹⁴ Tura higuera chicharak:

—Tuke nerechu atatme, tura asakmin aints ainau neremin pengké yuwachartatui, —timiayi. Tamati ni nuiniatiri ainau nuna antukarmiayi.

Yuse jeengka kasa jeenchuitai timiauri

(Mat. 21.12-17; Luc. 19.45-48; Juan 2.13-22)

¹⁵ Nunia Jerusalén yaktanam jearmiayi. Tura jear, Jesús Yus seatai juun jeansam waya, aints nuni surinak, tura suminak wajainaun wainak, mash aanum jiiki akupkamiayi. Tura kuikian yapajinak pujuinau misarin tura kayuk suwen surinau tutangkrincha yanturmiayi. ¹⁶ Tura Yus seatai juun jeansam warinchu entsaakinaun: Juningkia aitkawairap tusa suritkamiayi. ¹⁷ Tura chikich ainaun nuiniak:

—Yus chichaak: “Wína jearka mash nungkanmaya aints ainau Yus seatai jeitai,” timiayi. Tu aarmau wainiatrum, atumka aints kuikian juni kasamkarti tusaram tsangkatkarume, —Jesús timiayi.

¹⁸ Tamati aints ainau Jesúsá chichamen antukar nukap nintimraru asaramtai, sacerdote juuntri ainausha, tura Moisésá chichame nuikiartin ainausha nuna antukar Jesúsán

shaminak: ¿Jesús itiurak maawaintai? tusar chichaman najatawarmiayi. ¹⁹ Nunia kintamramtai Jesús juun yaktanmaya jiinkimiayi.

Higuera kukarun wainkamuri

(Mat. 21.20-22)

²⁰ Kashin tsawaar jinta weenak, numi higuera yaau wainkarma nuna nángkainak, kangkaptuk kukarun wainkarmiayi. ²¹ Tura Pedro nuna wainak Jesús chichakmau nintimias Jesúsán chicharak:

—Nuikiartinu jiisia. Ame higuera tuke nerechu atatme timiame nuka yanchuk kangkaptuk jakayi, —timiayi.

²² Tama Jesús chicharak:

—Tuke Yus nintimsaram nekasampita titaram. ²³ Nekasan tajarme. Yuska pengké tujinkachuitai, aints tu nintimias pujakka, tura Yuska nunaka nekas turatatu, tu nintimias pujakka: ‘Ju mura waja juka juni wajatsuk antsu juun kuchanam ayangti,’ tamaka nekas turunamawaitai.✠

²⁴ Tura asamtai tajarme: Yus seakrumka, wi seja nunaka nekas surustatuapi, tu nintimsaram seakrumningkia, mash suramsatatrume. ²⁵ Tura Yus seakrumka chikich aintsjai kajernaikiam pujakrumsha, atumi Apaachiri Yus nayaimpinam puja nu wina tunaaruncha mash tsangkutrurti tusaram tsangkurnairataram. ²⁶ Antsu tsangkurnaitsuk pujakrumningkia, atumi Apaachiri nayaimpinam puja nu atumi tunaaruncha tsangkutramrashtatrume, —Jesús timiayi.✠

¿Jesúsán yáki kakarmarincha susaya? timiauri

(Mat. 21.23-27; Luc. 20.1-8)

²⁷ Nunia ataksha Jerusalénnum wearmiayi. Tura nuni jear, Jesús Yus seatai juun jeans wayaamtai, sacerdote juuntri ainausha tura Moisésa chichame nuikiartin ainausha, tura judío juuntri ainausha Jesúsán tariarmiayi. ²⁸ Tura chicharinak:

—¿Ame aítkame jusha yana chichamejia aítkame? ¿Tura yaachia aítkata tusasha amincha akuptamkama? —tu iniasarmiayi.

²⁹ Tu iniinam Jesús aimiak:

—Wisha atumnasha kichan iniastajrume. Nu aimkakrumningkia yáki winasha akup-tukma tusan nunasha ujaktatjarme. ³⁰ Watska. ¿Yáki Juankun aints imaita tusasha akupkaya? ¿Yuseash akupkaya? Turachkusha ¿aintsuash akupkaya? Nu airkataram, —timiayi.

³¹ Tamati mai nuwamtak chicharnainak:

—¿Ilisha warintajik? Yus akupkamuitai takurningkia ¿waruka ni nekasampita tichami-arume? iincha turami tusar tichatnuitji. ³² Antsu aints akupkamuitai takurningkia, aints mash: Juan Yus akupkamuitai tinau asar, iin kajertamkarai tusar shamaji, —tunaiyarmiayi. ³³ Tura asar Jesúsán ainak:

—Juankun imiakratia tusasha yáki akupkaya tusarsha iikia nekatsji, —tiarmiayi. Tinamtai Jesús chicharak:

—Tu tau asakrumin, yáki wína akuptukia tusancha, wisha nunisnak ujakchatatjarme, —timiayi.

12

Pasé takau ainaun pachis nuikiartamuri

(Mat. 21.33-46; Luc. 20.9-19)

¹ Nunia Jesús nuikiartamun aints ainaun nuiniartas nangkamamiayi. Tura chicharak: “Aints uva naekrin ajanam araamiayi. Tura kasamkarai tusa wenurmiayi. Tura nu ajanam kayan juki, uva yumiri jutain najanamiayi. Tura ajan wainkatnun wenur-maunum yakí wajatirin najatamiayi. Tura aints ainaun eak: Ajar waitruktaram tusa ukuki, chikich nungkanam arák wemiayi. ² Tura juuktin kinta jeamtai, ni inatirin akupak:

✠ 11:23 (Mat. 17.20) ✠ 11:26 (Mat. 6.14-15)

Yamaikia ajarun takau ainaun: Uva juukrum akankaram winar aa nunaka akupturkarti tawai tita tusa akupkamiayi. ³ Akuptukmaitiat nu ajan takau ainau ajartinu inatirin achikiar katsumkarmiayi. Tura katsumkar uvancha sutsuk akupkarmiayi. ⁴ Turinamtai ajartin ataksha chikich inatirin akupkamtai, nusha ajanam jeamtai, ni muukencha awatrar pasé chichasarmiayi. ⁵ Turinamtai ajartin ataksha chikich inatirin akupkamia nunaka maawarmiayi. Turinamtai chikich chikich aintsrin untsuri akupkamiayi. Tura akupkamu waininayat ajan takau ainau chikich ainauncha awatrar, antsu kichnaka maawarmiayi. ⁶ Turinamtai ajartinu aintsri kichik nijai tsanias pujumiayi. Nuka ni aneamuri uchiri ayayi. Tura wína uchirnaka anturkarchatpiash, tu nintimias ni uchirin akupkamiayi. ⁷ Apari akupkamu waininayat, nu aja takau ainau ajartinu uchirin wainkar chicharinak: ‘Auka ajartinu uchirintai. Ni aparí jakamtai, ju ajaka ninu atatui. Watska, maatai. Au maarkia ajaka iinu achaintak,’ tiarmiayi. ⁸ Tura ajartinu uchirin achikiar maawar, namangkencha ajanmaya jiikiar iwiartsuk ajapawarmiayi.

⁹ Tura asamtai ¿ajartin taa iturkatnuita? ¿Atumsha itur nintimrume? Niisha taa nu aja takau ainaun mash maatnuitai. Tura ajarincha chikich ainau takakmasarti tusa susatnuitai.

¹⁰ ¿Atumka Yuse chichame aarmawa nu aujchaukitrum? Tu aarmawaitai:

‘Jeamin ainau kaya jean jeamkar, chikich kayan wainkar chichainak: Ju kayaka paseetai, tusar japawarmiayi. Japinau wainiat Yuska: Nu kayaka timiá pengkeraitai timiayi. ¹¹ Apu Yus nuna wakerau asamtai, iisha nu nintimsar pujaji,’ tu aarmawaitai,” Jesús timiayi. ¹² Tamati nu nuikiartamun iin pachitmas turamji tu nintimsar, sacerdote juuntri ainau, tura Moisésa chichame nuikiartin ainausha, tura judío juuntri ainausha: Jesús achiktai tu nintiminayat, aints ainau shaminau asar, Jesúsán ukukiar wearmiayi.

¿Juun apu akikchatnukai? timiauri

(Mat. 22.15-22; Luc. 20.20-26)

¹³ Nunia fariseo ainaun tura Herodesa aintsri ainaun akupinak: Jesús iniam ¿niisha warintintak? tusaram nekaataram. Nunia nekaaram tsanumrataram tusar akupkarmiayi. ¹⁴ Turinamtai Jesúsán jeariar chicharinak:

—Nuikiartinu, ameka nekas chicham chichaame. Iikia nuka nekaji. Tura chikich ainau chichaina nuka antutsuk, ameka nekasam Yuse jinti tu awai tusam tupin nuikiartame. Tura aints ainau wína pengker nintimtursarti tusamka pachiatme. Tura asakmin ¿ituir nintime? tusar nekaatasar taji. Juun apu César ni aintsrin akupak: Kuik irumrataram tamati, ¿ii kuikiari akiimiaktin pengkerkai? ¿Nu akiimiaktajiash? ¿Turachkursha surimkatjiash? Nu nekaatasar wakeraji, —tiarmiayi.

¹⁵ Tu tinam, Jesús ni pasé nintimaurin nekaru asa chicharak:

—¿Waruka winasha anangkruaram nekaprustasrumsha wakerutarme? Kuik itataram. Wisha jiistaj, —timiayi.

¹⁶ Tama kuikian itariaram Jesús kuikian jiis chicharak:

—¿Jusha yana yapiya nakumkamuita? ¿Tura yana naariya aarmawaita? —tu iniam:

—Juun apu Césarnawaitai, —tiarmiayi.

¹⁷ Tinamtai Jesús ayaak:

—Tu tinu asaram, juun apu Césarnau aa nuka ni susataram. Tura Yusnau aa nuka Yus susataram, —timiayi. Tamati ni aimkamurin antukar nukap nintimrarmiayi.

¿Aints jakau nantaktinuashi? timiauri

(Mat. 22.23-33; Luc. 20.27-40)

¹⁸ Nunia saduceo ainau Jesúsá chichamen nekaawartas tariarmiayi. Saduceo ainauka: Aints jakauka jakamunmaya nantakchatnuitai tinawai. Tura Jesús warintintak tusar niin tariar chicharinak:

¹⁹ —Nuikiartinu, Moisés chichaman aarmia nu chichamka nuwaitai: Aints uchin yajutmatsuk jakamtaikia, ni yachí uchin yajutmartas wajerin nuwatkatí. Tura uchin yajutmarta, nuka ni yachí jakau uchiriya nunisang atinuitai, tu aatramramiaji. ²⁰ Ayu, juni iijai iruntrar siete (7) yachintin puju armiayi. Tura eemkauri nuwan nuwatak,

uchin yajutmatsuk jakamtai, ²¹ jakau yachí wajerin nuwatkayat nusha nunisang uchin yajutmatsuk jakamiayi. Tura jakau asamtai, chikich yachiisha wajerin nuwatak, nusha nunisang uchin yajutmatsuk jakamiayi. ²² Turamtai kitcha kitcha siete (7) yachintin amia nu nuwan nuwatinayat, mash uchin yajutmatsuk kajingkiarmiayi. Nunia ukunam nuwasha jakamiayi. ²³ Tura nu siete (7) yachintin mash nu nuwan nuwataru asar, jakamunmaya nantakiar ¿nu nuwaka yana nuwariya atinuita? —tu iniasarmiayi.✠

²⁴ Tu iniinam Jesús ayaak:

—Yuse chichame nekachu asaram, tura Yuse kakarmarisha wainchau asaram, jakamunmaya nantaktin atsawai, takuram pe nuwá wearme. ²⁵ Jakamunmaya nantakiaru ainauka nuwanka nuwatkachartinuitai. Tura nuwasha aintsun ninumkachartinuitai, antsu Yuse awemamuri nayaimpinam pujuina nunisarang nuwartichu artinuitai. ²⁶ Tura jakamunmaya nantaktin pachisrum nekaatasrum wakerakrumka ¿atumka jakaru ainaun pachis Moisés papin aarmia nu aujchaukitrum? Numi jangkirtin kapaarmia nuni Yus Moisésan chicharak: “Abrahama Yusrinka wiitjai. Tura Isaaca Yusrinka wiitjai. Tura Jacobo Yusrinka wiitjai,” timiayi. Nu aints yaan chuik jakaru ainayat, tuke iwiaaku ainawai, Yus timiayi. ²⁷ Tu tinu asamtai, Yuska jakau ainau Yusrintai tarume nuka tuchuitai, antsu tuke iwiaaku ainau Yusrintai. Atumka jakau ainau nantakchartinuitai tinu asaram pe nuwá wearme, —Jesús timiayi.

Chicham umiktin nekas pengker aa nuna pachis etserkamuri

(Mat. 22.34-40)

²⁸ Nunia Moisésa chichame nuikiartin Jesús saduceo ainaujai chichaamun anumak antuku asa, tura Jesús nekas pengker aimkau asamtai, Jesús an iniak:

—¿Chicham umiktin chikich chichaman nangkamasang nekas pengker aa nusha tuwaita? —timiayi. ²⁹ Tu iniam Jesús ayaak:

—Umiktin chicham nuwá eemkar umiktinka juwaitai: ‘Israel ainautiram, antuktaram. Ii Yusri kichkitai. Nuka iinu Apurintai. ³⁰ Tura ami Yusrum ami Apuram asamtai, tuke nintimaurumjai anen ata. Tura asam tuke inaitsuk Yus nintimsam aneeta. Tura Yus ami kakarmarmijai tuke umirkata.’ ³¹ Tura junajai metek tausha juwaitai: ‘Ami namangkem aneame nunismek chikich aints ainausha aneeta.’ Nuna nangkamasang chicham umiktin pengké atsawai, —timiayi.✠

³² Tamati Moisésa chichame nuikiartin Jesús an chicharak:

—Ayu nuikiartinu, Yus kichkitai, tura asamtai chikich Yuska atsawai tame nuka nekasaintai. ³³ Tura Yus tuke nintijai aneakrikia, tura tuke Yus nintimsar pujakrikia, tura ii kakarmarijai Yus tuke umirkurkia, tura chikich ainausha ii namangkea nunisrik aneetnuitji tame nuka nekas pengkeraitai. Tura iinu tangkuri Yus susataj tusar maar epeakrikia mianchawaitai, —timiayi.

³⁴ Tura ni pengker aimkau asamtai, Jesús nuna antuk chicharak:

—Tuke Yusnum pujustaj takumka, tuke tu nintimsam pujusta, —timiayi. Tamati aints mash nintimrar iniasartatkamawar arantukarmiayi.✠

¿Mesíascha yana wearinta? timiauri

(Mat. 22.41-46; Luc. 20.41-44)

³⁵ Jesús Yus seatai juun jeanam aints ainaun nuiniak:

—Moisésa chichame nuikiartin ainau Yus akupkatnun Mesías tutain pachisar ¿waruka Davidta wearintai tinawa? ³⁶ Davidcha, Yuse Wakani tu aarta yaan chuik timiau asa, nuka papinum aak:

‘Apu Yus wína Apurun chicharak: Juni wína untsurunini apu keemtainum pujusam nakarsata. Tura nakarkumin ami nemasem ainaun mash nepetkatatjai,’ timiayi.

³⁷ Davidka Yus akupkatnun Mesíasan pachis: Wína Apuruitai tinu wainiatrumsha ¿waruka Davidta uchirintai tarume? —timiayi.

✠ 12:23 (Hech. 23.8) ✠ 12:31 (Deut. 6.4-5) ✠ 12:34 (Mat. 22.35-40; Luc. 10.25-28)

Jesús tu chichaamtai, aints mianchau ainau kaunkarmia nuka mash warawarat ni chichamen antukarmiayi.

Moisésa chichame nuikiartin ainaun pachis etserkamuri

(Mat. 23.1-36; Luc. 11.37-54;20.45-47)

³⁸ Jesús aints ainaun nuiniak:

—Moisésa chichame nuikiartin ainau wainkataram. Ni entsatirin sarman entsarar: Wisha nekasan papi nekau aintsuitjai tusar, jampesarang yaktanam wekajinak: Wína jiirsar aultusarat, tu nintimsar wekajin armayi. ³⁹ Tura iruntai jeanam wayaawar, wína jiirsarat tusar, keemtai nekas pengkernum keemsartas wakerinawai. Tura fiesta najanmaunumsha eemkar keemsar yuwartas wakerinawai. ⁴⁰ Tura waje jeencha atantin ainayat anangminak wína: Pengke aintsuitai turutiarat tusar, aya jangkejai Yusen sarman seainawai. Tuminau asaramtai, Yus chikich ainaun nangkamasarang niin nukap wait wajaktiniun susartinuitai, —Jesús timiayi.

Waje kuikiarin Yusen mash susamuri

(Luc. 21.1-4)

⁴¹ Jesús Yus seatai juun jeanam kuik engketi kajurin nakaj pujumiayi. Tura nu kuik engketinam aints ni kuikiarin engkeenaun wainkamiayi. Turamtai kuikiartin untsuri tariar, ni kuikiarin nukap engkewarmiayi. ⁴² Turinamtai waje kuikiartichu tari, jiru kuikian jimiaran engkeamiayi. ⁴³ Tura engkeamtai, Jesús nuna wainak, ni nuiniatiri ainaun untsuk:

—Nekasan tajarme: Ju wajeka nekas kuikiartichutiat, mash aints ainaun nangka-masang nukap engkeayi. ⁴⁴ Kuikiartin ainau aya kuik ampirmaurinak engkeenawai. Antsu ju wajeka ninu aa nunaka mash ampitsuk engkeayi, —Jesús timiayi.

13

Jesús Yus seatai jea yumpungtinun pachis timiauri

(Mat. 24.1-2; Luc. 21.5-6)

¹ Jesús Yus seatai juun jeanmaya jiinkiamtai, kichik nuiniatiri chicharak:

—Nuikiartinu jiista. Kaya au pengkerapita, tura Yuse jee juuntapita, —timiayi.

² Tamati Jesús ayaak:

—¿Ju jea kaya jeamkamuka juuntak jiam? Ju wainme juka ukunmaka mash yumpunkatnuitai, tura kaya kichkisha chikich kayanmasha patamkashtinuitai, —Jesús timiayi.

Nungka mesratnun pachis etserkamuri

(Mat. 24.3-28; Luc. 21.7-24;17.22-24)

³ Nunia Olivo Muranam wear, Yus seatai juun jea arakchichu amanum jear, Jesús mura waka keemsamiayi. Tura keemsamtai, Pedro nunia Santiago, nunia Juan, nunia Andrés Jesúsjai kanakar keemsar Jesúsani iniinak:

⁴ —¿Juun jea yumpunkatnusha warutik at? Tura nu turunatin kinta jeatak wajasam-taisha ¿waring wantinkatnui? —tiarmiayi.

⁵⁻⁶ Tu tinam Jesús ayaak:

—Aints untsuri chichainak: Wiitjai Yus akupkamuitjai tusar, aintsun untsuri anangkawartinuitai. Tura asamtai aints ainau wina anangkruwarai tusaram aneartaram.

⁷⁻⁸ “Aints ainau chikich nungkanmaya ainaujai maaniawartinuitai. Tura apu ain-ausha kajernaikar mesetan najanawartinuitai. Nuniasha chikich chikich nungkanam uusha untsuri uurkatnuitai. Tura tsukasha nukap atinuitai. Antsu nuna turuna nangkamaramtai, nuna nangkamasang wait wajakartiniun nuniangka nangkamawartinuitai. Tura asamtai maaniamu chicham antakrumsha, tura meset atatuui tamau antakrumsha shamkairap. Nungka meseatsaing maaniamu untsuri artinuitai. Antsu nungka mesertinka tewarikia achatnuitai.

⁹ “Tura ii juuntri iruntramunam atumin juramkiartinuitai. Tura iruntai jeanmasha awatamrartinuitai. Tura wína aintsur asakrumin, atumin judío apuri ainamunmasha, tura romano apuri ainamunmasha chicham nekaarami tusar juramkiartinuitai. Tura asaramtai aneartaram. ¹⁰ Tura nungka meseatsaing, uwemratin chichaman mash nungkanmaya ainamunam etserkartinuitai. ¹¹ Tura atumin achirmakar, apu pujamunam jeetaminamtai shamkairap. Tura chichastin jeatsaing ¿warinak titaj? tuuka nintimsairap. Tura chichastin amatai, Yus atumin chichamtikramkatnuitrume. Tura atumek nintimsarmeka chichakchatnuitrume, antsu Yuse Wakani atumin chichamtikramkatata nuke chichaktinuitrume.✠

¹² “Nu kinta jeamtai, aints ni yachiin wainiat: Maawarat tusar surukartinuitai. Tura chikich ainausha ni uchirin: Maawarat tusar surukartinuitai. Tura chikich ainausha ni aparincha, tura ni nukurincha kajerinak: Maawarat tusar surukartinuitai. ¹³ Tura wína aintsur asakrumin, aints mash atumin kajertamkartinuitrume. Antsu aints Yusen tuke umirkaruka uwemrartinuitai.✠

¹⁴ “Aints ju chichaman aujinauka nintimrarti. Yaanchuik Yuse chichame etserin Daniel naartin papinum aak, nekas pasemamtikiartinun pachis aarmiayi. Nu pasemamtikiartin Yus seatai juun jeanam wayaachmin ayat nuni wayaamtai, Judea nungkanam pujuinauka muranam tupikiakiartinuitai. ¹⁵ Tura wári tupikiakiartin asar, aints jea jimia pata jeamkamunam yakí patanam pujuinauka wári kuankinak, waririncha jutsuk tupikiakiartinuitai. ¹⁶ Tura ajanam takakminausha jeanam waketsuk entsatirincha jutsuk wári tupikiakiartinuitai.✠

¹⁷ “Nu wait wajaktin kinta jeamtai, nuwa jamtin ainauka tura kuwirin muntsak pujuinausha nukap wait wajakartin asaramtai wait anentinajai. ¹⁸⁻¹⁹ Nu nangkamtaik Yus nungkan najanamunmayangka timiá wait wajamuka atsuyayi. Tura ukunmasha ataksha timiá wait wajaktinka atsutnuitai. Tura asamtai nu wait wajaktin yumanch nantuti turunashiti tusaram Yus seataram. ²⁰ Nu wait wajaktinaka Yusek: Ainik ati tusa amuktinuitai. Nu turachmataikia, aints kichkisha pengké uwemrashtinuitai. Antsu Yus ni aintsri uwemrartin ainaun aneau asa, nu wait wajaktinaka amuktinuitai.

²¹ “Turamtai aints atumin anangkraminak: Jiista, juwaitai Mesías turaminamtaikia, tura chikich aints anangkraminak: Jiistaram, ani pujawai turaminamtaisha anturkairap. ²² Antsu aints unturi anangkraminak: Wiitjai Mesías tusar wantinkartinuitai. Tura chikich ainausha: Yus akupkamu asan, Yuse chichamen etsernuitjai, anangkraminak turamtiartinuitai. Nusha aints ainaun anangkawartas aints wainchati takatnasha, tura aints tujintamu takatnasha turuwar, Yuse umirin ainaun anangkamin amataikia nuna anangkawartinuitai. ²³ Nu aints ainau atumin anangkramawarai tusan, eemkin yamaik ujaajrume. Atumka aneartaram,” Jesús timiayi.

Jesús ni tatintrin pachis etserkamuri

(Mat. 24.29-35, 42-44; Luc. 21.25-36)

²⁴ Jesús tuke chichaak:

“Nu wait wajaktiniun wi etserja nu nangkamaramtai tsaasha tsantrashtinuitai. Tura nantusha kajinratnuitai. ²⁵ Yaa ainausha nayaimpinmaya kakeerartinuitai. Tura nayaimpinam muchichu ainausha muchitkartinuitai.✠

²⁶ “Tura wi aints ayatun, Yus akupkamu asan, nayaimpinmaya yurangmijai Yuse kakarmarijai nunia Yuse paaniurijai winamtai, wínaka paan waitkartinuitai. ²⁷ Tura wína awemamur ainaun akupkan, wína umirtukaru ainaun wi uwemtikratan wakerau asan, mash nungkanmayan tura nayaimpinmayanacha irurat tusan akupkartinuitjai.

²⁸ “Numi higuera tutai nintimratarum. Numi tsaraptur ataksha nukarmatai, ju nungkanam pujuinautiram: Esat jeatak wajasi tarume. ²⁹ Tura asaram wi tajarme nuka mash wainkarmeka, atumsha: Tatintri jeatak wajasi tusaram nekaamnawaitrume. ³⁰ Nekasan tajarme: Wi taja nunaka mash umiatsaing, aints nuni iwiaaku pujuinauka

✠ 13:11 (Mat. 10.17-20; Luc. 12.11-12) ✠ 13:13 (Mat. 10.22) ✠ 13:16 (Mat. 24.17-18; Luc. 17.31) ✠ 13:25 (Apoc. 6.12-13)

jakachartinuitai. ³¹ Nayaimpisha tura nungkasha mengkakartinuitai. Antsu wína chichamruka pengké mengkakashtinuitai.

³² “Tura nu turunatin kinta warutik at tusanka, aints kichkisha nekainatsui. Yuse awemamuri ainausha nunaka nekainatsui. Wisha Yuse Uchiri ayatnak nekatsjai. Antsu wína Apaachiruk nuke nekawai.

³³ “Tura asamtai aneartaram, tura wainkataram. Nu kinta warutik at tusaram nekachu asaram, Yus tuke searam pujustaram. ³⁴ Tura wikia junia apua nunisketjai. Apu arák irastas wetas, ni inatiri ainaun untsuk, kichik kichik ni takatrin akanak suawai. Tura jea wainuncha: Jear tenapkesam waitrukta tusa ukuawai. ³⁵ Atumsha nunisrumek winaka kajinmatrutsuk: ¿Apu tatintri warutik at? tusaram nekachu asaram aneartaram. ¿Kintamramtaiyash tat? tusaram tura: ¿Japkeash tat? tusaram tura: ¿Atash shinayash tat? tusaram tura: ¿Kashikiash tat? tusaram anearum pujustaram. ³⁶ Tu nintimtsuk pujakrumningkia, atumi apuri aneachmau taa, atum kanurua nunisrumek teparmin waitmakarai tusaram wainkataram. ³⁷ Wi atumin tajarme nunaka mash aintsun ju chichamnasha antumtikun tajarme: Anearum pujustaram,” Jesús timiayi.✠

14

Jesús maatar chicham najatamuri

(Mat. 26.1-5; Luc. 22.1-2; Juan 11.45-53)

¹ Pascua fiesta tura pang pachimrachmau yuwatin fiesta jimiaichik kinta ai, sacerdote juuntri ainau, tura Moisésa chichame nuikiartin ainausha Jesús anangkawar achikiar, maawarat tusar mesetan najatiarmiayi. ² Tura chichainak:

—Aints ainau untsuri iruntrar jiyaaninak maanitan wakerukarai tusar, fiesta kintatikia turachminuitai, —tunaiarmiayi.

Nuwa Jesús kungkutijai ukatramuri

(Mat. 26.6-13; Juan 12.1-8)

³ Jesús Betania yaktanam we, Simónka jeen misanam yuwak pujumiayi. Nu Simónka yaanchuik kuchapruk pujuutiat, nuniangka tsaarun waininayat tuke Kuchapruku Simón inaikiamuyayi. Tura Jesús nuna jeen pujai, nuwa taa muti kaya alabastro tutainum kungkutin engkea itamiayi. Nu kungkutikia nekas akik ayayi. Tura muti taparin intakar, Jesús muuken nu kungkutijai mash ukatramiayi.✠

⁴ Turamtai aints irunu nuna wainkar nu nuwan kajerinak:

—¿Waruka kungkuti timiá akiknasha nangkamisha ajapua? ⁵ Kichik musach takak-masar nu kuik jukir ju kungkutikia sumakminuitai. Tura ju surukrikia, ¿nu kuik jukir kuikiartichu ainau susamka pengkerchaukai? —tunaiarmiayi.

Tura nuwan kajerkar jiyakarmiayi.

⁶ Tinamtai Jesús chicharak:

—Inaisataram. ¿Waruka ju nuwasha kajerarme? Wína aitkara juka nekas pengker aitkarayi. ⁷ Kuikiartichuka tuke atumjai pujuinawai. Atum wakerakrumka ni tuke pengker awajsatnuitrume. Antsu wikia atumjaingkia tukeka pujuschatatjai. ⁸ Ju nuwaka ni wakeramurin mash umiki. Tura asa wi iwiarnatnurun umistas, iwiaaku pujaing wína namangkrun kungkutijai ukatruri. ⁹ Nekasan tajarme: Aints ainau kajinmakiarai tusan, mash nungkanam Yusnum uwemratin chichaman etserinauka ju nuwa turamurinha tuke etserkartinuitai, —Jesús timiayi.

Judas Jesús surukmauri

(Mat. 26.14-16; Luc. 22.3-6)

¹⁰ Nunia Jesús nuiniatiri doce (12) ainamunmaya kichik Judas Iscariote naartin: Jesús anangkan suruktaj tusa, sacerdote juuntri ainaun chichastas werimiayi.

¹¹ Turamtai nu aints ainau warasar: Ayu, ame tame nuka turata. Nu turakminka kuik

✠ 13:37 (Mat. 25.1-13; Luc. 12.36) ✠ 14:3 (Luc. 7.37-38)

akiimiaktatji tiarmiayi. Tu tinamtai Judas: ¿Itiurak Jesús anangkan surukaintaj? tu nintimias pujumiayi.

Jesús Pascua fiestati yuwamuri

(Mat. 26.17-29; Luc. 22.7-23; Juan 13.21-30; 1.Cor. 11.23-26)

¹² Pang pachimrachmau yuwatin fiesta nu kinta atin asamtai, tura uwija maatin asamtai, ni nuiniatiri Jesús iniinak:

—Pascua fiestati yuwatin ¿tuni umismi tusamea wakerame? —tiarmiayi.✠

¹³ Tu iniinam Jesús ni nuiniatiri jimian akatar akupak:

—Juun yaktanam wetaram. Tura nuni jearam, aints muitsan yumin shikik yanas weau wainkatatrume. Turaram nu aints nemarsataram. ¹⁴ Tura ni jeen wayaamtai, nuni atumsha wayaaram, jeentin chicharkuram: Iin nuitamin amin chichaman akupturmak: ¿Wína nuiniatir ainaujai Pascua fiestati yuwatniusha jea tesaamusha tuwaita? turamui titaram. ¹⁵ Takurmin nu jeentin pata yakí amaunum jea tesaamun yanchuk umismaun inakturmastatrume. Nuni ii yuwatin umistaram, —timiayi.

¹⁶ Tamati ni nuiniatiri ayu tusar jiinkiar juun yaktanam jear, Jesús tímia nunisarang wainkarmiayi. Tura asar nuni Pascua fiestati yuwatniun umisarmiayi.

¹⁷ Kiarai Jesús taa ni doce (12) nuiniatiri ainaujai iruntrarmiayi. ¹⁸ Tura nuni yuwinak pujuinai, Jesús chicharak:

—Nekasan tajarme: Kichik aints wijai yuwa juka wína anangkrua surutkatatui, —timiayi.

¹⁹ Tamati nuna antukar wake mesekar nintimrar kichik kichik:

—¿Wiyashitaj? ¿Wiyashitaj? —tiarmiayi.

²⁰ Tu iniinam Jesús ayaak:

—Wi nu tachaunumak tsaniasan yuwaja juwaitai. Juka wína anangkrua surutkatatui.

²¹ Wikia Yus akupkamutiatnak aints asan, aatramua nunisnak jakatniunam wejai. Turayatnak wína anangkrua surutkatnunka nukap wait anentajai. Ju aintska aki-inachuitkungka, wait wajakchamin ayat akiinaw asa, nukap wait wajaktnuitai, —timiayi.

²² Tura yuwinak pujusar, Jesús Yusen maaketai tusa, yurumkan achik puurak:

—Ju yuwataram. Juka wína namangkrua tumawaitai, —timiayi.

²³ Tura piningnasha achik, Yusen ataksha maaketai tusa, ni nuiniatiri ainaun susamiayi. Tura susaram mash amurarmiayi. ²⁴ Amuraramtai Jesús chicharak:

—Juka wína numparua tumawaitai. Aintsun untsurin uwemtikratan numpartatjai. Tura wína numpar numparamtai, yamaram chichaman wi etserkaja nunaka mash umiktatjai. ²⁵ Nekasan tajarme: Wikia ju uva yumirin juni ataksha amurchatattjai. Antsu Yuse pujutirin jean, ataksha nekas yamarman amurtinuitjai, —Jesús timiayi.✠

Pedron: Wína natsantrurtatme tusa ujakmauri

(Mat. 26.30-35; Luc. 22.31-34; Juan 13.36-38)

²⁶ Tura kantan kantamawar umisar, Olivo Muranam wearmiayi. ²⁷ Tura nuni jear Jesús chicharak:

—Ju kashia juwi atum wína mash natsantrurtatrume. Yuse chichame nekas tu aarmawaitai: ‘Uwija wainiun maawartinuitai. Turamtai uwija irunu tupikiartinuitai.’✠

²⁸ Antsu jakan nantakin Galilea nungkanam weatsrumning, wiyá eemkitattjai, —timiayi.✠

²⁹ Tamati Pedro chicharak:

—Mash amin natsantraminamtaisha, wikia pengké natsantrashtatjame, —timiayi.

³⁰ Tamaitiat Jesús ayaak:

—Nekasan tajame: Yamai ju kashia juwi atash jimian shinatsaing wína pachitsam kempatam waitrakum: Nu aintsnaka wikia wainchawaitjai tusam uurtuktatme, —timiayi.

³¹ Tamati Pedro kakar chicharak:

✠ 14:12 (Ex. 12.1-27) ✠ 14:25 (Jer. 31.31) ✠ 14:27 (Zac. 13.7) ✠ 14:28 (Mat. 28.16; Marc 16.7)

—Atsa, amin mantaminamtaisha wikia: Iijai jakami tau asan, amincha pengké nat-santrashtatjame, —timiayi. Pedro tamati chikich nuiniatiri mash nunisarang tiarmiayi.

Jesús arakmau Getsemaní tutainum Yus seamuri

(*Mat. 26.36-46; Luc. 22.39-46*)

³² Nunia numi arakmau Getsemaní tutainum wearmiayi. Tura nuni jear, Jesús ni nuiniatiri ainaun chicharak:

—Juni pujusrum nakarsataram. Turakrumin wikia Apaachirun aujsatasan weajai, —timiayi.

³³ Tura Pedroncha, nunia Santiagoncha, nunia Juannasha ayas juki, arakchichu wear, Jesús wake mesek napchau nintimramiayi. ³⁴ Tura chicharak:

—Timiá napchau nintimran jata nekapeajai. Juni wijai pujusrum kanutsuk asataram, —timiayi.

³⁵ Tura arakchichu we, nungká pinakumar tepes Yusen seak:

—Apaachiru, ame wakerakmek, wi wait wajaktinka tsangkatrukaip. ³⁶ Apaachi, mash tujinkachuitme. Ame wakerakmek wi wait wajaktinka tsangkamrukaip. Turayat wi wakeramurka ahati, antsu ame wakerame nuke ati, —Jesús timiayi.

³⁷ Tura waketki ni nuiniatiri kanú tepeenaun wainkamiayi. Tura Pedron shintartas chicharak:

—Simónka ¿kanamek? ¿Kichik horaksha kanutsuk iwiastatkamarmeka tujintarmek?

³⁸ Tunau nepetukai tusaram, kanutsuk Yus seataram. Atumi nintijai nintimsaram, tunaanaka nepetkatatjai tayatrumek, atumkeka tunauka nepetkashtatrumek, —timiayi.

³⁹ Tura Jesús ataksha we, seamia nunisang Yusen seamiai. ⁴⁰ Nunia waketki, ni nuiniatiri ainau ataksha kari nepetinam, kanú tepeenaun wainkaram, nuka kuraat shintarar: ¿Warintinjik? tinaksha nintimracharmiayi. ⁴¹ Tuminamtai Jesús ataksha we Yusen sea, tura waketki ni nuiniatiri irunun chicharak:

—¿Yamaikia tuke kanurtasrum tura ayamratasrum wakerarmek? Maaketai. Wi Yus akupkamutiatnak aints asamtai, tunaarintin ainamunam wina surutkartin hora yanchuk jeyai. ⁴² Nantaktaram. Wína surutkatnuka yanchuk winitrawai. Nijai ingkiunikmi, —Jesús timiayi.✠

Jesús achikiar jukimuri

(*Mat. 26.47-56; Luc. 22.47-53; Juan 18.2-11*)

⁴³ Jesúska tuke chichaak wajai, Judas ni nuiniatirintiat, Jesús anangka suruktas tarimiayi. Tura aints untsuri nijai wininauka saapin takusar tura numincha takusar winiarmiayi. Nu aints ainauka sacerdote juuntri ainausha, tura Moisésa chichame nuikiartintin ainausha, tura judío juuntri ainausha akupkamu asar winiarmiayi. ⁴⁴ Tura wininamtai Jesúsnum jeainatsaing, Judas nu aints ainaun chicharak:

—Wainkataram. Wijuwaitai tusan mejeastatjai. Turamtai awaapita tusaram achikrum metataram, tura jukitaram, —timiayi. ⁴⁵ Tura taa wári Jesús jeari mejeak:

—Nuikiartinu, winajai, —timiayi. ⁴⁶ Tamati kautkaru ainau Jesús tap achikiar metawarmiayi.

⁴⁷ Tura metawaram Jesús nuiniatiri kichik ni saapirin kuinak, sacerdote apuri inatirin kuwishin met charutkamiayi. ⁴⁸ Turamtai Jesús sacerdote aintsri ainaun chicharak:

—¿Waruka kasa aints achiktasrum winitua nunisrumsha, saapisha tura numisha takusrumsha tarutniurme? ⁴⁹ Wikia kashincha, kashincha Yus seatai juun jeansam atumjai pujusan aints ainaun nuininuyajai. Tura wainiatrum nuningkia achirkachmarume. Tura Yuse chichame wína pachitas aarmawa nu umiktasrum aitkararme, —Jesús timiayi.✠

⁵⁰ Tamati ni nuiniatiri ainau mash Jesús naka ukukiar tupikiakiarmiayi. ⁵¹ Tura natsa ni sekmatirin penumar, Jesúsjai tsanias wajasmiai. Turamtai suntar ainau nu natsanka achikiartas tariarmiayi. ⁵² Tura achinam, ni sekmatirin ajapa ukuki misu tupikiakmiayi.

✠ 14:42 (Hebr. 5.7) ✠ 14:49 (Luc. 19.47)

Sacerdote apuri pujamunam jukimuri

(Mat. 26.57-68; Luc. 22.54-55, 63-71; Juan 18.13-14, 19-24)

⁵³ Nunia Jesúsán sacerdote apuri jeen umaarmiayi. Tura sacerdote juuntri ainausha, tura judío apuri ainausha, tura Moisésa chichame nuikiartin ainausha nuni iruntrarmiayi. ⁵⁴ Turinamtai Pedroscha uku nemaras, sacerdote apuri jeen jeemiayi. Tura jeanmaka waaitsuk wenuknumak waya, aanum Yus seatai jean wainin ainaujai pachinak jiin ayamak pujumiayi.

⁵⁵ Turai sacerdote juuntri ainau judío apuri ainaujai mash iruntrar: Jesús nekas juun tunau turayi tiarat tusar, chichaman tsanumin ainaun eakarmiayi. Tura chicharinak:

—Nu warintimpi tusar nakasmi. Tura nu antukrikia ninu chichamejai maatnuitji, —tinayat aints nuna tiarat tusar wainkartatkamawar wainkacharmiayi. ⁵⁶ Tuminai aints untsuri Jesúsán tsanuinak wait chichaman etserinayat, yapajiasarang yapajiasarang chichainak metekka chichascharmiaiyi. ⁵⁷ Nunia chikich ainau wajakiar tsanuinak:

⁵⁸ —Ju aintsu timiauri iisha antukmaji. Ju chichaak: ‘Yus seatai juun jean aints ainau jeamkarmia nuna yumpungnasha, nunia ataksha chikich jean aintska jeamchamu wainiatnak kempatam kintatik jeamkatatjai’ tau antukmaji, —tiarmiayi. ✠

⁵⁹ Antsu tu tinayat metekka chichakcharmiaiyi.

⁶⁰ Tu chichainamtai, sacerdote apuri japen wajas Jesúsán iniak:

—¿Aimkatatkamam tujintamek? ¿Amin pachitmasar etserturmina nuka warimpita? —timiayi.

⁶¹ Tamaitiat Jesús aimkachmiayi. Tura aimtsuk wajamtai, sacerdote apuri ataksha chicharak:

—¿Nekasmek Mesíasaitam? ¿Nekas pengker aa nuna Uchirinkitam? —tu iniasmiayi.

⁶² Tu iniam Jesús ayaak:

—Ja ai, ame tame nuka nuwaitjai. Aints ayatun Yus akupkamu asan, nekas kakaram aa nuna untsurinini keemsan, nunia nayaimpinmaya yurangmijai winamtai, wínaka waitkatnuitrume, —timiayi.

⁶³ Tamati sacerdote juuntri nuna antuk, kajek wejmakrin japiki jaak:

—Pai ¿warí chicham antuktasrik nakastaj? ⁶⁴ Atumsha Yusen pachis pasé chichaa-muka antukurme. ¿Itiur nintimtarne? —tu iniam mash aiminak:

—Maawarti, —tiarmiayi.

⁶⁵ Tura kichik kichik Jesúsán usukrarmiayi. Tura ni jiin tarachjai jingkiatawar yapiin awatinak:

—Watska ¿yáki aitkara? tusam nekaata, —tiarmiayi. Turinai Yus seatai jean wainin ainausha Jesúsá yapiin awatiarmiayi.

Pedro nu aintsnaka wainchawaitjai timiauri

(Mat. 26.69-75; Luc. 22.56-62; Juan 18.15-18, 25-29)

⁶⁶ Pedroka aanum pujaun nuwa tarimiayi. Nu nuwaka sacerdote apuri inatiri ayayi. ⁶⁷ Tura nusha Pedron jiin ayamak pujaun wainak:

—Amesha Nazarenumia Jesúsjai tsaniasam wekainuyame nuwaapitme, —timiayi.

⁶⁸ Tamaitiat Pedro aimiak:

—Atsa, nu aintsnaka wikia wainchawaitjai, ame tame nunaka nekatsjai, —timiayi. Nunia wenurmanumia jiinkitas weamtai, atash shinimiayi. ⁶⁹ Atash shinamtai, nu nuwasha Pedron ataksha wainak nuni pujuinaun chicharak:

—Juwaapita ni aintsri, —timiayi.

⁷⁰ Tamaitiat Pedro ataksha:

—Atsa, nuchawaitjai, —timiayi. Tamati jumchik arus nuni wajainau ataksha Pedron chicharinak:

—Nekasmeapi aujai amesha wekainuyame. Galileanmaya aints asam, nunia aintsua nunismek chichaame, —tiarmiayi.

⁷¹ Tinamaitiat Pedro kakar chicharak:

✠ 14:58 (Juan 2.19)

—Nangkamrum tarume. Yusjai tajai: Atum nu aints pachisrum chichaawearme nunaka nekatsjai, —waitrak timiayi.

⁷² Tamati ataksha atash shinamtai, Pedro Jesúsá timiaurin nintimramiayi. Jesúsá timiauringkia nuwaitai: “Atash jimiaran shinatsaing, wína pachitsam: Nu aints naka wainchawaitjai tusam, ameka kempatam waitrakum uurtuktatme.” Tura Pedro nu chichaman nintimiar kakar juutmiayi.

15

Pilato pujamunam jukimuri

(*Mat. 27.1-2, 11-14; Luc. 23.1-5; Juan 18.28-38*)

¹ Tura tsawaarai sacerdote juuntri ainau judío juuntri ainaujai tura Moisésa chichame nuikiartin ainaujai tura chikich judío apuri ainaujai chichaman nekaawartas irun-trarmiayi. Tura chichaman najanawar, Jesúsán jingkiawar jukiar Pilato pujamunam jeeniarmiayi. ² Jeeniamtai Pilato Jesúsán chicharak:

—¿Nekasmek judío apurintam? —tu iniam Jesús ayaak:

—Ame turutme nuka nekasam tame, —timiayi.

³ Tamati sacerdote juuntri ainau chichaman untsuri tsanumriarmiayi. ⁴ Tu tsanumi-namtai Pilato ataksha iniak:

—¿Aimtaka nakitamek? ¿Amin chichaman untsuri aujmatramina nuka antatsmek? —timiayi. ⁵ Tamaitiat Jesús aikchamiayi. Tura aitsuk wajamtai Pilato nintimramiayi.

Pilato Jesúsán maawarti tusa tsangkamkamuri

(*Mat. 27.15-31; Luc. 23.13-25; Juan 18.38-19.16*)

⁶ Tura Pascua fiesta jeatak wajasai, romano apuri tuke kichik aints achikmau kárser-num engketun jiiki akupnuyayi. Tura aints ainau: Nu aints jiikim akupkata tu seainamka, jiiki akupnuyayi. ⁷ Nu musachti kichik aints Barrabás naartin chikich aintsjai mesetan najanawar aintsun mau asar, kársernum engkeamu pujuarmiayi. ⁸ Tura asamtai aints untsuri Pilatonam kaunkar chicharinak:

—Ii seakrinkia musachjai metek kichik aints karsernumia jiikim akupnuyame nunismek ataksha ju fiesta kintati turata, —tiarmiayi. ⁹⁻¹⁰ Sacerdote juuntri ainau Jesúsán suwirpiaku jiinak, nangkamiar achikiar itaarun Pilato nekau asa, aints ainaun chicharak:

—Judío apurin jiikin akupkatjai. ¿Nu wakerarmek? —timiayi. ¹¹ Tu tinam sacerdote juuntri irunu aints ainaun kichik kichik weriar akatrar akupinak:

—Barrabásan jiiki akupkati titaram, —tiarmiayi. Tu tinam aints ainau nunisarang tiarmiayi. ¹² Tu chichainamtai, Pilato ataksha chicharak:

—¿Tura Jesús, atum judío apurintai tu wearme nunasha itiurkatjak? —timiayi.

¹³ Tu iniam ataksha kakarar chichainak:

—Numi winangmanum ajinkam maata, —tiarmiayi.

¹⁴ Tu tinamtai Pilato chichaak:

—¿Waruka? ¿Warí tunauna turini? —tu iniam nuna nangkamasarang kakarar untsuminak:

—Numinam ajinkam maata, —tiarmiayi.

¹⁵ Tinamtai aints ainau wína pengker nintimtursarat tusa, Pilato Barrabásan karser-numia jiiki akupkamiayi. Tura suntar ainau Jesúsán katsumkarat tusa, tura numi winangmanum ajinkarti tusa akupkamiayi. [☆]

¹⁶ Suntar ainau akupkamu asar, Jesúsán ni pujutirin jukiarmiayi. Tura chikich suntar ainaun mash untsukarmiayi. ¹⁷ Tura mash kaunkaramtai, apu wejmakrin kapantaku amia nuna antsrarmiayi. Tura tsengkrutin jangkin najatawar tsengkrumtikiarmiayi.

¹⁸ Nunia wishikinak:

—Judío apuriya, pengker pujusta, —Jesúsán tiarmiayi.

☆ 15:15 (Hech. 3.14)

¹⁹ Tura Jesúsá muuken sapapjai awatiarmiayi, nunia usukrarmiayi. Tura wishikrami tusar tikishmatrarmiayi. ²⁰ Tura Jesúsán wishikrar umisar, apu wejmakrin aitkar, ni wejmakrin ataksha antsarmiayi. Tura numi winangmanum maatai tusar jukiarmiayi.

Numi winangmanum maamuri

(*Mat. 27.32-44; Luc. 23.26-43; Juan 19.17-27*)

²¹ Nunia Jesúsán jukiar, jinta weenak, Cirene nungkanmaya aintsun Simón naartinun ajanmaya winaun wainkarmiayi. Nuka Alejandro nunia Rufo apari ayayi. Simón ajanmaya winantai, Jesúsá krusrin nanarsat tusar achikiarmiayi.✠

²² Nunia Jesúsánasha, mura Gólgota tutainum jukiarmiayi. Gólgotaka ii chichamejaingkia muuk ukunch taku tawai. ²³ Tura nuni jear, najaimiashti tusar, amuti vino mirrajai pachimrar amurat tusar Jesúsán susarmiayi. Turamaitiat amurchamiayi.

²⁴⁻²⁵ Tsaa yakí wakantai, nuni numi winangmanum Jesúsán nenawar umisar, suntar ainau nakuruti suerte tutain nakurinak: ¿Yáki iin nepetamak Jesúsá entsatirin jukit? tusar nakurusarmiayi. ²⁶ Tura aints ainau: ¿Waruka maamuita? tu inintrinauka nekaawarat tusar, tatang aarmaun numi winangmanum nujtukarmiayi. Nu aarmauka nuwaitai: “Judío apurintai.” ²⁷ Nunia kasa aintsun jimiaran chikich Jesúsá untsurinini, tura chikitnasha Jesúsá menarininisha numi winangmanum nenaawarmiayi. ²⁸ Nu turunamuri Yuse chichame aarmawa nunisang umikmiayi. Yuse chichame Jesúsán pachis tu aarmawaitai: “Tunau aintsua nunisarang wainkarmiayi.”✠

²⁹ Tura aints ainau nangkaaminak Jesúsán wishikinak, muuken pearar pasé chicharinak:

—Jiisia ¿amesha Yus seatai juun jean yumpungtatjai, tura ataksha kempatam kintati jeamkatatjai tichamkum? ³⁰ Watska, yamaikia numinmaya kuankim uwemrata, —tiarmiayi.✠

³¹ Sacerdote juuntri ainausha, tura Moisésá chichame nuikiartin ainausha wishikinak, mai nuwamtak chicharnainak:

—Chikich ainaun uwemtiknuyayi, antsu ningki uwemratatkama tujintawai. ³² ¿Mesíasashi? ¿Tura Judío apuriyashi? Watska, yamai numinmaya kuankiamtaikia, iisha nu wainkar nekasampita timi, —wishikinak tiarmiayi.

Tura kasasha Jesúsájai jintamusha nunisang timiayi.

Jesúsá jakamuri

(*Mat. 27.45-56; Luc. 23.44-49; Juan 19.28-30; Hebr. 9.1-10.22*)

³³ Tsaa tupin wajasai, mash nungka tee kajintramiayi. Nunia kempatam hora nangkamaramtai, tsaa yantanti ataksha tsantramiayi. ³⁴ Turamtai Jesús kakar untsamak:

—Elí, Elí, lema sabactani, —timiayi. Nuka ii chichamejaingkia: “Yusru, Yusru ¿waruka japruamsha ukurme?” taku timiayi.✠

³⁵ Jesús nuna tamati, aints nuni wajainau nuna antukar:

—Antuktaram, Elíasan untsuawai, —tiarmiayi.

³⁶ Tinantai aints kichik ampuki we, vino churiniun uruchjai chupir, sapapjai iju mukunat tusa aapamiayi. Nuna susa chicharak:

—Turustaram. ¿Elías taa, niin kuaki jukishtimpiash? Nu wainkami, —timiayi.

³⁷ Tinantai Jesús kakar untsamak jakamiayi. ³⁸ Tura jakamtai Yus seatai juun jeanam aparmau netimia nu ningki yakiya tseu jaankamiayi. ³⁹ Jesús kakar untsamak jakamtai, sutara kapitantri Jesúsán jij wajamia nuka:

—Juka nekas Yuse Uchiri ayayi, —timiayi.

⁴⁰ Tura nuwa ainausha arák wajasar, Jesús maamun jiisarmiayi. Nu nuwa irunujai Magdalanmaya Marí, tura Santiago nunia José nukuri Marísha, tura Salomésha wajasarmiayi. ⁴¹ Jesús Galilea nungkanam yaanchuik pujamtai, nu nuwa ainau Jesúsán

nemarsar yaingkiarmiayi. Nunia jiinkiar niin Jerusalénnum nemarsar chikich nuwa irunujai taarmiayi.✠

Jesúsa iwiarsamuri

(*Mat. 27.57-61; Luc. 23.50-56; Juan 19.38-42*)

⁴²⁻⁴³ Kiarai ayamratin kinta jeatak wajasamtai, Arimateanmaya aints, José naartin, judío juuntri chicharin ayat, shamtsuk Pilato jeen waya, Jesúsa namangken iwiarsataj tusa werimiayi. Nuka Yus aints ainaun inarti tusa tuke nakauyayi. ⁴⁴ Tura iniam Pilato chicharak:

—¿Yanchkek jakama? ⁴⁵ —tu iniam kapitán aimiak:

—Ja ai, apuru, yanchuk jakami, —tamati, Jesúsa namangken José jukiti tusa tsangkatkamiayi. ⁴⁶ Turamtai José tarach lino najanamun sumak, Jesúsa namangken numinmaya kuaki tarachjai kangkarmiayi. Tura waa pampa taimunam iwiarsamiayi. Tura iwiaras umis waitiri kaya juun najanamujai epenmiayi. ⁴⁷ Turamtai Magdalanmaya Marí, José nukuri Maríjai ¿tuning iwiarsarat? tusar jiiwajatiarmiayi.

16

Jesúsa nantakmiauri

(*Mat. 28.1-10; Luc. 24.1-12; Juan 20.1-10*)

¹ Ayamtai kinta nangkamaramtai, Magdalanmaya Marí, tura Santiago nukuri Marísha, tura Salomésha, Jesúsa namangken yakaarami tusar kungkutin sumakarmiayi. ² Tura tumingti tsaá yama jiinai, iwiarsamunam wearmiayi. ³ Tura weenak chichainak:

—¿Iwiarsamu epenmiaun kaya juun ututkamusha yajaing uraktaij? —tunaiyarmiayi.

⁴ Tura nuni jear iwiarsamun jiisar, kaya juunjai waan epeniarmia nuna urankaun wainkarmiayi. ⁵ Tura iwiarsamunam wayaawar, ni wajainamunam untsurinini natsa entsatin pújun sarman entsar pujaun wainkarmiayi. Tura wainkar shamkarmiayi.

⁶ Shaminamtai nusha chicharak:

—Shamrukairap. Nazarenumia Jesús numi winangmanum maawarma nu earme. Nuka jakayat nantakni. Juningkia tepatsui. Ni iwiarsamuri jiistaram. ⁷ Tura werum ni nuiniatiri ainau jiisrum: ‘Atum weatsrumning, niyá eemak Galilea nungkanam weawai tusaram etserkataram. Tura atum weriram, Jesús atumin turammia nunisrumek nuni wainkatatrume, tura Pedroscha ujatruktaram,’ —Yuse awemamuri timiayi.✠

⁸ Tamati nuwa ainau nuna antukar shaminak kurainak, iwiarsamunmaya jiinkiar ampukiar waketkiarmiayi. Tura timiá shamkaru asar, jinta wekajinaun wainkarsha, pengké kichkisha ujakcharmiayi.

Jesús Magdalanmaya Maríjai wainaikiamuri

(*Juan 20.11-18*)

⁹ Jesús tumingti kashik jaka nantaki, Magdalanmaya Marín nuná eemak wantintukamiayi. Nu Marínaka yaanchuik iwianchrin siete (7) jiirkimiayi. ¹⁰ Jesús wantintukam, Marísha nuwik Jesúsjai tsaniasar wekaasarmia nuna jiistas wemiayi. Tura wake mesekar juutu pujuinaun wainak ni wainkamurin mash ujakmiayi. ¹¹ Tura: “Jesús iwiaakuitai, wisha wainkajai” tu ujaamaitiat, nekasampita pengké ticharmiayi.

Ni nemarnurin jimiaran Jesús wantintukmauri

(*Luc. 24.13-35*)

¹² Nunia jimiar aints tsaniasar wekainai, Jesús wantinkamiayi. ¹³ Turamtai nisha Jesús wainkaru asar, waketkiar ni nuiniatiri ainaun ujainamaitiat, nusha nunisarang nekasampita ticharmiayi.

Jesús ni nuiniatiri ainaun akatramuri

(*Mat. 28.16-20; Luc. 24.36-49; Juan 20.19-23*)

✠ 15:41 (Luc. 8.2-3) ✠ 16:7 (Mat. 26.32; Marc. 14.28)

¹⁴Jumchik arus, ni nuiniatiri once (11) misanam yuwinak pujuinai, Jesús wantintukmi-ayi, tura chikich ainau niin jaka nantaknun wainkarmia nuna timiaurin nekaschawaitai tinu asaramtai chicharak:

—¿Waruka nekasampi jakamunmaya nantaki turutsurme? ¿Tura warukaya timiá nintimurtsurme? —Jesús timiayi. ¹⁵Tura akatak:

—Mash nungkanam wetaram. Tura werum Yusnum uwemratin chicham mash aints ainau ujaktaram.✠

¹⁶Aints nu uwemratin chichaman nekasampita tinauka mainiar uwemrartin ainawai. Antsu nu uwemratin chichaman nekaschawapita tinauka tuke wait wajakartin ainawai.

¹⁷Tura wína nekasampita turutinauka Yuse kakarmarijai inakmamuncha turuwartinuitai. Tura wi akupkamu asar, wína naarun pachisar, iwianch ainaun jikiar akupkartinuitai. Tura chikich aintsu chichamen nekachu ainayat, niish niish chichasartinuitai.

¹⁸Tura aneachmau napin achikiariat jakachartinuitai. Tura amuti jatain amurarsha jakachartinuitai. Nunia jau ainaun ni uwejejai antingkiaram tsaarartinuitai, —Jesús timiayi.

Jesús nayaimpinam wakamuri

(Luc. 24.50-53)

¹⁹Nunia ni nuiniatiri ainaun aujas umisamtai, Yus ii Apuri Jesúsán nayaimpinam iwiakmiayi. Tura iwiakam ni Apaachiri Yuse untsurinini keemsamiayi.✠ ²⁰Turamtai ni nuiniatiri ainau waketkiar, mash nungkanam Yuse chichamen etserkarmiayi. Tura asaramtai aints ainau Yuse chichamen nekasaintai tiarti tusa, ii Apurisha wainchatai takatnasha turuwarti tusa takamtiksamiayi. Maaketai.

✠ 16:15 (Mat. 28.19; Hech. 1.8) ✠ 16:19 (Hech. 1.9-11)

Yamaram Chicham Lucasa Aarmauri

Lucas Teófilon chichaman akuptukmauri

¹⁻³ Wína aneetir Teófilo: Aints ainau Jesúsán wainkarmia nuka iin nuitamrau asar, tura chikich aints untsuri ujakarmau asar: Miatrusnak aartaj tiarmiayi. Tura asaramtai wisha nunisnak nu nangkamkenia nangkaman, Jesúsán pachisan mash nekaan, amincha miatrusnak aatratasan nintimtinuyajme. ⁴ Tura asan nekas chichaman amincha naitarmia nuna tenap nekamtikiatasan aatjame.✠

Imiakratin Juan akiinatniun pachis etserkamuri

⁵ Yaanchuik Herodes Judea nungkanam apu pujai, nu nungkanam sacerdote Zacarías naartin pujuyayi. Nuka Abías ainaujai Yus seatai juun jeanam iruntrar takakmin armiayi. Tura Zacarías nuwari Elisabet naartinuyayi. Nuka yaanchuik sacerdote juuntri Aarón naartinu weari ayayi. ⁶ Zacaríascha, tura Elisabetcha mai nekasar Yusen pengker umirin armiayi. Tura Yus umirkatin chichaman mash miatrusarang umirin armiayi. Tura asaramtai aints kichkisha niin pachisarka paseeka chicharchau armiayi. ⁷ Tura Elisabet kaa asa uchinka jurechuyayi. Tura aishrijai mai juuntach wajakiarmiayi.

⁸⁻⁹ Tura sacerdote Zacaríasjai takau ainau takakmasartin jeau asamtai, Zacaríascha chikich sacerdote ainaujai nuni jear, Zacarías Yuse jeen waya kungkutin keemakat tusar akupkarmiayi. ¹⁰ Turinamtai Zacarías Yus seatai juun jeanam ningki waya, nuni kungkutin keemakamtai, aints mash aanum wajainau Yusen searmiayi. ¹¹ Tura Yusen seainamtai, Zacarías kungkutin keemak wajai, kungkuti keemakanum untsurinini Yuse awemamuri aneachmau wantintukmiayi. ¹² Tura wantintukam Zacaríascha nuna wainak nukap shamkamiayi. ¹³ Turamtai Yuse awemamuri chicharak:

—Zacarías shamrukaip. Yuska ami seamurmin anturtamkayi. Nuwaram Elisabet uchin jurertatui. Turamtai nu uchikia Juan inaikiatatme. ¹⁴⁻¹⁵ Ami uchiram akiinatnua nuka Yusen miatrusang umirkatin asa, chikich ainaunka nangkakatnuitai. Tura ni akiinamtai, ame nekasam nukap warastinuitme. Turamtai aints ainau untsuri warasartinuitai. Ami uchiram vínoncha, tura amuti kariaunasha amurchatnuitai. Tura ni akiintsang, Yuse Wakaningkia ni nintin engkemtuatnuitai. ¹⁶ Tura asamtai ni tsakar Yuse chichamen etsermatai, Israel ainau untsuri ni Yusri wakeramurin ataksha umirkartinuitai. ¹⁷ Yaanchuik Yuse chichame etserin Elías naartinu nintin Yuse Wakani engkemtuamu asa, Yuse kakarmarijai aints ainaun Yuse chichamen ujakmia nunisang ami uchiram ni Apuri taatsang, Yuse chichamenka etserkatnuitai. Tura juun ainau ni uchirijai pengker nintimtinisar pujusarat tusa, tura Yuse chichamen umirtan nakitin ainausha Yusen miatrusarang umirkarat tusa, tura aints ainau ni nintin iwiarar, ni Apuri tatintrin nakasarat tusa, Yuse chichamen etserkatnuitai, —Yuse awemamuri timiayi.✠

¹⁸ Tamati Zacarías iniak:

—Wisha juuntach asan, nuwarsha juuntach asamtai ¿ame tame nunaka nekasampi turunatatua itiur titajak? —timiayi.

¹⁹ Tu iniam Yuse awemamuri ayaak:

—Wikia Gabrielaitjai. Yuse inatirinjai. Tura asan wína akuptukamtai, wikia pengke chichaman ami uchiram akiinatniun pachisan amin ujakatasan tarijme. ²⁰ Tura wi taja nuka nekasampita turutchau asam, ami uchiram akiintsang chichachu atatme. Tura uchiram akiinamtai, ataksha chichaktatme. Ni akiinatin kinta jeamtai, wi taja nunaka Yuska miatrusang umiktinuitai, —timiayi.✠

²¹ Tu chichaamtai aints ainau aanum nakainak wajainau: ¿Waruka taatsua? tu nintimrarmiayi. ²² Tu nintimrar wajainamtai, Zacarías jiinki, aints ainaun ujakatkama

✠ 1:4 (Hech. 1.1-2) ✠ 1:17 (Mal. 4.5-6) ✠ 1:20 (Dan. 9.21; Hebr. 1.14)

yumatkamiayi. Tura chichakchamin nekapeak aya uwijmiarmiayi. Turamtai aints ainau nintimrar: “Yuse jeen wajamtai ¿warintsuk wantintuka?” tiarmiayi.

²³ Tura Yuse jeen takakmastin kinta amukamtai, Zacaríaska ni jeen waketkiymiayi. ²⁴ Tura waketkiamtai jumchik arus ni nuwari Elisabetka japrukmiayi. Tura japruk cinco (5) nantu jeanmayangka jiintsuk pujumiayi. ²⁵ Tura jeanam pujus nintimias: “Yamaikia aints ainau: Juka uchin jurechuitai turutiarai tusa Yuska aitkarayi,” timiayi.

Jesús akiinatin pachisar etserkamu

²⁶ Seis (6) nantu nangkamaramtai, Yus ni awemamurin Gabriel naartiniun Galilea nungkanam Nazaret yaktanam akupkamiayi. ²⁷ Nu yaktanmaka nawan aintsjai tumichu Marí naartin pujuyayi. Nu nawannaka aints José naartin: Wi nuwatkamjinam tusa chichas ukukmiayi. Joséka apu Davidta weari ayayi.✠

²⁸ Tura Yuse awemamuri Marí pujamunam waya chicharak:
—María, Yuse aneetiriya ¿pujamek? Apu Yus amincha pengker nintimturmau asamtai winitjame. Yuska amin chikich nuwa ainaun nangkamasang timiá pengker awajtamui, —timiayi.

²⁹ Tamati Marísha Yuse awemamurin wainak: ¿Warukang turuta? tusa nintimramiayi. ³⁰ Turamtai Yuse awemamuri chicharak:

—María shamkaip. Yus aminka pengker nintimturmawai. ³¹ Antukta. Ame japruk-tatme. Tura japrukam uchi jurertatme. Tura jureram nu uchikia Jesús inaikiatme.✠

³²⁻³³ Yus yakí puja nuka nuna pachis: Wina uchiruitai titin asamtai, chikich aints ain-aun nangkamasang pengker atinuitai. Tura Yuska yaanchuik atumi juuntrin Davidtan apu ati tusa, pengker awajsamia nunisang ami uchirmincha juun Apu ati tusa pengker awajsatnuitai. Tura Israel ainautirmin tuke inarti timiau asa, ni aintsri inartinka tuke nangkankashtinuitai, —timiayi.✠

³⁴ Tamati nuna antuk Marí chicharak:
—Wikia aintsjai tsanirmichu asan ¿itiur uchincha jurertajak? —tu iniasmiayi.

³⁵ Tu iniam Yuse awemamuri ayaak:
—Yuse Wakani tarutmitatui. Tura yurangmia nunisang Yuse kakarmarijai amin tarutmiamtai japruktatme. Tura asamtai uchi akiinatata nuka nekas Yusnau asamtai Yuse Uchirintai tiartinuitai. ³⁶⁻³⁷ Yuska pengké tujinchau asamtai, ami kana kaim Elisabetcha juunchitiat japruki. Aints ainau niin pachisar: Uchinka jurerchatnuitai tinamaitiat, ni japrukmaurinkia seis nantu awai, —timiayi.

³⁸ Tamati Marí chicharak:
—Ayu, wikia Yuse inatirinjai. Ame wína turutme nunisang Yuse wakeramuri ati —timiayi.

Tamati Yuse awemamuri niin ukukmiayi.✠

Marí Elisabetnum irasmauri

³⁹⁻⁴⁰ Jumchik arus, Marí Elisabetan jiistaj tusa, Judea nungka murarin wári wemiayi. Tura Zacarías pujamunam waya, Elisabetan: ¿Pujamek? timiayi. ⁴¹ Tamati Elisabet nuna antamtai, uchi ampujnum engketu muchitkamiayi. Turamtai Yuse Wakani Elisabeta nintin piatkamiayi. ⁴² Tura nintin piatkamu asa, Marí japrukmauri nekaa Elisabet kakar chicharak:

—Yus chikich nuwa ainaun nuna nangkamasang aminak timiá pengker awajtamsau asa, ami uchiram akiinatata nunasha nekas pengker awajsatnuitai. ⁴³ Kairu, wikia mianchau aisha, wína Uwemtikrurtinu nukuri ayatmesha winasha jiirsatasmesha tarut-niume. ⁴⁴ Ame wína aujtakmin, uchi nuna antuk waraak ampujrunia muchitkayi. ⁴⁵ Apu Yus amin turamia nu nekasampi umiktatua tinu asakmin, Yus aminka waramtikramsata-tatui, —Elisabet timiayi.

⁴⁶ Tama Marí chicharak:
“Wikia tuke nintirjai

Yuska timiá juuntapita tajai.

⁴⁷ Tura Yuska wína Uwemtikrurtin asamtai, nukap waraajai.

⁴⁸⁻⁴⁹ Wikia ni inatiri mianchau aing,

Yus timiá juun aa nuka

ni wakeramurin umiktas
winaka pengker awajtusi.

Tura asamtai yamai nangkamasang

mash nungkanmaya ainau

wina pachitsar:

Yuska nekas pengker awajsayi

tuke turutiartinitai. Yuse naarin pachisan

nekas pengkerapita tajai.

⁵⁰ Yuska niin umirkartas wakerin ainaunka
tuke inaitsuk wait anentratnuitai.

⁵¹ Nuka timiá kakaram asa,
chikich ainau tujintina nunasha
ningki turamiayi.

Antsu ningki nintimsar:

Wikia miajuitjai tumaminaunka
nepetkamiayi.

⁵² Nunia inakratin ainauncha
nepetkamiayi.

Tura mianchau ainau

inakratin arti tusa

pengker awajsamiayi.

⁵³ Yuuminak pujuinauncha
yuumamurin nukap susamiayi.

Antsu kuikiartin ainaunka
aintsangsha pujusarti tusa inaisamiayi.✠

⁵⁴⁻⁵⁵ Yaanchuikia ii juuntri ainauncha,
tura Abrahamnasha, tura ni weari ainauncha
nunaka wi turatatjai timia nunisang

Israel ainautin Yuse inatiri asakrin,

tuke inaitamsuk wait anentramak yainmakaruitji,” Marí timiayi.

⁵⁶ Tura Marí kía Elisabetjai kempatam nantun pujus, nuniangka ni jeen waketkimiayi.

Imiakratin Juanku akiinamuri

⁵⁷ Nunia ni jurertin kinta jeamtai, Elisabet uchin aishmangkun jurermiayi. ⁵⁸ Tura Yus Elisabetan wait anentak uchin susau asamtai, ni weari ainausha, tura ni irutramu ainausha nuna nekaawar, níjai iruntrar warasarmiayi. ⁵⁹ Uchi akiinamuri ocho kinta nangkamaramtai, nu kinta tuke ni nuwapchirin charuktin kinta asamtai, aints ainau uchi jistai tusar, tura naari inaikiami tusar, Zacarías jeen kaunkarmiayi. Tura asar ni aparinak Zacaríasan inaikiartas wakeriarmiayi. ⁶⁰ Tura wainiat ni nukuri aints ainaun chicharak:

—Atsa, ni naaringkia Juan atatui, —timiayi.

⁶¹ Tamati iniinak:

—¿Warukaya Juan ati tame? Ami wearam nu naartinka kichkisha atsawai, —tiarmiayi.

⁶² Tura Zacarías chichakchamin asamtai, aints irunu aya uwejejai uchin inakmasar: ¿Uchi warí inaikiatasmea wakerame? tusar ni aparin iniasarmiayi. ⁶³ Tu iniinam uchi aparí uwijmiak: Tatang aatai tepaun nu surustaram tusa, aya uwejejai inakmasmiayi. Tura susam: Uchi naaringkia Juankuitai, tu aarmiayi. Tu aaramtai nuna wainkar: ¿Warukaya uchincha tuusha inaiyawa? tu nintimrarmiayi. ⁶⁴ Tinamtai Zacaríaska chichachu ayat nuniangka chichakmiayi. Tura:

✠ 1:53 (Sal. 113.5-8)

—Yuska nekas pengkerapita, —timiayi. ⁶⁵ Tamati nijai irutraru ainauka nuna wainkar mash shamkarmiayi. Tura Judea nungka murarinia ainau mash Zacarías turunamurin pachisar etseriarmiayi. ⁶⁶ Tinantai nu etsermaun antukar, nukap nintimrar mai nuwamtak iniininak:

—¿Nu uchisha nampuarsha warukuk ati? —tunaiarmiayi. Yus nekas uchin pengker awajsau asantai tu nintimrarmiayi.

Zacarías kantari

⁶⁷ Nuniangka Zacarías, Yuse Wakani piatkamu asa, tura Yus tita timiau asa chichaak:

⁶⁸ “Israel ainauti
iinu Apuri Yuska maaketai tiarmi.
Ni uchiri ainiaji.

Tura iin uwemtikramrartas tarutramiarji.

⁶⁹ Ii yaanchuik juuntri David
Yuse inatiri asantai,
ni weari ainautin
Yus iin Uwemtikramratin nekas kakaram aa nuna akupturmakji.

⁷⁰ Yaanchuik Yuse chichame etserin
nekas pengker armia nu
Yuse wakeramurin juna pachisar nekamtikramawarmiaji.

⁷¹ Ii nemase ainauncha,
tura iin kajertaminak pujuinauncha nepetak uwemtikramratnuitji.

⁷² Yuska yaanchuik
ii juuntri ainaun chicharak:
‘Wikia atumin tuke wait anentratnuitjarme,
tura nekasan atumin pengker awajsatnuitjarme,
timiaja nunaka pengké inaitsuk umiktinuitjai,’ timiayi.

⁷³⁻⁷⁵ Ii yaanchuik juuntrin Abrahaman Yuska chicharak:
‘Wikia nekasan tajame:
Ami wearam ainau
nemasen nepetkan atumniaka uwemtikratnuitjarme.
Wi turantai atumka iwiaaku pujusrum,
shamtsuk pengké tunaarinchau
wínaka tuke miatrusrumek umirtuktinuitrume,’ timiayi.
Iisha Abrahamana weari asakrin,
Yus niin tímia nunaka
iin pachitmas timiayi.

⁷⁶ Tura uchiru amincha tajame:
Yus nekas yakí puja nuka
aminka: Wína chichamur etsernuitme turamtinuitai. Tura Apu tatintri iwarata tusa,
ame eemkir akupkamuitme.✠

⁷⁷ Tura Israel ainau
Yuse chichame ujaakum:
Atumi tunaari tsangkuramu asaram uwemramnawaitrume titinuitme.

⁷⁸⁻⁷⁹ Aints ainautikia jakatin asar,
teenam pujakur tsawaarti tusar nakaji nunisrik ii Apuri tatintri nakaji.
Tura asakrin ii Yusri timiá wait anentramau asa, tsaa jiinua nunisang wantinturmak
iincha uwemtikramratnuitji.
Tura angkan tuke pengker nintimsaram pujustaram tusa nintimtikramratnuitji,” tu
Zacarías timiayi.✠

⁸⁰ Turantai uchisha Yusen nintimki tsakarmiayi. Tura Israel ainaun chicharkatin
kinta jeatsaing, aints atsamunam pujuyayi.

2

Jesúsa akiinamuri
(*Mat. 1.18-25*)

¹ Juan akiinamia nu musachti romano juun apuri Augusto naartin mash nungka ainamunam aints ainau naarin papinum aatrarti tusa, chichaman akupkamiayi. ² Nu nekapmartinnaka yaanchuik turushtain, yamai turuwarti tusa inamramiayi. Tura Siria nungkanam apu Cirenio pujai turuwarmiayi. ³ Tura juun apu akupkamu asar, aints ainau mash ni weari yaanchuik puju armia nuni ni naarin aamtikrartas wearmiayi.

⁴ Tura asaramtai Josésha Galilea nungkanam pujau, Nazaret yaktanmaya jiinki, Judea nungkanam yakat Belénnum wemiayi. Joséka apu Davidta weari asa, David akiinamu yaktanam, Belénnum weak, Marín ayas, ⁵ ni naarin aatmamrartas wearmiayi. Tura Marí Joséjai tumachiat, Yuse kakarmarijai japruku asa jamtinuyayi. ⁶ Tura nuni Belénnum pujuinai, Marí jurertin kinta jeamiayi. ⁷ Turamtai uchin eemkaurin jurermiayi. Tura tarachjai pempearmiayi. Antsu iraakur kanutai jea angkanchau asamtai, uchin tangku ayurtainum tuksamiayi.

Yuse awemamuri wantinkamuri

⁸ Marí uchin jererai, Belén yaktanam arakchichu uwija wainin kashi tangkurin waininak aanum pujuarmiayi. ⁹ Tura aanum pujuinai, Yuse awemamuri nayaimpinmaya wantinmatai, uwija wainin pujuinamunam Yuse paaniuri tsantramiayi. Turamtai nuna wainkar nukap shamkarmiayi. ¹⁰ Tura shaminamtai Yuse awemamuri chicharak:

“Shamrukairap. Antuktaram. Aints ainau mash nukap warasarat tusan, nekas pengker chichaman ujaktasan winitjarne. ¹¹ Yaanchuik apu David akiinamia nu yaktanam yamai kashia juwi atumin Uwemtikramratin akiinturmarume. Nuka atumi Apuri Mesíasaitai. ¹² Tura asamtai atum werum yaktanam jearam, uchi tangku ayurtainum tarachjai pempearmau tepau wainkatatrume. Tura wainkaram nekasrum: Juwaapita titatrume,” Yuse awemamuri timiayi.

¹³ Nu tamaujai metek nayaimpinmaya Yuse awemamuri untsuri kaunkarmiayi. Tura mash iruntrar Yus juuntaitai tusar chichainak:

¹⁴ “Yus nayaimpinam puja nuka nekas kakarmaitai. Tura mash nungkanam pujuin-aun Yuska pengker awajsatas wakerau asamtai, nekasar pengker nintimsar angkan pujusarti,” tiarmiayi.

¹⁵ Tura Yuse awemamuri ainau nayaimpinam waketkiaramtai, uwija wainin mai nuwamtak chicharnainak:

—Watska, Belénnum weartai. Tura chichaman Apu Yus iin nekamtikramaji nu nekaatai, —tiarmiayi.

¹⁶ Nuna tiar wári yaktanam wear, nuni eakar Maríncha, tura Joséncha pujaun wainkarmiayi, tura uchincha tangku ayurtainum tepaun wainkarmiayi. ¹⁷ Tura uchin wainkaru asar, Yuse awemamuri uchin pachis tímia nuna mash etserkarmiayi. ¹⁸ Etserkaramtai uwija wainu timiaurin antukaruka mash nintimrarmiayi. ¹⁹ Tura Maríka uwija wainu timiaurin antuku asa, nintijai kajinmarchamin nintimiayi. ²⁰ Tura uwija wainin ainau uwija matsatmaunum waketkiar, Yuse awemamuri uchin pachis tímia nunisarang wainkaru asar, ni antukmaurinha tura ni wainkamurinha nintimsar: “Yuska nekas juuntapita,” tiarmiayi.

Jesús Yuse jeen itamuri

²¹ Uchi akiinamuri ocho (8) kinta nangkamaramtai, nuwapchirin charutkarmiayi. Tura Marí japratsaing, Yuse awemamuri tu inaikiataram, tinu asamtai, uchin Jesúsán inaikarmiayi.✠

²²⁻²³ Moisés yaanchuik chichaman akupak: Uchi eemkauri tuke Yusnau atinuitai, tu aarmiayi. Nunia nuwa uchin jureru cuarenta (40) kinta nangkamachmataikia Yuse jeen wayaachmin amiayi. Nu kinta nangkamaramtai, Marí ni aishrijai Yuse chichame

✠ 2:21 (Lev. 12.3; Mat. 1.25; Luc. 1.31)

aarmawa nunisarang Jerusalénnum Yus seatai juun jeansam Jesúsana itaarmiayi. ²⁴ Tura Moisés yaanchuik chichaman akupak: Nuwa aishmangkun jurerka, yampitsan jimbaran Yusen susaarti, tura yampits atsamtaikia yapangman jimbaran susaarti, tu aarmau asamtai miatrusarang umikiarmiayi.✠

²⁵⁻²⁷ Nu kintati Marí ni aishrijai uchin itaar: Moisés aarmia nunisrik umiktai tusar, Yus seatai juun jeansam wayaawarmiayi. Tura wayaawaramtai, nekas pengke aints Simeón naartin, Yuse umirkau Jerusalénnum pujú asa, Yuse Wakani: Yus seatai juun jeansam weta timiau asa nuni wemiayi. Nuka Yus Israel ainaun uwemtikartinun nakauiayi. Tura Yuse Wakani ni nintin engkemtuamu asa: Apu Yus Mesíasana akupkatata nuka waintsukka jakashtatme tusa, yaanchuik nekamtikiamu asa, nu kintati Yus seatai juun jeansam wayaamiayi. ²⁸ Tura waya uchin wainak juki minakas Yusen maaketai tusa seak:

²⁹ —Apuru, yamaikia jaaknasha nekasan pengker nintimsan jakatatjai. Ame turutmiame nuka miatrusmek umikume.

³⁰⁻³¹ Mash nungkanmaya ainaun uwemtikratnunka yamaikia nekasan wína jiruujai wainkajai.

³² Chikich nungkanmaya ainau teenam pujuinau asar, paaniunam pujusarti tusa ju uchia uwemtikratnuitai. Tura Israel ainautincha nekas pengker awajtamsatnuitji. Turatin asamtai ju uchinka wainkau asan, yamaikia jaaknasha pengker nintimsan jakatatjai, —timiayi.

³³ Simeón uchin pachis tu chichaamtai, Josésha tura Jesúsana nukurisha nuna antukar nukap nintimrarmiayi. ³⁴ Tura uchin chichas umis: Atumnasha Yus yainmakarti timiayi. Nunia Marín chicharak:

—Nintimrata, uchiram Yuse kakarmarijai wainchati takatan turamtai, ³⁵ Israel ain-
ausha untsuri niin nakitrartinuitai. Antsu ju uchi pengker nintimtusar pujuinautinka Yuska pengker awajtamsatnuitji. Uchirmin nakitinamtai, aints ainau kichik kichik itiur nintiminawa nuka paan nekaatnuitme. Tura nangkijai ijumua nunismek nintim najamrutmitnuitai, —tu ujak Simeón Marín ukukmiayi.

³⁶⁻³⁷ Nunia nuwa juuntach ochenta y cuatro (84) musachrintin, Yusen pachis aints ainaun ujaya nuka, Ana naartin nuni pujuyayi. Nu nuwaka Fanuéla nawantri ayayi, tura Jacobo uchiri Aser naartinu wearí ayayi. Nuka yamai tsakaru aintsun ninumak, siete (7) musach nijai tsanias pujus wajemamiayi. Tura wajema pujus, Yus seatai juun jeansam tsawaisha, tura kashisha tuke jiintsuk Yusen seak pujuyayi. Tura yurumkanka yutsuk ijiarma pujus, Yusen tuke seayayi. ³⁸ Tura Ana tuke Yuse jeen pujusu asa, Jesúsana wainak, Yusen maaketai timiayi. Tura Jerusalénnumia ainaun Yus uwemtikrarti tusar nakainaun nu uchin pachis: “Nekasar ii ainautinka Uwemtikramratin tatatui tusar nakaji nuka nuwaitai,” tusa chichasmiayi.

³⁹ Tura Yus umirkatin chichaman miatrusarang umirkau asar, Josésha tura Marísha uchirijai Galilea nungkanam ni pujutirin Nazaret yaktanam waketkiarmiayi.✠

⁴⁰ Tura nuni pujuinai, Yus Jesúsana pengker awajmau asa tsakaki wemiayi. Tura kakaram wajaki, Jesús nekatnasha pengker nekaki tsakamiayi.

Jesús Yuse jeen wemaui

⁴¹ Musachjai metek Pascua fiesta jeatak wajamtai, José Jesúsana nukurijai Jerusalénnum weu armiayi. ⁴² Tura Yus tuke turataram tusa aamtikramu asamtai, Jesús doce (12) musach aun ayasar wearmiayi.✠

⁴³ Tura nuni jear, fiestan inangkarartas pujusar, fiesta nangkamaramtai, ni nukuri Joséjai waketinai, Jesúska waintsachmak Jerusalénnum juwakmiayi. ⁴⁴ Antsu José tura Marísha: “Eemkar weenamunam wechayash,” tu nintimsar, Jesúsana eatsuk kichik kinta wekaasarmiayi. Tura junta weenak ni wearí ainamunmasha eainaksha, tura ni waintairi ainamunam eainaksha, ⁴⁵ wainkartatkamawar wainkacharmiayi. Tura Jerusalénnum eakmi tusar ataksha waketrukiarmiayi.

✠ 2:24 (Lev. 12.6-8) ✠ 2:39 (Mat. 2.23) ✠ 2:42 (Ex. 12.1-27; Lev. 23.5-6)

⁴⁶ Tura kampakam kinta waintsuk waintsuk Yus seatai juun jeans wayaawar, nuni Moisésa chichame nuikiartin ainau chichamen antuk, tura niisha inintrak nuni pachinak pujaun Jesús wainkarmiayi. ⁴⁷ Tura Jesús chichamen anturkarmia nuka mash: “Nekasampi nekawa, tura aiantan cha nekas pengkerapi aimua,” tu nintimsarmiayi. ⁴⁸ Tuminam tai José Maríjai Jesús tuma pujaun wainkar, nusha nunisarang nukap nintimrarmiayi. Tura nukuri chicharak:

—Uchirua ¿warukaya juwakmame? Iisha aparmijai wake mesekar mengkakakmin eaknij awajame, —timiayi. ⁴⁹ Tama Jesús chicharak:

—¿Waruka winasha eatrume? ¿Wikia Apaachirnau turatin aja nuka nekatsrumek? —timiayi.

⁵⁰ Tamaitiat ¿warukakung taj? tusar pengké nekaacharmiayi.

⁵¹⁻⁵² Nunia Jesús ni nukurijai tura Joséjai Nazaretnum waketkiarmiayi. Tura ni jeen jear, Jesús Josécha, tura ni nukurincha tuke umirnuyayi. Tura Jesús tsakaki wemiayi, tura nekaki tsakamiayi. Turam tai Yuscha Jesús pengker nintimtimiayi. Tura aints ainausha niin pengker nintimtiarmiayi. Tura Marí Jesús Jerusalénnum wekaasamunka mash kajinmatsuk ni nintin ukusmiayi.

3

Imiakratin Juanku etserkamuri

(*Mat. 3.1-12; Marc. 1.1-8; Juan 1.19-28*)

¹ Juun apu Tiberio quince (15) musach romano apuri pujam tai, Judea nungkanam Poncio Pilato apu pujuyayi. Tura Galilea nungkanam Herodes apu pujuyayi. Tura yachí Felipe Iturea nungkanam, tura Traconite nungkanmasha apu pujam tai, Abilinia nungka apuri Lisania naartin pujuyayi. ² Tura nu musachti Anás Caifásjai sacerdote apuri pujuarmiayi. Nu musachti Zacarías uchiri Juan aints atsamunam ningki pujam tai Yus nijai chichasmiayi. ³ Tura Yus akupkamu asa, Juan Jordán entsa yantamen yakat amaunum wekaas, tsupias pujuinaun chicharak: “Atumka: Yus wina tunaarun sakturat tusaram, atumi pasé nintimtai ri yapajiam maitiam,” timiayi. ✨

⁴ Yaanchuik Juan akiintsang, Yuse chichame etserin Isaías naartin Juankun pachis aarmia nunaka miatrusang umikmiayi. Nu aarmauka nuwaitai.

“Numi atsamunam aints taa kakar chichaak: Apu wekaasatniun jintan tupin iwiarina nunisrumek atumi ninti iwiarataram. ⁵ Jinta wake amatisha, nungkan yaruakar pakamina nunisrumek atumi nintisha iwiarataram. Tura mura ainauncha yumpuarar pakamina nunisrumek turataram. Tura jinta tuniaru ainauncha tupin ati tusar, iwiarina nunisrumek turataram. Tura jinta japaku amataisha paka ati tusar, iwiarina nunisrumek atumi nintisha iwiarataram. ⁶ Tura asakrumin mash nungkanmaya ainautirmin Yus atumin uwemtikramratnun akupturmaktata nu wainkatnuitrume.” Yaanchuik Isaías Juankun pachis tu aarmiayi. ✨

⁷ Tura Juan aints ainaun imiaam tai, aints untsuri pachitsuk: Winasha imiatti tusar taarmia nuna Juan chicharak: “Atumka napia tumau pasé ayatrume ¿yaachia atumin maairam uwemratatrume turamiarume? Atumka nangkamrum: Wisha mainka uwemrainjapi, tura Yuska winaka wait wajaktinaka suruschatnuapita ¿tu nintimsarmek pujaram? ✨

⁸ “Atumka uwemratasrum wakerakrumka, nekasrum atumi pasé nintimtairingkia yapajiataram. Atumka nangkamrum: Iikia Abraham a weari asar, Yuse aintsrinji tiirap. Antsu wikia atumin tajarme: Yuska ningki wakerak ju kaya tepa juna juki, juka Abraham a weari arti tusa, ningki wakerakka najanamnawaitai. ⁹ Atumka numi nerechua nunisketrume. Tura aints jachan juki, numi nerechun aják nuna kanawen charuk jinum epeawai. Yuska numi kanawen epeawa nunisketai. Atumi tunaari inait nakitakrumka, atumka wait wajaktinuitrume,” timiayi. ✨

✨ 3:3 (Juan 1.6-8) ✨ 3:6 (Isa. 40.3-5) ✨ 3:7 (Mat. 3.7;12.34;23.33) ✨ 3:9 (Mat. 3.10;7.19)

¹⁰ Tamati aints ainau nuna antukar Juankun iniinak:
—¿Tura iisha imiaimu asar warukatjik? —tiarmiayi.

¹¹ Tu tinam Juan aimiak:

—Aints wejmakri jimiar amataikia, chikich wejmakrinchaun kichik susati. Tura yurumkan takaku yurumkan yuumaun susati, —timiayi.

¹² Tamati nunia kuikian juu ainausha Juan imiatit tusar jiasartas weriar iniinak:
—Nuikiartinu, ¿wisha warukatjak? —tiarmiayi.

¹³ Tu tinam Juan aimiak:

—Kuik apu irumratararam ta nu nangkamasrumka jukirap, —timiayi.

¹⁴ Tama suntar ainausha tariar Juankun iniinak:

—Juunta ¿wisha warukatjak? —tu iniinam Juan aimiak:

—Atumka chikich ainausha awaakaram ninu aa nuka atankirap. Tura tsanumrairap. Tura atumi apuri akirmina nuke jukiram: Maaketai tusaram, nuna nangkamasrumka wakerutsuk asatararam, —timiayi.

¹⁵ Tu chichaamtai aints ainau nintiminak: “¿Juka Mesíaschaukai? ¿Yus aints ainaun uwentikrat tusan akupkatatjai tíaia nuchaukai?” tusar nekaawartas wakeriarmiayi.

¹⁶ Juan tu iniam, nuna antuk aints ainaun mash chicharak: “Wikia aya entsanmak imiajrume. Antsu wina ukurun winitata nuka Yuse Wakani atumin nintin jiya tumaun engketramatatrume. Tura Yusen umirchau ainautirmin ji tuke kajintrashtinnum japramatnuitrume. Nuka wina nangkatusang kakaram atatui. Ni nekas timiá kakaram asamtai wikia mianchau asan, tsuntsumruan sapatri jingkiaamurin atiataj tayatun, natsaamau asan atiachminuitjai. ¹⁷ Niisha Yusen umirkau ainauncha, tura Yusen umirchau ainauncha aints trigon pakawa nunisang akankatnuitai. Trigo jingkiajincha nunia saapencha akankartas su su umpuiniar juwinawai. Tura jingkiajinak jeanam ukuinawai. Antsu saapen jinum epeenawai. Yuscha nunisang niin umirinaunaka ni jeen jukitnuitai. Antsu niin umirchau ainaunka ji kajintrashtinnum japatnuitai,” Juan timiayi.

¹⁸ Yusnum uwemratin chichaman Juan aints ainaun ujaak: Nekasrum Yus tuke nintimratararam tusa nukap chicharkamiayi. ¹⁹ Tura apu Herodes ni yachí Felipe nuwarin Herodías naartinun kasamak nuwatkau asamtai, tura chikich tunaunasha turau asamtai, Juan Herodesan chicharkamiayi. ²⁰ Tamaitiat Herodes Juanku chichamenka anturtsuk, chikich tunaunasha untsuri turamiayi. Tura ni suntarin akupak: Juan achikrum kársernum engkeatararam timiayi.✠

Jesúsa maimuri

(*Mat. 3.13-17; Marc. 1.9-11*)

²¹ Nuna turatsaing Juan kársernum achikcham pujus, tura nu nungkanmaya ainaun untsurin imiaak pujus, Jesús nasha imiamiayi. Tura Jesús imiaim, Yusen seak pujai, nayaim uranniun wainkamiayi. ²² Turamtai Yuse Wakani yapangma tumau Jesúsa muuken paan winitmiayi. Tura nayaimpinmaya chichaman antukarmiayi. Yus uchirin chicharak:

—Ameka wina Uchiruitme, wina aneetiruitme. Amin pengker nintimtusan pujajme, —timiayi.✠

Jesúsa yaanchuik weari ainau naari inaikiamuri

(*Mat. 1.1-17*)

²³ Jesús treinta (30) musach pujus, Yuse chichamen etsertan nangkamamiayi. Turamtai aints ainau nangkamiar: Jesús José uchirintai tu nintimtusarmiayi. Jesúsa apachri Elí naartinuyayi. ²⁴ Elí Matata uchiri ayayi. Nunia Matat Leví uchiri ayayi. Nunia Leví Melqui uchiri ayayi. Nunia Melqui Jana uchiri ayayi. Nunia Jana José uchiri ayayi. ²⁵ Nunia José Matatíasa uchiri ayayi. Nunia Matatías Amósa uchiri ayayi. Nunia Amós Nahúma uchiri ayayi. Nunia Nahúm Esli uchiri ayayi. Nunia Esli Nagaiya uchiri

✠ 3:20 (*Mat. 14.3-5; Marc. 6.17-18*) ✠ 3:22 (*Mat. 17.5; Marc. 9.7; Luc. 9.35*)

ayayi. ²⁶ Nunia Nagai Maata uchiri ayayi. Nunia Maat Matatíasa uchiri ayayi. Nunia Matatías Semeiya uchiri ayayi. Nunia Semei Joseca uchiri ayayi. Nunia Josec Judá uchiri ayayi. ²⁷ Nunia Judá Joanána uchiri ayayi. Nunia Joanán Resa uchiri ayayi. Nunia Resa Zorobabela uchiri ayayi. Nunia Zorobabel Salatiela uchiri ayayi. Nunia Salatiel Neri uchiri ayayi. ²⁸ Nunia Neri Melqui uchiri ayayi. Nunia Melqui Adi uchiri ayayi. Nunia Adi Cosama uchiri ayayi. Nunia Cosam Elmadama uchiri ayayi. Nunia Elmadam Era uchiri ayayi. ²⁹ Nunia Er Josué uchiri ayayi. Nunia Josué Eliezera uchiri ayayi. Nunia Eliezer Jorimia uchiri ayayi. Nunia Jorim Matata uchiri ayayi. ³⁰ Nunia Matat Leví uchiri ayayi. Nunia Leví Simeónka uchiri ayayi. Nunia Simeón Judá uchiri ayayi. Nunia Judá José uchiri ayayi. Nunia José Jonamka uchiri ayayi. Nunia Jonam Eliaquima uchiri ayayi. ³¹ Nunia Eliaquim Melea uchiri ayayi. Nunia Melea Mena uchiri ayayi. Nunia Mena Matata uchiri ayayi. Nunia Matata Natánka uchiri ayayi. ³² Nunia Natán Davidta uchiri ayayi. Nunia David Isaí uchiri ayayi. Nunia Isaí Obeda uchiri ayayi. Nunia Obed Booza uchiri ayayi. Nunia Booz Sala uchiri ayayi. Nunia Sala Naasónka uchiri ayayi. ³³ Nunia Naasón Aminadaba uchiri ayayi. Nunia Aminadab Arama uchiri ayayi. Nunia Aram Esroma uchiri ayayi. Nunia Esrom Faresa uchiri ayayi. Nunia Fares Judá uchiri ayayi. ³⁴ Nunia Judá Jacobo uchiri ayayi. Nunia Jacob Isaaca uchiri ayayi. Nunia Isaac Abrahamama uchiri ayayi. Nunia Abraham Taréa uchiri ayayi. Nunia Taré Nacora uchiri ayayi. ³⁵ Nunia Nacor Seruga uchiri ayayi. Nunia Serug Ragauwa uchiri ayayi. Nunia Ragau Pelegka uchiri ayayi. Nunia Peleg Hebera uchiri ayayi. Nunia Heber Sala uchiri ayayi. ³⁶ Nunia Sala Cainánka uchiri ayayi. Nunia Cainán Arfaxada uchiri ayayi. Nunia Arfaxad Sema uchiri ayayi. Nunia Sem Noé uchiri ayayi. Nunia Noé Lamecka uchiri ayayi. ³⁷ Nunia Lamec Matusalénka uchiri ayayi. Nunia Matusalén Enoca uchiri ayayi. Nunia Enoc Jareda uchiri ayayi. Nunia Jared Mahalaleela uchiri ayayi. Nunia Mahalaleel Cainánka uchiri ayayi. ³⁸ Nunia Cainán Enósa uchiri ayayi. Nunia Enós Seta uchiri ayayi. Nunia Set Adánka uchiri ayayi. Tura Adánnaka Yus najanamiayi.

4

Jesúsa nekapsamuri

(*Mat. 4.1-11; Marc. 1.12-13*)

¹ Jesús Jordán entsanmaya jiinkiamtai, Yuse Wakani ni nintin engkemtuau asa, aints atsamunam weta tusa Jesúsán ayamiayi. ² Tura nuni pujamtai Satanás: Watska, tunau turuwaintash tusa nekapsatas tarimiayi. Turamtai Jesús cuarenta (40) kinta yurumkan yutsuk pujau asa yaparmiayi. ³ Timiá tsukamak pujamtai Satanás chicharak:

—Nekasam Yuse Uchiritkumka, ju kaya tepa au jukim, kaya wainiatmek pang najanata, —timiayi.

⁴ Tamati Jesús ayaak:

—Atsa, turashtatjai. Yuse chichame tu aarmawaitai: ‘Aints aya yutanak yutanak nintimtinauka tukeka pujuschartinuitai. Antsu Yuse chichamen nintimtinauka nekasar tuke pujusartinuitai,’ —timiayi.

⁵ Tura Jesúsán ayas, mura juunnum iwiakmiayi. Tura nuni pujus, mash nungka ainaun inaktusmiayi. ⁶⁻⁷ Tura mash inaktus umis chicharak:

—Ju nungkaka mash wainme juka, tura ni apuri ainausha, tura warinchi nekas pengker ainia nuka winaruitai. Tura wi wakeraknaka kichan nunaka mash susatnuitjai. Tura asamtai tikishmatruram: Wína apuruitme turutkumningkia, junaka mash aminu ati tusan susatjame, —anangkak timiayi.

⁸ Tamaitiat Jesús ayaak:

—Satanása weta. Yuse chichame tu aarmawaitai: ‘Atumi Yusri atumi Apuri asamtai: Ameketme Apum titaram. Turaram atumi Yusri nuke umirkataram,’ —timiayi.

⁹⁻¹¹ Nuniasha Jesúsán Satanás ayas, Jerusalén yaktanam umamiayi. Tura Yus seatai juun jea, yakí wajakmaunum iwiak, ataksha nekapsatas chicharak:

—Yuse chichame tu aarchamukai: ‘Yus ni awemamuri irunun amin waitmakarat tusa inatmartatui. Tura nawemin kayan tukumkai tusar, ni uwejejai achirmakartatui,’ tu aarmau asamtai, nekasam Yuse Uchiritkumka, watska, yakiiya tsekengkim ayaarta, —timiayi.✠

¹² Tamaitiat Jesús ayaak:

—Atsa, turunashtatjai. Chikich aarmausha tu aarmawaitai: ‘Atumi Yusri atumi Apuri asamtai, nangkamrum nekapsatasrum wakerukairap,’ —timiayi.

¹³ Tu tau asamtai, Satanás Jesúsán nepetkatatkama pengké tujintak: Chikich kintati ataksha nekapsami, tusa Jesúsán ukukmiayi.

Jesús ni takatrin nangkamamuri

(Mat. 4.12-17; Marc. 1.14-15)

¹⁴ Nunia Jesús Yuse Wakani kakarmarijai Galilea nungkanam waketkimiayi. Tura nuni jeamtai, nu nungkanmaya ainauka niin pachisar chichasarmiayi. ¹⁵ Tuminamtai Jesús nuni chikich chikich yaktanam wekaas, iruntai jeanam waya, aints ainaun nuiniarmiayi. Turamtai ni chichamen antukarmia nuka untsuri niin pachisar pengker chichasarmiayi.

Jesús Nazaretnum pujusmauri

(Mat. 13.53-58; Marc. 6.1-6)

¹⁶ Tura Jesús Nazaret yaktanam ni tsakarmaurin wemiayi. Tura tuke turin asa, ayamtai kintati iruntai jeanam waya, Yuse chichamen aujsatas wajakmiayi. ¹⁷ Turamtai yaanchuik Yuse chichame etserin Isaíasá aarmaurin susarmiayi. Tura susaram Jesús nuna urak nu aarmaunka wainkamiayi. Tura aujak:

¹⁸ —Yuse Wakani wini pujurtawai. Tura asa wínaka: Nekas mianchau ainaun uwemratin chicham ujakta tusa akuptukmiayi. Tura jingkiemua nunisarang pujuinausha: Angkan pujustaram tita tusa akuptukmiayi. Tura wainmichun jiimtiksa tusa akuptukmiayi, tura pasé awajtamua ainausha pengker awajsata tusa akuptukmiayi. ¹⁹ Tura yamaikia Apu Yus aints ainaun wait anentawai tusam, etserkata tusa akuptukmiayi. Isaías tu aarmiayi, —timiayi.✠

²⁰ Tura nu aarmaun aujas umis papin nukukmiayi. Tura iruntai jean wainiun papin wangtuki keemsamiayi. Keemsamtai aints nuni ketinauka mash niin jiijam wajiarmiayi.

²¹ Tuminamtai Jesús chicharak:

—Yuse chichame yamai antukurme nuka aarmawa nunisnak ju kintaka umikjai, —timiayi. ²² Tamati aints ainau mash Jesúsá pengker chichaamurin antukaru asar, niin pachisar pengker chichasarmiayi. Tura nintimrar chicharnainak:

—¿Juka José uchirinchukai? —tiarmiayi.

²³ Tu tinam Jesús chicharak:

—Junia aints ainau: ‘Tsuwakratnu, amek tsuwarata,’ tina nunisrumek: Capernaum yaktanam wainchatai takat turamiame nunismek junisha turata ¿atumsha turutiatrumek? ²⁴ Tura nekasan tajarme: Yuse chichame etserin ni nungkarin taa, Yuse chichamen etsermatisha, pengké anturinatsui.✠ ²⁵ Atumsha wi wear ayatrum, wína chichamur antutka nakitarme. Tura asan tajarme: Yaanchuikia Yuse chichame etserin Elías naartin pujai, kempatam musach nunia japchiri yumi jitachu asamtai, Israel nungkanam aints ainau mash tsukajai nukap waitnasarmia nuni waje untsuri iruniarmiayi. ²⁶ Waje untsuri atumi nungkarin iruninau wainiat, Yus Elíasan nu waje ainaun yaingti tusangka akuptukchamiayi, antsu chikich nungkanmaya wajen Sarepta yaktanam Sidón nungkanam pujaun yaingti tusa akupkamiayi.✠ ²⁷ Tura Yuse chichamen etserin Eliseo pujai, Israel nungkanam kuchaprintin untsuri iruniarmiayi. Antsu nu nungkanmak kuchaprintin untsuri iruninau wainiat, Yus nu aints ainaunka mashkia tsuwarchamiayi. Antsu Siria nungkanmaya aintsun Naamán naartinun nunak tsuwarmiayi, —Jesús timiayi.✠

✠ 4:9-11 (Sal. 91.11-12) ✠ 4:19 (Isa. 61.1-2) ✠ 4:24 (Mat. 13.57; Marc. 6.4; Juan 4.44) ✠ 4:26 (1.Rey. 17.8-16) ✠ 4:27 (2.Rey. 5.1-14)

²⁸ Tamati iruntai jeanam pujuinau nu chichaman antukar, Jesús nupak kakerkarmiyai. ²⁹ Tura wajakar, Jesús yaktanmaya jikiar, mura arakchichu amanum iwikar: “Wakenam shitakar ujuartai,” tusar jukiarmiayi. ³⁰ Turinamaitiat Jesús ni wininamunmak jepen temraktaj jiki wemiayi.

Jesús iwianchin aintsnumia jiki akupkamuri
(*Marc. 1.21-28*)

³¹ Tura Galilea nungkanam Capernaum yaktanam jeamiayi. Tura nuni pujus, ayamtai kintati tuke turin asa, nuni aints ainaun nuiniarmiayi. ³² Tura Yuse kakarmarijai aints ainaun nuinau asantai, nuna antukaru ainu nintimrar: Nuka Yuse kakarmarijai iincha timiá pengker nuitamji tiarmiayi.✠

³³ Chikich kintati Jesús iruntai jeanam wayaamtai, aints iwianchrintin nuni engkema pujus, Jesús kakar chicharak:

³⁴ —Nazarenumia Jesús ¿waruka iincha amukratkatasmesha winame? Wikia neka-jme. Ameka Yus akupkamuitme. Nekasam pengké tunaarinchau aa nuwaitme, —tu jiyakmiayi.

³⁵ Tamati Jesús iwianchin kakar chicharak:

—Chichatsuk asata. Tura ju aintska ukukta, —timiayi.

Tama iwianchka aintsnumia jinau, nungkanam peet nangkimiamiayi. Turayat jumchiksha najuarhamiayi. ³⁶ Turamtai aints ainu nuna wainkar shamkar chichainak:

—¿Juna chichamesha waringki? Chichamenka iwianchka anturinawapi. Ju aintska Yuse kakarmarijai iwianch ainaun jiki akupawapi. Tura akupamu asar niincha umirinawai, —tunaiarmiayi. ³⁷ Tura nu nungkanam pujuinau mash Jesús turamurin pachisar etserkarmiayi.

Jesús Pedro tsatsarin tsuwarmauri
(*Mat. 8.14-15; Marc. 1.29-31*)

³⁸ Nunia iruntai jeanmaya jiki, Jesús Simónka jeen wayaamiayi. Tura jea wayai Simónka tsatsari nukap tsuwemiayi. Tura asantai:

—Tsuwaturta, —tiarmiayi. ³⁹ Tinamtai Jesús Simónka tsatsari tsuweak tepamunam weri tsuntsumrua: Tsuweamuram michatrata, tama kakarmachu michatramiayi. Tura wári wajak irasartas taarun yuramiayi.

Aints untsuri tsuwarmauri
(*Mat. 8.16-17; Marc. 1.32-34*)

⁴⁰ Tasa nungka wajasai, aints ainu ni weari sungkurintin ainaun Jesús itariarmiayi. Tura itarim kichik kichik ni uwejejai anting Jesús tsuwarmiayi. ⁴¹ Tura iwianchrintin ainaun iwianchrin jiki japruiamiayi. Turamtai iwianch ainu jikiar untsuminak:

—Ameka Yuse Uchirinme, —tiarmiayi.

Tura niisha: Jesúska Mesíasaitai, Yus akupkamuitai tusar nekainu asamtai, Jesús: Itatkataram tusa kakar chicharkamiayi.

Iruntai jeanam Yuse chichame etserkamu
(*Marc. 1.35-39*)

⁴² Kashin kashik tsawaarak, Jesús nu yaktanmayangka jiki, aints atsamunam wemiayi. Turamtai aints ainu eakar ni pujamunam jeariarmiayi. Tura jear: Waketkip, antsu ijai tuke pujusmi, tusar tuke pujsartas wakeriarmiayi. ⁴³ Tinamaitiat Jesús chichaak:

—Wikia juningka tukeka pujuschamnawaitjai. Antsu Yus chikich yakat ainamunam wina chichamur etserkata tusa akuptuku asantai, wisa wena nunia aints ainaun: Yuska aints ainaun inartas wakera nu chichaman etserkatatjai, —timiayi.

⁴⁴ Tura nuna tusa ukuak, Galilea nungkanam wekaas, chikich chikich yaktanam iruntai jeanam waya, Jesús tuke Yuse chichamen etserkamaikiak wekaimiayi.✠

✠ 4:32 (Mat. 7.28-29) ✠ 4:44 (Mat. 4.23;9.35)

5

Namak untsuri achikmauri
(Mat. 4.18-22; Marc. 1.16-20)

¹ Chikich kintati Jesús juun kucha Genesaret tutainum nuna kaanmatkarin aints ainaun nuiniak wajai, aints timiá untsuri Yuse chichamen antukartas wakerinak Jesús-num kawengkar kae wajasarmiayi. ² Tuminamtai Jesús jimia kanu kucha kaanmatkarin tepaun wainkamiayi. Kanurтин ainau rederin nijarartas jiinkiaru asaramtai, kanuka mai angkan nanatiarmiayi. ³ Tura asaramtai Jesús Simónka kanurin engkema: Jumchik japen nanaastajai, tamati Simón utsukmiayi. Tura kanu japen nanaasamtai, Jesús kanunam keemas aints kaanmatkanam pujuinaun Yuse chichamen nuiniarmiayi. ⁴ Tura nuiniar umis Simónkan chicharak:

—Kanu kucha kunarin jukim, namak achiktasam rederam ujungta, —timiayi.

⁵ Tamaitiat Simón ayaak:

—Nuikiartinu, namak achiktai tusar, kashi rede ujua ujuaka tsawaayatur kichkisha achikchaji. Antsu ame turutu asakmin ujungtajai, —timiayi.

⁶ Tura reden japen kunanam ujungkar, namak untsuri chumpimiau asamtai, redcha jaankamiayi. ⁷ Tura ningkikia jiiktatkamawar tujintinak, ni amikri chikich kanunam engketinaun: Yaintitaram tusar uwejejai untsukarmiayi. Turinamtai niisha tariar, kanunam namakan met chumpiawar, kanuka mai yarantanak wajasarmiayi. ⁸⁻⁹ Namak timiá untsuri kanunam chumpiamu wainkar, Simón ni amikri ainaujai shamkarmiayi. Tura Simón Pedro Jesúsán tikishmatar:

—Apuru, wikia nekas tunau asamtai ¿itiurak wijaisha pujustam? Wait aneasam ukurkita, —timiayi. ¹⁰ Tamati Jesús Simónkan chicharak:

—Shamrukaip. Yamai nangkamsamek namakka achitsuk: Aints ainau Yusnau arti tusam, Yuse chichame etserkum aints achiu atatme, —timiayi. Tura Zebedeo uchiri Santiagosha, tura Juansha, Simónjai kanunam engkemawar pujuarmia nusha mash shamkarmiayi.

¹¹ Tura nuka mash ni kanurinka kukarnum ukukiar, ni rederincha mash ukukiar, Jesúsán nemarsar wekaasarmiayi.

Jesús aints kuchaprinun tsuwarmauri
(Mat. 8.1-4; Marc. 1.40-45)

¹² Nunia Jesús chikich yaktanam we nuni pujai, aints kuchaprintin tari, Jesúsán wainak, ni muuke nungka antitnak tsuntsumrua, nunia pangkai jiis Jesúsán chicharak:

—Apuru, ame wakerakmeka tsuwaramnawaitme, —timiayi.

¹³ Tama Jesús ni uwejejai ni namangken takaras chicharak:

—Ja ai, wakerajme. Pengker wajasta, —timiayi.

Tama nu aintska nu tamaujai metek tsaar pengker wajasmiayi.

¹⁴ Tura pengker wajasamtai Jesús chicharak:

—Ame turunamuram pengké etserkaip. Antsu sacerdotenam weta. Tura nuni weme namangkem pengker tsuwamaru asam inakmasta. Tura aints ainau mash pengker wajasmaurum nekaawarat tusam, Moisés tímia nunismek turata, —timiayi.

¹⁵ Tamaitiat Jesúsá turamurin pachisar aints ainau nukap chichasarmiayi. Tuminamtai ni chichamen anturkartas aints untsuri kautkarmiayi. Tura sungkurintin ainausha tsuwaamartai tusar untsuri kautkarmiayi. ¹⁶ Tuminamtai Jesús aints atsamunam we, nuni ni Apaachirin seamiayi.

Jesús pimpirun tsuwarmauri
(Mat. 9.1-8; Marc. 2.1-12)

¹⁷ Chikich kintati Jesús aints ainaun nuiniak pujai fariseo ainauka, tura Moisésa chichame nuikiartin ainausha, tura Galilea nungkanmaya tura Judea nungkanmaya tura Jerusalénnumia kaunkaru ainauka Jesúsá chichamen antú pujuinai, Jesús Yuse

☆ 5:3 (Mat. 13.1-2; Marc. 3.9-10;4.1) ☆ 5:6 (Juan 21.3, 6)

kakarmarijai jau ainaun tsuwarmiayi. ¹⁸ Turamtai aints ainau tariar, aints pimpirun tampumruwar itaarmiayi. Tura Jesús pujamunam wayaawartas wakerinayat, ¹⁹ jeanam aints untsuri piaku asamtai, wayaawartatkamawar tujinkarmiayi. Tura asar jea yakí pata amanum wakar, patan urakar, aints ainau kak piak pujuinamunam Jesús wajamunam pimpirun tampunam engketun yakiya itararmiayi. ²⁰ Tura pimpirun itaarmia nuka: Jesús nekasampi tsuwartatua, tu nintimainu asaramtai, Jesús nuna nekaa pimpirun chicharak:

—Aishmangkua, tunaarum mash tsangkuramuitme, —timiayi.

²¹ Tamati Moisésa chichame nuikiartin ainausha, tura fariseo ainausha ni nintijai: ¿Yusek tunaunaka sakarchatnukai? ¿Nangkami ningki Yusetjai tumamtsuash? ¿Yuschautiat Yusetjai tumama ausha warí aintsuita? tu nintimtusarmiayi.

²² Tu nintiminamtai, Jesúska ni nintimaurin nekau asa chicharak:

—¿Waruka tuusha nintimrume? ²³ ¿Warí timiá yumtinita? ¿Tunaarum tsangkuramuitme, titin yumtinkai? Antsu nu tachakrishia pimpiru: ¿Wajakim wekaasata titin yumtinkai? ²⁴ Wikia aints ayatun Yus akupkamu asan, ju nungkanam pujuinau tunaarin tsangkuratnuitjai. Tura wi turamnawaitjai tusan yamaikia nekamtikiatjarme, —timiayi. Nunia pimpirun chicharak:

—Amin tajame nantakim tampuram jukim jeemin waketkita, —timiayi.

²⁵ Tama nu tamaujai metek aints mash jiiminai, pimpiru wajaki tampurin juki: Yus kakarmaitai tusa, ni jeen waketkimiayi. ²⁶ Turamtai nuna mash jii pujuinauka nintimrar: Yuska kakarmaitai, tusar shamkarmiayi. Tura shaminak:

—Yamaikia aintsti tujintamu tsuwaruka wainkaji, —tiarmiayi.

Jesús Levín wina nuiniatir ata timiauri

(Mat. 9.9-13; Marc. 2.13-17)

²⁷ Nunia jiinki Jesús jinta weak apu akitinam jea nangkamak, aints Leví naartinun, chikich naari Mateo, nuni pujaun wainkamiayi. Nuka romano apuri akatramu asa, aints ainau apun akikiarat tusa kuikian juuyayi. Tura Levín wainak chicharak:

—Wína nuiniatir ata, —Jesús timiayi.

²⁸ Tamati Leví: Ayu tusa wajaki ni takatrinka mash ukuki, Jesúsán nemarsamiayi.

²⁹ Nunia fiestan najana, kuikian ju ainau Jesúsán wainkarat tusa untsukmiayi. Tura untsukmau asar, kuikian ju ainau untsuri, tura chikich aints ainausha, tura Jesúsá nuiniatiri ainausha nijai iruntrar misanam yuwinak pujuarmiayi. ³⁰ Turinamtai fariseo ainausha, tura Moisésa chichame nuikiartin ainausha Jesúsá nuiniatiri ainaun iniinak:

—Maj ¿waruka atumsha kuikian juu ainaujaisha tura chikich tunaarintin ainaujaisha iruntrarmesha yuwarma? ¿Tura waruka nijai iruntrarmesha amutisha amarme? —tiarmiayi.✠

³¹ Tu tinam Jesús aimiak:

—Aints pengker pujuinauka tsuwakratnunka yuuminatsui. Antsu najaiminak pujuinauka tsuwakratnun yuuminawai. ³² Wikia péngke aintsuitjai tinaunka: Pasé nintimaurum yapajiarum Yus umirkataram titasnaka tachawitjai. Antsu tunaawaitjai tinaun: Tunaarum inaisataram titasan tawitjai, —timiayi.

Ijarmatin pachisar Jesúsán iniasmauri

(Mat. 9.14-17; Marc. 2.18-22)

³³ Jesús tamati fariseo ainau tura Moisésa chichamen nuikiartin ainausha ataksha iniinak:

—Juanku nuiniatiri ainausha, tura ii nuiniatiri ainausha nukap ijarmawar yutsuk Yusnaka seainawai. ¿Antsu ami nuiniatiram ainau waruka tuke yuwinak tura aminak pujuinawa? —tiarmiayi.

³⁴ Tu tinam Jesús nuikiartamun etserek:

—¿Aints yamai nuwan nuwatkau ni untsukmau ainaujai iruntrar pujuinamtai, yutsekek pujuina? ³⁵ Atsa, antsu aints yamai nuwan nuwatkamun jukiartin kinta jeamtai,

✠ 5:30 (Luc. 15.1-2)

nuniangka untsukmau ainau wake mesekar ijarmawartinuitai. Wína nuiniatirka wijai pujuinau asar, yamaikia ijarmawarka pujuinatsui. Antsu wína jurukiarantai, nuniangka ijarmawartinuitai, —Jesús timiayi.

³⁶ Nunia chikich nuikiartutai chichaman nuiniarmiayi. Tura chicharak:

—Aints kichkisha wejmak yamarman charuk arutchinam nujtinatsui. Antsu aints nuna turakka, wejmakri yamaram aa nuna mesramnawaitai. Tura arut wejmaksha yarmarmajaingkia tenap nujtukchamnawaitai. ³⁷ Nuniasha amuti vino tutai yamai kariauka nuwap aparmau mamurunmaka yarakchamnawaitai. Nu turamka vino kariak wapakrak nuwap aparmaun pujkatnuitai. Tura asa vinosha ukaratnuitai, tura nuwap aparmausha pasemartinuitai. ³⁸ Tura asamtai vino yamai kariauka nuwap najanamu yamarmanam yaraktinuitai. Nu turamka mai metek meserchatnuitai. Tura asamtai yamaram chicham umirkurmeka, arut chicham etserkamuka inaisatnuitrume. ³⁹ Tura aints vino arut najanamun umin ainauka yamarman nakitinawai. Tura nakitinak: ‘Vino arut najanamuka timiá pengkeraitai’ tinawai, —Jesús timiayi.*

6

Ayamtai kintati trigo majurar yuwamuri

(*Mat. 12.1-8; Marc. 2.23-28*)

¹ Chikich ayamtai kinta tsawaaramtai, Jesús ni nuiniatiri ainaujai aja japeng nangkam-inak, ni nuiniatiri ainau yaparinak trigo jingkiain achikiar majurar yukiar wearmiayi.

² Turinamtai fariseo nuna wainkar chicharinak:

—Ayamtai kintati takakmaschatnuitai tusa Moisés surimkau wainiatrumsha ¿warukaya aitkarme? —tiarmiayi.

³ Tinamtai Jesús chicharak:

—¿Yaanchuik apu Davidta turamuri pachisrum aujchaukitrum? Nuka ni aintsri ainaujai tsukaminak pujuinamtai, ⁴ Yus seatai juun jeansam ningki waya, Yus inaktustin pang aya sacerdote yutairi asamtai, chikich aintska yuwachminun wainiat, Davidcha nuna yuwak ni aintsrincha susamiayi. Antsu Yuska nu turamun pachiska tunaawitai pengké tichamiayi. Tura wína nuiniatirsha nunisarang tunaanaka takaschari. ⁵ Wi aints ayatun Yus akupkamu asan, aints ainaun ayamtai kintati tu pujusarti tusan inartinuitjai, —timiayi.✠

Uwejen mutchaun tsuwarmauri

(*Mat. 12.9-14; Marc. 3.1-6*)

⁶ Chikich ayamtai kintati Jesús iruntai jeansam waya, aints ainaun nuiniak pujai, aints untsur uwejen mutchau nuni pujumiayi. ⁷ Turamtai Moisésa chichame nuikiartin ainausha, tura fariseo ainausha: Jesús ayamtai kintati ju aintsun tsuwaramtaikia iikia: Tunau wajasi timi tusar, jiij pujuriarmiayi. ⁸ Tuminamtai Jesús ni nintimaurin nekau asa, uwejen mutchaun chicharak:

—Wajakim japen wajasta, —tama nu aintska wajaki japen wajasmiayi. ⁹ Tura japen wajasamtai, Jesús aints jiij pujuinam chicharak:

—Wi atumin iniaitajrume: ¿Ayamtai kintatisha pengker aa nuka turatnukai? ¿Nu turachkursha nu kintati pasé aa nuka turatnukai? Tura ¿nu kintatisha aints jakashti tusar uwemtikratnukai? Nu turachkursha ¿nu kintatisha aints maatnukai? ¿Atumsha itiur nintimrume? —tu iniamaitiat Jesús an aitske pujuarmiayi.

¹⁰ Tuminamtai Jesús niin tentewar pujuarmia nuna mash jiis, uwejen mutchaun chicharak:

—Uwejem kutsmar, —timiayi.

Tama ni uwejen kutsmar, nuniangka pengker wajasmiayi. ¹¹ Nu aints pengker wajasamtai, fariseo ainau kajerinak: ¿Jesús itiurkatjik? tusar mai nuwamtak chichasarmi-ayi.

* 5:39 (Chikich aints ainauka yamaram chichamnasha antutan nakitinawai, taku timiayi.) ✠ 6:5 (Ex. 20.8-11)

Jesús ni nuiniatiri ainaun inaikiamuri
(Mat. 10.1-4; Marc. 3.13-19)

¹² Chikich kintati Jesús Yusen seatas mura waka, nu kashi Yusen seaseaka kanutsuk tsawaarmiayi. ¹³ Tura tsawaar ni nuiniatiri ainaun mash untsuk, nu aints ainamunmaya aya doce (12) aints wi akupkatin arti tusa Jesús inaikiamiayi. ¹⁴ Nu aintsu naaringkia nu ainawai: Simón chikich naarin Pedron Jesús inaikiamiayi, nunia Pedro yachi Andrés, nunia Santiago, nunia Juan, nunia Felipe, nunia Bartolomé, ¹⁵ nunia Mateo, nunia Tomás, nunia Alfeo uchiri Santiago, nunia Simón yaanchuik mesetan najanin amia nu, ¹⁶ nunia Santiago uchiri Judas, nunia chikich Judas Iscariote naartin, ukunam Jesús anangka surukmia nuna: Wi akupkatin arti tusa Jesús inaikiamiayi.✠

Jesús aints untsurin nuiniarmauri
(Mat. 4.23-25)

¹⁷ Nunia Jesús ni nuiniatiri ainaujai muranmaya kuankiar paka nungkanam pujuarmiayi. Tura nuni pujuinamtai, Judea nungkanmaya ainausha, tura Jerusalén yaktanmaya ainausha, tura juun entsa yantamenia Tironmaya tura Sidónnumia ainausha untsuri: Jesús chichame antuktai tusar, tura tsuwarat tusar kaunkarmiayi. ¹⁸ Tura kaunkaramtai nu aints ainaun tsuwarniayi. Iwianchrintin ainauncha iwianchri jirki akuptukam pengker wajasarmiayi. ¹⁹ Jesús ni kakarmarijai aints ainaun timiá untsuri tsuwaru asamtai, aints mash niin antingtai tusar wakermiayi.

¿Ya aints ainauna Yuscha waramtiksatnuita? timiauri
(Mat. 5.1-12)

²⁰ Tura aints ainaun tsuwar umis Jesús ni nuiniatiri ainaun jiis chicharak:

“Atumka kuikiartichutiaturum: Yusnum pujustin asaram warastinuitrume.

²¹ “Yamaikia tsukamakrum pujayatrume, ukunmaka tsukamsuk pujustin asaram warastinuitrume.

“Yamaikia juutu pujayatrume, ukunmaka wishirtin asaram warastinuitrume.

²² “Wikia aintsutiatak, Yus akupkamu asamtai, atumka wina nekasampita turutu asaram, atumin nakitraminamtaisha, tura iruntai jeanmaya jirmakiar japraminamtaisha, tura atumin katsekraminamtaisha, tura atumi naarin pachisar pasé chichartaminamtaisha warastinuitrume.✠

²³ “Junia nungkanmaya pasé aintsu juuntri ainu yaanchuik Yuse chichame etserin ainaun pasé awajarmia nunisarang atumin pasé awajtaminu asaramtai, atumsha nayaimpinam Yusnum pujustin asaram, pengker nintimsaram pujustaram. Tura nukap warastaram.

²⁴ “Antsu kuikiartin ainautirmin wait anentajrume. Yamaikikia nakurayatrume, ukunmaka wait wajaktinuitrume.

²⁵ “Yamaikikia pengké yuumatsuk pujajai tu nintimiatrume, ukunmaka yuumaktinuitrume. Tumaktin asakrumin wait anentajrume.

“Yamaikikia wishiyatrume ukunmaka wake mesekrum juutinuitrume. Tumaktin asakrumin wait anentajrume.

²⁶ “Yaanchuik nangkamiar: Wikia Yuse chichame etsernuitjai tinu ainaunka waitrau waininayat pengker awajsarmiayi. Yamaisha nunisarang aints ainausha mash atumin pachitmasar pengker chichartaminamtaikia, atumsha wainkataram tajarme,” Jesús timiayi.

Ii nemase aneetnuitji timiauri
(Mat. 5.38-48; 7.12)

²⁷ Nunia Jesús ataksha chichaak:

“Wina chichamur anturtakrum pujautirmin nunasha tajarme: Atumi nemase aneetaram. Tura atumin nakitraminamtaisha pengker awajsaram. ²⁸ Tura atumin pasé chichartaminamtaisha: Yus yainmakti titaram. Tura atumin katsekraminamtaisha, nu

✠ 6:16 (Hech. 1.13) ✠ 6:22 (1.Ped. 4.14)

aints pachisrum: Yus yaingti tusaram seattiarum. ²⁹ Antsu atumi yapiin awataminamtaisha atumka kajertsuk: Atuninisha awaturta tusaram tsangkatkataram. Tura atumi wejmakrin jurutramataikia, atumi punchurisha jukiti tusaram tsangkatkataram.✠

³⁰ “Aints ni yuumak seatminamtaisha awangturkita tutsuk susataram. ³¹ Aints wina pengker awajtusat tusaram wakerau asaram, atumsha nunisrumek chikich aints ainausha pengker awajsataram.✠

³² “Tura atumin pengker awajtaminauk nuke aneakrumka, nekasrum pengker aa nuka turatsrume. Pasé aints ainausha nunisarang niin pengker awajina nunak aneenawai. ³³ Tura atumin pengker awajtaminauk nuke pengker awajkurmeka, nekasrum pengkerka nintimtsurme. Pasé aints ainausha nunisarang niin pengker awajina nunak pengker awajinawai. ³⁴ Tura nu ikiatsata turaminamtaisha, ataksha awangturkitatuapi tu nintimtsurum suakrumka, nekasrum pengkerka nintimtsurme. Pasé aints ainausha nunisarang: Awangturkita tusar, chikich pasé ainauncha sunain ainawai. ³⁵ Yus nekas anengkratchau ainaun, tura pasé aints ainauncha mash wait anentau asamtai, atumi nemase ainausha aneetaram tura pengker awajsataram. Tura ikiatsata turaminamtaisha: Nekas awangturkitatuapi tuuka nintimtsuk susataram. Turakrumningkia Yus atumnasha pengker awajtamsatnuitrume. Tura Yus nekas yakí puja nuna uchiri atinuitrume. ³⁶ Atumi Apaachiri Yus aints ainaun mash wait anentawa nunisrumek atumsha chikich ainausha wait anentratarum,” Jesús timiayi.

Chikich aints pachisrum aujmatkairap timiauri
(Mat. 7.1-5)

³⁷ Nunia ataksha Jesús chichaak:

“Yus winaka wait wajaktiniun surusai tusaram, chikich ainou pachisrum paseetai tiirap. Tura Yus winasha jinum akuptukai tusaram, chikich aintcha pachisrum: Nu aintsun Yus jinum akupkati tiirap. Antsu tsangkuratarum. Turakrumningkia Yuscha nunisang atumnasha tsangkutramratnuitrume.✠

³⁸ “Chikich ainou yuumamurisha susataram. Turakrumningkia Yuska atum yuumamuncha suramsatatrume. Atumka chikich ainaun surittsuk suwakrum pengker nekapmarum, tura nuna nangkamasang nukap ati tusaram, aintsu pitakrin chumpiraram shitaram, nunia ataksha chumpiraram, aints ainou suarme nunisang Yuska atum yuumakrumnisha turutmatnuitrume,” Jesús timiayi.

³⁹ Nunia ataksha chikich nuikiartutai chichaman nuiniak:

“¿Aints wainmichu chikich wainmichun jintanam wekaasati tusar wekaastinkai? ¿Mai metek waanam ayarcharaintak?✠ ⁴⁰ Nuimiasusha ni nuiniamurin nangkamaskeka achatnuitai. Antsu niisha nukap nuimiar ni nuiniamurijai metek nekaamnawaitai.✠

⁴¹ “Tura atumi tunaari nukap aa nu nintimtsuk pujakrumka, chikich aintsu tunaari jumchik aa nu wainiatrumek ¿itiur nusha pachisrum chichastarmek? Chikicha tunaari pachisrum chichaakrumka, aints chikich aintsu jiin tsetsee tuupich engketu wainiatrum paan wainua tumawaitrume. Antsu aints ni jiin tsetsee juun engketunka wainchawa tumawaitrume. ⁴² Tsetsee juun atumi jiin engketu wainchayatrume, atumi yachí chicharkuram: ‘Yatsuru, tsetsee jiimin engketun ashiirtajme, wait aneasam tsangkamkata’ ¿itiur nusha titarmek? Anangkartin ainautiram, nuwá eemkaram atumi jii tsetsee juun engketua nunisrumek atumi tunaaringkia japaram, nuniangka paan jii nuniangka nunisrumek chikich aintsun ni tunaaringkia pachisrum chichastinuitrume,” Jesús timiayi.

Numi nere jiisrum pengkerashi tusaram nekaamnawaitrume timiauri
(Mat. 7.17-20;12.34-35)

⁴³⁻⁴⁴ Nunia Jesús tuke nuikiartak: “Ju nungkanmaya ainou numi neren jiisar, ¿warí numita? tusar nekainawai. Numi jangkirtin amataikia, higuera nerenka juwinatsui.

✠ 6:29 (Rom. 12.14) ✠ 6:31 (Mat. 7.12) ✠ 6:37 (Rom. 2.1) ✠ 6:39 (Mat. 15.14) ✠ 6:40 (Juan 13.16;15.20)

Tura narajnumiangka uva nerenka juwinatsui. Tura asamtai numi pengker ainauka napchaunaka nereenatsui. Tura numi napchau ainauka pengkernaka nereenatsui. ⁴⁵ Aints ainausha nunisarang ainawai: Pengke nintintin ainauka pengker aa nuna chichainawai. Tura pasé nintintin ainauka pasé aa nuna chichainawai. Nekas paan nekaamnawaitai: Aints warina nintimias pujawa nuka ni nintin piatkamu asa, nunaka pachitsuk chichaawai,” Jesús timiayi.

Jea jimiar jeamkamun pachis etserkamu

(Mat. 7.24-27)

⁴⁶ Nunia Jesús ataksha chichaak: “Wi taja nuka umiachiatrumsha ¿waruka Apurua Apurua turutrume? ⁴⁷ Aints wini wininauka wina chichamrun antinak, tura umirtinak pujuinauka ¿ya aintsua tumawaita? tusan nekamtikiatjarne. ⁴⁸ Nu aintska nungka pisunam jea jeamkamua tumawaitai. Tura nukap taimu asamtai, entsa nukap nu-jangkrak, nujang nukap ukatmaitiat, nungka pisu amanum jea jeamkamu asamtai, yumpungatkama tujinkatnuitai. ⁴⁹ Antsu chikich aints wina chichamrun anturtukiat umirtutsuk pujakka, aints yaikminam patatek jea jeamkamua tumawaitai. Tura asamtai entsa nukap nujangkrak, nujang nukap ukatam, jea pukuktinuitai, tura tuke iwiarachmin atinuitai,” Jesús timiayi.

7

Suntara apuri inatiri tsuwaramuri

(Mat. 8.5-13)

¹ Jesús aints ainaun nuiniar umis ukuki Capernaum yaktanam wemiayi. ² Nuni Romanmaya kapitán pujumiayi. Nuna inatiri jatanak wajas tepemiayi. Nuka nekas ni aneetiri inatiri ayayi. ³ Turamtai Jesúsán pachisar chichainaun antuk, kapitán judío juuntri ainaun chicharak:

—Jesúsnum werum: Kapitani inatiri jaawai. Tura wait aneas, inatirun tsuwatriti tawai titaram, —tusa akupkamiayi. ⁴⁻⁵ Tamati Jesúsán weriar nukap seainak:

—Nu kapitanka chikich nungkanmayaintiat, ii ainautinka pengker nintimturmajai. Tura asa ii iruntai jearin jeartamkamiayi. Tura asamtai ni inatiri jaak tepa nu tsuwaram ukuita, —tiarmiayi.

⁶ Tinamtai Jesús: Ayu tusa nijai wemiayi. Tura jeanam jeatar weenamtai, kapitán ni amikri ainaun akatar: “Nijai ingkiunikrum tu titaram,” tusa akupkamiayi. Tura akupkamu asar, Jesúsán chicharinak: “Apu, tsangkuturta. Kapitán chichaman akupturmak: Wikia judíocho asan, jearun wayaata tichamin nintimjai. ⁷ Tura wikia mianchau asan amin jiiistatkaman natsaamajai. Tura wainiatum wina inatir pachisam: Pengker wajasti takumningkia nuka pengker wajastatui. ⁸ Wikia nekasan suntara apuri umirnuitjai. Tura suntar ainaun inau asan, kichan weta tama nusha weenawai. Tura kichan winita tama nusha wininawai. Tura wi inatirun takatan inam, nusha miatrusarang umirtinawai. Tura amesha nunismek Apu asam juni wajasam chichaamning inatir tsaartatui tawai titaram,” Jesúsán tiarmiayi.

⁹ Tinamtai Jesús nuna antuk nu aintsu chichamen nintimias niin nemarinaun chicharak:

—Nekasan tajarme: Juni Israela nungkarin pujuinauka nu aintsua nunisarang: Yus tujinkachuitai tinaunaka kichkisha wainkachuitjai, —timiayi.

¹⁰ Tamati kapitán akupkamu ainu ni jeen waketkiar, kapitani inatiri yanchuk pengker wajasun wainkarmiayi.

Waje uchiri jakau inantukmiauri

¹¹ Jumchik arus Jesús ni nuiniatiri ainaujai, tura chikich aints untsuri ainaujai tsani-asar chikich yaktanam Naín tutainum wearmiayi. ¹² Tura nu yaktanam jeatak wajasar, aints jakaun iwiarsartas weenaun wainkarmiayi. Nu jakau nukuringkia wajeyayi. Tura

uchirisha jakamia nukeyayi. Turamtai jakaun iwiarsatai tusar, nu yaktanmaya ainau untsuri nemarsarmiayi. ¹³ Turinamtai Jesús nu wajenka wainak wait anentar:

—Juutip, —timiayi.

¹⁴ Tura jakau engkermaun antiamtai, jakaun nanaakinauka wajasarmiayi. Nunia jakaun chicharak:

—Natsachi, nantakta tajame, —timiayi.

¹⁵ Tama niisha nantaki pujus chichasmiayi. Tura nantaki chichaamtai, Jesús nukurin chicharak: “Uchiram jukita,” timiayi. ¹⁶ Jesús nuna tamati, nuna wainkaru ainauka mash shamkarmiayi. Tura Yus juuntaitai tusar chichainak:

—Yuse chichame etserin nekas juun wantinturmakji. Tura Yus ni aintsri ainautin yainmaktas ju aintsun akupturmakji, —tiarmiayi.

¹⁷ Tura Judea nungkanmaya ainausha, tura nuna nangkamasarang timiá arák pujuin-
ausha Jesús turamurin mash nekaawarmiayi.

Imiakratin Juan chicham nekaataram tusa akupkamuri

(Mat. 11.2-19)

¹⁸ Juanku nuiniatiri ainau Jesús aints jakau inankimun antukaru asar Juannasha ujakarmiayi. Tura ujakam nusha antuk ni nuiniatirin jimian untsuk: ¹⁹ Atumka Jesús-num werum chichaakrum: ¿Yus uwemtikiartinun akupkatnuitjai tímia nuka amekitam? ¿Amechuitkumningkia chikichash nakastaij? tu iniastaram, tusa akupkamiayi. ²⁰ Tura akupkam niisha Jesús weriar, nuni jeariar chicharinak:

—Imiakratin Juan iin akatar: ¿Yus uwemtikiartinun akupkatnuitjai tímia nuka amekitam? ¿Amechuitkumningkia chikichash nakastaij? tu iniastaram tusa akup-
tamkaji. Nu nekaatar wakeraji, —tiarmiayi.

²¹ Juanku nuiniatiri ainau nuni jearai, Jesús jau ainauncha tura najaiminak pujuinaun-
cha untsuri tsuwarmiayi. Iwianchrintin ainauncha iwianchrin jirki akupkamiayi. Tura wainmichu ainauncha untsuri wainmantikiamiayi. ²² Tura asa Juanku nuiniatirin Jesús chicharak:

—Waketkiram atum wainkarume tura antukurme nuka Juan mash ujaktaram. Tura ujaakrum wainmichu ainu paan ataksha wainminawai, tura wekaichau ainausha atak-
sha wekainawai, tura kuchaprintin ainausha tsaarar pengker wajainawai, tura antichu
ainausha paan antinawai, tura jakau ainausha ataksha nantakiar iwiaaku pujuinawai,
tura mianchau ainauncha Yusnum uwemratin chichaman ujaawai titaram. ²³ Aints wína
turamurun wainkar, tuke inaitsuk nekasampita turutin ainauka nekasar warasartinuitai,
tawai tusaram Juan ujaktaram, —timiayi.

²⁴ Tama Juanku nuiniatiri waketkiaramtai, Jesús nuni juwakaru ainaun Juankun pachis
nuikiartutan nangkamamiayi. Tura nuikiartak:

—Aints atsamunam Juan wainkatarum ¿waruka wemiarume? Karis nase umpuam
mai we, mai we waja nunisang ¿aints tu pujau wainkatarumek wemiarum? Atsa.

²⁵ Turachkurmesha ¿aints wejmakan akikian entsaru wainkatarumek wemiarum? Atsa.
Antsu wejmakan timiá shiirman akikian entsarinauka apu jeen pujuinawai. Atumsha
nuka nekarme. ²⁶ Tura ¿warí wainkatarumea wemiarume? Nekasrum Yuse chichame
etserin wainkatarum wemiarume. Tura Juan wainkaram, chikich Yuse chichame
etserin ainu nangkamasang péngke aints wainkamarume. ²⁷ Juankun pachis yaanhuik
Yuse chichame etserin aarmia nuka nuwaitai: ‘Nintimrataram. Yus Mesíasan chicharak;
Ame weatsmining jintimin iwarati tusan, wína akupamurun eemkan akupajai timiayi,’
tu aarmawaitai. ✨

²⁸ Nekasan tajarme: Yuse chichamen etserin ju nungkanam puju armia nuka kichkisha
Juankun nangkamaska pengké atumiayi. Antsu yamaikia Yuse umirin mianchau
ainausha wi turatnun wainkartin asar, Juankun nangkamasarang nuwá eemkar Yuse
pujutirin jeartin ainawai tajarme.

✨ 7:27 (Mal. 3.1)

²⁹ Tura Juanku chichamen antukaru ainau, kuikian ju ainausha, tura chikich aints ainausha imiakratin Juan imiaimu asar, mash Yus nekas pengkeraitai tiarmiayi. ³⁰ Antsu fariseo ainausha, tura Moisésa chichame nuikiartin ainausha Juan imiaichmau asar, Yus niin pengker awajsatas wakerinamaitiat pachischarmiayi, —Jesús timiayi. ✠

³¹ Tura Juanku chichamen pachischaru asaramtai, Jesús nu aints ainan chicharak: “Junia aints ainau, itiur nintiminawa nuna nekamtikiatjarme. ³² Junia aints ainau uchua nunisarang nintiminawai. Uchi ainau ni amikrijai nakurusmi tusar aints aanum iruntramunam chicharnainak: ‘Iikia nangkuwach umpuarnisha ¿waruka yaamtsurme? tunainawai. Tura nangkamir nakurusmi tusar, aints jakamunam nampearnisha ¿waruka juuttsurme? Uchi tu nintimina nunisrumek pujarme. ³³ Juan taa, pangnaka yutsuk, tura vinoncha umutsuk pujamtai, atumka ni chichame antut nakitau asaram: Iwianchrinuitai tarume. ³⁴ Tura wikia Yus akupkamutiatak, chikich aintsua nunisnak yutanha pachitsuk yuwan, tura umutnasha pachitsuk umin asamtai, wina nakitrin asaram, wina pachitsaram: Ushuitai tura nampewitai turutrume, tura tunaarintin ainau amikrintai, tura kuikia juu ainau amikrintai turutrume. ³⁵ Tura waininayat Yusen umirin ainau Yuse nekamtairin jukin asar ¿warukaya nunasha tinawa? tusar nekainawai, —Jesús timiayi.

Fariseo Jesúsán: Yuwita tusa untsukmauri

³⁶ Fariseo aints yuwita tusa untsukmau asa, Jesús fariseo jeen waya, misanam yuwataj tusa keemsamiayi. ³⁷ Tura yuwak pujai, nu yaktanmaya tunau nuwa: Jesús fariseo jeen yuwatas weyi tamaun antuk, kungkuti muti alabastro tutainum engkea takus fariseo jeen wayaamiayi. ³⁸ Tura waya, ni tunaarin nintimias juutkamaikiak Jesúsá nawenini pujuras, nawen ni neaikirijai nijaramiayi. Nunia intashijai nawen japiramiayi. Tura Jesúsán timiá aneau asa, nawen mejeas kungkutijai ukatramiayi. ✠

³⁹ Turamtai fariseo aints Jesúsán yuwita tusa untsukmia nu nuwa turamurin wainak ningki nintimias: Juka nekas Yuse chichame etsernuitekungka ¿ju nuwa ni nawen takaa nuna warí nuwaki? tusa nekaawaintai. ¿Juka nekas tunau nuwachukai? tu nintimramiayi. ⁴⁰ Tu nintimias pujamtai, Jesús ni nintimaurin nekau asa chicharak:

—Simónka, amin chichaman titasan wakerajme, —Jesús tama niisha ayaak:

—Ayu turuttia, nuikiartinu, —timiayi.

⁴¹ Tama Jesús chicharak:

—Jimia aints kuikian ikiamsar tumashmawarmiayi. Kichik cinco pachak (50) kuikian tumashmamiayi. Chikitcha aya cincuenta (50) kuikian tumashmamiayi. ⁴² Tura akiimiaktin kinta jeamtai, mai metek akiimiakartatkamawar tujinkarmiayi. Turinamtai kuikian ikiasu nu aintsu tumashrin mai metek nangkami sakarti tusa inaisamiayi. Tura asamtai ¿amesha nu aints jimiar pachismesha itiur nintimme? ¿Nu jimia aints tumashmawaru ainau mai metek tumashnum akirkairap timiau asar, tu aintsna nekas timiá anea? —timiayi.

⁴³ Tu iniam Simón aimiak:

—¿Kuikian nukap tumashmamia nuchawashi? —timiayi. Tamati Jesús ayaak:

—Nekasam tame, —timiayi.

⁴⁴ Tura nu nuwan jiis Jesús Simónkan ataksha chicharak:

—Wi ami jeemin wayaamtai, ii jeakrin tuke turina nunismek nawer nijartinka yaratruckhamame. ¿Antsu ju nuwa turamuka waintsumek? Juka nawerun ni neaikirijai nijatruri, tura ni intashijai japitruri. ⁴⁵ Wi jeemin wayaamtai, ameka pengker awajtustasmeka mejentsachmame. Antsu ju nuwaka nawerun tuke inaitsuk mejentrusi.

⁴⁶ Wi jeemin wayaamtai, pengker awajtustasmeka olivo macharijaingkia muukruka ukatrurchamame. Antsu juka nawerun kungkutijai ukatruri. ⁴⁷ Ju turutau asamtai tajame: Juka wina nukap anentu asamtai, ni tunaari nekas nukap aa nuka mash tsangkuramuitai. Antsu tunaar jumchik awai ta nuna tunaari jumchik tsangkuramu asa, nuka Yusen jumchik aneawai, —Jesús Simónkan timiayi.

⁴⁸ Nuniangka nuwan chicharak:

—Ami tunaarumka mash tsangkuramuitme, —timiayi.

⁴⁹ Tamati Jesúsjai tsaniasar yuwiarmia nuka nintimsar:

—¿Jusha ya asa, aints ainau tunaarin tsangkurnuita? —tunaiarmiayi.

⁵⁰ Nuna tinamtai Jesús nuwan chicharak:

—Ame wina uwemtikrurtinuitme, tu nintimtururu asam uwemrawaitme. Pengker nintimsam weta, —timiayi.

8

Nuwa ainau Jesúsán yaingmauri

¹ Nunia Jesús ni nuiniatiri doce amia nujai untsuri yakat ainamunam wekaakamaikiak Jesús Yusnum uwemratin chichaman etserak: Aints ainau Yusen tu umirkartinuitai tusa etserki wekaimiayi. ² Turamtai nuwa ainausha Jesúsán nemariarmiayi. Nu nuwa ainausha Jesús yaanchuik tsuwarmau asar, chikich iwianchrintin pujuutiat iwianchrin jiirkir akuptukmau asar, Jesúsán nemariarmiayi. Magdalanmaya Marísha iwianchrin siete (7) jiirkimia nusha Jesúsjai tsanias wekaimiayi. ³ Chikitcha Cuza nuwari Juana naartinuyayi. Nu Cuzaka apu Herodesa jeen wainuyayi. Chikich nuwa Susana naartinuyayi. Chikich nuwa ainausha untsuri ni kuikiarijai Jesúsá yuumamurinha, tura ni nuiniatiri yuumamurinha sumarkar yaingkiarmiayi.✠

Arak pachisar nuikiartamu

(Mat. 13.1-9; Marc. 4.1-9)

⁴ Untsuri yaktanmaya ainau Jesúsán jiasartas kautkarmiayi. Tura kautkaram, nuikiartutai chichamjai etsermiayi, tura etserak: ⁵ “Anturtuktaram. Aints arakan tsaamratas wemiayi. Tura tsaamam, araka jingkiaji jintanam kakeekamiayi. Tura jintanam kakeekau asantai, aints ainau jintanam wekajinak arakan najararmiayi. Tura chingki ainau yakiya kautkar jingkiajin yuwaarmiayi. ⁶ Chikich jingkiajisha kaya irunmaunum kakeekamiayi. Tura tsapaiyat nungka mujukash asantai kaarmiayi. ⁷ Chikich jingki-ajisha jangkinam kakeekamiayi. Tura jingkiajisha jangkijai mai metek tsapain asar pempearan jakamiayi. ⁸ Tura chikich jingkiajisha nungka pengkernum kakeekamiayi. Tura tsapai jingkiaji kichkitiat cien (100) nerekmiai,” Jesús timiayi.

Tura ataksha kakar chichaak: “Aints ainautiram, ju chicham antukrum nintim-rataram,” timiayi.

¿Jesús waruka nuikiartamun etserkamia?

(Mat. 13.10-17; Marc. 4.10-12)

⁹ Tamati ni nuiniatiri ainau Jesúsán iniinak: “¿Ju nuikiartamu tame nusha warí pachisemea tame?” tiarmiayi. ¹⁰ Tu tinam Jesús aimiak: “Yus aints ainaun itiur inawa tusan, chikich aints ainau paan nekaachmin wainiatrum, atumka paan nekamtikiamuitrume. Antsu chikich aints ainau wina chichamrun antutan nakitinau asar, ni jiijaingka paan waininayat, wainmichua nunisarang wajasarti tusan, tura antutnasha antinayat, nekaawartatkamawar tujinkarti tusan, aya nuikiartutai chichaman ujainajai,” Jesús timiayi.✠

Arak tsaamramun taja nunaka takun tajai tusa etserkamuri

(Mat. 13.18-23; Marc. 4.13-20)

¹¹ Nunia ataksha etserak: “Wi árak tsaamramu taja nuka takuampi tawa tusaram nekaataram. Arakan taja nuka Yuse chichamen takun tajai. ¹² Tura árak jintanam kakeekamia nu jintaka aintsu nintiya nunisketai. Nu aints ainau chichaman antukar Yus nekasampita tiarai tusa, tura uwemrarai tusa, Satanás nu chichaman nintinian jurawai. ¹³ Tura arak kayanam kakeekamiayi taja nuka chikich aintsu nintiya nunisarang ainawai. Chikich aints ainau Yuse chichamen pengker antukar, nekasampita tusar warainawai.

✠ 8:3 (Mat. 27.55-56; Marc. 15.40-41; Luc. 23.49) ✠ 8:10 (Isa. 6.9-10)

Antsu itiuirkachmin amataikia, Yuse chichamen umirtan inainawai. Tura asar árak kayanam kakeekamia nuka kangkape atsau asamtai, wári jaawa nunisarang nintiminawai. ¹⁴ Tura arak jangkinam kakeekamiayi taja nuka chikich aintsu nintiya nunisarang ainawai. Nu aints ainauka Yuse chichamenka paan antinayat, ju nungkanmaya ainau nintimina nunisarang nintiminawai. Tura kuikian nukap wakerinak, tura nakurutan tuke nintiminak Yuse chichamenka nintimtsuk pujuinawai. Tura asar árak jangkinam kakeekamia nunisarang ainawai. Jangkinam árak kakeekauka nerekchamin ainawai. ¹⁵ Tura árak péngke nungkanam kakeekamia nuka chikich aintsu nintiya nunisarang ainawai. Nu aints ainauka nekasar péngke nintintin asar, Yuse chichamen antukar nintin ukuinawai, tura tuke inaitsuk miatrusarang umirinawai. Tura asar cien (100) nerekua nunisarang ainawai,” Jesús timiayi.

Kantiin keemakmaun pachis nuikiartamu
(Marc. 4.21-25)

¹⁶ Nunia chikich nuikiartamun Jesús etserak: “Aints kichkisha kantiin keemak nukukchatnuitai. Tura peaka wamketinka puusashtnuitai. Antsu aints jeanam waiina nuka paan waínkarat tusa yakí kentsatnuitai. ¹⁷ Tura yamai uukmau aa nunaka ukunam mash paan inakmashnuitai, tura yamai nekaachmin ainia nunaka ukunam mash paan nekawartinuitai.✠

¹⁸ “Yuse chichamen nekas pengker nintiminak pujuinaunka Yuska nuna nangka-masang paan nekamtikiatnuitai. Antsu Yuse chichamen nintimtachunka ni antukmaur-in kajinmantikui. Tura asamtai nekasrum pengker antuktaram,” Jesús timiayi.✠

Jesúsa nukuri ni yachí ainaujai tarimuri
(Mat. 12.46-50; Marc. 3.31-35)

¹⁹ Jesús nuna tusa nuikiartak pujai, ni nukuri ni yachí ainaujai taarmiayi. Tura aints timiá untsuri Jesúsnum iruntraru asaramtai, Jesúsán jiiisartatkamawar tujinkarmiayi.

²⁰ Tura asaramtai Jesúsán ujinak:

—Nukuram yachim ainaujai aanum wajasar, amin jiiirmasartas wakerutminawai, —tiarmiayi. ²¹ Tinamaitiat Jesús chicharak:

—Aints Yuse chichamen antukar umirinak pujuinauka wína nukur tura wína yatsur tura wína umaar ainawai, —timiayi.

Kucha tamparaun miaku awajsamuri
(Mat. 8.23-27; Marc. 4.35-41)

²² Chikich kintiati Jesús ni nuiniatiri ainaujai kanunam engkemawar:

—Atumajin katingtai, —timiayi. Tamati ayu tusar katiniarmiayi. ²³ Tura katinai Jesúska kanunam kanur tepemiayi. Turamtai aneachmau nase kakar nasenmatai, yumi kanunam yaranak ukantanak wajasmiayi. ²⁴ Tumamtai Jesúsán shintinak:

—Apurua, apurua, ukantatji, —tiarmiayi.

Tinamtai Jesús nantaki, nasencha tura kuchancha chicharkamiayi. Ni chichaamtai nasesha majaanmiayi. Nunia kuchasha miaaku wajasmiayi. ²⁵ Turamtai ni nuiniatiri ainaun chicharak:

—¿Waruka winaka timiá nintimtursturme? —timiayi.

Tamati niisha shamkar nukap nintimrar:

—¿Ausha warí aints asamtaiya nasesha, tura tampaasha umirinawa? —tunaiarmiayi.

Iwianch jiiikir kuchinam engkeamuri
(Mat. 8.28-34; Marc. 5.1-20)

²⁶ Nunia Galilea nungka tumajin katingkiar, Gerasa nungkanam nujamkarmiayi. ²⁷ Tura nujamkaramtai Jesús kanunmaya jiiinai, nu yaktanmaya aints tarimiayi. Nu aintska nukap musach iwianchrintin pujuyayi. Tura misu pujus, jeanmaka pujutsuk aints jakau iwiartainum pujuyayi. ²⁸⁻²⁹ Iwianch nu aintsun ataksha ataksha achik

✠ 8:17 (Mat. 5.15-16; Marc. 4.21-23; Luc. 11.33) ✠ 8:18 (Mat. 13.12;25.29; Luc. 19.26)

nepetnuyayi. Tura asamtai uwejencha, tura nawencha jirujai jingkiamaitiat, niisha jiruncha tsuriau asamtai, metawartatkamawar tujinkarmiayi. Turinamtai iwianch nu aintsun jukiar, aints atsamunam umaarmiayi. Tura asamtai Jesús nu aintsun wainak, iwianch nu aintsu namangken engkemtuau ainaun chicharak:

—Jiinkiram ju aintska ukuktiam, —timiayi. Tamati nu aintska Jesúsán tikishmatar kakar chicharak:

—Jesúsa, Yus yakí puja nuna uchiriya ¿warukaya winasha tarutniume? Wait aneam winaka waitkaip, —timiayi. ³⁰ Tamati Jesús iniak:

—¿Amesha yaachitme? —tu iniam iwianch untsuri ni namangken engkemtuau asar aiminak:

—Li naaringkia untsurintai, —tiarmiayi. ³¹ Tura iwianch ainu Jesúsán seainak:

—Juun waanmaka akupkartukaip, —tiarmiayi. ³² Nu muranmasha kuchi untsuri shushungminak wajainau asaramtai, iwianch ainu Jesúsán seainak:

—Au kuchinam engkematar tam sam akupkartukta, —tiarmiayi. Tu seainam Jesúska ayu tusa tsangkatkamiayi. ³³ Turamtai iwianch ainu nu aintsnumia jiinkiar, kuchinam engkemawaramtai, kuchi ainu wakenam mash pisarar, kuchanam ayangkar kijiakar kajingkiarmiayi.

³⁴ Tuminamtai kuchi wainin nuna wainkar ampukiar yaktanam pujuinauncha, tura ajanam pujuinauncha kuchi turunamuncha etserkarmiayi. ³⁵ Tura etserinamtai aints untsuri nu yaktanmaya jiinkiar: Jiimi tusar Jesúsnum jear, aints nuwik iwianchrintin pujuya nu pengker wajas wejmakan entsar, pengker nintimias Jesúsá nawenini pujaun wainkar shamkarmiayi. ³⁶ Tura nuwik iwianchrintin pujuya nuna pengker pujaun wainkaru asar, yamai taaruncha ujakarmiayi. ³⁷ Tu ujakaram Gerasa nungkanmaya aints kaunkarmia nusha mash nukap shamkar Jesúsán seainak:

—Wait aneam ii nungkarinia jiinkim weta, —tiarmiayi. Tu tinam Jesús ayu tusa wetas kanunam engkemamiayi. ³⁸ Turamtai nuwik iwianchrintin pujuya nuka pengker wajasu asa Jesúsán chicharak: Wisha winitjai tu iniamaitiat Jesús chicharak:

³⁹ —Atsa, antsu jeemin waketkim, Yus amin nekas pengker awajtamsau asamtai, mash aints ainu ujakarta, —timiayi.

Tama: Ayu tusa waketki, Jesús niin pengker awajsamurin nu yaktanmaya ainaun mash ujakmiayi.

Jairo nawantri inankimuri, tura chikich nuwasha tsuwarmauri

(Mat. 9.18-26; Marc. 5.21-43)

⁴⁰ Jesús katiamtai Galileanmaya ainu mash: Ni tati tusar nakainu asar, niin wainkar warasarmiayi. ⁴¹⁻⁴² Turai iruntai jea wainu apuri Jairo naartin tamiayi. Ni nawantri kichik doce (12) musachrintin amia nuka jatanak wajasamtai, nuka tari Jesús wajamunam tikishmatar:

—Wait aneam wína jearun winita, —timiayi.

Tamati Jesús: Ayu tusa weai, aints untsuri nemarkar niin teawarmiayi.

⁴³ Nu aints ainamunam nuwa doce (12) musach numpam nangkantsuk numpamia nusha pachinkamiayi. Nuka tsuwakratnun untsuri jiiutiat, kuikiarin mash amuaksha tsuwamichuyayi. ⁴⁴ Tura tuntupenini tari, Jesúsá wejmakri ninukmaurin antingmiayi. Tura anting numpamurinka nangkankamiayi.

⁴⁵ Turamtai Jesús inintrak:

—¿Yáki wína antinkama? —timiayi.

Tu iniamaitiat mash:

—Pengké antingchajme, —tinamtai Pedro chicharak:

—Nuikiartinu, amin aints timiá untsuri etenmawaru asar ¿yáki amincha antinmakma? nuka pengké nekaachminuitai, —timiayi.

⁴⁶ Tamati Jesús ayaak:

—Atsa, nekas wína kichik antinkau asamtai, wína kakarmarjai tsuwarjai tusan nekajai, —timiayi.

⁴⁷ Tama nu nuwasha: Nekarayapi tusa kurangki tari, Jesús wajamunam tikishmatrami-ayi. Tura aints mash antinamunam warukang antingma tura itiurak pengker wajasma tusa ujakmiayi. ⁴⁸ Tu ujaam Jesús chicharak:

—Nawantru, wína nekasampita turutu asam, nekasam pengker wajasume. Pengker nintimsam yamaikia weta, —timiayi.

⁴⁹ Tu chichaak wajai, Jairo aintsri ni jeenia tari apurin chicharak:

—Nawantrumka yanchuk jakayi. Nuikiartin nemarkini awajip, —timiayi. ⁵⁰ Tamati Jesús nuna antuk chicharak:

—Shamkaip, antsu nekasampita tusam, wína nintimtursata. Turakminka nawantrumka pengker wajastatui, —timiayi.

⁵¹ Tura jeanam jear, Jesús untsuri aints ainau jeanam wayaawartas wakerinau wainiat, aya Pedron, nunia Santiagoncha, nunia Juannasha, nunia nuwachi aparincha, nunia nukurincha wayaawarti tusa tsangkatkamiayi. ⁵² Tura jeanam wayaawar, untsuri juutka-maikiak untsuminaun wainkarmiayi. Tura Jesús nu aints ainaun wainak chicharak:

—Juutsuk asataram. Nu nuwachikia jakachi antsu kanuri, —timiayi.

⁵³ Tau wainiat nuwawach nekas jakau asamtai, nuna nekawaruka: ¿Warukakung taj? tusar wishikiarmiayi. ⁵⁴ Turinamaitiat Jesús jakau uwejen achik kakar chicharak:

—Nawantru nantaktia, —timiayi.

⁵⁵ Tama ni wakani ataksha engkemtuamu asa, niisha jakayat ataksha nantakmiayi. Nantakiamtai Jesús: Ayurataram timiayi. ⁵⁶ Jairo nawantri jakayat nantakiamtai, ni aparisha tura ni nukurisha nukap nintimraramtai, Jesús chicharak:

—Ju aitkamuka aints kichkisha pengké ujakairap, —timiayi.

9

Jesús ni nuiniatiri ainaun akatar akupkamuri

(*Mat. 10.5-15; Marc. 6.7-13*)

¹ Chikich kintati Jesús ni nuiniatiri doce (12) amia nuna untsuk wina chichamrujai iwianchrintin ainaun iwianchrin jiiykiarti, tura jau ainauncha tsuwararti tusa, ni kakarmarin susamiayi. ² Tura Yus aints ainaun tu inawai titaram, tura jau ainausha tsuwartaram tusa akatar akupkamiayi. ³ Tura chicharak:

—Jinta wekaakurmesha aintsarmek wetaram. Waisha takutsuk, tura pitakrumsha takutsuk, tura yurumkasha takutsuk, tura kuikiasha takutsuk wekaasataram. Tura wejmakrumsha jimiarka takutsuk wekaasataram. ⁴ Tura chikich yaktanam werum aints: Iijai pujusmi tamati, nuni wayaaram nu aintsjai pujustaram. Tura nu yaktanmasha pujusrum, jeanam wayaarmeka nuni tuke kanurtaram. ⁵ Tura atumin: Juni wayaawairap tusar suritraminamtaikia, nu yaktanmayangka jiiinkiram ukuktaram. Tura ukuakrum atumi nawe japimiarum: Ju aints ainaun Yus jiiisti tusaram, aints ainau mash nekamtiki-ataram, —tusa Jesús ni nuiniatirin akupak timiayi.✠

⁶ Tamati nunia jiiinkiar mash yakat ainamunam Yusnum uwemratin chichaman etserkiar wearmiayi. Tura jau ainauncha tsuwararmiayi.

Herodes Jesúsán pachis yáki tusa nekaatas wakeramuri

(*Mat. 14.1-12; Marc. 6.14-29*)

⁷ Aints ainau Jesúsá turamurin pachisar etserkaru asaramtai, apu Herodes nuna antuk nukap nintimramiayi. Chikich aints ainauka Jesúsán pachisar:

—Juan jakamunmaya nantaki wekaawai, —tiarmiayi. ⁸ Chikich ainausha chichainak:

—Elías yaanchuik Yuse chichame etserin pujumia nuka ataksha wantinak wekaawai, —tiarmiayi. Tura chikich ainausha chichainak:

—Atsa, chikich aints Yuse chichame etserin yaanchuik pujumia nuka jakamunmaya nantaki wekaawai, —tusar pachimian chichaarmiayi.✠

⁹ Tu tinamtai Herodes nuna antuk:

✠ 9:5 (Luc. 10.4-12; Hech. 13.51) ✠ 9:8 (Mat. 16.14; Marc. 8.28)

—Wikia Juanku muuken akaktaram timiajai. ¿Tura nu aintsun pachisar nukap chichaina nusha yáki? —tu nintimu asa Jesúsán jiistas wakerimiayi.

Jesús cinco warang aintsun yuramuri

(*Mat. 14.13-21; Marc. 6.30-44; Juan 6.1-14*)

¹⁰ Nunia Jesús akupkamu ainu ataksha Jesúsnum waketkiar, ni turamurin ujakarmiayi. Tura kaunkaramtai Jesús niin mash yaruak, aints atsamunam Betsaida yaktanam arakchichu amanum wearmiayi. ¹¹ Turinamtai Jesús nu aints ainaun aujas: Yus aints ainaun tu inawai tusa nuiniarmiayi. Tura jau ainauncha tsuwarmiayi.

¹² Tura tsaa akaamtai, ni nuiniatiri doce (12) irunmia nuka Jesúsán tariar chicharinak: —Juni aintsu pujutiri aya atsau asamtai, yakat arakchichu amanum aints pujamunam yurumkan sumakarat tusam, tura nuni kanurarat tusam, aints ainu akupkarta, —tiarmiayi. ¹³ Tinamtai Jesús ayaak:

—Atumek ni yutairi susataram, —tamati ni nuiniatiri chicharinak:

—Pang iinuka ju uwejchik arutramji. Namaksha jimiarchik arutramji. Antsu iikia yurumak sumatskesha ¿itiurak ju aints ainausha yuratjik? —tiarmiayi.

¹⁴ Aishmang cinco warang iruntrar asaramtai nunaka tiarmiayi. Tinamtai Jesús ni nuiniatiri ainaun chicharak:

—Atumka aints cincuenta, (50) cincuenta (50) kanákrum pujustaram tusaram chichas-taram, —timiayi.

¹⁵ Tamati ni tímia nunisarang mash pujusarmiayi. ¹⁶ Mash pujusaramtai, Jesús pangkan ju uwejchik takus, tura namaknasha jimiarchik takus, nayaimpinmanini pangkai jimias, Yusen maaketai timiayi. Nunia pangkan puuk ni nuiniatiri ainaun susam, nusha aints ainaun mash susarmiayi. ¹⁷ Tura susaram mash yuwaar tutuararmiayi. Tura yuwaar umisar ampintraun doce (12) changkinan chumpiawarmiayi.

Pedro Jesúsán: Mesíasaitme timiauri

(*Mat. 16.13-19; Marc. 8.27-29*)

¹⁸ Chikich kintati aints atsamunam ni nuiniatirijai iruntrar pujuinau asar, Jesús Yusen sea umis iniak:

—Aints ainu wína pachisar ¿warí aintsuita turutinawak? —tu iniasmiayi.

¹⁹ Tu iniam aiminak:

—Chikich ainu amin pachitmasar: Imiakratin Juankun maawarmia nuwaashi turaminawai. Tura chikitcha Elíasashi turaminawai. Tura chikitcha Yuse chichame etserin yaanchuik pujumia nuka jakamunmaya nantaki wekaatsuash turaminawai, —tiarmiayi.✠

²⁰ Tinamtai Jesús ataksha iniak:

—¿Tura atumsha winasha warintrutume? —timiayi.

Tu iniam Pedro ayaak:

—Ameka Mesíasaitme. Yus akupkamuitme, —timiayi.

Jesús ni jakatniurin pachis etserkamuri

(*Mat. 16.21-28; Marc. 8.31-9.1*)

²¹ Pedro tamati Jesús chicharak:

—Nuka pengké etserkairap, —timiayi.

²² Nunia ataksha chicharak:

—Yus akupkamutiatnak aints asan, nukap wait wajaktatjai. Wi turamtai judío juuntri ainu, tura sacerdote juuntri ainausha, tura Moisésa chichamen nuikiartin ainausha wína nakittrinak mantuwartatui. Tura wainiatnak kempatam kinta jakan tepayatun ataksha nantaktatjai, —timiayi.✠

²³ Nunia mash aints ainaun chicharak:

—Aints wína nekas umirtuktas wakerakka, ni wakeramurin inais, mianchawaitjai tusa, aints ni krusrin juwawa nunisang ni jakatniurinka shamtsuk kintajai metek

✠ 9:19 (Mat. 14.1-2; Luc. 9.7-8) ✠ 9:22 (Mat. 17.23;20.19; Marc. 10.33-34; Luc. 18.31-33)

wina nemartusti. ²⁴ Tura asamtai aints ningki wakerak: Wikia jakashtatjai tauka jakatnuitai. Antsu aints wina anentak jakatata nuka jakayat tuke iwiaaku pujustinuitai. ²⁵ Nintimrataram: Aints ju nungkanam aa nuna mash sumak, pengké yuumatsuk pujayat, ni wakani tuke mengkaakamtaikia, ¿itiurak tuke iwiaakusha pujusat? ²⁶ Aints wina natsantrinak, tura wina chichamruncha natsantinamtaikia, wi aintsutiatnak Yus akupkamu asan, wina Apaachiru kakarmarijai winakun, tura ni awemamuri ainaujai paaniunam winakun, wina natsantrurmia nuna pachisan: Nuka wina aintsruchuitai titinuitjai. ²⁷ Tura nekasan tajarme: Aints juni wijai tsaniasar pujuinauka, Yus ni kakarmarijai ni aintsri ainaun inartata nunaka jatsuk wainkartinuitai, —Jesús timiayi.✠

Jesúsa yapajmiamamuri

(Mat. 17.1-8; Marc. 9.2-8)

²⁸ Nunia chikich semantin Jesús Yusen seatas Pedroncha, nunia Santiagoncha, nunia Juannasha juki muranam wakaarmiayi. ²⁹ Tura Jesús Yusen seak wajai, ni yapi aneach-mau yapajmiamama jiitsumir wajasmiai. Ni entsatirisha nunisang nekas puju jiitsumir amiai. ³⁰ Turamtai aints jimiar Jesúsán wantintukar nijai chichainaun wainkarmiayi. Nuka Moisésayayi. Tura chikitcha Elíasayayi. ³¹ Nusha paaniunam jiitsumir wajaarmiayi. Tura Jesúsjai chichainak Jerusalénnum ni waitnas jakatniurin pachisar chichaarmiayi. ³² Tuminamtai Pedro ni tsaniakmaurijai kari nepetinam kanuru asar, kuraat shintarar, Jesúsán jimiá aintsjai wajaun wainkarmiayi. ³³ Tura nu aints jimiar Jesúsán ukukiar wearamtai, Pedro Jesúsán chicharak:

—Nuikiartinu, ii juni pujustincha nekas pengkeraitai. Juni kempatam jeawach jeamkarmi, kichka aminu, nunia kichka Moisésnau, nunia kichka Elíasnau ati, —timiayi.

Antsu ni tímia nunaka tenapka nintimtsuk timiayi. ³⁴ Pedro tu chichaak pujai yurangkim mikin wajasmiai. Turamtai shamkarmiayi. ³⁵ Tura yurangminmaya chichaun antukarmiayi. Yus chichaak: “Juka wina uchiruitai, wina aneetiruitai. Juka nekasrum anturkataram,” —timiayi.✠

³⁶ Yus tamati nu chichaamun antukar umisar, aya Jesúsának ningki wajaun wainkarmiayi. Tura ni wainkarmia nunaka aintsnaka kichkincha ujakcharmiai.

Uchinmaya iwianch jiikmiauri

(Mat. 17.14-21; Marc. 9.14-29)

³⁷ Kashin tsawaarar Jesús ni nuiniatiri ainaujai muranmaya taar, untsuri aintsjai ingkunikiarmiayi. ³⁸ Nu aintsnumia kichik jiintuki, Jesúsán kakar chicharak:

—Nuikiartinu, wait aneasam uchir jiitruista. Uchirsha juuchikitai. ³⁹ Iwianch uchirun engkemtua kakar untsumtiku weawai. Tura wichiatur wajasti tusa tura jangken sauran kapukja apaati tusa, pasé awajuweawai. Tura pengké akupuweatsui. ⁴⁰ Turamtai ami nuiniatirmin iwianchrin jirkit tusan seamjai. Turamaitiat tujintrutkari, —timiayi.

⁴¹ Tamati Jesús chicharak:

—Maj, Yus nintimchau asaram, winasha nekasampita turutiaram tusanka ¿warutam musachik atumjaisha pujustaj? Tura tupin nintimrataram tusanka ¿warutam musachik atumniasha nakastajrume? Watska, uchiram juni itata, —timiayi.

⁴² Tama uchin itaaramtai, iwianch uchin nungka ujuar, wewerkaja jakramiai. Turamtai Jesús iwianchin kakar chicharkamiai. Nunia uchin pengker awajas ni aparin awangtukmiai. ⁴³ Turamtai nuna wainkaru ainauka nukap nintimrar: Yuska nekas juuntapita tiarmiayi.

Jesús ni jakatniurin pachis ataksha etserkamuri

(Mat. 17.22-23; Marc. 9.30-32)

Aints mash ni turamurin nintimsar pujuinai, Jesús ni nuiniatiri ainaun chicharak:

⁴⁴ —Wi tajarme nuka pengker antukrum kajinmatsuk asataram. Wikia Yus akupkamu ayatnak aints asamtai, pasé aints ainamunam surutkartinuitai, —timiayi.

✠ 9:27 (Mat. 10.38-39; Luc. 17.33; Juan 12.24-25) ✠ 9:35 (Mat. 3.17; Marc. 1.11; Luc. 3.22; 2.Ped. 1.17-18)

⁴⁵ Antsu ni nuiniatiri ainau paan nekaawarai tusa surimkau asamtai, Jesús tímia nuna ¿warinkung taj? tusarka nekaacharmiayi. Tura waringki tusar iniasartatkamawar arantukarmiayi.

Yaachita chikich ainaun nangkamaskesha timiauri

(*Mat. 18.1-5; Marc. 9.33-37*)

⁴⁶ Nunia Jesúsá nuiniatiri ainau mai nuwamtak:

—¿Yaachita chikich ainaun nangkamaskesha? —tunaiyarmiayi.✠

⁴⁷ Tu tinam Jesús ni nintimaurin nekaru asa, uchin juki nijai tsanias wajas, ⁴⁸ ni nuiniatirin chicharak:

—Aints wína anentuka ju uchi ai mianchauchin wainiat pengker awajkungka, winasha nunisang pengker awajtawai. Tura wína pengker awajtauka wína akuptukmia nunasha nunisang pengker awajui. Atumek nintimsarmeka: Juka nekas mianchawaitai tarume juka mash aints ainaun nangkamasketai, —Jesús timiayi.✠

Aints iin nakitramachkungka iincha yainmaktinuitji

(*Marc. 9.38-40*)

⁴⁹ Tamati Juan Jesúsán chicharak:

—Nuikiartinu, chikich aints amin naarmin pachis iwianchin jiiki akupausha wainkamji. Tura iijai tsanias wekaachu asamtai, iwianch jiikim akupkaip tusar suritkamji, —timiayi.

⁵⁰ Tamaitiat Jesús chicharak:

—Antsu suritkairap. Aints iin nakitramachkungka iincha yainmaktinuitji, —timiayi.

Santiagon nunia Juannasha chicharkamuri

⁵¹ Jesús nayaimpinam waketkitnuri jeatak wajasamtai, shamtsuk Jerusalénnum wetan wakerimiayi. ⁵² Tura Samaria nungkanam wekaak, ni nuiniatiri ainaun kanurtintrin eakarát tusa, yaktanam eemki akupkamiayi. ⁵³ Jesús akupkamu waininayat, Samarianmaya aints ainau Jesúsán pachisar: Junia jiinki Jerusalénnum wetatui tusar, nuna nekainau asar: Juningkia kanurchatatrume tusar suritkarmiayi. ⁵⁴ Tura suritinam Jesúsá nuiniatiri Santiago tura Juansha nuna antukaru asar, Jesúsán iniinak:

—Apuru, ¿Yus jiin nayaimpinmaya akupak, Samarianmaya ainaun amukat tusar seatjiash? —tiarmiayi.

⁵⁵ Tu tinam Jesús niin jiis kakar chicharak:

—¿Atumi ninti warukuki tusarmeka nekaamatsrumek? Wikia aintsutiatnak Yus akupkamu asan, aints ainaun mesratanaka tachamiajai. Antsu aints ainaun uwemtikratan tawitjai, —timiayi.

⁵⁶ Nuniangka chikich yaktanam wearmiayi.

Jesúsán nemartan wakerinaun chicharkamuri

(*Mat. 8.19-22*)

⁵⁷ Jinta weenai, chikich aints Jesúsán chicharak:

—Apuru, ame tunia wekaasatatme nunisha amin nemarsatasan wakerajme, —timiayi.

⁵⁸ Tama Jesús ayaak:

—Kujancham ainau waanam kaninawai. Chingki ainausha pasungminawai. Antsu wikia Yus akupkamutiatnak aints asan, kanurmintruca atsawai. Tura asamtai wijai wekaakmeka wait wajakainme, —timiayi.

⁵⁹ Nunia chikich aintsnasha chicharak:

—Nemartusta, —timiayi.

Tamati chicharak:

—Ayu Apuru, turayat wína apar jakamtai, iwiarsan umisan nuniangka aminka nemarsatatjame. Nu tsangkatrukta, —timiayi.

⁶⁰ Tamati Jesús ayaak:

✠ 9:46 (Luc. 22.24) ✠ 9:48 (Mat. 10.40; Luc. 10.17; Juan 13.20)

—Atsa, wína umirtukcharu ainau jakawa nunisarang pujuinau asar, ni weari jakamtai iwiarsarti. Antsu ameka Yus umirkatin warukuita tusam etserkata, —timiayi.

⁶¹ Tama nunia chikich aints Jesúsán chicharak:

—Apuru, amin nemarsatasan wakerajme. Tura wína jearun waketkin, wína aintsur ainaun: Weajai tusan aujsan ukukin, nuniangka amin nemarsatjame, —timiayi.

⁶² Tamati Jesús ayaak:

—Waaka nungka tsaitin japiinamtai, waakartin nungkan tsaikmaikiak wekaayat, tuntupenini jiiimkunga, nu takatan pengkerka umikchamnawaitai. Tura asamtai aints Yuse chichamen etsertan wakerayat, ni wearin ukukchamin nekapeakka, Yus aints ainaun inawa nuna takatrinka takaschamnawaitai, —timiayi.

10

Jesús setenta y dos (72) aintsun akupkamuri

¹ Nunia Jesús chikich aints setenta y dos (72) niin nemarinaun wainak:

—Mash yakat ainamunam wi wetatja nuni jimichik jimichik tsaniasrum eema-jataram, —tusa akupkamiayi.

² Tura chicharak:

“Nekasan tajarme: Nu aints ainau trigo yanchuk tsamakua nunisarang ainawai. Tura juuktin kinta jeau waininayat, juukartin jumchik irunua nunisarang Yuse chichamen etserin ainausha jumchik asaramtai, Yus ni chichamen etserin ainaun wári akupkat tusaram Yus seataram.✠

³ “Tura atumsha wetaram. Atum uwija uchiriya nunisrumek pujarmin wainiatnak, wisha aints juun yawaaya nunisarang pujuinamunam akupajrume.✠ ⁴ Tura kuikiasha takutsuk, tura yutaisha entsatsuk, tura sapatcha takutsuk wetaram. Tura jinta wekaakuram, aints ainaujai aujmatnaitasuk asataram. ⁵ Tura jeanam wayaakrum: Ju jeanam pujuinautirminka Yus atumin pengker awajtamsarti titaram. ⁶ Nu takurmin nu jeanam pujuinau pengker nintimsar pujuinamtaikia, nu jeanam pujuinaunaka Yuska pengker awajsatataui. Antsu nu jeanam pujuinau pengker nintimtsuk pujuinamtaikia, Yuska pengkerka awajsashtataui. ⁷ Tura jeanam wayaarume nuning kanurtaram. Antsu chikich chikich jeanmaka kanukni wajairap. Tura takakminauka tuke akiktin asaramtai, atumin yutanha suramina nuke yuwataram. Tura amutincha suramina nuke amurtaram.✠

⁸ “Atumka chikich yaktanam jeakrumka, jeentin atumin wayaataram tusa juraminamtaikia, nu jeanmaya yutan suramina nuke yuwataram. ⁹ Jau ainausha tsuwartaram. Nunia Yus atumin inatmartas wakerawai titaram. ¹⁰ Tura chikich yaktanam jeakrumin, atum chicham etsermaun antutan nakitinamtaikia, jinta wajasrum titaram: ¹¹ ‘Chicham ii etserji nu antut nakitau asakrumin, atumi nungkari ii nawen nujata nu japimiarar, atumin japar ukuaji. Antsu Yus atumin inatmartas wakerawai tajirme nu chichamka aneaku ataram,’ tusaram nu yaktanmayangka jiiinkiram ukuktaram.✠

¹² “Tura wait wajaktin kinta jeamtai, yaanchuik Sodoma yaktanam pujuinau tunau asar, nukap wait wajakarmia nuna nangkamasarang nu yaktanam pujuinausha timiá wait wajaktin ainawai tajarme,” Jesús timiayi.✠

Yusen umirchau ainau yaktarin pachis etserkamuri (Mat. 11.20-24)

¹³ Nunia Jesús ataksha chicharak:

“Nu yaktanmaya ainau titaram: Corazín yaktanmaya ainautirmin, Betsaida yaktanmaya ainautirmincha aneartaram tajarme. Atumka nukap wait wajaktinuitrume. Tiro yaktanmaya ainau, tura Sidón yaktanmaya ainausha Yusen umirchau ainayat, Yuse kakarmarijai wainchati takatan atum wainkamiarume nuna wainkachariat nu wainkarkia, yaanchuik ni nintimaurin yapajiawar Yus tunaarun japitrurti tusar, entsatin

✠ 10:2 (Mat. 9.37-38) ✠ 10:3 (Mat. 10.16) ✠ 10:7 (1.Cor. 9.14; 1.Tim. 5.18) ✠ 10:11 (Luc. 9.3-5; Hech. 13.51) ✠ 10:12 (Gén. 19.24-28; Mat. 10.15; 11.24; Marc. 6.8-11; Luc. 9.3-5)

pushun entsarar, tura muuken yukuujai yukuarar, Yusnum uwemin armiyai. ¹⁴ Tura atumsha wainchati takat wainkayatrume, atumi tunaari inait nakitau asaram, tunau ainau jiistin kinta jeamtai, atumka Tiro yaktanmaya ainausha, tura Sidón yaktanmaya ainausha nangkamasrumek nukap wait wajaktinuitrume.✠

¹⁵ “Capernaum yaktanmaya ainautirmincha wikia tajarme: Atumka anangmamkura: ‘Iikia nayaimpinam pujustatjiapi,’ ¿tu nintimsarmek pujaram? Antsu atumka jakau matsamtainum mengkakatnuitrume tajarme, —Jesús timiyai.

¹⁶ Nunia ni nuiniatirin ataksha chicharak: “Atum wína umirtuku asakrumin, atumin anturtaminauka winasha anturtinawai. Tura atumin nakitraminauka winasha nakittrinawai. Tura wína nakittrinauka wína akup-tukuncha nunisarang nakitinawai,” Jesús tu chicharak ni aintsri ainaun akupkamiyai.✠

Setenta y dos (72) aints waketkimuri

¹⁷ Nu setenta y dos (72) aints Jesús akupkamu asar, Yuse chichamen etserkar waketkiar Jesúsnum kaunkar warasar chicharinak:

—Apu, iikia ami naaram pachisar iwianch ainau jiikir akupamsha iincha umirtamkamji, —tiarmiyai.

¹⁸ Tu tinam Jesús chicharak:

—Nekasrum tarume. Wisha nunisnak Satanásan nayaimpinmaya charpia nunisang akaikinun wainkamiyai.✠

¹⁹ Tura asan atumi nemase Satanás nepetkataram tusan, atum aneachmau napi nájakrumsha, tura titing nájakrumsha najaimiatsuk pujusmintrum tusan, wína kakar-marun susamjarme. ²⁰ Tura wainiatrum iwianch ainau atumin umirtaminamtaisha warasairap. Antsu atumi naari nayaimpinam aarmau asamtai warastaram, —timiyai.✠

Jesúsa waraamuri

(Mat. 11.25-27;13.16-17)

²¹ Nuniangka Yuse Wakani Jesúsa nintin waramtikmau asa Yusen seak:

—Apaachiru, maaketai tajame. Ameka mash nayaimpinmaya ainau Apurinme. Tura mash nungkanmaya ainau Apurinme. Tura asam aints ningki nintimsar: Wikia nekau aintsuitjai tinauka ju chichaman nekaacharti tusam uukuitme. Antsu uchichia nunisarang nintimianu ju chichaman paan nekaawarti tusam nekamtikiawaitme. Apaachiru, nekasam tu ati tau asakmin maaketai tajame, —timiyai.

²² Nunia Yusen sea umis ataksha chichaak:

—Wina Apaachir mash aa nuna wina surusmiyai. Aints kichkisha Yuse Uchiri itiurak a tusarka nekainatsui. Tura wína Apaachir itiurak a tusarsha nunasha nekainatsui. Antsu wikia Yuse Uchiri asan, tu awai tusan, paan nekajai. Tura aints ainaun: Wina Apaachirka tu awai tusan, wi nekamtikiatasan wakeraknaka nekamtikiawaitjai, —Jesús timiyai.✠

²³⁻²⁴ Nunia nu chichaman ujak ukuki, ni nuiniatiri ainaunak chicharak: “Nekasan tajarme: Yaanchuik Yuse chichame etserin ainau, tura apu ainau untsuri atum waintrume nunasha wainkartas wakerinayat wainkacharmiyai. Tura atum antuwearme nunasha antukartas wakerinayat antukcharmiyai. Tura atumka wi turamu winkau asaram nekasrum warastinuitrume, —Jesús timiyai.

Samaritanmaya aintsun pachis nuikiartamuri

²⁵ Nunia Moisésa chichame nuikiartin Jesús tari, warintintak tusa, nekapsatas chicharak:

—Nuikiartinu ¿wi pujut nangkankashtinun jukitaj tusan, warinak turuwaintaj? —timiyai.

²⁶ Tu iniam Jesús ayaak:

✠ 10:14 (Am. 1.9-10) ✠ 10:16 (Mat. 10.40; Marc. 9.37; Luc. 9.48; Juan 13.20) ✠ 10:18 (Isa. 14.12-15; Apoc. 12.9) ✠ 10:20 (Sal. 91.13) ✠ 10:22 (Juan 3.35)

—Moisésa aarmaurisha ¿warintua aarmawaita? ¿Nu aujkumsha itieur nintimme? —timiayi.

²⁷ Tu iniam Moisésa chichame nuikiartin aimiak:

—Nekas tu aarmawaitai: ‘Yusrum aminu apuram asamtai, nekasam ami nintimjai tuke aneen ata, tura ami kakarmarmijai tuke aneen ata, tura ami nintimaurumjaisha tuke aneen ata. Tura ami namangkem aneame nunismek chikich ainausha aneen ata,’ tu aarmawaitai, —timiayi.

²⁸ Tamati Jesús chicharak:

—Pengker aimkame. Nu chicham umirkumka, Yusnum tuke iwiaaku pujustinuitme, —timiayi. ✠

²⁹ Tama Moisésa chichamen timiatruska umirkachu asa, nu aintska Jesús aninik:

—¿Chikich aintcha itieur aneetnuitji? —timiayi.

³⁰ Tu iniam Jesús chicharak:

—Wi nuikiartamu etsermatai, ame anturtukam nekaata. Judío aints Jerusalénnumia jiinki, Jericó yaktanam jeatas jinta weak, kasa aints ainaujai ingkunik nu aints katsú katsumka ni waririncha, tura entsatirincha mash atankiarmiayi. Tura jakawa nunisang kajinmakamtai, nu aintsun jinta yantamen japawar ukukiarmiayi. ³¹ Turamtai jumchik arus sacerdote nu jinta weak, nu aintsun wainak aya ikiang jiis ukukmiayi. ³² Nunia jumchik arus sacerdote yaintrisha, Levita tutai, nu jinta weak, nuni aints jinta yantamen tepaun wainkayat, nusha nunisang tupnik nangkaikimiayi. ³³ Nunia Samarianmaya aints nu jinta winimiayi. Tura nu aintsun wainak wait anentramiayi. ³⁴ Tura olivo macharijai tura vinojai ni charuraurin yakaramiayi. Tura tarachjai penuntramiayi. Tura ni entsamtairin kenas juki, irau kanutinam jea tenap wainkamiayi. ³⁵ Kashin tsawaar wetas jeeniun jimia kuikian suwak: ‘Pai, ju aintska pengker waitrukta. Tura ju jeachamtaikia, waketkun ni tumashrinka akiimiaktatjai,’ timiayi. ³⁶ Ayu watska. ¿Ju kempatam aints pachismesha itieur nintimme? ¿Tu aintsua kasa ainau katsumkamuncha ni namangkea nunischa aneemiayi? —Jesús timiayi.

³⁷ Tu iniam Moisésa chichame nuikiartin aimiak:

—Katsumkamun wait anentramia nuwaitai, —timiayi. Tamati Jesús chicharak:

—Nekasam tame. Amesha nunismek turata, —timiayi.

Marta kai Maríjai pujamunam jeamuri

³⁸ Nunia Jesús jinta weak, chikich yaktanam jeamiayi. Tura nu yaktanmaya nuwa, Marta naartin Jesús aninik: Jearun wayaata, tusa untsukmiayi. ³⁹ Marta kai Maríka nu jeamuk pujau asa, Jesús aninik ayaamrus ni chichamen antú pujurmiayi. ✠ ⁴⁰ Antsu Martaka ni takatrin timiá nintimtau asa, Jesús aninik jiis chicharak:

—Apurua, ¿wína kair takatan winák winák inaitursa juka nintimsumek? Amesha yayiita tita, —timiayi.

⁴¹ Tamaitiat Jesús ayaak:

—Maj, Marta, takatrum timiá untsuri aa nuke nintimtame. ⁴² Turayatam kichik aa nuke yuumatame. Maríka antú puja juka nekas pengker aa nuna turawai. Tura asamtai antukchati tusan pengké surimkashtatjai, —timiayi.

11

Yus tu seataram tusa nuikartamuri (Mat. 6.9-15; 7.7-11)

¹ Chikich kintati Jesús aints atsamunam Yusen seak pujumiayi. Tura sea umisamtai, ni nuiniatiri kichik Jesús aninik chicharak:

—Apuru, imiakratin Juan ni nuiniatiri ainaun nuiniarmia nunismek Yus seat nuikiar-turta, —timiayi.

² Tama Jesús chicharak:

—Yus seatasrum wakerakrumka tu seataram:

✠ 10:28 (Mat. 22.35-40; Marc. 12.28-34) ✠ 10:39 (Juan 11.1)

'Ii Apaachiri Yus, nayaimpinam pujame nu ii nekas Apaachirinme.
Aints mash amin naarmin pachisar: Ameketme pengkeram turamiarti.
Ame aints inartin kinta wári jeati.
Ame wakeramuram nayaimpinmasha, tura nungkanmasha tuke ati.

³ Ju kintaka ii yutairi yuumaji nu sukartusta.

⁴ Tura chikich aints iin pasé awajtamsaru ainau tsangkurau akurningkia, ii tunaarisha nunismek tsangkukratkata. Tura tunaunum jearai tusam japkartuam ukukratkiip, antsu iwianchnumia uwentikiartukta. Maaketai.' Tu Yuska seataram, —timiayi.

⁵⁻⁶ Nunia ataksha ni nuiniatiri ainaun chicharak:

—Aints ni amikrin itiurkamnawaita tusar nintimrarmi. Atumsha amikrintin akurmeka, amikrum kashi japeng yajaya irastas taamtai, chikich amikrumi jeen weakrum, waiti kiramunam jearam chicharkuram: 'Amikchi, aints arakia aneachmau wina jearun irastas tayi. Tura wainiatun yuwatniuri winaruka pengké atsau asamtai, pang kampatmachik tsangkaturukta' tu seamaitiat, ⁷ atumi amikri waiti kiramunam chichartamak: 'Wina waittsuk asata. Jearka kiramuitai. Tura uchirsha wijai mash kanurar tepeenawai. ¿Tura asaramtai wisha nantakin amaschamin tepajai' turamintash? Atsa. ⁸ Antsu nekasam tajarme: Nuka atumi amikrintiat yuumamurmin suramsatas nantaachmataikia, atumka nekasrum yuumakrum seaj pujakrumningkia, yuumamurmin suramsatnuitrume. ⁹⁻¹⁰ Aints warina seamina nunaka juwinawai, tura warina eainawa nunaka waininawai. Tura winajai tinaunka waitincha uratinawai. Tura asamtai wikia atumin tajarme: Yus tuke seataram. Turakrumningkia yuumamurmincha suramsatatrume. Tura Yuse wakeramurin nekaatasrum wakerakrumningkia, Yuska nunasha nekamtikramatatrume. Tura Yus pujamunam jeatasrum wakerakrumningkia, Yuska waitin uratramtinuitrume.

¹¹ Uchirtin ainautirmesha nintimrataram: ¿Yaachia uchiri yaparak yurumkan seamaitiat, yurumkanka sutsuk kayan sua? ¿Tura yaachia uchiri namakan seamaitiat, namaknaka sutsuk napin sua? ¹² ¿Tura yaachia uchiri nujintan seamaitiat titingkin sua? ¹³ Atumka tunau ayatrumek, nekasrum atumi uchiri pengker aa nuke suarme. Atumka tuke turau asakrumin, atum Yus seakrumningkia, atumi Apaachiri nayaimpinam puja nuka nekas timiá pengker asa ¿ni Wakanin nekas pengker aa nunaka itiur suritramkat-ing? —Jesús timiayi.✠

Jesúska iwianchi kakarmarijai iwianchnaka akupawai timiauri

(Mat. 12.22-30; Marc. 3.20-27)

¹⁴ Nuna tusa ukuki, aints iwianch engkemtuam chichachu pujaun wainak, Jesús iwianchin jiiki akupkamiayi. Tura iwianch jiinkiamtai, chichatnasha paan chichakmiayi. Turamtai nuna wainkaru ainauka nintimrarmiayi. ¹⁵ Antsu chikich aints ainau chichainak:

—Juka iwianchi apuri Beelzebú kakarmarijai iwianch ainaun jiiki akupuweawai, —tiarmiayi.✠

¹⁶ Tinamtai chikich ainausha nekas Yus akupkamuashi tusar, Jesúsnekapsartas Yuse kakarmarijai wainchatai takat turata tusar iniasarmiayi.✠ ¹⁷ Tu iniinam Jesús tu nintiminaun nekau asa chicharak:

"Nintimrataram. Chikich nungkanmaya apu ainau kajernaikar kanakar pujasar maaninamtaikia, nu nungkaka wári mesertinuitai. Tura chikich jeanam iruntrar kajernaikar pujuinawaka nu jeancha wári ukukiartinuitai. ¹⁸ Tura Satanáscha nunisang ni inatirijai kajernaikar maaninamtaikia ¿ni inatirisha itiurak tuke Satanásnasha umirkarting? Tura atumka wína pachitsaram: Nuka Beelzebú kakarmarijai iwianch ainaun jii weawai, turututu asakrumin nunaka tajarme. ¹⁹ Antsu nu nekasainmatikia ¿atumi nuiniatiri ainau yana kakarmarijia iwianch ainaun jiikiar akupinawa? Tura nisha Satanása kakarmarijai turichuitji tinu asaramtai, atumka pe nuwaarme tusar

✠ 11:13 (Juan 14.13-14;15.7,16;16.23-24; 1Juan 3.21-22;5.14-15) ✠ 11:15 (Mat. 9.34;10.25) ✠ 11:16 (Mat. 12.38;16.1; Marc. 8.11)

nekamtikinawai. ²⁰ Antsu wikia Yuse kakarmarijai iwianch ainaun jiikin asamtai, atumsha paan nintimsaram: Yuska aints ainaun tu inawai tusaram nekaamnawaitrume.

²¹ “Aints nekas kakaram aa nuka saapin takus ni jeen nakaj pujamtai, ni jeen waririn ukusmaunaka kasarkachartinuitai. ²² Antsu nu aintska saapin takaku asa, ningki nintimias: Aints ainaun saapijai mash nepetkatatjai tau wainiat, nu aintsun nangkamasang kakaram aa nuka winák, niin nepetki saapirin juruki, nunia waririn yarurak jiinki, ni kasamkamurin chikich ainaun suawai.

²³ “Tura asamtai amikruchuka wina nemasruitai. Tura wina yaintsuk pujauka aints araka jingkiijin irumtsuk, antsu mengkakarti tusa, ajapua nunisang iwianchin yayaawai,” Jesús timiayi.✠

Iwianch aintsnumia jiinkisha waketkitnuitai timiauri

(Mat. 12.43-45)

²⁴ Nunia Jesús ataksha nuikiartak:

“Iwianch aintsnum engkema pujuu, nunia jiinkin asa, aints atsamunam wekaayat, nuni ayamsatatkama tujintak ataksha waketkitas aintsun eaknij wajatnuitai. Tura pengker pujusminun wainchaka nintimias: Aintsnum pujayatun wi jiinkimijaja nuni ataksha waketkitjai titinuitai. ²⁵ Tura ataksha waketki, nu aintsu nintin wainak angkan japimkamu shiiram iwiamua nunis atun wainkatnuitai. ²⁶ Tura nuna wainak, ataksha chikich iwianchin siete (7) niin nangkamasang pasé ainaun juki mash nu aintsu nintin engkemawartinuitai. Tura iwianch ainu nu aintsu nintin engkemtuamka, nuwik pasé pujumia nuna nangkamasang pasé nintimias pujustinuitai. Tura asamtai iwianch atumi ninti engkemawai tusaram wainkataram,” Jesús timiayi.✠

¿Nekas warastin warimpita? timiauri

²⁷ Aints iruntramunam Jesús chichaak wajai, nuwa kichik Jesúsán kakarman chicharak:

—Nukuram amin juretarmia nuka mumuntstamka tsakatmarmaru asa nekas warastinuitai, —timiayi.

²⁸ Tamaitiat Jesús ayaak:

—Antsu Yuse chichamen antukar miatrusarang umirinauka nuna nangkamasarang timiá warastinuitai tajame, —timiayi.

Pasé aints ainu wainchatai takat jiismi timiauri

(Mat. 12.38-42; Marc. 8.12)

²⁹ Aints ainu untsuri kautkaram, Jesús chicharak:

“Aints yamai pujuinauka pasé ainawai. Tura Yusen umirchau ainayat wainchati takatan wainkartas wakerinawai. Antsu yaanchuik Jonás turunamia nunisarang wainchati takatnaka wainkartinuitai.✠ ³⁰ Yus Jonásán chicharak: Nínivenmaya aints ainu uwentikrarti tusa, akupkamia nunisnak yamai pujuinauncha uwentikrartasan aintsu-tiatnak Yus akupkamuitjai.✠

³¹⁻³² “Jonás Nínive yaktanam Yuse chichamen etsermatai, nunia aints ainu ni tunaurin mash inaisarmiayi. Wi Jonásán nangkamasnak pujai waitinayat, junia aints ainu wi etsermaurun antinatsui. Antsu Yus tunau jiistin kinta jeamtai, Nínive yaktanmaya jakaru ainu nantakiar, yamai pujuinaun pachisar Yusen: Nu aints tunau ainawai tiartinuitai. Nuniasha yaanchuik Yus Salomónkan ni nekamtairin nukap susamu asamtai, chikich nungkanmaya apu nawantri arakia Salomónka chichamen antuktas tarimiayi. Wikia Salomónkan nangkamasnak ai waitinayat, junia nungkanmaya ainu wi etsermaunaka antinatsui. Antsu Yus tunau ainaun jiistin kinta jeamtai, nu nuwaka jakamunmaya nantaki, yamai pujuinaun pachis Yusen ujaak: Nu aints ainu tunau ainawai titinuitai,” Jesús timiayi.

✠ 11:23 (Mat. 12.30; Marc. 9.40) ✠ 11:26 (2.Ped. 2.20) ✠ 11:29 (Mat. 16.4;12.39; Marc. 8.12) ✠ 11:30 (Jon. 3.3-5; Mat. 12.41)

*Paaniun pachis timiaurin**(Mat. 5.15;6.22-23)*³³ Nunia Jesús ataksha nuikiartak:

“¿Aints kantiin akaa chingnanam uuktinkai? Atsa, aints kichkisha nunaka turinatsui, antsu jeanam wayaawaru ainau paan wainmakarti tusar yakí kentsartinuitai.✠

³⁴ “Atumi jiingkia kanti kapaawa nunisketai. Atumi jii pengkeraitmatikia, paan wainmaktinuitrume. Antsu atumi jii paseetmatikia, teenam pujuinawa nunisketrume.

³⁵ Tura asaram aneartaram. Atumi nintijai paan nintimuwearme nuni tee achati tusaram wainkataram. ³⁶ Atumi nintijai tunau nintimsuk antsu nekas paan nintimsaram pujakrumka, aints kashi kantiin takus wekaawa nunisketrume. Tura asakrumin aints ainau mash itiur pujarme tusar nunaka paan wainkartinuitai,” Jesús timiayi.

*Jesús fariseo ainaun tura Moisésa chichame nuikiartin ainauncha chicharkamuri**(Mat. 23.1-36; Marc. 12.38-40; Luc. 20.45-47)*

³⁷ Chichas umisamtai, fariseo aints Jesús aneartaram jearun yuwita tusa untsukmiayi. Turamtai Jesús jeanam waya, misanam yurumkan yuwatas keemsamiayi. ³⁸ Tura judío ainau nangkamiar: Yus pengker awajsatai tusar, tuke kijmiarar yuwatnuitji tu nintiminu wainiat, Jesúska kijmiatsuk pujamtai, fariseo nuna wainak: Maj ¿waruka aitkawa? tu nintimramiayi. ³⁹ Tu nintimmatai Jesús chicharak:

—Fariseo ainautirmeka, atumka pining tura puwat aya patatkeng nijarmawa tumawaitrume. Antsu atumi nintinkia tunau piaku asamtai, kasamtasha kasamuwearme. Tura pasé aa nuka mash turuwearme. ⁴⁰ Atumka nintinchawaitrume. ¿Yuska aintsu namangken ii wainji nuna najanachmakia? ¿Tura aintsu ninti ii waintsuji nunasha najanachmakia? ⁴¹ Tura asamtai atumka pengker nintimsaram chikich ainau wait anentakrum ni yuumamuri susataram. Antsu: Uwejrur kijmiarnaka nekasan Yusen pengker awajsatjapi tuuka nintimrashtinuitrume.

⁴² “Maj, fariseo ainautiram aneartaram. Atumi ajarinia árak menta tutain, tura chikich áraksha ruda tutain, tura chikich yurumak pachimtai irunusha timiá tuupich wainiatrum diez (10) juukrum, kichik Yus susatasrum akanuwearme. Nuka tuke inaitsuk turataram. Antsu tunaarinchau pujutka, tura Yus aneetka pachiatrume. Tura asaram nusha turataram tusan tajarme.

⁴³ “Maj, fariseo ainautiram aneartaram. Atumka miajuitjai tusaram, iruntai jeanmasha wayaaram, apu keemtainum timiá pengkernumsha keemsatasrum wakerarme. Tura junta wekaakuram, aints ainausha mash: Wína jiirsar aujtusarat tusaram wakerarme.

⁴⁴ “Maj, atumka aneartaram tajarme. Atumka jakau iwiarsamu wainchatiya tumawaitrume. Tura asaram aints iwiarsamun paan wainchau asar nájainawai. Tura aints ainausha nunisarang atumi chichamen antinayat, itiur nintimrume tusarka nekainatsui,” Jesús timiayi.

⁴⁵ Tamati Moisésa chichame nuikiartin kichik nuna antuk chicharak:

—Nuikiartinu, ame tu chichaakmeka, iin pachikratsam: Atumka pasé ainiarme tusam tukartakum tame —timiayi.

⁴⁶ Tama Jesús ayaak:

—Atumsha Moisésa chichame nuikiartin asaram aneartaram tajarme. Atumka aints chikich ainaun: Nekas meram aa nuka entsaktaram tayatrum, kichik uwejmijaisha yayit nakitawa nunisketrume. Tura asaram atumek nintimsaram chicham pengké umikchamin akupkaram atumsha umiachiatrum chikich ainau: Ju chichamka pachitsuk umiktaram tuwearme.

⁴⁷ “Atumi juuntri ainau Yuse chichamen etsernun maawarmia nuna iwiarsamuri shiiram ati tusaram iwiaruwearme. Tura asaram aneartaram. ⁴⁸ Atumi juuntri Yuse chichamen etsernun mau wainiatrumek, atumka nu iwiarsamu shiiram iwiarau asaram, atumi juuntri turuwarmia nuka pengkeraitai tarume.

✠ 11:33 (Mat. 5.15-16; Marc. 4.21; Luc. 8.16; 1.Ped. 2.12)

⁴⁹ “Tura asakrumin Yus mash nekawa nuka atumin pachis ju chichamnaka aamtikramiayi. Yus chichaak: ‘Wína chichamrun etserin ainaun, wína chichamrun akatran: Tu etserkataram tusan aints ainaun akupkatnuitjai. Wi turamtai chikichnaka maawartinuitai. Tura chikichnaka papeekiar pasé awajsartinuitai,’ timiayi. ⁵⁰ Tu aarmau asamtai nu nangkamtaik Yuse chichamen etserin ainaun maamurin, tura yamai kintatisha Yuse chichamen etserin ainaun maamurincha pachis, Yus yamai pujautirmin ininmastinuitrume. ⁵¹ Nu nangkamtaik Abelan ni yachí maamiayi, tura chikich Yuse chichamen etserin ainauncha maawarmiayi, tura Zacaríasnasha Yuse jeen ayaamas tangku epetinam takakmak pujaun maawarmiayi. Nu aints ainu maamurin pachis yamai pujautirmin Yuska ininmastinuitrume tajarme.✠

⁵² “Moisésa chichame nuikiartin ainautirmincha: Aneartaram tajarme. Aints ni jeen epeni, aints ainu nuni wayaacharti tusa, surimiak yawirin jurukmiawa nunisketrume. Tura asaram atumka nayaimpinmaka wayaashtinuitrume. Tura aints ainu nayaimpinam wayaatnun nekaawartas wakerinauka nekaacharti tusaram suritarme,” Jesús timiayi.

⁵³⁻⁵⁴ Jesús nuna tamati, Moisésa chichamen nuikiartin ainu, tura fariseo ainausha kakarman kakerkarmiayi. Tura suwirpiaku jiisar tsanumratai tusar: ¿Waring chichakaintai? tusar untsuri inintriarmiayi.

12

Pasé nintiminaun pachis etserkamuri

¹ Nunia aints untsuri warang kaunkaru asar, nawen mai najatnai wajaarmiayi. Turinamtai Jesús ni nuiniatiri ainaun chicharak:

“Fariseo ainu nangkamiar: Nekas chicham nuikiatjai tinayat anangkartin ainawai. Ni chichamengka pang pachimtaiya nunisarang ainawai. Pang pachimtai tuupich ayat pangnum pachimram pangkan mangkamtikui. Tumamtai pang apu ayat nitkangka tantaayaintai.✠ ² Aintsu chichamesha nunisarang ainawai. Yamai chicham ukar chichakmauncha ukunam paan nekaawartinuitai. Tura yamaikia aintsu turamurin nekaachminun waininayat, ukunam paan nekaawartinuitai.✠

³ “Tura asamtai kashi teeti chichawearme nunaka tsawai mash paan nekaawartinuitai. Tura atumi kanutirin pujusrum, yaitasrum chichawearme nunasha aints mash paan nekawarti tusar, aanum etseerartinuitai,” Jesús timiayi.

¿Yanak shamkartinuita? timiauri (Mat. 10.26-31)

⁴ Nunia Jesús ataksha chicharak:

“Amikur ainautirmin atumin tajarme: Aints atumin mantamawartas wakerutminamtaisha shamkairap. Atumin mantaminayat, atumi wakaninka maachartinuitai. ⁵ Tura yáki nekasrum shamkatnuitrume tusan ujaktajrume. Atum jakaram ji kajintrashtinum chumpimiatin asaram aya Yusek shamkataram.

⁶ “Atumka chingki cinco (5) ainia nusha jimiarchik jiru kuikijai surukminuitrume. Tura wainiat Yuska nu chingkingka kichkisha pengké kajinmatsui. ⁷ Tura atumin untsuri chingkin nangkamasang Yuska timiá anenmau asa, atumi intashi warutmak awa tusa nekapmarmawaitai. Tura asamtai atumin mantamawartas wakerutminamtaisha shamtsuk asataram,” Jesús timiayi.

Tunau pengké tsangkurashthinun pachis timiauri (Mat. 10.32-33;12.32;10.19-20)

⁸ Nunia Jesús ataksha chichaak:

“Nunasha tajarme: Aints wína pachitas chikich aints antinamunam: Wikia Jesús-nawaitjai taunka wisha aintsutiatnak Yus akupkamu asan, Yuse awemamuri antinamunam: Nuka wína aintsruitai titinuitjai. ⁹ Antsu aints wína pachitas chikich

✠ 11:51 (Gén. 4.8) ✠ 12:1 (Mat. 16.6;8.15) ✠ 12:2 (Mat. 10.26; Marc. 4.22; Luc. 8.17)

aints antinamunam: Wikia Jesúsnauchuitjai taunka wisha nunisnak Yuse awemamuri antinamunam: Nuka wína aintsruchuitai titinuitjai.✠

¹⁰ “Tura wikia aintsutiatak Yus akupkamu asan, wína pachitsar pasé chichainau-naka tsangkuratnuitjai. Antsu Yuse Wakanin pachisar pasé chichainaunka pengké tsangkurashtinuitjai.✠

¹¹⁻¹² “Atumka wina aintsur asakrumin, atumin achirmakar iruntai jea ainamunmasha, tura tunau nekatimasha, tura apu ainamunmasha juraminamtaikia, tura atumin ininminamtaisha, Yuse Wakani apu aiktinun atumin chichamtikramkatnuitrume. Tura asamtai ¿warintuk aimkataj? tura ¿warintuk chichaktaj? tuuka nintimrairap,” Jesús timiayi.✠

Kuikiaka nintimsashtinuitai timiauri

¹³ Jesús aints untsuri iruntramunam chichaak pujamtai, aints Jesús tari chicharak: —Nuikiartinu, wína apar jakau asamtai, wína yatsur apar kuikiarin akanak surusti tusam chichartusta, —timiayi.

¹⁴ Tamati Jesús chicharak:

—Aints yachijai kuikian suritnainamtai ¿yaachia ame susata tita tusasha inaitukma? —timiayi. ¹⁵ Nunia aints ainaun mash nuiniartas chicharak:

—Aneartaram. Aints kuikiartin tura untsuri warirtin pujayat tukeka pujuscham-nawaitai. Tura asamtai atumka kuikiartin wajastasan wakerajai tuuka nintimsairap, —timiayi.

¹⁶ Nunia nuikiartutai chichaman nuikiartak:

“Aints kuikiartin arakan ni ajarinian nukap juukmiayi. ¹⁷ Tura juuk nukap au asamtai: ¿Itiurkatjak? ¿Tura tuning ukustaj? tu nintimmiayi. ¹⁸ Nunia nukap nintimias: ‘Yamaikia nekas nintimrajai. Jea árak ukutai nekas tuupich asamtai, nunaka yumpungan, nekas nampurman jeamkatjai. Tura nuna jeamkan yurumkan juukan, tura araknasha juukan, tura warinchurnasha juukan, nuni mash matsaran, ¹⁹ nunia takakmatsuk pujusan, tura nukap yuwan, tura nukap umuran, tura nukap nakurusan untsuri musach pengké yuumatsuk pujustaj,’ tu nintimramiayi. ²⁰ Tu nintimmatai Yus chicharak: ‘Ameke nintinchawaitme. Ju kashiti jakatatme. ¿Turakmin warinchurmesha ame ukusmame nusha yanawa atata?’ timiayi. ²¹ Tura asamtai aints kuikian nintimtinak nukap ukuinayat, Yuskana nintimtinachu asar, nu aintsua nunisarang ainawai,” Jesús timiayi.

Yus ni uchiri yuumamurin nekawai timiauri
(Mat. 6.25-34)

²² Nunia ni nuiniatiri ainaun Jesús ataksha chicharak:

“Nunasha tajarme: ¿Warí yuwanak pujustaj, tura warinak entsartaj? tusaram, nuke nintimsarmeka pujusairap. ²³ Yus tuke iwiaaku pujustaram tusa pujutan suramu asa, tura atumi namangken najanau asa, atumi yutairincha tura atumi entsatirincha suram-satatrume. ²⁴ Chingki ainau jiiisrum: ¿Itiur pujuinawa? tusaram nintimrataram. Nuka araknaka arainatsui. Tura arakan juukar jeamasha ukuinatsui. Tu pujuinawainiat, Yus ni yuwatniurin suwawai. Yus atumin chingkin nangkamasang timiá anenmau asa ¿atumi yuumamurincha itiur suramsashting? ²⁵ Tura wikia untsuri kinta pujustaj takurmesha, kichik horaksha inangkakchamnawaitrume. ²⁶ Nu turunatakamaram tujintayatrumsa ¿warukaya yuta pachisrumsha, tura entsati pachisrumsha nukap nintimsarmesha pujarme?

²⁷ “Yangkur ainau nangkamiar yangkurkar wajainau nintimrataram. Nuka takakminatsui. Tura uruchnasha kutaminatsui. Tura apu Salomón yaanchuik pujumia nuka entsatirin timiá pengker entsariat, yangkura nuniska pengkerka iwiamamrachmiayi tusan tajarme. ²⁸ Nupaa ainausha yamaikikia shiiram ainayat, kashin tsawaar aints ainau charukar jiiinum epeawartinun wainiat, Yuska timiá pengker iwiamamtikin

✠ 12:9 (2.Tim. 2.12) ✠ 12:10 (Marc. 3.29) ✠ 12:11-12 (Marc. 13.9-11; Luc. 21.12-15)

asa, atumnasha entsatincha nuna nangkamasang shiirman suramsatnuitrume. Tura asamtai ¿warukaya Yuska nekasrum nintimtsurme? ²⁹⁻³⁰ Yusen nintimtichu ainau mash nungkanam pujuinauka tuke inaitsuk: ¿Warinak yuwataj tura warinak amurtaj? tusar tuke nintimsar pujuinawai. Antsu atumka tuuka nintimtsuk asataram. Atumi Apaachiringkia atumi yuumamurin pachis mash nekau asamtai, atumi yutairisha, tura atumi amutirisha pachisrum napchau nintimtsuk asataram. ³¹ Antsu Yuse wakeramuri nekasrum nintimrataram. Turakrumningkia atumi yuumamurincha mash suramsatatrume,” Jesús timiayi.

Nayaimpinmaka yuumatsuk pujustinuitrume timiauri
(Mat. 6.19-21)

³² Nunia ataksha Jesús chichaak:

“Wína aintsur ainautirmeka shamtsuk asataram. Atumka jumchik arumin wainiat, atumi Apaachiri nekas: Wijai pujustaram tusa wakerutmarme. ³³ Tura asamtai atumnau aa nuka surukrum yuuminak pujuinau susataram. Turakrum nayaimpinmaka kasa ainauka wayachartin asaramtai, tura entsatiram mamurchatin asaramtai: Nekasan nayaimpinam jeatasan wakerajai, tu nintimsaram pujustaram. ³⁴ Atum warí wakerarme nuka tuke atumi nintijai nintimsaram pujustatrume,” timiayi.

Atumi Apuri tuke aneakrum pujustaram timiauri

³⁵⁻³⁶ Nunia ataksha chicharak:

“Ju nuikiartamusha nintimrataram. Apu aints nuwenmaun jiistaj tusa weamtai, ni inatiri pengker umiu asa, jeanam pujus: Apur fiestanmaya taa waiiti uratrita tamati, waiitin wári uratiasan wakerajai, tu nintimias kantiin keemak nakaj pujawai. Atumka nu aintsu inatiriya nunisrumek atumi Apuri tatintri nakasrum pujustaram. ³⁷ Nu aintsu apuri waketki taa, ni inatirin kanutsuk iwiaj pujaun wainak waramtiksatnuitai. Nekasan tajarme: Nuka jea waya, ni wejmakrin aik yapajia, ni inatiri ainaun chicharak: Misanam pujustaram tusa, ni yutairin susatnuitai. ³⁸ Apu kashi japeng winak, turachkusha tsawaarai winak, ni inatiri iwiaj pujaun wainak nekas waramtiksatnuitai.✠

³⁹ “Nusha nintimrataram: Jeenniuka kasa aints tatinun niyá eemak nekawaitkungka, kanutsuk iwiaj pujus anear: Kasartukai tusa, tura jearun wayaawai tusa nakastinuitai. ⁴⁰ Wi aints ayatun Yus akupkamu asan, wisha nunisnak aneachmau tatin asamtai, atumsha anearum pujustaram,” Jesús timiayi.✠

Aintsu inatiri jimiaran pachis etserkamu
(Mat. 24.45-51)

⁴¹ Tamati Pedro iniak:

—Apuru ¿ju nuikiartamu etserme nuka iin tukartakmek tam? Turachkumsha ¿aints ainau mash nekaawarat tusamek tam? —timiayi.

⁴² Tu iniam Jesús aimiak:

“Ju nuikiartamusha nintimrataram. Atumka takatan wainua tumawaitrume. Aints arák irastas wetanak wajak: Wína jearun pujuinau yurumatin jeamtai, ¿yáki ni yuwatniurin susat tusa aintsun eawai. Nekas pengker umiaun tura paan nintimniun eak: Nu turati titinuitai. ⁴³ Nu aintsu inatiri ni takatrin miatrusang umik pujamtai, inamin taa nuna wainak inatirin waramtiksatnuitai. ⁴⁴ Nekasan tajarme: Ni inatiri miatrusang umiu asamtai, ni inakratin mash ninu aa nuna wainin ati tusa inaikiatnuitai. ⁴⁵ Antsu takatan wainin pasé aints asa: Apurka wárikia tachatatui, tu nintimias pujakka, chikich takau ainauncha, tura nuwa ainauncha pasé awajak, tura yutanha nukap yuj, tura amutincha nukap amuj nampea nampeaka ni apuri tatintri nakachmau asa, ⁴⁶ ni apuri aneachmau tari, inatirin nakachmaun wainak, chikich chichaman umichu ainaujai metek wait wajaktiniun susatnuitai.

⁴⁷ “Tura aintsu inatiri ni apuri wakeramurinka pengker nekayat umikchangka iwiaaku pujus nukap wait wajaktinuitai. ⁴⁸ Antsu chikich inatiri ni apuri timiaurinha antukchau

✠ 12:38 (Marc. 13.34-36) ✠ 12:40 (Mat. 24.43-44;25.1-13; 1.Tes. 5.2; 2.Ped. 3.10)

asa, napchau takakmak pujaksha iwiaaku pujus jumchik wait wajaktinuitai. Yus aints ainaun nukap susau asa ataksha: ¿Nusha ititurkamame? tusa ukunam iniastinuitai. Tura ni uchiri ainaun ni nekamtairin nukap susau asa ataksha: ¿Nusha ititurkamame? tusa nunisang ukunam iniastinuitai,” Jesús timiayi.

Jesús aints ainaun akankatnuitjai timiauri
(Mat. 10.34-36)

⁴⁹ Ataksha Jesús chichaak: “Aints ainau wína umirtukarti tusan wakerakun taawitjai. Tura asan yamaikia wína umirtukarat tusan wakerajai. ⁵⁰ Wikia nukap wait wajaktatjai. Tura nu wait wajaktinka wári jeat tusan wakerajai. ⁵¹ Atum wína pachitsaram: Aints ainau mash pengker nintimtunisar maanitsuk pujusarat tusa taawitai ¿tu nintimurtsurmek? Antsu wikia tajarme: Ju nungkanam tau asamtai aints ainauka kanakartinuitai. ⁵² Yamai nangkamas kichik jeanam cinco (5) aints pujuinau kanakartinuitai. Kampatam wína umirtukcharu ainauka chikich jimiaran wína umirtukaru ainaun kajerartinuitai. Turachkusha wína jimiar umirtukcharu ainauka kampatam wína umirtukaru ainaun kajerartinuitai. ⁵³ Tura asar aintska ni uchirin nakitrartinuitai. Tura uchisha ni aparincha nakitrartinuitai. Tura nuwasha nunisarang ni nawantrincha nakitrartinuitai. Tura nawantrisha ni nukurincha nakitrartinuitai. Tura chikich nuwasha ni najatin nakitrartinuitai. Tura najatisha ni tsatsarincha nakitrartinuitai,” Jesús timiayi.

Kinta tu tsawaartatui tusa timiauri
(Mat. 16.1-4; Marc. 8.11-13)

⁵⁴ Nunia aints ainaun chicharak: —Junia aints ainautiram, tsaa akaamunmanini yumi kajinramtai, yumi jiturtatui tusaram nekarme. Takurmin atum tarume nunisang jitawai. ⁵⁵ Tura surnumia nasenmataikia, esat atatui tarume. Takurmin atum tarume nunisang esatrawai. ⁵⁶ Anangkartin ainautiram, nayaim jiisrum yumi jiturtincha nuwá eemkaram nekayatrumsa, ju kintati wi chichaman atumin ujaajrume juka pachisrum: ¿Warina takua tawa tusaram waruka nintimtsurme? —Jesús timiayi.

Kársernum engkeatnun pachis nuikiartamuri
(Mat. 5.25-26)

⁵⁷ Nunia ataksha Jesús chicharak: “Tura atum nekas pengker pujustinun pachisrumsha ¿waruka atumek nekartsurme? ⁵⁸ Atumka tumaashitkurmeka, chikich aints atumin: Yamaik akirkata tusa tukumramak: Antsu akirchakminkia kársernum engketmawartatui tamatikia, apu pujamunam jeetamiartas, nijai tsaniasrum jinta weakrum, apu jeenkia jeetamtsaing, chicham iwarataram. Nu turachkurmeka, apu achirmak suntar ainaun akupturmak: Ju aintska kársernum engkeataram titinuitai. ⁵⁹ Tura nekasan tajarme: Atumi tumaashri mash metek akiimiatsuk pujakrumka, nuniangka pengké jiinkishtinuitume,” Jesús timiayi.*

13

Atumi nintimauri yapjiachkurmeka wait wajaktinuitume

¹ Nu kintati aints ainau Jesús ujaktai tusar tariarmiayi. Tura ujainak: Galilea nungkanmaya ainau waaka uchirin Yus susatai tusar mainak pujuinai, apu Pilato ni suntarin akupkam, nu aints ainaun maawar, nunia ni numpen waaka uchiri numpejai pachimrarmiayi. Nuna pachisar Jesús an ujakarmiayi. ² Tu ujainam Jesús chicharak:

—¿Atumka ititur nintimrume? ¿Atum nintimsarmeka: Nu aints jakaaruka chikich Galileanmaya ainaun nuna nangkamasarang timiá tunaarintin asaramtai maawari tarumek? ³ ¿Atsa! Antsu atumi nintimauri yapjiachkurmeka, atumsha nunisrumek jakatnuitume tusan tajarme. ⁴ Tura yaanchuik Siloénam yakí wajatiri kaya najanamu “torre” tutai ningki yumpunak ayaaramtai ¿dieciocho (18) aints jakaarmia

✠ 12:50 (Marc. 10.38) * 12:59 (Yus tunau jiistin kinta jeatsaing, atumi tunaaringkia inaisaram tsangkururta titaram, taku timiayi.)

nuka Jerusalénnumia ainau nuna nangkamasarang timiá tunaarintin asar jakarmiayi tarumek? ⁵ ¡Atsa! Antsu atumi nintimaui yapajiachkurmeka, atumsha nunisrumek jakatnuitrume tusan tajarme, —Jesús timiayi.

Numi higuera tutain pachis nuikiartamuri

⁶ Nunia Jesús ataksha nuikiartamun etserak:

—Aints ni ajarin numi higuera tutain araamiayi. Tura nukap musach arus: Nerekchayash tusa jiistas werimiayi. Tura wainiat nerekchamiayi. Ataksha jiimaitiat atsumiayi. Nunia ataksha jiimaitiat atsumiayi. ⁷ Tura nunia ajan wainiun chicharak: ‘Antukta. Musachjai metek nereatsuash tusan jiistan tarijai. Turayatun wainkachjai. Yamaikia ajakta. ¿Warukang nangkamnasha wajasat?’ timiayi. ⁸ Tamati ajan wainin ni apurin chicharak: ‘Atsa apuru, ju musachkeka wajasti. Yamaikia nu numi nantujen aangtuan, tangku ijincha matsatratjai. ⁹ Turamka nerekchatpiash. Antsu tuke nereachmataikia, nuniangka ajaktatme,’ timiayi.*

Ayamtai kintati Jesús nuwa punuapan tsuwarmauri

¹⁰ Nunia chikich ayamtai kintati Jesús iruntai jeanam waya, aints ainaun nuiniak pujumiayi. ¹¹ Nunia aints ainau iruntramunam nuwasha pujumiayi. Nu nuwaka yaanchuik iwianch engkemtuanu asa, dieciocho (18) musach punus wekainuyayi. Tura asa nakuintan cha pengké yumatnuyayi. ¹² Tu pujamtaí Jesús nu nuwan wainak untuk:

—Umaaru, punusam wekaayatun yamaikia angkan wajasume, —timiayi. ¹³ Nuna tusa uwejejai nuwan takasmiayi. Turam nuwasha nakuinia tupin wajasmiayi. Tura pengker wajas, Yus juuntaitai timiayi. ¹⁴ Tura Jesús nu nuwanka ayamtai kintati tsuwaru asamtai, iruntai jea juuntri kajak aints ainaun chicharak:

—Seis kinta aa nu takakmastinuitai. Nu kintati tsuwaamartaj tusaram tatinuitrume. Antsu ayamtai kintati tsuwaamartaj tusarmeka tachamnawaitrume, —tusa Jesús anantumtikiak timiayi.

¹⁵ Tamati apu Jesús chicharak:

—Chicham umichu ainautiram, ayamtai kintati tsuwamarairap tayatrumsha ¿ayamtaí kintati atumi waakarisha, tura atumi burrorisha yumin aartaj tusaram atiarum juwatsrumek? ¹⁶ Ju nuwaka Abrahama weari ayat, iwianch engkemtuanu asa, dieciocho (18) musach tuke jingkiama nunisang punus wekaju asamtai, ayamtaí kintati pengker wajasti tusanka ¿warukanak aitkashtaja? —timiayi.

¹⁷ Jesús nuna tamati, ni nemase ainau natsaararmiayi. Tura chikich aints ainau mash Jesús a pengker turamurin wainkar warasarmiayi.

Mostaza jingkiaji pachis nuikiartamuri

(Mat. 13.31-32; Marc. 4.30-32)

¹⁸ Nunia Jesús ataksha etserak:

—¿Atumsha itiu nintimrume? Yuse aintsri itiu yujainawa tusan, atumin ujaktinuitjarme. ¹⁹ Anturtuktaram. Yuse aintsri ainau mostaza jingkiajiya nunisarang ainawai. Aints mostaza jingkiain ni ajarin araam, nuka tsapai nunia tsakar, nunia nekas juun wajaayi. Tura kanaji timiá saram asaramtai, nanamtin ainau mostazan kanajin pasungminawai, —Jesús timiayi.

Pang pachimtai pachisar etserkamuri

(Mat. 13.33)

²⁰ Nunia Jesús ataksha chikich nuikiartamun etserak:

—Yuse aintsri ainau itiu yujainawa tusan ujaktinuitjarme. ²¹ Yuse aintsri ainau pang pachimtaiya nunisarang yujainawai. Pang pengker at tusa, nuwa pang pachimtaijai pangkan pachimui. Turam mash wapakrawai, —timiayi.†

* 13:9 (Jesús: Aints wina chichamrun umirtutsuk pujauka numi higuera neretsuk wajawa nunisketai, taku timiayi.)

† 13:21 (Yuse aintsri ainausha mash nungka ainamunam tu yujartin ainawai, taku timiayi.)

Waiti tuupchin pachis etserkamuri
(Mat. 7.13-14;21-23)

²² Nunia Jesús Jerusalénnum jeataj tusa, yakat juunnasha tura tuupchincha nangkaatsuk kichik kichik yaktanam aints ainaun nuiniaki wemiayi. ²³ Tura weamtai, aints Jesúsani iniak:

—Apuru ¿Yusnum uwemratin ainia nu jumchikiashi? —timiayi. Tu iniam Jesús aimiak:

²⁴ —Nekasam tame. Yus pujamunam pujustasrum wakerakrumka, waiti tuupchinam wayaataj tusaram wakeruktaram. Antsu aints untsuri nuni wayaawartas wakerinayat, wayaawartatkamawar tujinkartinuitai tajarme. ²⁵ Jeentin waitin epeniamtai, atumsha aanum wajasrum, waiti awatkuram: ‘Apurua uratrita,’ takurmincha, atumin airmak: ‘¿Tunianskitrum? Wikia wainchawaitjarme,’ turamtinuitrume.✠

²⁶ “Turamatai atum chicharkuram: ‘Antsu iisha amijai iruntrar yurumak yuwakur, tura amuti amakur pujuyaji. ¿Tura waruka nekartsume? Ii yaktarin wekaasam, nuikiartututcha ame nuikiartinuyame,’ titinuitrume. ²⁷ Atum takurmin jeentin atumin airmak: ‘Ataksha tajarme: ¿Atumsha tunianskitrum? ¿Wikia wainchawaitjarme tajarme nuka waruka antatsrume? Tunau takau ainautiram mash winingkia winitsuk waketitaram,’ atumin turamtinuitrume.✠

²⁸ “Tura jeentin turamu asamtai Abrahamsha, tura Isaacsha, tura Jacobsha, tura Yuse chichamen yaanchuik etserin ainausha mash Yus pujamunam pujuinau wainkaram, antsu atumka aanum japamu pujusrum nukap juutkuram naim esairam katertakrum kanaktinuitrume. ²⁹ Tura judfochu ainu tsaa taakmanumaninisha, tura tsaa pajeninisha, tura tsaa jeamunmaninisha tura atu pajeninisha, mash metek kaunkar Yus pujamunam yuwaartinuitai.✠

³⁰ Tura yamai mianchau ainausha ukunam Yusnum chikich ainaun nangkamasarang artinuitai. Tura: Wikia chikich ainaun nangkamasketjai tumamin ainu ukunam mianchau artinuitai,” Jesús timiayi.✠

Jerusalénnum pujuinaun aneak juutmiauri
(Mat. 23.37-39)

³¹ Nunia nu kintati fariseo ainu jumchik Jesúsani tariar chicharinak:

—Apu Herodes amin mantamatas wakerawai. Tura asamtai juniangka jiinkim yajá nungkanam weta, —tiarmiayi.

³² Tu tinam Jesús chicharak:

—Yamaikia weriram nu pasé nintintin ujaakrum: Antukta, wikia yamaisha, tura kashincha jumchik kinta pujusan, iwianch ainaun jiikin akupkatatjai. Tura jau ainauncha tsuwartatjai. Tura wina kintar jeamtai inaisatatjai, tawai titaram. ³³ Turayat Yuse chichamen etserin ainaun chikich nungkanmaka maacharmiayi, antsu tuke Jerusalénnumak maawarmiayi. Winasha nunisarang Jerusalénnum mantuwartin asaramtai, jumchik kinta arusan nuni jeatatjai.

³⁴ “Jerusalénnumia ainautirmin tajarme: Atumka Yuse chichamen etserin main aiyarume. Tura Yus wina chichamur etserkataram tusa, akupturmaku wainiatrumek, kayajai tukuram mainuyarme. Atash ni uchirin nanapejai tektuktas untsuawa nunisnak: ¿Yusnum uwemratarum tusan warutmak untsuyajrum? Tura wainiatrum nakitrinuyarme. ³⁵ Antsu wi jakamtai atumka: Yus akupkamuka nekas pengkeraitai tutsuk pujakrumka, winaka pengké waitkashtinuitrume. Wi ukukmiaka, atumi yaktari itarak atinuitai. Tura asamtai aneartaram tajarme,” Jesús timiayi.

14

Jesús aints jaun tsuwarmauri

✠ 13:25 (Mat. 25.11-12) ✠ 13:27 (Sal. 6.8) ✠ 13:29 (Mat. 8.11-12;22.13;25.30) ✠ 13:30 (Mat. 19.30;20.16; Marc. 10.31)

¹⁻² Nunia chikich ayamtai kintati fariseo juuntri Jesúsán yuwita tusa untsuam, Jesús ni jeen wemiayi. Tura nuni jea, aintsu namangken imiurun wainkamiayi. Turamtai chikich fariseo irunu ¿itiurkanpi? tusar jijj pujuriarmiayi. ³ Tuminamtai Jesús Moisésa chichamen nuikiartin ainauncha tura fariseo ainauncha iniak:

—¿Atumsha itiuur nintimrume? ¿Ayamtai kintati aints tsuwarminkai? ¿Turachkusha tsuwarchamnaukai? —timiayi.

⁴ Tamati aimtsuk pujuarmiayi. Tuminai Jesús jaun takas tsuwarmiayi. Nunia: Jeemin waketkita tusa akupkamiayi. ⁵ Nunia fariseo ainaun Jesús chicharak:

—Atumi uchiri tura atumi waakarisha nungka taimunam ayaaramtai, ¿ayamtai kinta au wainiatrumek wári jikchamnaukitrum? —timiayi.✠

⁶ Tu tamaitiat aimkartatkamawar pengké aimkacharmiayi.

Nuwenmanum untsukmau ainaun pachis etserkamuri

⁷ Tura nu jeanam untsukmau ainau wikia miajuitjai tusar, keemtai nekas pengkernum keemsartas wakerinamtai, Jesús nuna wainak nu aints ainaun nuiniak:

⁸⁻⁹ —Aints atumin nuwa nuwatmanum untsurmakaramtaikia, keemtai nekas pengkernumka keemsairap. Keemtai nekas pengkernum keemsakrumningkia, chikich aints atumin nangkatsang juun taamtai, atumin untsurmakma nuka tarutmi chichartamak: ‘Ju aints juni keemsati tusam wajaktia,’ turamatai atumka natsaarum wajakrum, nu keemtainkia ukukrum, chikich keemtai mianchau amanum keemsatnuitrume. ¹⁰ Antsu nuna turunawai tusaram, aints atumin untsurmakaramtaikia, keemtai mianchau amanum keemsataram. Nuni keemsakrumningkia, atumin untsurmakma nuka tarutmi chichartamak: Amikru, au nekas pengker keemtainum keemsata turamtinuitrume. Turamu asamtai chikich untsukmau ainau nuna antukar: Juka nekas pengke aintsuitai turamiartinuitai. ¹¹ Tura asamtai aints ningki nintimias: Wikia miajuitjai taunka Yuska: Mianchawaitai tawai. Antsu aints: Mianchawaitjai tumamunka Yuska: Miajuitai tawai, —Jesús timiayi.✠

¹² Nunia niin untsukmaurin chicharak:

—Ameke aints ainau yuwitaram tusam untsuktasmeka, niisha winasha iikasang untsurkami tusamka, amikrumsha, nunia yachim ainausha, nunia chikich wearam ainausha, nunia amijai patasar kuikiartin irunusha: Wina jearun yuwita tusamka untsukaip. Ame nu aints miaju ainaun untsuamka, niisha amincha nunisarang yuwita tusar untsurminamtaikia, ni yutairingkia akiimiakmawa nunisang atinuitai. ¹³ Antsu yuwitaram tusam, aints ainau untsuktasam wakerakmeka, kuikiartichu ainausha, nunia uweje mutchau ainausha, nunia wekaichau ainausha, nunia wainmichu ainausha yuwitaram tusam untsukta. ¹⁴ Nu turakminka niisha akirmakchartinuitai. Antsu pengke aints ainau jakamunmaya nantakiartin kinta jeamtai, Yus aminka akirmaktinuitai. Turatin asamtai warastinuitme, —Jesús timiayi.

Yuta yuwamu fiesta pachisar nuikiartamu
(Mat. 22.1-10)

¹⁵ Tamati chikich aints nu misanam yuwak pujus Jesúsán chicharak:

—Yus pujamunam yutan yuwinauka nekasar warainawai, —timiayi.

¹⁶ Tamati Jesús nuikiartutai chichaman etserak:

—Antukta. Aints fiestan najanatas nu kintati yuwitaram tusa, aintsun untsurin chichaman akuptukmiayi. ¹⁷ Tura mash umisamtai, ni inatirin akupak: ‘Yamaikia winitaram. Yanchuk mash umismawaitai, tawai tita,’ tusa untsukmau ainamunam akupkamiayi. ¹⁸ Turamaitiat untsukmau ainau mash: ‘Wait aneam tsangkuturta, wikia winichmin nekapeajai,’ tusar apu inatirin ujakarmiayi. Tura nu nangkamtaik untsukmauka chicharak: ‘Ajan yamai sumaku asan, jiiitaj tusan wetatjai. Wait aneam tsangkuturta tawai tita,’ timiayi. ¹⁹ Tura chikitcha chicharak: ‘Wikia waakan diez (10)

✠ 14:5 (Mat. 12.11) ✠ 14:11 (Mat. 23.12; Luc. 18.14;22.26)

sumarmaku asan ¿jimiarchik jimiarchik apatkan itieur wekaasaintak? tusan nekapsa-tasan weajai. Tura asan winichminuitjai. Wait aneas tsangkuturuti tawai tita,' timiayi. ²⁰ Tura chikitcha chicharak: 'Wikia pengké yamai nuwan nuwatkau asan winichmin nekapeajai,' timiayi. ²¹ Tu tinam apu inatiri waketki, ni apurin jea ni timiaunaka mash ujakmiayi. Tu ujaam, apu kajek ni inatirin ataksha chicharak: 'Yamaikia yaktanam tungkajin jinta ainamunam, tura jinta tsererchinmasha wári weme, nuni kuikiartichu ainausha, tura uweje mutchau ainausha, tura wainmichu ainausha, tura wekaichau ainausha, mash juni ikiankata tusa akupkamiayi. ²² Tura akupkam, inatiri ayu tusa we, aints ainaun ikiankau asa, apurin weri chicharak: 'Apuru, ame turutmiame nunaka miatrusnak umikjai. Tura chikich aints keemsamin angkantaitai,' timiayi. ²³ Tamati apu chicharak: 'Ayu, yamai ataksha jiinkim, jinta tsererchinam weme, tura ajanam pujuinamunmasha weme, aints irunu wainkam nusha untsukam juni itata. Wína jear piakat tusan wakerajai, apu timiayi. Nunia ni inatiri ainaun ataksha chicharak: ²⁴ Wikia nekasan atumin tajarme: Aintsun eemkan untsukarmaja nuka wijaingkia kichkisha yuwachartinuitai,' timiayi, —Jesús timiayi.*

Jesús ni aintsri ainau pujustintrin pachis etserkamuri

(Mat. 10.37-38)

²⁵ Nunia aints untsuri Jesúsan nemariarmiayi. Tuminamtai pajas jiis, Jesús nu aints ainaun chicharak: ²⁶ "Aints ni aparincha, tura nukurincha, tura nuwarincha, tura uchirincha, tura yachiincha, tura umajincha wína nangkamasarang aneau asa, tura winasha nemartak wait wajatan nakitajai tauka wínaka nemartuschatnuitai. ²⁷ Tura aints wína nemartustas wakerayat, mantuwari tusa shamak nemartutan nakitakka wínaka nemartuschatnuitai.✠

²⁸ "Atum ainautiram, juun jea kayajai jeamkatasrum wakerakrumka, nuka nángkamt-suk ¿kuikian warutmak japawaintaj? ¿Kuikiar jeatpiash? tu nintimsaram jeamu wearme. ²⁹ Aints nuna nintimtsuk waurtus jean jeamkatas nangkamayai, antsu kuikiarin amuak, jean jeamtan umitsuk inaisamtaikia, aints ainau nuna wainkar wishikinak: ³⁰ 'Jiistaram. Ju aintska jean jeamkatas nangkamayai umiktatkama tujinkayi,' tiartinu- itai. ³¹ Chikitcha nintimrataram: Apu chikich nungkanmaya apurijai mesetan najanatas wakerak maanitan nangkamtsaing, ni suntari ainaun mash irumrar diez warang (10,000) amataikia, chikich apu veinte warang (20,000) suntarjai winawa nuna nepetkainjash tusa nintimui. ³² Tura nepetkachmin nekapeak, wína nepetukai tusa, ni nemasen arák pujaunak: Maaniachmi tusa chichaman akupawai. ³³ Atum ainautirmesha nunisrumek, wína nemartustasrum wakerayatrum, atumnau aa nu mash inait nakitakrumka, winaka nemartuschatnuitrume," Jesús timiayi.

Weea tumawaitrume tusa nuikiartamuri

(Mat. 5.13; Marc. 9.50)

³⁴ Nunia Jesús ataksha nuikiartamun etserak: "Weeka nekas pengkeraitai. Tura wee michumangka ¿itiur ataksha yapaktinuita? ³⁵ Wee michumangka, árak pengker tsapait tusar, nujaingkia nungkasha iwiarashtinuitai, tura numi pengker tsakarti tusar, nantujencha matsatrashtinuitai. Antsu wariksha iturkachmin asamtai, aya japatnuitai. Aints ju chichamnaka antukar nintimrarti," Jesús timiayi.†

15

Uwija mengkakaun pachis nuikiartamuri

(Mat. 18.10-14)

* 14:24 (Yus aints ainaun wini winitaram tusa untsuamaitai anturkarchatnun pachis nunaka timiayi.) ✠ 14:27 (Mat. 16.24; Marc. 8.34-35; Luc. 9.23; Juan 12.24) † 14:35 (Atumsha wína umirtutsuk pujakrumka, winaka nemartuschatnuitrume taku timiayi.)

¹ Jesús chichaamtai, kuikian juu ainausha tura chikich tunaarintin ainausha mash antukmi tusar kautkarmiayi. ² Tura asaramtai fariseo ainausha, tura Moisésa chichame nuikiartintin ainausha Jesúsán pachisar aujmatinank:

—Auka tuke tunaarintin ainaun pengker awajui. Tura tuke nijai iruntrar yuweenawai, —tunaiarmiayi.✠

³ Tu aujmatinam Jesús nuna antuk nuikiartutai chichaman uwija wainiun pachis etserkamiayi. Tura etserak: ⁴ “Atum ainautiram nintimrataram. Aints kichik pachak uwijartin kichik mengkatukam, noventa y nueve (99) uwija matsatunka ukuki, uwijarin mengkakaun eaktas werawapi. ⁵ Tura we uwijarin wainak, yakajin wangkeas nukap warawawai. ⁶ Tura ni jeen waketki, ni amikri ainaun, tura ni irutkamurincha ikiaanank untsuk: ‘Uwija mengkakaun wainakajai. Tura asamtai wijai warastaram,’ tawai. ⁷ Tura Yuscha nunisang aints noventa y nueve (99) wina tunaaruka atsawai tinaun wainkangka miatruska waraatsui. Antsu kichik tunaarintin ni nintimaurin yapajia Yusen: tsangkutrutta tamatikia, Yuska nu aintsun wainak, kichik au wainiat, noventa y nueve nangkamasang warastinuitai tajarme,” Jesús timiayi.✠

Kuik mengkacamun pachis nuikiartamuri

⁸ Tura ataksha chicharak:

“Chikich nuikiartutai chichamnasha tajarme: Nuwa diez (10) kuikian takaku nunia kichik mengkacamtai, wainkataj tusa kantiin keemak, jean mash japimiak nu kuikianka eawai. ⁹ Tura kuikiarin wainak ni amikri ainauncha untsuk, tura ni irutkamurincha untsuk: ‘Kuikian mengkacamaja nunaka wainakajai. Tura asamtai wijai warastaram,’ tawai. ¹⁰ Tura asamtai tajarme: Kichik tunaarintin ni nintimaurin yapajia Yusen tsangkutrutta tamatikia, Yuse awemamuri ainau nu aintsun wainkar, nuwa kuik mengkakaun wainak warawawa nunisarang warainawai,” Jesús timiayi.

Aints ni uchirin tsangkuramun pachis etserkamuri

¹¹ Nunia Jesús ataksha nuikiartutai chichaman etserak:

“Aints jimia uchirtin pujumiayi. ¹² Tura ekeri amia nu ni aparin chicharak: ‘Apaachia, ame jakaakmin kuikiar winar atata nu yamaik surusta,’ timiayi. Tu seam ni apar: Ayu tusa, jepen akantuk ninu aa nuna susamiayi. ¹³ Tura jumchik kinta nangkamaramtai, nu natsaka ninu aa nuna mash suruk, kuikiarin chumpia chikich nungkanam yajá wemiayi. Tura chikich nungkanam we nuni jea, nangkami pujus ni wakeramurijai kuikiarin mash amukmiayi. ¹⁴ Tura kuikiari mash amukamtai, nu nungkanmasha tsuka asamtai, nisha yuwatatkama yuumakmiayi. ¹⁵ Tura asa: Takatan eaktaj tusa, aints kuchirtinum jeamtai, nu aintska: Kuchir waitrukta tusa natsan akupkamiayi. ¹⁶ Tura kuchin yurin pujuinamunam jea, yaparak kuchi yutairincha yuwatas wakerau wainiat suritinak pengké susacharmiayi. ¹⁷ Tura suritinam wake mesek nintimias: ¿Wina aparun jeen ni inatirisha warutmak pujuina? ¿Tura yutairisha warutmak ampinu wea? Antsu wikia juni tsukajai wait wajajai. ¹⁸ Tura wina aparun waketkin titatjai: ‘Apaachi, wikia Yusjai tura amijaisha tunau wajasjai. ¹⁹ Tura asan yamaikia ami uchiram wajatnaka natsaamajai. Antsu ami inatiram takakmina nunisnak wisha takakmastajai titatjai, tu nintimramiayi. ²⁰ Nunia ni aparun jeen waketkimiai.

“Turamtai ni aparun uchirin winaun wainak wait anentramiayi. Tura ampuki weri uchirin minakas mejeasmiayi. ²¹ Turam nu natsa aparin chicharak: ‘Apaachi, wikia Yusjai tura amijaisha tunau wajasjai. Tura asan yamaikia ami uchiram wajatnaka natsaamajai,’ timiayi.

²² “Tamaitiat aparun ni inatirin chicharak: ‘Wári wejmak nekas shiiram aa nu antsrami tusaram itataram. Tura uwejnun wetaisha wemamtikiami tusaram itataram. Nunia sapatcha wemamtikiami tusaram itataram. ²³ Nunia waaka uchiri nekas apu aa nu maaram. Tura maaram wári inarataram. Turar iruntrar yuwar nunia nakurusmi. ²⁴ Juka wina uchir jakawa nunisang pujuyayi. Antsu yamaikia ataksha iwiaakun

✠ 15:2 (Mat. 9.10-11; Luc. 5.29-30) ✠ 15:7 (Juan 10.1-16; Hebr. 13.20)

wainkajai. Juka mengkatarkamiayi timiaja nunaka yamaikia wainkajai,' timiayi. Tu tinamu asar fiestan najanawarmiayi.

²⁵ “Tura jeanam nakurinak pujuinai, nu aintsu uchiri eemkaurisha ajanam takakmak pujumiayi. Tura takatan umis taa, nangku umpuamuncha antuk, nunia arawir tuntuyamuncha antuk, tura yaaminauncha antuk: Jiitaj tusa tarimiayi. ²⁶ Tura tari anumak wajas, ni apari inatirin untsuk: ‘¿Waruka aitkinawa?’ tusa iniasmiayi. ²⁷ Tu iniam nusha chicharak: ‘Yachim tayi. Tura yachim jatsuk tau asamtai, aparam waaka uchiri nekas apu aa nu maataram turamji. Tamati fiesta najankur aitkaji,’ timiayi. ²⁸ Tu ujaam uchiri kajek jea waaitnasha nakitmiayi. Turamtai aparisha ni uchirin weri chicharak: ‘Uchirua wayaata. Tura wayaam yachim jiista,’ timiayi. ²⁹ Tamaitiat uchiri ayaak: ‘Apaachia anturtukta. ¿Wikia aminka miatrusnak umirkun ami inatirmea nunisnak tuke takakmakun warutam musachik pujaja? Nusha amesha nekarme. Turayatum ameka: Amikrumjai fiesta najanatararam tusamka, chipu uchiri kichkisha suruweatsme. ³⁰ Antsu aminu uchirmeka ami kuikiarmin nuwa kungkatip ainaujai tura ni wakeramurijai mash amukusha ¿waruka waaka uchiri apu aa nusha maamsha aitkame?’ kajes timiayi. ³¹ Tamaitiat apari chicharak: ‘Uchiru, ameka wijai tuke pujame. Tura winar aa nuka mash aminuitai. ³² Yachimka jakawa nunisang pujuya nu yamaikia iwiaaku ataksha tayi. Nuka mengkatarkamiayi timiaja nunaka yamaikia wainkajai. Tura asamtai nekasar fiesta najankur warastinuitji,’ uchirin timiayi.”

Jesús tusa nu nuikiartutai chichaman nuikiartimiayi.*

16

Jea wainiun pachis nuikiartamu

¹ Nunia Jesús ni nuiniatiri ainaun chikich nuikiartamun nuiniak:

“Aints kuikiartin ni inatirin: ‘Jear waitrukta,’ tusa ukukmiau waininayat aints ainau kuikiartinun ujainak: ‘Jeemin wainuka kuikiarmin nangkami japui,’ tiarmiayi. ² Tu tinam ni jeen wainuncha untsuk: ‘¿Amincha pachitmasar warina turaminawa? Yamaikia wina jear wainuka achatatme. Tura asamtai ¿wína kuikiarjai surukmausha ititurkamame? tusam nu aaram surusta’ timiayi. ³ Tamati ningki nintimias: ‘Maj, apur takatrun jurutrau asamtai, ¿wisha ititurkatjak? Tura wína kakarmar atsau asamtai, nungka tautnasha takakmaschamawaitjai. Tura aints ainaun kuik nangkamrum surustaram tusan seamkinij wajatnaka natsaamajai. ⁴ Tura yamaikia nunaka turatatjai. Wina takatur atsau asamtai, aints ainau wína jearun pujuita turutiarti tusan, yamaikia nintimratjai’ timiayi. ⁵ Tu nintimias ni apurin tumaashmiakaru ainaun mash kichik kichik winitaram tusa untsukmiayi. Tura eemak jearmia nuna chicharak: ‘¿Wína apur warutma tumashitme?’ timiayi. ⁶ Tu iniam nisha aimiak: ‘Olivo macharin cien (100) tarrun tumashmiamjai,’ timiayi. Tamati kuikian wainin chicharak: ‘Pai, ju papikia tumaashrum aarmawa juka jukim, wári keemsam chikich papinum: Cincuenta (50) tarrun tumashmiamjai tusam aattrurta,’ timiayi. ⁷ Nuna tusa ukuki, chikich aints taamtai: ‘¿Amesha warutam tumaashitme?’ tu iniam, nusha aimiak: ‘Trigon cien (100) sakan tumaashmiamjai,’ tamati, nunasha chicharak: ‘Pai, ju papikia tumaashrum aarmawa juka jukim, chikich papinum: Ochenta (80) sakan nunak tumaashmiamjai tusam aattrurta,’ timiayi. ⁸ Nunia jean wainu apuri nuna nekaa chichaak: ‘Timiá anangkartinka timiá nintipiapi awita,’ timiayi.”

Jesús nu nuikiartamun umis paan etserak:

“Yusen umirchau ainau Yuse uchiri ainau nangkamasarang nintip ainawai. ⁹ Kuikian wakerinauka tuke tunau takau ainawai. Tura asamtai tajarme: Atumka chikich ainau atumi kuikiarjai yaingtaram. Turaram atumi kuikiari amukamtai Yus: Wína jearun tuke pujustaram tusa atumin juramkitnuitrume.

* 15:32 (Aints ni tunaarin inais, Yusen tsangkuturta tamatikia, Yuscha waraawai taku timiayi.)

¹⁰ “Aints jumchik takakiat nujai pengker aa nuna turakka, nukap tákaka nujai metek turatnuitai. Antsu aints jumchik tákaka nujai pengker aa nuna turachkungka, nukap tákaka nujaisa pengker aa nunaka turashtinuitai. ¹¹ Tura asamtai ju nungkanmaya kuikiartin ainau chikichan anangkinawa nunisrumek pujakrumka ¿nayaimpinam nekas pengker pujustin takatcha itiurak takakmastaram? ¹² Tura atum ikiamsamu tenapkesrum wainchakrumningkia ¿Yus atumin suramsatas wakera nunaka itiur suramsatume?✠

¹³ “Apu jimiar metek nintimtsuk pujuinaunka aints kichkisha umirkartatkama tujintinawai. Antsu kichnaka nakitinak kichan aneenartinuitai. Tura kichkin umirinak, kichnaka pachischartinuitai. Tura asamtai atumka warin chu ainau aneakrumka aya nuke aneetaram. Antsu Yus aneakrumka aya Yusek aneetaram. Antsu mai aneakrumka nuka yumtinuitai,” Jesús timiayi.✠

¹⁴ Tamati fariseo ainau nuna antukar, kuikian tuke aneenau asar, Jesús an wishikrarmiayi. ¹⁵ Tuminamtai Jesús chicharak:

“Atumka wína pengke aintsuitme turutiarat tusaram, aints ainau ananguk wearme. Yuska atumi nintinka nekartamrume. Tura asa aints ainau nekasar wínaka: Miajuitme turutiarat tu nintiminaunka Yuska nakitawai,” Jesús timiayi.

Yaanchuik Yuse chichame etserkamun tura yamai etserkamuncha pachis timiauri

¹⁶ Nunia Jesús ataksha etserak:

“Juan Yuse chichamen etsertsang, aints ainau Moisésa chichamen antuku armiai. Tura yaanchuik Yuse chichamen etserin ainau etseriarmia nunasha antuku armiai. Tura Juan taa, Yus itiur pujawa tusa, yamaram chichaman etsertan nangkamamiayi. Tura nu chichamnasha yamaisha tuke etserjai. Tura asamtai aints ainau Yus pujamunam pachitsuk wayaatar wakerinawai.✠

¹⁷ “Tura nayaimpisha tura nungkasha meseatsang, Moisésa armauringkia pengké tuupchiksha yapajniashstinuitai. Antsu mash armawa nunisang umiktinuitai,” Jesús timiayi.✠

Nuwa japashtinun pachis etserkamu

(Mat. 19.1-12; Marc. 10.1-12)

¹⁸ Nunia Jesús ataksha chichaak:

“Aints ni nuwarin ajapa ukuki kichan nuwatkungka, nekas tunau wajawai. Tura aints nuwan ajapamun nuwatkausha nunisang tunau wajawai,” timiayi.✠

Jimia aints jakamurin pachis etserkamu

¹⁹ Tura Jesús ataksha chikich chichaman etserak:

“Aints kuikiartin wejmakan akikian entsar shiirman pujuyayi. Tura kintajai metek fiestan najanak nakuru pujuyayi. ²⁰ Tura chikich aints kuikiartichu Lázaro naartin kuchaprintin asa, kuikiartinu jee aarin ayaamas pujuyayi. ²¹ Tura timiá yaparau asa, kuikiartin yuwamu misanmaya kakeekaun yuwatas wakerimiayi. Tuma pujaun yawaa ainau ni kuchaprin nukatrarmiayi. ²² Tura kintari jeamtai, kuikiartichuka jakamiayi. Tura jakamtai, Yuse awemamuri tariar, ni wakani Abrahamjai tsanias pujusti tusar, Yusen umirkau jakaru matsamtainum jukiarmiayi. Kuikiartichu jakau ai, kuikiartincha ukunam jakamiayi. Tura jakamtai namangken iwiarsarmiayi.

²³ Tura kuikiartinu wakaningkia tunau ainau wait wajainamunam jeamiayi. Tura nuni jea, nukap waitnas pujus pangkai jiiimias, Abraham arák pujaun wainkamiayi, tura Lázaroncha nijai tsanias pujaun wainkamiayi. ²⁴ Tura wainak kakar untsuak: ‘Apaachiru Abraham, wait anentrurta. Turam juni Lázaro akupturkata. Wikia juni ji kajintrashtinum waitnasan pujajai. Tura asamtai juni taruti, tura tsaranchikijai yumin chupir inairun jumchikia michatmamtikrutati,’ timiayi. ²⁵ Tamaitiat Abraham ayaak:

✠ 16:12 (Mat. 25.21-30; Luc. 19.13-27) ✠ 16:13 (Mat. 6.24) ✠ 16:16 (Mat. 11.12-13) ✠ 16:17 (Mat. 5.18)

✠ 16:18 (Mat. 5.32; 1.Cor. 7.10-11)

'Uchiru nintimrata. Ameka iwiaaku pujakum, yuumatsuk wait wajatsuk pujuyame. Antsu Lázaroka nukap wait wajaj pujuyayi, tura yamaikia juni ayamui. Tura ame atak iiksamek wait wajame. ²⁶ Tura mura waach juun wakachmin asamtai, junia atumin winitramiartatkamawar tujintraminawai, tura atumniasha juni winiartatkamawar tujintinawai,' Abraham timiayi.

²⁷ Tamati kuikiartin ataksha chicharak: 'Antsu Apaachiru Abrahamama wait aneasam, Lázaroka aparú jeen akupturkata tusan tajame. ²⁸ Nuni wina yatsur cinco (5) pujuinawai. Niisha juni wait wajamunam winicharti tusan ujakat tusan tajame,' timiayi. ²⁹ Tamaitiat Abraham chicharak: 'Moisésa armaaurincha tura yaanchuik Yuse chichamen etserin armaaurincha takakinawai. Nuna antukar umirkarti,' timiayi. ³⁰ Tamati kuikiartin Abrahaman ayaak: 'Apaachir Abrahamama nekasam tame. Antsu aints jakamunmaya nantaki, nuni we chichaman etsermataikia, ni tunaarin inaisar nintin yapajiawarchaintash' timiayi. ³¹ Tamaitiat Abraham ayaak: 'Antsu Moisésa armaaurincha tura yaanchuik Yuse chichame etserin ainau armaaurincha antinachkungka, aints jakau nantaki weaun wainayat, niin nekasampita tichartin ainawai,' tusa Jesús nu chichaman etserkamiayi.

17

Tunaanum jeai tusaram aneartaram timiauri (Mat. 18.6-7;21-22; Marc. 9.42)

¹ Jesús ni nuiniatiri ainaun chicharak:

"Chikichan tunaun takamtikin ainauka tuke irunui. Antsu tunaun takamtikin ainauka nukap wait wajakartin ainawai. ² Tura aints uchin tunau takamtikmatikia nuna turashti tusar, tunau takamtiknu kuntujen kaya juuntan jingkiatawar, juun kunanam ujugkaramtaikia, timiá pengker atinuitai. ³ Nekasrum chikich ainaun tunaun takamtik-sai tusaram wainkataram.

"Chikich aints Yusen umirkau atumin pasé awajtaminamtaikia atumka chicharkataram. Tura niisha tunaar tsangkutururta turaminamtaikia, tsangkurataram. ⁴ Kichik kintatik tunaun siete (7) túrumtikramayat ataksha: 'Tunaar tsangkutururta, ataksha turashtatjame,' tusa siete (7) tarutrami turammataikia, tuke tsangkurataram," Jesús timiayi.

Yusen nekasampita tusar nintimtinauka tujintinatsui timiauri

⁵ Tamati Jesús nuiniatiri ainau niin chicharinak:

—Apuru, iikia Yus nekasampita tusar nintimtaji. Tura nuna nangkamasrik nintim-tustincha yaimkartukta, —tiarmiayi.

⁶ Tu tinam ni Apuri chicharak:

—¿Mostaza jingkiaji timiá tuupchichukai? Turayat nuka tsapai, nekas chikich nu-paa nangkamasang juun ayi. Atumsha mianchau ayatrumek, wina nintimtursaram: Nekasam tujinkachuitme turutkurminkia, wi: Turataram tinu asamtai, ju numi morera tutain chicharkuram: Junia kangkaptuk kuimiakam, ataksha juun entsa jopen wajasta takurminkia nekas turunamnawaitai, —Jesús timiayi.

Yuse inatiri ainaun pachis etserkamuri

⁷ Nunia Jesús ataksha chicharak:

"Atumi inatiri waaka ainaujai nungkan tsaiinak wekaa wekaaka, tura chikich inati waakan wainuka ni takatrin umisar jeanam taaramtai, ¿atumi inatiri chicharkuram: 'Winita, tura keemsam yuwita' timinkitrum? ⁸ Atsa, antsu atumi inatiri chicharkuram: 'Yurumak inarturata. Tura wajasam, wi yuwatniursha tura wi amurtincha surusminam umista. ¿Wiyá yuwamtai, ameka arum ukunam yuwamnum,' tichaintrumek? ⁹ Atumi inatiri atumin miatrusarang umirtaminak yutan yurtamawaramtaisha atumka: Maake-tai, pengker umikume pengké tatsurme. ¹⁰ Tura Yus turamia nuka mash umisrum: 'Nekasan Yusen pengker umirkajai' atumsha tichamnawaitrume, antsu atumi Apuri

turamin asamtai: ‘Iikia ni inatiri asar, iin turammiaji nuke umirkaji, tura asar mianchawaitji’ titinuitrume,” Jesús timiayi.

Jesús diez kuchaprintin ainaun tsuwarmauri

¹¹ Jesús Jerusalénnum wetas Galilea nungkanmaya jiinki, Samaria nungkanam nangkamakmiayi. ¹² Tura chikich yaktanam jeamtai, kuchaprintin diez (10) irunmia nuka arák wajasar, ¹³ untsuminak:

—Nuikiartinua Jesús, wait anengkratkata, —tiarmiayi.

¹⁴ Tu tinam Jesúscha niin wainak:

—Atum sacerdote pujamunam wetaram. Turakrumin ni jiirmasti, —timiayi.

Tamati ayu tusar, sacerdoten jiiitasar wekamawar, jinta weenak pengker wajasarmiayi.

¹⁵ Tura kichik kuchaprintin ni pengker wajasaurin wainak kakar chichaak: Yus juuntaitai tusa, nunia ningki waketki ataksha Jesús tarimiayi. ¹⁶ Nuka Samarianmaya aintsuyayi. Tura Jesús tari tikishmatar tsuntsumrua nungkan antitak wajas Jesús maaketai timiayi. ¹⁷ Tumamtai Jesús chicharak:

—¿Pengker wajasaruka diezchakai? ¿Chikich nueve (9) aintcha warukawarma? ¹⁸ ¿Ju chikich nungkanmaya aintska jukek Yus juuntaitai titas waketki taj? —timiayi.

¹⁹ Tura nu aints tikishmarun chicharak:

—Wajakim weta. Wína nekasampita turutu asam pengker wajasume, —timiayi.

Jesús ni tatintrin pachis etserkamuri

(Mat. 24.23-28, 36-41)

²⁰ Fariseo ainu Jesús iniinak:

—¿Yuska ju nungkanmaya ainaun inartin kinta warutik at? —tiarmiayi. Tu tinam Jesús aimiak:

—Yus aints ainaun inartin kintaka paanka nekaachminuitrume. ²¹ Tura Yuska yamaisha tuke atumjai pujau asamtai, aints ainu nangkamiar: Yuska juni pujawai, tura anisha pujawai tichamnawaitai, —timiayi.

²² Nunia ni nuiniatiri ainaun chicharak:

—Wikia aintsutiatak Yus akupkamu asamtai, atumsha winasha pachitsaram, kichik kintaksha wainkatar wakeraji titinuitrume. Turayatrum winaka waitkashtinuitrume.

²³ Chikich aintcha nangkamiar chichartaminak: Juni pujawai tura ani pujawai turaminu wainiatrumek nuni werirap. Tura nu aints ainausha nemarkairap. ²⁴ Wikia aintsutiatak Yus akupkamu asan, wi tatin kintar jeamtai, peem newarat tsantak nayaim mash paan wajawa nunisnak wi winamurka nekas paan atinuitai. ²⁵ Tura nu kinta jeatsaing, wi ju nungkanam pujusan nukap wait wajaktatjai. Turamtai junia aints ainu winaka nakitruartatui. ²⁶ Wi tatin kintar jeamtai, yaanchuik Noé pujamunam aints tunau puju armia nunisarang pujusartinuitai. ²⁷ Nu aints ainu Yusen nintimtsuk yutancha yuj, tura umutnasha umuj puju armiayi. Tura nuwan nuwatnaikiarmiayi. Tura nawantrincha aintsun ninumkati tusar surin armiayi. Tuma pujuinai kintari jeamtai, Noé juun kanunam engkemamiayi. Turamtai nujang aneachmau aints ainaun mash amukmiayi. ²⁸ Tura yaanchuik aints Lot naartin pujus, nu yaktanmaya ainausha nunisarang Yusen nintimtsuk yutancha yu armiayi, tura umutnasha umin armiayi, tura waririncha sumin armiayi, tura surin armiayi, tura yurumkanha arau armiayi, tura jeancha jeamin armiayi. ²⁹ Tura Lot Sodoma yaktanmaya jiinkiamtai, Yus yakiya kayan jiya tumaun kapainaun azufrejai pachimramun akupak, nu aints ainaun mash amukmiayi. ³⁰ Tura asamtai aints ainu winasha nintimturtsuk pujuinamunam wi tatin kintarsha nunisang aneachmau atinuitai. ³¹

³¹ “Nu kinta jeamtai, aints jea jimia pata jeamkamunam yakí pujauka wári kuanak waririncha jutsuk tupikiaktinuitai. Tura aints ajanam takakmausha ni jeen waketsuk tupikiaktinuitai. ³² Lota nuwari turunamuri nintimrataram. ³³ Aints ju nungkanam

☆ 17:24 (Mat. 24.26-27) ☆ 17:26 (Gén. 6.5-8) ☆ 17:27 (Gén. 7.6-24) ☆ 17:30 (Gén. 18.20-19.25) ☆ 17:31 (Mat. 24.17-18; Marc. 13.15-16) ☆ 17:32 (Gén. 19.26)

aa nunaka nintimias tuke iwiaaku pujustas wakerayat tuke mengkakatnuitai. Antsu aints wína umirtuku asa, niin mainamsha, jakayat ataksha nantaki tuke iwiaaku pujustinuitai.✠

³⁴ “Nunasha tajarme: Nu kintati kashi jimia aints kichik peaknumak kanú tepeenauncha kichik jukitnuitai, antsu kichka juwaktinuitai. ³⁵ Tura nuwasha jimiar tsaniasar trigo jingkiain nekenak pujuinauncha kichik jukitnuitai, antsu kichka juwaktinuitai. ³⁶ Tura aishmangsha jimiar ajanam tsaniasar takakminamtaisha kichik jukitnuitai, antsu kichka juwaktinuitai,” Jesús timiayi.

³⁷ Tamati nuna antukar:

—Apuru ¿nusha nekascha tuning turunatnuita? —tiarmiayi.

Tu tinam Jesús ayaak:

—Jakau tepamunam chiwiang kauninawai, —timiayi.✠

18

Aints ainau tuke yawetsuk Yusen searti timiauri

¹ Aints ainau tuke yawetsuk Yusen searti tusa, Jesús ataksha nuikiartamun etserkamiayi. ² Tura nuikiartak:

—Chikich yaktanam apu chichaman iwiarin pujuyayi. Nuka Yusnaka shamchayuyayi. Tura aints ainauncha pachichuyayi. ³ Tura nu yaktanmasha nuwa waje pujuyayi. Niisha chichaman iwiariniun jistas weri chicharak: ‘Wait aneasam, aints wína pasé awajtusú chicharkata,’ tusa waketrú pujuyayi. ⁴ Nu nuwaka chichaman iwiariniun tuke waketrú pujurmasha yayitnasha nakitmiayi. Tura waje nukap waketrú asa, nuka nintimias: ‘Wisha Yusen shamachiatnak, aints ainauncha pachichutiatnak, ⁵ nu nuwaka tuke wína waitkangka turutu asamtai, ataksha winamtai kajertukai tusan yaingtajai’ timiayi, —Jesús timiayi.

⁶ Nu nuikiartamun etsertan umis, ii Apuri ataksha chichaak:

—¿Nu chichaman iwiarin pasé ayat tímia nuka antukurmek? ⁷ Tura Yuse aintsri ainau tsawaisha, tura kashisha Yusen sea seamka, Yus nu chichaman iwiariniun nangkamasang pengker asa ¿ni aintsri ainaun anturtsuk inaisatniukai, tura yaitsuk inaisatniukai? ⁸ Atsa, antsu wári yaingtínuitai tajarme. Tura wikia aintsutiatnak Yus akupkamu asan, ataksha ju nungkanam winaknaka ¿aints ainau wina nekasampita turutinaunka wainkatjash? —Jesús timiayi.

Jimia aints Yusen seamuri

⁹ Tura aints ainau: Wikia pengkeraitjai tumamsar, antsu chikich aints pasé ainawai, tu nintiminaun wainak, Jesús chikich nuikiartamun nuikiartak:

¹⁰ —Aints kuikian juu tura fariseo aintcha mai Yusen seartas Yus seatai juun jeansam wayaawarmiayi. ¹¹ Tura fariseo wajaki nuwá eemak Yusen seak: ‘Yusrú, wikia tunau ainaujai metekchawaitjai. Kasamtancha pengké kasamchawaitjai. Tura nuwajaisha tsanirmichuitjai. Antsu aints kuikian juu waja auka wijaingkia metekchawaitjai. Tura asan maaketajame. ¹² Tumingjai metek jimia kintan yutsuk ijiarmaan aminka seaweajme,’ ningki nintimias tu seamiayi. ¹³ Tu seam, aints kuikian juu arák wajas, natsaamak tsuntsuma pangkaisha jiiimsuk, wake mesek netsepen uwejejai awatkamaikiak: ‘Yusrú, wikia tunau asamtai, wait anentrurta,’ tu Yusen seamiayi. ¹⁴ Tura wikia tajarme: Aints kuikian juu tu seam, Yus ni tunaarin tsangkuramu asa, pengker nintimias ni jeen wakatkimiayi. Antsu fariseoka nangkami: Wikia pengkeraitjai tinu asamtai, Yuska niinka tsangkurachmiayi. Tura asamtai tajarme: Aints ningki nintimtumasang: Wikia miajuitjai taunka Yuska: Ameka mianchawaitme tawai. Tura nekas mianchawaitjai tumamunka Yuska: Ameka nekasam miajuitme tawai, —Jesús timiayi.✠

✠ 17:33 (Mat. 10.39;16.25; Marc. 8.35; Luc. 9.24;17.33; Juan 12.25) ✠ 17:37 (Mat. 24.28; Apoc. 19.17-18) ✠ 18:14 (Mat. 6.5;23.12; Luc. 14.11)

Uchi ainau wini winiarti timiauri
(*Mat. 19.13-15; Marc. 10.13-16*)

¹⁵ Tura aints ainau: Jesús uchin takasat tusar itariarmiayi. Turinamtai Jesús a nuiniatiri ainau nuna wainkar: Uchi itairap tusar surimiarmiayi. ¹⁶ Tinamtai Jesús niin untsuak:

—Uchi wini winiarat tusaram tsangkatraktaram. Aints ju uchua nunisarang nekasampita turutin ainauka Yuse pujutirin jeartinuitai. Tura asaram suritrukairap. ¹⁷ Nekasan tajarme: Aints Yuse pujutirin wayaawartas wakerinauka uchi nekasar itiurkachmin nintimtsuk pujuinau asar nuni wayaawartinuitai, —Jesús timiayi. ☆

Kuikiartin Jesúsjai chichasmauri
(*Mat. 19.16-30; Marc. 10.17-31*)

¹⁸ Apu ainau iruntramunam kichik apu Jesús a chicharak:

—Nuikiartinu, nekas pengkeraitme. Tura asakmin iniajme: ¿Pujut nangkankashtinun jukitasnasha warinak itiurkataj? nu ujakkata, —timiayi.

¹⁹ Tama Jesús ayaak:

—¿Waruka winasha pengkeraitme turutme? Nekas pengker aa nuka kichkitai. Nuka Yusketai. ²⁰ Tura asantai Yus wina chichamur umirtuktaram timia nuka nekame. Nu aarmauka nuwaitai: ‘Tsanirmawairap, tura mangkartuwairap, tura kichnau aa nuka kasamkairap, tura aints kichkisha pachisrum tsanumrairap. Tura aparmesha, tura nukurmesha umirkataram,’ tu aarmawaitai, —Jesús timiayi. ☆

²¹ Tamati nu aintska chicharak:

—Ame tame nunaka uchiwach asanak tuke mash umikuitjai, —timiayi.

²² Tama Jesús nuna antuk ayaak:

—Kichik chicham umikchau asam, nusha turata: Ami wariram aa nusha mash surukam, yuuminau susata. Nunia nemartusta. Turakum nekasam nayaimpinam yuumatsuk pujustinuitme, —Jesús timiayi.

²³ Tamati nuna antuk nekas kuikiartin asa, nukap wake mesekmiayi. ²⁴ Wake mesekamtai Jesús nuna wainak chichaak:

—Kuikiartin ni kuikiarin aneenau asar, Yus pujamunam wayaawartatkamawar nekasar tujintinawai. ²⁵ ¿Kamiyusha akusha jiiin wayaamnaukai? Atsa, nuka pengké yumtinuitai. Tura kuikiartin ainausha nunisarang Yus pujamunam wayaatnuka pengké yumtinuitai, —Jesús timiayi.

²⁶ Tamati aints nuna antukaru ainau chicharinak:

—Tu amataisha ¿yaachik nuniasha uwemramnawaita? —tiarmiayi.

²⁷ Tu tinam Jesús ayaak:

—Aints ningki nintimsangka pengké uwemrachminuitai. Antsu Yuska pengké tujinkachuitai, —timiayi.

²⁸ Tamati Pedro chicharak:

—Apuru, ii ainautikia iinu amia nuka mash ukukir, ame nemarsamiaji, —timiayi.

²⁹ Tamati Jesús ayaak:

—Nekasam tame. Antsu wikia atumin tajarme: Aints Yusen umirkatas ni jeencha, tura nuwarincha, tura yachiincha, tura umajincha, tura aparincha, tura nukurincha, tura uchirincha ukuakka, ³⁰ ju nungkanam pujus ni ukukmia nuna nangkamasang untsurin wainkatnuitai. Nuniangka jaka nantaki, tuke Yusnum iwiaaku pujustinuitai, —timiayi.

Ni jakatniurin pachis ataksha etserkamuri
(*Mat. 20.17-19; Marc. 10.32-34*)

³¹ Jesús ni nuiniatirin doce (12) amia nuna akanak juki, nunia chicharak:

—Yamaikia Jerusalénnum weaji. Tura wi aintsutiatnak Yus akupkamu asantai, yaanchuik Yuse chichamen etserin ainau wina pachitsar aatrurarmia nunisnak umik-tatjai. ³² Tura romano ainamunam wina surutkaramtai, wina wishikrinak nunia pasé

☆ 18:17 (Mat. 18.3) ☆ 18:20 (Ex. 20.12-16; Deut. 5.16-20)

chichartinak usukrurartatui. ³³ Tura katsumrukar nunia mantuwartatui. Tura mantuwaru wainiatnak, kempatam kinta jakan tepayatun, ataksha nantaktatjai, —timiayi. ✠

³⁴ Paan etserkau waininayat, ni nuiniatiri ainau nu chichamnaka nekaawartatka-mawar pengké nekaacharmiayi. Tura Jesús chichamen antinayat: Nekas nunaapi taku tawa tusar nintimracharmiayi.

Jesús Jericónmaya aintsun wainmamtikiamuri

(*Mat. 20.29-34; Marc. 10.46-52*)

³⁵ Jericó yaktanam jeatas jintá weak, Jesús wainmichun jinta yantarin pujaun wainkamiayi. Nu aintska aints nangkaaminau kuikiarin tuke seauyayi. ³⁶ Tura aints untsuri nangkaaminantai, nuna antuk: Yaachita, tu inintrusmiayi. ³⁷ Tu iniam:

—Nazaretnumia Jesús nangkaamawai, —tiarmiayi. ³⁸ Tu tinam, nuna antuk untsamak:

—Jesús, Davidta weariya, wína wait anentrurta, —timiayi.

³⁹ Tu untsuam eemkar wearmia nuka jiyainak:

—Itatkata, —tiarmiayi. Tinamaitiat nuna nangkamasang kakar untsamak:

—Davidta weariya, wait anentrurta, —timiayi. ⁴⁰ Tu untsuam, Jesús nuni wajas:

—Au juni itataram, —tusa, akupkam wainmichun itaaramtai, Jesús iniak:

⁴¹ —¿Itiurtukat tusamea wakerutame? —timiayi. Tu iniam wainmichu aimiak:

—Apuru, wainmachkun wainmaktasan wakerajai, —timiayi.

⁴² Tamati Jesús chicharak:

—Paan jiimtia. Ame wína nekasampita turutu asam, pengker wajasume, —timiayi.

⁴³ Nu chichamuik paan wainmakmiayi. Tura asa Yus juuntapita tusa Jesús n ne-marsamiayi. Tura aints nuna wainkaruka mash: Yus juuntapita tiarmiayi.

19

Jesús Zaqueojai chichasmauri

¹ Nunia Jesús Jericó yaktanam waya wekakinij wajamiayi. ² Nuni kuikiartin Zaqueo naartin pujumiayi. Nuka aintsu kuikiari juu apuri ayayi. ³ Zaqueoka Jesús n wainkatas wakerayat sutarach asa, aints untsuri Jesús n jiiisartas kawengkaramtai, wainkatatkama pengké wainkachmiayi. ⁴ Tura Jesús nu jintanam nangkamaktin asamtai, Zaqueo jiiistaj tusa eemak ampuki we numinam wakamiayi. ⁵ Tura numinam keemas nakaj pujamtai, Jesús nuke nangkamak, pangkai jiiis chicharak:

—Zaqueowa, wári tarata. Yamaikia jeemin kanurtasan winajai, —timiayi.

⁶ Tamati Zaqueo wári tara pengker nintimias Jesús n ni jeen jeemiayi. ⁷ Turamtai aints ainau nuna wainkar:

—Maj, auka nekas tunau aintsu jeen wayaayi, —tusar aujmatiararmiayi. ⁸ Tura jea waya pujamtai, Zaqueo wajaki Jesús n chicharak:

—Apuru anturtukta. Kuikian tákakja nuna jafen akanan kuikiartichu ainaun susatjai. Tura aints ainaun anangkan, kuikiarin kichik kasamkamun ataksha cuatron awangtukiartajai, —timiayi.

⁹ Tamati Jesús chicharak:

—Ayu, turata. Ju jeanam pujuinautiram yamaikia uwemrau asaram, yaanchuiksha nangkamrum Abrahama wearinji tinuyarme. Antsu yamaikia nekasrum Abrahama weari wajasurme. ¹⁰ Wisha aintsutiatak Yus akupkamu asan, mengkakarua ainaun eakan, Yusnum uwemtikrataj tusan taawitjai, —Jesús timiayi. ✠

Kuikian pachis nuikiartamu

(*Mat. 25.14-30*)

¹¹ Jesús Jerusalénnum jeatak wajasu asamtai, aints ainau ni etsermaurin antukaru ainau nintiminak: Ni Jerusalénnum jea, wári aints ainaun inatan nangkamatatui, tu nintimrarai tusa, chikich nuikiartamun etserkamiayi. ¹² Tura nuikiartak:

✠ 18:33 (Mat. 16.21;17.23;27.63; Marc. 8.31;9.31; Luc. 9.22) ✠ 19:10 (Mat. 18.10-11)

—Aints chikich ainaun nangkamasang juun asa, apu naamkatas chikich nungkanam wemiayi. ¹³ Tura nu nungkanam weatsaing, ni inatirin diez (10) amia nuna untsuk, kuik jimia pachak kinta takakmasmaun akiimiakminun kichik kichik susa chicharak: ‘Kuikiar yujarti tusaram, ju kuikiajai takakmajataram. Tura wi taamtai wangturkimnuram’ tusa ukuki, chikich nungkanam wemiayi. ¹⁴ Turamtai ni nungkarinia ainau nu aintsun nakitinau asar, chikich nungkanmaya apun ujakarti tusar: Nu aintska ii apuri ati tutaka nakitaji titaram, tusar aints ainaun akupkarmiayi.

¹⁵ “Tinamaitiat nu aints apu naamkau asa, ataksha ni nungkarin tamiayi. Tura taa ni inatiri ainaun: ¿Kuikian warutmak kiaungkara? tusa nekaatas untsukmiayi. ¹⁶ Apu untsukam, ni inatiri kichik taa chicharak: ‘Ami kuikiarmijai takakmasu asan, mash irumram jimia warang kinta takakmasmau akiimiakminun kiauntukjame, nu jukita,’ timiayi. ¹⁷ Tamati apu chicharak: ‘Ayu, maaketai. Nekasam pengker takakmasume. Wikia jumchik susamiajme nujai wi timiaja nunismek pengker takakmasu asakmin, diez (10) yakat ainia nu wainin ata tusan inaikiatjame,’ timiayi.✠

¹⁸ “Nuna tusa ukukiamtai, kitcha tari chicharak: ‘Apu, ame kuik surusmiamе nujai takakmasu asan, mash irumram kichik warang kinta takakmasmau akiimiakminun kiauntukjame,’ timiayi. ¹⁹ Tamati nu aints nasha apu chicharak: ‘Ame cinco (5) yakat ainia nu wainin ata tusan inaikiatjame,’ timiayi.

²⁰⁻²¹ “Nuna tusa ukukiamtai, chikitcha tari chicharak: ‘Apu, ameka nekasam kakaram takamtikin asam, tura kuik ukuschayatun achiu asam, tura árak araachiatum juutrukta tinu asakmin, wisha nunaka nekau asan amin shamakun, ami kuikiarmin panuijai ijaan ukusmiajai. Pai, kuikiarmeka,’ timiayi. ²² Tamati apu chicharak: ‘Maj, ameka nakitme. Ame turutme nunisketjai. Wi kakarman takamtikin asan, tura kuikian ukuschayatun achiu asan, tura arakan araachiatnak: Juutrukta taja nuka nekayatmesha ²³ ¿warukaya kuik irumtainum kuikiarka ukutruschamiamе? Turakminka chikich aints ainau wina kuikiarjai takakminamtai, wi ataksha tana, kuikian susamiajme nuna nangkamasnak nukap jukimnawaitjai,’ timiayi. ²⁴ Nunia aints nuni wajainaun chicharak: ‘Kuikian takaka nu jurukrum, chikich aints jimia warang kinta takakmasmau akiimiakminun kiaunkamia nu susataram,’ timiayi. ²⁵ Tamati nu aints ainau apurin chicharinak: ‘Apu ¿ju aints yanchuk timiá untsuri takakusha warukarik ataksha susatji?’ tiarmiayi. ²⁶ Tu tinam apu aimiak: ‘Aints nukap takakmasuka nukap takakui. Tura nukap takakmasu asamtai, nuna nangkamasrik susatnuitji. Antsu tákakchauka takatan pengké nakitau asamtai, jumchik tákaka nuka juruktinuitai.✠ ²⁷ Tura wina nemasur ainau: Apu wajaschati tusar nakitruru asaramtai, yaruakrum mash juni itataram. Tura itaram wisha jiaing maataram,’ apu timiayi,” Jesús tusa ni tatintrin pachis nu nuikiartamun etserkamiayi.

Jesús Jerusalénnum wemauri

(Mat. 21.1-11; Marc. 11.1-11; Juan 12.12-19)

²⁸ Nuna tusa umis, Jesús nunia jiinki Jerusalénnum wemiayi. ²⁹ Tura wea weaka Betfagé yaktanmasha, tura Betania yaktanmasha arakchichu mura Olivo tutainum jeatak wajasar Jesús ni nuiniatirin jimieran akupak:

³⁰ —Atunini yaktachinam arakchichu aa nuni werum, tura nuni jearam burro entsakrachau jingkiamu wainkatatrumе. Tura nu wainkaram atiararam juni itataram.

³¹ Tura ¿waruka aitkarme? turaminamtaisha, ‘Apu yumau asamtai juwaji’ titaram, —timiayi.

³² Tamati ni nuiniatiri ayu tusar wear, Jesús tímia nunisarang wainkarmiayi. ³³ Tura burron wainkar atinamtai, burrortin chicharinak:

—¿Waruka burrosha atiarame? —tiarmiayi.

³⁴ Tu tinam aiminak:

—Apu yumau asamtai juwaji, —tiarmiayi.

✠ 19:17 (Luc. 16.10) ✠ 19:26 (Mat. 13.12; Marc. 4.25; Luc. 8.18)

³⁵ Tura burron jukiar Jesúsnum itaar, ni wejmakrin aimiakar, burronam awantsar Jesúsán kentsarmiayi. ³⁶ Turinamtai Jesús burronam keemas weamtai, jinta wetinum aints ainau: Ii Apurinme tiartas ni wejmakrin aimiakar nungkanam aitkarmiayi. ³⁷ Tura ni nemarkin ainau untsuri Jesúsai tsaniasar Olivo Muranmaya wangkenmanum arakchichu wekaasar, Jesús aints ainau wainchatai takatan mash turaun wainkaru asar, nuna nintimsar warainak kakarar untsunkarmiayi. ³⁸ Tura:

—Yus akupkamu winá nuka nekas ii Apurintai. Tura Yus nayaimpinam puja nuka nekas juuntapita, —tiarmiayi.

³⁹ Tinamtai fariseo untsurinchau nu aintsnumak pachinkar wajarmia nuka Jesúsán chicharinak:

—Nuikiartinu, amin nemartamina nuka itatkatarum tusam chicharkata, —tiarmiayi.

⁴⁰ Tinamaitiat Jesús ayaak:

—Ju aints ainau itatkaramtaikia, kaya ainausha untsunkartatui, —timiayi.

⁴¹ Tura Jerusalénnum jeatak wajas, nu yaktan ukunam suntar ainau amukartin asaramtai, Jesús nuna nekau asa juutmiayi. ⁴² Tura chichaak: —Jerusalénnum pujuinaitiram, atumi kintari jeatsaing, angka pujustiniun sukartin nekaatarum tusan wakerin ayajai. Turayat yamaikikia uukmawa nunisang asamtai, nekaatatkaramam tujintarme.

⁴³ Kinta nekas shamai atumin jeartamtinuitrume. Nu kinta jeamtai, atumi nemase ainau kaunkar, atumi yaktarin tentakar, mesetan najanawartas nungkejai wenurartinuitai.

⁴⁴ Yuska atumin uwemtikramratas irawa nunisang tarutramin wainiatrum, atumka nintinchau asakrumin, atumi uchirincha maawar, tura atumnasha mantamawar, yakat kayajai jeamkamau waininayat mash yumpungkartinuitai, —Jesús timiayi.

Yuse jeengka kasa jeenchuitai timiauri

(*Mat. 21.12-17; Marc. 11.15-19; Juan 2.13-22*)

⁴⁵ Nunia Jesús Yus seatai juun jeanam waya, tangku ainaun Yusen susartas surinaun wainak, aanum jiiki akupkamiayi. ⁴⁶ Tura chicharak:

—Yuse chichame yaanchuik tu aarmawaitai. Yus chichaak: ‘Wína jearka Yus seatai jeaitai,’ tu aarmau wainiatrum, atumka kasa aints juni kuikian kasamkarti tusaram tsangkatkarume, —timiayi.

⁴⁷ Nunia Jesús Yus seatai jeanam waya, aints ainaun kintajai metek Yuse chichamen nuiniarmiayi. Turamtai sacerdote juuntri ainausha, tura Moisésa chichame nuikiartin ainausha, tura judío juuntri ainausha mash iruntrar: “¿Itiurak Jesús maawaintai?” tu nintimrarmiayi. ⁴⁸ Tu nintiminayat, aints mash Jesúsá chichamen pengker nintimsar anturinau asaramtai, maawartatkamawar arantukarmiayi.✠

20

¿Yáki Jesúsán ni kakarmarin susaya?

(*Mat. 21.23-27; Marc. 11.27-33*)

¹ Chikich kintati Jesús Yus seatai jeanam waya, aints ainaun Yusnum uwemratin chichaman nuiniak pujamtai, sacerdote juuntri ainau, tura Moisésa chichame nuikiartin ainausha, tura judío juuntri ainausha Jesúsán tariar, ² chicharinak:

—¿Ame aitkame jusha yana chichamejia aitkame? ¿Tura yaachia aitkata tusasha amincha akuptamkama? Iikia nu nekaatarum wakeraji. Nu ujakratkata, —tiarmiayi.

³ Tu tinam Jesús aimiak:

—Wisha atumnasha kichik chichaman iniastasan wakerajrume. Nu airkataram.

⁴ Watska. ¿Yáki Juankun aints imaita tusasha akupkaya? ¿Yuseash akupkaya. Turachkusha aintsuash akupkaya? —timiayi.

⁵ Tu iniam mai nuwamtak chicharnainak:

—¿Iikia warintajik? Yusek akupkamuitai takurningkia, ¿waruka niin nekasampita tichamiarume? iincha turami tusar tichamnawaitji. ⁶ Antsu aints akupkamuitai

✠ 19:48 (Mat. 26.55)

takurningkia, aints mash: Juan Yus akupkamuitai tinau asar, iin kayajai tukurmiar mantamawarai tusar shamaji, —tunaiyarmiayi. ⁷ Tura Jesús an ainnak:

—¿Juan aints ainaun imaita tusasha yáki akupkaya? tusarsha iikia nekatsji, —tiarmiayi. ⁸ Tu tinam Jesús chicharak:

—Ayu, tu tau asakrumin, yáki wina akuptukia tusancha, wisha nunisnak atumnasha ujakchatatjarne, —timiayi.

Tunau takau ainaun pachis nuikiartamuri
(Mat. 21.33-44; Marc. 12.1-11)

⁹ Nunia Jesús aints ainaun chikich nuikiartamun nuiniak:

—Aints ni ajarin uva naekrin araamiayi. Tura araa umis, aints ainu takartusarti tusa ukukmiayi. Tura tatsuk arák puja pujakka, ¹⁰ juuktin kinta jeamtai, ni inatirin akatar akuptak: ‘Yamaikia weme, ajarun takau ainu ujaakum: Ajartin chichaman akupturmak: Uva yumiri winar aa nunaka akupturkarti tawai tita,’ timiayi. Tura akuptukmaitiat ajan takau ainu ajartinu inatirin katsumkar, uva yumirinka sutsuk akupkarmiayi. ¹¹ Turawaramtai ajartin ataksha chikich inatirin akuptukmaitiat, nu aintsnasha nunisarang katsekar, nunia katsumkar uva yumirinka sutsuk akupkarmiayi. ¹² Nuna turuwaramtai, ajartin ataksha chikich inatirincha akuptukmaitiat, nunasha nunisarang charu charu najanawar ajanmaya jiikiarmiayi.

¹³ “Turinamtai nuniangka ajartin nintimias: ‘¿Yamaisha ititurkainjak? Yamaikia wina uchirun aneetirun akuptuktajai. Niin wainkar nekasar anturkachartimpiash,’ timiayi. ¹⁴ Tura apari akupkamu waininayat, ajan takau ainu ajartinu uchirin wainkar chicharnainak: ‘Ni apari jakamtai, ju ajaka uchirinu atinuitai. Watska, maatai. Ju maarkia, nuniangka ju ajaka iinu achaintak,’ tunaiyarmiayi. ¹⁵ Tura ajartinu uchirin achikiar, ajanmayan jiikiar maawarmiayi,” Jesús timiayi.

Nunia nu nuikiartamun antukaru ainaun iniak:

—¿Atumsha ititur nintimrume? ¿Ajartin taa nu takau ainaun ititurkatnuita? ¹⁶ Niisha taa, nu pasé takau ainaun maatnuitai. Nunia chikich aints ainaun eak: ‘Ajarun takakmasarti’ tusa susatnuitai, —Jesús timiayi.

Tamati nuna antukaru ainu chicharinak:

—Atsa, pengké turachminuitai, —tiarmiayi.

¹⁷ Tu tinam Jesús nuna antuk nu aints ainaun pangkai jiis ayaak:

—¿Tura Yuse chichame etserin ainu aararmia nuna warina takua tawa tusarmeka nintimtsurmek? Nu aarmauka nuwaitai: ‘Jeamin ainu kaya jean jeamkar, chikich kayan wainkar chichainak: Ju kayaka paseetai tusar japawarmiayi. Japinau wainiat Yuska: Nu kayaka timiá pengkeraitai timiayi.’ ¹⁸ Tu aarmau asamtai, aints ainu nu kaya nekas pengker aa nunaka tukumkar kupinartinuitai. Tura nu kaya aintsnum ayaarkungka, nu aintsun tsairtinuitai, —Jesús timiayi.

¹⁹ Tama sacerdote juuntri ainu, tura Moisésa chichame nuikiartin ainausha nu nuikiartamun antukar: Iin pachitmas turamji tusar Jesús an kajerinak: Yamaik achiktai tu nintimtinayat, aints ainaun shaminu asar achikcharmiayi.

¿Juun apu akikchatnukai? timiauri
(Mat. 22.15-22; Marc. 12.13-17)

²⁰ Tura Jesús romano apurin suruktai tu nintiminak, chichaman najatawar, Jesús tsanurtai tusar, aints ainaun eakar: Nuka iikia pengke aintsuitji tinayat, Jesús iniam, niisha warintintak tusar, ni chichamen anturkar, nuna jukiarat tusar akupkarmiayi.

²¹ Tura akupkamu asar, Jesús an jeariar chicharinak:

—Nuikiartinu, ameka nekas chicham chichaame. Iikia nuka nekaji, tura aints ainu wina pengker nintimtsurat tuuka nintimtsuk pujame, tura nekasam Yuse jinti tu awai tusam, tupin nuikiartame. ²² Tura asakmin ¿ititur nintime? tusar nekaatar wakeraji. Juun apu César ni aintsrin akupak: Kuik irumrataram tamati ¿ii kuikiarin akiimiaktin

pengkerkai? ¿Antsu akiimiatsuk pujustinka pengkerkai? Nu nekaatar wakeraji, —tiarmiayi.

²³ Tu iniinam Jesús ni pasé nintimaurin nekaru asa chicharak:

—¿Waruka anangkruram winasha nekaprustasrumsha wakerutarme? ²⁴ Watska, kuik inaktursataram, —timiayi. Tura inaktusam Jesús chicharak:

—¿Jusha yana yapiya nakumkamuita? ¿Tura yana naariya aarmawita? —timiayi.

Tu iniam ainak:

—Apu Césarnawaitai, —tiarmiayi.

²⁵ Tinamtai Jesús chicharak:

—Tu tinu asaram, juun apu Césarnau aa nuka ni susataram. Tura Yusnau aa nuka Yus susataram, —timiayi.✠

²⁶ Aints mash antinamunam nuna tamati, nu chichaman antukaru ainau ni chichamejai achikiartatkamawar tujinkarmiayi. Antsu nintimrar chichatsuk wajasarmiayi.

¿Aints jakau nantaktinuashi? timiauri

(Mat. 22.23-33; Marc. 12.18-27)

²⁷ Nunia saduceo ainau: Aints jakauka jakamunmaya nantakchatnuitai tinu asar, chichaman nekaawartas tariarmiayi. Tura Jesús warintintak tusar chicharinak:

²⁸ —Nuikiartinu, Moisés chichaman aarmia nu chichamka nuwaitai: ‘Aints uchin yajutmatsuk jakamtaikia, ni yachí uchin yajutmartas ni wajerin nuwatkatnuitai. Tura uchin yajutmarta, nuka ni yachí jakau uchiriya nunisang atinuitai,’ tu aarmawaitai.

²⁹ Ayu, juni iijai iruntrar siete (7) yachintin pujuarmiayi. Tura eemkauri nuwan nuwatak, uchin yajutmatsuk jakamta, ³⁰ jakau yachí wajerin nuwatkayat, nusha nunisang uchin yajutmatsuk jakamiayi. ³¹ Tura nusha nunisang jakamta, chikich yachiisha wajerin nuwatak, tura chikitcha chikitcha siete (7) yachintin nu nuwan nuwatinayat, mash uchin yajutmatsuk kajingkiarmiayi. ³² Nunia nuwasha ukunam jakamiayi. ³³ Tura nu siete (7) yachintin mash nu nuwan nuwataru asar ¿jakamunmaya nantakiar nu nuwaka yana nuwariya atinuita? —tu iniasarmiayi.✠

³⁴ Tu iniinam Jesús ayaak:

—Ju nungkanam pujuinaka nuwatnaikiatin ainawai. ³⁵ Tura Yusen umirin ainau jakaar ju nungkanka ukukiar, nuniangka jakamunmaya nantakiar, ataksha jakachartin ainawai. Antsu Yusnum tuke pujuinaku asar, nuwanka nuwatkachartinuitai. Nunia nuwasha aintsun ninumkachartinuitai. ³⁶ Antsu Yuse awemamuriya nunisarang nuwartichu artinuitai. Tura jakamunmaya nantakiaru asar, Yuse uchiri artinuitai. ³⁷ Tura jakaru ainaun pachis Moiséscha tu awai tusa, iin nekamtikramamiaji. Tura aints atsamunam numi jangkirtin kapaayat kajintsuk wajamta, Apu Yus Moisésan chicharak: ‘Abrahama Yusrinka wiitjai. Tura Isaaca Yusrinka wiitjai. Tura Jacobo Yusrinka wiitjai,’ timiayi. ³⁸ Tura aintsu wakani tuke jakachartin asaramtai, Yuska jakau ainau Yusrinchuitai, antsu iwiaaku ainau Yusrintai. Yuska aints jakaru ainaun mash iwiaakua nunisang jiiawai, —Jesús timiayi.✠

³⁹ Tamati Moisésa chichame nuikiartin ainau chicharinak:

—Nekasam pengker tame, —tiarmiayi.

⁴⁰ Tura nuniangka iniasartatkamawar arantukarmiayi.

¿Mesíascha yana wearinta? timiauri

(Mat. 22.41-46; Marc. 12.35-37)

⁴¹ Nunia Jesús nu aints ainaun iniak:

—Aints ainau Yus akupkatniun, Mesías tutain pachisar ¿waruka Davidta wearintai tinawa? ⁴² Davidcha Yuse chichamen Salmo tutainum ningki tu aarmiayi:

Apu Yus wína Apurun chicharak:

‘Juni wína untsurunini apu keemtainum keemsam nakarsata.

✠ 20:25 (Rom. 13.6-7) ✠ 20:33 (Hech. 23.8) ✠ 20:38 (Ex. 3.6)

⁴³ Tura nakarkumin ami nemasem ainaun mash nepetkatatjai,' timiayi. ⁴⁴ Davidka Mesíasan pachis: Wina Apuruitai tinu wainiatrumsha ¿waruka Mesíaska Davidta uchir-intai tarume? —timiayi.

Moisésa chichame nuikiartin ainau chicharkamuri
(*Mat. 23.1-36; Marc. 12.38-40; Luc. 11.37-54*)

⁴⁵ Tura mash aints antinamunam Jesús ni nuiniatiri ainaun chicharak:

⁴⁶ —Moisésa chichame nuikiartin ainau wainkataram. Niisha nekau aintsuitjai tusar, entsatirin sarman entsarar jampesarang wekajin armiayi. Tura yaktanam wekainak: Wina jiirsar aujtusarat tusar wekainawai. Tura iruntai jeanmasha keemtai nekas pengkernum keemsartas wakerinawai. Tura fiesta amanumsha eemkar keem sar yuwartas wakerinawai. ⁴⁷ Tura waje jeen atantin ainayat anangminak wina pengke aintsuitai turutiarat tusar, aya jangkejai Yusen sarman seainawai. Tuminau asaramtai, Yus chikich ainaun nangkamasang niin nukap wait wajaktiniun susartinuitai, —Jesús timiayi.

21

Waje ni kuikiarin Yusen mash susamuri
(*Marc. 12.41-44*)

¹ Jesús Yus seatai juun jeanam waya, kuikiartin ainau kuik engketinam kuikiarin engkeenaun wainkamiayi. ² Tura waje kuikiartichu jimia jiru kuikian engkeaan wainkamiayi. ³ Tura nuna wainak aints ainaun chicharak:

—Nekasan tajarme: Ju wajeka kuikiartichutiat, chikich aints ainaun mash nangkamasang nukap engkeayi. ⁴ Chikich aints ainauka nekasar kuik ampirmaurinak engkeanawai. Antsu ju wajeka ninu aa nunaka mash ampitsuk engkeayi, —Jesús timiayi.

Yus seatai juun jea yumpungtinun pachis etserkamuri
(*Mat. 24.1-2; Marc. 13.1-2*)

⁵ Chikich aints ainau Yus seatai juun jeanam wajasar, kaya ainaun shiirman iwiarinaun jiisar, tura warin chu shiirman Yus susamun jiisar chicharnainak:

—Yus seatai juun jea juka shiirmapita, —tunaiarmiayi. Tu tinamtai Jesús chicharak:

⁶ —Ju mash waintrume juka ni kintari jeamtaikia mash yumpunkatnuitai. Tura yumpunkamtai, kaya kichkisha chikich kayanmasha patamkashtinuitai, —Jesús timiayi.

Nungka mesertin pachisar etserkamu
(*Mat. 24.3-28; Marc. 13.3-23*)

⁷ Jesús tamati nunia iniinak:

—Nuikiartinu ¿nusha warutik ati? Tura nu turunatin kinta jeatak wajasamtaisha ¿waring wantinkatnui? —tiarmiayi.

⁸ Tu tinam Jesús chicharak: —Wina anangkruwarai tusaram, aneartaram. Aints untsuri nangkamiar: 'Wiitjai Yus akupkamuitjai,' tiartinuitai. Tura: 'Nungka yumpunkatin yamaikia jeayi,' tiartinuitai. Tu tinamtaisha nu aintska nemarkairap.

⁹ Tura maaniamu atatui, tura mesetan najaninawai tamau antakrumsha shamkairap. Nusha eemak turunatnuitai. Antsu nungka mesertinka tewarikia achatnuitai, —timiayi.

¹⁰ Nunia Jesús tuke chicharak:

"Aints ainau chikich nungkanmaya ainaujai maaniawartinuitai. Tura apu ainausha kajernaikiar mesetan najanawartinuitai. ¹¹ Nunia uusha untsuri uurkatnuitai, tura tsukasha nukap atinuitai, tura sungkur ainausha yujartartinuitai. Nayaimpinmayasha shamrumtin wantinkartinuitai. Tura asamtai Yuse kakarmarin aints ainau wainkartinuitai.

¹² "Tura nuka jeatsaing, atumin achirmakar wait wajaktiniun suramsartinuitai. Tura chicham nekarami tusar, iruntai jeanmasha juramkiartinuitai. Nuniangka kársernum engketmawartinuitai. Tura engketmawarsha wina aintsur asakrumin, judío apuri ainamunmasha, tura romano apuri ainamunmasha atumin juramkiartinuitai. ¹³ Tura nuni juraminamtaisha, wina pachitsaram chichaktinuitrume. ¹⁴⁻¹⁵ Tura atumi nemase:

Waitaitai turamiarai tusan, wína nekamtairun atumin susan chichamtikiatnuitjarne. Tura asamtai atumin apunam juraminamtai, apu ininmamtaisha ¿itiurak aimkataj? tusarmeka, nuwá eemkarmeka nintimsairap.✠

¹⁶ “Atumi aparisha, tura atumi yachiisha, atumi weari ainayat, tura atumi amikrishsha nunisarang atumin anangkramawar apunam surutmakartinuitai. Tura chikich ainautirmincha mantamawartinuitai.✠ ¹⁷ Tura wína aintsur asakrumin, aints mash atumin kajertamkartinuitai. ¹⁸ Tura kajertaminaun wainiat, Yus atumi intashin kichkisha mengkakashti tusa waitmaktinuitrume. ¹⁹ Tura asaram wait wajayatrumek, tuke inaitutsuk wína umirtakrum pujakrumka, pujut nangkankashtin jukitnuitrume.

²⁰ “Ju yakat Jerusalénnaka suntar ainau tenteawaramtai, atumka nu wainkurmesha, wáriapi ju yaktan yumpungkartatua tusaram nekaataram. ²¹ Nu yaktan yumpungkartin asaramtai, Judea nungkanam pujuinauka muranam anumkartas tupikiakiartinuitai. Tura juni Jerusalénnum pujuinauka juniangka jiinkiartinuitai. Tura ajanam takakminak pujuinauka yaktanmaka waketchartnuitai. ²² Nu kintati Yuse chichame aarmawa nunisang mash umiktas niin umirchau ainaun Yus wait wajaktiniun susartinuitai. ²³ Tura Yuska ju nungkanam pujuinauka nukap wait wajaktiniun susatin asamtai, nuwa jamtin ainaunka, tura uchin muntsak pujuinaunka wait anentinajai. ²⁴ Junia aints ainaun untsurin mesetnum maawartin ainawai. Tura chikich aints ainau achikiar metawar mash nungkanam jukiartin ainawai. Tura judóchu ainau Jerusalénnum taar, ju yaktan yumpungkar mesartinuitai. Yus tsangkamkamu asamtai turuwartnuitai. Antsu Yus nuke ati tamati, nuniangka inaisartinuitai,” Jesús timiayi.

Ni tatintrin pachis etserkamuri

(Mat. 24.29-35, 42-44; Marc. 13.24-37)

²⁵ Nunia Jesús ataksha etserak:

“Nuniangka tsaanmasha, tura nantunmasha, tura yaanmasha aints pengké wainchati wantinkartinuitai. Tura juun entsa kakar tamparuktinuitai. Tura mash nungkanmaya ainau juun entsa uutmaurinha antukar, pachimian nintimrar nukap shamkartinuitai.✠

²⁶ “Tura nayaimpinam tuke muchichu ainausha muchitrartinuitai. Tura asamtai aints ainau nuna wainkar: Nungkaka yamaikia meseawapi tusar, nukap shaminak mayajin tak enerar jakawa nunisarang tepesartinuitai. ²⁷ Nunia wikia aintsutiatnak Yus akupkamu asan, Yuse kakarmarijai yurangmijai winamtai, wínaka paan waitkartinuitai. ²⁸ Nu turunatin wainkatin asaram kakaram wajastaram. Tura atumi uwemtikramratin wári tatin asamtai, pengker nintimsaram pujustaram,” Jesús timiayi.

²⁹ Nunia nunasha takun tajai tusa, nuikiartamun nuikiartak:

“Numi higuera tutai tura chikich numi ainausha nintimrataram. ³⁰ Numi tsaraptur nangkamar nukarmatai, atumka: Esat jeatak wajasi tusaram nekarme. ³¹ Tura asaram wi tajarme nuka mash wainkurmeka, atumsha nunisrumek: Yus aints ainaun inartin kinta jeatak wajasi tusaram nekaamnawaitrume.

³² “Nekasan tajarme, nunaka mash umiatsaing, aints ju nungkanam iwiaaku pujuinauka pengké jakarchatnuitai. ³³ Nayaimpisha, tura nungkasha mengkakartaartinuitai. Antsu wína chichamrun taja nuka umitskeka inaisashtinuitjai.

³⁴⁻³⁵ “Mash nungkanmaya ainau nu kinta wári jeatatuapi tusarka, nunaka nintimtsuk pujuinai, nu kintaka aneachmau tsawaartinuitai. Antsu atum pasé aa nu turakrumka, tura nampet wakerakrumka, tura ju nungkanam sumin ainia nu nintimsaram pujakrumka, paan nintimsaram pujustatkamaram tujintarme. Nu shamrumtin kinta awaktukai tusaram, anearum pujustaram. ³⁶ Tura Yusen umirchau ainau turunatnurin mash iisha turunawai tusaram, Yus tuke seataram. Tura aintsutiatnak Yus akupkamu asan ataksha wi winamtai, atumsha wijai pujusmi tusaram, Yuska tuke seataram, tura anearum pujustaram tusan tajarme,” Jesús timiayi.

✠ 21:14-15 (Mat. 10.17-20; Luc. 12.11-12) ✠ 21:16 (Mat. 10.21) ✠ 21:25 (Apoc. 6.12-13)

³⁷ Jesús tsawai Yus seatai jeanam waya aints ainaun nuinimiayi. Tura kashiti Olivo Muranam pujustas, Jerusalénnumia jiinkimiayi. ³⁸ Tura tuke tumin asamtai, aints ainau Jesúsá chichamen antukartas Yus seatai jeanam kashik tariarmiayi.

22

Jesúsán maawartas chicham najatamuri

(*Mat. 26.1-5, 14-16; Marc. 14.1-2, 10-11; Juan 11.45-53*)

¹ Pascua fiesta tura pang pachimrachmau yuwatin fiesta jeatak wajasmiayi. ☆

² Tura asamtai sacerdote juuntri ainausha, tura Moisésa chichame nuikiartin ainausha Jesúsán anangkawar achikiar maawarat tusar chichaman najatiarmiayi. Tura Jesúsán maatar wakerinayat, aints ainaun shamiarmiayi.

³ Nuniangka Judas Iscariote Jesúsá nuiniatiri wainiat, iwianchi apuri Satanás ni nintin engkemtuamiayi. ⁴ Satanás engkemtuam, Judas sacerdote juuntri ainamunam, tura Yus seatai wainin ainau iruntrar pujuinamunam we: Jesúska tu achikminuitai tusa etserkamiayi. ⁵ Tu etsermatai, nuna antukar warainak:

—Ame anangkakminkia akiimiaktatji, —tiarmiayi. ⁶ Tu tinam Judas: Ayu tusa ¿aints atsamunam itiur akankanak surukaintaj? tu nintimiayi.

Pascua fiestati yuwamuri

(*Mat. 26.17-29; Marc. 14.12-25; Juan 13.21-30; 1.Cor. 11.23-26*)

⁷ Pang pachimrachmau yuwatin fiesta nu kinta jeau asamtai, nu fiesta Pascua tutainum uwija uchirin maawar yu armiayi. ⁸ Tura asamtai Jesús Pedroncha, tura Juannasha akupak:

—Atum werum Pascua fiestati yuwatin umistaram, —timiayi.

⁹ Tamati niisha iniinak:

—¿Pascua fiestati yuwatniusha tunia umisarti tusamea wakerame? —tiarmiayi.

¹⁰ Tu tinam Jesús aimiak:

—Juun yaktanam werum, nuni jearam aints muitsan yumin shikik yanas weau wainkaram nu aints nemarsataram. Nu aints jeanam wayaamtai, ¹¹ jeentin wainkaram: ‘Ii nuitamin amin chichaman akupturmak: ¿Wina nuiniatir ainaujai Pascua fiestati yuwatin jea tesaamusha tuniinta? turamui,’ titaram. ¹² Takurmin jeentin pata yakí amanum jea tesaamun yanchuk mash umismaun inakturmastatrume. Nuni ii yuwatin umistaram, —Jesús timiayi.

¹³ Tamati ayu tusar wear, Jesús tímia nunisarang wainkarmiayi. Tura wainkar nuni Pascua fiestati yuwatniun umisarmiayi.

¹⁴ Yurumak yuwatin jeamtai, Jesús ni nuiniatiri ainaujai misanam yuwartas keem-sarmiayi. ¹⁵ Mash keemsaramtai, Jesús chicharak:

—Wína mantinatsaing, nekasan atumjai iruntran, ju fiestatin yurumkan yuwatasan nukap wakerinuyajai. ¹⁶ Yamaikia atumjai ju fiestati yuwaja junaka ataksha yuwashatjai. Antsu Yuse pujutirin jean, mash umisan nuni ataksha atumjai iruntran yuwatnuitjai, —timiayi. ¹⁷⁻¹⁸ Nuna tina piningkian achik, Yusen maaketai tusa, ni nuiniatiri ainaun suak:

—Ataksha ju nungkanam uva yumirin amurchatnuitjai. Antsu Yuse pujutirin jean ataksha amurtinuitjai tajarme. Tura asamtai ju pining jukiram sunaisaram amurtaram, —timiayi.

¹⁹ Nunia yurumkan achik, Yusen maaketai tusa, nunia puurak, ni nuiniatiri ainaun suak:

—Juka wína namangkrua tumawaitai. Atumin uwemtikratin asamtai, winaka mantuwartatui. Turutawartin asaramtai, wina nintimtursaram yuwataram, —timiayi.

²⁰ Tura yutan umisaramtai, Jesús piningkian ataksha achik chicharak:

—Ju piningnum amuti yarakmau wína numparua tumawaitai. Wína mantinamtai, atumin uwemtikratan wína numparka numpartatui. Tura wi jakan, yamaram chichaman etsernuyaja nunaka mash umiktatjai. ☆

☆ 22:1 (Ex. 12.1-27) ☆ 22:20 (Jer. 31.31)

²¹ Tura wína surutkatin wijai tsanias ju misanam ni uwejejai yurumkan achik yuwawai.
²² Wikia aintsutiataknak Yus akupkamu asan, Yuse wakeramurin miatrusnak umiktinuitjai. Turayatnak wína anangkrua surutkatniunka nukap wait anentajai, —Jesús timiayi.

²³ Tamati nuna antukar ni nuiniatiri ainau:
 —¿Ni suruktincha yáki at? —tunaiarmiayi.

¿Yáki chikich ainaun nangkamakesha atinuita? timiauri
 (Mat. 20.25-28; Marc. 10.42-45)

²⁴ Nunia Jesúsa nuiniatiri ainau chicharnainak:
 —¿Yáki iin nangkatamsangsha ati? —tunaiarmiayi. ☆

²⁵ Tu tunainamtai Jesús chicharak:
 —Ju nungkanmaya apu ainauka ni aintsri ainaun akatrar pe akupin armiayi. Tura aintsu akupin ainaun pachisar: ‘Pengker turinuitai,’ tinawai. ²⁶ Antsu atumka tuuka nintimrashtinuitrume. Atum eemkau ainautirmeka uchi ekeria nunisrumek atinuitrume. Tura inakratin akurmasha miajuitjai tumamtsuk, antsu aintsu inatiria nunisrumek atinuitrume. ²⁷ Nintimrataram. Aints misanam yuwak pujau, tura chikich aints ainaun yutan sua nujai apatkam ¿tuá nekas timiá nangkamakuita? Yuta yuwa nu nekas nangkamakuitai, antsu wikia aintsu inatiria nunisnak atumjai iruntran pujajai. ☆

²⁸ “Wi wait wajamtaisha atumsha tuke wijai iruntraram pujuyarme. ²⁹ Tura asakrumin apu atiniun wína Apaachir wína tsangkatrukmiá nunisnak atumnasha tsangkatkatnuitjarne. ³⁰ Tura wína pujutirun pujusrum wijai yuwatnuitrume, tura wijai umurtinuitrume. Tura apu keemtai doce (12) ainamunam pujusrum, Israela wearí inartinuitrume,” Jesús timiayi. ☆

Pedron: Wína natsantrurtatme timiauri
 (Mat. 26.31-35; Marc. 14.27-31; Juan 13.36-38)

³¹ Nunia Apu Jesús Simón Pedron chicharak:
 —Simónka wainkata. Aints trigo jingkiájin juuk pakar peawa nunisang Satanás atumin pachimian nintimtikramratas Yusen iniasi. ³² Tura wainiatnak wikia amin pachisan: Ame tuke inaitutsuk wina nekasampita turutminam tusan Yusen seatmiajme. Tura ataksha wina umirtukam wína umirtin ainau kakamtikrarta, —Jesús timiayi.

³³ Tamati Simón ayaak:
 —Apuru, kársernum engketminamtaisha, wisha nunisnak amijai tsaniasan engke-matatjai. Tura amin mantaminamtaisha, winasha mantuwarat tusan wakerajai, —timiayi.

³⁴ Tamaitiat Jesús chicharak:
 —Pedro, nekasan tajame: Yamaik atash shinatsaing, wina pachitsam: Nu aintsnaka wainchawaitjai tusam, ameka kampatam waitrakum uurtuktatme, —timiayi.

Nekaprustin jeatak wajasi timiauri

³⁵ Nunia Jesús ataksha ni nuiniatiri ainaun iniak:
 —¿Wi yaanchuik yurumak entsatsuk, nunia kuikiasha takutsuk, tura sapatcha takutsuk wetaram tusan akupkamiajrume nuni yuumakmakiarum? —Tu iniam aiminak:
 —Atsa, pengké yuumakchamiaji, —tiarmiayi. ☆

³⁶ Tinamtai Jesús chicharak:
 —Antsu yamaikia yurumkan takakuka nuka takusti. Tura kuikiancha nunisang takusti. Tura saapin takakchauka ni wejmakrin suruk, saapin sumakti tajarme. ³⁷ Yuse chichame etserin yaanchuik aararmia nunaka mash umiktin asamtai, ju aarmauka: ‘Pasé aints ainaujai maawarmiayi,’ wína pachitas aarmawa junaka umikiartatui, —timiayi. ☆

³⁸ Jesús tamati ni nuiniatiri chicharinak:
 —Apuru, juni saapikia jimiar takakji, —tinamtai, Jesús ayaak:
 —Ayu, maaketai, nuke ati, —timiayi.

☆ 22:24 (Mat. 18.1; Marc. 9.35; Luc. 9.46) ☆ 22:27 (Juan 13.12-15) ☆ 22:30 (Mat. 19.28;25.31) ☆ 22:35 (Mat. 10.9-10; Marc. 6.8-9; Luc. 9.3;10.4) ☆ 22:37 (Isa. 53.12)

Jesús arakmau Getsemaní tutainum Yus seamuri
(*Mat. 26.36-46; Marc. 14.32-42*)

³⁹ Nunia Jesús jiinki, tuke tumin asa, Olivo Muranam wemiayi. Ni weamtai nuiniatiri ainausha nemarkarmiayi. ⁴⁰ Tura mura wakaar, Jesús nuiniatirin chicharak:

—Tunau nepetukai tusaram Yus seataram, —timiayi.

⁴¹ Nunia kaya nangkimiamsha ayaarminum Jesús ai arakchichu wemiayi. Tura we Yusen seak:

⁴² —Apaachi, ame wakerakmeke, wi wait wajaktinka tsangkamrukaip. Antsu wi wakeraja nuka ahati, antsu ame wakerame nuke ati, —timiayi.

⁴³ Tamati Yuse awemamuri nayaimpinmaya Jesúsán kakamtikratas tarimiayi. ⁴⁴ Tura Jesús ni wait wajaktintrincha nintimias shamak nuna nangkamasang kakar Yusen seak, seekirisha numpa tumau nungká kitaamiayi.

⁴⁵ Tura Yusen sea umis wajaki, ni nuiniatiri ainaun jiistas werimiayi. Turam timiá wake mesekar napchau nekapinak, kari nepetinam kanú tepearmiayi. ⁴⁶ Kaninamtai nuna wainak Jesús chicharak:

—¿Waruka kanusha teparme? Tunau nepetukai tusaram nantakrum Yus seataram, —timiayi.✠

Jesúsán achikiar jukimuri
(*Mat. 26.47-56; Marc. 14.43-50; Juan 18.2-11*)

⁴⁷ Jesús tuke chichaak wajai, aints untsuri tariarmiayi. Tura Jesúsá nuiniatiri Judas niyá eemkak Jesúsán mejeastas tarimiayi. ⁴⁸ Turamtai Jesús chicharak:

—Judasa, wikia Yus akupkamu ayatnak, aints akiinai waitiatmek ¿wína mejentsam surutam? —timiayi.

⁴⁹ Tamati Jesúsjai pujuarmia nuka nuna wainkar:

—Apuu ¿saapijai maaniktajiash? —tiarmiayi.

⁵⁰ Tura aints Jesúsjai wajau saapirin kuinak, sacerdote apuri inatiri kuwishin untsurinini met charutkamiayi. ⁵¹ Turamtai Jesús chicharak:

—Maaketai, inaisataram, —timiayi. Nunia nu aintsu kuwishin ataksha nujtuk pengker najanamiayi. ⁵² Nunia sacerdote juuntri ainau, tura Yus seatai wainin ainausha, tura judío apuri ainausha Jesúsán achikiartas taarmia nuna chicharak:

—¿Waruka kasa aints achiktasrum winitua nunisrumsha saapisha, tura numisha takusrumsha tarutniurme? ⁵³ Wikia kashincha kashincha Yus seatai juun jeansam atumjai tuke pujusan aints ainaun nuininuyajai. Tura wainiatrumsha nuni achirkachmarume. Turayatrum tuke teenam puja nuna inatiri asaram, ni kakarmarijai yamai kintati aitkararme, —Jesús timiayi.

Pedro Jesúsánaka wainchajai timiauri
(*Mat. 26.57-58, 69-75; Marc. 14.53-54, 66-72; Juan 18.12-18, 25-27*)

⁵⁴ Nunia Jesúsán achikiar metawar sacerdote apuri jeen umaarmiayi. Turinamtai Pedrosá ukunam yaitas nemarki wemiayi. ⁵⁵ Tura nuni weri, sacerdote inatiri ainau aanum jin yaminak pujuinamtai, Pedrosá nu aints ainaujai pachinak keemsamiayi.

⁵⁶ Tura nuni pujamtai, nuwa sacerdote inatiri, Pedron jin ayamak pujaun wainak tari jij wajatmiayi. Tura chicharak:

—Ju aintska Jesúsjai wekainuyayi, —timiayi.

⁵⁷ Tamaitiat Pedro aimiak:

—Atsa nuwachi, nangkami tame. Nu aintsnaka wainchajai, —timiayi.

⁵⁸ Tamati jumchik arus chikich aintcha niin wainak:

—Amesha au aintsjai pachitkauyame, —timiayi.

Tamaitiat Pedro aimiak:

—Atsa aishmangku, wichawaitjai, —timiayi.

⁵⁹ Tura kichik hora nangkamaramtai, chikich aints nuni iruntrar pujuinaun chicharak:

✠ 22:46 (Hebr. 5.7)

—Juka nekas aujai wekainuyayi. Juka nekas Galilea nungkanmaya aintsuitai, —timiayi.

⁶⁰ Tamaitiat Pedro aimiak:

—Aishmangku ¿warintsuk turutrum? nunaka nekatsjai, —timiayi.

Tura chichaak pujai atash shinimiayi. ⁶¹ Atash shinamtai, Apu Jesús Pedron ayanmatar jiiij wajatmiayi. Turamtai Pedro Apu Jesús a timiaurin nintimramiayi. Ni timiauringkia nuwaitai: Atash shinatsaing, nu aintsnaka wainchawaitjai tusam, ameka kempatam waitrakum uurtuktatme. ⁶² Nu timiau asa, Pedro nuna nintimias jiinki kakar juutmiayi.

Jesús an wishikramuri

(*Mat. 26.67-68; Marc. 14.65*)

⁶³ Aints Jesús an wainkarmia nuka wishikrami tusar awatiarmiayi. ⁶⁴ Tura Jesús a jiinka tarachjai jingkiatawar awatinak:

—Watska, ame ¿yáki aitkara? tusam jiitsuk nekaata, —tiarmiayi. ⁶⁵ Tura katsekinak chichaman untsuri chichariarmiayi.

Judío apuri iruntramunam jukimuri

(*Mat. 26.59-66; Marc. 14.55-64; Juan 18.19-24*)

⁶⁶ Tsawaaramtai judío juuntri ainu, tura sacerdote juuntri ainausha, tura Moisés a chichame nuikiartin ainausha mash iruntrar chicham nekaaratai tusar, Jesús an judío apuri iruntramunam umaarmiayi. Tura nuni jeeniar iniinak:

⁶⁷ —¿Nekasmek Mesíasaitam? ¿Yus akupkatnuitjai tímia nukítam? Nu paan etserkata, —tiarmiayi.

Tu iniinamaitiat Jesús ayaak:

—Wikia nekas an Mesíasaitjai tamatisha, atumsha nekasampita turutchatatrume.

⁶⁸ Tura wi atumin iniamsha, winaka airkashtatrume. ⁶⁹ Tura wikia aintsutiatnak Yus akupkamu asan, jumchik arusan Yus nekas kakaram aa nuna untsurinini pujustajai, —timiayi.

⁷⁰ Tamati mash iniinak:

—¿Nekasmek ame Yuse Uchirintam? —tiarmiayi.

Tu tinam Jesús aimiak:

—Ja ai, atum wína turutrume nuka nuwaitjai, —timiayi.

⁷¹ Jesús tamati chicharinak:

—Pai, ii antarin nuwaitjai ningki tumamusha ¿warí chicham antuktasrik nakastaj? —tunaiarmiayi.

23

Pilato pujamunam jukimuri

(*Mat. 27.1-2, 11-14; Marc. 15.1-5; Juan 18.28-38*)

¹ Nunia mash wajakar Jesús an romano apuri Pilato pujamunam jeeniararmiayi. ² Tura Pilatonam jeeniar tsanuminak:

—Ju aintska ii aintsri ainaun pachimian nintimrarti tusa chicharu anturkamji. Tura romano apurin kuik akikchamnawaitji tau anturkamji. Tura wiitjai Mesíasaitjai tau anturkamji. Nuka judío ainauti apurinjai taku tawai, —tiarmiayi.

³ Tu tinam Pilato Jesús an iniak:

—¿Nekasmek judío apurintam? —timiayi.

Tama Jesús ayaak:

—Ame turutme nuka nekasam tame, —timiayi.

⁴ Tamati Pilato sacerdote juuntri ainaun, tura aints iruntrarun chicharak:

—Ju aintsu tunaarinka kichkisha nekaarachjai, —timiayi.

⁵ Tamaitiat nuna nangkamasarang kakarar chicharinak:

—Antsu juka mash judío nungkanmaya ainaun nuiniak: Atumka apu umirtsuk asataram tusa tsanumnuyayi. Yanchuk Galilea nungkanam nangkama tsanu tsanumka junisha tamayi, —tiarmiayi.

Jesús an apu Herodesnum jeemiauri

⁶ Tu tinamtai Pilato nuna antuk iniak:

—¿Ju aintska nekas Galileanmayangkai? —timiayi. ⁷ Tu iniam:

—Ja ai, —tinamtai, apu Herodes chichaman nekaati tusa, Pilato Jesúsán Herodesnum akupkamiayi. Herodeska Galilea apuri ayayi. Turayat Jerusalénnum irastas taa, nu kintati nuni pujumiayi. ⁸ Tura Herodes yaanchuik Jesúsán pachisar chichainamun antuku asa, Jesús aints wainchatai takatan turamtai, wisha wainkataj tusa wakerukmiayi. Tura asa Jesúsán jeeniarantai, Herodes niin wainak warasmiayi. ⁹ Tura inintramun untsurin iniasmiayi. Tura wainiat Jesúska pengké aitsuk wajamiayi. ¹⁰ Herodes Jesúsán iníamtai, sacerdote juuntri ainau tura Moisésa chichame nuikiartin ainausha antú wajarmiayi. Tura Jesús aimitsuk wajamtai, niisha nangkamiar chichaman najatinak nukap tsanumiarmiayi. ¹¹ Turinamtai Herodescha ni suntari ainaujai iruntrar Jesúsán: Ainusha tusar wishikinak, apu entsatirin shiirman antsrarmiayi. Nunia Herodes: Ataksha Pilatonam wakеткиti tusa Jesúsán akupkamiayi. ¹² Yaanchuikkia Herodeska Pilatojaingkia kajernaikiar wainaitsuk puju ainayat, nu kintati amikmawarmiayi.✠

Pilato Jesúsán maawarti tusa tsangkamkamuri

(*Mat. 27.15-26; Marc. 15.6-15; Juan 18.39-19.16*)

¹³ Nunia Jesúsán ataksha itarim, Pilato sacerdote juuntri ainaun, tura judío juuntri ain-
auncha, tura chikich aints ainauncha mash irurmiayi. ¹⁴ Nunia juun ainaun chicharak:

—Atumka ju aints: Apu umirtsuk asataram tusa, aints ainaun tsanuyayi tusaram wini itaarume. Tura wainiatun atumsha antarmin, wi iniaknasha ju aintsu tunaarin pachisrum chichaa wearme nunaka nekaratatkaman pengké tujinkajai. ¹⁵ Herodescha nunisang ni tunaarinchá nekarachu asa, ataksha juni akupturmakji. Tura asantai ju aintsna maawarti tichamnawaitjai. Atumsha nusha nekarme. ¹⁶ Tura asan tajarme: Suntar awatraramtai nuniangka akupkatatjai, —Pilato timiayi.

¹⁷ Musachjai metek Pascua fiesta jeamtai, Pilato kichik aintsun karsernumia jiiki akupnuyayi. Tura asa aints ainaun iniak:

—¿Ju aintsna jiikin akupkatjash? —timiayi. ¹⁸ Tamaitiat aints mash iruntrar kakarar chichainak:

—Atsa, juka nakitaji. Antsu Barrabás akupkata, —tiarmiayi.

¹⁹ Nu Barrabáska romano apurin umirtan nakitak, Jerusalén yaktanam chikich aints irunujai mesetan najana, aintsun mau asa karsernum engkeamu pujuyayi. ²⁰ Tura asantai Pilatoka aints ainaun ataksha chicharak:

—Antsu nekasna Jesúsán akupkatjai, —timiayi. ²¹ Tau waininayat nuna nangka-masarang kakarar chicharinak:

—Atsa, antsu numi winangmaunum ajinkam maata, —tiarmiayi.

²² Nunia Pilato ataksha aints ainaun chicharak:

—¿Waruka? ¿Warí tunauna turini? Ju aintsun maawarti tusanka, ni tunaarinka pengké nekarachjai. Tura asan suntar awatraramtai, nuniangka akupkatatjai, —timiayi.

²³ Tamaitiat tuke kakarar chicharinak:

—Juka numi winangmaunum ajinkam maata, —tusar wakerinau asar, Pilatonka nepetkarmiayi. ²⁴ Tinamtai Pilatoka:

—Ayu, nuniangka suntar numi winangmaunum ajinkar maawarti, —tusa aints ainau seainam tsangkamkamiayi. ²⁵ Antsu mesetan najanin tura mangkartin akupkata tinau asaramtai, Pilato nu aintsun karsernumia jiiki akupkamiayi. Tura: Aints ainau ni wakeramurin turuwar, Jesúsna maawarti tusa tsangkamkamiayi.✠

Numi winangmanum maamuri

(*Mat. 27.32-44; Marc. 15.21-32; Juan 19.17-27*)

²⁶ Nunia Jesúsán jukiar junta weenak, Cirene nungkanmaya Simón naartiniun ajan-maya winaun wainkar, suntar ainau niin achikiar, numi winangmaun yanas Jesúsán nemarsati tusar nijai wekaasarmiayi.

✠ 23:12 (Hech. 4.27) ✠ 23:25 (Hech. 3.14)

²⁷ Turinamtai aints ainau untsuri jiistai tusar nemariarmiayi. Tura nuwasha untsuri Jesúsán wainkar, napchau nintimrar juutiarmiayi, tura wake mesekar untsumkiar Jesúsán nemariarmiayi. ²⁸ Tuminamtai Jesús nuwa irunun jiis chicharak:

—Jerusalénnumia nuwa ainautiram, wína anenkurmeka juutirap. Antsu atumek nintimtumasrum, tura atumi uchiri nintimsaram juutiram. ²⁹ Atum wait wajaktin kintaka jeartinuitai. Nu kinta jearamtai, aints ainau chichainak: Nuwa kaa ainau, uchin jurechu asar, tura uchin munchau ainausha chikich nuwa ainaun nangkamasarang warasartin ainawai, tiartinuitai. ³⁰ Tura nukap wait wajainau asar, nu kintati aints ainau muran chicharinak: ‘Mura ainautiram, yakíya ayaarum iin tukukratkataram,’ tiartinuitai. ³¹ Tura asamtai wikia pengké tunaarinchautiatnak, timiá wait wajau asamtai, tunaarintin ainawa wina nangkamasarang wait wajakartin ainawai, —Jesús timiayi.

³² Turamtai mangkartin ainaun jimieran Jesúsjai maami tusar jukiarmiayi. ³³ Tura mura muuk ukunch tutainum jear, suntar ainau Jesúsán numi winangmanum ajinkar yakí nenaawar, mangkartin aints nasha nunisarang Jesúsá untsurinini, tura Jesúsá menarininisha numi winangmanum ajinkar nenaawarmiayi. ³⁴ Turinamtai Jesús Yusen seak:

—Apaachi, ju aints aitkarinia juka nintiminachu asaramtai tsangkurarta, —timiayi. ³⁵

Tamati Jesúsá entsatirin jurukiar, suntar ainau ¿Yáki juna jukit? tusar nakuruti “suerte” tutain nakuriarmiayi. ³⁵ Turinamtai aints irunuka Jesúsán jijj wajatiarmiayi. Tura judío juuntri ainau wishikinak:

—Chikich ainaun uwemtiknuyayi. Nekas Yus akupkamuitkungka ningki uwemrati, —tiarmiayi. ³⁶

³⁶ Suntar ainausha nunisarang wishikinak, vino churiniun mukunat tusar aapawarmiayi. ³⁷ Tura chicharinak:

—Ame nekasam judío apurinkumka amek uwemrata, —tiarmiayi.

³⁸ Tura Jesúsá muuken yakinini griego chichamjai, tura romano chichamjai, tura hebreo chichamjai tatangnum aarmaun numi winangmanum nujtukarmiayi. Nu aarmauka nuwaitai: Juka judío apurintai.

³⁹ Mangkartin aints nuni netimia nuka Jesúsán jiyaak:

—Ame Yus akupkamu Mesíasaitkumka, watska amek uwemrata. Tura iincha uwemtikiarturta, —timiayi.

⁴⁰ Tamati kichka ni tsaniakmaurin chicharak:

—Ameka jakatin kinta jeau wainiatmek ¿Yus tuke shamatum? ⁴¹ Iikia nekasar tunau asar wait wajakminuitji. Tura asar ii tunaari akiimiakur waitnaji. Antsu ju aintska tunaunaka pengké kichkisha turichuitai, —timiayi.

⁴² Nunia Jesúsán chicharak:

—Jesúsá, ami pujutirmin jeam, aints inau wajasam kajinmatrukiip, —timiayi.

⁴³ Tama Jesús ayaak:

—Nekasan tajame, yamai kintaka Yuse umirin jakaru matsatmanum wijai pujustatme, —timiayi.

Jesúsá jakamuri

(*Mat. 27.45-56; Marc. 15.33-41; Juan 19.28-30*)

⁴⁴ Tsaá tupin wajasamtai, mash nungka tee wajasmiayi. Tura kempatam hora nangkamaramtai, tsaá yantanti ataksha tsantramiayi. ⁴⁵ Tsaá mushatmaramtai, Yus seatai juun jeanam aparamau netimia nu ningki yakiya tseu jaankamiayi. ⁴⁶ Turunamtai Jesús kakar untsamak:

—Apaachia, wína wakantruca ame waitrukta, —tusa mayajin tak nangkankamiayi. ⁴⁷

⁴⁷ Turamtai suntara kapitangkri Jesúsá jakamurin wainak, Yus juuntapita tusa chichaak:

☆ 23:30 (Apoc. 6.16) ☆ 23:34 (Isa. 53.12) ☆ 23:34 (Sal. 22.18) ☆ 23:35 (Sal. 22.7) ☆ 23:46 (Sal. 31.5; Hech. 7.59)

—Ju aintska nekas pengké tunaarinchauyayi, —timiayi.

⁴⁸ Jesús jakamtai, aints ainau nuna wainkar, mash napchau nintimsar netsepen awatmaminak: “Pengké nangkamiapi ju aintsun maawari,” tunaiyarmiayi. ⁴⁹ Tura Jesús wainkaru ainausha tura nuwa ainausha Galileanmaya niin nemarkarmia nusha arák wajasar jijj wajatiarmiayi.✠

Jesúsa iwiarsamuri

(*Mat. 27.57-61; Marc. 15.42-47; Juan 19.38-42*)

⁵⁰⁻⁵² Jesús jakamtai, aints José naartin pengke aints asa, Pilaton weri:

—Jesúsa namangke surusta, —tusa seamiayi. Nuka judío nungkanmaya Arimatea yaktanmaya aintsuyayi. Joséka judío juuntri chicharin ayat, judío apuri iruntramunam mash Jesús maatai tiarmia nunaka pengké nakitmiayi. Antsu Yus aints ainaun inarti tusa nakauyayi. ⁵³ Pilato José:

—Jesúsa namangke jukita, —tamati, José we Jesús namangken numinmaya kuaki, tarachjai kangkarmiayi. Nunia jakau iwiartai pampa taimunam iwiarsamiayi. Nu iwiartainum aints kichkisha iwiarsachmauyayi. ⁵⁴ Tura kashin tsawaarka ayamtai kinta atin asamtai, kintamrai tusa José Jesús namangken wári iwiarsamiayi.

⁵⁵ Tura iwiarsamtai Galileanmaya nuwa ainau Jesús nemarsarmia nusha iwiarsamunam wear: ¿Jesúsa namangken tuning iwiarsarma? tusar jijj wajatiarmiayi. ⁵⁶ Tura jiisar ni jeen waketkiar, Jesús namangke chikich kintati yakaarami tusar kungkutin pachimrarmiayi.

Jesúsa nantakmiauri

(*Mat. 28.1-10; Marc. 16.1-8; Juan 20.1-10*)

Tura nu kintati aints kichkisha takakmascharti Moisés tu aarmau asamtai, nu chichaman umiinak ayamsarmiai.

24

¹ Tuning kintati kashik nu nuwa ainauka kungkuti pachimramun jukiar, chikich nuwa irunujai tsaniasar, Jesús iwiarsamunam wearmiayi. ² Tura nuni jear kaya juuntan iwiarsamu waarin ututkarmia nuna urankaun wainkarmiayi.

³ Tura wayaawariat ii Apuri Jesús namangkenka wainkacharmiayi. ⁴ Tura wainkacharu asar: Warukatjik tusar shamkarmiayi. Tura shaminak, Yuse awemamuri jimia aintsua tumaun entsatin pujun winchaan jiischamniaun entsarun wainkarmiayi. ⁵ Nuna wainkar nukap shamkar tsunsumawaramtai, Yuse awemamuri chicharinak:

—Jesús iwiaaku pujausha ¿waruka iwiarsamusha jiarme? ⁶⁻⁷ Juningkia tepatsui. Antsu jakamunmaya nantaki. Nisha Galileanam pujus atumin chichartamak: ‘Wikia Yus akupkamu waitinayat, winaka tunau aints ainamunam surutkartinuitai. Tura numinam ajinkar mantuwaramtai, kempatam kinta jakan tepayatnak nantaktinuitjai,’ ¿ni tímia nuka nintimtsurmek? —tiarmiayi.✠

⁸ Tu tinam Jesús timiaurin nintimrarmiayi. ⁹ Nunia iwiarsamunmaya waketkiar, Jesús nuiniatiri once (11) amia nuna wainkar, tura chikich irununcha wainkar, nu turunamun mash etserkarmiayi. ¹⁰ Jesús nuiniatirin ujakaru ainauka nu ainawai: Magdalanmaya Marí, nunia Juanasha, nunia Jacobo nukuri Marísha, tura chikich nuwa irunusha nu turunamun etserkarmiayi. ¹¹ Tura nuwa irunu tinaun antukariat, Jesús nuiniatiri ainau nekasampita tutsuk: Nangkamiar waurinak tinatsuash, tu nintimrarmiayi.

¹² Antsu Pedro jiinki iwiarsamunam ampuki wemiayi. Tura nuni jea tekana jiikma tarachik tepaun wainkamiayi. Tura wainak nukap nintimiar jeanam waketkimiai.

Emaús jintanam Jesús wantinkamuri

(*Marc. 16.12-13*)

✠ 23:49 (Luc. 8.2-3) ✠ 24:6-7 (Mat. 16.21;17.22-23;20.18-19; Marc. 8.31;9.31;10.33-34; Luc. 9.22;18.31-32)

¹³ Nu kintati Jesúsa nemarnuri jimiar Emaús yaktanam wearmiayi. Nu yakat Jerusalénnumia once (11) kilómetros ayayi. ¹⁴ Tura junta weenak mai nuwamtak Jesús turunamun pachisar chichaarmiayi. ¹⁵ Tura chichakiar weenai, Jesús wantintuk nuni pachinak nijai tsanias wekaasamiayi. ¹⁶ Tura Jesús wantinkaun ni namangkencha paan waininayat, Jesúsapita tusarka nekaacharmiayi. ¹⁷ Tura nekaacharam Jesús nijai tsanias junta weak chicharak:

—¿Jinta weakrumsha, warí chichakrumsha wearme? ¿Tura waruka timiá wake mesekrumsha wearme? —timiayi.

¹⁸ Tu iniam aints Cleofas naartin ayaak:

—Jerusalénnum turunamunka aints ainau mash nekainawai. ¿Amekek nu chicham antichumka pachitkam? —timiayi. ¹⁹ Tamati Jesús chicharak:

—¿Waruka? ¿Warí chichama awa? —timiayi.

Tu iniam aiminak:

—Iikia Nazaretnumia Jesúsa turunamuri taji. Nisha Yuse chichame etserin asa, Yuse kakarmarijai chichauyayi. Tura Yus wainmamunmasha tura aints mash wainminamunmasha wainchatai takatan takauyayi. ²⁰⁻²¹ Tura waininayat sacerdote juuntri ainau, tura judío juuntri ainausha chichainak: Tunau takasu asamtai jakati tusar, tura numi winangmanum maawarti tusar, romano apurin surukarmayi. Tura ni maamuri yamaikia kempatam kinta nangkamari. Antsu iikia Israel ainautin uwentikramrash-tajash tu nintimrarmiaji. ²²⁻²³ Antsu nuwa ainau iijai iruntrar pujuina nuka yamai kashik iwiarsamunam wear, Jesúsa namangken wainkartatkamawar wainkachari. Tura wainkacharu asar, ii pujamunam taar chichainak: Iikia iwiaayatrik karanma nunisrik Yuse awemamuri wainkaji. Tura nuka: Jesúska iwiaakui tusa ujatmakji. Nuwa tu ujatminamtai iisha shamkamji. ²⁴ Tu etserkaru asaramtai, iijai iruntrar pujuinausha iwiarsamunam wear, nuwa tiarmia nunisarang wainkari. Antsu Jesúsna wainkachari, —tiarmiayi.

²⁵ Tu tinam Jesús chicharak:

—Nintinchau ainautiram ¿yaanchuik Yuse chichame etserin ainau tiarmia nusha waruka nekasampita tutsuksha pujarme? ²⁶ ¿Mesíasan pachisar aararmia nuka nekaschaukai? Yus akupkamutiat nayaimpinmaka watsuk ¿nekas wait wajakchatnukai? —timiayi.

²⁷ Tura Moisés niin pachis aarmia nuna nangkamsang, tura Yuse chichamen etserin aararmia nusha taku tiarmiayi tusa, Jesús Yuse chichamen niin pachisar aararmia nunaka mash nekamtikiamiayi.

²⁸ Tura chichaa chichaaka nu yaktanam jearmiayi. Tura Jesúska nangkamaki wetaj tusa wajamiayi. ²⁹ Tura waininayat nu jimia aints chicharinak:

—Atsa, nangkamakip. Iijai pujusta. Tsaa yanchuk nungká wajasi, —tiarmiayi.

Tu tinam Jesús ayu tusa, nijai pujustas jeanam wayaamiayi. ³⁰ Tura nijai iruntrar jeanam pujus, pangkan achik Yusen sea: Maaketai tusa, puurak niincha susamiayi. ³¹ Turamtai ni jii uranua nunisarang: Nekasampi Jesúsaita tusar paan nekaawarmiayi. Paan nekaawaram Jesúska mengkakamiayi. ³² Tura mengkakamtai mai nuamtak chicharnainak:

—Ii junta winarin, Yuse chichame tu awai tusa iin ujatmamtai, ii ninti kapaawa nunisrik tsuwer nekapmamramji. ¿Nuka nekaschaukai? —tunaiyarmiayi.

³³ Tura arutsuk wajakiar jeanmaya jiinkiar, wári Jerusalénnum waketkiarmiayi. Tura waketkiar, Jesúsa nuiniatiri once (11) ainau chikich nemarnuri irunujai iruntrar pujuinaun wainkarmiayi. ³⁴ Tura wainaikiar jeanam pujuarmia nuka yamai wininaun chicharinak:

—Ii Apuri nekas nantaki. Tura Simónkan wantintuki, —tusar ujakarmiayi.

³⁵ Tu ujainam nisha chichainak:

—Iisha waketkur junta weakur nekasar Jesús wainkamji. Tura pangkan achik puurtamak iin suramsamtai, nekas Jesúsapita tusar nekaamji, —tiarmiayi.

Jesús ni nuiniatiri ainaun wantintukmauri
(*Mat. 28.16-20; Marc. 16.14-18; Juan 20.19-23*)

³⁶ Tu chichainak pujuinai, Jesús aneachmau japen wajas:

—Pengker nintimsaram pujustaram, —timiayi.

³⁷ Tamati nuna antukar shaminak:

—¿Wakanchawashi? —tu nintimrarmiayi. ³⁸ Tu nintiminamtai Jesús chicharak:

—¿Waruka shamrarme? ¿Waruka winasha wakanchawashi tuusha nintimrutrume?

³⁹ Jiirsataram. Wiitjai. Tura uwejrusha tura nawersha takarsaram jiirsataram. Wakankia nekas namangtichuitai. Tura ukunchtichuitai, —timiayi.

⁴⁰ Nuna tii ni uwejencha, tura mijiarincha inakmasmiayi. ⁴¹ Turamtai ijiumurin wainkar warainayat timiá shamkaru asar, nekasampita tichamin nekapiarmiayi. Tu nintiminamtai Jesús iniak:

—¿Juni yuta awak? —timiayi.

⁴² Tamati namak inaramun yuwati tusar susarmiayi. ⁴³ Tura susaram Jesús nuna achik, ni nuiniatiri jimia wajainai yuwamiayi. ⁴⁴ Tura yuwa umis Jesús ataksha chichaak:

—Wi atumjai pujusan timiajrume nuka mash turunayi. Tura wína pachitas Moisés aarmia nusha uminkayi. Tura Yuse chichame etserin aarmia nusha, tura papi Salmonam aarmawa nusha mash uminkayi, —timiayi.

⁴⁵ Nunia Yuse chichame niin pachis armaunasha Jesús ni nuiniatiri ainaun nekamtiki-amiayi. ⁴⁶ Tura ataksha chichaak:

—Yuse chichame tu aarmawaitai: ‘Mesías Yus akupkamutiat jakatnuitai. Tura kampatam kinta jaka tepayat nantaktinuitai,’ tu aarmawa nuka wína pachitas aarmawaitai.

⁴⁷ Tura aints ainu ni nintimaurin yapajiawar, ni tunaarin inaisaramtai, Yus ni tunaar-incha mash sakartinuitai, tusar wína naarun pachitsar Jerusalénnumia nangkamawar mash nungkanam etserkartin ainawai. ⁴⁸ Tura atumsha wi turunamur mash nekau asaram etserkatnuitrume. ⁴⁹ Tura wína Apaachir: Wína Wakantrun akuptuktatjarme tinu asamtai, nuka nayaimpinmaya taatsaing, juni Jerusalénnum pujustaram. Tura taa ni kakarmarin suramsatatrume, —Jesús timiayi.✠

Jesús nayaimpinam wakamuri
(*Marc. 16.19-20*)

⁵⁰ Nunia mash etserak umis, ni nuiniatiri ainaujai iruntrar Betania yaktanmanini wearmiayi. Tura nuni wear, Jesús wajas ni uwejen takui: “Yamaikia pujustaram. Yus yainmakarti,” timiayi. ⁵¹ Tura uwejen takui kanák wajas nayaimpinam wakamiayi.✠

⁵² Turamtai ni nuiniatiri ainu: Ameketme Yusem tusar nukap warasar Jerusalénnum waketkiarmiayi. ⁵³ Tura nuni jear, kintajai metek Yus seatai juun jeanam wayaawar: Yus juuntapita tiarmiayi. Maaketai.

Yamaram Chicham Juanku Aarmauri

Yuse Uchiri Yuse chichamea tumawaitai timiauri

¹ Nu nangkamtaik Yus mash aa nuna najantsaing, Yuse Chichamengka tuke ayayi. Nu Chichamka tuke Yusnum pujuyayi. Tura asa Yuseyayi.* ² Nuka nu nangkamtaik Yusjai tuke pujuyayi. ³ Ningki najanamuka pengké atsawai, antsu Yus ni Uchirijai mash najanamiayi.✠ ⁴ Nuka tuke iwiaaku pujau asa, aints ainaun tuke pujustinun suyayi. Tura tuke pujutan sukartin asa, paaniunam pujus, aints ainau nekasar paan nintimrarti tusa chichaman nekamtiknuyayi. ⁵ Tura aints ainaun tuke paan nintimtikin asa, aints teenam pujuinauka paan nintimrarti tusa tuke nintimtikui. Tura Yusen umirtan nakitinauka teenam pujuinau asar, nu paaniunam pujaunaka nepetkartatkama pengké tujinkarmiayi.†

⁶ Cristo wantintsaing Yus Imiakratin Juankun akupkamiayi. ⁷ Turamtai aints ainau ni chichaamun antukar nekasampita tiarat tusa, Juan nu paaniunka pachis chichaman etserkatas tamiayi. ⁸ Juanka mash aints ainaun paan nintimtiknuka achayayi. Antsu nu paaniun pachis etserkat tusa, Yus akupkamuyayi.✠ ⁹ Nu paaniun nintimtiknuka chikichaitai. Nuka aints ainaun mash paan nintimtikrartas ju nungkanam tamiayi.

¹⁰ Tura ni chichamen nekamtikiartuktas, ju nungkanam taa akiinamiayi. Tura ju nungkan najanau waininayat, ju nungkanam pujuinauka nuwaapita tusar nekaacharmiayi. ¹¹ Ju nungkanam ni weari pujuinamunam tamiayi. Tura waininayat, ni wearisha niin pachischarmiayi. ¹² Tura ni weari pachischaram, chikich ainau niin nekasampita tusar nintimtinauka Yuse uchiri arti tusa tsangkamkamiayi.✠ ¹³ Junia aints akiinawarua nunisarang ataksha akiinawaruka ainatsui. Tura junia aints uchin yajutmarua nunisarang ataksha yajutmarmauka ainatsui. Antsu Yus yajutmarmawa nunisarang Yuse uchiri ainawai.

¹⁴ Nu Chichamka ju nungkanam akiina aints wajakmiayi. Tura ijai pujuyayi. Nuni iisha ni kakarmari waitnuyaji. Yuse Uchiri kichik aa nu ni Apaachiriya nunisang tuke puju asamtai, ni nekas chichame anturnuyaji. Tura ni anengkratairisha nekarnuyaji.✠

¹⁵ Tura Juan Criston pachis chichaak:

—Juwaitai wi timiaja nuka: Wikia atsai tuke puju asa, wina ukurun winayat wina nangkaatukuitai, —timiayi.

¹⁶ Cristo timiá anengkratin asa, mash pengker aa nuna tuke inaitsuk sukartinuyayi. ¹⁷ Yaanchuik Yus Moisés umirkatin chichaman akatramiayi. Antsu Yuse anengkratairinkia, tura nekas chichamnasha Jesucristo iin nekamtikramnuyaji. ¹⁸ Aints kichkisha Yusnaka pengké wainkacharu ainawai. Antsu ni Uchiri, nekas kichik aa nuka tuke nijai tsanias puju asa: Yus tu awai tusa, iincha paan nekamtikramamiayi.✠

Imiakratin Juan Jesucriston pachis etserkamuri

(Mat. 3.11-12; Marc. 1.7-8; Luc. 3.15-17)

¹⁹ Judío juuntri ainau Jerusalénnum pujuinau asar, sacerdote ainaun tura sacerdote inatiri ainauncha akatrar akupinak:

—Atumka Juannum werum, nekas Mesíaschawashi tusaram nekaataram, —tiarmiayi. Tinamtai nuka ayu tusar, Juannum wearmiayi. ²⁰ Tura Juannum wear tu iniinam, Juan aimiak:

—Atsa, wikia Mesíaschawaitjai, —timiayi.✠

²¹ Tamati ataksha iniinak:

* 1:1 (Yuse Chichame ta nuka Yuse Uchirin taku tawai.) ✠ 1:3 (Gén. 1.3-31; Sal. 33.6-7; Col. 1.15-17; Hebr. 1.2; 1.Juan 1.1) † 1:5 (Nu paaniunam pujauka Cristoyayi.) ✠ 1:8 (Mat. 3.1; Marc. 1.4; Luc. 3.3) ✠ 1:12 (1.Juan 3.1) ✠ 1:14 (Mat. 11.27) ✠ 1:18 (Mat. 11.27; Juan 6.46;10.15) ✠ 1:20 (Juan 3.28)

—¿Tura warí aintsuitme? ¿Yaanchuik Yuse chichamen etserin Elíaskitam? —tu iniinam, Juan aimiak:

—Atsa, nuchawaitjai, —timiayi. Tamati ataksha iniinak:

—¿Tura Yuse chichame etserin tatinua nukítam? —tiarmiayi. Tinamaitiat ataksha:

—Atsa, nuchawaitjai, —timiayi.✠

²² Tamati pengké tujinkar:

—Tura amesha nuwaitjai tusam, paan ujakratkata. Iin akuptamkaji nu warintuk ujaktaij tusar, paan nekaatar wakeraji, —tiarmiayi.

²³ Tinamtai Juan ayaak:

—Yaanchuik Yuse chichamen etserin Isaías naartin wína pachitas papinum aak: ‘Aints numi atsamunam wekaas kakar chichaak: Apu wekaasati tusar, aints jintan tupin iwiarina nunisrumek atumi ninti iwiarataram,’ tímia nuwaitjai, —timiayi.✠

²⁴ Tamati Juanjai chichainauka fariseo akupkamu asar, ²⁵ ataksha iniinak:

—Tura Mesíaschawaitiatmesha, tura Elíaschawaitiatmesha, tura Yuse chichamen etserin tatinua nuchawaitiatmesha ¿waruka aints ainausha imiaame? —tiarmiayi.

²⁶ Tu tinam Juan ayaak:

—Wikia aints ainaun aya entsanmak imiaajai. Antsu yamai atum pujamunam chikich aints pujawai. Tura nuwaapita tusarmeka nekatsrume. ²⁷ Nuka wína nangkatusang tuke iwiaaku pujuwitiat, wína ukurun winitatui. Wikia nekasan mianchau asan, tsunsumruan ni sapatrin jingkiamun atitataj tayatun, natsaamakun turachminuitjai, —timiayi.

²⁸ Betania nungkanam Jordán entsa tumajin Juan aints ainaun imiaamunam nunaka timiayi.✠

Jesúska Uwija Uchiriya tumawaitai timiauri

²⁹ Nunia kashin tsawaar Juan Jesús winaun wainak aints ainaun chicharak:

—Jiistaram. Juka Yus akupkamu asa, uwija uchiriya nunisang mash nungkanmaya ainau tunaarin sakartas jakatnuitai. ³⁰ Ju wina ukurun winitatui timiaja juka tuke iwiaaku puju asa, wina nangkakuitai tusan ujakmajrume nuwaitai. ³¹ Juka wantintsaing, Yus akupkamuitai tusanka nekaachmiajai. Antsu ju wantinkamtai, Israel ainau nuna mash paan nekaawarat tusan, aints ainaun imiainiartasan tamajai, —timiayi.

³²⁻³³ Nunia Juan ataksha chichaak:

—Wína akuptuku chichartak: ‘Yuse Wakani yampitsa tumau yakiya nanaaki taa aintsnum ketu wainkatatme. Turamtai juwaapita aintsu nintin Yuse Wakani engkemtuanua tusam nekaatatme,’ wína turutmiayi. Nuna wainchaknaka yáki tusancha nekaachmiajai. Turayatun Yuse Wakani yampitsa tumau nayaimpinmaya tara, aintsnum ketu wainkau asan, nuniangka juwaapita tusan nekaamjai. ³⁴ Tura nuna wainkau asan, juka nekas Yuse Uchirintai tusan paan etserjai, —Juan timiayi.

Nu nangkamtaik Jesúska nuiniatiri ainaun pachis etserkamuri

³⁵ Kashin tsawaarar Juan ni jimiar nuiniatiri ainautijai iruntrar wajasmiaji. ³⁶ Tura Jesús nangkaamaun wainak, Juan iin chichartamak:

—Jiistaram. Juwaitai Yus akupkamuitai. Juka nekas uwija uchiriya tumawaitai, —turammiaji.

³⁷ Turammatai nu antukar ni nuiniatiri jimiar ayatrik, Juanka ukukir Jesús ne-markamiaji. ³⁸ Tura asakrin Jesús pajas jiiimias:

—¿Atumsha yaachia earme? —turammiaji.

Turammatai iisha:

—Nuikiartinu ¿tunia pujame? —tu iniasmiaji.

³⁹ Tu iniam Jesús chichartamak:

—Watska, iijai wemi. Tura wi pujamur wainkamniuram, —turammiaji.

✠ 1:21 (Mal. 4.5) ✠ 1:23 (Isa. 40.3) ✠ 1:28 (Juan 5.33)

Turammatai ayu tusar, nijai weri Jesúsá pujamuri wainkamiaji. Tura tsaa nungka wajasu asamtai, iisha nuni wayaar kintamramiaji.

⁴⁰ Iikia jimiarchitak Juanku chichame antuku asar, Jesús nemarkamiaji. Wijai tsanias nemarkamiaji nuka Andrésuyayi. Nuka Simón Pedro yachí ayayi. ⁴¹ Andréscha Jesúsán wainkau asa, chikich aintsun ujatsuk, niyá eemak ni yachiin Simónkan eaktas wemiayi. Nunia wainak:

—Mesíaska wainkaji, —tusa ujakmiayi. Mesías ta nuka Cristoitai, Yus akupkamuitai taku tawai.

⁴² Nunia Andrés ni yachiin Simónkan juki, Jesús pujamunam jeemiayi. Turamtai Jesús Simónkan wainak:

—Ameka Simónkaitme. Juanku uchirinme. Yamaikia ami naarmeka Cefas atatui, —timiayi.‡

Jesús Felipen Natanaeljai untsukmauri

⁴³ Kashin tsawaar, Jesús Galileanam wetas wakerimiayi. Tura Felipen wainak:

—Nemartusta, —timiayi.

⁴⁴ Nu Felipeka Betsaida yaktanmaya aintsuyayi. Andréscha, tura Pedroscha nu yaktanmayang iruniarmiayi. ⁴⁵ Nunia Felipeka Jesúsá chichamen antuku asa, Natanaelan eaktas wemiayi. Tura wainak chicharak:

—Yaanchuik Moisés chichaman aak: ¿Yus akupkatnuka tatinuitai tu aarchamukai? Tura yaanchuik Yuse chichamen etserin ainau Yus akupkatnun pachisar aararmia nu aintska iikia nekasar wainkaji. Nuna naaringkia Jesúsaitai. José uchirintai. Nazaretnumia aintsuitai, —timiayi.✠

⁴⁶ Tamati Natanael ayaak:

—¿Nazaretnumiangka pengke aints kichkisha aminkai? —tamati, Felipe chicharak:

—Watska, iijai wemi. Amesha wainkamnium, —timiayi.

⁴⁷ Tamati Natanael ayu tusa, Felipejai wemiayi. Turamtai Jesús Natanaelan winaun wainak:

—Jiistaram, juka nekas Israela wearintai. Juka pengké anangkartichuitai, —timiayi.

⁴⁸ Tamati Natanael chicharak:

—¿Tunia winasha waitkamame? —tu iniam Jesús ayaak:

—Felipe amin untsurmatsaing, numi higuera nantujen pujamin nekaamjame, —timiayi.

⁴⁹ Tamati Natanael chicharak:

—Nuikiartinu, ameka nekasam Yuse Uchirinme. Israel ainautin apurinme, —timiayi.✠

⁵⁰ Tamati Jesús chicharak:

—Wi amin higuera numi nantujen pujamin nekaamjame tamau asam, ¿ameka nekasampi Yuse Uchirinme turutmek? Antsu wi taja nuna nangkasmek wainchati takat turamusha wainkatnuitme tajame, —timiayi.

⁵¹ Nunia ataksha chicharak:

—Nekasan tajame: Yus nayaimpin uraamtai, wikia aints ayatnak Yus akuptuku asamtai, atumsha Yuse awemamuri nayaimpinmaya wi pujamunam tarutiar, nunia nayaimpinam waketinau wainkatnuitrume, —Jesús timiayi.

2

Jesús nuwa nuwatmaunum wemauro

¹⁻² Kampatam kinta nangkamaramtai, Galilea nungkanam Caná yaktanam nuwa nuwatmau fiesta amiayi. Turamtai Jesúsánasha, tura ni nuiniatiri ainautincha untsurmakaru asaramtai, iisha nuni wemiayi. Tura Jesúsá nukurisha nuni pujumiayi. ³ Tura umuti vino tutai amukamtai, nukuri Jesúsán chicharak:

—Vinoka mash amukayi, —timiayi.

⁴ Tamaitiat Jesús aimiak:

‡ 1:42 (Cefas ta nuka kaya taku tawai. Tura iiti chichamejaingkia ni naaringkia Pedroitai.) ✠ 1:45 (Mat. 2.23)

✠ 1:49 (Mat. 16.16; Juan 6.68-69)

—Nukuachi ¿warukaya winasha turutme? Wi wainchatai takat turatnuka jeatsui, —timiayi.

⁵ Tamati Jesúsna nukuri vino surin ainaun chicharak:

—Au inatmamtaisha miatrusrumek umirkataram, —timiayi.

⁶ Tamati muits kaya najanamu nekas juun seis armia nuna judío ainau jeanam wayaawar nu muitsnum yumin yarakar uwejencha, tura nawencha nijau armiayi. ⁷ Tura asamtai, Jesús vino surin ainaun chicharak:

—Ju muits irunuka yumi shikikrum, met met pintrataram, —timiayi.

Tamati miatrusarang met met pintrarmiayi. ⁸ Tura pintraramtai Jesús chicharak:

—Yamaikia jumchik shikikrum jeentin susataram, —tamati shikikiar jeeniun susarmiayi.

⁹ Tura vino surin ainau: Yumiapi yarakmaji tusar nekarmiayi. Antsu fiestanam untsumakuka yumi vino najanamun nekapsatas umusa jiis:

—¿Jusha tunia itamuita? —tusasha nekatsuk shiirman nekapramiayi. ¹⁰ Tura asa yamai nuwan nuwatkaun untzuk chicharak:

—Ii nungkarin fiesta najankurkia, nu nangkamtaik nekasar vino pengker tuke suaji. Tura nukap amuraramtai, nuniangka mianchaun suaji. Antsu ameka nuka turutsuk, vino pengker aa nu ukusu asam sukartame, —timiayi.

¹¹ Jesús nu nangkamtaik Galilea nungkanam Caná yaktanam nu wainchatai takatnaka turamiayi. Tura nu turamujai ni kakarmarin paan inakmasmiayi. Turamtai ni nuiniatiri ainautisha nu wainkau asar: “Juka nekas Yus akupkamuitai” timiaji.

¹² Nunia Jesús ni nukurijai, tura ni yachí ainaujai, tura ni nuiniatiri ainautijai Capernaum yaktanam wemiaji. Tura nuni jear, jumchik kinta pujusmiaji.✠

*Yus juun jeanam tangku surinun jiikmiauri
(Mat. 21.12-13; Marc. 11.15-18; Luc. 19.45-46)*

¹³ Judío fiestari, Pascua tutai jeatak wajasamtai, iikia Jesúsjai Jerusalénnum wemiaji.✠

¹⁴ Tura nuni jear, Yus seatai juun jeanam wayaar, aints waakan surinau, tura uwijan surinau, tura kayuk suwencha surinau wainkamiaji. Tura aintsu kuikiarin yapajinausha wainkamiaji. ¹⁵ Tura Jesús nuna wainak, chapikian chapikmar umis, nujai waaka ainaun, tura uwija ainauncha awatar jiikmiayi. Tura kuikia yapajinau misarincha ayantur, kuikiarin nungka ujuntramiayi. ¹⁶ Tura kayuk suwen surin ainaun chicharak:

—Juka mash jiiktaram. Wína Apaachiru jeenka surutai jeaka najanawairap, —timiayi.

¹⁷ Tamati ni nuiniatiri ainautisha Jesúsna turamuri nintimsar, Yuse chichamen etserin yaanchuik aarmauri nintimramiayi. Nu aarmauka Yuse jeen pachisar tu aarmawaitai: “Ami jeemka nekas pengker asamtai, kakarman kasmatnuyajai,” tu aarmawaitai. ¹⁸ Jesús turamtai, judío juuntri ainau iniinak:

—¿Ameka ju turata tusang Yuska aminka akuptamkamia? Watska, Yus akupkamuitkumka, ¿Yuse kakarmarijai warí wainchatai takata turatatme? —tiarmiayi.

¹⁹ Tinamtai Jesús chicharak:

—Wi ju jea pujaja juna yumpungkakrumnisha, wikia ataksha kempatmachik kintajai jeamkainjai, —timiayi.✠ ²⁰ Tamati judío juuntri ainau chicharinak:

—¿Ju jeaka cuarenta y seis (46) musach jeamkamua juka kempatam kintajaingiash jeamkaintam? —tiarmiayi. ²¹ Tinamaitiat Jesús nekas jean pachiska tichamiayi, antsu ni namangken pachis: Wi kempatam kinta jakan tepayatun ataksha nantaktinuitjai, taku timiaji. ²² Tu tinu asamtai Jesús ukunam jakamunmaya nantakiamtai, ni nuiniatiri ainautisha ni timiauri nintimrar nekasampita timiaji. Tura Yuse chichamen etserin ainausha yaanchuik Jesúsna pachisar tu aararu asaramtai, nusha ukunam nintimrar nekasampita timiaji.

Jesús aints ainau nintin mash nekawai

✠ 2:12 (Mat. 4.13) ✠ 2:13 (Ex. 12.1-27; Lev. 23.5-6) ✠ 2:19 (Mat. 26.61;27.40; Marc. 14.58;15.29)

²³ Nunia Jesús Pascua fiestan inangkartaj tusa, Jerusalénnum pujus, wainchati takat ainaun turamtaí, aints untsuri nuna wainkar: Nekasmeapi Yus akupkamuitme tiarmiayi. ²⁴ Tinamaitiat Jesús mash aints ainau nintimaurin nekau asa, wína miatrusarka nintim-turinatsui tusa nekaamiayi. ²⁵ Tura aints ainau nintin ningki paan nekaru asa, chikich ainaun pachiska wína ujatkarat pengké tichamiayi. ✠

3

Jesús Nicodemojai chichasmauri

¹ Fariseo aints Nicodemo naartin judío apuri ayayi. ² Tura Jesúsán kashi weri chicharak:

—Nuikiartinu, aints Yusjai pujachuka, ame wainchati takat turame nunaka kichkisha turachminuitai. Tura asamtaí Yus amin aints ainaun nuiniarat tusa akuptamkawaitai tusar nekaji, —timiayi.

³ Tama Jesús ayaak:

—Nekasan tajame: Aints ataksha yakiya akiinachuka Yuse pujutirin waintancha pengké wainkachartinuitai, —timiayi.

⁴ Tamati Nicodemo iniak:

—¿Aints timiá juuncha itiu ataksha akiinating? ¿Aints ataksha akiinatas ni nukuri ampujen engkematnukai? —timiayi. ⁵⁻⁶ Tu iniam Jesús ataksha ayaak:

—Atsa, nuka turunashtinuitai. Aintsnumia akiina nuka aintsuitai. Antsu Yuse Wakani aintsun engkemtuaamka nuka Yusnumia akiinui. Tura asamtaí nekasan tajame: Aints Yuse Wakanijai akiinachuka Yus pujamunmaka pengké jeashtinuitai. ⁷ Wi amin chicharkun: ‘Ataksha yakiya akiinatnuitme,’ tajame nuka ¿itiurkamnaukai? tuuka nintimraip. ⁸ Nase nintimrata. Nase ningki wakerak nasentui. Tura nase uutmausha antayatmek ¿tuniang winá? tura ¿tuki wea? tusamka nekatsme. Yuse Wakani naseya nunisang wainchati asamtaí, Yuse Wakanijai akiinausha tuyapi akiinua tusamka nekaashtinuitme, —timiayi. ✠

⁹ Tama Nicodemo ataksha iniak:

—¿Ame tame nusha itiurkamnawaita? —timiayi.

¹⁰ Tu iniam Jesús ayaak:

—¿Ameka Israel ainau nuinichukitam? ¿Turayatmesha waruka wi taja nuka nekatsme? ¹¹ Nekasan tajame: Iikia ii nekamu chichaaji. Tura ii wainmau etserji. Tura ii etserji nuka antayatrum nekasampita tu weatsrume. ¹² Wikia ju nungkanmayan pachisan chichaamtaí, nekasampita tachakrumka ¿itiur nayaimpinmayan pachisan etsermausha antukrum nekasampita titarmek?

¹³ “Ju nungkanmaya aints kichkisha nayaimpinam wakaar ataksha tarauka ainatsui. Antsu wikia aints akiinayatun Yus akupkamu asan, nayaimpinmaya taramiajai.

¹⁴ Yaanchuik entsa atsamunam aints ainau napi esaim kajiinamtaí, uwemrrarat tusa Moisés napin jirun najana yakí takuimiayi. Tura asamtaí wisha nunisnak aints akiinayatun Yus akupkamu asan, aints ainaun uwemtikratan numinam yakí nemaatnuitjai. ✠

¹⁵ Tura asamtaí aints ainau nintimtursar: Nekasampi wina uwemtikrurtatua turutinauka jiinum wetsuk, antsu tuke iwiaaku pujusartin ainawai, —Jesús timiayi.

Yuska mash nungkanmaya ainautin anengkratu

¹⁶ Yus mash nungkanmaya ainautin timiá anengkratu asa, ni uchirin kichkinak akupturmakmiaji. Tura asamtaí mash nekasampita tusar, nintimtin ainauka tukeka mengkakahartin ainawai, antsu tuke Yusnum iwiaaku pujusartin ainawai. ¹⁷ Yuska aints ainautin mengkaakarti tusangka ni Uchirinka akupturmakchamiaji. Antsu mash aints ainautin uwemtikramratas ni Uchirin akupturmakmiaji.

¹⁸ Yuse Uchiri nekasampita tusar nintimtinaunka ji kajintrashtinnumka pengké akupkashtinuitai. Antsu Yuse Uchiri kichik aa nuna nekasampita tusar nintimtinachu

ainauka niin nekasampita tichau asar mengkaakartinuitai. ¹⁹ Yuse Uchiri ju nungkanam tara, aints ainau tunaarin paan nekamtikiamiayi. Turamaitiat aints ainau tunau turin asar, paaniunmaka pujutan nakitinak, antsu tuke teenam pujustasar wakerinau asar tuke mengkaakartin ainawai. ²⁰ Tunau takau ainauka mash paaniunam pujutnaka nakitinawai. Tura ni turamurin nekarawarai tusar paaniunka yupitinawai. ²¹ Antsu nekas chichaman umirinauka Yuse wakeramurin tuke turinau asar, chikich aints ainau ni turamurin wainkarti tusar paaniunka yupitinatsui.

Imiakratin Juan Jesúsán pachis ataksha chichasmauri

²² Nunia Jesús ni nuiniatiri ainautijai Judea nungkanam weri nuni pujusar, aints ainau imaimiaji. ²³ Juansha Enón yaktanam Salimnum jeatak wajas aints ainaun imiaak pujumiayi. Nuni entsa nukap au asamtai, aints ainau wininaunka imaimiaji. ²⁴ Nunaka Herodes niin kársernum engkeatsaing turamiayi. ✠

²⁵ Tura Juanku nuiniatiri ainau judío ainaujai chichainak:

—¿Yana imiakratmauriya timiá pengkeraita? —tunaiyarmiayi. ²⁶ Tura nunia Juankun iniasartas wear chicharinak:

—Nuikiartinu, ame nuwik Jordán entsa amajin pujusam, amijai nuni pujuma nu pachisam: Wína ukurun winitatui timiame nuka yamaikia aints ainaun imiaawai. Tura asamtai mash niin nemarkartas, —ningki nintimsar tiarmiayi.

²⁷ Tinamtai Juan aimiak:

—Yus ni kakarmarin akupkachamtaikia, aints kichkisha nunaka pengké jukicharminuitai. ²⁸ Atumka antarmin: ‘Wikia Cristochuitjai, antsu eemak jintan iwiaratnua nunisnak akupkamuitjai,’ wi timiaja nusha paan antukmarume. ✠

²⁹ Nintimrataram. Aints yamai nuwan nuwatmatai, ni amikrisha taa, nu mai tsaniasar wajainaun wainak, tura ni amikri etsermaun antuk nukap waraawai. Atumsha Jesús pachisrum etseru wearme nuna antukan, wisha nunisnak nekasam nukap waraajai. ³⁰ Niisha mash aints ainaun nangkamasang juuntaitai tuke tiartinuitai. Antsu wikia nuna nangkamasnak tuke mianchau atinuitjai, —Juan timiayi.

Yakiya taramia nu pachisar etserkamuri

³¹ Nunia ataksha Juan chichaak:

Yakiya taramia nuka mash nangkamakuitai. Tura nungkanmaya ainautikia ju nungkanmaya asar, ju nungkanam aa nuke pachisar chichaaji. Antsu nayaimpinmaya taramia nuka mash ainia nuna nangkamakuitai. ³² Tura asa ni wainkamia nuna, tura antukmia nuna mash etserui. Tura waininayat ni chichamenka anturinatsui. ³³ Antsu yakiya taramia nuna chichamen juwinak nekasampita tinauka Yus ta nuka nekasaintai tinawai. ³⁴ Yus ni Wakanin surittsuk susamu asa, Yus akupkamuka ni chichamen tuke etserui. ³⁵ Yus ni Uchirin aneau asa, ninu aa nuna mash inarti tusa akupkamiayi. ✠

³⁶ Aints Yuse Uchirin nekasampita tinauka Yusnum tuke pujusartin ainawai. Antsu Yuse Uchirin nintimtichu ainauka Yusnumka tukeka pujuschartin ainawai. Nunia Yusen umirtan nakitinau asaramtai, Yuska tuke wait wajaktinnum akupkatnuitai, —timiayi. ✠

4

Jesús Samaria nungkanmaya nuwajai chichasmauri

¹⁻² Aints ainau untsuri Jesúsá chichamen antukar niin nemarkartas mainiartas wake-riarmiayi. Tura wainiat Jesús nu aints ainaunka imiaichmiayi, antsu ni nuiniatiri ainauti aints ainau imaimiaji. Turakrin fariseo ainau iin pachitmasar: Jesúsá nuiniatiri Juankun nangkamasarang aints timiá untsurin imiainawai, tiarmiayi. ³ Tinamtai Jesús nuna nekau asa: Ataksha iijai Galilea nungkanam waketkimi tamati, iikia Jesúsjai tsaniasar Judea nungkanmaya jiinkimiaji.

✠ 3:24 (Mat. 14.3-5; Marc. 6.17-19; Luc. 3.19-20) ✠ 3:28 (Juan 1.20) ✠ 3:35 (Luc. 10.22) ✠ 3:36 (1.Juan 5.12)

⁴ Tura jiinkir Samaria nungka japen nangkamaktin amiaji. ⁵ Tura Samaria nungkanam weakur, yakat Sicar tutainum jeatak wajasmiaji. Nu nungkaka yaanchuikia Jacobo nungkari ayayi, tura asa ni uchiri Josén susamuyayi. ⁶ Nu nungkanmasha yaanchuik Jacob yumi shikitin nungka chingkiakmau asamtai, nuwa ainau nuni yumin shikiu armiaji. Tsaá tupin wajasai, Jesús weka wekaaka pimpikin asa, yumi shikiti nungka taimunam ayamas keemsamiayi. ⁷⁻⁸ Turamtai ni nuiniatiri ainautikia yaktanam yurumak sumaktasar wemiaji. Turakrin Jesús ningki juwakmiayi. Tura juwakamtai Samarianmaya nuwa yumin shikiktas tamiayi. Tura taamtai Jesús chicharak:

—Yumi shikikiam surusta, —timiayi.

⁹ Tu seam nu nuwaka ayaak:

—¿Waruka Samarianmaya nuwa aisha, ame judíotiatmesha winasha yumi umurtincha seatme? —timiayi. Judío ainauka Samarianmaya ainaujai pengké aujnaichau asaramtai nunaka timiayi. ✠

¹⁰ Tamati Jesús ayaak:

—Yus amin yumi umurtinun suramsatas wakera nu nekakmekka, tura yumi surusta tusa seatma nussha nekakmekka, nekasam wína seatinuitme. Turakmin wikia tuke yumi iwiaaku pujustinun sukartin asan, amin susamnawaitjame, —timiayi. ✠

¹¹ Tama nuwasha ayaak:

—Amesha yumi shikitisha takaktsume. ¿Tura yumi shikiti timiá nitkasha tuniang yumi tuke pujutan sukartincha surustame? ¹² Ii yaanchuik juuntri Jacob ju yumi shikitin chingkiamu asamtai, niisha tura ni uchiri ainausha, tura ni waakari ainausha mash juni umin armiaji. Nunia chikich ainausha umurarti tusa junaka ukurtamkimiaji. ¿Amesha ii juuntri Jacob nangkakaukitam? —timiayi.

¹³ Tu iniam Jesús ayaak:

—Ju yumin umauka ataksha kitaartinuitai. ¹⁴ Antsu wi yumin susatatja nuna umauka ataksha pengké kitaarchatnuitai. Tura nu yumin wi suamka aintsu nintin entsa pukunia nunisang aintsun pujut nangkankashtinun susatasan pajamturtinuitjai, —timiayi.

¹⁵ Tamati nu nuwaka ayaak:

—Winasha nu yumikia surusta. Wisha nuna umuran, pengké kitamchau ami. Tura asan yumin shikiktasnasha juningkia winichu ami, —timiayi.

¹⁶ Tamati Jesús chicharak:

—Aishrum untsukam nijai juni tata, —timiayi.

¹⁷ Tamati nuwasha aimiak:

—Wína aishruka atsawai, —timiayi.

Tamati Jesús ayaak:

—Ame: Aishruka atsawai tame nuka nekasam tame. ¹⁸ Ame cinco (5) aints tsanirmam pujuyame. Tura yamaisha tsanirmam pujame nuka aishrumchawaitai. Tura asamtai: Aishruka atsawai tame nuka nekasam tame, —timiayi.

¹⁹ Tama nu nuwaka aimiak:

—Apuru, wikia Yuse chichame etsernua nunin jiajme. ²⁰ Ii juuntri ainau ju muranam wakaar Yusen: Ameketme juuntam tinu armiaji. Turayatrum judíotirmeka: Jerusalénnum Yusen ameketme juuntam tiartinuitai tuwearme, —timiayi.

²¹ Tamati Jesús ataksha ayaak:

—Nuwachi nintimrata. Kinta jeatak wajasi, atumka ju muranmaka tura Jerusalénnumsha ii Apaachiri Yus: Ameketme juuntam titasrumka wechamnawaitrume. ²² Atumka Yus nekachiatrum: Ameketme juuntam tarume. Antsu mash aints ainau uwentikratin judíonmaya tatin asamtai, judíotikia: ¿Yus yaachita? tusar nekau asar nekasar: Ameketme juuntam taji. ²³ Kinta jeatata nuka yamaikia jeayi. Aints ainau ii Apaachiri Yusen nekasar: Ameketme juuntam tiartas wakerinauka, tuke nintijai Yusen nekasar nintimartinuitai. Antsu aints ainau niin nekasar tuke nintijai: Ameketme juuntam turutiarat tusa Yuska wakerawai. ²⁴ Yuska nekas Wakanitai. Tura Yusen

✠ 4:9 (Esd. 4.1-5) ✠ 4:10 (Juan 7.37-39; Apoc. 21.6;22.17)

nekasar: Ameketme juuntam tiartas wakerinauka Yuse Wakani wakera nunisarang tupin nintimsar: Ameketme juuntam tiartinuitai, —Jesús timiayi.

²⁵ Tamati nu nuwa chicharak:

—Mesíaska chikich ainau Cristo tu weena nuka tatinuitai. Wisha nunaka nekajai. Tura ni taa, mash aa nunaka iin paan ujatmaktinuitji, —timiayi.

²⁶ Tamati Jesús ayaak:

—Ame wína pachitsam chichaame nuka wiitjai, —timiayi.

²⁷ Nu nuwajai chichaak pujai, ni nuiniatiri ainautisha tamiaji. Tura nu nuwa wainkar nukap nintimturmiaji. Turayatur: ¿warí pachismea aujaisha chichaame? tura ¿waruka chichaame? tusarkia, kichkisha iniaschamiaji. ²⁸ Nuniangka nu nuwaka yumi shikitirin japa ukuki, yaktanam waketki aints ainaun ujaak:

²⁹ —Atumsha werum, aints wi turunamurun mash wina turuta nu jiitaram. ¿Nuka Yus akupkatin ii nakaji nuchaukai? —timiayi.

³⁰ Tamati nuna antukaru ainauka yaktanmaya jiinkiar, Jesús pujamunam wearmiaji.

³¹ Nu nuwa yaktanam weamtai, ni nuiniatiri ainauti Jesús chicharkur:

—Nuikiartinu, amesha yuwata, —timiayi.

³² Tamaitiat Jesús iin airmak:

—Wína yutairuka atum nekachmau awai, —turammiaji.

³³ Turammatai iisha ininiakur:

—¿Chikich aints ni yuwatniurinka itarcharmasha? —tunaimiaji.

³⁴ Tunaiyakrin Jesús chichartamak:

—Wína akuptuku wakeramurin miatrusnak umiakun, tura ni takatrin miatrusnak takakmakun, yutan yuwina nunisnak kakartinuitjai. ³⁵ Atumka chichaakrum: Cuatro (4) nantu nangkamaramtai, árak juuktin jeatatui, tarume. Antsu wikia tajarme: Pangkairam jiimsaram aints winina au jiistaram. Arak juuktin kinta jeachu wainiatrumek, árak tsamakua nunisarang aints untsuri uwemtikratnuka yanchuk jeayi. ³⁶ Aints arakan juwiinaunaka akiinawai. Tura arakan araamia nujai metek warainawai. Tura uwemratin chichaman antukaru ainau nu árak juwaamua nunisarang artinuitai. Yuse chichamen etserin ainau arakan araina nunisarang, tura arakan juwiina nunisarang mai metek takakminau asar, mai metek nayaimpinam warasartin ainawai. ³⁷ Tura asamtai yaanchuik juun ainau chichainak: ‘Chikich aintska arakan araawai, tura chikichka juwaawai,’ tu tinu armia nuka nekasaintai. ³⁸ Atumsha nunisrumek Yuse chichamenka etserchau arumning, aints ainau irurtaram tusan akupajrume. Chikich aints ainau arakan arainawa nunisarang Yuse chichamen yaanchuik etserkarmiaji. Turinamtai ukunmasha atum aints ainau Yuse chichamen nekasampita tiarat tusaram nekamtikiatnuitrume, —Jesús timiayi.

³⁹ Ni nuiniatiri ainautin chichartamak pujai, nu Samarianmaya nuwa waketki, ni yaktarin pujuinaun ujaak: “Wi turunamurun mash ujatkeyi,” tinu asamtai, nu nuwa etsermaun antukaru ainau untsuri Jesús nekas Yus akupkamuitai tiarmiayi. ⁴⁰ Tura asar Samarianmaya ainau Jesús pujamunam taar: “Ii yaktarin winitaram, iijai pujusmintrum,” tinamtai iisha ayu tusar, nu yaktanam jear jimia kinta kanurmiaji. ⁴¹ Turakrin chikich aints ainausha Jesús chichamen antukar, nekasampita tiarmiayi. ⁴² Tura asar nuwan chicharinak:

—Yamaikia ame chichaamu nuke antuku asar, nekasampita tatsuji, antsu iik ni chichame anturkau asar: Juka nekas mash nungkanmaya ainaun uwemtikratnuitai tusar nekaji, —tiarmiayi.

Jesús apu uchirin tsuwaramuri

⁴³ Nunia Jesús Samarianam jimieran kanur, nunia jiinki Galileanam wemiayi. ⁴⁴ Tura ni nungkarin waketki ai, ukunam atiniun pachis chichaak:

—Yuse chichame etsernun ni nungkarin pujuinau pachinatsui, —timiayi. ☆

☆ 4:44 (Mat. 13.57; Marc. 6.4; Luc. 4.24)

⁴⁵ Tura Galilea nungkanam jeamtai, nunia aints ainau Pascua fiestan inangkartas Jerusalénnum wearu asar, nuni pujusar, Jesús turamurin wainkaru asar, Jesús pengker awajsarmiayi.✠

⁴⁶ Tura asamtai Galilea nungkanam pujau ataksha Caná yaktanam waketkimiayi. Nu yaktanam yaanchuik vino najanamia nuni Jesús jeai, chikich yaktanam Capernaum tutainum apu uchiri jaak tepemiayi.✠ ⁴⁷ Tura asamtai Capernaumnumia apu: Jesús Judea nungkanmaya jiinki, Galileanam tayi, tamaun antuk, Jesús werimiayi. Tura jeari chicharak:

—Uchir pengké jatanak wajasun ukukjai. Wait aneasam jearun winim uchir tsuwatrita, —timiayi.

⁴⁸ Tama Jesús ayaak:

—Atumka wi wainchati takatan takai wainchakrumka, nekasampita turutsurme, —timiayi.

⁴⁹ Tamaitiat apu ayaak:

—Apuru, wait aneasam uchir jatsaing, wári winitrita, —timiayi.

⁵⁰ Tamati Jesús apun chicharak:

—Jeemin waketkita. Uchirmeka pengker wajasi, —timiayi.

Jesús tamati, Capernaumnumia apu nuna antuk: Nekasampita tusa waketkimiayi.

⁵¹ Tura waketki ni jeen jeatak wajasai, ni inatiri ainau jeanmaya jiinkiar ingkiungkar ujainak:

—Uchirmeka pengker wajasi, —tiarmiayi.

⁵² Tinamtai apu ni inatirin iniak:

—¿Tsaá tuni ketia pengkersha wajasma? —timiayi. Tu iniam ni inatiri aiminak:

—Yau tsaá yantanti michatrami, —tiarmiayi. ⁵³ Tinamtai apu nintimias: Tsaá yantanti Jesús: Uchirmeka pengker wajasi, tu ujakmau asa, ni aintsriyai mash Jesús nekasampita tiarmiayi.

⁵⁴ Jesús nu apu uchirin tsuwaru asa, Galilea nungkanam ni kakarmarin jimianan inakmasmiayi. Tura nu wainchati takatnaka Judea nungkanmaya jiinki turamiayi.

5

Jesús Betesda maatinam kijirun tsuwarmauri

¹ Nuniangka judío ainau fiestan najanawaramtai, Jesús ataksha Jerusalénnum waketkimiayi. ² Jerusalénnum Uwija Waiitiri tutainum nuni ayaamas maati amiayi. Nu maati naaringkia hebreo chichamejai Betesda tinu armiayi. Nu maati yantamen cinco (5) jea jeamkamunam jau ainau tepetiri armiayi. ³ Tura jau ainau, tura wainmichu ainausha, tura wekaichau ainausha, tura kijiru ainausha untsuri nuni tepearmiayi. ⁴ Tura asar Yuse awemamuri aneachmau entsan tamparmantikmatai, aints ainau: Wiyá ayangnaka pengker wajasainjapi, tu nintimsar: Entsa miartukat tusar maatinam nakasarmiayi. ⁵ Nuni nakainak pujuinamunam aints treinta y ocho (38) musach tuke najaimiak tepeu pujuyayi. ⁶ Tuke nunisang tepeu asamtai, Jesús nu aintsun wainak, tura timiá musach najaimiak tepeu nekau asa chicharak:

—¿Ame pengker wajastasam wakeramek? —timiayi.

⁷ Tu iniam jau aimiak:

—Ja ai, natsa, antsu entsa miartamtai, aints wina imiatminka atsau asamtai, wikia maatsaing chikitcha eemkar maa weenawai. Tuminau asaramtai wikia juni tsaatsuk tuke tepajai, —timiayi.

⁸ Tamati Jesús chicharak:

—Nantakim tepetiram jukim weta, —timiayi.

⁹ Tama nu chichaamujai metek nu aintska pengker wajasmiayi. Tura nantaki tepetirin juki wemiayi. Tura ayamtai kinta asamtai, ¹⁰ judío juuntri ainau nu pengker wajasun chicharinak:

✠ 4:45 (Juan 2.23) ✠ 4:46 (Juan 2.1-11)

—Ju kintaka ayamtai asamtai, tepetiram jukichminuitme, —tiarmiayi.

¹¹ Tu tinam nu aintska aimiak:

—Wína tsuwarauka chichartak: ‘Tepetiram jukim weta,’ turutin asamtai aitkajai, —timiayi.

¹² Tamati iniinak:

—¿Yaachia tepetiram jukim weta turamij? —tiarmiayi.

¹³ Tu tinamaitiat nu aintska aimkatatkama tujinkamiayi. Aints untsuri nuni weka-jinamunam Jesúscha wári jiinki weau asamtai, nu tsuwaarama nusha yáki tusangka nekaachmiayi. ¹⁴ Tura jumchik arus Yus seatai juun jeanam wayaamtai, Jesús niin wainak chicharak:

—Antukta. Yamaikia pengker wajasume. Tura asam ame najaimiame nuna nangkasmek jatan jurumaki tusam, yamaikia ataksha tunau turuwaip, —timiayi.

¹⁵ Tama nu aintska judío juuntri ainamunam we:

—Wína tsuwarauka Jesúsaitai, —tusa etserkamiayi. ¹⁶ Tu ujaam, ayamtai kintati turau asamtai, judío juuntri ainau: ¿Jesús itiurkarik maawantai? tu nintimrarmiayi.

¹⁷ Tu nintiminamtai Jesús nuna nekaa chichaak:

—Wína Apaachir ju kintatisha tuke takakmasu asamtai, wisha nunisnak takakmajai, —timiayi.

¹⁸ Tamati judío juuntri ainau nuna nekaawar: “Ayamtai kintan pachiatstui, tura Yus wína Apaachiruitai tinu asa, Yus wijai metekaitai, tu nintimias pujatsuash,” tusar Jesúsán nuna nangkamasarang kajerkar maawartas wakeriarmiayi. ✨

Wina Apaachiru chichamejai takakmajai timiauri

¹⁹ Tuminamtai Jesús chicharak:

—Nekasan tajarme: Wi Yuse Uchiri asan, wiki nintimsanak nunaka kichkisha turachminuitjai. Antsu wína Apaachir tura nuna wainkan nunaka turatnuitjai. Wína Apaachir tura nunaka wisha nunisnak mash turajai. ²⁰ Wína Apaachirka wínaka anentui. Tura winasha ni tura nunaka mash nekamtikrawai. Tura nuna nangkamasang aints wainchati takatnasha winaka inaktursatatui. Tura asamtai atumsha nu wainkarmeka shamkaram nintimratatrumé. ²¹ Wína Apaachirka jakau ainau tuke iwiaaku pujusarat tusa inankitin asamtai, wisha nunisnak wi wakeraknaka nunasha turamnawaitjai. ²² Wína Apaachirka aints ainaun pachis: Nu aintska pengkeraitai, tura nu aintska paseetai tatsui. Antsu wina Apaachirka: Aints ainau mash jiisam: Juka paseetai, tura juka pengkeraitai tusam mash nekaata turutmiayi. ²³ Tura asa aints mash wína Apaachirun pengker awajinauka winasha nunisarang mash pengker awajtustin ainawai. Wína Apaachir akuptuku asamtai, wína pachitinachuka wína Apaachirnasha nunisarang pachinatsui.

²⁴ “Nekasan tajarme: Wína chichamrun antukaru ainau wína akuptukmia nuna nekasampita tinu asar, pujut nangkankashtinun juwinawai. Tura jinam wait waktinnumka wechartinuitai, antsu yaanchuik jakawa nunisarang pujuinayat, pujut nangkankashtinun jukin asar, Yusnum tuke iwiaaku pujusartin ainawai. ²⁵ Nunasha nekasán tajarme: Uwemratin kinta jeatatui timiaja nuka yanchuk jeayi. Nu kinta jeau asamtai, wi Yuse Uchiri asan ataksha winamtai, wina untsummaurun antukartin ainauka jakaru ainayat, tuke iwiaaku pujusartin ainawai. ²⁶ Wikia ni Uchiri asamtai, wina Apaachirka tuke iwiaaku pujau asa, aints ainau tuke pujut nangkankashtin susata tusa tsangkatrukmiayi. ²⁷ Tura wikia aints ayatun Yus akupkamu asan, aints ainaun pachisan: Nu aintska pengkeraitai, tura chikich aintska paseetai tusa nekaatnun wína Apaachirka surusmiayi. ²⁸ Ju chichamka itiurkamnawaita tuuka nintimrairap. Jakamunmaya nantakiartin kinta nekas jeatnuitai. Nu kinta jeamtai, jakaru ainau mash wi untsummaurun antukar, ²⁹ iwiarsamunmaya jiinkiertinuitai. Aints pengker aa nuna takasaru ainauka pujut nangkankashtinnum weartas nantakiartinuitai. Antsu tunau takasaru ainauka jinam tuke wait wajakartinnum weartas nantakiartinuitai, —Jesús timiauri.

✨ 5:18 (Juan 10.30-38)

Yus akupkamuitjai timiauri

³⁰ Nunia Jesús ataksha etserak:

—Wiki wakeraknaka pengké turachminuitjai. Antsu wína Apaachir turata turutin asamtai, wikia miatrusnak umiajai. Tura wína Apaachir wína akuptuku asamtai, wi wakeraja nunaka nintimtsuk pujau asan, ni wakeramurinak turajai. Tura asan wi turaja nuka nekas pengkeraitai. ³¹ Wiki nintimtumasan etsertumamtaikia, aints ainau: Nangkami tawai turutiartinitai. ³² Tura chikich wína pachitas etserturkatnuka awai. Ni wína pachitas etsera nunaka nekasaintai tusan nekajai. ☆

³³ Atumsha wína pachitsaram chicham nekaatasrum aints ainau Juankun iniasarat tusaram akupkamarume. Turakrumin Juan tímia nuka nekasaintai. ³⁴⁻³⁵ Juan ji kapawa nunisang ¿aints ainau ninti itiur ainawak? tusa chichaman paan etsermiayi. Tura asamtai atumsha jumchik kinta ni chichame antukrum warasmiarume. Tura wainiatun aints wina pachitsar tina nunaka wikia pachiatstjai. Antsu Yuse chichame nintimkuram uwemrataram tusan nunaka tajarme. ³⁶ Juan wína pachitas etsermia nuka nekasaintai tusaram nekaratnuitrume. Tura nuna nangkamasrumek wína Apaachir Yus akupkamuitai tusaram nekaratnuitrume. Ni turata turutin asamtai, wi turaja nu wainkuram: Nekasampi Yus akupkamuita tusaram nekaratnuitrume. ☆

³⁷ Tura wína Apaachirka wína akuptuku asa, wína pachitas: Wiitjai tusa paan nekamtikruamiayi. Tura wainiatrumek atumka ni chichamengka pengké anturchau ayarume, tura wina Apaachirsha waintasha wainchawaitrume. ☆ ³⁸ Nunia wína Apaachir akuptuku waitiatrum, nekasampita turutchau asaram, wína Apaachiru chichamengka atumi nintijaingkia juwatsrume. ³⁹ Atumka Yuse chichamen etserin yaanchuik aararmia nu aujkuram: Nuna aujsanka nekasam tuke iwiaaku pujusjainjapi tusaram nangkamrum tu nintimrume. Antsu nu aarmau ainauka wína pachitsar aarmau ainawai. ⁴⁰ Tura wainiatrumek wini winiram nekasrum pujut nangkankashtin jutaka nakitarme.

⁴¹ “Aints wína pengkeraitme turutinamtaisha wikia pachiatstjai. ⁴² Maj, atumka Yus aneatrume tusan wikia nekajrume. ⁴³ Wína Apaachir akuptuku asamtai, ju nungkanam taawitjai. Turai waitiatrumek winaka nakitarme. Antsu chikich aints ningki nintimsar chichaman etserkartas wininamtaikia, nuna chichamengka anturkatatrume. ⁴⁴ Atumka mai nuwamtak: Pengke aintsuitme turutiarat tu nintimsaram pujayatrum Yuska pachiatstrume. Tura asaram ¿winaka itiurak nekasampita turutiarat? ⁴⁵ Atumka wína pachitsaram: Ii tunaari ii Apaachirin ujatramkatatji, tuuka nintimsairap. Wikia nunaka turashtatjai. Atumka: Moisésa chichamen umirkan uwemratatjapi tayatrumek, Moisésa chichame umichu asakrumin, Moisés atumi tunaarin pachis paan aarmiayi. ⁴⁶ Tura Moisés wína pachitas aaru asamtai, Moisésa aarmauri nekasampita tusaram, winasha nekasampi Yus akupkamuitme tusaram nintimtursatnuitrume. ⁴⁷ Tura Moisésa aarmauri nekasampita tichau asaram ¿wína chichamrusha itiurak nekasampita titaram? —Jesús timiayi.

6

Jesús cinco mil (5,000) aints yuramuri

(*Mat. 14.13-21; Marc. 6.30-44; Luc. 9.10-17*)

¹ Nuna tusa ukuki, Jesús Galilea kucha tumajin katingmiayi. Nu kuchanka chikich aints ainauka Tiberias kucha tu weena nuwaitai. ² Tura jau ainaun tsuwarchamniaun wainiat, Jesús tsuwaru asamtai, chikich aints untsuri nuna wainkaru asar Jesúsán nemariarmiayi. ³⁻⁴ Judío ainau fiestari, Pascua tutai jeatak wajasamta, Jesús ni nuiniatiri ainautijai muranam wakaar, nuni pujusmiaji. ⁵ Tura nuni pujarin, Jesús pangkai jiimkama aints untsuri wininaun wainak Felipen chicharak:

—Aints timiá untsuri yuratasrisha ¿tuniang yurumkasha sumaktaij? —timiayi.

☆ 5:32 (Juan 8.13) ☆ 5:36 (Juan 1.19-27) ☆ 5:37 (1Juan 5.9)

⁶ Jesúska ni turatnurinka ningki nekayat ¿Felipe warintuk aimkain? tusa timiayi. ⁷ Tu iniam Felipe ayaak:

—Jimia pachak kuikijai pang sumakrisha, kichik kichik aints jumchik suwamsha jeachminuitai, —timiayi.

⁸ Tamati chikich nuiniatiri Andrés, Simón Pedro yachí, Jesúsán chicharak:

⁹ —Juni uchi pang sebadajai najanamun cinco (5) takakui, tura namaknasha jimiarchik takakui. ¿Tura aints timiá untsurisha itiurak mashcha yuratai? —timiayi.

¹⁰ Tamaitiat Jesús ni nuiniatiri ainautin chichartamak:

—Aints ainau mash pujustaram titaram, —turammiaji.

Turammatai chirichri nukap amaunum pujusar, mash irumram cinco mil (5,000) aints iruntrarmiaji. ¹¹ Mash iruntraramtai, Jesús pangkan takus, Yusen maaketai tusa, ni nuiniatiri ainautin suramsamtai, iisha nuni pujuinau mash susarmiaji. Tura namaknasha pachitsuk yuwarti tusar susarmiaji.

¹² Tura aints ainau mash tutuararamtai, Jesús ni nuiniatiri ainautin chichartamak:

—Nangkamiar japawarai tusaram, ampirmau jukitaram, —turammiaji.

¹³ Turammatai pang cinco (5) amia nuna ampintramuri doce (12) changkin chumpiamiaji. ¹⁴ Tura Jesús nu wainchati takatan turau asamtai, aints nuna wainkar chicharnainak:

—Juka nekas Yuse chichamen etserin ju nungkanam tatinuitai tinu armia nuwaapita, —tunaiarmiayi.

¹⁵ Tura ii apuri ati tusar, Jesúsán jukiartas wakerinam, Jesús nuna nekaa ataksha ningki muranam wakamiayi.

Jesús kucha japen nawejai wekaasamuri

(Mat. 14.22-27; Marc. 6.45-52)

¹⁶ Tura kintamramtai Jesúsá nuiniatiri ainauti kuchanam wemiaji. ¹⁷ Kashi Jesús taachmatai, juun kanunam engkemar, Capernaum yaktanam waketkimi tusar katimiaji. ¹⁸ Turarin nase kakar nasenmatai, kucha tamparamuri kakar tamparimiayi. ¹⁹ Tumamtai iikia kuchanam kawinmakir seis (6) kilómetron wearin, Jesús kuchanam nungkanma nunisang wekaaki winau wainkamiaji. Tura wainkar shamkamiaji. ²⁰ Tumakrin Jesús chichartamak:

—Wiitjai, shamrukairap, —turammiaji.

²¹ Turammatai iikia pengker nintimsar Jesús engkear jukir, kakarmachu ii weamunam nujamkamiaji.

Aints ainau Jesúsán eakmauri

²² Kashin tsawaarar aints tumajin juwakuu ainau kanu atsau wainkar: Ni nuiniatiri ainau Jesúsánaka ayacharmapi tu nintimrarmiayi. ²³⁻²⁴ Nuni iruntrar chichainai, Tiberias yaktanmaya ainau chikich kanujai taarmiayi. Tura yau Jesús Yusen maaketai tusa, pangkan aints ainau yuramia nuni arakchichu nujamkaramtai, aints nuni juwakuu ainau Jesúsánasha waintsuk, tura ni nuiniatiri ainautincha waitmakchau asar, nu kanunam engkemawar: Jesús eaktai tusar, Capernaum yaktanam wearmiayi.

Wiitjai yurumka tumawaitjai timiauri

²⁵ Tura kucha tumajin katingkiar, nuni Jesúsán wainkar iniinak:

—Nuikiartinu ¿warutia junisha katingmame? —tiarmiayi.

²⁶ Tu tinam Jesús ayaak:

—Nekasan tajarme: Atumka yau pang yuwaram tutuaru asaram, wína eatrume. Turayatrum wainchatin turaja nuka nintimtsurme. ²⁷ Junia nungkanam yurumak kaurtin aa nuke nintimsaram pujuirap. Antsu nekasrum: ¿Itiurak tuke Yusnum pujusaintaj? tusaram, yuta tuke kaurchatin aa nu nintimrau ataram. Apaachir Yus: Ameka nu turata tusa, wína inatrau asamtai, wikia aints ayatnak, nu yutanka susatnuitjarme, —timiayi.

²⁸ Tamati aints ainau iniinak:

—¿Yus wakeramu umiktasrisha warí itiurkatnuitji? —tiarmiayi.

²⁹ Tu tinam Jesús ayaak:

—Yus wakeramuka nuwaitai: Yus wína akuptuku asa, aints ainau mash wína nimtim-tursarat tusa wakerawai, —timiayi.

³⁰ Tamati ataksha iniinak:

—¿Tura amesha warí wainchati takatcha turame? Iikia nu wainkar: Nekasmeapi Yus akupkamuitme tusar, iikia nu nintimsar pujustinuitji. Tura asar ¿warí wainchati takatcha turame? tusar iikia nekaatar wakeraji. ³¹ Yuse chichame tu aarmau asamtai, ii yaanchuik juuntri ainau aints atsamunam yurumak maná tutain yuwarmiayi. Nu aarmauka nuwaitai: “Aints ainaun yuratas Yus nayaimpinmaya yurumkan akupkamiayi,” —tiarmiayi. ✠

³² Tinamtai Jesús aimiak:

—Wi taja nuka nekasaintai. Moiséska atumi juuntri ainaun nayaimpinmaya yurumkanka susachmiayi. Antsu wína Apaachir nayaimpinmayan yurumak nekas aa nuna suramrume. ³³ Yus nekas yurumkan nayaimpinmayan akupak, mash nungkanmaya aints ainaun pujut nangkankashtinun susatnua nuwaitai, —timiayi.

³⁴ Tamati chicharinak:

—Apuu, nu yurumak pujut nangkankashtinun sukartin tame nuka tuke sukartusta, —tiarmiayi.

³⁵ Tinamtai Jesús aimiak:

—Wikia tuke pujutan sukartin asan atumi yurumkaria tumawaitjai. Tura asamtai wini wininauka tuke yapartsuk pujusartinuitai. Tura wína nekasampita turutinauka tuke kitamtsuk wijai pujusartinuitai. ³⁶ Antsu wi atumin timiaja nunaka ataksha tajarme: Wina waitkayatrum: Nekasam Yus akupkamuitme turutsurme. ³⁷ Aints ainaun wína Apaachir: Nuka aminu arti timiau asar, nuka wína aintsur artinuitai. Tura asaramtai wini wininaunka pengké nakitrashtinuitjai. ✠

³⁸ Wikia wína wakeramurun turatasnaka nayaimpinmayangka tachawaitjai, antsu wína akuptuku wakeramurin najanatasan taawitjai. ³⁹ Wína Apaachir wína akuptuku asa: Aints ainaun wína surusmia nunaka kichkisha mengkatsuk, antsu nungka amukatin kinta jeamtai, inankita tusa wakerawai. ⁴⁰ Aints ainau wína nekasampi Yuse Uchirinme turutinauka mash tuke iwiaaku pujusartinuitai. Tura nu aints jakaramtai, nungka amukatin kinta jeamtai, wi inankitnuitjai. Nuwaitai wina Apaachiru wakeramuringkia, —Jesús timiayi.

⁴¹ Jesús: “Wiitjai yurumak nayaimpinmaya akupkamunka,” tinu asamtai, judío ainau Jesúsán pachisar pasé chichatan nangkamawarmiayi. ⁴² Tura chicharnainak:

—¿Juka Jesúschaikai? ¿José uchiria nuchaukai? Iikia juna aparisha tura nukurisha wainiaji. Nuna uchirintiat ¿warukaya nayaimpinmaya taawitjai tawa? —tunaiyarmiayi.

⁴³ Tu tinamtai Jesús chicharak:

—Tuuka aujmatrutsuk asataram. ⁴⁴ Wína Apaachir wína akuptukmia nuka aints ainaun nintimtikchamtaikia, aints kichkisha winingkia winichartinuitai. Tura nungka amukatin kinta jeamtai, wini wininaunka jakamunmayan inankitnuitjai. ⁴⁵ Yaanchuik Yuse chichame etserin tu aarmiayi: “Yus mash aints ainaun nuiniartinuitai,” tu aarmau asamtai, wina Apaachiru chichamen antukar nuimiaru ainauka wini wininawai.

⁴⁶ “Wína Apaachirun aints kichkisha wainkacharuitai. Antsu wiki Yusnumia tau asan, Apaachirun wainkawaitjai. ✠

⁴⁷ “Nekasan tajarme: Wína nekasar nintimtursar pujuinauka pujut nangkankashtinun jukiartin ainawai. ⁴⁸ Wikia tuke pujutan sukartin asan, yurumkaria tumawaitjai.

⁴⁹ Nintimrataram. Yaanchuik atumi juuntri ainau aints atsamunam yurumak maná tutain yuwariat mash jakarmiayi. ⁵⁰ Antsu yurumkan nayaimpinmayan pachisan taja nuka wiitjai. Aints yurumkan yuwa nunisarang nekasampita turutinauka tuke jakachartin ainawai. ⁵¹ Nayaimpinmaya yurumkan tuke pujutan sukartin naka wiitjai. Tura asamtai nu yurumkan yuwinauka tuke iwiaaku pujusartin ainawai. Mash nungkanmaya ainau

pujut nangkankashtinun jukiarat tusan jakatnuitjai. Tura asan wi yurumkaitjai taja nunaka wína namangkrun pachisan tajai, —Jesús timiayi.

⁵² Tamati judío mai nuwamtak chicharnainak:

—¿Juka itiurak yurumak yuwataram tusasha ni namangkencha sukartusminuita? —tunaiarmiayi.

⁵³ Tu tinam Jesús chichaak:

—Nekasan tajarme: Wikia aints akiinayatun, Yus akuptuku asamtai, wína namangkur yuwachkurmeka, tura wina numpar umachkurmeka nekasrum pujut nangkankashtinka jukishtinuitume. ⁵⁴ Aints wína nekasampita turutuka wína namangkrun yuwawa tumawaitai, tura wína numparun umawa tumawaitai. Tura asa pujut nangkankashtinun jukin asamtai, nungka amuamunam nu aints naka inankitnuitjai. ⁵⁵ Wina namangkruka nekas yuta tumawaitai. Tura wina numparsha nekas umutiya tumawaitai. ⁵⁶ Wína namangkrun nintimias yuwauka, tura wína numparun nintimias umauka wijai tuke tsanias pujawai. Tura asamtai wisha nijai tuke tsaniasan pujajai. ⁵⁷ Wina Apaachirka tuke puja nuka wína akuptak tuke pujustinun surusu asamtai, wína namangkrun nintimsar yuwinauka wi pujaja nunisarang wijai tuke iwiaaku pujusartinuitai. ⁵⁸ Yus yurumkan nayaimpinmayan akupkamia nuna pachisan chichaajai. Yaanchuik atumi juuntri nayaimpinmayan yurumak akupkamun yuwariat jakarmiayi. Antsu yamaram yurumkan yuwinauka tuke iwiaaku pujusartinuitai, —Jesús timiayi.

⁵⁹ Pujut nangkankashtinun pachis: Wikia yurumka tumawaitjai tusa, aints ainaun Capernaum yaktanam iruntai jeanam Jesús tu nuiniarmiayi.

Pujut nangkankashtinun pachis etserkamuri

⁶⁰ Jesús a nemarnuri untsuri nu chichaman antukaru asar, mai nuwamtak chicharnainak:

—Ju chichamka nekas yumtinuitai. ¿Yáki junasha antukat? —tunaiarmiayi.

⁶¹ Tu tinamtai Jesús ni tunaiyamun nekaa chicharak:

—¿Waruka wi taja nuka napchawaitai? tarume. ⁶² Wi aints ayatun, Yus akupkamu asan, yaanchuik pujumiaja nuni waketkiamtaikia ¿warukawaintrumek? ⁶³ Yuse Wakani nuke pujut yamarman sukartawai. Antsu aintsu namangkengka tuke iwiaakuka pengké pujuschamnawaitai. Wi taja nunaka Yuse Wakani nekamtikramat tusan, tura nekas pujut yamarman suramsarat tusan atumin ujaajrume, —Jesús timiayi.

⁶⁴ Tura Jesús niin nintimtichu ainaun, tura niin suruktinua nunasha nu nangkamtaik nekau asa, ni nemarnuri ainautin chichartamak:

—Atumjai iruntrar pujuinau winaka mashka nintimturinatsui. ⁶⁵ Tura asakrumin wikia atumin chicharkun: Wína Apaachir aints ainaun wini winiarat tusar nintimtikchamka, aints kichkisha wini winichartinuitai timiajrume, —timiayi.

⁶⁶ Tu tama ni nemarnuri untsuri Jesús an ukukiar niin nemartan inaisarmiayi.

⁶⁷ Tuminamtai Jesús ni doce (12) nuiniatiri ainautin ininmak:

—¿Atumsha nunisrumek jiinkiram wetasrum wakerarmek? —turammiaji.

⁶⁸ Turammatai Simón Pedro aimiak:

—Atsa Apuru ¿yanumak wetaij? Ami chichamijai tuke iwiaaku pujustinuitji. Amek nu chichamka etseru weame. ⁶⁹ Iikia nekasampi Yus Akupkamuita, tu nintimsar pujau asar nuka nekaji, —timiayi.✠

⁷⁰ Tamati Jesús aimiak:

—Wi doce (12) aints ainautirmin wina nuiniatir ataram tusan inaikiamiajrume. Turayat atumnia kichik iwianchrintin pachitkawai, —Jesús timiayi. ⁷¹ Ni tímia nuka Judas Iscarioten Simónka uchirin taku timiayi. Judascha ni nuiniatirintiat ukunam Jesús anangka surukmiayi.

7

Jesús a yachí ainau Yus akupkamuitme tichamuri

✠ 6:69 (Mat. 16.16; Marc. 8.29; Luc. 9.20)

¹ Nunia Jesús Galilea nungkanam wekaimiayi. Tura Judea nungkanam judío juuntri Jesús maatai tinau asaramtai, nuni wetan nakitmiayi. ² Tura judío fiestari, Aakmakmau Fiesta tutai jeatak wajamtai, ³ ni yachí ainau Jesúsán chicharinak:

—Ami nuiniatiram Judea nungkanam pujuinau ami wainchati takatrumin wainkarat tusam, junia jiinkim nuni weta. ⁴ Chikich aints ainau: Wina turamurun wainkarat tusar wakerinauka uukarka turinatsui. Ame wainchati takat takaakmek, mash aints ainau wainminamunam turata, —tiarmiayi.

⁵ Ni yachí ainausha: Nekasmeapi Yus akupkamuitme, tinachu asar nunaka tiarmiayi.

⁶ Tu tinam Jesús chicharak:

—Wi fiestanam wetin kintarka jeatsui. Antsu atumka pachitsuk weminuitrume. ⁷ Ju nungkanmaya ainau atumnaka kajertaminatsui. Antsu wikia ni tunau takasmaurin nekantikmau asar, winaka kajertu weenawai. ⁸ Atumek fiestanam wetaram. Antsu wína kintarka jeachu asamtai, wikia weatsjai, —timiayi.

⁹ Nuna tusa ukuki Galileanam juwakmiayi.

Aakmakmau fiesta tutainum wemaui

¹⁰ Turamtai ni yachí jiinkiar fiestanam wearmiayi. Antsu Jesús juwakiat ukunam Jerusalénnum wemiayi. Tura aints ainau nekarawarai tusa uumak wemiayi. ¹¹ Judío juuntri ainausha fiesta irunmaunum Jesúsán eainak:

—¿Nusha tuning puja? —tiarmiayi.

¹² Nu fiestati iruntrar aints untsuri Jesúsán pachisar chichainak:

—Nu aintska nekas pengkeraitai, —tunaiarmiayi. Tinamtai chikich ainau:

—Atsa, nuka paseetai. Aints ainaun anangkatas wekainuitai, —tunaiarmiayi.

¹³ Tura judío juuntrin shaminau asar, paan antukarai tusar chichakcharmiayi.

¹⁴ Fiesta japen wajasai, Jesús Yus seatai juun jeansu waya, Yuse chichamen nuikiartutan nangkamamiayi. ¹⁵ Turamtai judío ainau ni chichamen antukar nukap nintimrar:

—Jusha papin nuimiarchau ayatcha ¿itiurak nunasha nekawa? —tunaiarmiayi.

¹⁶ Nuna antuk Jesús chichaak:

—Wi nuikiartaja juka wína chichamruchuitai. Antsu wína akuptuku chichamentai.

¹⁷ Aints Yuse wakeramurin umirkartas wakerinauka: Wi chichaman nuikiartaja nuna Yusnawaitai tusar paan nekaawartin ainawai. Tura wiki nintimsanak chichaamtaisha, nunasha paan nekaawartin ainawai. ¹⁸ Aints ningki nintimias chichaman etseruka, aints ainau wina pengker nintimtursarat tusa chichaman etserui. Antsu chikich aints niin akupkamia nunak pengker awajsatas wakerakka, aints ainaun anangtsuk nekas aa nunak ujaawai.

¹⁹ Yus umiktin chicham umiktaram tusa, Moisés suramsau wainiatrumek, kichkitirmesha nu chichamka umirtsurme. ¿Waruka winasha mantuatasrumsha wakerutarme? —Jesús timiayi.

²⁰ Tamati aints ainau aainak:

—Waurkum nuka tame. ¿Yaachia amincha mantamatascha wakerutminawa? —tiarmiayi.

²¹ Tinamtai Jesús aimiak:

—Wi ayamtai kintati aintsun kichik tsuwaru asamtai, mash ¿waruka aitkawa? tusaram nukap nintimrarume. ²² Tura wainiat Moisés chichaman akupturmak: Uchi aishmang akiinamtai, nuwapchiri charutkataram, atumin turamin asamtai, atumka ayamtai kinta au wainiatrumek tuke turin ainiarme. Antsu Moiséska nu turatnunka nangkamachuitai, antsu yaanchuik atumi juuntri ainau nu turatnunka nangkamawarmiayi. ²³ Tura Moisésa aarmaurin miatrusrumek umirkuram, ayamtai kintatisha uchi nuwapchirin charutnuitrumsha, wi ayamtai kintatin kichik aintsun tsuwaraisa ¿waruka kajertarme? ²⁴ Tenap nekartsuk aints ainaun pachisrum: Tunau turayi tiirap. Antsu nekasashi tusaram, inintrusrum tenap nekaataram, —Jesús timiayi.

Wikia tuniyainja timiauri

²⁵ Tamati Jerusalénnumia aints ainau chicharinak:

—¿Maatai tina auchukai? ²⁶ Jiistaram. Mash antinamunam chichau waininayat apu ainauka pachinatsui. ¿Nekasash Yus akupkamui tuuyash nintiminaj? ²⁷ Iikia ju aintska tuniayainta tusar paan nekaji. ¿Antsu Yus akupkamu tatinua nusha tuniang winitnui? tusarsha aints kichkisha nekainatsui, —tunaiarmiayi.

²⁸ Tinamtai Jesús Yus seatai juun jeanam nuikiartak pujau, nuna antuk kakar chichaak:

—¿Wi tuniaya winaja nusha paantak nekaram? Wína wakeramurun takastasnaka tachawitjai. Antsu wína nekas akuptukuka yaachita tusarmesha nuka nekatsrume. ²⁹ Antsu wína akuptuku asamtai, wikia nijai pujayatun juni tau asan, wína akuptukunka paan nekajai, —Jesús timiayi.

³⁰ Tamati aints ainau: “Watska, achikiar kársernum engkeatai,” tinayat ni achiktin kintari jeachu asamtai achikcharmiayi. ³¹ Tura aints untsuri: Nekas Yus akupkamuapita tusar chichainak:

—Mesías tatinuitai tina nu winakka, wainchatai takatan ju aintsun nangkamasang untsuri turashtinuitai, —tiarmiayi.

Fariseo ainau Jesús eaktaram timiauri

³² Fariseo ainau Jesúsán pachisar chichainaun antukar, sacerdote juuntri ainaujai iruntrar chichainak, Yus seatai jean wainin ainaun untsukar: Jesús achiktaram tusar akupkarmiayi. ³³ Turinamtai Jesús nuna nekaa aints ainaun chicharak:

—Wikia atumjai jumchik kinta pujustatjai. Tura nunia ataksha wina akuptuku pujamurin waketkitatjai. ³⁴ Tura wi waketkiamtai, atumka eatkatatrume. Tura wi wetatja nuni winichmin asaram, winaka waitkashtinuitrume, —timiayi.

³⁵ Jesús tamati judío mai nuwamtak iniininak:

—¿Ausha tu weamtaik iisha wainkashtai? ¿Judío ainau arák griego ainaujai pachinkar pujuinamunam wetinun nu aints ainaun nuiniartas tatsuash? ³⁶ Au iincha chichartamak: “Wina eatiatrumek, wi weaja nuni wechamin asaram, winaka waitkashtinuitrume,” ¿iin turamji nunasha warina takua tawa? —tunaiarmiayi.

Yumi tuke pujutan sukartinun pachis timiauri

³⁷ Fiesta amuamu kinta timiá pengker kinta asamtai, Jesús nu kintati wajaki kakar chichaak:

—Aints ni nintin kitamawa nunisang pujakka, nintir kitamachua nunisang ati takungka wini winiti. ³⁸ Tura wína nekasampi Yus akupkamuitme turutuka Yuse chichame aarmawa nunisang ni nintinia entsa pukunia nunisang aints kitaminawa nunisarang pujuinaunka tuke iwiaaku pujusarti tusa yaingkiartinuitai, —timiayi.

³⁹ Kitaminawa nunisarang Jesúsán nekasampita tinu ainauka Yuse Wakani jukiartinuitai, nuna taku timiayi. Yuse Wakaningkia taachu asamtai, tura Jesús nayaimpinam weachu asa, ukunam atiniun pachis nunaka timiayi.✠

Aints metekchau nintimrar kanarmauri

⁴⁰ Tamati aints ainau Jesúsá chichamen antukar chichainak:

—Nekas Yuse chichamen etserin tatinuitai tiarmia nuka juwaitai, —tiarmiayi.

⁴¹ Tu tinamtai chikich ainausha chicharinak:

—Atsa, antsu Mesías tu weena nuwaitai, —tiarmiayi.

Tu tinamaitiat chikich ainu aiminak:

—Atsa ¿Mesíaska Galileanmaya tatinkai? ⁴² Mesíaska ii juuntri Davidta weari asa, Davidcha Belénnum akiinaw asamtai, nisha nunisang Belénnum akiinatnuitai, —tiarmiayi.✠

⁴³ Tu tinaw asamtai, aints ainau metekchau nintimrar kanararmiayi. ⁴⁴ Tuminai chikich ainauka Jesúsán achikiar jukiartas wakerinayat achikcharmiayi.

Apu ainau Jesúska Yus akupkachmawaitai timiauri

✠ 7:39 (Isa. 55.1-2; Juan 4.10-14) ✠ 7:42 (Miq. 5.2)

⁴⁵ Tura Yus seatai jean wainin ainau Jesúska chichamen anturkar waketkiar fariseo ainauncha, tura sacerdote juuntri ainauncha ujakaram inintrinak:

—¿Waruka juni itachurme? —tiarmiayi.

⁴⁶ Tu tinam nuka aiminak:

—Nu aints chichaa nuniska aints kichkisha chichachu armayi, —tiarmiayi.

⁴⁷ Tu tinam fariseo ainau chicharinak:

—¿Atumnasha anangkramarume? ⁴⁸ ¿Judío apuri ainausha, tura fariseo ainautisha kichkisha nu aints pachisar nekasampita tinajias? ⁴⁹ Antsu Moisésa aarmaurin nekachu ainauka Jesúska nekasampita tinu asar, yumingkramu ainawai, —nangkamiar tiarmiayi.

⁵⁰ Tinamtai Nicodemo nuwik Jesúska kashi jearmia nuka fariseotiat chichaak:

⁵¹ —Ii umirkatin chicham tu aarmau asamtai, aintsu chichaamuri anturtsuk, tura ni turamurisha tenap nekartsuk pujakrikia, wait wajaktintri tu atinuitai pengké ticham-nawaitji. ¿Nekaschaukai? —timiayi.

⁵² Tamaitiat Nicodemon jiyainak:

—¿Amesha Galileanmaya aintskitam? Galileanmaya aints Yuse chichamen etsernuka pengké atsutnuitai. Amesha Yuse chichame tenap aujsam nekaata, —tiarmiayi.

⁵³ Tu tinu asar, kichik kichik ni jeen waketkiarmiayi.✠

8

Nuwa tunau turamtai Jesúsnum itamuri

¹ Fariseo ainau ni jeen waketkiaramtai, Jesúska Olivo muranam wakamiayi. ² Tura kashin tsawaar ataksha Yus seatai juun jeenam jeamtai, aints ainau untsuri niin kautkarmiayi. Tura kautkaram, Jesús keemas nu aints ainaun nuiniarmiayi. ³ Tura nuikiartak pujai, Moisésa chichame nuikiartin ainau, fariseo ainausha nuwan chikich aintsjai tepaun wainkar jukiar, Jesús pujamunam itaarmiayi. Tura aints iruntramunam japen awajsar, ⁴ Jesúska chicharinak:

—Nuikiartinu, ju nuwaka chikich aintsjai tepau wainkaji. ⁵ Moisés iin chichaman akupturmak: Nuwa tumauka kayajai tukur maatnuitai, tu aatramramiaji. ¿Tura amesha warinme? —tu iniasarmiayi.✠

⁶ Nunaka: ¿Ni warinting? nunia chicham najanami tusar nekarawartas tiarmiayi. Tinamaitiat Jesús aintsuk tsuntsumaj ni uwejejai nungkan aak pujumiayi. ⁷ Jesús aak pujamtai, tuke itattsuk iniinam, wajaki chicharak:

—Ayu, watska, aints tunaun pengké turichu akungka, kayan achik ju nuwanka eemak tukuti, —timiayi.

⁸ Nunia ataksha tsuntsuma nungkan aak pujumiayi. ⁹ Tu pujau asamtai, ni chichamen antukaru ainau ni tunaarin nintimrar, juun ainau nuwá eemkar jiinkiar, nunia chikich ainausha mash kichik kichik jiinkiar wearmiayi. Mash jiinkiarantai, Jesús ningki nu nuwajai juwakmiayi. ¹⁰ Nuniangka Jesúska wajaki nuwanak wainak:

—Nuwachi ¿aints amin jakati turamina nusha warukawarma? ¿Kichkisha juwakcharik? —timiayi.

¹¹ Tu iniam nu nuwaka aimiak:

—Ja ai Apuru, kichkisha juwakchari, —timiayi.

Tamati Jesús chicharak:

—Ayu, wisha mantamawarti tichatatjame. Yamaikia jeemin waketkim nuniangka tunau turuwaip, —timiayi.

Jesús paaniua nunisketjai timiauri

¹² Aints ainau ataksha iruntramtai, Jesús chicharak:

—Wikia paaniua nunisnak mash nungkanmaya aints ainaun paan nintimtikrat-nuitjai. Tura asamtai wina nemartinauka teenmaka pujuschartinuitai, antsu pujut nangkankashtinun jukiartin asar, tuke paaniunam pujusartinuitai, —timiayi.✠

✠ 7:53 (Juan 3.1-2) ✠ 8:5 (Lev. 20.10) ✠ 8:12 (Mat. 5.14; Juan 9.5)

¹³ Tamati fariseo ainau chicharinak:

—Ameka amek nintimtumasam chichaame. Tura ame tame nuka nekaschawaitai, —tiarmiayi. [☆]

¹⁴ Tu tinam Jesús aimiak:

—Wikia tuniaya winaja, tura tuwa weaja tusancha nekajai. Tura asan wiki nintimtumasam chichayatnak, wi taja nuka nekasaintai. Antsu atumka tuniaya winaja, tura tuwa weaja nuka pengké nekartsurme. ¹⁵ Atumka ju nungkanmaya ainau nintimina nunisrumek aujmatru wearme. Tura wainiatun wikia aintsun kichkisha pachisnaka aujmatu weatsjai. ¹⁶ Tura chikich ainaun pachisan: Nuka pengkeraitai, antsu kichka paseetai tayatun, wiki nintimsanak nunaka tatsujai. Antsu wína akuptukmia nusha nunisang nunaka tawai. Tura asamtai wi taja nuka nekasaintai. ¹⁷ Atum umiktin chichamnasha Moisés tu aarmiayi: Jimia aints mai metek ni wainkamurin pachisar tu amiayi tusar etserinamtaikia, nu chichamka nekasaintai titinuitrume. ¹⁸ Tura asamtai wi taja nuka nekasaintai. Tura wína Apaachirsha, wína akuptuku asa, wína pachitas ta nusha nekasaintai, —Jesús timiayi.

¹⁹ Tamati chicharinak:

—¿Apaachirmesha tuwaita? —tiarmiayi. Tu iniinam Jesús aimiak:

—Atumka winasha tura wína Apaachirsha nekatsrume. Wína nekarkurmeka, wína Apaachirsha nekaatnuitrume, —timiayi.

²⁰ Jesús Yus seatai juun jeansam kuik engketi kajurin puusamunam nunaka etserkamiayi. Tura ni kintari jeachu asamtai, aints kichkisha Jesúsán achikcharmiayi.

Wi wetatja nuningkia winichminuitrume timiauri

²¹ Ataksha Jesús chichaak:

—Wikia wetatjai. Tura wi weamtai atum wína eatkatin ainiarme. Antsu wi weamunmaka winichminuitrume. Tura atumka tuke tunaarintin asaram jakatnuitrume, —timiayi.

²² Tama judío juuntri chicharinak:

—Juka wi weamunam winichminuitrume ta nunasha ¿warina takua tawa? ¿Ningki maamatan asa tumamtsuash? —tiarmiayi.

²³ Tu tinam Jesús aimiak:

—Atumka junia nungkanmayaintrume. Antsu wikia nayaimpinmayaintjai. Atumka nekasrum ju nungkanmayaintrume. Antsu wikia junianchuitjai. ²⁴ Tura asan tajarme: Atumi tunaarijai jakatnuitrume. Atumka wína nekasampi Yus akupkamuitme turutchau akurmeka, atumi tunaarijai jakatnuitrume, —timiayi.

²⁵ Tamati iniinak:

—¿Tura amesha nekascha warí aintsuitme? —tiarmiayi.

Tu tinam Jesús aimiak:

—¿Warukanak nekasnasha atumjaisha chichastaja? ²⁶ Atumi tunaarin pachisan nukap chichasminuitjai. Turayatun nunaka turashatjai. Antsu wína akuptukmia nuka nekas chicham aa nunak tau asamtai, wikia ni tamaun antuku asan, mash nungkanmaya ainau nekaawarti tusan nunaka etserjai, —timiayi.

²⁷ Nuna tau waininayat, ni Apaachiri Yusen pachis nunaapi tawa tusarka pengké nekaacharmiayi. ²⁸ Tura asamtai Jesús chicharak:

—Wiki nintimsanak kichkisha turatsjai, antsu wína Apaachir nuiturmia nunak tajai. Wikia aints ayatun Yus akuptuku asamtai, wína yakí numinam takuriamtai, nuniangka atumka nekasrum: Juka Yus akupkamuapita tusaram nekaratnuitrume. [☆] ²⁹ Wína akuptukmia nuka tuke wijai pujawai. Wikia ni wakeramurin tuke umiku asamtai, winaka ajapruangka ukurtsui, timiayi.

³⁰ Nuna tamati, aints untsuri niin nekasampita tiarmiayi.

Atumka Satanása uchirintrume timiauri

³¹ Nunia judío Jesúsán nekasampita tiaru ainaun Jesús chicharak:

[☆] 8:13 (Juan 5.31) [☆] 8:28 (Juan 8.28)

—Wi taja nu miatrusrumek umirkurmeka, nekasrum wína nuiniatir atinuitrume.

³²Tura nekas chicham aa nuka nekaatnuitrume. Tura nu chicham umirkurmeka, angkaan pujustinuitrume, —timiayi.

³³Tamati Jesúsán nekasampita ticharu ainau chicharinak:

—Iikia Abraham weawitji. Tura asar chikich ainau inatiri pengké wajaschamiaji. ¿Amesha waruka angkaan pujustinuitrume tukartame? —tiarmiayi.

³⁴Tu tinam Jesús aimiak:

—Nekasan tajarme, aints tuke tunau takainauka mash tunau inatiri ainawai. ³⁵Antsu aintsu inatiri ni uchirinchu asa, nu aintsu jeenka tukeka pujuschamnawaitai. Antsu aintsu uchiri ni apaachiri jeen tuke pujusminuitai. ³⁶Tura asamtai Yuse Uchiri atumin angkaan awajtamatikia, nekasrum tuke angkaan pujustinuitrume. ³⁷Atumka Abraham weawitji tarume nunaka nekajai. Tura wainiatrum atumka wi taja nuka antutcha nakitau asaram, wína mantutcha wakerutarme. ³⁸Wikia Apaachirjai pujakun, wi wainkamiaja nunaka etserjai. Tura atumsha atumi apaachiri timiauringkia miatrusrumek umirume, —Jesús timiayi.

³⁹Tama aiminak:

—Li yaanchuik juuntringkia Abrahamaitai, —tiarmiayi. Tinamaitiat Jesús chicharak: —Atumka nekasrum Abraham wearinkurmeka, ni turamia nunisrumek turam-nawaitrume. ⁴⁰Wikia chicham nekas aa nuna Yusnumia nuimiaru asan, atumin ujayajrume. Tura nu chichamka antuku ayatrumek, wína mantuatasrum wakerutarme. Abrahamka tuuka nintimchauyayi. ⁴¹Antsu atumka atumi apaachirijai metek turarme, —timiayi.

Jesús tamati jiyainak:

—Iikia tsanirnumiangka akiinachuitji. Ii aparingkia kichkitai. Nuka Yusketai, —tiarmiayi.

⁴²Tu tinam Jesús chicharak:

—Yus nekas atumi Apaachirinmataikia, wikia Yusnumia tau asamtai, winasha anentnuitrume. Wikia wiki nintimsanka juningkia tachamiajai, antsu Yus akuptuku asamtai, juningkia taawitjai. ⁴³¿Waruka wi taja nuka timiá nintimtsurme? Wi taja nu nakitau asaram, wína chichamruka antatsrume. ⁴⁴Atumi aparingkia Satanásaitai. Tura atumka ni uchiri asaram, ni wakera nu turarme. Nu nangkamtaik tuke mangkartin ayayi. Tura nekas aa nunaka nakitau asa, nekas aa nunaka chichaa weatsui. Antsu tuke wait chichaman etserin asa, wait chichaman aparintai. Ni wait chichaman chichau asa, tuke ninu aa nunak chichaawai. ⁴⁵Antsu wikia nekas chichaman etserai waitiatrum, winaka nekasainme turutsurme. ⁴⁶Wína tunaaruka pengké atsau asamtai ¿yáki wi tunau takaamurnasha kichkisha nekamtikruati? Wikia nekas chichaman chichai waitiatrum ¿waruka wínaka nekasainme turutsurme? ⁴⁷Yusnau ainauka Yuse chichamen antinawai. Antsu atumka Yusnauchu asaram, wi taja nuka antut nakitarme, —Jesús timiayi.

Abraham akiintsang Cristoka tuke pujuyayi

⁴⁸Tamati judío juuntri ainau Jesúsán jiyainak:

—Maj, ameka Samarianmaya aints asam, iwianchrinuitme, ii taji nuka nekasar taji, —tiarmiayi.

⁴⁹Tu tinam Jesús aimiak:

—Wína iwianchruka atsawai. Antsu wína Apaachirun pengker awajkun pujajai. Antsu atumka wínaka pengkerka awajtatsrume. ⁵⁰Wikia wiki nintimsanak: Wína pengker awajtusarat tusanka wakeratsjai. Antsu kichka: Aints ainau mash wína pengker awajtusarat tusa wakerawai. Tura nuka mash aintsu turamurin nekau asa, pengkeraitai tura paseetai tusa ningki mash nekawai. ⁵¹Nekasan tajarme: Wína chichamrun umirtin ainauka tuke jakashtin ainawai, —timiayi.

⁵²Tamati judío juuntri ainau Jesúsán jiyainak:

—Pai, yamaikia ameka iwianchrinuitme tusar paan nekaaji. Abrahamsha tura chikich aints Yuse chichamen etserin ainausha jakaru wainiatmek, wína chichamrun umirtin

ainauka tuke jakashtin ainawai tukartame. ⁵³ ¿Ii yaanchuik juuntri Abraham nangkasmek juunkitam? Abrahamsha, tura chikich Yuse chichamen etserin ainausha mash jakarmiayi. Tura asaramtai ¿waruku asamea nusha tame? —tiarmiayi.

⁵⁴ Tu tinam Jesús aimiak:

—Wikia wiki nintimsanak: Miajuitjai takunka, nunaka nangkamin tiinjai. Antsu wína pachitas: Miajuitai ta nuka wína Apaachiruitai. Atumka nangkamrum ii Yusrintai tarume nuka nuwaitai. ⁵⁵ Atum ii Yusrintai tayatrum atumka wainchawaitrume. Tura wikia wainjai. Antsu wainchawaitjai takunka, atumea nunisnak wait chichaman etserin aintjai. Turayatnak niin wainkau asan, ni chichamen miatrusnak umirnitjai. ⁵⁶ Atumi juuntri Abraham yaanchuik jakayat, wi ju nungkanam tatinun wararturas nakarsamiayi. Tura wína waitak nukap warasmiayi, —timiayi.

⁵⁷ Tamati judío juuntri ainu Jesúsani iniinak:

—Ame cincuenta (50) musach pujachiatmesha ¿waruka Abrahaman wainkamiajai tame? —tiarmiayi.

⁵⁸ Tu tinam Jesús aimiak:

—Nekasan tajarme: Abrahamsha akiintsang, wikia tuke pujuyajai, —timiayi.

⁵⁹ Jesús tamati kayan jurukiar: Tukur maatai tinam, Jesús uumak Yus seatai juun jeanmaya jiinki wemiayi.✠

9

Wainmichu akiinaw tsuwarmauri

¹ Nunia ni nuiniatiri ainauti Jesúsjai wekaakur aints akiinamunmaya wainmichu wainkamiajai. ² Tura nangkamakur ni nuiniatiri ainauti iniakur:

—Nuikiartinu ¿warukaya juka wainmichusha akiinaya? ¿Ni aparitunaa asamtaiyash ai akiinaya? ¿Turachkusha ningki tunau asayash ai akiinaya? —tu iniimiajai.

³ Tu iniam Jesús iin chichartamak:

—Atsa, juka tunaarintin asaya ai akiinachuitai. Tura aparisha, nunia nukurisha tunaarintin ainamtaiya, ai akiinachuitai. Antsu Yus ni kakarmarin inakmastas wakerau asamtai, ai akiinawaitai. ⁴ Tsawaikia wína akuptuku takatrin takakmastinuitjai. Antsu tee wajasamtai, aints kichkisha takakmaschartinuitai. ⁵ Ju nungkanam iwiaaku pujaknaka, mash nungkanmaya ainu paaniurinjai, —Jesús turammiajai.✠

⁶ Nuna tusa, Jesús nungkanam usukmimiayi. Nunia usukijai nungkan kuta najana, nuna juki wainmichu jiin nujtukmiayi. ⁷ Tura chicharak:

—Yamaikia entsa maati Siloé tutainum weme jiimi nijarta, —timiayi. Siloésha iiti chichamejainkia “Akupkamu” taku tawai.

Jesús tamati wainmichu nuni we, ni jiin nijarmiayi. Tura ni jiin nijar umis, ni jeen waketki paan wainmakmiayi. ⁸ Tura paan wainmakamtai, ni irutkamu ainauka, tura niin tuke wainmichu pujaun wainin ainu chicharinak:

—¿Jinta pujus kuik surustaram tusa seamnia nuchaukai? —tunaiyarmiayi.

⁹ Tu tinam chikich aints ainu chichainak:

—Ja ai, nuwaitai, —tiarmiayi. Antsu chikich aints ainu chichainak:

—Atsa, nuchawaitai, antsu nu aintsua tumawaitai, —tiarmiayi.

Tu tunainamtai nu aintska ningki etsertumak:

—Ja ai, nuwaitjai, —timiayi. ¹⁰ Tamati iniinak:

—¿Tura yamaisha ituur jiimme? —tiarmiayi.

¹¹ Tu tinam nuka aimiak:

—Nu aints Jesús tu wena nuka ni usukijai nungkan kuta najana nujai jiirun yakatru: ‘Entsa maati Siloé tutainum weme jiimi nijarta,’ turutmatai wi wena jiirun nijaran paan jiimramjai, —timiayi.

¹² Tamati iniinak:

—¿Nu aintcha tuning puja? —tiarmiayi.

✠ 8:59 (Juan 10.30-33) ✠ 9:5 (Mat. 5.14; Juan 8.12)

Tu tinam:

—Chaj, nekatsjai, —timiayi.

Fariseo ainau wainmichu tsuwarmaun iniasmauri

¹³ Nunia aints wainmichu tsuwarmaun fariseo pujuinamunam itaarmiayi. ¹⁴ Jesús ayamtai kintati nungkan kuta najana nujai wainmichu aintsun tsuwaru asamtai, ¹⁵ fariseo ainausha nu aintsun ataksha iniinak:

—¿Yamaisha itiur jiiimme? —tiarmiayi. Tu tinam niisha aimiak:

—Nungka kuta najanamujai jiiirun yakatruramtai, nunia nijaran paan jiiimjai, —timiayi.

¹⁶ Tamati chikich fariseo ainau chichainak:

—Ju aintsun tsuwaruka Yuska akupkachmawaitai. Yus akupkamuitkungka, ayamtai kintatikia nunaka turachminuitai, —tiarmiayi.

Tinamtai chikich ainau chichainak:

—Atsa ¿tunau aintsuitkungka itiurak nu wainchatai takatnasha turatnuita? —tunaiarmiayi.

Tura asar metekchau nintimrarmiayi. ¹⁷ Tura yaanchuik wainmichu amia nuna ataksha iniinak:

—¿Ami jiiimin tsuwarparu nu pachismesha warinme? —tiarmiayi.

Tu tinam nu aintska aimiak:

—Wikia Yuse chichamen etsernuitai tajai, —timiayi.

¹⁸ Tamaitiat judío juuntri ainau nu aintsun pachisar: Nekasampi yaanchuik wainmichutiat yamaikia paan jiiimua ticharmiayi. Tura asar aparincha tura nukurincha untsukar, ¹⁹ iniinak:

—¿Atumi uchiri wainmichu akiinamiayi timiarme nuka nekas jukai? ¿Tura tuke wainmichu akiinausha itiur yamaisha wainmawa? —tiarmiayi.

²⁰ Tu tinam ni aparai aimiak:

—Juka nekas ii uchirintai. Tuke wainmichu akiinamia nuwaitai. ²¹ Antsu itiurak wainmakma tusarkia iikia nekatsji. Tura yáki wainmamtikiama tusarsha nekatsji. Antsu atum nekaatasrum wakerakrumka, ningki iniastaram. Niisha nampuaru asa, ningki ujatmaktatruma, —timiayi.

²² Judío juuntri irunun shaminu asar tu aimkarmiayi. Judío juuntri ainau mash iruntrar chicharnainak:

—Aints kichkisha Jesús Mesíasaitai tinauka ii iruntai jeanmaya jikir akupkatai, tinu asaramtai shiarmiayi. ²³ Tura asar: Ii uchiri nampuaru asamtai, atumka iniasrum nekaataram, —tiarmiayi.

²⁴ Tu tinam wainmichu tsuwarmaun ataksha untsukar:

—Wína tsuwarauka nekas Yusetai tita. Antsu Jesúska tunaarinuitai tusar nekaji, —tiarmiayi.

²⁵ Tu tinam niisha aimiak:

—Tunaarinuashi tusanka nekatsjai. Antsu junak nekajai: Wikia yaanchuik wainmichu ayatun yamaikia paan jiiimjai, —timiayi.

²⁶ Tamati ataksha iniinak:

—¿Itiurtamkama? ¿Itiur jiiimtikramsama? —tiarmiayi.

²⁷ Tuutas awajinam nisha ayaak:

—¿Wi yanchuk timiajrume nuka antatsrumek? ¿Warukaya ataksha etserkata tusarshasha wakerutarme? ¿Atumsha nekasrumek ni umirkatasrum tarum? —timiayi.

²⁸ Tamati kajerinak:

—Ameka nekas nu aints nemarnuitme. Antsu iikia Moisés nemarnuitji. ²⁹ Iikia Yus Moisésan akupkamuka nekaji. ¿Antsu nu aintska tunianskai? —tiarmiayi.

³⁰ Tu tinam niisha ayaak:

—Maj ¿itiurkamnawaita? Wína wainmamtikruku wainiatrumek ¿nuka tuniangki tusarmeka nekatsrumek? ³¹ Iikia nuka paan nekaji: Yuska tunaarintin ainaunka anturtsui. Antsu Yusen pengker awajsaruka tura ni wakeramurin najanin ainau seamurinka anturui. ³² Yaanchuikia aints wainmichu akiinaun tsuwaruka kichkisha nekachuyaji.

³³ Tura asamtai ju aintska Yus akupkachmawaitkungka, wainchati takatnasha kichkisha pengké turachminuitai, —timiayi.

³⁴ Tamati jiyainak:

—Ameka nekas tunaarintin akiinayatmesha ¿warukaya iin nuikiartin ataj tame? — tusar judfo juuntri irunu nu aintsun iruntai jeanmaya jiikiar akupkarmiayi.

Nintijai paan nintimchamun pachis etserkamu

³⁵ Iruntai jeanmaya jiikir akupkamu asamtai, Jesús nuna nekaa, nu aintsun wainak:

—¿Amesha Yuse Uchiri nekasampita tamek? —timiayi.

³⁶ Tamati niisha ayaak:

—Juunta, ¿yaachita nusha? Wisha nuna wainkan: Nekasampita titasan wakerajai, —timiayi.

³⁷ Tamati Jesús chicharak:

—Ameka nuka wainme. Amijai chichaaja nuwaitjai, —timiayi.

³⁸ Tamati nu aintska tikishmatar chicharak:

—Apuru, nekasampitme tajame, —timiayi.

³⁹ Tamati Jesús chicharak:

—Aintsu nintin mash nekau asan, wina nekasampita turutinaunka, tura wina nekasampita turutinachunka akankartasan ju nungkanam taawitjai. Tura aints paanchaun nintimunka paan nintimtikratan taawitjai. Tura chikich ainausha anangmamsar: Wikia paan nintimu weajai tu nintimturinaunka paanchau nintimtikratan taawitjai, —timiayi.

⁴⁰ Tamati fariseo nuni pujuinauka nuna antukar inintrinak:

—¿Ilisha paanchau nintimnukitaj? —tiarmiayi.

⁴¹ Tu tinam Jesús aimiak:

—Atumka wainmichu akurmeka, atumi tunaari nekachu asaram tunaarinchau aminuitrume. Antsu anangmamkuram: Ii tunaaringkia atsawai tinu asaram, atumi tunaari sakarchau ainiarme, —Jesús timiayi.

10

Uwija wainiun pachis etserkamuri

¹ Nunia Jesús ataksha aints ainaun nuiniak:

—Wi taja nuka nekasaintai. Aints uwijartin ni uwijarin wenurmaunum kashi ukuawai. Tura kasa ainau uwijan kasamkartas waitinmaka waaitsuk, atu yantamen wenurmaunum wakaar wayaatin ainawai. ² Antsu uwija wainuka waiti amanum nuke waiini. ³ Uwija wainin taamtai, waiti wainin waitin uraktinuitai. Tura uwija ni waintairi chichamenka pengker antin asamtai, nisha uwija naarin kichik kichik inaituk untsuuyi. Tura ni uwijarin mash chirichrin yuwaarat tusa jiiyi. ⁴ Tura wenurmaunumia mash jiiki ayas wekaini. Turamtai uwija ainau waintairi chichamenka anturin asar, ni untsuam namarin armayi. ⁵ Antsu wainchatiri chichamen nekarchau asar, ni untsuamsha namarinatsui, antsu tupikinawai, —timiayi.

⁶ Jesús nu nuikiartamun aints ainaun ujakmiayi. Tura waininayat nuna takuampi tawa tusarka nekaacharmiayi.

Jesús: Uwijan wainua tumawaitjai timiauri

⁷ Tuminamtai Jesús ataksha chichaak:

—Nekasan tajarme: Wikia uwija wenukri waitiriya tumawaitjai.

⁸ Wi taatsaing, anangkartin ainau winiarmia nuka uwijan kasaminawa nunisarang armiayi. Antsu wina nemartin ainauka uwijaya nunisarang asar, Yus akupkachmau ainaunka anturkacharmiayi. ⁹ Wikia uwija wenukri waitiriya tumawaitjai. Uwija waiitinam wainawa nunisarang wina umirtukaru ainauka tuke uwemmartin ainawai. Uwija wenuknum wayaawar, nunia jiinkiar chirichrin yuwina nunisarang wina umirtukaru ainau wini wininau asaramtai, wikia niin tuke wainkartinuitjai.

¹⁰ “Kasaka aya kasamkatas, tura aintsun maatas, tura jean mesratas winiyi. Antsu wikia aints ainaun tuke pujut nangkankashtinun susataj tusan, tura tuke wijai warasarat tusan tawitjai. ¹¹ Wikia aints ni uwijarin pengker wainua tumawaitjai. Uwija wainin nekas pengker aa nuka ni uwijari ainaun uwentikratas jakatnuitai. ☆

¹² “Antsu aints kuikijai akikiam uwijan wainuka uwija niinuchu asaramtai, yukartin winamtai, nuna wainak uwijanka ajapa ukuuyi. Tura yukartin uwijan achiamtai, uwija irunu mash pisaayi. ¹³ Nu aintska aya akikiam takakmin asa, uwija ainu warukati tusangka nintimtsuk tupikini. ☆

¹⁴⁻¹⁵ “Antsu wikia uwija wainin nekas pengker aa tumawaitjai. Tura asan uwija wainin uwijan uwentikratas jakatnua nunisnak wisha jakatnuitjai. Wína Apaachirka winaka nekaru asamtai, wisha wína Apaachirnasha nekajai. Tura wína aintsur ainauka uwijaya nunisarang ainu asaramtai nekajai. Tura niisha winasha nekarinawai. ¹⁶ Tura chikich aints ainausha uwijaya nunisarang ainayat, wína chichamrun antichu ainawai. Nu aints ainauncha wini winiarat tusan untsuktinuitjai. Wi turamtai chikich umirtin ainaujai mash iruntraramtai, wisha uwija wainua nunisnak nu aints ainaun wiki mash wainkatnuitjai. ☆

¹⁷ “Wikia jakayatun jakamunmaya ataksha nantaktin asan, wína aintsur ainaun uwentikratas jakatnuitjai. Wi turatin asamtai, wína Apaachirka wína anentui. ¹⁸ Wiki wakerakun jakatnuitjai. Wi wakerachmataikia, kichkisha wínaka mantuwar-chamnawaitai. Antsu wína Apaachirka: Nunaka turata tusa akuptuku asamtai, nunaka turatnuitjai,” Jesús timiayi. ☆

¹⁹ Tamati judío juuntri ainu nu chichamnasha antukar ataksha metekchau nintimsar, ²⁰ untsuri chichainak:

—Aunka iwianch engkemtawai. ¿Waurak tausha waruka anturu wearme? —tiarmiayi.

²¹ Tinamtai chikich ainu aiminak:

—Atsa, waurkungka chichaa weatsui. ¿Iwianch engkemtuamuka wainmichun tsuwarminkai? —tiarmiayi.

Jesús ni Apaachirijai kichkia nunisketai

²² Yumanch nantutin Jerusalénnum tuke fiestan najanin armiayi. Yaanchuik ii juuntri ainu Yus seatai jean ataksha iwiararun pachisar nintimtin armiayi. ²³ Tura asaramtai Jesús Yus seatai juun jeanam jea tesaamurin Salomón jeamkamia nuni wayaamiayi. ²⁴ Turamtai judío juuntri ainu niin tentakar:

—¿Mesías ayatmesha waruka nuwaitjai tusam, paan etseru weatsme? Ameka nekasam Mesías akumka, nuwaitjai tusam yamaikia paan etserkata, —tiarmiayi.

²⁵ Tinamtai Jesús aimiak:

—Yanchuk etserkamja nuka antukiatrumsha, nekasampita turutsurme. Wína Apaachirka turata tusa akuptuku asamtai, wi turaja nusha wainkaram: Nuwaapita tusaram paan nekaatnuitrume. ²⁶ Turayatrum wína aintsruchu asaram, nekasampita turutsurme. ²⁷ Wína aintsur ainaun uwijaya nunisnak untsuam, anturtukar nemartinawai. Tura winar asamtai, nuwaapita tusan nekajai. ²⁸ Wikia pujut nangkankashtinun suwitjai. Tura asamtai tuke wait wajaktinnumka pengké wechartin ainawai. Tura wi wainu asamtai ¿yáki jurutkit? ²⁹ Wína Apaachirka mash ainia nunaka nangkamasang timiá kakaram asamtai, wína aintsur ainaun wína Apaachir surusmia nuna kichkisha atantrukchartinuitai. ³⁰ Wisha wína Apaachirjai kichkia nunisrikiti, —timiayi.

³¹ Jesús tamati judío juuntri ainu: Kaya jurukir tukur maatai tiarmiayi.

³² Turinam Jesús chicharak:

—Wína Apaachiru kakarmarijai wainchati takatan nekas pengker aa nuna nukap takakmasu asamtai ¿tu takat pachisrumea wína kayajai tukur maatai turutrume? —timiayi.

☆ 10:11 (Sal. 23.1) ☆ 10:13 (Juan 21.15-17; 1.Ped. 5.2) ☆ 10:16 (Mat. 11.27; Luc. 15.4-5; Juan 1.18; Hebr. 13.20)

☆ 10:18 (Fil. 2.8)

³³ Jesús tu iniam judío juuntri ainau aiminak:

—Nekas pengker takat takaakminia: Kayajai tukur maatai tatsuji. Antsu ameka aintsutiatum, wikia Yusetjai tumamu asakmin, kayajai tukur maatai taji, —tiarmiayi. ✠

³⁴ Tu tinam Jesús chicharak:

—Atum umirkatin chichamka tu aarmawaitai: Yus chichaak: ‘Atumka yusetrume’ timiayi. ³⁵ Yuse chichamengka nekas asamtai, nu aarmauka pachisrum: Nuka waitaitai tichamnawaitrume. Ni chichamen antukaru ainaun pachis: ‘yusetrume’ tinu asamtai, nu chichamka nekasaintai. ³⁶ Wína Apaachirka ju nungkanam akuptuku asamtai, wikia nekas Yuse Uchirinjai tau aisha ¿waruka winasha: Yusetjai tau asam pasé chichaame turutrume? ³⁷ Wína Apaachiru takatrin wi turai wainiatrumek, nekas turachmataikia, nekasampita turutirap. ³⁸ Antsu wikia nekas Yuse takatrin takak-mamtaikia, winaka nekasampita turutiarum. Tura wina nakitrakrumsha, wi turaja nu pachisrum: Nekasampi nuka Yuse takatrin takaawai titaram. Nu takurmeka, wína Apaachirka wijai metekaitai, tura wisha wína Apaachirjai metekaitjai tusaram, paan nekaataram tusan tajarme, —Jesús timiayi.

³⁹ Tamati ataksha: Jesús achiktai tinamaitiat jiinki wemiayi. ⁴⁰ Nunia Jordán entsa tumajin we, yaanchuik Juan imiakratmia nuni pujumiayi. ✠

⁴¹ Turamtai aints untsuri Jesúsán jisartas weriar, tura wainaikiar chicharnainak:

—Nekas Juanka wainchatai takatnaka aitkachmiayi. Turayat Jesúsán pachis mash tímia nuka nekasaintai, —tunaiyarmiayi.

⁴² Tura nu nungkanmaya untsuri Jesúsán nekasampita tiarmiayi.

11

Lázaro jakamuri

¹ Betania yaktanam aints Lázaro naartin jaak tepemiayi. Nuka nu yaktanam ni umaji Maríjai, tura chikich umaji Martajai iruntrar puju armiayi. ✠ ² Nu jau umaji Marí naartin ukunam kungkutin sumak, apu Jesúsá nawen ukatar ni intashijai mujturmia nuwaitai.

³ Tura Lázaro jaak tepamtai, ni umaji mai Jesúsán chichaman akuptinak:

—Apuru antukta, ami amikrum jaawai tita, —tiarmiayi.

⁴ Chicham akuptukmau asa, Jesús nuna antuk chicharak:

—Nu jaak tepauka tukeka jakashtinuitai. Antsu aints ainau Yuse kakarmarincha wainkarat, tura Yuse Uchiri kakarmarin wainkarat tusa jaawai, —timiayi.

⁵ Jesús Martancha, tura nuna kaincha, tura umajin Lázaroncha nekas aneemiayi. ⁶ Tura Lázaro jaawai tamaun antukiat, wári wetsuk ni pujamunam jimiaran kanurmiayi. ⁷ Nunia ni nuiniatiri ainautin chichartamak:

—Judea nungkanam ataksha waketkimi, —Jesús iin turammiaji.

⁸ Turammatai ayaakur:

—Nuikiartinu ¿aunia aints amin kayajai tukurmjar mantamawartas wakerutminau wainiatmesha nuni ataksha waketkimi tame? —timiaji.

⁹ Tu chichaakrin Jesús nuikiartamun etsarak:

—¿Tsawaarka doce (12) horas paanchaukai? Ju nungkanam pujuinautisha tsawai wekaakur, paan wainmau asar tukumkashtinuitji. ¹⁰ Tura kashi wekaakurkia tee asamtai tukumkatnuitji, —turammiaji. Nuna tusa wina umirtakrum pujakrumka, nekasrum paan nintimsaram pujustinuitrume. Antsu wína umirtutsuk pujuinauka, teenam wekainawa nunisarang wait wajakartin ainawai, taku timiayi.

¹¹ Nunia ataksha iin chichartamak:

—Ii amikri Lázaro kanak tepawai. Tura wi werin shintartatjai, —turammiaji.

¹² Turammatai iikia ayaakur:

—Apuru, nekas kanak tepakka, nuniangka pengker wajastatui, —timiaji.

¹³ Jesúska Lázaro jakamurin nekayat: Kanak tepawai turammiaji. Antsu iikia: Nekas kanuru asamtaiyash taj, tu nintimramiaji.

¹⁴ Tu nintimkurin Jesús paan chichartamak:

—Lázaroka yanchuk jakayi. ¹⁵ Tura nuni wi pujachu asamtai jakayi. Antsu atum wína nekasampita turutin asakrumin, wisha atumin nintimsan waraajai. Tura yamaikia nuni werir jiismi, —turammiaji.

¹⁶ Turammatai Jesúsá nuiniatiri kichik Tomás, Jimiamramu naartin, iin chichartamak: —Iijai metek mantamawarti tusar iisha wearmi, —turammiaji.

Jakau inannunka wiitjai timiauri

¹⁷ Tura Betania yaktanam jeatak wajasarin, Lázaroka yanchuk cuatro (4) kinta jakau asamtai, iwiarsari tinau antukmiaji. ¹⁸ Betania yaktaka Jerusalénnumia kampaatmachik kilómetro arakchichu ayayi. ¹⁹ Tura ni umaji jakau asamtai, Marta tura Marísha wake mesekar juutinamtai, judío ainau untsuri pengker nintimtikratai tusar weriarmiayi. ²⁰ Turinamtai Jesús tatanak wajasi tinamun antuk, Marta Jesúsjai ingkiuniktas jiinki wemiayi. Antsu Maríka jeanam juwakmiayi. ²¹ Turamtai Jesúsán ingkiung Marta chicharak:

—Apu, ame juni pujakminka, umaar jakachmin ayat jakayi. ²² Tura wainiatun ame Yus seamka, waring achat mash tuke tsangkatramkatatui tusan nekajme, —Marta Jesúsán timiayi.

²³ Tamati Jesús chicharak:

—Umaimikia ataksha nantaki iwiaaku pujustatui, —timiayi.

²⁴ Tamati Marta aimiak:

—Nekasam tame. Nungka amuamunam mash jakaru ainau nantakiartin kinta jeamtai, nisha nantaktatui, —timiayi.

²⁵ Tamati Jesús chicharak:

—Wiitjai jakaru ainaun inannunka. Tura Wiitjai pujut nangkankashtinun sukartinaka. Aints wína nekasampita turutinauka jakariat tuke iwiaaku pujusartinuitai. ²⁶ Tura yamai pujuinausha wína nekasampita turutinauka tuke jakarchatin ainawai. ¿Amesha nusha nekasaintai tamek? —timiayi.

²⁷ Tu iniam Marta aimiak:

—Ja ai Apuru, wikia ame tame nunaka nekasampita tajame. Ameka nekasam Mesíasaitme. Nekas Yus akupkamu asam Yuse Uchirinme. Yuse chichamen etserin yaanchuik amin pachitmasar: Ju nungkanam tatinuitai turamiarmia nuka ametme, —timiayi. ☆

Jesús Lázaro iwiarsamunam taa juutmiauri

²⁸ Marta nuna tusa Jesúsán ukuki, kain Marín untsuktas waketkimiayi. Tura jeanam jea kain akanak ujaak:

—Nuikiartin ani wajas untsurmawai, —timiayi.

²⁹ Tamati Marísha nuna antuk, wári wajaki Jesúsán jiistas wemiayi. ³⁰ Antsu Jesús yaktanmaka tuke wayaachu asa, Martajai ingkiunikmia nuning pujumiayi. ³¹ Tura asamtai Marí wári wajaki jeanmaya jiinki weamtai, jeanam Marín pengker nintimtikrartas pujuinausha nuna wainkar: Iwiarsamunam juutias weatsuash tusar nemariarmiayi.

³² Tura Marí jeanmaya jiinki, Jesús pujamunam naka tikishmatar chicharak:

—Apu, ame juni pujakminka, umaar jakachmin ayat jakayi, —timiayi.

³³ Tamati Jesús Marínasha tura nijai tsaniasar taarusha juutinaun wainak, napchau nintimias wake mesekmiayi. ³⁴ Tura iniak:

—¿Tunia iwiarsamarme? —timiayi.

Tu iniam aiminak:

—Apu winim jiita, —tiarmiayi.

³⁵ Tinamtai Jesús juutmiaji. ³⁶ Turamtai judío irunu nuna wainkar chicharnainak:

—Jiisia, Lázaron nukap aneawai, —tunaiarmiayi. ³⁷ Tura chikich irunu chicharnainak:

☆ 11:27 (Col. 2.12;3.1)

—Wainmichun paan wainmamtikin asa, juni pujakka ¿Lázaron jakashti tusa surimkachampash? —tunaiarmiayi.

Lázaron inankimuri

³⁸ Tura Jesúscha ataksha napchau nintimias jakau iwiarsamunam jeamiayi. Pampanam iwiartai waa juun amanum kaya juun ututkamuyayi. ³⁹ Tura asamtai Jesús:

—Kaya epenmiao uratkataram, —timiayi.

Tamati jakau umaji Marta chicharak:

—Maj, cuatro (4) kinta jakau asa kawaarak mejeawai, —timiayi.

⁴⁰ Tamaitiat Jesús Martan chicharak:

—Ame nekasampitme turutkumka, Yuse kakarmari wainkatatme ¿wi tichamkajam? —timiayi.

⁴¹ Tamati iwiarsamunam kaya ututun jurukiaramtai, Jesús nayaimpinmanini pangkai jiimias Yusen seak:

—Apaachiru, ame tuke anturtau asakmin, maaketai tajame. ⁴² Wi seamka tuke anturtu weame tusan nekajai. Turayatnak aints juni iruntrar wajainausha wina pachitsar: Nekasampi Yus akupkamuita turutiarat tusan tajame, —Jesús timiayi.

⁴³ Nunia kakar untsuak:

—Lázaroa, nantakim jiinkita, —timiayi.

⁴⁴ Tu untsuam Lázaroa iwiarsamunmaya jiiinak, uwejencha tarachjai jingkiamu, tura nawencha tura yapiincha tarachjai kangkarmau jiinkimiayi. Turamtai Jesús aints ainaun chicharak:

—Wekaasat tusaram atiataram, —timiayi.

Jesús achiktai tusar chicham najatamuri

(*Mat. 26.1-5; Marc. 14.1-2; Luc. 22.1-2*)

⁴⁵ Judío Marín nemariarmia nuka Jesús jakaun inankinun wainkar, untsuri nekasampita tiarmiayi. ⁴⁶ Antsu chikich ainou fariseo pujuinamunam wear, Jesús turamun etserkarmiayi. ⁴⁷ Tura ujakaram nuna antukar fariseo ainou sacerdote juuntri ainoujai iruntrar chichainak:

—¿Nu aintska wainchati takatan untsuri aints wainminamunam turu wea nusha itiurkainjik? ⁴⁸ Ii pachischakrinkia, aints ainou mash nuna anturkar nemarkartatui. Turinamtai romano ainou kautramkar mesetan najaninak, ii Yus seatai jean yumpun-traminak iincha amutmakartatji, —tunaiarmiayi.

⁴⁹ Tu chicharnainak pujuinamtai, kichik sacerdote Caifás naartin, nu musach sacerdote juuntri naamkau asa chicharak:

—Atumka pengké nintimtsurme. ⁵⁰ Israel ainautikia mash jakarai tusar ¿kichik aintsuk maatin pengkerchaukai tusaram nintimtsurmek? —timiayi.

⁵¹ Antsu Caifáska ningki nintimsangka nunaka tichamiayi. Antsu nu musachti sacerdote apuri asamtai, Yus nuna titi tusa nintimtikramiayi. Jesús Israel ainaun uwentikratas jakatnuitai, taku nunaka timiayi. ⁵² Antsu Israel ainaunak uwentikrataska jakashtinuyayi, antsu Yuse uchiri ainaun mash nungkanmaya irurtas jakatnuyayi.

⁵³ Caifás nuna tamati, nu kintati judío juuntri ainou iruntrar: Jesús maatai tusar, chichaman najatawarmiayi.

⁵⁴ Turinau asaramtai, Jesús paan wantinkangka judío nungkanmaka wekaasachmiayi. Antsu ni nuiniatiri ainautijai nuniangka jiinkir, entsa atsamunam yakat Efraín tutainum jear nuni pujusmiayi.

⁵⁵ Israel ainauti fiestari, Pascua tutai jeatak wajasamtai, chikich yaktanmaya ainou untsuri Jerusalénnum wearmiayi. Tura Pascua fiestaka jeatsaing, Moisés turataram timiau asar, ni namangken nijarartas, tura ni nintin iwiarartas kaunkarmiayi. ⁵⁶ Tura Jesús nasha wainkartas wakerinak aints ainou Yus seatai juun jeanam wayaawar chicharnainak:

—¿Atumsha itiur nintimrume? ¿Jesúscha ju fiestanmasha tatimpiash? —tu ininis-armiayi.

⁵⁷ Fariseo ainausha tura sacerdote juuntri ainausha chichaman akupinak:
 –Atumsha ni pujamuri nekaarmeka etserkataram, –tiarmiayi. Tura nekaawar, nuniangka Jesúsán achikiartas wakeriarmiayi.

12

Marí Jesúsán kungkutijai ukatramuri
 (Mat. 26.6-13; Marc. 14.3-9)

¹ Pascua fiesta seis (6) kinta jeatak wajasamtai, Jesús Betania yaktanam wemiayi. Lázárosha Jesús inankimia nusha nu yaktanmasha pujumiayi. ² Jesús Betanianam jeamtai, yurumkan yuwartas inarkarmiayi. Tura Marta yurumkan ukaimiayi. Tura Lázárosha, tura chikich ainausha Jesúsjai misanam iruntrar yuwarniayi. ³ Tura yuwinai Maríki kungkuti nardo tutain, nekas akik aa nuna litro japchirin ita, Jesúsá nawen mash ukatramiayi. Nuniasha nawen ni intashijai japir mujturmiayi. Turamtai jeasha mash kungkuimiayi. ⁴ Tura kungkutin ukaramtai, Judas Iscariote, Simónka uchiri nuni pujau, Jesúsá nuiniatirintiat, ukunam niin suruktin amia nuka chichaak:

⁵ –Kichik musach takakmasar nu kuik jukir, nu kungkutikia sumakmin amiayi. Tura asamtai ¿waruka au suruk kuikian juki, kuikiartichu ainaun sutsuksha? –timiayi.

⁶ Antsu Judaska kuikiartichu ainaun yaingtaska nunaka tichamiayi. Nuka Jesúsá nuiniatiri kuikiarin wainin asa, kuik engketinam chumpiar susam, nuna kasamnuyayi.

⁷ Judas tamati, Jesús chicharak:

–Inaisata. Jumchik kinta arus wína iwiartusartin asaramtai, ju kungkutijaingkia ukatruri. ⁸ Kuikiartichu atumjai tuke irunui. Antsu wikia atumjaingkia tukeka pujuschatatjai, –timiayi.

Lázárosha maatai timiauri

⁹ Judío untsuri Jesús Betanianam pujawai tamaun antukar, wainkartas wearmiayi. Tura Lázáro jakaun Jesús inankimia nunasha wainkartas weriarmiayi. ¹⁰⁻¹¹ Tura judío ainu untsuri Lázáro jakamunmaya nantakmiaun nekaawar, sacerdote ainaunka nemarkan inaisar ukukiar, Jesúsán nekasampita tusar nemariarmiayi. Tura asaramtai sacerdote juuntri ainu mash iruntrar: Lázárosha maatai tusar chichaman najatawarmiayi.

Jesús Jerusalénnum wayaamuri

(Mat. 21.1-11; Marc. 11.1-11; Luc. 19.28-40)

¹² Pascua fiesta jeatak wajasamtai, aints untsuri Jerusalénnum kaunkarmiayi. Tura kashin tsawaarar, Jesús tatatui tinamun antukarmiayi. ¹³ Nuna antukar numi nuken charukar jukiar, Jesúsjai ingkuniktai tusar, yaktanmaya jiinkiar untsuminak:

–Yus juuntaitai. Yus akupkamu winá nuka nekas pengkeraitai. Nuka Israela apuri asa nekas pengkeraitai, –tiarmiayi.

¹⁴ Jesús wekama burro uchirin wainak, Yuse chichame aarmawa nunisang keemsamiayi. Nu aarmauka nuwaitai:

¹⁵ “Jerusalén yaktanmaya ainautirmeka shamkairap. Jiistaram. Atumi apuri burro uchirin keemas winitramui.”

¹⁶ Jesús Jerusalénnum weamtai, ni nuiniatiri ainauti Yuse chichame yaanchuik aarmawa nunisang umirui, tuuka nintimrachiayi. Tura ukunam nayaimpinam waketkiamtai, Jesús turatnun pachisar yaanchuik aarmawa nunaka nekas miatrusang umiawapi tusar nintimramiayi.

¹⁷ Aints ainu Jesúsán nemarsar wekainauka, Jesús Lázaron iwiarsamunmaya inankinun wainkau asar, ni wainkamurin chikich ainaun ujakarmiayi. ¹⁸ Tura ujakaram, chikich aints ainu Jesúsá turamurin nekaawar, Jesúsjai ingkiunikiartas Jerusalénnumia jiinkiarimiayi. ¹⁹ Tuminamtai fariseo ainu mai nuwamtak chicharnainak:

–Pai, aints ainu nu aintsun nemarsacharti tusaram, surimkatatkamaram pengké tujinkarume. Jiistaram. Mash niin nemarkanawai, –tunaiarmiayi.

☆ 12:3 (Juan 11.2)

Griego ainau Jesúsan eakmauri

²⁰ Pascua fiesta jeamtai, chikich nungkanmaya ainau Yus juuntaitai tiartas Jerusalén-num untsuri kaunkarmiayi. Griego ainausha jumchik iruntrarmiayi. ²¹ Tura nu aints ainauka Filipen jiisar, nijai chichasartas taarmiayi. Felipeka Betsaida yaktanmaya aintsuyayi. Betsaidaka Galilea nungkanmaya yaktaitai. Tura griego chichau ainau Filipen chicharinak:

—Sairua, iisha Jesús wainkatar wakeraji, —tiarmiayi.

²² Tu tinam Felipe Andrésun weri, nijai metek tsaniasar wear Jesúsan ujakarmiayi. ²³ Tu ujainam Jesús chichaak:

—Wikia aints ayatun Yus akupkamu asan, yakí wetin kintarka jeatak wajasi. ²⁴ Nekasan tajarme: Wikia trigo jingkiajiya nunisketjai. Jingkiaji araachmauka tsapachu asa yujachayi. Antsu jingkiaji araamka, kauriat tsapain asa nukap yujaayi. Wisha nunisnak jakan nunia nantakin, untsuri nungkanmaya ainaun uwemtikratnuitjai. ²⁵ Aints ni wakeramurinak nintimias jatan shamak pujakka, árak tsapaichua nunisang mengkakatnuitai. Antsu aints Yuse wakeramurinak nintimias jatan shamtsuk pujakka, árak tsapai nukap nerekuwa nunisang pujut nangkankashtinun jukitnuitai. ²⁶ Aints wína umirtutan wakerakka, nekas wi turaja nunasha turati. Tura nuna turakka, wi nayaimpinam pujustatja nunisha pujustinuitai. Turamtai wína umirtukunka wína Apaachirka nekas pengker awajsatnuitai, —Jesús timiayi.

Ni jakatniurin pachis etserkamuri

²⁷ Nunia Jesús ataksha chichaak:

—Yamaikia nukap napchau nintimsan pujajai. ¿Wisha warintajak? Apaachi, ¿wína mantuwartas wakerutina nunaka inaitusarti titajash? Atsa, nunaka pengké tichatatjai. Antsu turutawarti tusan taawitjai. ²⁸ Apaachi, amin naarmin pachisar: Ameketme juuntam turamiarti tusan wakerajai, —timiayi.

Jesús tamati iikia nayaimpinmaya chicham antukmiaji. Nu chichamka nuwaitai:

—Wína naarun pachisar: Ameketme juuntam turutiarti tusan, yanchuk aints ainaun nintimtikramiajai. Tura ataksha nintimtikratatjai.

²⁹ Aints ainau nu chichaman antukar: Ipiamtarui tiarmiayi. Tura chikich ainausha chichainak:

—Yuse awemamuri nijai chichasi, —tiarmiayi.

³⁰ Tu tinam Jesús chicharak:

—Wína antumtikruktaska nu chichamnaka akupturkachi, antsu atumin antumtikramkatas nu chichamnaka akupkayi. ³¹ Yamaikia ju nungkanam tunau ainia nunaka mash nekamtikiatatjai. Tura ju nungkanmaya apuri Satanásan nepetkatatjai. ³² Wína mantuwartas yakí takuriarantai, mash nungkanmaya ainau wini winiarat tusan nintimtikrartinuitjai, —Jesús timiayi. ³³ Nuna taku ni jakatniurin aints ainaun nekamtikiamiayi. ³⁴ Jesús tamati aints ainau chicharinak:

—Iikia Yus umirkatin chicham aukur: Mesíaska jatsuk tuke pujustinuitai tusar nekaji. Tu aarmau wainiatum ¿waruka ame ‘Yus akupkamuka aints wajas yakí takuntinuitai,’ tame? ¿Nu Yus akupkamuka Mesíaschaukai? Antsu nuchawaitkungka ¿yaachita nusha? —tiarmiayi.

³⁵ Tu tinam Jesús aimiak:

—Atumka teenam pujusairam tusan, wikia Yus akupkamu asan, paaniua nunisnak yamaikia jumchik kinta atumjaingkia pujustatjai. Tura asamtai atumsha Yuse uchiri wajasrum, paaniunam wekainawa nunisrumek paan nintimtursataram. Teenam wekainauka tuning wekaij tusarsha nekainatsui. ³⁶ Wikia paaniunam tuke pujau asamtai, wína aintsur atasrum nekasampita turutiaram, —Jesús timiayi.

Nuna tina we uumak pujusmiayi.

☆ 12:25 (Mat. 10.38-39;16.24-25; Marc. 8.34-35; Luc. 9.23-24;17.33) ☆ 12:32 (Juan 3.14;8.28)

¿Waruka judío ainau Jesúsán nekasampita ticharmiayi?

³⁷ Jesús wainchati takatan timiá untsuri turau waininayat, judío ainau niin nekasampita ticharmiayi. ³⁸ Tura Jesúsán nekasampita ticharu ainau yaanchuik Yuse chichame etserin Isaías naartin aarmia nunaka miatrusarang umirkarmiayi. Nu aarmauka nuwaitai:

“Apuru ¿yaachia ii chichamencha nekasampita turammiaji? ¿Tura ii Apurisha ni kakarmarincha yaná inaktusmiayi?”

³⁹⁻⁴⁰ Tura kichnasha Isaías aarmia nuka nuwaitai:

“Yus nu aints ainaun wainmichua nunisarang nintimrarat tusangka, paanka nintimkrachmiayi. Tura asamtai ni jiijai jiiminayat, wainmichua nunisarang wainmakatkamawar tujintinawai. Tu ainiachkungka paan nekaawarminuitai. Tura nintijai paan nintimsar ni tunaarin inaisaramtaikia, wikia nu aints ainaun uwemtikratnuitjai,” Yus Isaíasan timiayi. ⁴¹ Isaías Jesúsá paaniurin wainkau asa, nuna timiayi.✠

⁴²⁻⁴³ Tu aarmau waininayat, judío ainau untsuri Jesúsán nekasampita tiarmiayi. Antsu judío juuntri ainausha jumchik Jesúsán nekasampita tinayat, Yus wína pengker nintimtursat tuuka nintimtsuk, antsu aints ainauka nekasar pengker nintimtursarat tusar, fariseo ainaun shaminak, iruntai jeanmaya jiirkarai tusar, paanka wikia Jesúsán umirnuitjai ticharmiayi.

Aints ainaun uwemtikratan tawitjai timiauri

⁴⁴ Nunia Jesús kakar chichaak:

—Aints wína nekasampita turutinauka winaka turutinatsui, antsu wína Apaachir wina akuptukmia nunasha tinawai. ⁴⁵ Tura wína waitinauka wína akuptukun waininawa nunisarang winasha waitinawai. ⁴⁶ Wikia paaniunam pujau asan, wína nintimtura nusha ju nungkanam teenam pujusarai tusan tamiajai. ⁴⁷ Wikia aints ainaun wait wajaktinum akupkatasnaka tachamiajai. Antsu aints ainaun uwemtikratan tamiajai. Tura asamtai aints wína chichamrun antukiat umirtachmataisha, wikia nu aintsnaka wiasmamtikiashtinuitjai. ⁴⁸ Antsu aints wína nakittrinak wína chichamrun pachischaruka ningki wakerinak wait wajaktinaka juwinawai. Tura nungka amumatai, wína chichamrun pachischaru asar, wait wajaktiniun jukiartinuitai. ⁴⁹ Wikia wína nintirjaingka chichachuyajai. Antsu wína Apaachirka ningki wína akuptuku asa: Tu chichasta tusa, akatur akuptukmiayi. ⁵⁰ Tura wína Apaachir akatur akuptukmia nunaka aints ainau pujut nangkankashtinun jukiarat tusa akuptukmiayi. Wikia nuna nekau asan, wína Apaachirka akatur akuptak: Tu tita turutmia nunisnak chichaajai, —Jesús timiayi.

13

Jesús ni nuiniatiri ainaun nawen nijarmauri

¹ Pascua fiesta tsawaatsaing, Jesús ni Apaachirin waketkitas, ju nungkan ukuktin kinta jeatak wajasun nuna nekaamiayi. Tura ni aintsri ainautin ju nungkanam tuke ukurmaktin asa, iin nuwik aneenmimiaji nuna nangkamasang inangnamunam ni anengkratairin paan inakturmasmiaji.

²⁻³ Turamtai Satanás Judas Iscarioten, Simónka uchirin: Jesús surukta tusa nintimtikramiayi. Tura Jesús Yusnumia tau asa, yamaikia waketkitatjai tusa, tura ni Apaachirisha Jesúsán: Mash ainia nu inau atatme timiau asa, nunasha mash nekaamiayi. Tura tsaá jeamtai, iruntrar uwijan yuwaartas pujuinai, ⁴ Jesús wajaki wejmakrin aik wangkeas tarachin juki kachumamiayi. ⁵ Tura kiimiatinam yumin yarak, ni nuiniatiri ainautin nawen nijatramar, nunia tarach peaakmaurijai ii nawen mujturmarmiaji.

⁶ Nunia Simón Pedro nawen Jesús nijatratas wakeramaitiat nuka chicharak:

—Apuru ¿ameash wina nawer nijatrurtam? —timiayi.

⁷ Tamati Jesús ayaak:

✠ 12:41 (Isa. 6.9-10; Mat. 13.14-15)

—Ja ai, wi turaja nuka yamaikikia paanka nekarashtatme, antsu ukunam paan nekaratnuitme, —timiayi.

⁸ Tamaitiat Pedro ayaak:

—Apu, ameka wina nawerka pengké nijatrurchatatme, —timiayi.

Tamati Jesús chicharak:

—Wikia nawemin nijarchamtaikia, wijaingkia tsaniasmeka pujuschamnawaitme, —timiayi.

⁹ Tamati ataksha Pedro ayaak:

—Apu, takumka nawersha nijaturam uwejrusha kiiturta, tura muukrusha ma-jetrurta, —timiayi.

¹⁰ Tamaitiat Jesús chicharak:

—Atsa, aints yamai maaingkia, namangkengka pakuichau atinuitai. Tura asam-tai wárikia namangkenka nijamatsuk, aya nawenak nijartinuitai. Atumka yamaikia pakuichawa nunisrumek pujarme. Antsu mashkia pakuichawa nunisrumka pujatsrume, —timiayi.

¹¹ Mashkia pakuichawa nunisrumka pujatsrume, tímia nunaka niin suruktinun nekau asa timiayi.

¹² Tura ni nuiniatiri ainautin nawen nijatramar umis, Jesús ni wejmakrin entsar misanam keemas iin chichartamak:

—¿Wi aitkaja juka waruka aitkawa tusaram nekarmek? ¹³ Wi nekasam atumi Apuri asamtai, atumka winaka nekasrum: Nuikiartinu tura Apuru turutrume. ¹⁴ Tura wikia atumi nuinin ayatnak, tura atumi apuri ayatnak: Mianchawaitjai tusan, atumi nawen nijatkamu asaram, atumsha nunisrumek: Mianchawaitjai tusaram, mai nuwamtak atumi nawe nijatnairataram. ¹⁵ Wikia mianchawaitjai titaram tusan, atumin nekaprakun aitkajrume.☆

¹⁶ Nekasam tajarme: Aintsu inatiri ni inamurinka nangkakashtinuitai. Tura aints akupamu ni akupamurinka nangkakashtinuitai.☆

¹⁷ Ju chichaman wi tajarme nu nekakrumka, tura umirkaram pujakrumka nekasrum warastinuitrume.

¹⁸ Wi atumin mash eaku asan, mash paan nekajrume. Tura asan atum ainautirmin wínaka mashkia umirtukuitrume tusanka tatsujrume. Antsu kichkin pachisan: Wina umirtukchawaitai tajarme. Tura asamtai Yuse chichame aarmawa nunisang nekas umiktinuitai. Nu chichamka nuwaitai: “Wijai yuya nuka wína nemasur wajasi,” tu aarmawaitai.☆ ¹⁹ Nuka turuntsaing yamaik ujaajrume. Tura wi nuna turuna umisamtai, winaka nekasampita turutinuitrume. ²⁰ Nekasam tajarme: Aintsun wi akupaja nunasha nakitsuk anturinauka, winasha nunisarang nakitrutsuk anturtinawai. Tura wína anturtinauka wína akuptukuncha nunisarang anturinawai, —Jesús timiayi.☆

Jesús Judas surutkatatui timiauri

(*Mat. 26.20-25; Marc. 14.17-21; Luc. 22.21-23*)

²¹ Nuna tusa Jesús napchau nintimramiayi. Tura paan chichartamak:

—Nekasam tajarme: Atumniang kichik wína anangkrua surutkatatui, —turammiaji.

²² Turammatai Jesús nuiniatiri ainauti jiiinisar:

—¿Yanak takung taj? tu nintimramiaji. ²³ Tura wikia nekasam ni aneetiri asan, niin ayaamsan yuwakun pujumiajai. ²⁴ Tura asamtai Simón Pedro ni uwejejai inakmas: Iniasta. ¿Yana takung taj? turutmiayi.

²⁵ Turutmatai wikia Jesús iniakun:

—Apu ¿yaachita? —timiajai.

²⁶ Tu iniam Jesús chichartak:

—Jiij pujurtia. Pangkan achikian chupran susatatja nuwaitai, —turutmiayi.

☆ 13:15 (Mat. 20.28; Marc. 10.45; Luc. 22.27) ☆ 13:16 (Mat. 10.24; Luc. 6.40; Juan 15.20) ☆ 13:18 (Sal. 41.9)

☆ 13:20 (Mat. 10.40; Marc. 9.37; Luc. 9.48; 10.16)

Nuna tusa pangkan chupir, Simónka uchirin Judas Iscarioten susamiayi. ²⁷ Tura pangkan susantai, Satanás Judasa nintin engkentuamiayi. Turantai Jesús Judasan chicharak:

—Ame turataj tame nuka yamaik turata, —timiayi.

²⁸ Turantai chikich ainauka nuni iruntrar yuwinak pujuarmia nuka ¿warinak taj? tusarsha nekaacharmiayi. ²⁹ Antsu Judas kuikian wainin asa, kuik chumpitin takaku asantai, chikich nuiniatiri ainau nintiminak: ¿Fiesta kintatin yuta yuumaktatji nuna sumakta tusash taj? tu nintimrarmiayi. Antsu chikich irunu: Nuna turachkusha ¿kuikiartichu irunun kuik susata tusash taj? tu nintimrarmiayi. ³⁰ Tuminamtai Judascha pangkan yuwa umis, tee amanum jiinki wemiayi.

Yamaram chicham umiktin akatramuri

³¹ Judas jiinkiamtai, Jesús iin chichartamak:

—Wi aints ayatun Yus akuptuku asantai, yamaikia Yus winaka pengker awajtustinuitai. Tura wi turatatja nunaka mash nekaawar, mash nungkanmaya ainau Yusen: Ameketme juuntam tiartinitai. ³² Wikia aints ayatun, Yus akupkamu asan, Yusen pengker awajmataikia, Yuscha winasha nunisang pengker awajtustatui. Tura nunaka wári umiktatui. ³³ Uchichir irunutiram, yamaikia nukapka atumjaingkia pujuschatatjai. Atumka wína eatkatatrume. Antsu ii juuntrin timiaja nunisnak yamaikia atumnasha tajarme: Wi wetatja nuningkia winichminuitrume.✠

³⁴ Yamaikia yamaram chicham umiktaram tusan tajarme: Tuke mash aneenitaram. Wi atumin aneemiajrume nunisrumek aneenitaram. ³⁵ Atumka aneenisrum pujakrumningkia, mash aints ainau: Nekasampi Jesús nuiniatiri ainawa tusar nekarmawartinuitai, —Jesús timiayi.✠

Jesús Pedron: Wina natsantrurtatme timiauri
(Mat. 26.31-35; Marc. 14.27-31; Luc. 22.31-34)

³⁶ Tamati Simón Pedro Jesús iniaik:

—Apu ru ¿tua wetatme? —timiayi.

Tu iniam Jesús aimaik:

—Wi wetatja nuningkia yamaikikia winichminuitme. Antsu nukap arusam winingkia winitnuitme, —timiayi. ³⁷ Tamati Pedro ataksha iniaik:

—Apu ru ¿waruka yamaikikia winichminuitme turutme? Wisha amin ayamruktasan jatan wakerajai, —timiayi.

³⁸ Tamati Jesús ayaak:

—¿Nekasmek wína mantuwarat tusamek tam? Nekasan tajame: Atash shinatsaing, ameka wína pachitsam: Nu aints naka wainchawaitjai tusam, kempatam waitrakum uurtuktatme, —timiayi.

14

Wikia jinta tumawaitjai timiauri

¹ Nunia Jesús ataksha ni nuiniatiri ainautin chichartamak:

—Napchau nintimtsuk asataram. Yus nekasampita takurmeka, winasha nekasampita turutaram. ² Wína Apaachir pujamunam atum pujustin nukap angkan awai. Nu nekaschawaitmatikia atumnasha ujakchainjarme. Tura asan atum pujustintrumin umistasan weajai. ³ Tura wi wena atum pujustinun umisan, atumin yaruaktasan ataksha taratnuitjai. Tura wi pujamunam atumsha nuni pujusmintrum tusan tajarme. ⁴ Tura wi weamurka nekarme. Tura jintasha itiur awa tusaram nekarme, —Jesús turammiaji.

⁵ Turammatai Tomás iniaik:

—Apu ru, ame weamuram nekachutisha ¿itiurak jintasha nekaataij? —timiayi.

⁶ Tamati Jesús aimaik:

✠ 13:33 (Juan 7.34) ✠ 13:35 (Juan 15.12, 17; 1.Juan 3.23; 2.Juan 5)

—Wiitjai jintaitjai, tura asan wiitjai nekasainjai. Tura tuke iwiaaku pujau asan, pujutan sukartinnaka wiitjai. Tura asamtai aints ningkikia Apaachirun pengké jeachartinuitai, antsu wijaingkia jeartinuitai.✠

⁷ Atumka wína: Tuniyainme tusaram nekarkurmeka, wína Apaachirsha nekaam-nawaitrume. Tura ni wainkau asaram, yamaikia yaachita nusha tusaram nekarme, —timiayi.

⁸ Tamati Felipe Jesúsan chicharak:

—Apuru, Apaachiram inakmasta. Turakmin ii wainkarkia maaketai titatji, —timiayi.

⁹ Tamati Jesús ayaak:

—Felipea, ¿tuke atumjai pujai waitiatmesha, warí aintsuitme tusamka nekartsumek? Wína waituka wína Apaachirsha wainui. Tura asamtai ¿waruka amesha Apaachiram inakmasta turutme? ¹⁰ Wína Apaachirjai tuke tsaniasan pujajai. Tura nijai tsaniasar pujau asar, iikia kichkia nunisketji. ¿Nuka nekasampita tusamka nintimsumek? Wi taja nunaka wiki nintimsanka tatsujrume. Wína Apaachirka wini pujau asa, ni wakermurin takantikrawai. ¹¹ Wisha wína Apaachirjai tuke tsaniasan pujau asamtai, nunia wína Apaachirsha tuke wijai tsanias pujau asamtai, atumsha nekasampita turuttiam. Antsu wína nekasampitme turuchamin nekapeakrumka, wi takaamursha wainkau asaram, nekasampita tusaram nintimtursataram. ¹² Nekasan tajarme: Wina nekasampi pengké tujinkachuitme tu nintimtursar pujuinauka wi turaja nunasha nunisarang turuwartin ainawai. Tura wikia Apaachirun wetin asamtai, wi turaja nuna nangkamasarang takasartin ainawai. ¹³ Atumka wína nintimtursaram wína naar pachitsaram nekasampita tusaram seatkurminka, aints ainau mash wína Apaachirun: Ameketme juuntam tiarat tusan, nunaka turatatjai. ¹⁴ Atumka wína naar pachisrum: Nekasampita tusaram, waring achat mash wína seatkurminka, wisha nunaka turatatjai, —Jesús timiayi.✠

Yuse Wakani akupkatnun pachis etserkamuri

¹⁵ Nunia Jesús ataksha chichaak:

—Atum wína anenkurmeka wína chichamur umirtuktaram tajarme nuka miatrusrumek umiktaram.✠

¹⁶ Tura wi weakun wína Apaachirun chicharkun: Chikich atumin yainmaktinun wiya tumaun akupturmakat tusan seatatjai. Tura wi seam, chikich atumin yainmaktinun atumjai tuke pujusat tusa akupturmaktatrum. ¹⁷ Nuka Yuse Wakanintai. Nekas aa nuna nekamtikiartin aa nuwaitai. Wína umirtukcharu ainauka nunaka wainchau asar, tura tuniyainta tusar nekachu asar jukichmin ainawai. Antsu atumjai pujau asamtai, tuniyainta tusaram nekarme. Tura niisha atumi nintin engkemau asa, tuke atumjai pujustinuitai.

¹⁸ “Atum mitaikia nunisrumek pujustaram tusanka, atumin japanka ukukchatatjarme. Antsu waketrusnak ataksha taritnuitjarme. ¹⁹ Jumchik arusar wína umirtukcharu ainauka winaka waitkachartinuitai. Antsu atumka winaka waitkatnuitrume. Wi tuke pujau asamtai, atumsha nunisrumek tuke pujustinuitrume. ²⁰ Yuse Wakani atumin tarutramiamtai, wisha wina Apaachirjai tsaniasan pujusan, atumsha wijai tsaniasrum pujau asaram, wi atumjai pujamuka paan nekaatnuitrume. ²¹ Aints wína anentuka wína umirtuktin chichamrun nekau asa miatrusang umiawai. Tura asamtai wína Apaachirsha wína anentak pujuinaunka aneawai. Wisha nunisnak wína anentunka anejai. Tura asan paan nekarawarat tusan wantinkatnuitjai,” Jesús timiayi.

²² Tamati chikich Judas, Iscariotechu amia nu iniak:

—Apuru ¿warukaya amin umirtamtsuk pujuinausha wantintutskesha, iinkesha wantinkatmek? —timiayi.

²³ Tu iniam Jesús chicharak:

—Wína anentuka wi taja nuna umirtuktinuitai. Turamtai wína Apaachirsha nu aintsnaka aneetnuitai. Tura iijai tuke tsanias pujau asamtai, iisha nu aintsu nintin

✠ 14:6 (Mat. 11.27-28; Juan 6.46; Hech. 4.12)

✠ 14:14 (Mat. 7.7-11; Luc. 11.9-13; Juan 15.7,16;16.23-24; 1Juan

3.21-22;5.14-15) ✠ 14:15 (1Juan 5.3)

engkemtuar, nijai tsaniasar pujustinuitji. ²⁴ Antsu wína anenchauka wi taja nunaka umiatsui. Atum chicham antu wearme nuka winaruchuitai, antsu wína Apaachir wína akuptukmia nuna chichamentai.✠

²⁵ “Wi atumjai tuke pujau asan, nunaka ujaajrume. ²⁶ Antsu wi weamtai, wína Apaachirka atumin yainmaktas ni Wakanin akupturmaktin asamtai, nu nekas Pengker Wakankia wi taja nuna warina takua tawa tusa mash nekamtikramatnuitrume, tura wi etserkamiaja nunasha mash atumin nintimtikramratnuitrume.

²⁷ “Yamaikia pengker nintimsaram angkan pujustaram. Wi pengker nintimsan angkan pujaja nunisrumek pujustaram tusan akatran ukuajrume. Ju nungkanmaya ainau nangkamiar: Angkan pujaji tinawa nunisrumek pujustaram tusanka tatsujrume. Antsu napchau nintimsaram pujusairap. Tura shamtsuk asataram tusan tajarme. ²⁸ Wikia atumin chicharkun: Wikia Apaachirun wena, ataksha waketsanak atumjai tuke pujustasan taratnuitjai timiaja nuka antukmarume. Wína Apaachirka wína nekas nangatuku asamtai, nekasrum wína anenkurmeka, wína Apaachirun weajai tamau antuku asaram nekasrum warastinuitrume. ²⁹ Wikia wetsuk nuná eemkan yamaik ujaajrume. Tura wi weamtai, nekasampita turutmintrum tusan nunaka tajarme.

³⁰ “Ju nungkanmaya inakratin wináu asamtai, atumjaingkia nukapka chichasnaka pujuschatatjai. Antsu nuka wína inatratatkama pengké tujintrawai. ³¹ Antsu wína Apaachirun anejai, tura wína akuptukmia nunaka miatrusnak umirmaurun ju nungkanmaya ainau mash nekaawarti tusan, wína Apaachir turutmia nunaka mash umiajai. Yamaikia wajaktiaram. Juniangka jiinkir wearmi,” Jesús iin turammiaji.

15

Numi araamua tumawaitjai timiauri

¹ Nunia ataksha nuikiartamujai Jesús iin chichartamak:

—Wikia nekas numi araamua tumawaitjai. Tura wína Apaachirka nu numi araamun wainua tumawaitai. ² Antsu wína aintsur ainautiram numi kanawea tumawaitrume. Tura aints wína Apaachiru wakeramurin umirkachu ainauka numi kanawe nerechua tumau ainawai. Numi araamu nereachmataikia, numi kanawen met charukar japin armayi. Tura chikich kanawe nereunaka nuna nangkamasang nukap nerekat tusar nasuin armayi. Numi kanawe pengker nereu ainauka wina chichamrun umirtukarua nunisarang ainawai. ³ Atumka wína chichamur umirtuku asaram, pakuichawa nunisrumek ainiarume. ⁴ Numi kanawe sankauka niisha tepeska nerechamawaitai. Atumsha nunisrumek wína nintimurtsuk pujakrumka, nekasrum pengker aa nuka turachminuitrume.

Tura asaram wi atumjai tsaniasan pujau asamtai, atumsha nunisrumek tuke wijai tsaniasrum pujustaram.

⁵ “Wikia nekas numi araamua tumawaitjai. Tura atumka numi kanawea tumawaitrume. Numi kanawe ni numirin achitkawa nunisrumek wini achitkau ataram. Turakrumka numi kanawe nukap nerekuwa nunisrumek atinuitrume. Antsu wijainchuka pengker aa nuka turatatkamaram pengké tujintarme. ⁶ Aints wína japruwar ukurkiaramtaikia, numi kanawen japinawa nunisnak japatnuitjai. Numi kanawe japam kukartinitai. Tura kukaramtai aints ainau nuna mash irumrar jijai keemin armayi.

⁷ “Atumka wini tuke pujakrumka, tura wína chichamur tuke kajinmatsuk nintimtakrumka, waring achat seatkurminka, Yus nunaka suramsatnuitrume. ⁸ Atumka Yus wakera nunisrumek pujakrumka, wína Apaachirsha nekasrum pengker awajsatnuitrume. Tura asakrumin chikich ainau atumin waitmakar: Nekasar Jesúsua nuiniatirintai tusar nekarmawartinuitai. ⁹ Wína Apaachir wína anentua nunisnak wisha atumnasha anejrume. Tuke wína aneetir ataram. ¹⁰ Wína Apaachiru chichamen tuke umiru asan, tuke ni aneetirinjai. Atumsha nunisrumek wína umirtuktin chicham tuke umirtakrumka, wína aneetiruitrume.

✠ 14:24 (2.Juan 6)

¹¹ “Wi waraaja nunisrumek atumsha warastaram tusan, atumin tuke waramtiksatasan wakerajrume. Tura asan ju chichaman ujaajrume. ¹² Wina chichamur umirtuktaram tajarme nuka nuwaitai: Wi atumin aneajrume nunisrumek aneenitaram.”[☆]

¹³ “Aints ni amikrin nekas aneak, ayamruktaj tusa jakatas wakerawai. Nuna nangka-masang aneenitka pengké atsawai. ¹⁴ Atumka wina chichamur miatrusrumek umir-takrumka, nekasrum wina amikruitrume. ¹⁵ Aints ni inamuri turamunka nekatsui. Tura asamtai wina inatiruitrume tatsujrume. Antsu wina Apaachir turutmiaun mash atumin ujaku asan, wina amikruitrume tajarme. ¹⁶ Atumek nintimsarmeka wina aintsruka wajaschamiarume. Antsu atumin: Wina aintsur ataram tusan eakmiajrume. Tura atum numi nerekuwa nunisrumek wina takatur takastaram tusan akupkamiajrume. Tura asan atumi turamuringkia tuke nangkankashti tusan akupkamiajrume. Tura atumka wina aintsur asaram, wina naar pachittsaram wina Apaachir seamka mash suramsatnuitrume.”[☆]

¹⁷ “Wina chichamur umirtuktaram tajarme nuka nuwaitai: Tuke aneenisrum pujus-taram,” Jesús turammiaji.”[☆]

Atumnasha nakitramrartinuitai timiauri

¹⁸ Nunia Jesús ataksha iin chichartamak:

—Ju nungkanmaya ainau atumin nakitraminamtaikia, wina pachittsaram: Nunasha nakitraru asar, iincha nakitraminaji tusaram nintimrataram. ¹⁹ Atumsha ju nungkan-maya ainawa nunisrumek nintimsaram pujakrumningkia, junia aints atumin anenmi-araintai. Antsu ju nungkanmaya arumning, wina aintsur ataram tusan, wi atumin eakmau asaram, yamaikia ju nungkanmayanchuitrume. Tura asakrumin junia aints ainau atumin nakitraminawai.”[☆]

²⁰ “Aintsu inatiri ni inamurinka nangkashtinuitai timiaja nuka aneaku ataram. Aints ainau wina nakittrinak pasé awajtusaru asar, atumnasha nunisarang pasé awajtamsart-inuitai. Tura chikich aints wina chichamrun umirtukaru asar, atumi chichamencha nunisarang umirtamkartinuitai.”[☆]

²¹ “Wina akuptuku yaachita tusar nekainachu asar, atumin wina aintsur asakrumin pasé awajtamsartinuitai. ²² Wi ju nungkanam tau asan, junia aints ainaun wina chichamrun ujakchamuitkungka, ni tunaarinka nekarachminuyayi. Antsu ujakmau asar: Nekachkun tunau turinuyajai, pengké tichartin ainawai. ²³ Wina nakitrinauka wina Apaachirnasha nakitinawai. ²⁴ Aints ainau wainminamunam wainchati takatan wi chikich aints ainau tujintinaun wainiatun unturi turinuyajai. Nuna turachmataikia, niin wiasmamtikiashtinuitjai. Antsu wi wainchati takatan turamun wainkariat wina nakittrin asar, wina Apaachirnasha nunisarang nakitin ainawai. ²⁵ Nu turunatnunka pachis Yuse chichame tu aarmawaitai: ‘Nangkamiar wina kajertukarmiayi.’ Nu aarmauka ii umirkatin chichamaitai tiarmia nunaka miatrusarang umikiarmiayi.”[☆]

²⁶ “Tura wi wena atumin yainmaktinun wina Apaachirun puja nuna akuptuktatjarme. Nuka Yuse Wakanintai. Nekas aa nuna nekamtikiartinka nuwaitai. Nuka Yusnumia taa, wina pachitas aints ainaun nintimtikratnuitai. ²⁷ Atumsha nu nangkamtaik wijai pujau asaram, wina naar pachisrum aints ainau nekamtikiatnuitrume.

16

¹ “Atumka wina chichamur umirat inaisairap tusan, ju chichaman ujaajrume. ² Ukunam iruntai jeanam wayaakrumin, winar asakrumin jiirmakiartinuitai. Tura aints ainau atumin mantaminak Yusen pengker awajsatasan aitikajai turamiartinuitai. ³ Nu aints ainau winasha tura wina Apaachirnasha nekainachu asar turutmawartinuitai. ⁴ Nu turunatin kinta jeamtai, wi taja nu nintimrataram tusan, ju chichaman ujaajrume,” Jesús turammiaji.

☆ 15:12 (Juan 13.34;15.17; 1.Juan 3.23; 2.Juan 5) ☆ 15:16 (Mat. 7.7-11; Juan 14.13-14;16.23-24) ☆ 15:17 (2.Juan 5) ☆ 15:19 (Juan 17.14) ☆ 15:20 (Mat. 10.24-25; Luc. 6.40; Juan 13.16) ☆ 15:25 (Sal. 35.19)

Yuse Wakani turatnun pachis etserkamu

Nunia Jesús ataksha chichartamak:

“Yaanchuikia atumjai tuke pujau asan, nunaka ujakchamiajrume. ⁵ Antsu yamaikia wena, wína akuptukmia nujai pujustasan waketjai. Turai waitiatrumek kichkitirmesha ¿tuwa weame? tusarmeka inintsurme. ⁶ Tura wi nuna tinu asamtai, atumka wake mesekurme. ⁷ Antsu wikia nekasan tajarme: Wi waketkiamtai, atumka nekasrum timiá pengker pujustinuitrume. Wi waketchamtaikia, atumin yainmakartinka tarutmichaintrume. ⁸ Wi Yuse Wakanin akupkamtai, ni taa ju nungkanmaya ainau tunaarin pachis nekamtikiatnuitai. Tura Yuse wakeramurinha nekamtikiatnuitai. Tura Yus tunaarintin ainaun wait wajaktiniun susatnuncha nekamtikiatnuitai. ⁹ Tunaarintin ainau wína nekasampita turutinachu asar tunau ainawai. ¹⁰ Tura wína Apaachirun waketkin asamtai, atumka winaka waitkashtinuitrume. Tura asakrumin itiur Yuse wakeramurin najanatnuitrume tusa, Yuse Wakani atumin nekamtikramatnuitrume. ¹¹ Tura ju nungkanmaya ainaun inau tuke wait wajaktinnum wetin asamtai, tunau ainau Yus wait wajaktiniun susatniun pachisar nekaawartinuitai.

¹² “Atumin nukap ujakmin ayatun, atumka yamaikikia warina takua tawa tusaram nekaachminuitrume. ¹³ Tura Yuse Wakani nekas chicham aa nuna nekamtikiartin taa, nekas aa nunaka mash atumin nuitamratnuitrume. Antsu ningki nintimsangka nunaka turashtinuitai. Antsu wína Apaachiru chichamen antukmaun nunak titinuitai. Tura ukunam atiniun pachis atumin ujatmaktinuitrume. ¹⁴ Nuka wína pachitas atumin ujatmaktin asa, wína nekas pengker awajtustinuitai. ¹⁵ Wína Apaachirnau aa nuka mash winaruitai. Tura asamtai Yuse Wakani wína pachitas atumnaka ujatmaktinuitrume tusan tajarme.

¹⁶ “Wikia wina Apaachirun wetin asamtai, jumchik arusrumka winaka waitkashtatrume. Nuniangka ukunam jumchik arusrum winaka ataksha waitkatatrume,” Jesús iin turammiaji.

Wake mesekrum pujayatrume kunam warastinuitrume timiauri

¹⁷ Jesús turammatai ni nuiniatiri ainauti mai nuwamtak chicharnaiyakur:

—¿Ju chichamsha warimpita? Wína Apaachirun wetin asamtai, jumchik arusrumka winaka waitkashtatrume. Nunia ukunam jumchik arusrum ataksha waitkatatrume ta nusha ¿warukang tawa? ¹⁸ Jumchik arusrum ta nunasha warina takua tawa tusarkia antatsji, —tunaimiaji.

¹⁹ Jesús iniasmi tunaiyakrin, nuna nekaa iin chichartamak:

—Wi atumin chicharkun: ¿Jumchik arusrumka winaka waitkashtatrume, nunia ataksha jumchik arusrum winaka waitkatatrume tajarme nu pachisrumek inintsasarum wakeraram? ²⁰ Nekasan tajarme: Ju nungkanmaya ainau warasartatui. Antsu atumka wake mesekrum pujusrum juutiatrume. Atumka wake mesekrum pujayatrume, ukunmaka warastinuitrume. ²¹ Nintimratarum: Nuwa jurertin kintari jeamtai, jatema wait waja pujuuyi. Tura uchin wainak waraak, wait wajakmaurinka kajinmini. ²² Atumsha nunisrumek yamaikikia wake mesekrum pujarme. Turayatrum ataksha wi wantinkamtai, wína waitkaram, atumi nintijai nukap warastinuitrume. Nu waraamuka tuke nangkankashtinuitai.

²³ “Nu kintatikia winaka pengké kichkisha inintsashtinuitrume. Antsu nekasan tajarme: Wína naar pachisrum wína Apaachir seakrumningkia mash suramsatnuitrume. ²⁴ Yamaisha wína naar pachisrumka wína Apaachirsha pengké seaatsrume. Antsu yamai nangkamsaram seataram. Atum seakrumningkia, niisha nukap warastaram tusa atumin waramtikramsatnuitrume,” Jesús turammiaji.✠

Jesucristo tuke nepetminuitai

²⁵ Nunia ataksha Jesús iin chichartamak:

✠ 16:24 (Mat. 7.7-11; Juan 14.13-14;15.7,16)

—Wikia atumin chichaman ujaaknaka, tuke nuikiartutai chichamjai ujayajrume. Antsu kinta jeamtai, nuikiartutai chichamjaingkia ukunmaka ujakchatnuitjarme. Antsu wina Apaachirun pachisan paan ujaktinuitjarme. ²⁶⁻²⁷ Nu kinta jeamtai, atumka wina anentu asaram, wina pachitsaram: Nekasampi iin anenmau asa, ni Apaachirinia jiinki iin tarutramji, tu nintimsaram pujau asakrumin, wina Apaachirka atumin anenmawai. Tura atumin anenmau asamtai, wikia atumin pachisan wina Apaachirun seatinuitjarme tatsujrume, antsu atumka wina naar pachisrum wina Apaachir seatnuitrume. ²⁸ Wikia wina Apaachirnia jiinkin, ju nungkanam taawitjai. Tura yamaikia ju nungkan ukukin, ataksha Apaachir pujamunam waketjai, —turammiaji.

²⁹ Turammatai ni nuiniatiri ainauti Jesús chicharkur:

—Yamaikia nuikiartutai chichamka ujakratsuk, nekasam paan etseru weame. ³⁰ Ameka mash nekawaitme. Tura aints amin ininmatsaing, pengker aimiat nekawaitme. Tura asakmin nekasampi Yus akupkamuitme taji, —timiaji.

³¹ Tu tinu asakrin Jesús iin chichartamak:

—¿Nekasrum yamaikia Yus akupkamuitme turutrumek? ³² Antsu wikia tajarme: Nu kinta jeatutai timiaja nuka yamaikia tsawaatnak wajasi. Tura asamtai atumka mash wina ukurkiram kanartatrume. Antsu wina Apaachirka wijai pujau asamtai, wikikia juwakchatatjai. ³³ Tura asamtai wina nintimtursaram angka pengker pujusmintrum tusan, nunasha tajarme. Ju nungkanam pujakrumka wait wajaktinuitrume. Antsu wi ju nungkanam aa nuna mash nepetkau asamtai, atumsha napchauka nintimsuk pujustaram, —Jesús turammiaji. ☆

17

Jesús ni nuiniatiri ainaun pachis Yusen seamuri

¹ Nunia Jesús chichas umis, nayaimpinmanini pangkai jiimias Yusen seak:

“Apaachiru, yamaikia wina kintarka jeayi.

Tura asamtai ami uchiram asan,
ami kakarmarmin inakmastasan wakerau asamtai,
amesha kakarmaram inakmasta.

² “Tura wina aintsur ame surusume nuka
pujut nangkankashtinun jukiarat tusam,
ameka mash aints inarta tusam,
kakarmaram surusuitme.

³ “Apaachiru, ameketme Yusem.

Chikich Yuska pengké atsawai.

Tura asamtai aints ainu aminak:

Ameketme Yusem tusar, tura winasha: Jesucristoka Yus akupkamuitai turutinau asar,
pujut nangkankashtinun jukiartin ainawai. ☆

⁴ “Wikia ju nungkanam pujusan,
ame turata turutmiamenunaka mash umikuitjai.
Tura asan amin pengker awajnuyajme.

⁵ “Tura asamtai Apaachiru,
yaanchuik nungka najanchamning wi amijai pujamtai,
pengker awajtinuyame nunismek yamaisha pengker awajtusta.

⁶ “Ame ju nungkanmaya ainu
wina surusmiamenunaka
ami naarmin pachisan
tenapkesan nekamtikiamu asar
aminu ainawai. Tura aminu asaramtai
aminu aarti tusam surusuitme.
Turamu asar ami chichamin umirtamin ainawai.

7-8 “Ame wína chichamur etserkata tusam akuptukmiame nunaka miatrusnak umikuitjai.

Tura asamtai jusha wína chichamrun antukar jukiarmiayi.

Tura asar nekasampi Yus akupkamuitme tinawai.

Tura wína chichamrun nekas aminuitai tusar nekainawai. Tuminau asar, ame surusmau ainauka mash ninu ainiaji tusar nekainawai.

⁹ “Aminu asaramtai, juna pachisan seatjame.

Ju nungkanmaya ainau aminuchu asaramtai, nuna pachisnaka seatsjame. Antsu wína surusmiame juka aminu asaramtai, juna pachisan seatjame.

¹⁰ “Mash aminu aa nuka winaruitai.

Tura asamtai wína aintsur ainauka aminu ainawai.

Tura asar winaka: Ameketme juuntam tusar pengker awajtinawai.

¹¹ “Wikia yamaikia amin winitin asan, ju nungkanmaka pujuschatatjai. Antsu ju ainauka juni tuke juwakartatui.

Tura asamtai Apaachiru, nekas pengker asam, wisha amijai kichik ajina nunisrik, jusha mash iruntrar kichkia nunisarang arti tusan, ami kakarmarmijai ame surusmau ainauka wainkata.

¹² “Wikia ju nungkanam pujusan,

wína aintsur ainaunka ame surusmiame junaka ami kakarmarmijai mash pengker wainuyajai.

Tura asan, kichkisha mengkakchajai.

Antsu ami chichamim yaanchuik aarmau aa nuna umiktas, kichik aints tuke mengkakatin asa, ningki wakerak mengkakawaitai. ✠

¹³ “Yamaikia ame pujamunam winitatjai.

Tura juni pujusan wi waraaja nunisarang wína aintsur ainausha warasarti tusan seajme.

¹⁴ “Wína aintsur ainaun

ami chichamin ujayajai. Wikia ju nungkanmayanchuitjai.

Tura jusha nunisarang ju nungkanmayanchu asaramtai, ju nungkanmaya pasé aints ainau junaka nakitin ainawai. ✠

¹⁵ “Tura wainiatnak

yamaikia ju nungkanmaya jiikiarta tusanka seatsjame.

Antsu Satanás ju aints ainau nepetkai tusam, ayamrukta tusan seajme.

¹⁶ “Wisha ju nungkanam

tuke pujuschatin asamtai, jusha nunisarang ju nungkanmaka tuke pujuschartin ainawai.

¹⁷ “Ami chichamim nekas aa nujai ami aintsrum pengker awajsata.

Ame chichameka nekasaintai.

¹⁸ “Ame junia aints ainamunam

wína akuptukmiame nunisnak

wisha junia aints ainamunam

✠ 17:12 (Juan 13.18) ✠ 17:14 (Juan 15.18-19)

niincha akupinajai.

¹⁹“Aminu aintsrum asar,
tuke inaitsuk ami wakeramurmin najanawarti tusan,
nu aints ainauncha pengker awajsatasan
ami wakeramurmin tuke najanin ajai.

²⁰“Juni wijai iruntrar pujuina
nunak pachisnaka seatsjame.
Antsu ukunam ju aints ainau chichamen antukar:
Wína nekasampita turutiartin ainaun
nunasha pachisan amin seajme.

²¹“Ameka Apaachiru wína pujurtame.
Tura wisha amin pujaja nunisarang niisha iijai pujusarti tusan seajme.
Tura mash iruntrar kichkia nunisarang nintimsar pujuinamtai,
ju nungkanmaya ainau nuna wainkar,
nekasar wína pachitsar:
Nekasampi Yus akupkamuita
turutiarat tusan seajme.

²²“Ame wijai kichkia nunisrik pujaji nunisarang niisha pujusarti tusam,
wína pengker awajtusume. Tura asakmin wisha nunisnak
niincha pengker awajinajai.

²³“Amesha wini pujurtakmin,
wisha ni nintin engkemau asamtai,
pengké kichkia nunisarang pujusarti tusan seajme.
Tura tu pujuinamtai,
ju nungkanmaya ainau
nuna wainkar wína pachitsar:
Nekasampi Yus akupkamuita tusar nekaawarti.
Tura amin pachitmasar:
Ni Uchirin aneawa nunisang
ni aintsri ainauncha aneawai
tusar nekarawarti tusan seajme.

²⁴“Apaachiru, ameka nungkaka najantsuk winaka tuke anentin asam,
aints wína surusmiamé nuka
mash wainkata turutin asakmin,
wína kakarmarsha ame surusmiamé nunaka
niisha wainkarti tusan wakerajai.

²⁵“Apaachiru, nekasam pengkeraitme.
Ju nungkanmaya ainauka
amin nekarminachu wainiatnak
wikia wainjame. Tura ame wína surusmiamé nusha
mash wína pachitsar: Ameka Yus akupkamuitme tusar nekarinawai.

²⁶“Wikia ni nintin pujamtai,
ameka tuke wína anenme nunisarang niisha aneniarti tusan,
wína aintsur ainaun
ami naarmin pachisan nekamtiknuyaja nunaka tuke nekamtikiatataj,”
Jesús Yusen seak timiayi.

18

Jesús an achikmauri

(Mat. 26.47-56; Marc. 14.43-50; Luc. 22.47-53)

¹ Nunia Yusen sea umis, Jesús ni nuiniatiri ainautijai entsawach Cedrón tutai kat-
ingkiar, numi arakmaunum wemiaji. ² Jesús iijai tuke nuni iruntrau asamtai, Judascha
niin suruktas wakerau asa, nu numi arakmaunaka nuwaapita tusa nekauyayi. ³ Tura

asamtai Judas sacerdote juuntri ainaun, tura fariseo ainauncha ujaak: Suntarum tsangkatruktaram tamati, niisha suntar ainaun, tura Yus seatai juun jea wainin ainauncha Judasjai wearti tusar akupkarmiayi. Turinamtai nangkijai, tura saapijai, tura namparingjai, tura kantiinasha takusar, Jesúsán achikiartas tariarmiayi. ⁴ Turinamtai Jesúska ukunam atiniun mash nekayat, numi arakmaunumia jiintuki:

—¿Yaachia earme? —timiayi.

⁵ Tu iniam aiminak:

—Nazaretnumia aints Jesús eaji, —tiarmiayi.

Tinamtai Jesús:

—Wiitjai, —timiayi.

Judascha Jesúsán suruktin asa, suntarnum pachinak wajamiayi. ⁶ Jesús: Wiitjai tamati, shaminak waketskamawar nungkanam ayaararmiayi. ⁷ Tuminamtai Jesús ataksha iniak:

—¿Yaachia earme? —timiayi.

Tu iniam ataksha aiminak:

—Nazaretnumia Jesús eaji, —tiarmiayi.

⁸ Tu tinam Jesús chichaak:

—Yanchuk wiitjai tajarme. Wína achirkatasrum eatkurmeka, ju aints wijai wajainauka wearat tusaram akupkataram, —timiayi.

⁹ Jesús nuna tusa, ni Apaachirin nuwik seak: “Aints wína surusmiamé nunaka kichkisha mengkakchajai,” tímia nuna umiktas timiayi. ¹⁰ Tamati nunia Simón Pedro saapin takaku asa, saapin engketirinia kuinak sacerdote juuntri inatiri kuwishin untsurinini met charutkamiayi. Nu aintsu naaringkia Malcoyayi. ¹¹ Turamtai Jesús Pedron chicharak:

—Saapiram engketirin engkeata. ¿Wína Apaachirka wait wajaktatme turutmia nunisnak wait wajakchatnukitaj? —timiayi.

Sacerdote apuri jeen jukimuri

(Mat. 26.57-58; Marc. 14.53-54; Luc. 22.54)

¹² Tamati suntar ainu ni apurijai, tura Yus seatai wainin ainaujai irunturar Jesúsán achikiar jingkiawarmiayi. ¹³ Nunia Anása jeen jukiarmiayi. Anáska Caifása juuntri ayayi. Tura Caifás nu musachtin sacerdote apuri ayayi. ¹⁴ Nu Caifáska yaanchuik judío ainaun chicharak: “Aints mash jakarai tusar ¿kichik aintsuk maatin pengkerchaukai?” tímia nuka nuwaitai.✠

Pedro waitruamuri

(Mat. 26.69-70; Marc. 14.66-68; Luc. 22.55-57)

¹⁵ Jesúsán jukiaramtai, Simón Pedro chikich nuiniatirijai: Jiitai tusar weriarmiayi. Tura apu jeen jear, chikich nuiniatiri sacerdote apuri waintai asa, Jesúsán apu jeen wayaamiayi. ¹⁶ Tura wayaamtai Pedro anum juwakmiayi. Turamtai nu Jesúsá nuiniatiri nuwa waiitin wainin wajamia nuna Pedron pachis aujak:

—Jusha wayaati, —tamati nuwa: Ayu tusa Pedron wejaamiayi. ¹⁷ Pedro wayaamtai, nu nuwachikia waiitin wainin asa, Pedron chicharak:

—¿Amesha Jesúsá nuiniatirinchukitam? —tu iniam Pedro aimiak:

—Atsa, wichawaitjai, —waitrak timiayi.

¹⁸ Nuna tusa ukuki, micha asamtai, sacerdote apuri inatiri irunu, tura Yus seatai jean wainin irunusha jin keemakar jinam ayaamsar wajasarmiayi. Tuminamtai Pedrosá nuni pachinak anumak wajasmiayi.

Sacerdote apuri Jesúsán iniasmauri

(Mat. 26.59-66; Marc. 14.55-64; Luc. 22.66-71)

¹⁹ Nuna turinai sacerdote apuri Jesúsán iniak:

—¿Ami nuiniatirmesha ya ainia? ¿Tura warimpia ami nuiniatirmesha nuininuyame? —timiayi. ²⁰ Tu iniam Jesús aimiak:

✠ 18:14 (Juan 11.49-53)

—Wikia mash aints antinamunam chichauyajai. Iruntai jeanmasha tura Yus seatai juun jeanmasha, tura judío mash iruntramunmasha aints ainaun tuke nuininuyajai. Antsu uuknaka chichachuyajai. ²¹ ¿Waruka winasha inintrume? Winaka inintsuk wína chichamrun antukaru ainu iniasta. Nuka wi chichakmaunka nekawaru asar ujatmakartatui, —timiayi.

²² Tamati Yus seatai wainin kichik nuni wajau Jesús a yapiin paat awati:

—¿Warukaya sacerdote apurisha tuusha chicharme? —timiayi. ²³ Tamati Jesús ayaak:

—¿Tuna wi napchaunasha chichaaja? Tura wi taja nuka pengker wainiatmesha ¿waruka awattame? —timiayi.

²⁴ Tamati nunia Anás: “Ju aints jingkiataram,” tusa Jesús an sacerdote apuri Caifás naartinum akupkamiayi.

Pedro ataksha waitruamuri

(*Mat. 26.71-75; Marc. 14.69-72; Luc. 22.58-62*)

²⁵ Anása jeen Jesús an iniinak pujuinai, Pedro aanum jin ayamak wajamiayi. Nuni wajamtai, aints ainu iniinak:

—¿Amesha Jesús a nuiniatirin chukitam? —tiarmiayi.

Tu tinamaitiat Pedro ayaak:

—Atsa, wichawaitjai, —timiayi.

²⁶ Tamati sacerdote apuri chikich inatiri Malco naartinun Pedro kuwishin charutkama nuna weari Pedron chicharak:

—¿Numi arakmanum aujai wajamin wi wainkachmakjam? —timiayi.

²⁷ Tu iniamaitiat Pedro ataksha waitrak:

—Atsa, —tamati atash shinimiayi.

Pilato Jesús an iniasmauri

(*Mat. 27.1-2, 11-14; Marc. 15.1-5; Luc. 23.1-5*)

²⁸ Nunia Caifása jeenia Jesús an jukiar romano apuri chicham nekatai jeanam jeeniarmiayi. Yamai tsawaarai jeeniarai: iikia judío asar, judío chu jeen wayaarkia, Pascua fiestati yuwinamunmak iikia yuwachminuitji, tu nintimrar, romano apuri jeen wayaacharmiayi. ²⁹ Tuminau asaramtai, Pilato nu aints ainu aujai chichastas jiinki iniak:

—¿Ju ainsa warí tunaana turini? ¿Atumsha warintrume? —timiayi.

³⁰ Tu iniam aiminak:

—Ju aintska tunau turichuitmataikia, iikia aminka itachminuitji, —tiarmiayi.

³¹ Tinamtai Pilato chicharak:

—Atumek ju aintska jukiram, atumi juuntri chichamen umirkuram, ni tunaari nekarataram, —tamati judío juuntri aiminak:

—Antsu judío ainautikia aints kichkisha maachminuitji. Romano ainautiram ii apuri asaram, nuka pe surimu wearne, —tiarmiayi.

³² Jesús yaanchuik chichaak: Tu mantuatin ainawai tinu asamtai, ni timiaurin miatrusarang umikiarmiayi. ☆

³³ Judío juuntri tinamtai, Pilatoka ataksha chicham nekatai jeanam waya, Jesús cha wayaati tusa untsukmiayi. Tura Jesús wayaamtai iniak:

—¿Nekasmek judío ainu apurintam? —timiayi.

³⁴ Tu iniam Jesús ayaak:

—¿Amek nintimsamek inintam? ¿Turachkumka chikich aints wína pachitsar ujatmakaramtaik winaka turutam? —timiayi.

³⁵ Tamati Pilato ayaak:

¿Wikia judíokitaj? Ami aintsrum ainu sacerdote juuntri ainu aujai aminka juningkia itarmiari. ¿Warí tunaawa turamame? —timiayi.

³⁶ Tu iniam Jesús aimiak:

—Wikia ju nungkanmaya ainu ni inatirin inawa nunisnaka inatsjai. Wikia ju nungkanmaya ainawa nunisnak wína nuiniatirun ínamtaikia, nuka maanikiartinuitai.

☆ 18:32 (Juan 3.14;12.32)

Turamtaikia judío juuntri ainauka winaka achirkacharaintai. Antsu wi inamuka juni-anchuitai, —timiayi.

³⁷ Tamati Pilato iniak:

—Takunka ¿nekasmek apuitam? —timiayi.

Tu iniam Jesús aimiak:

—Ja ai, ame tame nuka nekasam tame. Wiitjai apu. Ju nungkanam akiinaw asan, chicham nekas aa nuna etserkatasan juningkia taawitjai. Tura asamtai chicham nekas aa nuna umirinawka wi taja nuna mash antinawai, —timiayi.

³⁸ Tamati Pilato chicharak:

—¿Nekas chichamsha warimpita? —timiayi.

Jesús jakati timiauri

(*Mat. 27.15-31; Marc. 15.6-20; Luc. 23.13-25*)

Nuna tusa ukuak, Pilato ataksha judío ainaujai chichastas jeanmaya jiinki chicharak:

—Ju aintsu tunaarinka kichkisha nekarachjai. ³⁹ Antsu Pascua fiesta jeamtai, atum wína seatkurmin kichik achikmaun jiikin akupnuyajai. ¿Yamaikia itiurkatjak? ¿Ju judío ainautirmin apurinash jiikin akupkataj? —timiayi.

⁴⁰ Tu iniamaitiat aints ainaw untsuminak:

—Atsa. Juka akupkaip. Antsu Barrabás jiikim akupkata, —tiarmiayi.

Nu Barrabáska kasa aintsuyayi.

19

¹ Tu tinam Pilato suntar ainaun Jesúsán katsumkarat tusa jeanmayan jiiki akupkamiayi. ² Turamantai suntar ainaw tsengkrutin jangkin najatawar tsengkrumtikiarmiayi. Nunia apu wejmakrin kapantakun antsrarmiayi. ³ Nunia kichik kichik Jesús wajamunam weriar chicharinak:

—Judío Apuria, pengker pujusta, —tuser yapiin awatiarmiayi.

⁴ Turinamantai Pilato ataksha jiinki aints ainaun chicharak:

—Jiistaram. Wikia au aintsu tunaarinka kichkisha nekarachjai. Nu nekaataram tusan, ataksha jiiktajai, —timiayi.

⁵ Tamati Jesús jangkin tsengkruk, tura wejmak kapantakun entsar jiinkimiayi. Tura jiinkiamtai Pilato aints ainaun chicharak:

—Ju aintska jiistaram, —timiayi.

⁶ Jesús jiinkiamtai, sacerdote juuntri ainaw, tura Yus seatai jean wainin ainausha Jesúsán jiisar kakarar chicharinak:

—Numi ajintruam maata, —tiarmiayi.

Tu tinamantai Pilato chicharak:

—Atumek jukiram numinam ajinkaram maataram. Wikia ju aintsu tunaarinka pengké nekarachjai, —timiayi.

⁷ Tamati judío juuntri ainaw aiminak:

—Juka Yuse Uchirinjai tinuyayi. Ii umiktin chicham tu aarmawaitai: Aints tu chichauka maatnuitai, —tiarmiayi.

⁸ Tu tinamantai Pilato nuna antuk nuna nangkamasang shamkamiayi. ⁹ Tura ataksha chicham nekatai jeanam waya, Jesúsán iniak:

—¿Amesha tuniayainme? —tamaitiat Jesúska aikchamiayi.

¹⁰ Tura aimtsuk wajamantai, Pilato chicharak:

—¿Warukaya winasha airtsume? Wi wakeraknaka numinam ajinkaram maataram tiinjame. Turachkunka jiikin akupkainjame. ¿Ameka nuka nekatsmek? —timiayi.

¹¹ Tamati Jesús ayaak:

—Yus surimramtaikia, winaka mantuachminuitme. Tura asakmin wína amin surutkauka amin nangkamasang nukap tunaawitai, —Jesús timiayi.

¹² Nuna tinu asamtai Pilatoka: ¿Itiurak Jesúsán jiikin akupkaintaj? tu nintimmiayi. Antsu judío juuntri ainaw chicharinak:

—Ju aints akupkamka, juun apu Césari amikringkia achatatme. Aints ningki: Apuitjai tumamuka juun apu Césari nemasentai, —tiarmiayi.

¹³ Nu tinamun antuk Pilato: “Jesús aanum jiiktaram,” tusa akupak, chicham nekatai keemtainum keemsamiayi. Nu keemtaikia kaya metek paparmay ayayi. Nu wekaataingkia judío chichamejai Gabata inaikiamuyayi. Nuka iiti chichamejaingkia Pata Kaya taku tawai. ¹⁴ Pascua fiesta tsawaatsaing, tsaa yakí waakai, Pilato judío ainaun chicharak:

—Pai, atumi apuri jiistaram, —timiayi.

¹⁵ Tamaitiat untsuminak:

—Jakati, jakati, numinam ajintruam maata, —tiarmiayi.

Tu chicharinam Pilato chicharak:

—Atumi apuri wainiatnakeash ¿numinam ajinkan maataj? —timiayi.

Tu iniam sacerdote apuri ainau aiminak:

—Ii apuringkia kichkitai, nuka Césarkitai, —tiarmiayi.

¹⁶ Tu tinamtai Pilato Jesúsán numinam ajinkar maawarat tusa akupkamiayi. Tura akupkamtai suntar ainau Jesúsán jukiarmiayi.✠

Jesús numinam ajinkar maamuri

(*Mat. 27.32-44; Marc. 15.21-32; Luc. 23.26-43*)

¹⁷ Juwinam Jesús numi winangmaun ningki nanaki suntar ainaujai mura muuk ukunch tutainum wearmiayi. Nuka judío chichamejaingkia Gólgota taku tawai. ¹⁸ Nuni jeamtai, suntar ainau jimia aintsun numi winangmanum ajinkarmiayi. Nunia Jesúsán japen ajinkarmiayi. ¹⁹ Nuna eemkar: Pilato turataram tusa akupkamu asar, Jesúsá muuken yakinini tatang aarmaun numi winangmanum nujtukarmiayi. Tura nu tatangnum aarmauka nuwaitai: “Juka Nazaretnumia Jesúsaitai, judío apurintai.” ²⁰ Nu aarmauka judío chichamejai, tura griego chichamejai, tura romano chichamejaisha aarmauyayi. Tura yakta aarin Jesús numinam nenaamu asamtai, judío untsuri nuni wekajinak nu aarmaunaka aujiarmiayi. ²¹ Turinau asaramtai, sacerdote juuntri ainau nuna wainkar, Pilaton jeariar chicharinak:

—Ameka judío apurintai tuuka aatsuk ningki: ‘Judío apurinjai tumammiayi,’ tu aarta, —tiarmiayi.

²² Tinamaitiat Pilato ayaak:

—Wi aarja nuke ati, —timiayi.

²³ Suntar ainau Jesúsán numi winangmanum ajintawar umisar, cuatro (4) aints asar, Jesúsá entsatirin ii jukimi tusar, jurukiar akankarmiayi. Tura Jesúsá wejmakri aparchamu aya najanam asamtai, ²⁴ suntar ainau chichainak:

—Juka jaakchami. Antsu suerte nakurusar ¿yáki juna jukit? tusar nekaami, —tunaiyarmiayi.

Turinau asar yaanchuik Yuse chichame aarmawa nunisarang umikiarmiayi. Nu aarmauka nuwaitai: “Suerte nakurusmi tusar, wína entsatirun jurutkiarmiayi.” Tu aarmau asamtai, suntar ainau nunisarang turuwarmiayi.✠

²⁵ Turinamtai Jesúsá nukuri, ni kai Cleofasa nuwari Maríjai, nunia Magdalanmaya Maríjai Jesús nenaamunam arakchichu wajaarmiayi. ²⁶ Nuni wajainamtai Jesús nukurin wainak, tura winasha, ni aneetairi nuiniatiri asamtai, nukurijai tsaniasan wajai waitak, ni nukurin chicharak:

—Nukuachi, juka ami uchiram ati, —timiayi.

²⁷ Nunia winasha chichartak:

—Juka ami nukuram ati, —turutmiayi.

Turutin asamtai wisha Jesúsá nukurin ukunam wína jearun jukimiajai.

Jesúsá jakamuri

(*Mat. 27.45-56; Marc. 15.33-41; Luc. 23.44-49*)

✠ 19:16 (Juan 3.14; Hech. 3.14) ✠ 19:24 (Sal. 22.18)

²⁸ Nunia Jesús mash umiku asa, nuna nekaa, Yuse chichame yaanchuik aarmaun umiktas:

—Kitamajai, —timiayi.

²⁹ Tamati aints muits tuupchinam vino churin atun wainak, uruchjai chupir, sapapjai mukunat tusa aapamiayi. ³⁰ Turamtai Jesús vino churiniun mukuna nunia chichaak:

—Mash umikjai, —tusa tsuntsuma jakamiayi.

Mijiarnum nangkijai ijumuri

³¹ Nu kinta Pascua fiesta tsawaatsaing turuawaru asamtai, kashin tsawaar nekas ayamtai kinta atin asamtai, judío juuntri ainau chicharinak:

—Nu kintaka aints numi winangmanum ajintamu ainau nunisarka nemascharti, —tutar, Pilaton weriar chicharinak:

—Numi winangmanum ajintamu ainau wári jakarat tutar, suntar ainau weriar kangkajin kupikiarti. Nunia jakaramtai, numinmaya jukiarat tusam, chicham akupkata, —tiarmiayi.✠

³² Tu tinamtai Pilato: Ayu tusa chichaman akuptukmau asar, suntar ainau Jesús-num ayamas netimia nuna kangkajin kupikiarmiayi. Nunia kichnasha nunisarang kupikiarmiayi. ³³ Turuwar Jesús-a kangkajisha kupirkatai tutar weriar, jiamaitiai yanchuk jakaun wainkarmiayi. Tura wainkar kangkajin kupirtsuk inaisarmiayi.

³⁴ Tura wainiat kichik suntar ¿nekasash jaka? tusa nangkijai Jesús-a mijiarin ijiumiayi. Tura ijium numpasha, nunia yumisha kitamiayi. ³⁵ Nunaka wikia nekasan wainkau asan etserjai. Atumsha nekaaram nekasampita titaram tusan ujaajrume. Wi nekasan nuna wainkau asan, wi taja nuka nekasantai. ³⁶ Jesús-a kunchin kupikcharu asar, Yuse chichame yaanchuik aarmawa nunisarang umikiarmiayi. Nu aarmauka nuwaitai: “Ni kunchin kichkisha kupirkachartinuitai.”✠

³⁷ Nangkijai ijiumia nusha chikich aints Yuse chichame yaanchuik aarmia nunisang umikmiayi. Nu aarmauka nuwaitai: “Nangkijai ijuarmia nuka niincha wainkartinuitai.” Tu aarmauyayi.✠

Jesús-a iwiarsamuri

(*Mat. 27.57-61; Marc. 15.42-47; Luc. 23.50-56*)

³⁸ Suntar nuna mash umisaramtai, Arimateanmaya aints José naartin Pilatonam we: Jesús-a namangken jukin iwiarsatjai tusa seamiayi. Tu seam Pilato ayu tamati, José Jesús-a namangken jukimiayi. Nu Joséka Jesús-a nemarnutiat, judío ainaun shamak nekarawarai tusa, uumak Jesús-an nemarnuyayi. ³⁹ Turamtai Nicodemosha yaanchuik Jesús-an chichastas kashi tarimia nu kungkutin mirra tutain chikich kungkutijai pachimramun treinta (30) kilon sumak tarimiayi.✠

⁴⁰ Tura taa, José Nicodemojai Jesús-a namangken jukiar, tarach sarmanam nu kungkutijai ukatrar, Jesús-a namangken kangkararmiayi. Judío ainautikia jakaru ainau tu iwiarniaji. ⁴¹ Jesús numi winangmanum jakamia nuna ayaamas numi arakmau ainau wajaarmiayi. Nuni jakau iwiartai pampa najanamu yamaram amiayi. Tura yamaram asamtai, aints kichkisha nuni iwiarsachmauyayi. ⁴² Nu kinta judío ayamtai kinta asamtai, tura nu jakau iwiartaingkia arakchichu asamtai, Jesús-a namangken nuni iwiarsarmiayi.

20

Jesús jakamunmaya nantakmiauri

(*Mat. 28.1-10; Marc. 16.1-8; Luc. 24.1-12*)

¹ Tumung kinta kashik paantratsaing, Magdalanmaya Marí Jesús-a iwiarsamurin jiistas wemiayi. Tura nuni jea, kaya juuntan waanam ututkarmia nuna urankaun wainkamiayi.

² Nuna wainak, Simón Pedro pujamunam ampuki waketkimiayi. Wisha Jesús-a aneetiri nuiniatiri asan, Pedrojai tsaniasan nuni pujumiajai. Tura Marí taa iin chichartamak:

✠ 19:31 (Deut. 21.23) ✠ 19:36 (Ex. 12.46; Sal. 34.20) ✠ 19:37 (Zac. 12.10; Apoc. 1.7) ✠ 19:39 (Juan 3.1-2)

—Ii Apuri namangke iwiarsamunmayan jukiari. Tura tunintsuk ukusarma nuka nekatsji, —turammiaji.

³ Turammatai iisha Pedrojai jiinkir iwiarsamu jiistasar werimiaji. ⁴ Iikia mai tsaniasar ampukir weayatrik, wiyá Pedron nangkaikin, Jesús iwiarsamunam jeamiajai. ⁵ Tura ututsuk tekenan jiikman, Jesús namangkenka waintsuk antsu ni kangkarmaurinak wainkamiyai. ⁶ Wi turamtaí, Simón Pedro ukunam taa, wajatsuk iwiarsamunam utukmiyai. Tura utuk Jesús kangkarmau tarachik tarachik nuni tepaun wainkamiyai. ⁷ Tura muuken nukukmausha niish nanenar tepaun wainkamiyai. ⁸ Turamtaí wisha eemkan jeayatun, iwiarsamunam wayaachu asan, wisha uku wayaan, tarach mash amia nuna wainkan: Nekasampi nantaki, tu nintimramiajai. ⁹ Yuse chichame yaanchuik Jesúsán pachis: Jakamunmaya nantaktinuitai, tu aarmau wainiatrik, nu tarach wainchakrikia: Nekasampi nantaki tuuka nintimtsuk pujumiaji. ¹⁰ Tura nunia jiinkir ii pujutirin waketkimiaji.

Magdalanmaya Marín Jesús wantintukmauri
(*Marc. 16.9-11*)

¹¹ Ii waketkiarin, Marí taa, Jesús iwiarsamunam ayaamas juutu wajamiyai. Tura juutak tekenas iwiarsamun jiistaj tusa, ¹² Jesús namangke atsayat, Yuse awemamuri jimiar wejmakán pujun entsarinaun, kichka nuwik Jesús namangke tepamunam muukenini pujaun, tura kitcha nawenini pujaun wainkamiyai. ¹³ Turamtaí Yuse awemamuri Marín iniinak:

—¿Waruka juutme? —tiarmiayi.

Tu tinam nuka aimiak:

—Wína Apuru namangken jurutkiaru asaramtaí, tunintsuk ukusarma tusan, nekachu asan juutjai, —timiayi.

¹⁴ Nuna tusa tuntupenini pajas jiimkama, Jesús wajaun wainkayat Jesúsapita tusangka nekaachmiyai. ¹⁵ Turamtaí Jesús Marín iniak:

—¿Warukaya juutme? ¿Yaachia eame? —timiayi.

Tu iniam Marí: Ju aintska numi arakmaun wainutskita, tu nintimias:

—Ame ni namangke jukinuitkumka, juni ukusmajai tusam ujatkata. Turakmin wi jurumkitjai, —timiayi.

¹⁶ Tamati Jesús chicharak:

—María, —timiayi.

Tamati nuna pajas jiis, judío chichamejai chicharak:

—Rabuni, —timiayi. Nuka iiti chichamejaingkia nuikiartinu taku tawai.

¹⁷ Tamati Jesús chicharak:

—Wína Apaachir pujamunam wakachu asamtaí achirkaip. Antsu wína aintsur pujuinamunam weta. Tura ujaakum: Wína Apaachir pujamunam weajai. Nusha atumi Apaachirintai. Tura wína Yusur pujamunam weajai. Nusha atumi Yusrintai tusan tajarme, tawai tita, —timiayi.

¹⁸ Nuna timiauí asa, Magdalanmaya Marí waketki, Jesús nuiniatiri ainautin chichartamak:

—Wi nekasán ii Apurin wainkajai. Tura tita tusa akaturmayi, —turammiaji.

Ni nuiniatiri ainau wantintukmauri
(*Mat. 28.16-20; Marc. 16.14-18; Luc. 24.36-49*)

¹⁹ Nu tuming kinta kintamaunum Jesús nuiniatiri ainauti judío juuntri shamakur, epeemir iruntrar pujarin, Jesús waitin uratsuk aneachmau jeanam waya japen wajas iin chichartamak:

—Pengker nintimsaram pujustaram, —turammiaji. ²⁰ Nunia ni uwejencha, tura ni mijiarincha inakturmasmiaji. Turamtaí ii Apuri wainkar warasmiaji. ²¹ Tumakrin Jesús ataksha chichartamak:

—Pengker nintimsaram pujustaram. Wína Apaachir wína akuptukmia nunisnak wisha atumnasha akupkatatjarme, —turammiaji.

²² Nunia suut umpunmi iin chichartamak:

—Yuse Wakani atumi nintin engkemati. ²³ Atumka aintsu tunaari Yus sakarti takurminka, ni tunaarinka sakartatui. Tura aintsu tunaari Yus sakarchati takurminkia, ni tunaarinka sakarchatatu, —Jesús turammiaji.✠

Tomás Jesús wainkamuri

²⁴ Jesús nu jeanam wayaamunmaka Tomás Jimiamramu naartin Jesús nuiniatirintiat iijaingkia iruntrachmiayi. ²⁵ Tura asamtai ukunam chikich nuiniatiri irunuti Tomás ujaakur:

—I Apuri wainkaji, —timiaji.

Tu ujaamaitiat Tomás iin chichartamak:

—Atsa, ni uwejen jirujai jinkamurin takaschanka, tura nangkijai ijumurin uwejrui inurkachnaka, nekasampita tichatatjai, —turammiaji.

²⁶ Nunia chikich tumingtin ataksha Jesús nuiniatiri ainautikia mash iruntramiaji. Tura Tomás iin pachinkamiayi. Turamtai waiti epenmiao wainiat, Jesús aneachmau waya, japen wajas iin chichartamak:

—Pengker nintimsaram pujustaram, —turammiaji.

²⁷ Nunia Tomás chicharak:

—Tomása, ami tsaranchikmijai wína uwejur ijumur inukam takasta. Tura uwejmijai mijjarur inukam jitrusta. Tura nekaschawaitai turutsuk, antsu nekasampita turuttia, —timiayi.

²⁸ Tamati Tomás aimiak:

—Nekasampi wína Apuruitme. Tura nekasampi wína Yusruitme, —timiayi. ²⁹ Tamati Jesús chicharak:

—Tomása ¿wína waitkam nekasampita turutmek? Antsu aints wína waittsuk pujuinayat nekasampita turutinauka winaka nekasar timiá pengker nintimturinawai, —timiayi.

¿Ju papikia waruka aarmawaita?

³⁰ Jesús chikich wainchati takatnasha untsuri turamia nusha ni nuiniatiri ainauti wainkamiaji. Antsu ju papinumka mashkia aarchamuitai. ³¹ Tura Jesús nekasampi Yus akupkamuita, tura nekasampi Yuse Uchirinta titaram tusan, tura tu nintimtakrum pujut nangkankashtin jukimnuram tusan, ju papinaka aatjarme.✠

21

Siete nuiniatiri ainaun Jesús wantintukmauri

¹ Jesús jakamunmaya nantaki, ataksha Tiberias kucha kaanmatkarin wekaas, ni nuiniatiri ainautin wantinturmakmiaji. ² Nuni Simón Pedro, nunia Tomás Jimiamramu naartin, nunia Natanael, Caná yaktanmaya Galileanmaya aintcha nusha, nunia wi, nunia wína yatsursha, chikich jimiar Jesús nuiniatirijai iruntrar pujumiaji. ³ Iikia iruntrar pujarin, Simón Pedro iin chichartamak:

—Namakan achiktasan weajai, —turammatai iisha:

—Iijai wemi, —tusar jeanmaya jiinkir kanu juunum engkemrar, kashi red ujua ujuaka namak kichkisha achikchamiaji. ⁴ Tura tsawaarin Jesús juun kucha kaanmatkarin wantinkamiayi. Tura ni nuiniatiri ayatrik, Jesúsapita tusarkia nekaachmiaji. ⁵ Turakrin Jesús untsurmak:

—Natsachi ¿namak achikurmek? —turammiaji.

Turammatai iikia:

—Atsawai, —timiaji.

⁶ Tu aimkurin iin ataksha chichartamak:

—Yamaikia untsurnumanini red ujugtaram. Nuni achiktatrume, —turammiaji.

Turammatai ni tímia nunisrik nangkimiar, namak timiá untsuri shikikar, redcha jiiktatkar tujinkamiaji.✠

⁷ Nuniangka wikia Jesúsa aneetiri nuiniatiri asan, Pedron chicharkun:

—Auka ii Apurintai, —timiajai.

Wi tamati Simón Pedro nuna antuk, misu wajau asa, wejmakrin patasmaun entsar, juun kuchanam ayangmiayi. ⁸ Turamtai chikich nuiniatiri ainautikia kanujai rednum namak chumpimiau kichik pachak metro japikir kaanmatkanam jeemiaji. ⁹ Tura kaanmatkanam jear, ji kapaamunam namak jiyamu pangjai wainkamiaji. ¹⁰ Turakrin iin Jesús chichartamak:

—Namak achikurme nu jumchik itataram, —turammiaji.

¹¹ Turammatai Simón Pedro reden kaanmatkanam japiki patai, namakan ciento cincuenta y tres (153) nekapmarmiaji. Antsu timiá untsurintiat redenka jaakchamiayi.

¹² Nunia Jesús:

—Yuwitaram, —turammiaji.

Turammatai ni nuiniatiri ainautikia: Juka nekas iinu apurintai tu nintimu asar, kichkisha inintrutsuk: ¿Yaachitme? tichamiaji. ¹³ Nunia mash kaunkaru asakrin, Jesús wajaki, pangkan achik suramsamiaji. Tura namaknasha nunisang suramsamiaji.

¹⁴ Jesús jakamunmaya nantaki iwiaaku pujus ni nuiniatiri ainautin nujaingkia kampatam wantinturmakmiaji.

Pedrojai chichasmauri

¹⁵ Yutan umis, Jesús Simón Pedron iniak:

—Simónka, Jonása uchiriya ¿ju ainau nangkasmek timiá wína anentam? —timiayi.

Tu iniam Pedroka aimiak:

—Ja ai, Apuru, wikia aminka pengker nintimtusan pujajme. Amesha nuka nekame, —timiayi.

Tamati Jesús chicharak:

—Takumka uwija uchiri wainua nunismek wína umirtin ainau waitrukta, —timiayi.

¹⁶ Tamati Jesús ataksha iniak:

—Simónka, Jonása uchiriya ¿nekasmek anentam? —tu iniam Pedroka aimiak:

—Ja ai, Apuru, amesha nuka nekame. Wikia amin tuke pengker nintimtusan pujajme, —timiayi.

Tamati Jesús chicharak:

—Takumka wína uwijar ainau waitrukta, —timiayi.

¹⁷ Nunia ataksha iniak:

—Simónka, Jonása uchiriya ¿nekasmek wína pengker nintimtursam pujam? —timiayi.

Nujaingkia kampatam iniamu asa, Pedroka wake mesekmiayi. Tura ayaak:

—Apu, ameka mash nekame. Wi amin pengker nintimtusan pujajme tajame nuka nekasaintai tusam nekame, —timiayi.

Tamati Jesús aimiak:

—Takumka wína uwijar ainau waitrukta. ¹⁸ Nekasan tajame: Ame natsa akumka wejmakrum entsaram, ame tuningsha wekaasatasam wakerakmeka pachitsuk wekainuyame. Turayatum juuntach wajasakminkia, ami kunturam kutsmarakmin, chikich aints wejmakrumin antstamrartin ainawai. Tura ame nuni weta nakitamin waitminayat, amin achirmakar juramkiartinuitai, —timiayi.

¹⁹ Nuna tusa Pedron: Tu mantamawartinuitai tusa ujaak timiayi. Tura tu jakam Yus pengker awajsatnuitme taku timiayi. Nunia Pedron ataksha chicharak:

—Tuke inaitutsuk nemartusta, —timiayi.

Jesúsa aneetiri nuiniatirin pachis chichasmauri

²⁰ Jesús tamati Pedro pajas jiiras winasha Jesús namarai waitkamiayi. Turamtai wikia nekas Jesúsa aneetiri nuiniatiri asan, iisha Jesús jaatsaing, nijai iruntrar yuwakur pujarin, Jesúsnum ayaamsan pujusan niin iniakun: “Apu, ¿amin anangkrama surutmaktata nusha yaachita?” timiajai.✠

²¹ Tura nuna nintimias, Pedro pajas jiiras Jesús iniak:

✠ 21:20 (Juan 13.25)

—Apuru ¿jusha warukatnuki? —turutmiayi.

²² Tama wína pachitas Jesús Pedron ayaak:

—¿Amesha waruka ausha tame? Wi wakeraknaka, juka jatsuk pujaun tarimnawaitjai. Antsu ameka pachitsuk nemartusta, —timiayi.

²³ Jesús tu tinu asamtai, chikich nuiniatiri ainau wína pachitsar: Nekasam jakashtinuitme turutin armiayi. Antsu Jesúska: “Wi wakeraknaka juka jatsuk pujaun tarimnawaitjai,” turutmiayi, antsu jakashtinuitme turutanka turutchamiayi. Tura Pedron: —¿Amesha waruka ausha tame? —nunak timiayi.

²⁴ Wikia Juankuitjai, Jesúska nuiniatirinjai. Ju papinasha aaru asan, mash nekasaintai tajai. Jesúska aintsrishanunisarang mash nekasaintai tinawai.

²⁵ Tura Jesúska turamuringkia untsurintai. Antsu ni turamuri kichik kichik aakrikia papi timiá untsuri aarminuitai. Timiá untsuri aarmaka mash nungkanmasha ukuschamin aminuitai. Maaketai.

Cristo Nuiniatiri Ainau Turamuri

Yuse Wakani akupkatnun pachis etserkamuri

¹⁻² Wiitjai Lucasaitjai. Wína aneetir Teófilo: Wi yaanchuik amin papin akuptuk-miajme nuna aaran, Jesús nayaimpinmaka watsuk ju nungkanam pujus ni turamurin pachisan, tura ni nuiniarmaurinha pachisan nu nangkamtaik nangkaman, nunaka mash aatramiajme. Jesús nayaimpinam waketkitas ni nuiniatiri ainaun: Wína chichamur etserkataram tusa, yaanchuik Yuse Wakani turata tinu asamtai, ni turatniurin pachis chichaman akatmamramiayi.✠

³ Jesús waitnas jaka, nunia nantaki cuarenta (40) kintati ni nuiniatiri ainaun wantintukmiayi. Tura wantintuk paan: Iwiaakjai tukini wajamiayi. Tura Yus ni aintsri ainaun itiu inawa nuna pachis chichasmiai.✠

⁴ Tura nuni iruntrar pujusar Jesús ni nuiniatiri ainaun chicharak:

—Juni Jerusalén yaktanam nakastaram. Turaram wína Apaachir ni Wakani pachis chichaman akupkamia nuna umiatsaingkia jiinkirap. Yuse Wakani atumi nintin pi-atramkatatui tusan, wi atumin ujakmiajrume nu nakastaram. ⁵ Juan nekas aints ainaun entsanam imaimiayi. Antsu jumchik kinta arus Yus ni Wakanin atumi nintin piatramkatatrume, —timiayi.✠

Jesús nayaimpinam wakamuri

⁶ Jesúsjai iruntrar pujusar, ni nuiniatiri ainau Jesúsán iniinak:

—Apuru ¿Israel ainauti Apuri yamaikiash atam? —tiarmiayi. ⁷ Tinamtai Jesús ayaak:

—Atsa, warí kintatiya tura warí nantutiya wína Apaachir ni kakarmarijai turatata nuka pengké nekaachminuitrume. ⁸ Antsu atumin Yuse Wakani engkemturma, Yus ni kakarmari suramsatatrume, tura asamtai juni Jerusalénnum pujusrum, nunia Judea nungkanam wekaakurmesha, nunia Samaria nungkanam wekaakurmesha, nunia arák wekaakurmesha, mash nungka ainamunam wína pachitsaram etserkatnuitrume, —Jesús timiayi.✠

⁹ Tamati Jesúsá nuiniatiri ainau jiiw wajainai, Jesús yakí nayaimpinam yurangmijai wakamtai nuniangka wainkacharmiayi.✠ ¹⁰ Jesús nayaimpinam wakamtai, ni nuiniatiri ainau tuke jiiw wajainai, aneachmau Yuse awemamuri jimiar aintsua tumau wejmakan pujun entsarinai nijai tsaniasar wajainaun wainkarmiayi. ¹¹ Tura wainkaram nuka chicharinak:

—Galilea nungkanmaya ainautiram, ¿warukaya nayaimpisha timiá jiisha wajarme? Jesúska atumnia nayaimpinam waka nuka ataksha nunisang taratnuitai. Turamtai atum wainkamarme nunisrumek ataksha wainkatnuitrume, —tiarmiayi.

Matías Cristo chichamen etserin ati timiauri

¹² Nunia olivo muranmaya Jerusalénnum waketkiarmiayi. Ayamtai kintati wekaasatin aya kichik kilómetrok arakchichu ayayi. ¹³ Tura Jerusalénnum ni pujutirin jear, pata yakí amaunum wakarmiayi. Aints nuni wakarmia nuna naaringkia nu ainawai: Pedro, nunia Juan, nunia Santiago, nunia Andrés, nunia Felipe, nunia Tomás, nunia Bartolomé, nunia Mateo, nunia Alfeo uchiri Santiago, nunia Simón mesetan najanin aints, nunia Santiago uchiri Judas naartin, nu mash iruntrarmiayi. ¹⁴ Nusha tuke Jesúsá yachi ainaujai, tura Jesúsá nukuri Maríjai, tura chikich nuwa ainaujai nuni Yusen seartas iruntrarmiayi.✠

¹⁵ Chikich kintati aints ciento veinte (120) nuni iruntrar pujuinai, Pedro wajaki chichaak:

✠ 1:1-2 (Luc. 1.1-3) ✠ 1:3 (Hech. 13.31) ✠ 1:5 (Mat. 3.11; Luc. 24.49) ✠ 1:8 (Mat. 28.19; Marc. 16.15; Luc. 24.47-48) ✠ 1:9 (Marc. 16.19; Luc. 24.50-51) ✠ 1:14 (Mat. 10.2-4)

16-19 —Yatsur ainautiram, anturtuktaram: Yaanchuik Jesús Judasan iijai metek wína nuiniatir ataram tusa, inaikiamu asa, ni takatrincha takakmasmiayi. Turayat aints ain-aun Jesús an achikiarat tusa, jintan inakmasmiayi. Tura Judas tunau wajas Jesús an suruku asamtai, kuik waingkimujai ajan sumakarmiayi. Tura nu ajanam Judas kuntujen naekjai jingkiama tsekengki ayaarak, naekri put tsuraku asamtai, chapi ukuma ayaarak ampuje tishini saaki jakamiayi. Tu jakau asamtai, Jerusalénnum pujuinau nuna nekaawar, nu ajanka ninu chichamejai Acéldama inaikiarmiayi. Nuka “numpa aja” taku tawai. Tura Yuse Wakani ii juuntri Davidtan aamtikramu asamtai Judaska akiintsang, David Judasan pachis aarmiayi. ☆ 20 Apu David yaanchuik papi Salmo tutainum tu aarmiayi:

‘Ni jeenka itarak atinuitai. Tura kichkisha ni jeenka pujuschartinuitai,’ tu aarmiayi. ☆
Nunia ataksha:

‘Chikich aints ni takatrin takakmastinuitai,’ Judasan pachis tu aarmiayi. ☆

21-22 “Tu aarmau asamtai chikich aints Judasa takatrin takasat tusar inaikiami. Nu aintska nu nangkamtaik Juan Jesús an imiaamun wainkau asa, nunia ii Apuri Jesúsjai wekajin asa, nunia ni jakamunmaya nantakmiaurincha wainkau asa, tura nayaimpinam wakamurin wainkama nu aintska Judasa takatrin takakmasat tusar inaikiami,” Pedro timiayi. ☆

23 Tamati jimia aintsun inaikiarmiayi. Chikich aintsun José Barsabás naartinun chikich naari Justo: Ju ati tusar inaikiarmiayi. Turinamtai chikich ainausha Matíasan inaikiarmiayi. 24-25 Nunia Yusen seainak:

—Ii Apuri Jesús, ameka aintsu nintingkia mash nekame. Tura asam Judas tunau asa, jaka wait wajaktinum weu asamtai, yáki ni takatrin takakmasat tusam, paan inakmasta, —tiarmiayi.

26 Nunia papin jimieran jukiar, nu aintsu naarin papinum aararmiayi. Tura yana papiriya jiinkiti tusa uwejen engkea, kichik aints peakmiayi. Turamtai Matíasan papiri jiinkimiayi. Tura asamtai Cristo nuiniatiri once (11) ainamunam Matíasnaka pachikiarmiayi.

2

Yuse Wakani aints pujuinamunam tamauri

1 Fiesta Pentecostés tutai tsawaaramtai, Cristo umirin ainauka mash Jerusalénnum iruntrarmiayi. 2 Tura mash iruntrar pujuinai, nasengka atsayat aneachmau nayaimpinmaya nase kakarman uutua tumaun jeanam iruntrar pujuinauka mash antukarmiayi. 3 Nunia chikich chikich aintsu muuken jiya tumau kapaun wainkarmiayi. 4 Tura nuni iruntrar pujuinaunaka Yuse Wakani mash piatkarmiayi. Tura nuni iruntrar pujuinaunaka mash chikich aintsu chichamen nekachu ainaunak niish niish chichamtikiamiayi. ☆

5 Tura nu fiestanmaka judío Yuse umirin ainau mash nungkanmaya kaunkar Jerusalénnum pujuarmiayi. 6 Tura aints ainau niish niish chichainamtai, nuna antukar kautkarmiayi. Tura mash ninu chichamejaingkia chichainau asaramtai ¿warukang tina? tiarmiayi. 7 Tura nekainachu asar shamkarmiayi, tura chicharnainak:

—¿Chikich chikich chichamjai chichaina auka mash Galileanmaya ainchaukai? 8 ¿Ausha warukinakua? Ii chichamencha chichatan nekachu ainayatcha, miatrusarang paan chichainausha antaji. 9 ¿Ilikia mash nungkanmaya aints ainatsjik? Partianmaya, nunia Medianmaya, nunia Elamnumia, nunia Mesopotamianmaya, nunia Judea nungkanmaya, nunia Capadocianmaya, nunia Pontonmaya, nunia Asia nungkanmaya, 10-11 nunia Frigianmaya, nunia Panfiliannmaya, nunia Egipto nungkanmaya, nunia Libianmaya yakat Cirene tutai nuna nangkaikiar arák matsamin ainau, nunia Romanmaya judío ainausha, tura judóchu ainausha iiya nunisarang Yusen nekasampita tinausha irunji. Nuniasha Cretanmayasha, nunia Arabianmayasha irunji. Turayatrik Yus ni kakarmarijai tura nuka paan ii chichamejai mash chichainau antaji, —tunaiarmiayi.

☆ 1:16-19 (Mat. 27.3-8) ☆ 1:20 (Sal. 69.25) ☆ 1:20 (Sal. 109.8) ☆ 1:21-22 (Marc. 1.9;16.19) ☆ 2:4 (Hech. 15.8)

¹² Tura mash nintimrar shaminak:
—¿Juka warimpita? —tunaiarmiayi.

¹³ Tura chikich ainau wishikinak:
—¿Nampekar tinatsuash? —tiarmiayi.

Pedro aints ainaun chicharkamuri

¹⁴ Tu tinamtai Pedro chikich aints Cristo nuiniatiri ainaujai wajaki aints ainaun kakar chicharak:

—Judío ainautiram, Jerusalénnum mash matsamnutirmesha, wi taja nuka antur-tukrum nintimrataram. ¹⁵ Ju aints ainau nampekar tinawai, tu nintimtar me nuka nangkamrum tarume. ¿Tsa yamai waakaisha itiur nampekarting? ¹⁶ Antsu Yuse chichame etserin Joel naartin nuna pachis yaanchuik etserkamiayi. Ni etserkamuringkia tu aarmawaitai:

¹⁷ Yus chichaak: Nungka amukatin jeatak wajamtai, mash aints ainamunam yumi yaranua nunisnak wína Wakantrunka akupkatnuitjai. Tura asamtai atumi uchirisha, tura atumi nawantrisha wína chichamrun etseriartinuitai. Tura natsa ainausha ni jijjaingkia winaka waitinachu wainiatnak, paan nintimtikrartinuitjai. Nuniasa atumi juuntri wína pachitsar karamrurartinuitai.

¹⁸ Tura wína inatir aishmang ainauncha, tura nuwa ainauncha wína Wakantrunka akuptuktinuitjai. Tura asamtai wína chichamrun etserkartinuitai. ¹⁹ Tura yakí nayaimp-inmayan shamrumtinun inakmastinuitjai. Tura nungkanmasha wainchati takatnaka inakmastinuitjai. Aints maaniamunam numpan nukap wainkartinuitai. Tura jisha nukap keenaun wainkartinuitai. Nunia mukunit nungkanam nukap atinuitai. ²⁰ Tsaasha tsawai wainiat kajintratnuitai. Tura nantuncha numpa tumaun keaun wainkartinuitai. Nunia Yuse paaniurijai tura ni kakarmarijai nu kintaka jeatnuitai. ²¹ Antsu wína naarun pachitsar seatin ainauka uwemrartin ainawai. Yuska tawai, Joel tu aarmiayi. ✠

²² “Israel ainautiram, wi taja nuka anturtuktaram. Nazaretnumia Jesús Yusen pengker awajsamia nuna pachisan yamaikia ujaktatjar me. Nu aintska atumjai pujus, Yuse kakarmarijai wainchati takatnasha, tura itiurkachmin au wainiat atum jiiimmaunum turamia nuka mash nekarme. ²³ Turayatrum jakati tusaram, nu aintska achikrum, Yusen umirchau ainamunam numin ajintruwar maawarti tusaram surukmiarume. Jesús aints ainaun uwentikratin asamtai, Yuska eemak mash nekau asa, nunaka turuwarti tusa tsangkamkamiayi. ✠ ²⁴ Tura jatasha Jesús an nepetkachmin asamtai, waitnas jakau wainiat, Yus niin jakamunmaya inankimiayi. Tura asamtai Yuse kakarmarijai jatancha nepetak nantakmiayi. ✠

²⁵ “Ii juuntri Davidcha Jesús akiintsang, Jesús an pachis tu armiayi:

‘Wína Apurun tuke wijai pujaun wainuyajai. Niisha wína untsurunini pujurtau asamtai, wikia pengké mengkaakashtatjai.

²⁶ Tura wína nintirun pujurtau asamtai waraajai. Tura pengker nintimsan chichaak-nasha waraawarat chichaajai. Nunia nantaktinuapitja tau asan, jakancha pengker nintimsan ayamsatnuapitja tajai.

²⁷ Yusru, wína wakantrusha jakatniunmaka ukurtuschatnuitme. Tura ami inatiram nekas pengker asamtai, ni namangkesha kaurti tusamka tsangkamrukchatnuitme.

²⁸ Tura jinta tuke iwiaaku pujustinnum jeatnuka inaktursatnuitme. Tura tuke wijai pujau asam waramtikrustinuitme.’ David yaanchuik tu aarmiayi. ✠

²⁹ “Yatsur ainautiram: Ii juuntri Davidtan pachisan atumin paan ujaktasan waker-ajrume. Nu jakamtai iwiarsarmiayi. Tura iwiarsamuri yamaisha tuke wainkatnuitai.

³⁰ Nuka ukunam atiniun etsernuyayi. Tura asamtai Yus Davidtan chichaman yapajiach-minun chicharak: ‘Nekasan tajame: Ami wearam Apu asa, aints ainaun inartinuitai,’ tu timiau asa nunaka nekaamiayi. ³¹ Yaanchuik David nuna nekau asa, Mesíasan wainkawa nunisang ni nantaktintrin pachis: Wakanim jakatniunmaka ukukchatnuitme, tura ni namangkesha kaurti tusamka tsangkamkashtinuitme, tu aarmiayi. ³² Nu aintsun pachis

David yaanchuik aarmia nuka Jesúsayayi. Yus Jesúsna naka nekas jakamunmaya inankimiayi. Turamtai iisha nu mash nekau asar: Nekasaintai taji. ³³ Tura asakrin ii Apaachiri Yus: Wina Wakanur aints ainau akuptukta, Jesúsna tinu asa, Jesúsna jakamunmaya inankimiayi. Tura asamtai Jesús nayaimpinam waka, ni Apaachiri untsurinini pujus, ni Wakanin akupturmaji. Atumka yamai waintrume tura antarme nuka nuwaitai. ³⁴ Tura nayaimpinam wakamia nuka Davidchawaitai. Tura asamtai David tu aarmiayi: ‘Yus wína Apurun chicharak: Apu keemtainum wína untsurunini keemsata.

³⁵ Wi ami nemasmin nepettsaing juni ayaamsam pujusta.’ Tu aarmawaitai.

³⁶ “Nu Jesúska numi winangmanum maamarme nunaka Yus: Apu ati tusa, tura Mesías ati tusa akupkamiayi. Israel ainautirmeka, nuka nekasampita tusaram, mash pengker nekaataram,” Pedro timiayi.

³⁷ Tamati nu etsermaun antukar wake mesekar, Pedron nunia Cristo nuiniatiri ainaun iniinak:

—Yatsur ainau iisha itiurkamnaukitaj? —tiarmiayi.

³⁸ Tinamtai Pedro ayaak:

—Mash aints ainautiram, atumi yaanchuik nintimtai inaisakrumningkia, Yuska atumi tunaarinka sakturmartatrume. Tura asa ni Wakani nekas pengker aa nuna atumniaka suramsatatrume. Tura asamtai Jesucristo umirkatasrum maaitaram. ³⁹ Yus yaanchuik ni Wakanin pachis tímia nunaka atumin turamrume, nunia atumi uchirincha, tura mash nungkanam arák pujuinauncha nunaka tawai. Tura ii Apaachiri Yuska: Winar ataram tusa, aints ainaun untsuktas wakerau asa tawai, —Pedro timiayi.

⁴⁰ Nu chichamnasha tura chikich chichamnasha untsuri aints ainaun ujakmiayi. Tura chicharak:

—Junia aints tunau turina nujaingkia kanakrum pujustaram, —Pedro timiayi.

⁴¹ Tura asamtai nu chichamnasha antukar, nekasampita tinauka mainiarmiayi. Tura asamtai nu kintati kempatam warang (3,000) aints Cristonu wajasarmiayi. ⁴² Tura nu aints ainau mash Cristo nuiniatiri ainau nuiniarmia nuna antú pujuarmiayi. Tura mash iruntrar pujusar, Yusen sear Yuse misarin yuwarmiayi.

Nu nangkamtaik Cristo umirin ainau pujusmauri

⁴³ Cristo nuiniatiri ainau nekashtai takatnasha untsuri turuwarmiayi. Tura Cristo kakarmarijai wainchati takatnasha untsuri turinamtai, aints ainau mash nintimrar shamkarmiayi. ⁴⁴ Turinamtai Cristonu ainauka mash iruntrar pujusarmiayi. Tura ninu aa nuna mash sunaisarmiayi. ⁴⁵ Tura ninu aa nunasha mash surukar, ni ajarincha surukar, Cristonu ainau yuuminak pujuinaun kuikian susarmiayi. ⁴⁶

⁴⁶ Tura kintajai metek Yus seatai juun jeanam iruntrarmiayi. Nunia Cristonu ainau jeencha kichik kichik wayaawar, nuni iruntrar pengker nintimtusar warasar yuwarmiayi. ⁴⁷ Tura Yus juuntaitai tiarmiayi. Tinamtai aints ainau mash Cristonu ainaun pengker nintimtiarmiayi. Tuminau asaramtai kintajai metek Yus aints ainaun uwentikramiayi. Tura asamtai Cristonu ainauka kintajai metek yujararmiayi.

3

Aints wekaichau tsuwarmauri

¹ Chikich kintati tsaa nungkaanmatai, Yus seatai hora jeau asamtai, Pedro Juanjai Yus seatai juun jeanam Yusen seartas wearmiayi. ² Tura Waiiti Shiiram tutainum wayaawartas wearmiayi. Tura waiitinam jear, aints wekaichau nuni pujaun wainkarmiayi. Nu aintska akiinamunmaya tuke wekaichau asamtai, ni weari ainau kintajai metek Yus seatai juun jea waiitirin aints nuni waainaun: Wait aneasrum kuik surustaram titi tusar puusar ukukiarmiayi. ³ Turinamtai aints wekaichau Pedron Juanjai wininaun wainak:

—Wait aneasrum, kuik surustaram, —timiayi. ⁴ Tamati mai nu wekaichaun wainkar, Pedro chicharak:

☆ 2:33 (Luc. 24.49; Juan 16.13-15; Hech. 1.4) ☆ 2:45 (Hech. 4.32-35)

—Jiirsata, —timiayi.

⁵ Tamati nu aintska: ¿Warinak surustas taj? tusa jij pujurmiayi. ⁶ Tu nintimias jij pujuram, Pedro chicharak:

—Kuikiarka atsawai. Tura kurisha atsawai. Antsu nuna nangkamasang timiá pengker aa nuna susatjame. Nazaretnumia Jesucristo kakarmarijai wajakim wekaasata tajame, —timiayi.

⁷ Nuna tusa Pedro ni untsur uwejejai tap achik awajkimiayi. Turamtai nawesha, tura wanusesha kakaram wajasmiayi. ⁸ Turam ayaatsuk wajaki, wekaatan nangkamamiayi. Nunia Pedrojai, tura Juanjai iruntrar Yus seatai juun jeans waya ming ming wajak: Yus kakarmaitai timiayi. ⁹ Tamati aints mash nuni kaunkaru ainu niin wekaun wainkarmiayi. Tura ni chichaamurin anturkarmiayi. ¹⁰ Tura nintimsar shaminak:

—Ju aintska Yus seatai juun jeans Waiti Shiiram tutainum tuke aintsu kuikiarin seama pujuya nuwaapita, —tiarmiayi.

Jea tesaamurin Salomón jeamkamunam Pedro aints ainaun chicharkamuri

¹¹ Tu tinamtai nu aintska Pedrojai tura Juanjaisha kanatsuk nijai tsanias Yus seatai juun jea tesaamurin Salomón jeamkamia nuni wajainamtai, aints ainu nuna wainkaru asar, nuni ampukiar weriarmiayi. ¹² Tuminamtai Pedro aints kaunkarun chicharak:

—Israel ainautiram ¿warukaya miatcha nintimrume? ¿Tura warukaya miatcha jikratrume? Ii kakarmarijaingkia juka tsuwarchaji. ¿Ii pengker asarik tsuwaraij? ¹³ Antsu ii juuntri Abrahamia Yusri, tura Isaaca Yusri, tura Jacobo Yusri ii Yusri asa, ni uchirin Jesúsán: Nekas ameketme juuntam tiarat tusa pengker awajsamiayi. Tura waininayat atumi juuntri ainu: Jesúsánaka maawarat tusar, Pilatonam surukarmiayi. Nuni atum kaunkaram, Pilatoka: Jesúsán jiihin akupkatjash, tau wainiatrum surimkamarume. ¹⁴ Jesúsánka tunaarinchau tura timiá pengker pujau wainiatrum, atumka nakitramiarume. Antsu mangkartin aintsun jiihi akupkati tusaram, Pilato seamiarume. ¹⁵ Nu turau asaram, tuke iwiaaku pujustinun sukartin amia nuka maamiarume. Tura wainiat Yus niin jakamunmaya inankimu asa, yamaikia iwiaakuitai. Tura asamtai iikia nu wainkau asar etserji.✠

¹⁶ “Tura Jesús nekasampita tinu asakrin, ni kakarmarijai Jesús ju wekaichaunka nekas pengker tsuwari. Turamtai atumka ju turamuka mash wainkarume.

¹⁷ “Yatsur ainautiram, antuktaram. Atumka atumi juuntri ainaujai Jesús turamiarme nuka Yuse uchirintai tutsuk turamiarme. ¹⁸ Tura yaanchuik Yuse chichamen etserin ainu: Yus akupkamu Mesías tutai wait wajaktinuitai tusa, ni chichamen etsernun Yus nunaka aamtikramiayi. Tura asamtai atum Jesús mau asaram, nu chichamka umikuitrume. ¹⁹ Tura asaram atumi yaanchuik nintimtairingkia yapajiam atumi tunaari Yus sakturat tusaram seataram. Nu turakrumningkia atumi tunaarinka sakturmartatrume. Tura atumniaka angkan awajtamsatatrume. ²⁰ Tura Yus yaanchuik: Atumi Apuri ati tinu asa, ni uchirin Jesúsán ataksha akupturmaktinuitrume. ²¹ Turayat Yus mash aa nuna yamarman najantsaing, Jesucristo yamaisha nayaimpinam pujustinuitai. Yuse chichame etserin ainu paan nintimin asar yaanchuik: Yus turonatnuitai tu tinu asaramtai, Yus mash aa nuna ataksha yamarman najanatnuitai. ²² Tura asamtai Moisés ii juuntri ainaun chicharak: ‘Ii Apuri Yus atumi aintsrin wiya nunisang kichkin akupturmak: Nuka wína chichamrun etserin ati tusa, atumin akupturmaktinuitrume. Nu atumin turamtiata nuka mash umirkataram. ²³ Tura nu Yuse chichamen etsernun umirtsuk pujuinauka Yusnau ainuajingkia iruntrarchatnuitai, antsu tuke mengkaktinuitai,’ Moisés tu aarmiayi.

²⁴ “Nunia Yuse chichame etserin Samuelsha nunisang yamai turatnun pachis yaanchuik etserkamiayi. Nunia chikich Yuse chichame etserin ainausha yamai turatnuncha pachisar mash etserkarmiayi. ²⁵ Iisha yaanchuik Yuse chichame etserin armia nuna wearinji. Tura asakrin Yus atumin pengker awajtamsatas wakerau asa, Abrahaman

✠ 3:15 (Isa. 52.14-53.12; Mat. 27.15-26; Marc. 15.6-15; Luc. 23.13-23; Juan 19. 12-15)

chicharak: ‘Kichik ami wearam akiinatata nuka mash nungkanam pujuinaun pengker awajsatnuitai,’ timiayi. Tu tinu asamtai atumsha Abrahamama weara asakrumin, Yus atumin pengker awajtamsatas wakerutmarme. ²⁶ Tura ni Uchirin atumin akupturmak: Atumi tunaui mash inaisataram tusa, atumin pengker awajtamsatas ni Uchirin eemak akupturmakmiarume,” Pedro timiayi.

4

Pedro Juanjai apu iruntramunam jukimuri

¹⁻⁴ Pedro Juanjai aints ainaun tuke chicharinak wajainai, aneachmau sacerdote ainau, tura Yus seatai jea wainu juuntrisha, tura saduceo ainausha kaunkarmiayi. Tura kaunkar anumrukar Pedro Juanjai aints ainaun nuininak wajainaun antukarmiayi. Pedro Juanjai aints ainaun nuininak: Jesús jakamunmaya nantakin asamtai, aints ainautisha jakayatrik nantaktinuitji tinau asaramtai kakerkarmiayi. Tura Pedron Juanjai achikiar, tsaanungka wajasu asamtai: Kashin chichamsha nekarami tusar kársernum engkewarmiayi. Turinamtai aints untsuri Pedro Juanjai Yuse chichame etsermaun antukaru ainau nu kintatik aishmangkuk aishmangkuk cinco warang (5,000) Criston nekasampita tusar nemarkarmiayi.

⁵ Kashin tsawaarar Jerusalénnum judío apuri ainau judío juuntri ainaujai, tura Moisésa chichame nuikiartin ainaujai iruntrarmiayi. ⁶ Tura sacerdote apuri Anás naartin, nunia Caifás, nunia Juan, nunia Alejandro, nunia sacerdote apuri wearisha mash iruntrar pujuarmiayi. ⁷ Tura aintsun akuptukar Pedron Juanjai itaarmiayi. Tura japen awajsar chicharinak:

—¿Yana kakarmarijia tura yana chichamejia atumsha aints wekaichausa tsuwar-marume? —tu iniasarmiayi.

⁸ Tu iniinam, Pedro Yuse Wakani piatkamu asa ayaak:

—Israela apuri ainautiram, juun ainautirmesha antuktaram. ⁹ Aints wekaichau pengker awajsamu pachisrum ¿itiur tsaarma? tusaram, iincha iningkratu asakrumin, ¹⁰ atumin paan ujaktatjarme. Israel ainautirmesha nusha mash paan nekaataram tusan tajarme: Ju aintska nuwik wekaichau pujuya juka yamaikia pengker wajasu wainkarume juka Nazarenumia Jesucristo kakarmarijai tsaari. Atumka Jesucristo numi winangmanum ajinkaram maamiarume, tura wainiat Yus ataksha jakamunmaya inankimia nuna kakarmarijai tsaari. ¹¹ Atumka jea jeamnua tumawaitrume. Antsu Jesúska kaya juunta tumawaitai. Ju kayaka nekas pengker au wainiatrumek, atumka jea jeamnutiram: Nuka paseetai tusaram japamiarume. Antsu Yuska: Nu kayaka timiá pengkeraitai timiayi. Jesús atumniaka uwentikramratas wakerau wainiatrumek atumka tsuutramiarume. ¹² Tura chikichnum tunaunumia uwemratnuka pengké atsawai. Mash nungka ainamunam chikicha naari pachisar uwemratnuka atsau asamtai, iin uwentikramratnuka aya Jesucristoketai, —Pedro timiayi.✠

¹³ Pedro Juanjai shamtsuk tu chichainamtai, apu ainausha nuna antukar:

—¿Warukaya nuimiarchau ainayatcha, tura mianchau ainayatcha, timiá shamkar-tutskesha chichainawa? —tunaiarmiayi. Tura Jesúsjai iruntrar nukap pujusaru asar, tu chichainawai tusar nekaawarmiayi. ¹⁴ Tura aints tsuwarmau nuni wajaun wainkau asar, chicharkatatkamawar tujinkarmiayi. ¹⁵ Tura jiiktaram tinam, Pedroncha tura Juannasha tura aints tsaarmia nunasha jiikiaramtai, nunia kanakar pujusar chichainak:

¹⁶ —¿Ju aints ainausha ituurkatjik? Jerusalénnum pujuinau mash nu aintsun tsuwar-chamniau waininayat tsuwarmaurin nekainawai. Tura asaramtai: Waitaitai ticham-nawaitji. ¹⁷ Antsu aints ainau Jesúsana pachisar etserkarai tusar, yamaikia jiyakar: Nu aintsu naari pachisrum aints kichkisha ujakairap, tu chicharkami tiarmiayi.

¹⁸ Nunia wayaawarti tusar, ataksha untsukarmiayi. Tura Pedro Juanjai wayaawaramtai:

✠ 4:12 (Juan 14.6)

—Yamaikia Jesús pachisrumka aints kichkisha pengké ujakairap. Tura nu aintsu chichame pengké nuiniarairap, —tu chicharkarmiayi. ¹⁹ Tinamaitiat Pedro Juanjai aiminak:

—¿Atum umirkataras Yus umirtsuk pujusminkai? ¿Yus nunasha wakerawak? Atumek nintimrataram. ²⁰ ¿Ii wainkamji nu tura ii antukmaji nu pachisar chichatsuk pujusminkitaij? —tiarmiayi. ²¹⁻²² Tinamtai nu aintska cuarenta (40) musach wekaichau pujuutiat, aneachmau tsuwarmau asamtai, aints ainu nuna nekaawar Yusnaka maaketai tiarmiayi. Tu tinamtai apu ainu Pedron tura Juannasha awatratat tinayat, aints ainaun shamkaru asar, aya chicharinak:

—Yamaikia waketkiram nu aints pachisrum etserkurminkia awatratatjirme, —tusar akupkarmiayi.

Cristonu ainu Yuse kakarmarin seamuri

²³ Tu akupkamu asar, Pedro Juanjai jiinkiar, Cristonu ainu pujuinamunam waketkiar: Sacerdote apuri ainu tura Israela juuntri ainu tu chichartamkamji tusar ujakarmiayi.

²⁴ Tu ujainam nuna antukar, mash iruntrar Yusen seainak:

—Apu, ame nayaimpisha, tura nungkasha, tura juun entsasha waring achat mash amek najanawaitme. ²⁵ Ami Wakanim nekas pengker aa nu ami inatiram David engketam tu aamtikramiame.

‘¿Waruka Yusen umirchau ainu Yusen kajerkar shininawa? ¿Tura warukaya nangkamiarsha nintiminawa?

²⁶ Mash nungkanmaya apu ainu aintsun inu ainuajai kaunkar, Yus apu ati tusa akupkamu waininayat niin kajerinawai.’[☆]

²⁷ “Tu aamtikramiame nuka nekasaintai. Ami uchiram Jesús akupkam: Wina Uchir asam aints ainu inarta tusam akupkamiame. Tura asakmin apu Herodes, romano apuri Poncio Pilatojai, tura chikich nungkanmaya aints ainuajai, tura Israel ainautijai ju yaktanmasha iruntrartas kaunkarmiayi. ²⁸ Tura asaramtai: Nu turunatnuitai, tinu asakmin nu chichamnaka mash umirkarmiayi.’[☆]

²⁹ “Apu, yamaisha iincha kajertaminaji nusha jisarta. Iikia ami inatiram asar, pengké shamkartutsuk aminu chichamem etserkataras wakerau asakrin kakarmaram sukartusta. ³⁰ Ami kakarmarmijai jau ainauncha tsuwararat tusam, tura ami Uchirmi Jesús naari pachisar wainchatitakatnasha takasarat tusam, tura aintska itiurkachminun turuwarat tusam kakarmaram sukartusta,” tu Yusen searmiayi.

³¹ Yusen tu seainamtai, mash iruntrar pujuinamunam uuya tumau jean peakmiayi. Turamtai Yuse Wakani nuni iruntrar pujuinaunaka mash piatkarmiayi. Tura asar shamtsuk Yuse chichamen etserkarmiayi.

Cristonu ainuka: Mash iinuitai timiauri

³²⁻³³ Cristo nuiniatiri ainu Yuse kakarmarijai ii Apuri Jesús nantakmiaurin pachisar tuke etserkarmiayi. Turinamtai Yus niincha nukap yaingmiayi. Turamtai Cristo umirin ainu mash metek nintimtunisarmiayi. Aints kichkisha: Winar aa nuka winaruketaiticharmiayi, antsu mash iinuitai tiarmiayi. ³⁴ Tura asamtai kichkisha yumakcharmiayi. Ajartin ainausha ni ajarin surukar, tura jeentin ainausha ni jeen surukar, nujai kuikian jukiar, ³⁵ Cristo nuiniatiri ainaun susarmiayi. Turinamu asar yutan yuuminak pujuinaun kichik kichik ni yuumamurincha susarmiayi.’[☆]

³⁶⁻³⁷ Turinamtai Levita aints José naartin, isra Chipre tutainum akiinamia nuka Cristonu asa ni nungkarin suruk, kuikian itaa, Cristo nuiniatiri ainaun susamiayi. Tura asamtai Cristo nuiniatiri ainu nu aintsun Bernabé inaikiarmiayi. Nuka wait anengkratin taku tawai.

¹ Tura chikich aints, Ananías naartin, ni nuwari Safirajai ni nungkari amia nuna surukarmiayi. ² Tura Ananías kuikian imiajapen akanak chikich akankamun juki, Cristo nuiniatiri ainaun weri: Juketai tusa, ni nawenini pujtusmiayi. Tura nuwarisha nunaka mash nekaamiayi. ³ Turamtai Pedro chicharak:

—Ananías, Yuse Wakani anangkatasmesha ¿waruka iwianchi apuri Satanás nintirun engkemati tusamsha tsangkamakume? Nungkarmeka surukam kuik imiajapen akankam jukiyatmesha ¿waruka juketai tame? ⁴ Nungkaka surachkumka aminu ayayi. Tura nu nungka surukam, kuik jukim nusha nunisang aminu ayayi. ¿Warukaya nekas chicham aa nu ujatsuksha, wait chichaman ujaktaj tusamsha nintimrutme? Ameka aints ainaun wait chichaman ujaktaj tayatum, nekas Yus anangkatasam wait chichamka etserme, — Pedro timiayi.

⁵⁻⁶ Tamati Ananías nuna antú wajayat jaak ayaarmiayi. Turamtai natsa ainau wayaawar, jaka tepaun kangkararmiayi. Tura iwiarsatai tusar jukiarmiayi. Turinamtai aints ainau nuna nekaawar mash shamkarmiayi.

⁷ Kampatam hora nangkamaramtai, Ananías nuwari, aishri jakaunaka nekatsuk wayaamiayi. ⁸ Wayaamtai Pedro chicharak:

—¿Atum nungka surukrumsha, nekasrumek jukek jukimiarum? —tu iniam nuwasha aimiak:

—Ja ai, juketai, —timiayi.

⁹ Tamati Pedro chicharak:

—¿Warukaya aishrumjai Yuse Wakani anangkatasrumsha wakerukmarume? Ami aishrumin iwiarsartas wearma nuka waiitinam wayaawartas wininawai. Au jiista. Au winina au amincha iwiartamsartas winitraminawai, —timiayi.

¹⁰ Tamati arutsuk Ananías nuwari Safira naartin Pedro nawen ayamas jaak ayaarmiayi. Turamtai natsa ainau wayaawar, nuwa jaka tepaun wainkar jukiar, aishri iwiarsamunam yamsar iwiarsarmiayi. ¹¹ Turuwaramtai Cristonu ainausha mash nukap shamkarmiayi. Tura chikich aints ainausha nu turunamun antukar nusha nunisarang nukap shamkarmiayi.

Wainchati takat untsuri Yuse kakarmarijai turamuri

¹² Tura Cristonu ainau Yus seatai juun jeanam wayaawar, metek nintimsar chikich tesaamu Salomón jeamkamunam tuke mash kaunkarmiayi. Turinamtai Cristo nuiniatiri ainau wainchati takatnasha, tura aints ningkikia turachminun untsuri Yuse kakarmarijai turuwarmiayi. ¹³ Tura Cristonauchu ainau nunaka pengkeraitai tinayat, Cristonu ainaujai iruntrartatkamawar shamiarmiayi. ¹⁴ Tura aishmang ainausha nunia nuwa ainausha untsuri ii Apuri Cristonka nekasampita tiarmiayi. Tura asar Cristonu ainauka untsuri yujararmiayi. ¹⁵ Tura Cristo nuiniatiri ainau turamurin nekaawar, jau ainaun jeanmaya aanum jiikiar, tepetinmasha tura washimnumsha puusar, Pedro nangkamak ni mikintrijai tsuwarti tusar, jau ainaun jintanam pujtusarmiayi. ¹⁶ Nunia chikich yaktanmaya ainausha arakchichu pujuinau asar, jau ainauncha tura iwianchruku ainauncha Jerusalénnum itaarmiayi. Tura itaaram mash pengker wajasarmiayi.

Pedro Juanjai wait wajakmauri

¹⁷ Tura asamtai sacerdote apuri chikich sacerdote ainau saduceo tutajai iruntrar Cristo nuiniatiri ainaun suwirpiaku jiiinak: ¹⁸ Kársernum engkeatarum tusar, ni aintsri ainaun akatrar akupkarmiayi. Akupkamu asar, achikiar tunau aints engketinam engkewarmiayi. ¹⁹ Turuwaramtai Yuse awemamuri kashi tari, kársera waitirin urak, Pedron Juanjai jiiki chicharak:

²⁰ —Yamaikia jiinkiram, tsawaarum Yus seatai juun jeanam wayaaram, nuni wajasrum aints ainau Yusnum tuke iwiaaku pujustin chicham ujaktaram, —timiayi.✠

²¹ Tamati Pedro Juanjai miatrusarang umirkarmiayi. Tura tsawaaramtai, Yus seatai juun jeanam wayaawar, Yuse chichame nuikiartutan nangkamawarmiayi.

✠ 5:20 (Juan 11.25;14.6; Rom. 6.4)

Tuminai Cristo nuiniatiri karsernumia jiinkinun nekachu asar, sacerdote apuri ni aintsri ainaujai: Judío apuri ainausha mash kaunkarti tusar untsukarmiayi. Tura mash kaunkaramtai chichainak:

—Jesúsa nuiniatiri ainau karsernumia jiikrum itataram, —tusar ni aintsrin akupkarmiayi. ²² Akupkamu asar, kársernum jear nuni wayaawar Cristo nuiniatirinka waintsuk, judío juuntri iruntramunam waketkiarmiayi. ²³ Tura chichainak:

—Iikia kársernum jear, waiti tuke yawikmau jeamji, tura kársera nakausha aanum wajatinau jear, tura urakar wayaar kichkisha engketu wainkachji, —tiarmiayi.

²⁴ Tinamtai sacerdote apuri, tura Yus seatai juun jea wainu apuri, tura sacerdote juuntri ainausha nuna antukar:

—Maj ¿nusha tuning wainkaintaij? —tu nintimrarmiayi. ²⁵ Tu nintimsar pujuinai, chikich aints taa chichaak:

—Aints ainau atum kársernum engkearmame nuka Yus seatai juun jeanam wajasar aints ainaun nuininawai, —timiayi.

²⁶ Tamati juun jea wainu apuri ni aintsrijai jiismi tusar juun jeanam wearmiayi. Tura nuni jear, Cristo nuiniatirin wainkar, aints ainau iin kayajai tukurmiarai tusar, pasé awajtsuk itarmiayi. ²⁷ Tura judío apuri iruntrar pujuinamunam itaar jepen awajsaramtai, sacerdote apuri chicharak:

²⁸ —Iikia atum chicharkur: Nu aintska pachisrum pengké nuiniatsuk asataram tusar, akupkamjarme nuka antutskesha, nu nuiniamuka pachitsuk Jerusalénnum mash antukarti tusaram tuke nuikiartarme. Tura atumka: Nu aintska maarume tusaram, chikich ainausha pasé nintimtikratasrum wakerarme, —timiayi.✠

²⁹ Tamati Pedro Cristo nuiniatiri ainaujai aiminak:

—Aints ainauka umirtsuk Yusek umirkamnawaitji. ³⁰ Atumka Jesúska achikrum numinam ajintaram maamarume. Tura wainiat ii juuntri ainau Yusri Jesúsna ataksha inankimiayi. ³¹ Tura nayaimpinam yakí iwiak, Israel ainauti nintimaurin yapajiakrin, ii tunaurcha sakturmartas ii aintsritin inatmin tura uwemtikin ati timiau asa, yamaikia Yuse untsurinini pujawai. ³² Iikia mash nu nekau asar etserji. Tura Yuse Wakanin ni umirkaru ainaun Yus sua nuka: Tu chichastaram tusa iinka chichantikramji, —tiarmiayi.

³³ Tinamtai judío juuntri ainau nukap kajerarmiayi, tura Cristo nuiniatiri ainaunka maawartas wakerarmiayi. ³⁴ Turinamtai chikich fariseo aints, Gamaliel naartin, nu iruntramunam pujumia nuka Moisésa chichamen nuikiartin asamtai, aints ainau niincha pengker anturin armiayi. Tura asamtai judío juuntri iruntrar pujuinamunam wajaki, Pedroncha tura Juannasha pachis: Nu aints ainau jiiktaram tama aanum jiikiarmiayi.

³⁵ Nunia Gamaliel judío juuntri ainaun chicharak:

—Israel ainautiram, atum ju aints turatai tu nintimrume auka aneartaram. ³⁶ ¿Atumka aints Teudas naartin aneaktsurmek? Nu aintska: Wikia juuntaitjai tamati, cuatro pachak ainau niin nemarkarmiayi. Tura niin mainamtai, ni nemarnuri ainauka mash tupikiakiar ni jeen waketkiar kanakar pujusarmiayi. ³⁷ Nunia ukunam aints ainau naarin papinum aatramunam chikich Galileanmaya aints, Judas naartin tamia nuna aints untsuri nemariarmiayi. Tura niincha mainamtai, ni nemarnuri ainauka mash tupikiakiarmiayi. ³⁸ Tura asamtai au aintska inaisataram tajarme. Au aints turina nusha ningki nintimsar turinakka, ningki inaisartatui. ³⁹ Tura Yus au aints ainaun: Nu turataram tamatikia, atumka au aints ainauka nepetkatatkamaram tujinkatnuitrume. Tura asaram aneartaram. Nu inaiyachkurmeka Yusjai maaniktinuitrume, —Gamaliel timiayi.✠

Tamati miatrusarang umirkarmiayi. ⁴⁰ Nunia Cristo nuiniatirin untsukar awatrararmiayi. Nuna turuwar chicharinak:

—Jesúsa naari pachisrum chichamka pengké etserkairap, —tusar akupkarmiayi.

⁴¹ Akupkaram Cristo nuiniatiri judío juuntri iruntramunmaya jiinkiar weenak: Jesúsna naari pachisar inatsaartinun Yus iin tsangkatramkamji tusar warasarmiayi. ⁴² Tura

warasar kintajai metek Yus seatai juun jeansam wayaawar, nunia chikich aintsu jeencha wayaawar, tuke inaitsuk Cristo Jesúsán pachisar nuiniararmiayi, tura Yusnum uwem-ratin chichamnasha etserarmiayi.

6

Cristo umirin ainau yaingtinun siete aints inaikiamuri

¹ Jumchik arus Cristo umirin ainau nukap yujaru asaramtai, griego chichame chichainau chikich hebreo chichame chichainaujai kajernaikiarmiayi. Tura hebreo chichamen chichainau njiyainak:

—Waje ainau yuumamuri kinta metek suayatrumsha ¿waruka waje griegon chichainausha yuumamuri metek sutsuksha pujarme? —tiarmiayi. ² Tura asamtai Cristo nuiniatiri doce (12) armia nuka: Cristonu ainau mash kaunkarat tusar untsukarmiayi, nunia mash kaunkaramtai chicharnainak:

—Aintsu yuumamuri susatasar, Yuse chichame etsertsuk pujakriki napchawaitai. ³ Tura asamtai yatsur ainautiram, atumka pengke aints nintip Yuse Wakani piatkamu ainau siete (7) eaktaram, tura nuka aints ainau yuumamuri susarti tusaram inaikiataram. ⁴ Turakrumin iisha tuke inaitsuk Yus seakur, tura Yuse chichame etserkur pujustatji, —tiarmiayi.

⁵ Tinamtai Cristonu ainau mash nuna antukar: Pengkeraitai tiarmiayi. Tu tinau asaramtai, Estebankan nu takatan takakmasti tusar inaikarmiayi. Estebanka Criston miatrusang umirnuayayi. Nusha Yuse Wakani piatkamuyayi. Nunia Filipencha, nunia Prócoroncha, nunia Nicanornasha, nunia Timónasha, nunia Parmenasnasha, nunia Antioquía nungkanmaya aintsun, Nicolás naartinasha nu takatan takakmasarti tusar inaikarmiayi. Nu aintska judíochutiat judíowa nunisang Yusen nemarkauyayi.✠

⁶ Nuniasha nu aints ainaun Cristo nuiniatiri pujuinamunam itaarmiayi. Itaaramtai Cristo nuiniatiri ainau ni uwejejai nu siete (7) aintsu muuken achirkar: Ni takatrin Yuse kakarmarijai takakmasarti tusar Yusen seatiarmiayi.

⁷ Tura Yuse chichamen etserkaru asaramtai, aints ainau untsuri nuna antukaru asar, Cristonu ainau Jerusalénnum nukap yujararmiayi. Tura sacerdote ainausha untsuri Criston nekasampita tiarmiayi.

Estebankan achikmauri

⁸ Tura Yuse Wakani Estebanka nintin piatkamu asa, aints ainaun wait anentak pengker awajsamiayi, tura wainchatí takatan ningkikia turachminun Yuse kakarmarijai turamiayi.

⁹ Tura chikich aints ainau Estebankan: ¿Warukaya Cristosha umirume? tusar iniasartas weriarmiayi. Nu aints ainau iruntai jeansam, Angkan Ainau Iruntai Jea tutainum tuke iruntrararmiayi. Nu iruntai jeansamsha Cirene nungkanmaya ainau, tura Alejandría nungkanmaya ainausha, tura Cilicia nungkanmaya ainausha, tura Asia nungkanmaya ainausha nuni iruntrararmiayi. ¹⁰ Tura Estebankan Yuse Wakani piatkamu asa, Yus ni nekamtairi susamu asamtai, nunia aints ainau ni chichamejaingkia nepetkatakamawar nepetkacharmiayi. ¹¹ Tura asamtai Estebankan suwirpiaku jiisar, chikich ainaun wainkar, kanakar pujusar kuikian susar:

—Atumka tsanumkuram chicharkuram: Au aintska Moisésán pachis pasé chichasmayi, tura Yusen pachis pasé chichasmayi titaram, —tusar akikiarmiayi. ¹² Tu tinam, tsanumin ainau: Ayu tusar, chikich aints ainaun, tura ni juuntri ainauncha, tura Moisésa chichame nuikiartin ainauncha Estebankan pachisar pasé nintimtikarmiayi. Nunia Estebankan achikiar judío apuri iruntrar pujuinamunam jeeniarmiayi. ¹³ Tura jeeniaramtai chikich aints ainaun: Estebankan pachisar wait chichaman etserkarat tusar itaarmiayi. Turinamtai nuka waitrinak:

—Auka Yus seatai juun jeansam nekas pengker aa nuna pachis tuke itiattsuk pasé chichasmayi, tura Moisés umirkatin chichamnasha pachis tuke pasé chichasmayi. ¹⁴ Tura

✠ 6:5 (Hech. 21.8)

chichaak: Nazaretnumia Jesús Yus seatai juun jean yumpungtatui, tura Yus Moisésnum chichaman iin akupturmakmiaji nuna yapajiatatui timiayi, —Estebankan tsanuminak tiarmiayi.

¹⁵ Tinamtai judío apuri iruntramunam pujuinauka Estebankan jiiij pujuriarmiayi, tura Estebanka yapiin Yuse awemamuria tumaun wainkarmiayi.

7

Esteban Yuse chichamen etserkamuri

¹ Tura Estebankan wainkar sacerdote apuri iniak:

—¿Ju amin pachitmasar turamina nuka nekaskai? —timiayi.

² Tama nisha ayaak:

—Juun ainautiram yatsur ainautirmesha antuktaram. Ii juuntri Abrahamama tura-muri nintimrataram. Ii juuntri Abraham Harán nungkanam weatsaing, Mesopotamia nungkanam pujamtai, ii Apaachiri Yus nekas pengker aa nu niin wantintukmiayi.

³ Tura Yus chicharak: ‘Ame nungkarminia jiinkim, ami wearam ainau ukukim, chikich nungkanam wi inaktustatjame nuni weta,’ timiayi.✠

⁴ “Yus tu timiau asa, Abraham Caldea nungkanmaya jiinki, Harán nungkanam pujustas wemiayi. Nunia ni apari jakamtai, Yus Abrahaman: Chikich nungkanam weta timiau asa, atumi nungkari yamai atum pujarme juni tamiayi.✠ ⁵ Antsu nungkanka jumchiksha susachmiayi. Tura uchin kichkisha yajutmachu wainiat, Yus chicharak: ‘Ame jakakmin ami wearmin ju nungkan susatnuitjai,’ timiayi.✠

⁶ “Tura Yus chicharak: ‘Ami wearam ainau nukap yujarar, chikich nungkanam pujusartinuitai. Tura nuni pujusar, chikich nungkanmaya ainau inatiri asar, cuatro pachak musach wait wajakartinuitai. ⁷ Tura ami wearmin wait wajakminiun suwinaunka wisha wait wajakminiun susartinuitjai. Nunia ami wearam nu nungkanmaya jiikiaran, ju nungkanam wína umirtukartinuitai,’ Yus timiayi.✠

⁸ “Nunia Yus Abrahaman chicharak: ‘Wina chichamur umirtukta. Juwaitai wina chichamruka: Aishmang ainau akiina ocho (8) kinta nangkamaramtai, nuwapchiri mash charutkataram. Ami wearam wína aintsur asar, tuke inaitsuk ju akupamurun umirtukarti,’ timiayi. Tu timiau asa, Abrahamama uchiri Isaaca akiinamuri ocho (8) kinta nangkamaramtai, Abraham ni uchiri nuwapchirin charutkamiayi. Nunia Isaaca uchiri akiinamtai, nusha nunisang turamiayi. Tura Jacobssha nunisang turamiayi. Jacobo uchiri doce (12) amia nuka yaanchuik ii juuntri armiayi.✠

⁹ “Tura ii juuntri ainau Jacobo uchiri armia nuka ni yachiin Josén suwirpiaku jiinau asar: Egipto inatiri ati tusar surukarmiayi. Tura wainiat Yus Josénka pengker awajsamiayi.✠ ¹⁰ Tura José itiurkachmin pujau wainiat Yus niincha uwemtikramiayi, tura ni nekamtairincha susamiayi. Tura Egipto apuri faraón tutai niin pengker awajsati tusa Yus wakerumtikiamiayi. Tura asamtai faraón Josén Egipto nungkarin tura ni aintsri ainauncha mash wainin ata tusa inaikiamiayi.✠

¹¹ “Nunia Egipto nungkanam, tura Canaán nungkanmasha tsuka amatai, Canaán nungkanam pujuinau nukap wait wajakarmiayi. Tura tsuka nukap au asamtai, ii juuntri yutan wainkartakamawar wainkacharmiayi. ¹² Tura ii juuntri Jacob: Egipto nungkanam trigo awai tamaun antuk, ni uchiri ainaun: Nuni werum trigo sumataram tusa akupkamiayi. Turamtai wear yutan sumakar waketkiarmiayi.✠

¹³ “Nunia ataksha: Yurumak sumaktai tusar taaramtai, José ni yachí ainaun: Wikia atumi yachiinjai tusa nekamtikiamiayi. Turamtai faraón: Joséka Israela wearintai tusa nekaamiayi.✠ ¹⁴ Turamtai José ni yachí ainaun chicharak: Wína apar ni wearai ainaujai setenta y cinco (75) aints mash juni itataram tusa akupkamiayi.✠

✠ 7:3 (Gén. 12.1) ✠ 7:4 (Gén. 12.4) ✠ 7:5 (Gén. 12.7) ✠ 7:7 (Gén. 15.13-14) ✠ 7:8 (Gén. 17.10-14)

✠ 7:9 (Gén. 37.11, 28) ✠ 7:10 (Gén. 41.39-41) ✠ 7:12 (Gén. 42.1-2) ✠ 7:13 (Gén. 45.1, 16) ✠ 7:14 (Gén. 45.17-46.27)

¹⁵ “Turamtai Jacob ni weari ainaujai Egipto nungkanam wearmiayi. Tura Jacobsha, tura ni uchiri ainausha mash juunmarar nuni jakarmiayi. ¹⁶ Nuni jakaramtai nukap arus, ni weari ainau José kunchinka jukiar, Siquem nungkanam iwiarsarmiayi. Abraham: Ii weari nuni iwiarsami tusa, nungka Hamora uchirinu amia nuna ni kuikiarijai sumaku asamtai, nuni iwiarsarmiayi.

¹⁷ “Tura Yus Abrahaman: Wisha ami wearmin nukap yujratnuitjai timia nu kinta jeatak wajasamtai, ni weari ainau Egipto nungkanmaka nukap yujararmiayi. ¹⁸ Nukap yujararai, chikich apu José wainchau Egipto apuri amiayi. ¹⁹ Nuka ii juuntri ainaun anangka pasé awajsamiayi. Tura: Israela uchiri jakarti tusa chichaman akupak: ‘Atumi uchiri yamai akiinauka mash entsanam ujungtaram,’ timiayi. ²⁰

“Nunia Moisés akiinamiayi. Turamtai Yus niin pengker awajsamiayi. Tura asamtai ni nukuri uchirin kempatam nantu ni jeen uukmiayi. ²¹ Nunia uuktakama tujintak entsanam ujungtin kinta jeamtai, uchinha pitaknum engkea entsanam inanmasmiayi. Turamun faraónka nawantri juki, ni uchiria nunisang tsakatmarmiayi. ²² Tura asamtai Egipto ainau nekarmia nuna mash Moisésan nuiniararmiayi. Tura miatrusarang nuiniarmanu asa, kakarman chicharkartin ayayi. Tura turamurincha kakarman turinuyayi. ²³

“Nunia Moisés cuarenta (40) musachrintin pujak, Israel ainaun ni weari asamtai, jiiistaj tusa wemiayi. ²⁴⁻²⁵ Tura weai, Egipto aints Israel aintsun awatun wainak, nuna jiiij wajatmiayi. Tura nintimias: Wikia Egipto aintsun maamtaikia, wi wear nuna wainkar: Nekas Yus iin akupturmaku asa, iincha ayamrutmaktatji, tu nintimrartatui, Moisés tu nintimias, Egipto aintsun maamiayi. Tura waininayat Israel ainauka tuuka nintimrcharmiai. ²⁶ Kashin tsawaar Moisés ni weari ainaun ataksha jiiistas weai, mai Israeltak maaninaun wainak: Kajernaisuk asataram titas weri chicharak: ‘¿Warukaya mai Israeltaksha maaniarme?’ timiayi. ²⁷ Tamaitiat chikich aintsun awatmia nuka Moisésan shitak: ‘¿Ameka ii apurinkitam? ¿Yaachia amincha chicharuta tusasha akuptamkama?’ ²⁸ ¿Yaau Egipto aints maamame nunismek winasha mantuatasam turutsumek?’ timiayi. ²⁹ Nu tímia Moisés tupikiaki Madián nungkanam we, nuni pujus uchin jimieran yajutmarmiayi. ³⁰

“Nunia cuarenta (40) musach nangkaramtai, Moisés aints atsamunam mura Sinaí tutainum jeatak wajasai, numi jangkirtin keamunam Yuse awemamuri wantintukmiayi. ³¹ Tura numi keaun kajinchau asamtai, Moisés nuna wainak: ¿Warukang kajintsu? tusa: Wisha wakemkan jiisnaka wainkainjapi, tu nintimias weri wakemak jiiiai, Yus chichau antukmiayi. ³² Tura Yus chicharak: ‘Wiitjai ami wearmi Yusrinjai. Tura asan Abraham Yusrinjai. Tura Isaaca Yusrinjai. Tura Jacobo Yusrinjai,’ timiayi. Yus tama Moisés kuraimiayi, tura jiiistakama shamkamiayi. ³³ Turamtai Yus chicharak: ‘Nungka wajame auka winaruitai. Tura asamtai sapatrum kuinkam ukuktia. ³⁴ Wína aintsur Egipto nungkanam pujuinau wait wajainaun wainkau asan, tura ni juutinauncha antuku asan, wína aintsur ainaun ayamruktasan winajai. Tura asamtai yamaikia Egipto nungkanam waketkita. Amin nuni akupkatasan wakerajme,’ Yus timiayi. ³⁵

“Ii juuntri ainau Moisésan chicharinak: ‘¿Ameka ii apurinkitam? ¿Yaachia amincha chicharuta tusasha akuptamkama?’ tusar nakitraru wainiat, Yus ni awemamurin numi jangkirtin keamunam Moisésan wantintukti tusa akuptukmiayi. Tura Moiséska Israel ainau apuri ati, tura ayamrukti tusa akupkamiayi. ³⁶ Turamtai Moiséska Israel ainaun Egipto nungkarinia jiiikmiayi. Tura Egipto nungkanam, tura juun entsa Kapantin Entsa tutainum, tura aints atsamunam cuarenta (40) musach wekaas, Yuse kakarmarijai ningkikia turachmin ayat, wainchati takatnaka turamiayi. ³⁷

☆ 7:15 (Gén. 49.33) ☆ 7:18 (Ex. 1.7-8) ☆ 7:19 (Ex. 1.22) ☆ 7:20 (Ex. 2.2) ☆ 7:22 (Ex. 2.3-10) ☆ 7:29 (Ex. 2.11-15;18.3-4) ☆ 7:34 (Ex. 3.1-10) ☆ 7:36 (Ex. 7.3;14.21)

³⁷ “Moiséska ni weari ainaun chicharak: ‘Yus atumi aintsrin kichik: Wína chichamur etserin ata tusa, wiya nunisang atumin akupturmaktinuitrume,’ timiayi.[☆] ³⁸ Tura asamtai Moiséska aints atsamunam Israel ainaujai iruntrar puju armiai. Tura ii juuntri ainaujai mura Sinaí tutainum iruntrar pujuinai, Yuse awemamuri Moisésjai chichasmiayi. Turamtai Moiséscha Yuse chichamen tuke pujustiniun sukartin aa nuna iin nekantikramatas antukmiayi.[☆]

³⁹ “Tura waininayat ii juuntri ainau Moisésan: ‘¿Ainusha itiur umirkatjik?’ tusar niin umirtan nakitinau asar, Egiptonam waketkiartas nintimiarmiayi. ⁴⁰ Tura asar Aarónkan chicharinak: ‘¿Ainusha Moiséska iin Egiptonmaya jiirmakmiaji nusha tutsuk werumi? Iikia nekatsji. Tura asamtai ii yusri najatruata. Nuka eemak wekaamtai, iisha nemarsatatji,’ tiarmiayi. ⁴¹ Nunia waaka uchiri nakumkar kurin najanawarmiayi, tura ni yusrin ni uwejejai ningki najanawariat, maaketai tiartas tangku ainaun maawar epewarmiayi, nunia nakurusarmiayi.[☆]

⁴² “Turinau asaramtai Yuska ii juuntri ainaun ukukmiayi. Turamtai ii juuntri ainau yaa ainaun Yus nayaimpinam ekentsau waininayat: Ii yusrintai tiarat tusa, Yuska tsangatkamiayi. Yuse chichame etsernusha yaanchuik nuna pachis tu aarmiayi.

Yus chichaak: ‘Israel ainautiram, cuarenta (40) musach aints atsamunam wekaakuram tangku ainau maaram, wína surustasrumka nekasrum turachmiarume. ⁴³ Antsu tangku ainau wínaka surutsuk, chikich yus, Moloc tutai yuschau wainiatrum, nuka ii yusrintai tusaram, nunia yaa Refán tutai ii yusrintai tusaram, atumek nakumkaram tikishmatratasrum najanamiarume. Tura asamtai wikia atumin Babilonia nungkan nangkaikin akupkatnuitjarne,’ Yuska timiayi. Tu aar-mawaitai.[☆]

⁴⁴ “Yus Moisésan: ‘Jear tarach najanamu jeartukta tusan, wisha inaktustatjame,’ tinu asamtai, ii juuntri ainau aints atsamunam Yusjai iruntai jean Yus tímia nunisarang jeamkarmiayi.[☆] ⁴⁵ Ii juuntri ainau nu jean tarachjai jeamkaramtai, ni uchiri ainau wekaasar, ju nungkanmasha Josuéjai taarmiayi. Tura Yus yaingmau asar, ju nungkanam pujuinaunka jiikiarmiayi. David apu naamtsaing, nu tarach jeaka ju nungkanam tuke ayayi.[☆]

⁴⁶ “Davidcha Yusen pengker awajsamiayi, tura ii juuntri Jacobo Yusri, Davidta Yusri asamtai, David Yuse jeen jeamkatas wakerimiayi. ⁴⁷ Tura Yus nuna surimkau asamtai, Salomón Yuse jeen jeamkamiayi. ⁴⁸ Turayat Yuska nekas juun asa, aints ainau ni uwejejai jeamkamunmaka pujuschamnawaitai. Yuse chichame etsernusha yaanchuik tu aarmiayi.

⁴⁹⁻⁵⁰ Yus chichaak: ‘Wiki mash aa nunaka najanau asan, nayaimpikia wina keem-tairuitai. Tura nungkaka wína najamtairuitai. ¿Winasha warí jea jeartuktas-rumea wakerutarme? ¿Wína ayamtairuka tuwaita?’ Yus timiayi.”

⁵¹ Nunia Esteban tuke etserak:

—Atumka katsuram nintintin asaram, Yus umirchawa nunisrumek nintimrume, tura Yuse chichame antut nakitau asaram, atumi juuntri turuwarmia nunisrumek Yuse Wakaningkia kajerin ainiarme. ⁵² Nintimrataram. Atumi juuntri ainau Yuse chichame etserin ainauncha tuke kajerin armiai. Tura Yuse chichamen etserin ainau: ‘Nekas Tunaarinchau aa nu taratnuitai,’ tu etserinaunka atumi juuntri ainau main armiai. Tura asaramtai ‘Nekas Tunaarinchau’ aa nu taamtai, atumsha nunisrumek ni anangkaram achikrum maamiarume.[☆] ⁵³ Tura asaram Yuse awemamuri ainau Moisésnum chichaman akupinak: Nu chicham umirkataram tiaru wainiatrumek atumka nu chichamka pengké umikchamiarume, —Esteban timiayi.

Estebanka maamuri

⁵⁴ Esteban tamati nuna antukar, judío juuntri ainau kakarar kajerinak nainka katetet awajiarmiayi. ⁵⁵ Turinamtai Esteban, Yuse Wakani piatkamu asa, nayaimpinmanini

☆ 7:37 (Deut. 18.15) ☆ 7:38 (Ex. 19.1-20.17) ☆ 7:41 (Ex. 32.1-6) ☆ 7:43 (Am. 5.25-27) ☆ 7:44 (Ex. 25.9, 40) ☆ 7:45 (Josué 3.14-17) ☆ 7:52 (Mat. 5.12)

pangkai jiihkama Yuse paaniurin wainkamiayi. Tura Yuse untsurinini Jesús wajaun wainkamiayi. ⁵⁶ Tura wainak, nu aints ainaun chicharak:

—Pangkairam jiiistaram. Nayaim uraniun wainjai. Tura Yus akupkama nuna Yuse untsurinini wajaun wainjai, —timiayi.

⁵⁷ Tama aints ainau kajerkar kakarar shinukiar, kuwishin epetkar irunturar Estebankan achikiarmiayi. ⁵⁸ Turuwar yaktanmaya jiiikar, kayajai tukuarmiayi. Tura aints ainau kayajai tukuartas ni wejmakrinka aimiakar: Natsa Saulo ii wejmakrin wainkati tusar, ni wajamunam tuktusarmiayi. ✠

⁵⁹ Tura kayajai tukuinam Esteban Jesúsán seak:

—Apuru Jesúsá, wakanur jurutkita, —timiayi. ✠ ⁶⁰ Tura tikishma kakar untsamak:

—Apuru, ju tunau turina juka tsangkurata, —timiayi.

Nuna tina nuniangka jakamiayi. ✠

8

Saulo Cristonu ainaun kajerkamuri

¹⁻⁴ Tura Estebankan maawaramtai, Sauloka: Nu aintsu maamuri pengkeraitai timiayi. Turamtai Cristonu ainau Estebanka namangken jukiar iwiarsarmiayi. Tura wake mesekar nukap juutiarmiayi. Nu kintati Cristonu ainau Jerusalénnum pujuinau nukap wait wajakartiniun nangkamawarmiayi. Saulosha nu aints ainaun mash amuktaj tusa, kichik kichik aints pujuinamunam waya, aishmang ainauncha, tura nuwa ainauncha achik japiki kársernum engkewarat tusa akupnuyayi. ✠

Samaria nungkanam Cristo chichame etserkamuri

Cristonu ainau mash Jerusalénnumia jiiinkiar, Judea nungkanam, tura Samaria nungkanmasha anumkartas niish niish tupikiakiarmiayi. Tura tupikiakiar, yaja wekainaksha tuke inaitsuk Yusnum uwemratin chichaman etseriarmiayi, antsu Cristo nuiniatiri ainauka Jerusalénnum juwakarmiayi. ⁵ Turunawaramtai Felipe Samaria nungkanam chikich yaktanam we, aints ainaun chicharak:

—Yus atumin uwemtikramratnun akupkatatjai tímia nuka Jesúsaitai, —timiayi. ✠

⁶ Tama aints ainau mash iruntrar titu pujusar Felipe chichamen pengker nintimsar anturkarmiayi. Turuwar wainchati takatan Felipe turaun wainkarmiayi. ⁷ Turamtai iwianchrintin ainausha untsuri iwianchri kakarar untsamak jiiinkiarantai tsaarmiayi. Nunia kijiru ainausha, tura wekaichau ainausha untsuri tsaarmiayi. ⁸ Tura asamtai nu yaktanmaya ainau untsuri warasarmiayi.

⁹ Tuminamtai nu yaktanmasha wishin Simón naartin pujumiayi. Nuka Samaria nungkanmaya ainaun anangkak:

—Wikia nekas juuntaitjai, —tinuyayi. ¹⁰⁻¹¹ Tura wishin asa, aints ainaun anangkau asamtai, nu yaktanmaya kuikiartin ainausha, tura kuikiartichu ainausha niin mash pachiararmiayi. Tura páchinak:

—Nu aintska Yuse kakarmari jukin asa, timiá kakarmaitai, —tiarmiayi. ¹² Antsu Felipe Yus aints ainaun inartata nuna pachis, tura Jesucristo naarin pachis uwemratin chichaman etseru asamtai, aints ainausha tura nuwa ainausha nuna antukar, Criston nemarkartas mainiarmiayi. ¹³ Turinamtai Simónsha Criston nekasampita tusa maamiayi. Tura Felipe Yuse kakarmarijai wainchati takatnasha turaun wainak: ¿Wisha warukawainjak? tu nintimias Felipejai tsanias wekaasamiayi.

¹⁴⁻¹⁶ Nunia Cristo nuiniatiri Jerusalénnum pujuinau: Samarianmaya ainau Yuse chichamen umirinawai tinamun antukar, Pedroncha nunia Juannasha Samarianam akupkarmiayi. Tura akupamu asar, Samarianmaya ainaun Yuse Wakani piatkachmau ainayat, ii Apuri Jesúsán nemarkaru ainau imainiaru asaramtai, Pedro Juanjai Yusen

✠ 7:58 (Hech. 22.20) ✠ 7:59 (Sal. 31.5; Luc. 23.46) ✠ 7:60 (Luc. 23.34) ✠ 8:1-4 (Hech. 11.19;22.4-5;26.9-11)

✠ 8:5 (Hech. 21.8)

seainak: Yuse Wakani Cristonu ainaun piatkati tusar seatiarmiayi. ¹⁷ Nunia muuken achirkaramtai, nu aintsu nintin Yuse Wakani piatkamiayi.

¹⁸⁻¹⁹ Cristonu ainau muuken achirkar, Yusen seainamtai, Yuse Wakani engketau asaramtai, Simón nuna wainak Pedron, tura Juannasha chicharak:

—Winasha atumi kakarmari kuikijai surustaram. Wisha aints ainaun páchitsuk uwejrujai achikian Yuse Wakanin engketami tusan tajarme, —timiayi.

²⁰ Tamati Pedro ayaak:

—Kuikiarmeka amijai metek mengkakatnuitai. ¿Yus ni kakarmarin ningki wakerak sukarta nuka kuikijai sumakminkai? ²¹ Yus nintimtichu asam, Yuse Wakanijai turatin pengké tujintame. ²²⁻²³ Ameka wiya nunismek Yuse takatri takakmat wakerayatum, nintimin tsaangkua tumau yapau pujurtamu asamtai, ameka tunaarumjai jingkiamua nunismek pujame tu nekajme. Tura asam tunaarum yamaikia inaisam ukukta. Tura Yus seata. ¿Nu turakmin Yus ami tunaarumin tsangkutramrashtimpiash? —Pedro timiayi.

²⁴ Tama Simón ayaak:

—Wína turutrumena nu turunawai tusaram, Yus seatritaram, —timiayi.

²⁵ Tamati Pedro Juanjai nu aints ainaun Jesúsa turamurin ujarak, tura Yuse chichamen etserkar umisar, Samaria nungkanam wekaasar, chikich chikich yaktanam Yusnum uwemratin chichaman etserkiar Jerusalénnum waketkiarmiayi.

Felipe Etiopíanmaya aintsun Jesúsan pachis ujakmauri

²⁶ Nunia Yuse awemamuri Felipe wantintukmiayi. Tura chicharak:

—Felipea, wári umisam ju yakat ukukim, Jerusalén nangkaikim yakat Gaza tutainum jinta amatkamunam nuni aints atsamunam wekaasata, —timiayi. ²⁷⁻²⁸ Tamati Felipe wári umis, nu jintan amak, aints atsamunam weai, Etiopíanmaya aints Jerusalénnum Yusen maaketai titas we, nunia kawai kárrun japiki weamunam engkema, nu jintanam ni nungkarin waketkitas weun wainkamiayi. Nu aintska Etiopíanmaya nuwa inakratniu kuikiarin wainuyayi. Nu aintska kárrunam weak yaanchuik Yuse chichame etserin Isáfasa aarmaurin aujki wemiayi. ²⁹ Tura nuni papin aujki weamtai, Yuse Wakani Felipe chicharak:

—Au kárru wea au mankiata, —timiayi.

³⁰ Tamati Felipe nuni we, nu aintska Yuse chichamen etserin Isáfasa aarmaurin aujki winaun anturkamiayi. Tura iniak:

—¿Ame aujmena nunaapi tawa tusam nekamek? —timiayi.

³¹ Tu iniam nuka ayaak:

—Atsa, wína nekamtikruatnuka atsau asamtai ¿itiur nekaatjak? —timiayi. Tura:

—Juni wakam, wijai keemsam ujakkata, —tamati Felipesha warukmiayi.

³² Isáfasa aarmaurinja aujki winaun anturkamia nuka nuwaitai:

“Uwijan maawartas juwina nunisarang Niincha jukiarmiayi. Tura uwija uchiri ure awaam, juutsuk tepawa nunisang chichakchamiayi.

³³ Niincha inatsaararmiayi, tura tunaarinchau waininayat, wait wajaktiniun susarmiayi. Tura ju nungkanam iwiaaku pujaun maamuncha ¿yaa ni wearing pachischa chichakat?” Tu aarmawaitai.✠

³⁴ Nu aarmau aujsar umisar, Etiopíanmaya aints Felipe iniak:

—Wait aneasam ujakkata. ¿Yuse chichame etserin yána pachisa takua tawa? ¿Ningkik tumama? ¿Antsu turachkusha kichan pachisash tawa? —timiayi.

³⁵ Tu iniam: Ju aarmauka Jesúsan pachis taku tawai tusa, Felipe uwemratin chichaman Jesúsan pachis ujaktas nangkamamiayi. ³⁶ Tura kárrunam jinta weenak entsa aun nangkainak Etiopíanmaya aints chicharak:

—Jiisia, juwaitai entsa. ¿Jesucristo umirkat tusam juni imiatchamnaukitam? —tu iniasmiayi. ³⁷ Tu iniam Felipe ayaak:

✠ 8:33 (Isa. 53.7-8)

—Jesucristo nekasampita takumningkia imaimnawaitjame, —timiayi. Tamati nu aintska chicharak:

—Jesucristo nekasampi Yuse Uchirinta, wikia tajai, —timiayi.

³⁸ Nunia kawain wajasat tusar awajsarmiayi, tura mai kárrunmaya kuankiar entsanam wear, Felipe nu aintsnaka imaimiayi. ³⁹ Tura mai entsanmaya jiinkiarantai, Yuse Wakani Felipen jukimiayi. Turantai nuwa kuikiarin wainin Felipen waintsuk ningki juwakmiayi. Turayat waras kárrurin engkema ni nungkarin waketkimiayi. ⁴⁰ Turantai Yuse Wakani Felipen jukin asa, Azoto yaktanam jeemiayi. Turantai nunia jiinki chikich chikich yaktanam Yusnum uwemratin chichaman Jesucriston pachis tuke etserki Cesarea yaktanam jeemiayi.

9

Saulo Cristo umirkamuri

¹ Nunia Saulo inaitsuk Cristonu ainaun kajerak maatas wakerimiayi. Tura asa sacerdote apuri jeen jea chicharak:

²—Papi aaram surusta. Wikia Damasco yaktanam iruntai jeenam wayaan nuna apurin nu papin inaktusan, yamaram chichaman umirin ainaun aishmangnasha, tura nuwancha wainkanka, achikian jing kian jukin juni Jerusalénnum ikiankatasan wakerajai, —timiayi. ³ Tura nu papi aarmaun juki, jinta weaun Damasco yaktanam jeatak wajaun aneachmau nayaimpinmaya paantin Saulon tenteamiayi. ⁴ Turantai shamak nungká ayaar kuta antumkamiayi. Tura chichaman antukmiayi. Nu chichamka nuwaitai:

—Saulo, Saulo, ¿waruka winasha waitkaratasmesha wekaaturme?

⁵ Tamati Saulo ayaak:

—Apuru ¿amesha yaachitme? —tu iniam ataksha nayaimpinmaya ayaak:

—Wikia Jesúsaitjai. Ame waitkaratasam wekaaturme nuwaitjai. Waaka kajek numin najar nawen meseawa nunismek amek ami nintim meseame, —timiayi. ⁶ Tamati Saulo shamak kurangmaikiak:

—Apuru ¿warí itiurtukat tusamea wakerutame? —timiayi. Tamati Jesús ayaak:

—Wajakim weme nu yaktanam weta. Nuni jeakmin ame turatatme nuna ujatmakar-tatui, —timiayi.

⁷ Tamati aints nijai tsaniasar wekainausa chichaamun antukarmiayi. Antsu aintsnaka pengké wainkacharmiayi. Tura asar shaminak chichatsuk wajasarmiayi. ⁸ Tuminantai Saulo kuta antuma pujayat wajaki wainmaktatkama tujinkamiayi. Tura asamtai uwejen tap achikiar jukiar, Damasco yaktanam jeeniarmiayi. ⁹ Tura nuni jea kempatam kinta wainmatsuk yurumkancha yutsuk, tura amutnasha amutsuk pujumiayi.

¹⁰ Saulo tu pujantai, Damasco yaktanam Cristo nemarkin Ananías naartin pujuyayi. Turantai Apu Jesús niin wantintuk:

—Ananías, —timiayi. Tamati nuka ayaak:

—Apuru, juni pujajai, —timiayi.

¹¹ Tamati ataksha Apu Jesús chicharak:

—Ame wajakim Jinta Tupin tutainum weta. Nuni Judasa jeen jeam, Tarsonmaya aints Saulo naartin nuni pujau iniasta. Tura nuka Yuse seak pujau wainkatatme. ¹² Ame jeemin pujamning, nu aintsnaka karanma nunisnak amin wainmamtikiamjame. Tura jeenam wayaam, uwejmijai ni muuken achikiam: ‘Ataksha wainmakta,’ tusam paan wainmamtikiamjame, —Jesús timiayi.

¹³ Tamati nuna antuk Ananías ayaak:

—Apuru, nu aintsun pachisar wina untsuri ujatarmayi, tura Jerusalénnum amin umirtaminak pujuinaun nu aintska pasé awajsamurin untsuri ujatinaun antukmajai.

¹⁴ Tura sacerdote apuri papi aarmau susam, yamai juni taa, amin seatmina nuna mash achiktaj tusa tayi, —timiayi.

¹⁵ Tamati Apu Jesús chicharak:

—Tutsuk weta. Nuka antukiatmek nu aintska wína inatir ati tusan, judíocho ainauncha, nunia apu ainauncha, nunia Israela weari ainauncha wína pachitas chicharkat tusan, wikia niin eakmajai. ¹⁶ Tura wína pachitas nukap wait wajaktiniun nekamtikiatjai, —timiayi.

¹⁷ Tamati Ananías we, Saulo pujamunam jea, nuni waya ni uwejejai muuken achik chicharak:

—Yatsuru Saulo, ame jinta winamin Apu Jesús wantinturmak amijai chichasma nuka amincha wainmamtikiat tusa, tura Yuse Wakani ami nintimin piatramkat tusa wina akuptuki, —timiayi.

¹⁸ Tama wainmachiat namaka saapea tumau ni jiinia ayaarmiayi. Tura asamtai Saulo ataksha paan wainmakmiayi. Tura wajaki Criston nemarkatas maaimiayi. ¹⁹ Nunia yutan yuwa ni namangken kakamtikramiayi. Tura Cristonu ainu Damasconam pujuinaujai tsanias jumchik kinta pujusmiayi.

Saulo Damasconam Cristo chichamen etserkamuri

²⁰ Nunia iruntai jeanam waya: Jesús Yuse Uchirintai tusa etserkamiayi. ²¹ Turamtai nu chichaman antukaru ainauka mash nintimrar:

—¿Ju aintska Jerusalénnum Jesúsán seau ainaun achiktas wekainuya nuchaukai? ¿Tura junisha taa, nu aints ainaun achik jingkia sacerdote juuntri ainamunam jeetias tamia nuchaukai? —tiarmiayi.

²² Tinamaitiat Saulo shamkartutsuk: Jesús nekas aints ainautin uwentikramratnuitji tusa, Yuse kakarmarijai chichau asamtai, judío Damasconam pujuinau: Nekaschawaitai tiartatkamawar tujinkarmiayi.

Saulo ayamrukmauri

²³ Nukap kinta arus judío ainu Saulon maatai tusar, chichaman najatawarmiayi. ²⁴ Tura judío ainu tsawaisha, tura kashisha yakta waiitiri ainamunam wajasar: Saulo jijnmatai achikiar maatai tusar nakakarmiayi. Turinamaitiat Sauloka nunaka nekaamiayi. ²⁵ Tura asamtai Cristonu ainu kashi Saulon juun changkinnum engkewar, yakta wenukrinia naekjai itarar jiikiar akupkaram tupikiakmiayi.✠

Saulo Jerusalénnum waketkimuri

²⁶ Saulo Jerusalénnum waketki, Cristonu ainuajai iruntratas wakerimiayi. Turamaitiat Sauloka Cristo umirnuитай, tuuka nintimtsuk mash shamkarmiayi. ²⁷ Tura wainiat Bernabé Saulon juki, Cristo nuiniatiri pujuinamunam itamiayi. Tura ita chichaak:

—Juka jinta weak ii Apuri Jesúsán wainkami. Turamtai ii Apuri niin chichasmau asa, Damasconam jea, shamkartutsuk Jesúsá kakarmarijai chichasmayi, —timiayi. ²⁸ Tamati Saulo Jerusalénnum juwakmiayi, tura Cristo nuiniatiri ainuajai wekaasamiayi. Tura shamkartutsuk Apu Jesúsá kakarmarijai chichauyayi. ²⁹ Tura Sauloka Jesúsán pachis chichasmiayi. Turamtai judío griego chichamejai chichau armia nu nuni pujuarmiayi. Tura Saulojai chichainu asar, niincha maatar wakeriarmiayi. ³⁰ Turinamtai Cristonu ainu nuna nekaawar, Saulon maawarai tusar, Cesarea yaktanam jeeniar:

—Ami yaktarmin Tarsonam weta, —tusar akupkarmiayi.✠

³¹ Tura asamtai Cristonu ainu Judea nungkanam tura Galilea nungkanam tura Samaria nungkanam pujuinausha mash pengker nintimsar angka pujusarmiayi. Tura Criston miatrusarang umirkar: Tunau wajasai tusar shaminak, Yuse Wakani kakarmarijai nukap yujararmiayi.

Eneasa tsuwarmauri

³² Pedro nu nungkanmasha wekaak, Lida yaktanam Cristo umirin pujuinamunam jeamiayi. ³³ Tura nuni jea, aints Eneas naartinun wainkamiayi. Nuka kijiru asa, ocho (8) musach wekaichau ni peakrin tepeyayi. ³⁴ Tura nu aintsun wainak Pedro chicharak:

—Eneasa, Jesucristo amin yamai tsuwarmawai. Tura asamtai nantakim sekmatiram tuksata, —timiayi.

✠ 9:25 (2.Cor. 11.32-33) ✠ 9:30 (Hech. 26.20)

Tamati nu tamaujai metek Eneas nantakmiayi. ³⁵ Turamtai Lidanam tura Sarón yaktanam pujuinau nuna wainkar, ii Apurin umirkarmiayi.

Dorcac jakamunmaya nantakmiauri

³⁶ Tura Jope yaktanam nuwa Cristo umirin, Tabita naartin pujuyayi. Nuka griego chichamejai Dorcas taku tawai. Nu nuwaka tuke pengker aa nuna takaak, tuke yu-uminauncha yainuyayi. ³⁷ Dorcas nuni pujus sungkuran achimiak jakamiayi. Turamtai namangken nijarar, pata yakí amanum patasarmiayi. ³⁸ Patasaramtai Pedro Lida yaktanam arakchichu pujau asamtai, Cristonu ainu nuna antuku asar, jimia aintsun Pedron jiiwearat, tura nuni jear: Wári juni itaarat tusar akuptukarmiayi.

³⁹ Tura akupkamu asar, nuni jeariar ujakaram, Pedro nijai tsaniasar Jope yaktanam wearmiayi. Tura nuni jearamtai, jakau namangke yakí patasmaunum Pedron iwiakarmiayi. Tura nuni wayaamtai, waje ainu mash juutkiar tenteawarmiayi. Turuawar Dorcas iwiaaku pujak peetai ainu, tura wejmak ainauncha najanamia nuna inaktusarmiayi. ⁴⁰ Turinamtai Pedro aints ainu, tura waje ainauncha mash jiikmiayi. Tura ningki juwak tikishma Yusen seamiayi. Nunia jakau namangken pangkai jiis:

—Tabita, nantakta, —timiayi.

Tamati Tabita jiimi Pedron wainak nantaki pujusmiayi. ⁴¹ Turamtai wajakti tusa, Pedro Tabita uwejen achik awajkiymiayi. Nunia Cristonu ainauncha, tura waje ainauncha mash untsuam, nusha wayaawar iwiaaku pujaun wainkarmiayi. ⁴² Turamtai Jope yaktanam nu turamun aints ainu mash nekaawarmiayi. Tura aints untsuri Criston nekasampita tiarmiayi. ⁴³ Tinamtai Pedrosha Jope yaktanam untsuri kinta aints Simón naartinu jeen pujusmiayi. Nu aintska nuwapen takauyayi.

10

Pedro Cornelion wainkamuri

¹ Cesarea yaktanam suntara apuri Cornelio naartin pujuyayi. Ni suntaringkia Italia nungkanmaya aints armiayi. ² Nu apuka péngke aints ayayi. Tura ni weari ainuajai tunau wajasai tusar, shaminak Yusen: Ameketme juuntam tinu armiayi. Tura judío kuikiartichu ainu yaingtás kuikian nukap suyayi. Tura tuke Yusen seayayi. ³ Tu pujai tsaa nungkaanmatai, Cornelio karanma nunisang Yuse awemamuri ni pujamunam wayaun paan wainkamiayi.

Tura wainkam chicharak:

—Corneliowa, —timiayi. ⁴ Tamati Cornelio Yuse awemamurin wainak shamak jijij wajatmiayi. Tura:

—Apuru ¿warí turuttiasme winame? —timiayi. Tu iniam Yuse awemamuri ayaak:

—Ame Yus seamame nuna anturtamkayi, tura yuuminak pujuinau yaingtásam tura-mame nunaka Yuska kajinmatramtsui. ⁵ Tura asamtai yamaikia Jope yaktanam aints ainu akupkata. Tura aints Simón naartin, chikich naari Pedro tati tusar untsukarti. ⁶ Nuka irastas taa chikich Simónjai nuwape takau tutaijai tsanias pujawai. Ni jeengka juun entsa yantamen pujawai, —timiayi.

⁷ Chichas umis Yuse awemamuri waketkiamtai, Cornelio ni inatirin jimieran untsuk, nunia suntar Yusen umirkau pengke nintinnun untsukmiayi. Nu aintska tuke ni apurin umirnuayayi. ⁸ Tura nuni wetaram tusa mash ujak, Jope yaktanam akupkamiayi.

⁹ Kashin tsawaar junta weenai, Jope yaktanam jeainatsaing, tsaa tupin wajamtai,

Pedro Yusen seatas jea tuntupe yakí pata amaunum wakamiayi. ¹⁰ Tura nuni pujus nukap yaparmiayi. Tura asa yuwatas wakerimiayi. Tura yurumkan inarawarti tusa nakaj pujai, karanma nunisang ¹¹ nayaim uranmiaunumia sekmati sarma tumau cuatro juwiakmaurin jingkiar, yakíya akupamun wainkamiayi. ¹² Nu sekmatinam pachim ainu cuatro (4) nawentin, tura napi ainausha, tura nanamtin yuchati ainausha engketinaun wainkamiayi. ¹³ Turamtai:

—Pedroa, wajakim maam yuwata, —tu chichaun antukmiayi.

¹⁴ Nuna antuk Pedro ayaak:

—Atsa Apuru, Moisés iin chichaman akupturmaku asamtai, junaka yuchajai. Wikia yuchatinka tuke tsuutakun yuchawaitjai, —timiayi. ¹⁵ Tamati ataksha chichaun antukmiayi:

—Yus pengkeraitai tau wainiatmesha ¿waruka amesha paseetai tame? —timiayi.

¹⁶ Tura sekmatiya tumaun ataksha akupak, nunia ataksha iwiak, nunia ataksha akupak, nunia tuke nayaimpinam iwiakmiayi. ¹⁷ Nuna turau wainak Pedro: ¿Warukanak auncha wainkaj? tu nintimias pujai, Cornelionmaya akupkamu ainau:

—¿Simónka jee tuwaita? —tusar inintrukiar inintrukiar taarmiayi. ¹⁸ Tura taar untsuminak:

—¿Aints Simón naartin chikich naarisha Pedro ju jeanmasha irastas taa pujawak? —tu inintrusarmiayi. ¹⁹ Tu inintrinamtai, Pedro karanma nunisang wainkamurin tuke nintimias pujamtai, Yuse Wakani chicharak:

—Jiisia, kempatam aints amin eatminawai. ²⁰ Tura wi nu aints ainaunka akupkau asamtai wajakim tarata. ¿Nekasnash aujai wetaj? tutsuk aujai weta, —timiayi. ²¹ Tamati Pedro tara, Cornelio aintsri akupkamu ainaun wainak:

—Atum eatrume nuwaitjai. ¿Waruka tarutniurme? —timiayi.

²² Tu iniam aaminak:

—Iikia suntara apuri Cornelio akuptamkau asamtai winiji. Nuka péngke aintsuitai. Yusen umirnitai. Tura asamtai mash judío aneenak pengker awajin ainawai. Yuse awemamuri wantintuk niin chicharak: ‘Ami aintsrum akupkam, Pedro jeemin tati tusam untsukta. Tura ni taamtai, ni titata nuka antukta,’ timiayi. Nuna tawai titaram turammiaji, —tiarmiayi.

²³ Tu tinamtai Pedro chicharak:

—Wayaataram. Turaram juni kanurtaram, —timiayi. Tamati jea wayaawar nuni kanurarmiayi. Tura kashin tsawaarar Pedrojai waketkiarmiayi. Tura Cristonu ainau Jopenam pujuinausha warumchik nemariarmiayi.

²⁴ Tura jinta kanurar kashin tsawaarar Cesareanam jearmiayi. Turinamtai nuni Cornelioka ni weari ainaun, tura ni amikri ainauncha winiarti tusa untsukmau asar, nusha nijai iruntrar nakasarmiayi. ²⁵ Tura Pedro jeanam jeamtai, Cornelio nijai ingkiuniktas jiinki: Ameke juuntaitme, titas tikishmatramiayi. ²⁶ Turamtai Pedro Cornelion achik:

—Wajaktia. Wisha aintsuitjai. Amea nunisketjai, —timiayi.

²⁷ Nunia Corneliojai chichasar jea wayaawar nuni aints untsuri iruntrar pujuinaun wainkamiayi. ²⁸ Tura Pedro chichaak:

—Atumka nekarme: Judío ainautikia Moisésa aarmauri umirkau asar, judíocho ainautirmi jeen pengké iraschamnawaitji. Tura atumjai iruntrachminuitji. Tura wainiat Yuska winaka: ‘Aints kichkisha paseetai tutsuk asata, tura tsuutsuk asata,’ turutmiayi.

²⁹ Tura amesha chicham akupturkau asakmin, wisha nakimtsuk winijai. Tura asan ¿warukang untsura? tusan nekaatasan wakerajai, —timiayi.

³⁰ Pedro tamati Cornelio ayaak:

—Taa nungká wajasai, wína jearun Yusen seakun pujai, aneachmau aints entsatin winchaan entsarun wainkamjai, nu wainkamurka cuatro (4) kinta nangkamari. ³¹ Tura wi wainkamu chichartak: ‘Corneliowa, ame Yus seamame nuna anturtamkayi, tura yuuminak pujuinau yaingmame nunasha kajinmatramtsui. ³² Tura asamtai Jope yak-tanam aints ainau akupkata. Nuka aints Simón naartin, chikich naari Pedro, tati tusar untsukarti. Nuka irastas taa chikich Simónjai, nuwape takau tutaijai tsanias pujawai. Ni jeengka juun entsa yantamen pujawai,’ turutmiayi. ³³ Tura asamtai wári ujaataram tusan aintsun akupkamjai. Turam amesha pengker nintimin asam taume. Tura yamaikia Yus wainmamunam juni iruntrar pujaji. Tura Yus akuptamkau asamtai, Yus chichaman amin ujatmakma nu mash antuktasar wakeraji, —timiayi.

Pedro Cornelio jeen chichaman etserkamuri

³⁴ Tamati Pedro etserak:

—Ayu, yamaikia nekajai: Aints mash metek ainawai, Yuska tu nintimui. ³⁵ Antsu Yus mash nungkanmaya ainauncha, judío ainautincha tura judíochou ainauncha, Niin umirinak pujuinaunka, tura pengker aa nuna turinaunka pengker nintimtus pujawai. ³⁶ Yus Israela weari ainautinka Jesucristonam angkan pujustin chichaman akuptur-makmiaji. Nuka mash aints ainautin Apurintai. ³⁷⁻³⁸ Juan Yuse chichamen etserak aints ainaun imaimurisha nekarme. Nunia Nazaretnumia Jesús Galileanmaya jiinki, judío nungkarincha mash wekainuyayi. Tura Yus ni Wakanin engketamu asa, Yuse kakarmarijai pengker aa nuna takauyayi. Tura iwianchrintin ainaun iwianchrin jiirki akupnuyayi. Yus nijai pujau asa, nunaka turinuyayi. Atumsha nuka nekarme. ³⁹ Tura Judea nungkanam Jerusalénnumsha iisha Jesúska turamuri wainkamiaji. Nunia numinam nenaawar maawarmiyai. ⁴⁰ Antsu kempatam kinta jaka tepau wainiat, Yus ataksha Jesúska jakamunmaya inankimiyai. ⁴¹ Turayat Jesús jaka nantaknunka aints mashkia wainkacharmiyai. Antsu Yus yaanchuik iin: Nu wainkau ataram tusa, eemak eatmaku asamtai, iinak wantinturmakmiaji. Jesús jakamunmaya nantakiamtai, iisha nijai yurumak yuwamijai, tura amutisha amurmijai. ⁴² Tura Jesúska iwiaaku ainu tunaarinchu, tura jakau ainu tunaarinchu jiistinitai, tusaram nu chicham aints ainu ujaktaram tusa, Yus akuptamkamijai. ⁴³ Yaanchuik Yuse chichame etserin mash Jesúska pachisar etserkarmiyai. Tura Jesúska nekasampita tinaunka ni tunaarin Jesús tsangkuratnuitai tiarmiyai, —Pedro etserak timiyai.✠

Judíochou ainu Yuse Wakani engkentuamuri

⁴⁴ Pedro tuke chichaak pujai, Yuse Wakani aneachmau yakiiya taa, ni chichamen antú pujuinaun engkentuamiyai. ⁴⁵⁻⁴⁶ Tura chikich chichamjai anturnaikiachmin niisha Yusen maaketai tiarmiyai. Tura asaramtai judío Cristonu ainu Pedrojai tsaniasar taarmia nuka nuna antukar nukap nintimrar:

—Maj, Yuse Wakani judíochou ainauncha engkentuware, —tiarmiyai.✠ ⁴⁷ Tinamtai Pedro chicharak:

—Iiya nunisarang Yuse Wakani engkentuwaru asaramtai ¿ju aints ainaun Criston nemarkartas wakerinaun maatsuk asarti tusasha yáki surimkat? —timiyai. ⁴⁸ Tura:

—Jesucristo nintimsaram maaitaram, —tusa akupkamiyai. Turamtai:

—Jumchik kinta iijai pujusmi, —tusa Pedron iniasarmiyai. Tu iniinam: Ayu tusa pujusmiyai.

11

Pedro Jerusalénnum chichaman etserkamuri

¹ Cristo nuiniatiri ainu, tura Judea nungkanmaya Cristonu ainu nu turamuncha nekaawar: Judíochou ainayat nusha iiya nunisarang Yuse chichamen jukiari tamaun antukarmiyai. ²⁻³ Tura Pedro Jerusalénnum jeamtai, judío ainu niin chicharinak:

—¿Waruka judíotiatmesha judíochou ainamunmasha irastamesha wemame? ¿Tura waruka nijaisa tsaniasmesha yuwamame? —tiarmiyai.

⁴ Tu tinam Pedro nu nangkamtaik Jope yaktanam turamurin mash etserkatas nangkamamiyai. Tura chichaak:

⁵ —Wikia Jope yaktanam pujusan, Yusen seakun pujai, karanma nunisnak sekmatin sarma tumaun cuatro (4) juwiakmaurin jingkiatamu nayaimpinmaya wi pujamunam taarun wainkamjai. ⁶ Tura ¿waring initak engketa? tusan jiikman, pachim cuatro (4) nawentin, nunia napi ainausha, nunia nanamtin ainausha iikia yuchatai nuni engketinaun wainkamjai. ⁷ Nunia chichaman antukmajai. Nu chichamka nuwaitai: ‘Pedroa, wajakim maam yuwata.’ ⁸ Turutmatai wikia ayaakun: ‘Atsa, Apuru. Yuchatai aa nunaka tuke yuchawaitjai,’ timijai. ⁹ Turamtai ataksha nayaimpinmaya chichartak: ‘Yus pengkeraitai tau wainiatmesha ¿warukaya paseetai tame?’ turutun antukmajai.

✠ 10:43 (Hech. 15.7) ✠ 10:45-46 (Hech. 15.44)

¹⁰Tura sekmatiya tumaun ataksha akupak nunia iwiak, nunia ataksha akupak, nuniangka tuke nayaimpinam iwiakmayi.

¹¹Nuna nintimsan pujai, aints Cesareanmaya akupkamu ainau wína eatkiar wi pujamurun tarutiarmayi. ¹²Tarutiaramtai Yuse Wakani wína chichartak: ‘¿Nekasnash aujai wetaj? tutsuk aujai weta,’ turutun antukmajai. Tura Cristonu ainau seis (6) juni wijai jearu ainaujai Cesareanam jear, Cornelio jeen mash iruntrar wayaamji. ¹³Tura ii wayaakrin, Cornelio iin ujatmak: ‘Wína jearun Yuse awemamuri wajaun wainkamjai. Tura nisha chichartak: Aints ainau Jope yaktanam akupkam, aints Simón naartin, chikich naari Pedro tati tusam untsukta. ¹⁴Nu amin chichartamak: Ami wear mijai itiur uwemratnuitrume tusa amin ujatmaktatui,’ turutun antukmajai tusa ujatmakmaji. ¹⁵Turutmatai wikia Cornelio ainaun Yuse chichamen ujaakun pujai, Yuse Wakani nu nangkamtaik iin engkemturmamiaji nunisang niincha engkemtuwarmayi. ¹⁶Turamtai ii Apuri Cristo timiaurin nintimramjai. Nu chichamka nuwaitai: ‘Juan aints ainaun nekas entsanam imaimiayi. Tura Yuse Wakani atumi nintin piatramkatatrume,’ ii Apuri timiayi.✠

¹⁷Atumsha nintimrataram. Ii nu nangkamtaik ii Apuri Jesucristo umirkau asakrin, Yus ni Wakanin iin akupturmakmaji nunisang yamaisha ni Wakanin nu aints ainauncha akuptuku asamtai ¿wisha itiurkanak Yusen: Atsa turuwaip titaj? —Pedro timiayi.

¹⁸Tamati nuna antukar pengker nintimsar: Yuska juuntapita tiarmiayi. Tura chichainak:

—Yuska judíocho ainau ni nintimaurin yapajiawar nekasar pujut nangkankashtinun jukiarti tusa yaingkiari, —tiarmiayi.

Antioquíanmaya Cristonu ainaun pachis timiauri

¹⁹Estebankan maawaru ainau chikich Cristonu ainauncha maawartas wakerinam, Jerusalénnumia tupikiakiar Fenicia nungkanam, nunia Chipre isranam, nunia Antioquía yaktanam jearmiayi. Nuni jear, judío ainaunak Yuse chichamen ujaarmiayi.✠

²⁰Tura Chipre isranmaya, nunia Cirene nungkanmayasha Cristonu ainau Antioquía yaktanam jear, judíocho ainaun chichasar, ii Apuri Jesúsán pachisar uwemratin chichaman etserkarmiayi. ²¹Tura Yus ni kakarmarijai nu aints ainaun kakamtikramu asar, judíocho ainau untsuri ni yaanchuik nintimtairinka inaisar, ii Apuri Criston nekasampita tiarmiayi.

²²Turinamtai Cristonu Jerusalénnum pujuinau nuna antukar, Bernabén Antioquía yaktanam nuna nekaat tusar akupkarmiayi. ²³⁻²⁴Bernabéka pengke aints asa, Yuse Wakani piatkamuyayi. Tura Criston miatrusang umirnuyayi. Tura asa Antioquíanam jea, Yus nu aints ainaun pengker awajsamun wainak nukap warasmiai. Tura asa nu aints ainaun chicharak:

—Pengker nintimsaram tuke inaitsuk ii Apuri Cristo umirkataram, —tusa chicharkamiayi. Tura Bernabé nuni pujai, aints untsuri ii Apurinu wajasarmiayi.

²⁵Nuniasha Bernabé Tarso yaktanam Saulon eaktas wemiayi. ²⁶Tura wainak, Antioquía yaktanam jukimiayi. Tura nuni jear, Cristonu ainaujai kichik musach pujusar, aintsun untsuri Yuse chichamen nuiniararmiayi. Tura asamtai Antioquía yaktanam nuna eemkar Cristonu ainaun pachisar: “Cristonu ainawai,” tiarmiayi.

²⁷Chikich kintati Jerusalénnumia Yuse chichamen etserin ainau Antioquíanam jearmiayi. ²⁸Tura jear, chikich aints Agabo naartin Cristonu ainau iruntramunam wajaki, Yuse Wakani niin nekamtikiamu asa:

—Nekas mash nungkanam tsuka nukap atatui, —timiayi. Claudio romano juun apuri asamtai, nu timiauka nunisang uminkamiayi.✠

²⁹Tura asamtai Cristonu ainau chicharnainak: Judea nungkanam tsuka amati, iisha Cristonu ainau yaingmi tusar, ii kuik tákakmauka kichik kichik miatrusrik susarmi tusar

✠ 11:16 (Hech. 1.5) ✠ 11:19 (Hech. 8.1-4) ✠ 11:28 (Hech. 21.10)

nintimrarmiayi. ³⁰ Nuna turuwar Bernabéncha, tura Saulonasha Cristo umirnu juuntrin kuikian suwearat tusar Judea nungkanam akupkarmiayi.

12

Santiago jakamuri nunia Pedron kársernum engkeamuri

¹ Nunia apu Herodes Cristonu ainaun wait wajaktiniun susarat tusa ni aintsrin akupkamiayi. ² Tura Juanku yachiin, Santiagon saapijai maataran tusa ni aintsrin inarmiayi. ³ Nuna maawaramtai, judío ainu nuna wainkar: Nuka pengkeraitai tinu asarmatai, Herodes nuna nekaa: Pedrosha achiktaram tusa ni aintsrin akupkamiayi. Turamtai Pascua fiesta, pang pachimrachmau yuwatin kinta tutai amia nuni Pedron achikiarmiayi. ⁴ Achikiaramtai Herodes ni suntarin dieciseis (16) akupak:

—Atumsha atumsha cuatro (4) iruntraram, Pedro jiinki tusaram kárser nakastaram, —timiayi. Nunia Pascua fiesta nangkamaramtai, aints ainu iruntramunam chicham nekaami, tu nintimramiayi. ⁵ Turamtai suntar ainu Herodes tímia nunisarang Pedron nakasarmiayi. Pedron kársernum engkeawaru asaramtai, Cristonu ainu tuke inaitsuk Pedron pachisar Yusen seatiarmiayi.

Yus Pedron karsernumia jiikmiauri

⁶ Herodes: Kashin chicham nekaami timiau kintaka tsawaatsaing, kashi Pedro suntar jimiar ainamunam jape teema kanú tepemiayi, tura jimia jirujai jingkiamuyayi. Antsu chikich suntar ainuka kársera waitirin nakainak wajaarmiayi. ⁷ Turinai Yuse awemamuri aneachmau kársernum engkemtua paantin awajsamiayi. Tura Pedro kának tepaun mijiarnum achik shintarmiayi. Tura Pedro shintaramtai:

—Wári nantakta, —timiayi. Tamati Pedro ni uwejen jingkiamun atiachmaitiat, ningki sayat atimiayi. ⁸ Turamtai Yuse awemamuri chicharak:

—Kachumtairum kachumata, tura sapatrum weekata, —timiayi. Tu tama Pedro miatrusang umirkamiayi. Turamtai:

—Tura wejmakrum entsaram nemartusta, —timiayi.

⁹ Tamati Pedro Yuse awemamurin nemarsamiayi. Tura suntar ainaunaka shintaatsuk ukukmiayi. Antsu: ¿Paankeash ainia? tusa nekachu asa: ¿Karanam wekaatsujash? tu nintimias karsernumia jiinki, Yuse awemamurin nemarsamiayi. ¹⁰ Tura suntar eemak wajauncha nangkaikiarmiayi. Tura chikich suntar wajainauncha nunisarang nangkaikiarmiayi. Nunia waiti jiru najanamu epenmiaunum jeainamtai, nu waitikia ningki kuwat uranmiayi. Uraniamtai mai jiinkiar, jintanam jumchik wesarang, Yuse awemamuringkia aneachmau mengkakamiayi. ¹¹ Yuse awemamuri mengkakamtai, Pedro:

—Herodes judío ainaujai mash wína mantuwartas wakerutinau asaramtai, Yus nekasampi wína uwemtikrurtas ni awemamurin akupturkayi, —tu nintimramiayi.

¹² Tura nuna nintimias Marí jeen wemiayi. Nu Maríki Juan Marcosa nukuri ayayi. Nu jeanam Cristonu ainu untsuri iruntrar Yusen searmiayi. ¹³ Tuminai Pedro nuni jea, aanum wajas waiti epenmiau uratrita tusa, uwejejai tuntuyamiayi. Turamtai nawan Rode naartin inati asa, waitinam jiistaj tusa, werimiayi. ¹⁴ Tura Pedro chichamen antuku asa waras, waitin uratsuk waketki:

—Pedro aanum wajawai, —timiayi. ¹⁵ Tamati:

—Atsa ¿waurkum tatsumek? —tiarmiayi. Tinamaitiat:

—Atsa, nekasan tajai, —tamaitiat:

—Atsa nuchawaitai. ¿Antsu ni wakanin chuashi? —tiarmiayi.

¹⁶ Tinau wainiat Pedro tuke waitin tuntuyak wajamiayi. Turamtai waitin urakar Pedron wainkar: ¿Itiur tayik? tusar shamkarmiayi. ¹⁷ Tuminamtai jea waya: Itiatkataram titas, uwejen takuimiayi. Tura nuni pujuinaun chicharak:

—Ii Apuri Cristo wína karsernumia jiirkini, —tusa etserkamiayi. Tura chichas umis:

—Santiagosha tura chikich Cristonu ainausha ujaakrum: Yanchuk jiinkini tusaram ujaktaram, —timiayi.

Nunia jiinki chikich yaktanam wemiayi.

¹⁸ Kashin tsawaar Pedro mengkakau asamtai, suntar ainau: ¿Itiurak jiinkimia, tura tuki wemaj? tusar napchau nintimrar chichainak nukap taetet wajarmiayi. ¹⁹ Turinamtai Herodes ni aintsri ainaun akupak:

—Eaktaram, —timiayi. Tamaitiat ea eaka wainkartatkamawar tujinkarmiayi. Tura asamtai kársera nakasaru ainaun: ¿Itiur jiinkimia? tusa inimiayi. Tu iniamaitiat aiminachmatai, kársera nakasaru ainau maataram tusa, ni suntari ainaun akupkamiayi. Nunia Herodes Judea nungkanmaya jiinki, Cesarea yaktanam jea nuni pujusmiayi.

Herodesa jakamuri

²⁰ Tura Herodes Cesarea yaktanam pujus, Tiro nungkanmaya ainaun, tura Sidón nungkanmaya ainauncha kakarman kakerkamiayi. Turamtai nu nungkanmaya aints ainau apu Herodesa nungkarinia ni yutairin sumarmin asar, chichaman iwiarartas wakeriarmiayi. Tura apu jeen wainiun Blasto naartiniun chicharinak:

—Wait aneam, iin pachikratsam apuram chichartakum:

Iisha kajernaitsuk angka pujustasar wakeraji, tinawai tita, —tusa chichasarmiayi.

²¹ Tu tinu asaramtai Herodes:

—Ataksha nu kintati kaunkataram, —timiayi. Nu kinta tsawaaramtai, Herodes apu entsatin nekas shiirman entsar, paan waitkarat tusa, pata amanum apu keemtainum keemas, aints ainaun chicharkamiayi. ²² Turamtai aints ainau nuna antukar untsuminak:

—Au chichaa auka aintschawaitai, antsu Yusetai, —tiarmiayi. ²³ Tu tinamaitiat Herodes: Wikia Yuschawaitjai tachau asamtai, arutsuk Yuse awemamuri sungkuran akuptukmiayi. Turamtai Herodes iwiaakutiak akarak jakamiayi.

²⁴ Tura Herodes jakamtai, Cristonu ainau Yuse chichamen angka etserkarmiayi. Tura asaramtai aints Yuse chichamen untsuri antukarmiayi.

²⁵ Turinamtai Bernabé Saulojai ni takatrin mash umisar, Jerusalénnumia Antioquíanam waketinak:

—Juan Marcos ijai wekaasati, —tusa jukiarmiayi.

13

Bernabé Saulojai wekaatan nangkamamuri

¹ Antioquía yaktanam Cristo umirin iruntrar pujuinamunam Yuse chichamen etserin ainau, tura Yuse chichamen nuikiartin ainausha iruntrarmiayi. Nuna naaringkia nu ainawai: Bernabé, nunia Simón, chikich naari Shuwin inaikiarmiayi, nunia Cirene nungkanmaya aints Lucio naartin, nunia Manaén, nuka Galilea apuri Herodesjai tsakaruyayi, nunia Saulo ainik armiayi. ² Tura yurumkan yutsuk ijarmawar, mash iruntrar iinu Apuri Criston maaketai tiartas pujuinamtai, Yuse Wakani nu aints ainaun chicharak:

—Yuse chichamen etserkarti tusaram, Bernabéssha tura Saulosha akankaram akupkataram, —timiayi. ³ Yuse Wakani tu timiau asar, ijarmawar Yusen sear umisar uwejejai muukencha achikiar: Yus yainmakti tusar akupkarmiayi.

Cristo akupkamu ainau Chiprenam wekaasamuri

⁴⁻⁵ Nunia Yuse Wakani akupkamu asar, Bernabé Saulojai Seleucia yaktanam weenamtai, Juan Marcos iin yainmakti tusar, jukimu asa nusha wemiayi. Tura Seleucianam jear, kanu juunum engkemawar, isar Chipre tutainum wearmiayi. Nunia yakat Salamina tutainum jear kanunmaya jiinkiar, judío iruntai jeanam wayaawar, Yuse chichamen etsertan nangkamawarmiayi. ⁶ Tura nu isranam Yuse chichamen etserkiar weenak atu yantamen yakat Pafos tutainum jear, judío aintsun Barjesús naartinun wainkarmiayi. Nuka wishnutiat:

—Wikia Yuse chichamen etsernuitjai, —nangkami anangmak tinuyayi. ⁷ Nu wishnuka ni apuri Sergio Paulojai tsanias pujuyayi. Tura nu apuka nintip asa, Yuse chichamen antuktas wakerimiayi. Tura asa:

—Bernabésa, tura Saulosha tati, —tusa untsukmiayi. ⁸ Turamtai Yuse chichamen etserinamtai, wishin Barjesús naartin, chikich naari griego chichamejai Elimas naartinuyayi, nuka ni apuri Apu Jesúsan umirkai tusa chicharak:

—Ju aintsu chichamengka paseetai, —timiayi. ⁹ Tamati Saulo, chikich naari Pablo, nuka Yuse Wakani piatkamu asa, wishnun jijj pujurmiayi. ¹⁰ Tura chicharak:

—¡Maj! Ameka anangkartinuitme, tura tsanukratin asam Satanása uchirinme. Tura asam pengker aa nuka mash tsuutame. ¿Warukaya ii Apuri chichame nekas pengker au wainiatmesha tuke inaitsuk paseetai tame? ¹¹ Yamaikia ii Apuri amincha wait wajaktinnasha suramsatatui. Tura jiimin kusumtikramratatui. Tura asamtai tsaa tsanmausha wainkashtatme, —timiayi.

Nu tamaujai metek wishnu jiingkia kusurmiayi. Tura wainmichu asa, aintsun eak:

—Uwejrún achirkam wekaatsata, —timiayi. ¹² Nu turunamtai apuka nuna wainak, ii Apuri chichame etsermaun antuk nintimrau asa, Criston nekasampita timiayi.

Pablo Bernabéjai chikich Antioquía yaktanam wekaasamuri

¹³ Nunia Pablo ni tsaniakmaurijai ataksha kanu juunnum engkemawar, Pafos yaktan ukukiar juun entsanam wekaasar, Perge yaktanam Panfilia nungkanam jearmiayi. Tura nuni pujuinai, Juan Marcos: Waketkitaj tusa Jerusalénnum waketkimiayi. ¹⁴ Turamtai Perge yaktanmaya jiinkiar, Pisidia nungkanam wekaasar, chikich yaktanam Antioquía tutainum jearmiayi. Nu yaktaka Pisidianmaya Antioquía inaikiamuitai. Tura nuni jear, ayamtai kintati judío iruntai jeanam wayaawar keemsarmiayi. ¹⁵ Tuminamtai Moisésa aarmaurin aujsar, tura Yuse chichame etsernu aarmaurincha aujsar umisar, judío iruntai jea juuntri ainau Pabloncha tura ni amikrincha chicharinak:

—Yatsur ainautiram, chicham timin amataikia, yamaikia titaram, —tiarmiayi.

¹⁶ Tu tinamtai, Pablo wajaki, anturtukarat tusa, uwejen takui chichaak:

—Israel ainautiram, Yus pengker nintimtin ainautirmeka anturtuktaram. ¹⁷ Israel ainauti Yusri ningki wakerutmau asa, yaanchuik ii juuntri ainaun Egipto nungkanam pachiinkar pujuinauncha pengker awajsau asa nukap yujramiayi. Tura yujaramtai ni kakarmarijai ii juuntri ainaun Egiptonmayan jiikmiayi. ¹⁸ Tura aints atsamunam cuarenta (40) musach Yus ni turamurincha tsantramiayi. ¹⁹ Tura Canaán nungkanam pujusarat tusa, siete (7) nungkanmaya aints ainaun niish niish chichau ainaunka mash amukmiayi. Tura ni nungkarin Israel ainautin tuke nuni matsamsataram tusa suramsamiaji. ²⁰ Turamtai Egipto nungkanam pujuinai cuatrocientos cincuenta (450) musach nangkamaramtai, Yus ni aintsri ainaun inartas chichaman nekamtikin ainaun akupkamiayi. Nunia Yuse chichame etserin, Samuel naartin akiinamiayi. ²¹ Nunia Israel ainau Samuelan chicharinak: Apu inaiturkata tiarmiayi. Tinamtai: Cisa uchiri Saúl naartin, Benjamínka weari amia nuna atumi juuntri apuri ati tusa, Yus tsangkatkamiayi. Turamtai Saúl cuarenta (40) musach Israel ainaun inarmiayi. ²² Nunia: Saúl yamaikia apu ahati, antsu David apu ati, Yus timiayi. Tura Davidtan pachis chichaak: Isaía uchiri Davidka nekas wína wakeramurun tuke umirtuktas wakerau asa, wína nintirun waramtikrusi, Yus timiayi. ²³ Yus nuna turatnuitjai tinu asa, Davidta weari kichik Israel ainautin uwemtikramratas, nukap arus Jesúsan akupturmakmijai. ²⁴ Tura Jesúska akiintsang, Juankua akiinamiayi. Nuka aints ainaun Yuse chichamen ujaak: Atumi nintimauri yapajiam Yus umirkuram maaitaram tusa chicharkamiayi.✠

²⁵ “Tura ni jakatniuri jeatak wajasamtai, aints ainaun chicharak: ‘¿Atumka wína pachitsaram itiur nintimrume? Atumka: Mesíasaitai turutrumena nuchawaitjai. Antsu wína ukurun akiinamia nuka wína nangkatusang kakaram atatui. Tura asamtai wikia mianchau asan, tsunsumruan nuna sapatri jingkiamurin atitataj tayatun, timiá natsaamakun atitachminuitjai. Nuka Mesíasaitai,’ timiayi.✠

²⁶ “Yatsur ainautiram, Abrahama weari ainautirmesha, Yus pengker nintimsaram pujuinautirmesha anturtuktaram: Ju uwemratin chichamnaka atumin akupturmakuitai.

✠ 13:24 (Marc. 1.4; Luc. 3.3) ✠ 13:25 (Juan 1.20, 27)

²⁷ Nintimrataram. Jerusalénnum pujuinausha, tura ii juuntri ainausha ¿Jesús warí aintsiki? tusar nekaacharmiayi. Tura ayamtai kintajai metek tuke judío iruntai jeanam wayaawar, Yuse chichamen etserin ainau Yuse chichamen aujinamtaisha pachischarmiayi. Antsu Yuska yaanchuik: Nu turunatnuitai tímia nunisarang: Jesús jakati tiarmiayi. Tura asar Yus tímia nunaka miatrusarang umirkarmiayi. ²⁸ Tura niin nangkamiar maachminun waininayat: Pilato Jesúsán maati tiarmiayi.✠

²⁹ “Tura asaramtai yaanchuik Yus turunatnuitai tímia nunaka mash miatrusarang umikiar, numinam maawaru asaramtai, ni namangken numinmayan kuakiar iwiarsarmiayi.✠ ³⁰ Tura wainiat Yus niin jakamunmaya inankimiayi. ³¹ Tura Jesús nantakin asa, wína nemartin ainau waitkarti tusa, untsuri kinta Galilea nungkanmaya ainaun nijai Jerusalénnum tsaniasar jearmia nunasha wantintukmiayi. Tura asamtai nu aints ainau yamaisha chikich ainauncha Jesúsán pachisar ujainawai.✠

³²⁻³³ “Tura asamtai ii yaanchuik juuntri ainaun Yus ni uchirin pachis: Jaka nantaktinuitai, tímia nunisang Jesúsánka inankimiayi. Nu uwemratin chichamsha iisha atumin ujaajrume. David Jesúsán pachis Salmo jimiari tutainum aarmia nuka nuwaitai. Yus ni uchirin chicharak: ‘Ameka wína nekas Uchiruitme. Ju kintati wína kakarmarun suajme,’ timiayi. Tu aarmawaitai.✠

³⁴ “Nuniasha Yuse chichame Jesúsán pachis tu aarmawaitai. ‘Yus ni uchirin chicharak: Davidtan nekas pengker awajsamiaja nunisnak amincha pengker awajsatatjame timiayi.’✠ Tu tinu asa, Jesúsá namangke kaurchati tusa, jakamunmaya inankimiayi. ³⁵ Tura asamtai chikich Salmonam Jesúsán pachis tu aarmawaitai: ‘Ami inatiram nekas pengker asamtai, ni namangkengka kaurti tusamka tsangkamrukchatnuitme.’✠ ³⁶ Antsu nunaka Davidta namangkenka pachiska tichamiayi. Yus Davidtan turata tímia nunaka mash umikmiayi. Nunia ni juuntri jakarmia nunisang Davidcha jakamiayi. Tura asa ni namangkengka kaurmiayi.

³⁷ Antsu Yus inankimia nuka kaurchamiayi.

³⁸⁻³⁹ “Yatsur ainautiram, nusha nekaataram: Jesús atumi tunaarin sakturmaru asamtai, nu chichaman atumin etserkaruitai. Moisés umirkatin chichamka umirkayatrume, atumi tunaaringkia sakarchamnawaitrume. Antsu Jesús nekasampita takurminka, atumi tunaarinka mash sakturmartinuitrume. ⁴⁰⁻⁴¹ Yuse chichame tu aarmawaitai: ‘Wishikiartin ainautiram nintimrataram. Atum iwiaaku pujakrumin, wisha wainchati takatan takaamtaisha, chikich ainau nuna pachis atumin ujatminau wainiatrume, atumka nekasampita pengké tichatnuitrume. Tura asaram atumsha mengkakai tusaram shamkataram,’ Yus tawai.

Tu tinu asamtai, Yuse chichame etserin tiarmia nuna turunawai tusaram aneartaram,” Pablo timiayi.✠

⁴² Tura chichas umis, Pablo Bernabéjai judío iruntai jeanmaya jiinkiamtai, aints ainau niin chicharinak:

—Wait aneasrum, yamai etserkarume nuka chikich ayamtai kintatisha nunisrumek etseritaram, —tiarmiayi. ⁴³ Tura judío iruntai jeanmaya mash jiinkiar, Yuse umirin judío ainau tura judíocho ainausha untsuri Pabloncha, tura Bernabéncha nemarkarmiayi. Nemarkaram nu aints ainaun chicharinak:

—Yus atumin wait anentramrau asamtai, pengker nintimsaram tuke inaitsuk Cristo umirkataram, —tu akatrar ukukiarmiayi.

⁴⁴ Nunia chikich ayamtai kinta jeamtai, nu yaktanam pujuinau mash Yuse chichamen antukartas iruntrararmiayi. ⁴⁵ Tura judíocho ainau timiá untsuri kaunkaramtai, judío ainau nuna wainkar, Pablon suwirpiaku jiisar:

—Nangkami tawai, —tiarmiayi. Tura asar Pablon pachisar pasé chichasarmiayi.

⁴⁶ Turinamtai Pablo Bernabéjai shamkartutsuk judío ainaun chicharinak:

✠ 13:28 (Juan 19.15) ✠ 13:29 (Mat. 27.57-60) ✠ 13:31 (Hech. 1.5) ✠ 13:32-33 (Sal. 2.7) ✠ 13:34 (Isa. 55.3) ✠ 13:35 (Sal. 16.10) ✠ 13:40-41 (Hab. 1.5)

—Yus turataram iin turamin asamtai, atum nuwá eemkaram ni chichame antuktaram tusar, atumin etserkamin amiaji. Tura wainiatrum atumka tuke iwiaaku pujustinka nakitau asakrumin, yamaikia judíochu ainamunam nu chicham etserkatai tusar weaji.

⁴⁷ Ii Apuri nu chichamsha etserkataram tusa iin akatamramiaji. Yus chichaak:

“Judíochu ainau paan nintimrarti tusaram, wína chichamur mash aints ainamunam etserkataram. Tura asaram mash nungkanmaya ainausha arák pujuinausha uwemrarat tusaram, turataram tajarme.” Tu aarmawaitai, —Pablo timiayi.

⁴⁸ Tamati judíochu ainau nuna antuku asar warasar: Yuse chichame timiá pengkeraitai tiarmiayi. Tura pujut nangkankashtinun jukiartin ainauka Jesúsan nekasampita tiarmiayi. ⁴⁹ Tura Yuse chichamen etserinamtai, nu nungkanmaya ainau mash antukarmiayi.

⁵⁰ Antsu judío ainau kajerinak nu yaktanmaya juuntri ainausha, tura nuna nuwari ainausha, judío iruntai jeansam tuke winiarmia nuna:

—Atumsha Pablo Bernabéjai ii nungkarinia jiinkarti tusaram pasé awajsataram, —tusar chichaman najatiarmiayi. ⁵¹⁻⁵² Nu judío ainau Yuse chichamen antutan nakitinu asaramtai, Pablo tura Bernabésha ni sapatrin kuinkar, nungka tsetserin japawar ukukiarmiayi. Yus atumin wait wajaktiniun suramsarti tusar nunaka turuwarniayi. Tura nu yaktan ukukiamtai, Cristonu ainau juwakarun Yuse Wakani piatkamu asar tuke warasarmiayi. Turinamtai Pablo Bernabéjai chikich yaktanam Iconio tutainum wearmiayi.✠

14

Pablo Bernabéjai Iconio yaktanam pujusmauri

¹ Pablo Bernabéjai Iconio yaktanam jear, judío iruntai jeansam wayaawar, Yuse chichamen etserkarmiayi. Tura nuni etserinamtai, judío ainau, tura judíochu ainausha untsuri Criston nekasampita tiarmiayi. ² Turinamtai judío Cristo umirchau ainau judíochu ainaun chicharinak: Cristonu ainau kajerkataram tusar, pasé nintimtikrarmiayi. ³ Tura waininayat Pablo Bernabéjai untsuri kinta nuni pujusarmiayi. Tura ii Apurin nintimsar shamkartutsuk: Yus aints ainaun pengker awajsatas wakerawai tusar ujakarmiayi. Tu ujakaramtai Yus: Nuna wína kakarmarjai etserinawai tusa, wainchati takatnasha aintska itiurkachminun najanmamtikiarmiayi. ⁴ Turinamtai nu yaktanam pujuinau metekchau nintimsar, chikich ainau judío Cristo umirchau ainau chichamen umiriarmiayi. Antsu chikich ainausha Cristo akupkamu ainau chichamen umiriarmiayi.

⁵ Turinamtai judíochu ainau, tura judío ainausha ni juuntri ainaujai iruntrar chichainak: —Nu aints ainau pasé awajsarmi, tura kayajai tukurarmi, —tinamtai, ⁶ Pablo Bernabéjai nu tinamun anturmamkar, nu yaktanmaya jiinkiar, Licaonia nungkanam Litra yaktanam jear, nunia Derbe yaktanam wearmiayi. ⁷ Tura nuni jear Yusnum uwemratin chichaman etseriarmiayi.

Litra yaktanam Pablo kayajai tukurmauri

⁸ Litra yaktanam aints wekaichau pujumiayi. Nuka akiinamunmaya tuke wekaichau ayayi. ⁹ Nu aintska Pablo chichaamun antuk: Nekasnapi tsaartatja, tu nintimias pujamtai, Pablo nuna wainak, ¹⁰ kakar chicharak:

—Wajakim tupin wajasta, —timiayi. Tamati tsekengki wajaki, wekaichautiat wekaatan nangkamamiayi. ¹¹ Turamtai nunia aints ainau Pablo turamurin wainkar, Licaonia nungkanmaya chichamejai untsuamkar:

—Ii yusri aintsua tumau iin tarutmiji, —tiarmiayi.

¹² Tinau asar Bernabén pachisar chichainak:

—Juka ii yusri Júpiteraitai, —tiarmiayi. Tura Pablo chicharkartau asamtai, niin pachisar:

—Juka ii yusri Mercuriowaitai, —tiarmiayi. ¹³ Tinamtai yakat wayaamunam nu yaktanmaya ainau yusri Júpiter naartinu jee amiayi. Tura ni yusri jee wainin sacerdote tutai,

✠ 13:51-52 (Mat. 10.14; Marc. 6.11; Luc. 9.5;10.4-11)

waaka ainauncha, tura yangkur ainauncha itaar, mash aints ainaujai iruntrar Pabloncha, tura Bernabéncha: Atumka ii yusrintrume tiartas, waakan maawartas wakeriarmiayi.

¹⁴ Turinamtai Bernabé Pabljai nuna nekaawar, Yuschau arining turaminaji tusar, nuka pengké paseetai tusar, wejmakrin jaakarmiayi. Tura nu aints ainaun chicharkartas ampukiar wear untsumkar:

¹⁵ —Juun ainautiram ¿waruka aitkarme? Iisha atumea nunisrik aintsuitji. Tura asar atum nangkamrum aitkarme nu inaisaram ukukrum Yus nekas iwiaaku aa nu umirkataram titasar winaji. Nekas Yuska nayaimpincha, tura nungkancha, tura juun entsancha, tura mash nungkanam aa nuna najanamiayi. ¹⁶ Yaanchuikia aints ainu ni wakeramurin najanawaru wainiat, Yuska nunaka pachischamiayi. ¹⁷ Turayat wi nekas Yusetjai tusa, aints ainautin mash nekaamtikramatas yumin jitumtikui. Tura árak araamusha pengker nerekti tusa, aints ainautin ii yutairinka nukap suramji. Tura warasarti tusa, iincha pengker awajtamji, —tiarmiayi.

¹⁸ Tu tinau waininayat aints ainu tuke Pabloncha, tura Bernabéncha: Atumka ii yusrintrume tiartas, waakan maawartas wakeriarmiayi. Antsu nuka inaisataram timiau asar inaisarmiayi.

¹⁹ Turinamtai Antioquíanmaya judío ainu, tura Iconionmaya judío ainausha Listranam jear, Listranmaya ainu: Pablo pasé awajsataram tusar nintimtikrarmiayi. Turamu asar Pablon kayajai tukua tukuaka kajinmakamtai: Yanchuk jakayi tusar, namangken japikiar yakta aarin japawar ukukiarmiayi. ²⁰ Turuwaramtai Cristonu ainu Pablon tariar tentakarmiayi. Turinam nantaki ataksha nu yaktanmak wayaamiayi. Tura kashin tsawaar, Bernabéjai nu yaktanmaya jiinkiar, chikich yaktanam Derbe tutainum wearmiayi.

²¹ Tura nu yaktanmasha jear, Yusnum uwemratin chichaman etserkarmiayi. Turinamtai aints untsuri Criston nemarkaramtai, nu yaktancha ukukiar, Listranam ataksha waketkiar, nunia Iconionam jear, Pablo Bernabéjai Antioquíanam waketkiarmiayi.

²² Tura chikich chikich yaktanam Cristonu ainu pengker nintimtikrartas chicharinak:

—Kakaram wajasrum, Cristo tuke inaitsuk nekasampita titaram. Iikia Yuse pujutirin nukap wait wajakur jeamnawaitji, —tiarmiayi. ²³ Tura chikich chikich yaktanam Cristonu ainu juuntrin inaikiar, nunia ijarmawar Yusen sear, Cristonu ainaun chichasar umisar: Ii Apuri atumin yainmakarti tusar ukukiarmiayi.

Pablo Bernabéjai Siria nungkanam Antioquía yaktanam waketkimuri

²⁴ Nunia jiinkiar Pisidia nungkanam nangkamakiar, Panfilia nungkanam jearmiayi.

²⁵ Tura nuni jear, Perge yaktanam pujuinaun Cristo chichamen ujakarmiayi. Nunia jiinkiar, Atalia yaktanam jearmiayi. ²⁶ Tura nuni juun kanunam engkemawar, yaanchuik jiinkiar nu Antioquía yaktanam waketkiarmiayi. Pablo Bernabéjai nu yaktanmaya jininatsaing, Cristonu ainu niin akupinak: Yus atumin: Cristo chichame etserkataram tusa, pengker awajtamsarti tusar, yaanchuik akupkamu asar, nu yaktanam ataksha jearmiayi. ²⁷ Tura Antioquíanam jear, Cristonu ainu iruntrarti tusar untsukarmiayi. Tura mash iruntraramtai, Yus niin kakamtikramu asar, chikich yaktanam turuwarmia nuna mash etserkarmiayi. Tura etserinak: Yus judíocho ainaun Jesúsán nekasampita tiarat tusa, nintimtikramu asar, nuna pachisar ujakarmiayi. ²⁸ Tura Pablo Bernabéjai Cristonu ainaujai nukap kinta iruntrar pujusarmiayi.

15

Jerusalénnum iruntramuri

¹ Pablo Bernabéjai Antioquíanam pujuinai, Judea nungkanmaya ainu irasartas taarmia nuka Cristonu ainaun nuininak:

—Moisés tímia nunisrumek nuwapchiram charutsuk pujakrumka uwemrashtinuitrume, —tiarmiayi. ² Nuna tinamtai Pablo Bernabéjai nu aints ainaun kakarar chicharinak:

—Tuuka atsui, —tiarmiayi. Tu tinau asar, metekka nintimracharmiayi. Tuminamtai Cristonu ainau Pabloncha, tura Bernabéncha:

—Atumsha chikich aints ainaujai Jerusalénnum werum, Cristo nuiniatiri ainausha, tura Cristonu ainau juuntrisha nu chicham pachisrum: ¿Itiurkamnauki? tusaram nekaataram, —tiarmiayi.

³ Tusar akupkarmau asar, Fenicia nungkanam nangkamakiar, tura Samaria nungkanmasha nangkamakiar, Cristonu ainamunam jear:

—Judíochu ainau nekasar yaanchuik ni turutirincha inaisar Criston nemarkartas tinamtai, nuna antukar nukap warasarmiayi.

⁴ Nunia Jerusalénnum jearamtai, Cristonu ainau, tura Cristo nuiniatiri ainausha, tura Cristonu ainau juuntri ainausha pengker nintimtusar: Winitaram tiarmiayi. Tinamtai Pablo Bernabéjái Yuse turamurin mash etserkarmiayi. ⁵ Turinamtai fariseo Cristonu ainau wajakiar chichainak:

—Moisés iin chichaman akupturmaku asamtai, Cristonu judíochu ainausha nekasar nuwapchirin charutkarti, tura Moisésa chichamen miatrusarang umikiarti tusar nuiniarartinuitai, —tiarmiayi.

⁶ Tu tinu asaramtai Cristo nuiniatiri ainau, tura Cristo nemarnu juuntri ainausha nu chicham nekaatai tusar iruntrararmiayi. ⁷ Tura chichainak pujuinai, Pedro wajaki chichaak:

—Yatsur ainautiram, yaanchuik Yus wína chichartak: Judíochu ainau Criston nekasampita tiarti tusam, Yusnum uwemratin chicham ujakta tusa akuptukmiayi. Atumsha nuka nekarme. ⁸ Tura Yus aintsu nintin mash nekau asa: Wikia judíochu ainauncha uwemtikratan wakerajai tusa, Yuse Wakani nekas pengker aa nu ii nintin piatramkamiayi nunisang judíochu ainauncha piatkamiayi. ⁹ Tura judíochu ainaun: Judíowa nunisrumek uwemrau ataram timiau asar, Criston nekasampita tinu asaramtai, ni nintincha japiramiayi. ¹⁰ Turamu asamtai ii juuntrisha Moisésa chichamen umirkartakama pengké tujinkarmiayi. Iisha nunisrik tujinuyaji. Tura itiurkachmin ayatrumsha, ¿warukaya judíochu ainau Moisésa chichamen mash umirkarti tuusha nintimrume? ¿Yus iin kajertamkat tusaram, nuka tatsurmeash? ¹¹ Antsu tuuka nintimtsuji. Ii Apuri Jesús iin wait anentramak jarutramkau asamtai, iikia nekasampita tinu asar uwemrawaitji. Tura asamtai judíochu ainausha iiya nunisarang uwemrartin ainawai, tu nintimji, —Pedro timiayi.

¹² Tama mash aiitsuk pachitske pujuarmiayi. Tuminamtai Bernabé Pabljái aints ainaun ujainak: Aints wainchati takatnasha, tura tujintamu turatnuncha judíochu ainau mash wainkarti tusa, Yus turumtikiamu asar mash etserkarmiayi. ¹³ Tura chichasar umisaramtai, Santiago chichaak:

—Yatsur ainautiram, anturtuktaram. ¹⁴ Simón Pedro iin chichartamak: Yus nu nangkamtaik: Wína aintsur ataram tusa, judíochu ainauncha eakmiayi. Nuna iincha ujatmaji. ¹⁵ Nu turunatniun pachisar Yuse chichame etserin ainau yaanchuik aararmiayi. Nu aarmauka nuwaitai: Yus chichaak:

¹⁶ Nukap arusan Davidta wearí arák wearuncha nuna ataksha irurtinuitjai. Davidta wearí ampintrau ainau jea yumpunkawa nunisang pujuinai wainiatnak, aints jean iwiarua nunisnak ataksha angkan pujusarti tusan pengker awajsatnuitjai.

¹⁷ Chikich nungkanmaya ainau mash wína eatkarat tusan, tura mash wína aintsur arat tusan turatnuitjai, Yus timiayi.

¹⁸ Yus yaanchuik nu mash nekaataram tusa, ni chichamen iin akupturmakmiayi, tu aarmawaitai.

¹⁹ Tura asamtai judíochu ainau ni yaanchuik nintimtai inaisar, Yusen nemarkartas wakerinau wainiatrumek: Nuwapchiram charuktaram tichamnawaitai tajarme. ²⁰⁻²¹ Tura Moisésa chichame etserin ainau yaanchuik kichik kichik yaktanam iruntai jeanam Moisésa aarmauri tuke aujsar yamaisha nunisrumek umirkataram tusar, ayamtai kintajai metek nu chichamnasha etserinau asaramtai, iikia papi aarar akupakur: Aints ni

☆ 15:7 (Hech. 10.1-43) ☆ 15:8 (Hech. 2.4;10.44)

najanamurin: Wína yusrutai tina nunaka inaisarti. Nuniasha tsanirmatnasha inaisarti. Nunia niapir maamunka numpentin asantai yuwacharti, nunia numpancha umutsuk asarti tusar, papi aarar akupkarmi, —Santiago timiayi.

Judíochu ainaun papi akuptukmauri

²² Tamati Cristo nuiniatiri ainau, Cristonu ainau juuntri ainaujai, Cristonu ainaujai mash metek nintimrar, Cristonu ainau juuntrin jimiaran Pablojai, tura Bernabéjaisha Antioquíanam akupkatai tusar eakarmiayi. Tura aintsun eakarmia nuka nuwaitai: Kichik Judas Barsabás, tura kitcha Silas naartinuyayi. ²³ Tura nu aints ainaujai papin akupkarmiayi. Nu papikia tu armauyayi:

“Cristo nuiniatiri ainautikia, tura Cristo nemarnu juuntri ainautikia, atum judíochu ayatrum Cristonu asakrumin, Antioquíanam pujautirmin, nunia Siria nungkanam pujautirmin, nunia Cilicia nungkanam pujautirmincha chichaman akuptajrume. ²⁴ Junia aints ainau ningki nintimsar, ii akupkachmau ainayat, atumin jear: ‘Nuwapchiram charuktaram, tura Moisés umirkatin chicham mash umiktaram,’ tusar atumin itit awajtaminau asaramtai, atum napchau nintimsar pujamusha antukmaji. ²⁵ Tura asar iikia mash iruntrar atumin metek nintimtusar jimia aints akupkatar inaikiamji. Nu aintska jimiar ii aneetiri yachi ainau Bernabé tura Pablojai tsaniasar wekaasarti tusar akupaji. ²⁶ Nuka ii Apuri Jesucriston miatrusarang umirin asaramtai, maawartas wakeriarmiayi. ²⁷ Tura asantai Judas Silasjai apatkar akupaji. Nuka ii timiayi nuna mash atumin ujamtatrume. ²⁸ Yuse Wakani iin nintimtikramrau asantai, iisha nunisrik nintimsar: Atum nuke umirkataram tusar tajirme. ²⁹ Aints ni najanamurin: Wína yusrutme tina nu susamuka yuwairap. Tura numpasha umutsuk asataram. Tura niapir maamuka numpentin asantai yuwairap. Tura tsanirmat inaisataram. Tu pujakrumka nekasrum pengker pujustatrume. Yus atumin yainmakarti.” Tu armauyayi.✠

³⁰ Tura papin aarar mash umisar: Antioquíanam wetaram tusar, akupkarmau asar, Antioquía yaktanam wearmiayi. Tura nuni jear, Cristonu ainau mash iruntraratusar untukarmiayi. Tura mash kaunkaramtai papin susarmiayi. ³¹ Tura susaram, papin aujsar umisar pengker nintimsar warasarmiayi. ³² Turinamtai Judascha, tura Silascha Yuse chichamen etserin asar, Cristonu ainaun chichaman unturi ujarar pengker nintimtikrarmiayi. Tura Cristo miatrusrumek umirkataram tusar kakamtikrarmiayi. ³³ Turamu asar nukap arusar nu yaktanmaya Cristonu ainau: Pengker nintimsaram angkan waketkitaram tusar, Jerusalénnumia taarun akupkarmiayi. ³⁴ Akupinamaitiat Silaska nuni pujustas wakerimiayi. ³⁵ Tura Pablo Bernabéjai Antioquía yaktanam juwakarmiayi. Tura chikich aints ainaujai ii Apuri chichamen nuiniararmiayi. Tura aints ainaun Yusnum uwemratin chichaman tuke ujararmiayi.

Pablo ataksha Yuse chichamen etserkatas wemaui

³⁶ Jumchik arus Pablo Bernabén chicharak:

—¿Cristonu ainau itiur pujuinawak? tusar ataksha jiiwearmi. Tura chikich chikich yaktanam ii Apuri Cristo chichame etserkamiaji nuni ataksha iraumi, —timiayi.

³⁷ Tamati Bernabé: Ayu tusa, Juan Marcos iijai ataksha wekaasati tusa ayatas wakerimiayi. ³⁸ Antsu Marcoska Yuse takatrin takakmatan nakitak Panfilia yaktanmaya waketkin asantai, Pablo ayatan nakitmiayi.✠ ³⁹ Tamati metekchau nintimtunisar:

—Kanakar wekaasami, —tusar kanakarmiayi. Tura asa Bernabé Marcosan ayas isra Chiprenam wearmiayi. ⁴⁰ Tuminamtai Pabloka Silasan ayamiayi. Tura weenamtai Cristonu ainau:

—Ii Apuri atumin yainmakarti, —tusar akupkarmiayi. ⁴¹ Tura akupinam jiinkiar Siria nungkanam wekaasar, tura Cilicia nungkanmasha wekaasar, Cristonu ainaun kakamtikrarmiayi.

✠ 15:29 (Hech. 21.25) ✠ 15:38 (Hech. 13.13)

16

Timoteo Pablo Silasjai nemarsamuri

¹ Pablo Silasjai Derbe yaktanam jear, nunia jiinkiar, Listra yaktanam jear, nuni Cristo nemarin Timoteo naartinun wainkarmiayi. Timoteo nukuringkia judío nuwa ayayi. Nusha Cristo nemarnuyayi. Antsu aparingkia griego aintsuyayi. ² Turamtai Cristonu ainu Listranam pujuinau, tura Iconionmasha pujuinau Timoteon pachisar pengker chichasarmiayi. ³ Tura asamtai Pablo chichaak:

—Timoteo ijai wekaasati, —tusa wakerimiayi. Turayat nuna aparingkia griego aints asa, uchiri nuwapchirin charutkachmiayi. Tura asamtai judío nuni pujuinau nunaka mash nekaawaru asar, Timoteon pasé nintimturarai tusa Pablo:

—Nuwapchirin charutkarti, —timiayi. ⁴ Turamtai nuna umis, nunia tsaniasar wekaasar, chikich chikich yaktanam jear, nuni Cristo nuiniatiri tura Cristo nemarnu juuntri Jerusalénnum pujuinau papin aarar akupkarmia nuna ujarkuta wearmiayi. ⁵ Tu ujainau asar, Cristonu ainaun: Miatrusarang Criston umirkarat tusar kakamtikinak kintajai metek yujrarmiayi.

Pablo Macedonianmaya aintsun karanma nunisang wainkamuri

⁶ Yuse Wakani: Asia nungkanam Yuse chichame etserkairap, tusa surimkamiayi. Tura asamtai, Pablo Silasjai Frigia nungkanam nangkamakiar, nunia Galacia nungkanam nangkamakiar, ⁷ Misia nungkanam jear, Bitinia nungkanam weartas wakeriarmiayi. Tu nintiminaun wainiat: Nuningkia weerap, tusa Jesúsa Wakani surimkamiayi. ⁸ Tura asamtai Misia nungkanam wekaasar, juun entsa yantamen Troas yaktanam jearmiayi. ⁹ Tura nuni jear kashi Pablo karanma nunisang Macedonia nungkanmaya aints wajaun wainkamiayi. Tura ni chichamen antukmiayi. Nu chichamka nuwaitai: “Katingkiam iin yaingkratkatasam winita.” ¹⁰ Tura Pablo karanma nunisang nu aintsun wainkau asamtai, iikia nintimsar: Nekas Yus nu nungkanmaya ainaun Yusnum uwemratin chicham etserkataram, tusa untsurmaji tu nintimsar, Pablo ijai Macedonia nungkanam katingmi tusar umismiaji.

Pablo Silasjai Filiposnum pujusmauri

¹¹ Nunia Troasnum juun kanunam engkemar, juun entsanam tupnik wekaasar, isar Samotracia tutainum wemiaji. Tura nuni jear, kashin tsawaarar nunia jiinkir, Neápolis yaktanam jearmiayi. ¹² Nunia juun kanunmaya jiinkir, Filipos yaktanam wemiaji. Nu yaktaka Macedonia nungka juun yaktayayi. Nuka romano yaktarisha ayayi. Iikia nu yaktanam jear, nuni jumchik kinta pujusmiaji.✠

¹³ Tura nuni pujarin, ayamtai kinta tsawaaramtai: ¿Yakta aarin judío ainu Yusen seainatsuash? tusar yaktanmaya jiinkir, entsa yantamen aanum Yus seatinam jear, nuni keemsar, nuwa ainu Yuse chichame ujakmiaji. ¹⁴ Tura nuwa antinak pujuinamunam Tiatira yaktanmaya nuwa, Lidia naartin pachinkamiayi. Nuka tarach shiirman kapan-takun surinuyayi. Tura Yusen seauyayi. Nuka Pablo chichaamun antuk, ni etsermaurin nintimramiayi. Tumamtai Yus ni nintin uratmiayi. ¹⁵ Turamtai Lidia ni weari ainuajai Criston nemarkartas entsanam mainiarmiayi. Tura nu umisakrin Lidia iin chichartamak:

—Nekasrum Apu Criston nemarnuitai turutkurmeka, wait aneasrum wina jearun wayaaram, nuni pujustaram, —timiayi. Tamati iikia ni jeen wayaar nuni pujusmiaji.

¹⁶ Tura nuni pujusar, chikich kintati Yus seatinam wearin, nuwawach wakantrintin iin ingkunmakmiaji. Aints ainu nu nuwachin: ¿Ukunam itiur pujustatja? tu iniinam, iwianch niin nekamtikmau asa, ni pujustintrincha paan etsernuyayi. Tura nu nuwawach aints ainu inatiri asamtai, nu nuwachin inauya nunaka nukap akiu armiayi. ¹⁷ Nu nuwachikia iin nemartamas untsamak:

—Ju aints ainuka nekasar Yus nayaimpinam puja nuna inatiri ainawai. Tura atumin: Uwemratin chichaman ujatminawai, —timiayi.

✠ 16:12 (Fil. 1.1)

¹⁸ Tura turaka untsuri kinta untsumkinij wajamiayi. Tuke inaitsuk turamtai, Pablo yawetar ayanmatar iwianchin chicharak:

—Jesucristo naarijai tajame: Ju nuwachikia ukukim, jiinkim weta, —akupak timiayi. Tamati nu tamaujui metek iwianchkia jiinki ukukmiayi.

¹⁹ Nu nuwachinmaya iwianch jiinkin asamtai, ni inau ainau nuna nekaawar: Yamaikia kuik jukishtatji tusar, napchau nintimrar Pabloncha, tura Silasnasha kajerkar achikiar, yakta japen apu pujuinamunam jukiarmiayi. ²⁰ Tura yakta apurin jeeniar tsanuminak:

—Ju aintska judío asar, ii yaktarin taar, iin napchau nintimtikraminaji. ²¹ Tura ni turamurinka nuitaminaji. Antsu iikia romano asar, nu chichamka antukchatnuitji. Tura ni turamuringkia turashtinuitji, —tiarmiayi.

²² Tu tinamtai aints untsuri kakarman kajerarmiayi.

Turinamtai apu ainau ni aintsrin akupkar:

—Ju aintsu wejmakri aitkaram numijai awatraram, —tiarmiayi. ²³ Nunia nukap awatrar umisar kársernum engkewar, kársera wainiun:

—Ju aints jiinkiarai tusam, tenap wainkata, —tutar awajtusarmiayi. ²⁴ Tu timiau asa, kársera wainin Pabloncha tura Silasnasha kársera nitkarin tee amanum engkewarmiayi. Tura wajascharti tusa, tau jimiar amanum kangkajin kuinkachminun chanuntawarmiayi.

²⁵ Turamtai kashi japeng Pablo Silasjai Yusen sear, kantancha kantamawarmiayi. Tura kantaminamtai, chikich kársernum engkeamu ainau ni kantarin pengker nintimsar antú pujuarmiayi. ²⁶ Kantaminai aneachmau kakaram uurkamiayi. Tura uurak kársera wenukrincha kaya najanamun nukap peakmiayi. Turamtai kársera waitiri ningki mash uranmiayi. Tura aints achikmau ainau jirujai jingkiamuri ningki mash tsurararmiayi.

²⁷ Turamtai kársera wainin kuraat shintar, kársera waitirin urankaun wainak: Achikmau ainau mash tupikiakcharmasha, tu nintimias ningki maamatas saapirin achikmiayi.

²⁸ Turamtai Pablo nuna wainak kakar chicharak:

—Maamawaip. Iikia mash pujaji, —timiayi.

²⁹ Tamati kársera wainin ni inatirin akupak:

—Kantii akaam nimta, —timiayi. Tamati kantiin keemak itaamtai, kársernum ampuki waya shamak kuraimiayi. Tura Pablo Silasjai wajamurin naka tikishmatramiayi. ³⁰ Tura kársera wainin Pablon tura Silasnasha karsernumia jiiki chicharak:

—¿Uwemratsnasha warinak itiurkataj? —tu iniasmiayi.

³¹ Tu iniam nuka aiminak:

—Apu Jesús nekasampita tusam, amesha ami wearmijai mash uwemratatrume, —tiarmiayi.

³² Tura Yuse chichamen ni jeen iruntrar pujuinawu mash antukarti tusar ujakarmiayi.

³³ Nuna umisaramtai, kashi wainiat kársera wainin ni numparmaurincha nijatramiayi. Tura nuniangka kársera wainin ni weari ainaujai mash Criston umirkartas mainiarmiayi.

³⁴ Nuna umisar Pabloncha tura Silasnasha ni jeen iwiak yutan yuramiayi. Nuniasha ni weari ainaujai mash Yusen nekasampita tinu asar nukap warasarmiayi.

³⁵ Kashin tsawaar, nu yakta apuri ainau kársera wainunam: Nu aintsun jimiaran akupkati tusar ni aintsrin akupkarmiayi. ³⁶ Tinamtai kársera wainin Pablon nu chichamnasha ujaak:

—Yakta apuri ainau atumin jiirmakiartas chichaman akupturminawai. Tura asaramtai yamaikia jiinkiram angkan pengker nintimsaram wetaram, —timiayi.

³⁷ Tamaitiat Pablo apu inatirin ayaak:

—Atsa, ¿iikia romano arincha waruka chichamnaka nekartamtsuksha aints jiiminamunmasha awatarmarmaji? ¿Tura waruka karsernumsha engketmamji? ¿Waruka yamaikia ukar akuptamkartascha wakerutminaji? Tuuka wechatatji. Antsu ningki taar, iincha jiirmakiar akuptamkarti, —timiayi.

³⁸ Tama apu inatiri waketkiar, ni apurin nu chichamnasha ujakarmiayi. Tura romano ainawai tinamtai, yakta apuri shamkarmiayi. ³⁹ Tura ningki kársernum weriar, nuni

wayaawar Pabloncha Silasnasha: —Tsangkutrutaram, —tiarmiayi. Tura karsernumia jiikiar:

—Wait aneasrum, ju yaktanmayangka jiinkiram wetaram, —tiarmiayi. ⁴⁰ Tinamtai Pablo Silasjai karsernumia jiinkiar, Lidia jeen wearmiayi. Tura nuni jear, Cristonu ainaun chicharinak:

—Pengker nintimsaram Cristo umirkataram, —tusal yaktanmaya jiinkiarmiayi.

17

Tesalónica yaktanam wekaasamuri

¹ Nunia Pablo Silasjai wekaasar Anfípolis yaktan nangkaikiar, nunia Apolonia yaktan nangkaikiar, Tesalónica yaktanam jearmiayi. Nuni judío iruntai jea amiayi. ² Tura Pablo tuke turin asa, nu yaktanam jea, kempatam seman pujus, ayamtai kinta jeamtai, judío iruntai jeanam waya, Yuse chichamen pachis judío ainaujai chichasmiayi. ³ Tura yaanchuik Yuse chichame etsernu aarmauri Jesúsán pachis ujaak:

—Yus akupkamuka tu wait wajaktinuitai, nunia jakatnuitai, nunia jakamunmaya nantaktinuitai, tu aarmawaitai, —timiayi. Nunia Pablo ataksha chichaak:

—Jesúsán pachisan atumin ujaajrume nuka nekas Mesíasaitai, —timiayi.

⁴ Tamati judío ainu jumchik Jesús nekasampi Yus akupkamuita, tiarmiayi. Tura Pabljai, tura Silasjaisha iruntrarmiayi. Tura griego ainu untsuri Yusen searmia nusha Jesúsán nekasampita tiarmiayi. Tura nu yakta juuntri nuwari ainausha untsuri Jesúsán nekasampita tiarmiayi. ⁵ Tinamtai judío Jesúsán umirchau ainu Pabloncha, tura Silasnasha kajerinak suwirpiaku jiisar, yaktanam pasé nintintin nangkami pujuinauncha wainkar, nuna jukiar, nu yaktanmaya ainaun mash pasé nintimtikrarmiayi. Turuwar aints Jasón naartinu jeen jear Pabloncha, tura Silasnasha aanum jiikiartas, tura pasé nintintin ainamunam surukartas wakeriarmiayi. ⁶ Tura asar judío Jesúsán umirchau ainu Pabloncha tura Silasnasha wainkachu asar, Jasónkan tura chikich Cristonu ainauncha japikiar, yakta apuri pujamunam jeeniar, Pabloncha, tura Silasnasha pachisar untsuminak:

—Mash nungkanam itit awajkartin ainu yamaisha iin tarutramiarji. ⁷ Jasón nu aints ainaun: Wína jearun pujusarti tusa untsuki. Tura nu aints ainu juun apu Césara chichamenka umirinatsui, antsu chikich apu Jesús naartin awai turaminaji, —tiarmiayi.

⁸ —Tu timiau asar, nuna antukar nu yaktanmaya ainausha mash, tura yakta apuri ainausha mash pasé nintimrarmiayi. ⁹ Antsu Jasón chikich Cristonu ainaujai apu ainaun chicharinak:

—Iikia nu aints ainaun ii yaktarinia jiinkiarti tusal awematji. Pai, kuik ukuaji, nunia iinu yaktarina jiinkiamtaikia, ataksha wainkimnuram. Antsu jiininachmataikia kuik tuke jukitaram, —tiarmiayi. Tinamtai yakta apuri Jasónkan nunia chikich Cristonu ainauncha akupkarmiayi.

Pablo Silasjai Berea yaktanam pujusmauri

¹⁰ Tura asaramtai arumak kashi Cristonu ainu Pabloncha Silasnasha Bereanam akupkarmiayi. Tura akupkamu asar, Berea yaktanam jear, judío iruntai jeanam wearmiayi. ¹¹ Tura nu yaktanmaya ainu pengke nintintin asar, Tesalónicanmaya ainu nangkamasarang Yuse chichamen pengker nintimsar antukarmiayi. Tura Yuse chichamen antukar: ¿Yaanchuik Yuse chichamen etserin aarmaujai metekash etserina? tusal kintajai metek Yuse chichamen aujsarmiayi. ¹² Turinau asar, judío untsuri Jesúsán nekasampita tiarmiayi. Tura griego juuntri nuwari ainausha, tura juun ainausha nunisarang Jesúsán nekasampita tiarmiayi. ¹³ Tura asaramtai Tesalónicanmaya judío ainu: Pablo Bereanam Yuse chichamen etserui, tamaun antukar nuni jeariar, aints ainu Pablon kajerkarat tusal, itit awajiararmiayi. ¹⁴ Tura asaramtai Cristonu ainu nuna antukar Pablon: Wári juun entsanam weta tusal akupkarmiayi. Antsu Silaska Timoteojai nuni juwakarmiayi. ¹⁵ Tuminamtai Bereanmaya ainu Pabljai tsaniasar

Atenas yaktanam jearmiayi. Tura jear waketinamtai, Pablo Silasan tura Timoteoncha: Wári winiarti, tusa chichaman akuptukmiayi.

Pablo Atenasnum pujusmauri

¹⁶ Pablo Atenasnum pujus, Silas Timoteojai winiarti tinu asa, nuni nakasmiayi. Nunia aints ainau ni yusrin Yuschau waininayat, untsuri ningki najanawar: Ameka ii yusrinme tinamtai, Pablo nuna wainak napchau nintimramiayi. ¹⁷ Tura judío iruntai jeanam waya, nuni judío ainaujai, tura judíocho Yusnau ainaujai chichasmiayi. Nuniasha kintajai metek yakta japen aints ainaujai ingkiunik chichasmiayi. ¹⁸ Nunia griego nuikiartin, Epicuro naartinu chichamen nuikiartin ainaujai chichasmiayi. Tura chikich nuikiartin ainaujai, Estoicos tutajai chichasmiayi. Turamtai chikich ainau Pablon pachisar chichainak:

—¿Ju aints nangkami chichaa wea juka warintramtajik? —tunaiyarmiayi. Tura Pablo Jesúsán pachis, tura jakar nantaktinun pachis Yusnum uwemratin chichaman etseru asamtai, chikich ainau chichainak:

—¿Juka ni yusri ainaun ii nekatsji nuna pachis chichaatsuash? —tunaiyarmiayi.

¹⁹⁻²¹ Atenasnum pujuinauka, tura chikich yaktanmaya ainausha, nuni iruntrartas taaru ainauka tuke yamaram chichaman ujakartas tura antukartas wakerin armiayi.

Tura asar ni juuntri ainau iruntramunam, Areópago tutainum Pablon jeeniarmiayi. Tura nuni jeeniar chicharinak:

—Yamaram chicham ame tame nu iisha nekaatasar wakeraji. Ame tame nuka antichu asar, nunaka takun tajai takumin nekaatasar wakeraji, —tiarmiayi.

²² Tu tinu asaramtai, Pablo juun ainau iruntramunam jepen wajas chicharak:

“Atenasnumia juun ainautiram, atumi yusri ainau miatrusrumek nintimtarne tusan wainjarne. ²³ Wikia atumi yaktarin wainkan, atumi yusri aints najanamu wainiatrumek: Wína yusrutme tarume, nunaka mash wainkan, nunia atumi yusri susatasrum atumi tangkuri maar epetincha wainkajai. Tura nu aarmaunasha wainkajai: ‘Juka nekashtai Yusnawaitai.’ Tu aarmaun wainkau asan, atumi Yusri nekachiatrum tikishmatrumen nuna pachisan nuwaitai tusan, atumin nekamtikiatjarne.

²⁴ “Nintimrataram. Nu Yuska nungkan najanamiayi. Tura nungkanam mash iruna nunasha najanamiayi. Tura asa nayaimpi Apurintai. Tura nungkanam ainia nuna Apurintai. Tura asa aints ni uwejejai jean jeamina nuningkia Yuska pujuchuitai. ²⁵ Nunia mash iwiaaku ainauti pujusarti tusa, ningki ii mayatairincha, tura ii yuumamurincha suramji. Tura ningkia yuumichu asamtai, aintstikia warinchuka Yuska susachminuitji.

²⁶ “Tura Yuska aintsun kichkin najana, mash nungkanam yujarar pujusarti tusa najanamiayi. Tura aintsnaka najantsuk eemak nintimias: Warutik pujusarat tusa, tura tuning pujusarat tusa nekaamiayi. ²⁷ Tura Yuska arákka pujurtamtsuji. Antsu aints ainau wína eatkar nintimtursarti tusa nintimramiayi. ²⁸ Yuska pujutan suramsau asamtai aintstikia iwiaakuitji. Tura asar muchiaji. Tura asamtai atumi nekarmin ainausha nu chichamnaka aarar: ‘Iikia mash Yus najanamuitji,’ tiarmiayi. ²⁹ Tura asar iincha Yus najatmau asakrin, kuri najanamuka: Yusetai tuuka nintimtuschatnuitji. Tura kuik najanamuka, tura kaya najanamuka: Yusetai tuuka nintimtuschatnuitji.

³⁰⁻³¹ “Nintimrataram. Aints ainau Yusen nekainachak turuawarmia nuna Yus yaanchuik pachischamiayi. Antsu ukunam ni kintari jeamtai, Yus mash nungkanmaya ainau nintimaurin yapajiawarti tusa aintsun akupkatnuitai. Nu aintska pengké tunaarinchau asa, nunaka turatnuitai. Tura mash aints ainau nuna nekaawarti tusa, nu aintsun jakamunmaya inankimiayi,” Pablo timiayi.

³² Tama aints jakamunmaya nantakmiaun pachis chichaun antukar wishikrarmiayi. Chikich ainau chicharinak:

—Ii wakerakrikia ame tame nuka chikich kintati antuktatji, —tiarmiayi.

³³ Tinamtai Pablo nu aints ainaun ukukmiayi. ³⁴ Tura waininayat jumchik aints ainau Pablon nemarkarmiayi. Kichik Atenasa juuntri, Dionisio naartin, nunia kichik nuwa, Dámaris naartin, nunia chikich aints ainausha Criston nekasampita tiarmiayi.

18

Pablo Corintonam pujusmauri

¹ Pablo Atenasnumia jiinki, Corinto yaktanam wemiayi. ² Tura nuni jea, judío aintsun, Aquila naartinun wainkamiayi. Nuka Ponto nungkanmaya aintsuyayi. Tura Roma yaktanam pujai, romano apuri Claudio naartin judío ainaun nu yaktanmayan mash jiikmiayi. Tura asamtai Aquila ni nuwari Priscilajai Italia nungkanmaya jiinkiar, Corinto yaktanam jear, nuni pujusarmiayi. Tura asamtai Pablo Aquila jeen iraamiayi. ³ Tura Pablosa, tura Aquilasha mai metek tarach jean najanin asar, Pablo nijai pujumiayi. Tura nuna najanawar surukarmiayi. ⁴ Tura ayamtai kintajai metek judío iruntai jeanam waya, Pablo judío ainauncha, tura judíochou ainauncha: Wi taja nuka nekasaintai tusa chicharkamiayi. ⁵ Turamtai Silas Timoteojai Macedonianmaya taamtai, Pablo tarach jea najantanka inais, kintajai metek Yuse chichamen etserkamiayi. Tura judío ainaun paan ujaak:

—Nekasan tajarme: Yus akupkamu atum tati tusaram nakarme nuka Jesúsaitai, —timiayi. ⁶ Ujaamaitiat nu chichamnaka antutan nakitinak Pablon pasé chicharkarmiayi. Tura asaramtai Pablo ni wejmakrin pearmiayi. Wikia atumin japan ukuktatjarme taku nunaka turamiayi. Nunia nu aintsun chicharak:

—Atumek wakerau asaram, jakaram mengkakatrume. Antsu wikia nunaka wakeratsjai. Atumka uwemratin chicham antut nakitau asakrumin, wikia yamaikia judíochou ainaun nu chichaman ujaktasan werajai, —timiayi.

⁷ Tura judío iruntai jeanmaya jiinki, judíochou aintsu jeen wayaamiayi. Nu aintska judío iruntai jeanam ayamas pujumiayi. Tura Yusen seayayi. Ni naaringkia Ticio Justoyayi. ⁸ Turamtai judío iruntai jea apuri, Crispo naartin, ni weari ainaujai mash ii Apuri Jesúsán nekasampita tiarmiayi. Nunia Corintonam pujuinau untsuri Yuse chichamen antukar, Jesúsán nekasampita tusar mainiarmiayi. ⁹⁻¹⁰ Turinamtai ii Apuri Jesús Pablon kashi karanma nunisang chicharak:

—Wikia amijai pujajai. Tura asamtai amincha kichkisha paseeka awajtamsarchatatui. Ju yaktanam wína aintsur untsuri iruninau asaramtai, shamkartutsuk asata. Antsu tuke inaitsuk wína chichamur etserkim weta, —timiayi.

¹¹ Tamati Pabloka nu yaktanam kichik musach nunia jape pujusmiayi. Tura aints ainaun Yuse chichamen nuiniarmiayi.

¹² Tura nuni aints Galión naartin Acaya nungka apuri inaikiamu pujai, judío mash iruntrar Pablon achikiar, chicham nekatai jeanam jeeniarmiayi. ¹³ Tura apun chicharinak:

—Ju aintska Yus umirkataram tayat, Moisésa chichamen nuitamtsuji, antsu metekchau nuitamji, —tiarmiayi.

¹⁴ Tinamtai Pablo chichastas wakerau wainiat, Galión judío ainaun chicharak:

—Judío ainautiram, ju aints nekas tunaawaitmatikia, tura juka nekas pasé turamtaikia, wikia atumin anturkainjarme. ¹⁵ Antsu atum nuikiartamu pachisrum, tura atumi juuntri naari pachisrum, tura chichaman atumi juuntri akupkarmia nu pachisrum tau asaram, atumek iwaratararam. Wikia nu chichamnaka nekatan nakitajai, —timiayi.

¹⁶ Nuna tina judío ainaun chicham nekatai jeanmaya jiikmiayi. ¹⁷ Tura apu chichaman nekatan nakitau asamtai aints ainu judío iruntai jea apurin Sóstenes naartinun achikiar, apu naka wajamunam awatiarmiayi. Awatinau wainiat apu Galiónka pengké pachischamiayi.

Pablo Antioquíanam wakетки ataksha wekaasamuri

¹⁸ Turamtai Pablo Corinto yaktanam nukap kinta pujusmiayi. Nunia Cristonu ainaun: Weajai tusa ukukmiayi. Nunia Priscilajai, tura aishri Aquilajai Cencrea yaktanam juun entsa yantamen wemiayi. Tura nuni jea yaanchuik Yusen: Wi turatatjai tímia nuna umiktas muuken awamramiayi. Nunia juun kanunam engkemawar, Siria nungkanam wakеткиartas wekaasarmiayi. ¹⁹⁻²¹ Tura Efeso yaktanam jear, Pablo judío iruntai jeanam wemiayi. Tura nuni jea, judío ainaujai chichasmiayi. Tura iijai pujusmi tinamaitiat,

Pablo ayu tichamiayi. Antsu ataksha wetas: “Yus wakeramtaikia, ataksha winitatjai,” tusa ukuki juun kanunam engkema, Efeso yaktanmaya jiinkimiayi. Antsu Priscila ni aishri Aquilajai nuni juwakarmiayi.

²² Tura nunia Pablo kanujai wekaas, Cesarea yaktanam nujamak, juun kanunmaya jiinki, Cristonu ainau Jerusalénnum pujuinaun jiistas wemiayi. Nunia jiinki Antioquíanam wemiayi. ²³ Tura nuni jea nukap pujus, ataksha nunia jiinki Galacia nungkanmasha, tura Frigia nungkanmasha wekaas, Cristonu ainau chikich chikich yaktanam pujuinaun kakantikramiayi.

Apolos Efesonam pujuinaun Yuse chichame ujakmauri

²⁴ Pablo wekai, judío aints Apolos naartin Efesonam jeamiayi. Nuka Alejandría yaktanmaya aintsuyayi. Tura Yuse chichame aarmaun pengker nekau asa, pengker etsernuyayi. ²⁵ Nuka pengke nintintin asa, tura ii Apuri Jesúsán pachis chichaman antuku asa, nu chichaman paan antumain aints ainaun nuiniarmiayi. Turayat imiakratin Juan aints ainaun imiaimun pachis nunak nekau ayayi. ²⁶ Tura judío iruntai jeanam Apolos waya, shamtsuk Jesúsán pachis chichasmiai. Turamtai Priscila ni aishri Aquilajai ni chichaamurin antuku asar, Apolosan akankar jukiar, Yuse chichame nekas tu awai tusar miatrusarang ujakarmiayi. ²⁷⁻²⁸ Tura Apolos Acaya nungkanam wetas wakerau asantai, Efesonmaya Cristonu ainau papin aattrar akuptinak: Ju aintska pengker yaingtaram, tusar akupkarmiayi. Nunia Apolos we, Acaya nungkanam jea, aints mash antinamunam Yuse chichame etserin yaanchuik aarmaurin Yuse kakarmarijai etserak: Yus akupkamu Mesías tati tusaram nakarme nuka Jesúsaitai tusa, paan nekamtikiamiayi. Tura asa judío ainaun nepetkamiayi. Tura Cristonu ainaun Yus pengker awajsati tusa nukap yaingmiayi.

19

Pablo Efesonam pujusmauri

¹ Apolos Corintonam pujai, Pablo muran nangkaiki, Efeso yaktanam jeamiayi. Tura nuni jea, Yusen umirin ainaun wainkamiayi. ² Tura chicharak:

—¿Atumi nintin Yuse Wakani pujawak? —tu iniam nusha aiminak:

—Atsa, Yuse Wakani pachisar etsermauka iikia pengké antichuitji, —tiarmiayi.

³ Tu tinam ataksha iniak:

—¿Tura atumsha warí nintimsarme maimiarne? —tu iniam nusha aiminak:

—Juan aints ainaun nuiniarmia nu nintimsar maimiaji, —tiarmiayi.

⁴ Tinamtai Pablo chicharak:

—Nekas Juan aints ainaun: Atumi pasé nintimauri yapajiam maitiam tusa imiatmimiayi, tura chicharak: Wína ukurun winá nuka Jesúsaitai. Ni nekasampita titaram, —Juan timiaun Pablo etserak timiayi.☆

⁵ Tura Pablo Juanku timiaurin etsermatai, nu aints ainau ii Apuri Jesúsá naarin pachisar mainiarmiayi. ⁶ Turinamtai Pablo Yusen sea, nu aints ainau muuken achiki-antai, Yuse Wakani ni nintin piatkamiayi. Turamtai niish niish chichakarmiayi. Turinamtai Yus: Wína chichamrun etserkarti tusa chichamtikiamiayi. ⁷ Yuse Wakani piatkamuka doce (12) aints armiayi.

⁸ Tura Pabloka nuni kempatam nantu pujus, tuke judío iruntai jeanam waya, nuni shamtsuk judío ainaun Yuse chichamen ujamiayi. Tura Yus ni aintsri ainaun tu inawai tusa chicharkamiayi. ⁹ Tura wainiat chikich ainau Yuse chichamen umirtan nakitinu asar, nu yamaram etsermaun pachisar pasé chichasarmiayi. Tura pasé chichainamtai, Pablo nunia jiinki, Cristonu ainaun yaruak, aints Tirano naartinu papi aujtainum waya, kintajai metek Yuse chichamen etserkamiayi. ¹⁰ Tura Pablo jimia musach aints ainaun Yuse chichamen ujakmiayi. Tura asantai Asianmaya judío ainausha mash, tura griego ainausha mash Apu Jesúsán pachisar etsermaun antukarmiayi. ¹¹ Tura asaramtai Pablon Yus wainchatai takatan takasat tusa kakantikramiayi. ¹² Turamtai aints ainau

☆ 19:4 (Mat. 3.11)

panuinasha, tura tarachnasha jukiar, Pablo namangken antingkiar, nunia jukiar jau ainau namangken nujtukaram tsaararmiayi. Tura iwianchrintin ainausha nu tarachjai nujtukaram, iwianch ainauncha jiiriarmiayi.

¹³ Turinamtai chikich judío ainau chikich chikich yaktanam wekaasar, iwianchrintin ainaun wainkar, ningki nintimsar Jesúsá naarin pachisar, iwianch ainaun jiikiartas chicharinak:

—Pablo Jesúsá naarin pachis etsera nuna naarijai jiinkitaram tajarme, —tinu armiayi.

¹⁴ Tura sacerdote juuntri Esceva naartinu uchiri siete (7) armia nuna tiarmiayi. ¹⁵ Tura iwianchrinu jeen wayaawar nuna tinamtai, iwianch ayaak:

—Wikia Jesúsán wainuyajai. Tura Pabloncha wainuyajai. Antsu ¿atumsha ya asarmeá tarume? —timiayi.

¹⁶ Nuna tusa iwianchrintin tsekengki nu aints ainaun iwianchi kakarmarijai mash achik, nunia nepetak nukap awatramiayi. Turamtai misu kuimiakar, nukap numparar nu jeanmaya tupikiakiarmiayi. ¹⁷ Turinamtai Efesonam judío ainausha, tura judíochou ainausha mash nuna nekaawar shamkarmiayi. Tura Apu Jesús nekas juuntaitai tiarmiayi.

¹⁸ Tura Cristonu ainau kaunkar untsuri ni yaanchuik tunau turamurin etserkarmiayi. ¹⁹ Tura wishin untsuri yaanchuik turutirin inaisar, ni papirin itaar, aints mash wainminamunam keematkarmiayi. Tura nu papi akikri mash irumram nekapmaram, cincuenta warang (50,000) kuikijai sumakmin amiayi. ²⁰ Tura ii Apuri Jesúsá kakarmarijai Yuse chichamen etserkaramtai, aints ainau untsuri Jesúsán nekasampita tusar ni kakarmarin inakmasarmiayi.

²¹ Tuminamtai Pablo nintimias: Macedonia nungkanam, tura Acaya nungkanmasha wekaasan, nunia Jerusalénnum wetasan wakerajai. Tura nunia jiinkin, Roma yaktanmasha weminuitjai, tu nintimramiayi. ²² Tura ni yaingtintrin jimieran Timoteo Erastojai Macedonia nungkanam eemak akupkamiayi. Tura ningki Asia nungkanam jumchik kinta pujustas juwakmiayi.✠

Efeso yaktanam aints taetet wajamuri

²³⁻²⁴ Pablo Efesonam pujai, aints ainau Cristo umirkamurin pachisar nukap chichainamtai, chikich aints ainau kakerkar taetet wajarmiayi. Efesonmaya ainau yusri nuwa tumau nakumkamun: Ii yusrintai tusar seu armiayi. Ni yusri naaringkia Artemisaitai. Aints Demetrio naartin ni yusri seati jeen kuikijai tuupchin najanin armiayi. Tura nu nakumkamun ni yaintri ainajai najanawar untsuri surin armiayi. Tura asar nukap kuikian ju armiayi. ²⁵ Tura nu aints ainaun mash untsuk nunia chikich aints, ni yusri nakumkamurin nuwén najanin ainauncha untsuk, mash kaunkaramtai, Demetrio chicharak:

—Juun ainautiram anturtuktaram: Ii yusri nakumkar surin asar, kuik nukap juwaji. Atumsha nusha nekarme. ²⁶ Antsu aints Pablo naartin chichaak: Aintsu yusri ni uwejejai najanamu ainauka Yuschau ainawai. Tura juni Efesonam wekaakusha tura Asia nungkanam wekaakusha, tuke nunisang chichaawai. Tu chichau asamtai aints untsuri ni timiaurin antukar: Nekasaintai tinawai. ²⁷ Tu tinau asaramtai, yamaikia ii yusri nakumkamuri najaniatrik suruktatkar yuumataji. Tura ii yusri Artemisaka nekas juuntan waininayat, aints ainau nuna jeenka pachischartinuitai. Tura Asianmaya ainau mash, tura chikich nungkanmayasha mash: Nuka ii Yusrintai tinu ainayat ukunam: Nuka Yuschawaitai tiartinuitai, —Demetrio timiayi.

²⁸ Tamati nuna antukar, Efesonam pujuinau kakarman kakerkar chichainak:

—Efesio ainauti yusri Artemisaka nekas juuntaitai, —tiarmiayi.

²⁹ Tura nu yaktanmaya ainau: ¿Warí pachisara untsuminawa? tusar taetet wajarmiayi. Tura aints Gayo naartinnasha, tura chikich aints Aristarco naartinnasha

✠ 19:22 (2.Tim. 4.20)

wainkar, tura achikiar metawar, tura japikiar iruntai jeanam jeeniarmiayi. Gayoka tura Aristarcosha Macedonianmaya aints armiayi. Tura Pablojai tsaniasar wekain armiayi.✠

³⁰ Turinamtai Pablo juun ainaun iruntraun chicharkatas wakerau waininayat, Cristonu ainu nunaka surimkarmiayi. ³¹ Tura Asianmaya juun ainu Pablo amikri asar chichaman akuptinak:

—Anearta: Amin mantamawarai, auni juun ainu iruntramunam wayaawaip, —tiarmiayi. ³² Tinamtai juun ainu iruntramunam aints untsuri: ¿Warukarik iruntraij? tusar nekainachiat iruntrarur asar, chikich ainausha niish chichasar, tura chikich ainausha:

—Atsa, nuka tuuka atsui, —tusar chichainak taetet wajaarmiayi. ³³ Tu wajainai, judío ainu ni aintsrin Alejandro naartinun: Ame chichakta tusar shitakiar umarmiayi. Turinamtai aints ainaun: Itiatkataram tusa, uwejen takui wajas, judío ainaun ayamruktas aints ainaun chichastas wakerimiayi. ³⁴ Tura Alejandro tsapumtai, aints ainu: Auka judío aintsuitai tusar, mash metek jimia hora kakarar chichainak:

—Ii yaktari yusri Artemisaka nekas juuntaitai, —tiarmiayi.

³⁵ Tuke chichainamtai, nunia yaktanmaya chicharkartin wajaki, aints ainaun itatmamantik chicharak:

—Efesomaya ainautiram, anturtuktaram. Ju yaktanam pujuinautikia ii yusri Artemisa jeengka tuke wainuyaji. Tura asar ii yusri nekas pengker aa nuna nakumkamurisha nayaimpinmaya ayaarmia nusha wainuyaji. Mash nungkanmaya ainu nuna nekainawai. ³⁶ Aints kichkisha nuna pachis nekaschawaitai tichamnawaitai. Tura asamtai atumka yamaikia itatkataram. Atumka tenap nintimtsukka pasé aa nuka kichkisha turuwairap. ³⁷ Ju aintska atum juni itaarume nuka ii yusri jeenianka warinchun kichkisha kasamkachari. Tura ii yusrin pachisar paseeka chichaschari. ³⁸ Antsu Demetriosha tura chikich aints nijai takainausha, chikich aints ainaun pachisar: Tunau turayi tusar, chicham nekaatai tusar wakerinamtaikia, chichaman nekamtikiartin ainaun jiisar, apu iruntramunam chichamnaka nekaawarti. ³⁹ Antsu chikich chicham iwiaratasrum wakerakrumka, ju yaktanmaya juun ainu iruntramunam chichamka nekaamnawaitrume. ⁴⁰ Tura ju kintati juni nangkamir iruntrar taetet wajamun romano apuri nuna nekaa inintrak: ¿Warí pachisrumea tuusha chichaarme? tamatikia iikia aiktatkamar tujinkatati. Tura iin pasé awajtamsai tusar shamkatatji tajarme, —timiayi.

⁴¹ Nuna tusa:

—Yamaikia mash jiinkitaram, —timiayi.

20

Pablo Macedonianam nunia Grecianam wekaasamuri

¹ Nunia itatkar jiinkiamtai, Pablo Cristonu ainu untsukmiayi. Tura kaunkaramtai: Pengker nintimsaram pujustaram, tusa chicharkamiayi. Tura chichas umis: Weajai tusa nunia jiinki, Macedonia nungkanam wemiayi. ² Tura nu nungkanam wekaa wekaaka, Cristonu ainu: Cristo miatrusrumek umirkataram tusa, nunia ukuki, Grecia nungkanam wemiayi. ³ Tura nuni jea, kempatam nantun pujus, judío ainu: Pablo maataj tinam, Pablo Siria nungkanam wetas kanunam engkemtsaing, nuna nekaa: Kanunmaka engkemtsuk ataksha kukarak Macedonia nungkanam wetajai, tu nintimramiayi. ⁴ Tura nijai iruntrar wekaasarmia nuka nu armiayi: Bereanmaya aints Sópater naartin, nuka Pirro uchirintai, nunia Tesalónicanmaya ainu Aristarco nunia Segundo, nunia Derbenmaya aints Gayo naartin, nunia Timoteo, nunia Asianmaya ainu: Tíquico nunia Trófimo nu naartin armiayi.✠

⁵ Tura nu aints ainu Troas yaktanam eemkar jear iin nakarmasarmiaji. ⁶ Tura pang pachimrachmau yuwatin fiesta nangkamaramtai, iikia Filiposnum juun kanunam engkemar, nunia cinco kinta kanujai wekaasar, Troasnum jear, ii amikri kukarak eemkar wearmia nujai ingkiunikmiaji. Tura nuni siete (7) kinta iruntrar pujusmiaji.

✠ 19:29 (Filem. 24) ✠ 20:4 (Hech. 21.29)

Pablo Troasnum irasmauri

⁷ Nunia tuming kinta tsawaaramtai, Cristo jakamuri nintimsar iruntrar pang yuwatar kaunkamiaji. Tura Pablo kashin wetin asa, Yuse chichamen etserak, kashi japeng umismiayi. ⁸ Tura ii iruntramiaji nu jeanmaka pata yaki amaunum kantiin untsuri keemakarmiayi. ⁹ Pablo Yuse chichamen etsermatai, natsa Eutico naartin wenur mau angkaakmaunum keemas antimiayi. Tura turaka kari nepeteam kanur, yakíya akaiki aanum ayaarmiayi. Tura nu jeaka kempatam pata yakiri amiayi. Tura nunia ayaaru asamtai, aints ainau kuankiar jiikma yanchuk natsaka jakaun wainkarmiayi. ¹⁰ Turinamtai Pablo kuanki tikishmatar jakaun minakas aints ainaun chicharak:

—Shamkairap. Jakayat iwiaakui, —timiayi.

¹¹ Nuna tusa ataksha patanam yakí waka, pangkan puukamtai yuwaarmiayi. Tura yuwaar umisar, Cristonu ainaujai chichaa chichaaka tsawaarmiayi, tura tsawaaramtai Pablo jiinki wemiayi. ¹² Tura jiinkiamtai, natsa jaka nantaknun ni jeen jeeniarmiayi. Tura pengker pujawai tinamtai, mash pengker nintimrarmiayi.

Troasnumia jiinkiar Miletonam jeamuri

¹³ Pablo: Wikia Aso yaktanam kukarak wetaj tusa wakerimiayi. Tura iincha:

—Atumka kanunam engkemraram wetaram, —turamkurin, iikia eemkar Asonam jear nakasmiaji. ¹⁴ Tura Asonam ingkiunikiar Pablosa kanunam engkemramtai, Mitilene yaktanam nijai jeamiaji. ¹⁵ Nunia jiinkir, kashin tsawaarar isar Quío tutai nangkaikir, nunia kashin tsawaarar Samos isranam jeamiaji. Nunia jiinkir kashin tsawaarar Mileto yaktanam jeamiaji. ¹⁶ Tura Pablo: Wári Jerusalénnum weartai, tura nuni jear, fiesta Pentecostés tutai inangkartai tusa, Asia nungkanam yamaikia pujutsuk, Efeso yaktanmasha wetsuk nangkamakmi, tu nintimias pujumiayi.

Efesonmaya Cristonu ainau juuntrin chicharkamuri

¹⁷ Tura Miletonam jear, Efesonmaya Cristonu ainau juuntrin winiarti tusa untsukmiayi.

¹⁸ Tura mash kaunkaramtai, Pablo chicharak:

—Wikia nu nangkamtaik Asia nungkanam jean, nunia atumjai pujusan, itiur pujuyaja nusha mash nekarme. ¹⁹ Wikia Yuse inatiri asan, tuke kintajai metek ii Apurin umirnuyajai. Tura miajuitjai tumamtsuk, aints ainau Yusen umirtan nakitinamtai, juutkamaikiakun takakminuyajai. Tura judío ainau wína pasé awajtusartas wakerutinau asaramtai wait wajayajai. ²⁰ Turayatun chicham nekas pengker aa nunaka mash pengker nintimsan atumin ujayajrume. Tura aints iruntramunam Yuse chichamen etserkun, nunia atumi jeen wayaan, nunisha Yuse chichamen ujayajrume. ²¹ Tura judío ainauncha, tura judío chu ainauncha chicharkun: Atumi nintimauri yapajiaran, Yus nintimraram tusan, ii Apuri Jesús nekasampita titaram timiajai. ²² Tura yamaikia Yuse Wakani: Jerusalénnum weta turutin asamtai weajai. Tura nuni jeamtai, itiurkarti tusancha nekatsjai. ²³ Antsu Yuse Wakani wína chichartak: Chikich chikich yaktanam amin achirmakar kársernum engketmawartas wakerutminawai. Tura wait wajaktatme turutin asamtai nunasha nekajai. ²⁴ Antsu wikia nunaka pachiatjsjai. Mantuwartas wakerinakka mantuwarti. Antsu Apu Jesús: Wína chichamur etserkata tusa, wína akuptuku asamtai, nunaka umiktasan, Yus aints ainaun mash nekas pengker awajtsatas wakerau asamtai, Yusnum uwemratin chichaman etserkatasan wakerajai. Nunia jakancha Yusnum warastasan wakerajai.✠

²⁵ “Yamaikia nunasha tajarme: Wikia atumin Yuse chichamen etsermatai, mash antuku ainautiram winaka ataksha waitkashtinuitrume, tusan nekajai.

²⁶⁻²⁷ Wikia Yuse wakeramurin pengké uutsuk ujayajrume. Tura asan ju kintaka tajarme: Aints wína chichamrun antukiat, Yusen umirtan nakitak mengkakungka, ningki wakerak mengkawai. Antsu wikia aints ainau mash uwemrarat tusan wakerajai.

²⁸ Tura asamtai atumek wainmamkataram. Turaram Yuse Wakani Cristonu ainau wainin ata tusa, atumin akuptamkau asamtai, ii Apuri jarutramak, ni nemarkau ainautin

✠ 20:24 (2.Tim. 4.7)

ni numpejai sumarmaku asamtai, Cristonu ainau mash wainkataram. ²⁹ Wi junia jiinkiamtai, aints ainau uwija ainaun pachim papeenawa nunisarang Cristonu ainaun: Cristo umirat inaisataram tiartas taartinuitai. Wikia nunasha nekajai. ³⁰ Tura Cristonu ainau wina nemartusarat tusar atumniang wait chichaman etserin wantinkartinuitai. ³¹ Tura asamtai aneartaram. Wikia kempatam musach atumjai pujusan, tsawaisha tura kashisha tuke inaitsuk kichtirmincha: Tunaanum weram tusan, juutkamaikiakun chicharnuyajrume nuka atumka kajinmakirap.

³² “Yatsur ainautirmin, yamaikia Yus yainmakarti tajarme. Yuse anengkratairin pachisan, wi atumin tuke paan ujayajrume nu nintimrataram. Nu chichamka atumi nintin kakamtikramratnuitrume. Yus ni aintsri ainautin: Pengké tunaarinchau wijai pujusmintrum tinu asamtai, Cristojai tuke iruntraram pujustinuitrume tusan, yamaikia ukuajrume. ³³ Wikia aintsu kuikiarinchau, tura kuririnchau, tura entsatirinchau pengké wakerichuyajai. ³⁴ Antsu wina uwejrui takakmasan, wi yuumamurun sumarminuyajai. Tura wijai tsaniasar wekainau yuumamurinchau sumarnuyajai. Atumka nuka nekarme. ³⁵ Wikia atumjai pujakun, tuke inaitsuk takakmakun, kakaichu ainau yuumamurin sumarnuyajai. Tura asamtai atumsha nunisrumek turataram tusan, atumin nintimtiknuyajrume. Ii Apuri Jesúsau chichame nintimrataram. Nu chichamka nuwaitai: ‘Aints yuumak pujau ni yuumamurin juwak warastinuitai. Antsu chikich ainau yuumamurin sua nuka nuna nangkamasang nukap warastinuitai,’” Pablo etserak timiayi.

³⁶ Nuna tusa chichas umis tikishmar, Cristonu ainaujai Yusen seamiyai. ³⁷⁻³⁸ Tura Yusen sea umis, Pablo:

—Winaka ataksha waitkashtinuitrume, —tau asamtai, wake mesekar mash juutkamaikiak Pablon minaksar mejeasarmiyai. Tura nunia nijai tsaniasar kanunam wearmiayi.

21

Pablo Jerusalénnum wemaui

¹ Tura Cristonu ainaun juun entsa yantamen wajainau ukukir, kanunam engkemrar, tupnik isar Cos tutainum wemiaji. Tura kashin tsawaarar nunia jiinkir, isar Rodas tutainum jeamiaji. Nunia jiinkir Pátara yaktanam jeamiaji. ² Tura nuni jear, chikich juun kanu Fenicia nungkanam weau wainkamiaji. Tura nuni engkemrar, nu yaktanmaya jiinkimiaji. ³ Tura juun kanunam wekaasar, isar Chipre tutai wainkamiaji. Tura nujamtsuk nangkamakir, nu israka menanmanini ukukir, Siria nungkanam wemiaji. Tura Tiro yaktanam nujamkar, nuni kanunmaya waririn mash jiiktin asamtai, iisha kanunmaya jiinkimiaji. ⁴ Tura jiinkir, Cristonu ainau nuni pujuinau eakmiaji. Tura wainkar, nuni nijai siete (7) kinta pujarin, Yuse Wakani Cristonu ainaun nekamtikiau asamtai, Pablon chicharinak:

—Jerusalénnum weep, —tiarmiayi. ⁵ Tura siete (7) kinta nangkamaramtai, iisha nu yaktanmaya jiinkir weakrin, Cristonu ainau mash nuwartuk, tura uchirtuk yakta aarin iin nemartamsarmiaji. Tura juun entsa kaanmatkarin jear, mash tikishmarar Yus seamiaji. ⁶ Nuniangka aujsar ukukir kanunam engkemrakrin, nunia aints ainauka ataksha ni jeen waketkiarmiayi.

⁷ Waketkiaramtai iikia Tironmaya jiinkir, kanujai Tolemaida yaktanam jeamiaji. Tura nuni jear kanunmaya jiinkir, Cristonu ainau wainkar: Winaji tusar chichasar, nijai kichik kinta pujusmiaji. ⁸ Tura kashin tsawaarar nunia jiinkir, Cesarea yaktanam jear, nuni Felipe jeen wayaamiaji. Nu Felipeka Yusnum uwemratin chichaman Criston nemarchau ainaun ujayayi. Yaanchuik waje ainau yumamurin susarti tusar, inaikiarmia nuni inaikiamuyayi. Tura nuni wayaar, Felipejai pujusmiaji. ⁹ Ni nawantri cuatro (4) aishrinchau armia nu Yuse chichamen etserin armiayi. ¹⁰ Tura nuni jumchik kinta pujarin, Yuse chichame etserin Agabo naartin Judea nungkanmaya tamiayi. ¹¹ Tura

☆ 21:10 (Hech. 11.28)

ii pujamunam waya, Agaboka Pablo kachumtairin achik, Pablo nawen tura uwejencha jingkiatamiayi. Tura chicharak:

—Yuse Wakani chichaak: ‘Ju kachumtai kachuma juna judío Jerusalénnum pujuinau achikiar judíocho ainamunam surukartatui,’ tawai, —timiayi.

¹² Tamati nu antukar, iisha Cesareanmaya Cristonu ainaujai mash iruntrar Pablo chicharkur:

—Wait aneamam Jerusalénnum weep, —timiaji. ¹³ Tamaitiat Pablo aimiak:

—¿Warukaya timiá juutkurmesha winasha napchausha nintimtikrarme? Wína Apuru Jesúsá naarin pachisar Jerusalénnumia ainau wína jingkiatawartas wakerutinakka turutawarti, tura mantuwartas wakerutinakka mantuwarti tusan tajarme, —timiayi.

¹⁴ Tura Pablo antukchamtai, iikia chicharkur:

—Ii Apuri wakeramuri ati, —tusal itatkamiaji.

¹⁵ Tura umisar Jerusalénnum weakur jiinkimiaji. ¹⁶ Tura asakrin Cesareanmaya Cristonu ainau warumchik iin nemartamkarmiaji. Tura Jerusalénnum jear, Chiprenmaya aints Mnasón naartin ni jeen iinka jeetammiaji. Nu aintska nu nangkamtaik Criston nemarnuyayi. Tura nu aintsu jeen pujustin amiaji.

Pablo Santiagonam irasmauri

¹⁷ Tura Jerusalénnum jeakrin, Cristonu ainau iin waitmakar, pengker nintimturmasar: Winitaram tusar warasarmiaji. ¹⁸ Kashin tsawaarar Pablojai Santiago jiistasar wemiaji. Tura nuni jear, Cristonu ainau juuntri mash iruntrar pujuinau wainkamiaji. ¹⁹ Tura nuni jear Pablo: Winajai tusa, ni wekaamurin pachis kichik kichik turamurinha mash ujaak:

—Wikia Yuse chichamen ujaakun pujai, Yus judíocho ainauncha pengker nintimtikramiaji, —timiayi. ²⁰ Tamati nuna antukar: Yus juuntapita tusar warasarmiaji. Nunia juun ainau Pablon chicharinak:

—Yatsuru, ame tame nuka nekas pengkeraitai. Tura untsuri warang judío ainau Cristonu ainayat, Moisésa armauri miatrusrik umiktinuitji, mash tinawai. ²¹ Tura judío ainau judíocho ainamunam pujuinau juni taar, amin pachitmasar aints ainaun ujainak: ‘Pabloka Moisésa chichame umirtsuk asataram tawai. Tura atumi uchiri nuwapchiri charutsuk asataram tawai. Tura judío ainauti turuti aa nuna mash inaisataram tawai,’ amin pachitmasar mash turaminawai. ²² Turaminau asaramtai ¿iikia iturkatjik? Aints ainau amin pachitmasar: Juni tayi tinaun antukarka tarutmiartatui. ²³ Tura asaramtai ii taji nuka turata. Juni Cristonu ainau cuatro (4) irunui. Nuka yaanchuik Yusen: Wikia nuna turatatjai tinu asar, yamaikia nu chicham umikmi tusar juni pujuinawai. ²⁴ Tura asamtai amesha nu aints ainaujai Yus seatai juun jeanam wayaam, ii judíoti: ‘Yus wína pengker awajtusti,’ tusar nijaamaji nunismek amesha nijaamarta. Nunia Moisés tímia nunisarang ni muuken awamrarti tusam, nunia kuik akiimiaktin aa nu amek akiimiakta. Nu turakminka, aints mash amin turamurmin waitmakar, amin pachitmasar aujmatramina nuka nekasar nangkamiar tinawai, tu nintimrartatui. Tura amincha pachitmasar: Nisha nekas Moisésa armaurin miatrusang umirui turamiartatui. ²⁵ Antsu aints judíocho Cristonu ainau iikia yaanchuik papi akuptukmiaji. Iikia mash metek nintimsar: Aints ni najanamurin: Wína yusrutai tina nu susamuka yuwairap. Tura numpasha umutsuk asataram. Tura niapir maamuka numpentin asamtai yuwairap. Tura tsanirmatka inaisataram. Tu aarar chicham akupkamiaji, —juun ainau tiarmiayi.✠

Yus seatai juun jeanam Pablon achikmauri

²⁶ Tinamtai Pablo nunia jiinki, kashin tsawaar nu cuatro (4) aintsjai Moisés tímia nunisarang ni namangken nijaamarar, Yus seatai juun jeanam wayaawar, Pablo nu aints ainaun pachis sacerdoten chicharak:

—Nu kintati ni nijaamarar umisar, tangkun sumakar Yusen susartas itaartatui, —timiayi.

✠ 21:25 (Hech. 15.29)

²⁷ Tura siete (7) kinta nijaamamuri umitnak wajainai, Asianmaya judío ainau Pablon Yus seatai juun jeanam wayaun wainkar, chikich aints ainauncha mash kajkarmiayi. Nuniangka Pablon achikiarmiayi. ²⁸ Tura kakarar untsuminak:

“Israel ainautiram, yainkataram. Ju aintska mash nungkanam pasé chichaman nuikiartak wekau achikji. Juka Israel ainautin pachitmas, tura Moisésa chichame pachis, tura Yus seatai juun jeancha pachis: Nuka nakitrataram tu nuikiartawai. Tura Yus seatai juun jeanam judíocho ainau pengké wayaachminun wainiat, griego ainausha wayaawarti tusa juni itayi. Tura nuna turak, juka nekas péngke jea wainiat pasemantikui,” nangkamiar waitrinak tiarmiayi.✠

²⁹ Tura Efesonmaya aintsun Tróximo naartinun Pablojai Jerusalénnum wekaun wainkau asar: Pabloka nu aintsjai Yus seatai juun jeanam wayaachiash, tu nintimsar nunaka tiarmiayi.✠

³⁰ Tinamtai Jerusalén yaktanam pujuinau mash taetet wajaarmiayi. Tura ampukiar weriar Pablonka achikiar, Yus seatai juun jeanmaya japikiar jiikiarmiayi. Turinamtai nu jea waitrinka wári epeniarmiayi. ³¹ Tura judío aints ainau maatai tinamtai, romano suntari ni apurin chichaman akuptinak:

—Mash Jerusalénnum pujuinau maaniatai tusar taetet wajainawai, —tusar ujakarmiayi. ³² Tu ujaam, suntara apuri ni suntari ainaujai, tura kapitantri ainaujaisha Pablo katsuminamunam ampukiar wearmiayi. Turinamtai aints ainau nuna wainkar, Pablon katsuminayat inaisarmiayi. ³³ Tura inaisaramtai suntara apuri tari Pablon achikmiayi, tura ni suntarin akuptak:

—Jingkiakratai jiru jimiarjai jingkiataram, —timiayi. Tura jingkiawaramtai suntara apuri:

—¿Yaachita jusha? tura ¿Warina turama? —tusa judío ainaun iniasmiayi. ³⁴ Tu iniam aints untsuri chichainak, taetet wajarmiayi. Tura taetet wajainau asaramtai, suntara apuri chichaman nekaatatkama tujintak: Pablo suntar matsatmanum jukitaran tusa, ni suntarin akuptukmiayi. ³⁵⁻³⁶ Turamtai aints ainau Pablon eteawar nemarsar:

—Maataran, —tusar untsunkarmiayi. Tura judío ainau kajerinou asaramtai, suntar ainou watainum jear, Pablonka nanasar iwiakarmiayi.

Pablo: Tu pujajai tusa chicharmamsamuri

³⁷ Tura suntar matsatmanum jeatak wajasar, Pablo suntara apurin griego chichamejai chicharak:

—Ame tsangkamrakminkia kichik chichaman amin titasan wakerajme, —timiayi. Tu tama ayaak:

—¿Amesha griego chichame chichaukum? —tu iniasmiayi. ³⁸ Tu iniam Pablo:

—Ja ai, —tamati, suntara apuri iniak:

—¿Amesha Egiptonmaya aints nuwik romanotin kajertamak: Maataran, tusa mangkartin ainaun cuatro warangkan (4,000) aints atsamunam jukimia nu aintschaukitam? —tu iniasmiayi.

³⁹ Tu iniam Pablo ayaak:

—Atsa, nuchawaitjai. Wikia judío aintsuitjai. Tarso yaktanmaya aintsuitjai. Cilicia nungka yaktari nekas juun yaktaitai, nuniayainjai. Wait aneam ju aints ainaujai chichasat tusam tsangkatrukta, —timiayi.

⁴⁰ Tamati suntara apuri: Ayu tama Pablo watainum wajas, aints ainaun itatmamtiki-atas uwejen takui wajamtai, aints ainou mash itatkarmiayi. Tura itatkaramtai, Pablo hebreo chichamejai chichasmiayi.

22

¹ Tura aints ainaun chicharak:

—Yatsur ainautiram, juun ainautirmesha, anturtuktaram. Wikia chicharmamkun: Nekas tunaunaka turatsjai tusan, paan ujaktasan tajarme, —timiayi. ² Tura hebreo

✠ 21:28 (Hech. 24.17-19) ✠ 21:29 (Hech. 20.4)

chichamejai chichau asamtai, nuna antukar chichatsuk takamtaik wajasarmiayi. Tumi-namtai Pablo aints ainaun chicharak:

³ “Wikia Judío aintsuitjai. Tarso yaktanam Cilicia nungkanam akiinawaitjai. Turayatun ju yaktanam tsakaru asan, wína nuitinu Gamaliela chichamen nuimiaru asan, ii juuntri ainau Moisésa aarmaurin umirkarmia nunasha mash umirnuyajai. Tura atum ju kinta turarme nunisnak wisha Yuse wakeramurin najanatasan tuke nintirjai wakerin ayajai. ⁴ Tura nu yamaram chichaman umirin ainaun maataj tusan: Aishmang ainausha, tura nuwa ainausha achikrum jingkiaram kársernum engkeataram, tusan akupin ayajai. ⁵ Tura sacerdote juuntrisha, tura judío apuri ainausha mash nunaka nekaawaru asar, nekasaintai tiaraintai. Nuka papin aarar wína surusar: Judío Damasco yaktanam pujuinau susata tusar akuptukarmiayi. Nu akuptukaramtai wikia nuni wena, yamaram chichaman umirin ainaun achikian, juni Jerusalénnum kiankamtai, wait wajaktiniun susarat tusan werimiajai. ⁶

Pablo: Criston tu umirkawaitjai tusa etserkamuri
(Hech. 9.1-19;26.12-18)

⁶ “Tura jinta weayai, Damasco yaktanam jeatak wajasai tsa tupin ai, aneachmau nayaimpinmaya paantin pengké jiitsumir wajatrukmiayi. ⁷ Turamtai shamakun nungka ayaaran, kuta antumkamiajai. Tura chichaman antukmiajai. Nu chichamka nuwaitai: ‘Saulo, Saulo ¿waruka wína waitkaratasmesha wekaaturme?’ ⁸ Tamati wisha ayaakun: ‘Apuru ¿amesha yaachitme?’ tu iniasmiajai. Nuna tama ataksha nayaimpinmaya airak: ‘Wikia Nazarenumia Jesúsaitjai. Ame waitkaratasam wekaaturme nuwaitjai,’ turutmiayi. ⁹ Turutmatai aints wijai wekainauka paaniuncha wainkarmiayi, antsu wijai chichaunka antukcharmiayi. ¹⁰ Tuminamtai wi chichaakun: ‘Apuru ¿warí ititurkat tusamea wakerutame?’ tu iniasmiajai. Nuna tama Apu Jesús wína chichartak: ‘Wajakim weme nu yaktanam weta. Nuni jeakmin ame turatatme nuna ujamakartatui,’ turutmiayi. ¹¹ Tura Yuse paaniuri jirun kusumtikruru asamtai, wikia nantakin wainmak-tatkaman tujinkamiajai. Tura wainmachu asamtai, wijai wekajinau uwejrur tap achirkar Damasconam umatiarmiayi.

¹² “Nuni aints Ananías naartin pujuyayi. Nuka Moisésa aarmaurin miatrusang umirnuyayi. Tura asamtai judío Damasconam pujuinau mash nu aintsun pachisar pengker chichau armiayi. ¹³ Nu aintska wína taruti chichartak: ‘Yatsuru Sauloa, yamaikia ataksha paan jiimsata,’ turutmatai, nu tamaujai metek niin paan wainkamiajai. ¹⁴ Tura wi wainkam wína chichartak: ‘Ii juuntri Yusen searmia nuka ii Yusri asa, ni wakeramurin amin nekamtikramatas aitkarmayi. Tura ni Uchiri timiá pengker aa nu wainkata tusa, tura ni chichame antukta tusa aitkarmayi. ¹⁵ Tura asamtai ameka Yuse Uchiri pachisam wainkamame nu, tura antukmame nusha aints ainausha mash ujaktatme. ¹⁶ Tura asam ¿yamaikia warí nákakmea pujame? Wajaktia, turakmin imaitjame. Tura: Apur tunaunurun jipitruurat tusam Yus seata,’ turutmiayi,” Pablo timiayi.

Pablon judíochu ainamunam akupkamuri

¹⁷ Pablo tuke chichaak:

“Nunia nukap arusan juni Jerusalénnum jean, Yus seatai juun jeanam wayaan, tura Yusen sean, karanma nunisnak ¹⁸ Apur taarun wainkamiajai. Tura nuka wína chichartak: ‘Wári umisam Jerusalénnumia jiinkita. Ame wína pachitsam chicham etserkumnisha, junia aints ainauka anturtamkachartatui,’ turutmiayi. ¹⁹ Nuna turutmatai, wisha ayaakun: ‘Apuru, wikia iruntai jeanam kichnum kichnum wayaan, amin umirtaminak pujuinaun wainkan, nunia jukin kársernum engkeyajai, tura awatnuyajai. Tura asamtai junia aints ainauka nunaka mash paan nekarinawai. ²⁰ Tura ami inatiram Esteban naartin amin pachitmas aints ainaun ujaku asamtai, nu aintsun mainamtai, wikia nuni wajasan: Nuna turuwarti tusan, Estebankan maawarmia nuna wejmakrin nakasmiajai,’ Jesúsantimiai. ²¹

☆ 22:3 (Hech. 5.34-39) ☆ 22:5 (Hech. 8.3;26.9-11) ☆ 22:20 (Hech. 7.58)

²¹ “Wi tamaitiat Apur Jesús wína chichartak: ‘Wikia amin arák judíochu ainamunam akupkatasan wakerajme. Tura asamtai weta,’ turutmiayi,” Pablo timiayi.

Pablo suntara apurin chichasmauri

²² Judío ainau Pablo etsermaurin chichatsuk antukarmiayi. Turayat judíochu ainaun pachis chichaamtai, kakarar untsuminak:

—Ju aintska maaram japataram. Juka iwiaakuka pujuschatu, antsu jakati, —tiarmiayi.

²³ Nunia kakarar untsumkar wejmakrin aimiakar, nungka tsetserin nangkiminak Pablon yukuararmiayi. ²⁴ Turinamtai, suntara apuri nuna wainak Pablon pachis ni suntarin chicharak:

—Atumi pujamuri itaram awatraram. Tura awatraram ¿aints ainau warukaya untsuminawa? tusaram nekaataram, —tusa akupkamiayi. ²⁵ Turamtai suntar ainau Pablon awatrartas nuwap chapikmarmaujai jingkiawaram, Pablo romano kapitantrin nuni jiimij wajaun chicharak:

—¿Romano aints chicham nekartsuk awatramnaukitrum? ¿Atumi apuri nuna tsangkatramarmek? —timiayi.

²⁶ Tamati nuna kapitán antuk, suntara apurin jiistas we, nuni jea chicharak:

—¿Amesha iturkatmek? Nu aintska romano aintsuitai. Tura asamtai awatrashtinu-itme, —timiayi.

²⁷ Tamati suntara apuri Pablon weri chicharak:

—¿Nekasmek romano aintsuitam? —tu iniasmiayi.

Tu iniam Pablo:

—Ja ai, —timiayi.

²⁸ Tamati suntara apuri chicharak:

—Wikia romano aints wajastaj tusan, kuikian nukap akiimiakmijai, —timiayi. Tamati Pablo ayaak:

—Antsu wisha romano ainamunam akiinau asan romano aintsuitjai, —timiayi.

²⁹ Tamati nuna antukar Pablon awatrartas wajainauka awattsuk ukukiarmiayi. Tura Pablo romano aintsuitjai, tinu asamtai, suntara apuri: Pablo jingkiataram tinu asa shamkamiayi.

Pablo judío juuntri ainaun chicharkamuri

³⁰ Kashin tsawaar suntara apuri: ¿Waruka judío ainau Pablon timiá kajerina? tusa tenap nekaatas wakerak, jingkiamurin atitamiayi. Nunia sacerdote juuntri ainaun: Judío apuri ainaujai iruntrarti tusa chichaman akupkamiayi. Tura mash iruntramtai, Pablon judío apuri iruntramunam jafen awajsamiayi.

23

¹ Turamtai Pablo judío apuri ainaun jiis chicharak:

—Wi wear ainautiram anturtuktaram. Wikia Yuse umirin asan, tuke inaitsuk tunau nintimtsuk pujuyajai, —timiayi.

² Tamati sacerdote juun apuri Ananías naartin Pabljai tsaniasar wajainaun chicharak:

—Jangke awatitaram, —timiayi. ³ Tamati Pablo jiyaak:

—Ameka jimiá chichamtin asakmin, aminak Yus awatamratatui. Wína tunaar nekaatasam: ¿Moisésa chichamen umirtsuash? tusam eketiamesha ¿waruka Moisésa chichame umirtsuksha: Jangke awatitaram tame? —timiayi.✠

⁴ Tamati nijai ayaamsar wajainau Pablon chicharinak:

—Maj, sacerdote juun apuri wainiatmesha ¿waruka tuusha chicharme? —tiarmiayi.

⁵ Tu tinam Pablo chicharak:

—Wi wear ainautiram, juka sacerdote juun apurintai, tarume nunaka nekachu asan nunaka tajai. Yuse chichame tu aarmawaitai: ‘Atumi juuntri ainaun pachisrum pásé chicharkairap,’ tawai, —timiayi.

✠ 23:3 (Mat. 23.27)

⁶⁻⁸ Nuna tusa Pablo judío juuntri iruntramunam saduceo ainau fariseo ainaujai pachinirarun wainkamiayi. Saduceo ainau nintiminak: Jakau ainau ataksha iwiaaku pujusartaska nantakchartinuitai, tura Yuse awemamuri atsuinawai, tura wakancha pengké atsuinawai, tinu armiayi. Antsu fariseo ainauka nunaka pachisar: Nuka mash ainawai, tinu armiayi. Pabloka nunaka nekaa kakar chichaak:

—Wi wear ainautiram, wikia fariseo aintsuitjai. Tura fariseo uchirinjai. Tura asan jakau ainau ataksha nantakiar iwiaaku pujusartinuitai tajai. Wikia tu tinu asamtai, wína chichamrun nekartuwartas juni iruntrari, —timiayi. Nuna tamati fariseo ainau saduceo ainaujai chicharnainak metekka nintimtsuk kanakar wajasarmiayi. ☆

⁹ Tura mash taetet wajainak, Moisésa chichamen nuikiartin ainau fariseo asar, wajasar chichainak:

—Ju aintska tunau kichkisha turachi. ¿Antsu wakan tura Yuse awemamuri nijai chichaschamasha? ¿Yaachia neka? —tiarmiayi.

¹⁰ Tura kakarar chicharnainak wajainamtai, suntara apuri Pablon pachis: Nu aintsun achikiar japikiar maachartimpiash, tu nintimias: Nunaka turacharti tusa, suntar ainaun: Pablon jukiarti tusa, chichaman akuptukmiayi. Turamtai suntar ainau ni matsatmaunum ataksha jukiarmiayi.

¹¹ Turinamtai kashi Apu Jesús Pablon wantintuk chicharak:

—Pabloa, juni Jerusalénnum wína pachitsam chichasume nunismek Roma yaktanmasha chichastinuitme. Tura asam pengker nintimsata, —timiayi.

Judío ainau Pablo maami timiauri

¹² Kashin tsawaarar judío iruntrar chichainak:

—Pablo maami. Maachkurkia, yutasha yutsuk, tura amutisha amutsuk pujustatji. Antsu Pablo maachiatrik yuwakrinkia, tura amutisha amakrinkia, Yus iin pasé awajtam-satatji, —tiarmiayi. ¹³ Nunaka cuarenta (40) aints nangkamasang tiarmiayi. ¹⁴ Turuwar sacerdote apuri ainau judío juuntrijai iruntrar pujuinamunam weriar chicharinak:

—Iikia Pablo maami tinu asar, maachkurkia yutasha yutsuk pujustatji. Antsu Pablo maatsuk yuwakrinkia, Yus iinka pasé awajtamsatatji, —tiarmiayi. ¹⁵ Tura ataksha chicharinak:

—Atumsha tura ii juuntri ainausha suntara apurin chicham akuptakrum: Iisha nu aints pachisar chicham tenapkesar nekarataras wakeraji, anangkuram titaram. Turakrumin suntara apuri Pablon akupkamtai, atumin jeatsaing ii maatji, —tiarmiayi.

¹⁶ Tinamtai Pablo awe, ni umaji uchiri, nu aints ainau chichaamurin antuku asa, suntar matsatmaunum jea, nuni waya jiichrin ujakmiayi. ¹⁷ Tu ujakmau asa, Pablo kapitanin untsuk chicharak:

—Ju uchikia apu pujutirin jeeta, wína chichaman ujata nuna apurmincha ujakti, —timiayi.

¹⁸ Pablo tamati, kapitán uchin suntara apuri pujamunam juki, apurin chicharak:

—Aints Pablo naartin ii achikmaji nu wína untsurak: Ju uchikia apunam umata turutin asamtai itajai. Chichaman niin ujakma nuna amincha ujatmakti, —timiayi. ¹⁹ Tamati suntara apuri uchi uwejen achik, iik kanakar pujusar nekaami tusa chicharak:

—¿Warí ujakatasmae wakerutame? —tu iniasmiayi.

²⁰ Tu iniam nuka ujaak:

—Judío juuntri ainau chichaman najaninak: ‘Kashin Pablo jukim judío juuntri iruntramunam akupturkakmin, nu aints pachisar chicham tenapkesar nekarataras wakeraji,’ tusar amin anangkramawartas ininmasartatui. ²¹ Turaminamtaisha: Nekasampita tiip. Cuarenta (40) aints nangkamasang junta epetkar pujurinawai. Tura chichainak: ‘Iikia Yusjai taji: Nu aints maachkurkia, yutasha yutsuk tura amutisha amutsuk pujustatji,’ tinawai. Tura chichaman najanawar umisar, apu ayu titi tusar, amin nakarminawai, —timiayi.

²² Tu tinu asamtai suntara apuri uchin chicharak:

☆ 23:6-8 (Mat. 22.23; Marc. 12.18; Luc. 20.27; Hech. 26.5; Fil. 3.5)

—Yamaikia weta. Antsu wína ujatrame nuka aints kichkisha pengké ujakaip, —tusa akupkamiayi.

Pablo apu Felixnum akupkamuri

²³ Nunia nu apuka suntara kapitangkrin jimiaran untsukmiayi. Tura mai taaramtai chicharak:

—Yamaikia jimia pachak (200) suntar saapin takusar, nunia setenta (70) suntar kawainum keemkar, nunia suntar jimia pachak (200) nangkin nanasar atumjai wearti tusaram umistaram. Nunia kashi japeantak wajai, nu suntar ainaujai Cesarea yaktanam wetaram. ²⁴ Nunia Pablo kawainum keemsatin umirsataram. Nuka apu Felixnum pengker jeati tusaram turataram, —tusa akupkamiayi. ²⁵ Nunia papin akupkatas tu aarmiayi:

²⁶ “Wikia Claudio Liciasaitjai. Apu Felixa, nekas wína apur asakmin, amin chichaman akuptajme. ¿Amesha pengkerak pujam? ²⁷ Ju aintsun amin akuptajme. Judío ainu niin achikiar maatai tinamtaí, juka: Wikia romano aintsuitjai tamati, wikia nuna nekaan, wína suntarur ainaujai werin ayamruk:majai. ²⁸ Tura ¿warukaya maawartas wakerinawa? tusan nuna nekaratasan judío apuri ainu iruntainum jukimjai. ²⁹ Tura nuni jeamtaí, ii juuntri umiktin chichaman umiatsui tinau wainiatnak wikia: Maawarti tichamnawaitjai. Karsernumsha engkeawarti tichamnawaitjai. ³⁰ Tura judío ainu nu aintsun maawartas chicham najatmaun nekaan, wári amin akupajai. Nunia nu aintsun kajerinaun chicharkun: Atumsha apunam werum atumi kajeramuri pachisrum ujaktaram timiajai. Nunak tajame,” tu aarmiayi.

³¹ Tura suntar ainu akupkamu asar miatrusarang umirinak, Pablon jukiar, kashi wekaa wekaaka, Antípatris yaktanam jeeniarmiayi. ³² Kashin tsawaar suntar nawejai wekajinauka ni matsamtairin waketkiarmiayi. Antsu suntar kawainum keemsar wekajinauka Pabljai Cesareanam wearmiayi. ³³ Tura nuni jear papi aarmaun apun suwinak:

—Yamaikia Pablo wainkata, —tiarmiayi. ³⁴ Tinamtaí apu papin aujas umis Pablon chicharak:

—¿Amesha tunía aintsuitme? —tu iniam Pablo ayaak:

—Wikia Cilicia nungkanmaya aintsuitjai, —timiayi. ³⁵ Tamati apu chicharak:

—Amin kajertamina nu taar, amin pachitmasar chichaman ujatnamtai anturkatatame, —timiayi.

Nunia ni suntari ainaun akatar akupak:

—Apu Herodes jean jeamkamia nuni pujsaram ju aints wainkataram, —tusa akupkamiayi.

24

Apu Felixnum Pablo chicharmamsamuri

¹ Nunia cinco (5) kinta nangkamaramtai, sacerdote juuntri Ananías naartin, chikich judío juuntri ainaun ayas, tura chikich chicharkartin Tértulo naartin amia nuna ayas, Cesareanam jearmiayi. Tura Pablon kajerinau asar apunam wearmiayi. ²⁻³ Tura jearamtaí, apu Pablon untsuam ni wayaamtaí, Tértulo Pablon tsanumratas apun chicharak:

—Apu Felixa, ameka nekas chicham nekamtikiartin asakmin, angka pengker pujaji. Tura pengker inamin asam, ii nungkari nekas pengker iwiarin asakmin, mash ju nungkanam pujuinautikia tenukap maaketajai. ⁴ Antsu chicham untsuri antakmeka yaweraim tusan, wait aneam wi chichaamtaí, jumchiksha anturtukta tajame. ⁵ Ju aintska sungkura nunisang paseetaí. Nuka mash nungkanam wekaas, judío ainu metekchau nintimtikratas: Jesúsak umirkataram tusa, Nazaretnumia aintsu umirnu apurintai. ⁶ Tura Yus seataí juun jean pasemantikratas wakerau asamtaí achikmajai. ⁷ Turamaitiat suntara apuri Licias ni suntarijai taar, nu aintsun atantramkiarmaji. ⁸ Ame ju aints inim, ningki etsermataí, ii taji nuka nekasaintai tusam nekaatatme, —Tértulo timiayi.

⁹ Tamati judío nuni kaunkaru ainausha apun chicharinak:

—Ju etsera juka nekasaintai, —tsanuminak tiarmiayi. ¹⁰ Tinamtai apuka: Pablo chichasti tusa, uwejejai untsukmiayi. Turamtai Pablo apun chicharak:

—Apua, ameka untsuri musach ju nungkanmaya ainau chicham nekamtikin asakmin, wikia nunaka nekau asan, wina chichamur anturtukta tusan, pengker nintimsan ujaktatjame. ¹¹ Wikia Jerusalénnum Yusen seatasan tamauruka doce (12) kinta nuke nangkamari. Amesha nekasaintai tusam nekaamnawaitme. ¹² Tura nuni jean, nu yaktanam Yus seatai juun jeanam wayaan, nunia iruntai jeanmasha wayaan, aanumkesha aints kichkijaisha jiyaniamunka waitkacharmayi. Tura aints ainaujai taetet wajamuncha waitkacharmayi. ¹³ Juni aints taara juka wina pachisar: Tunau turayi tusarka, turutcharmin ainawai. ¹⁴ Antsu nunasha tajame: Jesús yamaram chichaman nuikiartimia nuna wikia umirkawaitjai. Nu yamaram chichaman nekasan umiyatnak, ii juuntri Yusrincha tuke umirkawaitjai. Tura Moisésa armaurincha mash, tura yaanchuik Yuse chichame etserin armaurincha mash wikia nekasaintai tajai. ¹⁵ Nuniasha tunaarinchau ainausha, tura tunau ainausha jakaarusha jakamunmaya nantakiartinuitai, ju aints ainau tina nunisnak wisha tajai. ¹⁶ Nuna tau asan Yusen nintimsan, tuke inaitsuk tunaarinchau pujustasan wakerajai. Tura aints ainaun nekasan pasé awajtsuk pujustasan wakerajai.

¹⁷ “Wikia untsuri musach chikich nungka ainamunam wekaasau asan, kuikian yuuminak pujuinaun susatasan, tura Yusnau aa nuna Niin susatasan wina nungkarun tamajai. ¹⁸⁻¹⁹ Wikia nuna turakun, judío ainauti tuke turaji nunisnak pengker nijaamaran, aintsun jumchik ayasan, Yus seatai juun jeanam wayaamjai. Antsu taetet wajamuka atsumi. Tura Asianmaya judío ainau nuni wayaawar, wina waitkarma nu juni taar, wi tunau turawaitmataikia, auka tunau turami turutiarantai. Antsu nuka taarchayi. ²⁰ Nuka tacharu asaramtai, aints juni kaunkaru ainau wi nuwik judío apuri iruntramunam wajasan, tunau turamun wainkaru ainakka etserkarti. ²¹ Antsu nuni wajasan kichik chichaman kakarman chicharkun: Jakau ainau jakariat ataksha nantakiar iwiaaku pujusartin ainawai, wi timiaja nu chichaman pachisar: Paseetai turutinatsuash,” Pablo timiayi.✠

²² Tamati apu Felix nu yamaram chichaman pachis etsermaun antuku asa, judío juuntri ainaun chicharak:

—Suntara apuri Licias taamtai, atumi chichamen nekaaratjarme, —timiayi.

²³ Nuna tusa apu Felix suntara kapitangkrin untsuk chicharak:

—Ju aintska wainkata, antsu jingkiatsuk jeanam pujsata. Antsu ni amikri taaramtai, Pablon yaingkiarti tusam tsangkatkata, —timiayi.

²⁴ Chikich kintati Felix ni nuwari Drusilajai ataksha tamiayi. Ni nuwaringkia judío nuwa ayayi. Tura Pablo itataram timiayi. Jesucristo ituur umirkatnuita tusa, nuna ujakat tusa apu Felix Pablon untsukmiayi. ²⁵ Turamtai Pablo:

—Tu tunaarinchau pujustinuitji, tura ii wakeramuringkia tu nepetkatnuitji, tura ni kintari jeamtai, Yus tunaarintin ainaun jiistinuitai, —tusa ujaam, Felix shamak Pablon chicharak:

—Yamaikia nuke ati tusam weta. Wikia chikich kintati angkan pujakun untsuktatjame, —timiayi.

²⁶ Nunia Felix nintimias: Pablo achikmau jiinkitas wakerakka, kuikian suruschatpiash tusa, jumchik arus Pablon ataksha untsuk, nunia ataksha untsuk, tuke nijai chichastas wakerimiayi. ²⁷ Jimia musach nangkamaramtai, Felix apu pujayat jiinkimiayi. Tura jiinkiamtai Porcio Festo apu wajasmiai. Antsu Felix: Judío ainau wina pengker nintimtursarat tusa, Pabloka tuke achikmau pujusti tusa ukukmiayi.

¹ Turamtai Festo Cesareanam taa, kampakam kinta nangkamaramtai, nunia Jerusalénnum wemiayi. ² Nuni weamtai sacerdote juuntri ainau judío juuntri ainaujai Pablon tsanuminak chichaman untsuri ujakarmiayi. ³ Tura chicharinak:

—Wait aneasam nu aints juni Jerusalénnum weti, tusam akupkata, —tiarmiayi. Jinta nakakar maami, tu nintimsar nunaka tiarmiayi. ⁴ Tu seainamaitiat Festo ayaak:

—Pablo Cesareanam achikmau pujawai. Tura wikia juni jumchik kinta pujusan waketaanak wajajai. ⁵ Tura asamtai atumi apuri ainau wijai Cesareanam wearti. Tura nu aintsu pasé turamuri amatikia, nuni etserkarti, —timiayi.

⁶ Tura Festoka jumchik kinta Jerusalénnumka pujusmiayi. Ocho (8) kinta, turachkusha diez (10) kintaksha pujuschayawash. Nunia ataksha Cesareanam waketskimiayi. Tura nuni jea, kashin tsawaar chichaman nekaatas apu keemtainum keemas: Pablo itataram, tusa ni suntarin akuptukmiayi. ⁷ Tura Pablo wayaamtai, judío Jerusalénnumia kaunkaru asar, Pablon tentakar nangkamiar chicharinak:

—Juka nekas tunau untsuri turamiayi, —tusar tsanumriarmiayi. ⁸ Tinamaitiat Pabloka: Warintajak tusangka yuumatkachmiayi. Tura chichaak:

—Wikia tunaanaka kichkisha turachmiajai. Tura Moisésa chichame judíoti tuke umirji nunasha umirkawaitjai. Tura Yus seatai juun jeancha paseeka awajsachmiajai. Tura romano juun apurin pachisnaka paseenaka chicharkachmiajai, —timiayi.

⁹ Tamati apu Festo judío ainau wína pengker nintimtursarat tusa, Pablon chicharak:

—Ami chichamin nuni nekartuwarat tusam ¿Jerusalénnum wetasam wakeramek? —timiayi.

¹⁰ Tu iniam Pablo ayaak:

—Atsa, wikia judío ainaunka paseeka awajsachmiajai. Ameka nuka nekame. Tura romano juun apuri wi turamurun nekartuati tusan ujaktinuitjai. ¹¹ Turayatun nekasan wi juun tunau turamtaikia, wína mantuatasam wakerakmeke mantuata. Wikia jatanka shamatsjai. Antsu wína tsanumrutinak etserturina nuka nekaschawaitmataikia, winaka judío ainamunmaka surutkachminuitme. Tura asamtai romano juun apuri César chichaman nekartuati tusan tajame, —timiayi.✠

¹² Tamati apu Festo ni aintsri ainaujai chichasmiayi. Nunia Pablon chicharak:

—Nekasam romano juun apuri César chichamrun nekartuati tau asakmin nuni akupkatatjame, —timiayi.

Pablo apu Agripan chicharmamsamuri

¹³ Jumchik kinta arus chikich apu Agripa naartin ni umaji Berenicejai Cesarea yaktanam apu Feston jiisartas taarmiayi. ¹⁴ Tura nuni taar, untsuri kinta pujuinai, Festo Pablon pachis apu Agripan ujaak:

—Apu Felix aintsun achik juni ukukmiau tuke pujawai. ¹⁵ Tura asamtai wikia Jerusalénnum pujai, sacerdote juuntri ainau judío juuntri ainaujai iruntrar nu aintsun pachisar: Tunau turamiayi tusar kautrukarmayi. Tura: Nu aintsnaka maawarti tusar seatiarmayi. ¹⁶ Tu seatinamtai wikia ayaakun: Romano apuri ainautikia chicham nekatsuk aintsun maawarti tichamnawaitji. Tura aints tunau turayi tinu ainaujai ingkiunisar: Tunaari atsuash tusar nekaratnuitji. Tura nu aints chichaman nekar-mamchaukeka: Maawarti tusarkia akupatsji, wikia timiajai. ¹⁷ Tu tinu asamtai, judío ainau juni kaunkaramtai, wikia nakatsuk kashin tsawaaran chichaman nekaratasan apu keemtainum keemsan, nu aints itataram tusan, suntarun akupkamjai. ¹⁸ Tura judío ainau niin pachisar: Juun tunaun untsuri turayi tichartimpiash tu nintimramjai. Tura wainiat nunaka ticharmayi. ¹⁹ Antsu ni Yusrin pachisar nu aintsjai metekchau nintimraru asar, nuka paseetai tiarmayi. Tura Pabloka chikich aints Jesús naartin jakayat iwiaakuitai tinu asamtai, nuna pachisar etseriarmayi. ²⁰ Tu etserinamtai, wikia iturkatjak tusan, nekachu asan Pablon iniasan: Ami chichamin nekartamawarat tusam ¿Jerusalénnum wetasam wakeramek? timiajai. ²¹ Wikia tamati, nuka aimiak: ‘Atsa, antsu romano juun

✠ 25:11 (Hech. 28.19)

apuri César chichamrun nekartuati,' tamati wikia ayaakun: 'Takumka Césarnum wi amin akupachmaka, juni achikmau pujusta timiajai,' —Festo apu Agripan ujaak timiayi.

²² Tu ujaam apu Agripa Feston chicharak:

—Wisha nu aintsu chichamen antuktasan wakerajai, —tamati Festo ayaak:

—Ayu, takumka kashin wi untsukamtai, ni chichamengka anturkatatme, —timiayi.

²³ Kashin tsawaar apu Agripa Berenicejai shiirman iwiarmamsar, suntara apuri ainaujai, tura nu yakta apuri ainaujai, romano juun iruntai jeanam wayaawaramtai Festo: Pablo utita, tusa ni suntarin akuptukmiayi. ²⁴ Tura Pablon itaaramtai, Festo apu Agripan chicharak:

—Apu Agripaya, tura mash juun ainautiram, ju aints jüstaram. Judío Jerusalénnum pujuinau mash ju aintsun kajerinak pasé chicharinawai. Tura tuke inaitsuk maatai tinawai. Tura juni taarsha nunisarang inintru weenawai. ²⁵ Tura wikia nintimsan:

Ju aintska maata, turutiaru wainiatnak, juun tunaunaka turichu asamtai, maachminuitjai tajai. Tura ningki: 'Romano juun apuri César chichaman nekartuati,' turutin asamtai, nuni akupkatasan nintimjai. ²⁶⁻²⁷ Antsu aints achikmau ni turamurin nekatskeka nangkamrik juun apunam akupkachminuitji, tu nintimjai. Tura ju aintsun pachisan wína juun apurun warinak aatrataj tusanka nekatsjai. Tura asamtai atumsha mash antuktaram tusan, tura amesha apu Agripaya ju aintska iniasta tusan, amin itarjame. Nuniasha paan antuknaka papinasha aartatjai, —timiayi.

26

Pablo Agripan: Tu pujajai timiauri

¹ Nuna tamati apu Agripa Pablon chicharak:

—Ame turamuram pachisam etserkata, —tama Pablo: Anturtuktaram, titas uwejen takui apu Agripan chicharak:

²⁻³ —Apu Agripaya, ju kintati wikia juni pengker nintimsan wajajai. Judío ainauti itiur pujaji, tura warí pachisria chichaaaji nu miatrusmek nekau asam, judío ainau wína tsanumrutinak tina nunaka pachisan wi etsermati, anturtukta tusan juni wajajai. Tura asan wait aneasam pengker nintimtursam anturtukta tajame, —Pablo timiayi.

Pablo yaanchuikia tu pujuyajai timiauri

⁴ Tura ataksha etserak:

—Wikia yaanchuik uchi akunka wína nungkarun pujaknasha, tura nampuaran Jerusalénnumsha itiur pujuyaja nunaka judío ainauka mash nekarinawai. ⁵ Nunaka nekarinau asar, wi yaanchuik fariseo wajasmauncha nekarinawai. Fariseo ainauka: Yusen miatrusnak umirnitjai tumaminawai. Nuna mash nekainau asar, ni wakerinakka wína pachitsar ujatmakarminuitai. ⁶ Yus yaanchuik ii juuntri ainaun chicharak: Jakau ainau jakariat, ataksha nantakiartinuitai tinu asamtai, wisha nunisnak tinuyajai. Tu tinu asamtai, juni yamaikia chichaman nekartuwartas itariari. ⁷ Iikia Israela uchiri doce (12) armia nuna wearu asar, mash jakamunmaya nantaktasar wakerau asar, tsawaisha tura kashisha Yuska miatrusrik umirnyajai. Apu Agripaya, wikia jakamunmaya nantaktin-uapitji tinu asamtai, judío ainau wína tsanumrutinawai. ⁸ ¿Waruka Yus jakau ainaun jakamunmaya inankitnuitai, tuuka nintimtsurme? —Pablo timiayi.✠

Pablo Cristonu ainaun tu wekaatinuyajai timiauri

⁹ Tura ataksha etserak:

—Yaanchuik wiki nintimsanak: Nazarenumia Jesúsua umirkarunka kajerkatnuitjai, tinuyajai. ¹⁰ Wikia Jerusalénnum tu nintimsan pujai, sacerdote juuntri ainau turata tusar inataramtai, Cristonu ainaun mainamtai, wisha pengkeraitai tinuyajai. ¹¹ Tura iruntai jeanmasha mash wayaan, Cristonu irunun awatnuyajai. Criston umirtan nakitajai tiarat tusan turinuyajai. Tura Cristonu ainaun timiá kajerau asan, chikich nungkanam chikich yakat ainamunam wekaatinuyajai, —Pablo timiayi.✠

✠ 26:8 (Hech. 23.6) ✠ 26:11 (Hech. 8.3;22.4-5)

Pablo Criston tu umirkawaitjai tusa ataksha etserkamuri
(Hech. 9.1-19;22.6-16)

¹²⁻¹³ Tura ataksha etserak:

—Wi nuna tuke turin asamtai, sacerdote juuntri ainau turata tusar, papin aarar surusaramtai, wikia Damasco yaktanam wemiajai. Tura tsaa tupin wajasai jinta weai, aneachmau nayaimpinmaya paantin pengké jiitsumir tsaa tsanmau nangkamasang kakarman tsanturamiayi. Apu Agripaya, wikia jinta wekaakun nuna wainkamiajai. Tura wijai wekainausha nuna wainkarmiaji. ¹⁴ Tura iikia mash shamkar, nungkanam ayaarar kuta antumkarmiaji. Tura kuta antumkakrin, hebreo chichamejai chichaun antukmiajai. Nu chichamka nuwaitai: ‘Saulo, Saulo, ¿waruka winasha waitkaratasmesha wekaaturme? Waaka kajek numin naka wajakun najar, nawen meseawa nunismek amek ami nintim meseame,’ turutmiayi. ¹⁵ Turutmatai wikia: ‘Apuru ¿amesha yaachitme?’ timiajai. Wi tu iniam nuka aimiak: ‘Wikia Jesúsaitjai. Ame waitkaratasam wekaaturme nuwaitjai. ¹⁶ Tura nantakim wajakta. Yamaikia wína inatir atatme titasan wantintajme. Tura ame wainkamurmesha pachisam etserkata. Tura ukunam wantintuktatjame nusha etserkamnium tusan tajame. ¹⁷ Judío ainau tura judíocho ainausha amin kajertaminamtaisha wi ayamruktatjame. Nuna turatin asan, yamaikia judíocho ainamunam akupkatatjame. ¹⁸ Tura amin akupakun: Wina chichamur etserkum, aints ainau ninti uratia tusan tajame. Ame turakmin teenam pujuinauka yamaikia paaniunam pujusarti tusan wakerajai. Tura iwianchi apuri Satanásan umirtsuk, Yusen umirkarat tusan akupkatatjame. Tura wina nekasampita turutinantikia, ni tunaarin tsangkuratatai. Tura Yus winar ataram tusa, eakarmau asar, wijai iruntrar pujusarti tusan akupkatatjame,’ Jesús turutmiayi, —Pablo timiayi.

Pablo Apu Jesús a chichame miatrusang umikmauri

¹⁹ Tura ataksha chicharak:

—Apu Agripaya, Jesús nayaimpinmaya wína turutmia nunaka miatrusnak umirkamijai. ²⁰ Tura asan nu chichamnaka Damasconam pujuinaun nuná eemkan ujakmiajai. Nunia Jerusalénnum waketkin, nunia mash Judea nungkanmasha wekaasan, nunia arák nungkanmasha wekaasan, judíocho ainauncha nu chichamnaka ujaakun: ‘Atumi pasé nintimaurisha yapajiam Yus umirkataram. Nunia Cristonuitjai tusaram, nekas pengker aa nu turataram’ timiajai.✠

²¹ “Nunia Yus seatai juun jeansam wikia wayaamtai, wína achirkar mantuwartas wakerutiarmiayi. ²² Tura Yus wína yainkau asamtai, tuke inaitsuk apu ainauncha, tura mianchau ainauncha Yuse chichamen ujayajai. Tura yaanchuik Yuse chichame etserin ainau ukunam atiniun pachisar etserkarmia nuna, tura Moisés ukunam atiniun pachis etserkamia nunak etsernuyajai. ²³ Yaanchuik Yuse chichame etserin ainau etserinak: Yus akupkamu Mesías waitnas jakatnuitai. Turayat jakamunmaya nuwá eemak nantaktinuitai. Tura jakamunmaya nantakiamtai, judío ainauncha tura judíocho ainamunmasha chichaman etserinak: Paan nintimsaram pujusrum uwemrataram tusar, etserkartinuitai tiarmiayi,” Pablo timiayi.✠

Pablo apu Agripan: Cristo umirkata timiauri

²⁴ Pablo nu chichaman etserak wajamtai, apu Festo kakar chicharak:

—Pabloa, nuka waurkum tame. Papi nukap nuimiaru asam waurme, —timiayi.

²⁵ Tamati Pablo ayaak:

—Atsa, apu Festoa, wikia waurtsujai. Antsu wi taja nuka nekasaintai. ²⁶ Apu Agripa ju keta juka wi taja nunaka nekasaintai tusa nekawai. Tura wi taja nunaka uukchamu asamtai, nunaka mash antuku asa nekawai. Tura asamtai arantutsuk niincha ujaajai. ²⁷ Apu Agripaya ¿yaanchuik Yuse chichame etserin aararmia nuka nekasampita tamek? Wikia nekajme. Ame nekasampita tame, —Pablo Agripan timiayi.

²⁸ Tama Agripaka ayaak:

✠ 26:20 (Hech. 9.28-29) ✠ 26:23 (1.Cor. 15.20)

—¿Wári Cristo umirkat tusamek wakerutam? —timiayi.

²⁹ Tamati Pablo chicharak:

—Ja ai, yamaik tura nukapka arutsuk wiya nunismek Yus umirkata tusan wisha wakerajme. Tura ju kinta wína chichamrun antú pujuinauka mash wiya nunisarang Yusen umirkarat tusan wikia wakerajai. Antsu wiya nunisrumek jingkiamu pujustaram tusanka tatsujrume, —timiayi.

³⁰ Pablo tamati, apu Agripa apu Festojai mai wajakiar, tura Berenicesha nijai pujuarmia nujai mash wajakiarmiayi. ³¹ Tura kanakar apu ainau chicharnainak:

—Ju aintsu tunaaringkia atsau asamtai maachminuitai. Tura karsernumsha engkeachminuitai, —tunaiyarmiayi.

³² Tura apu Agripa Feston chicharak:

—Ju aintska juun apu César chichamrun nekartuati tichawaitmataikia, jiikir akupkamin aji, —timiayi.

27

Pablo Romanam akupkamuri

¹ Chichaa chichainaka apu Festo:

—Pablon Italia nungkanam Roma yaktanam akupkami, —tamati, suntar ainau Pablon chikich achikmau ainajai yaruakarmiayi. Turinamtai apu Festo suntara kapitantrin chicharak:

—Ju achikmau jukim, Italia nungkanam juun apu pujamunam umatia, —timiayi. Nu kapitán Julio naartin apu Césari suntarin inauyayi. ² Tura asamtai juun kanu Adramitio yaktanmaya jeamtai, nuni engkemramiaji. Nu kanuka Asia nungkanam wetin asamtai, iikia Cesareanmaya jiinkir, juun entsanam wekaasamiaji. Tura Macedonianmaya aints Aristarco naartin iijai wemiaji. Nuka Tesalónicanmaya aintsuyayi.✠

³ Tura kashin tsawaarar Sidón yaktanam nujamkamiaji. Tura nujamkakin, Julio Pablon wait anentak:

—Kanunmaya jiinkim amikrum ainau jiista. Turakmin nuka yuumamurmin suramsarti, —tusa tsangkamkamiayi. ⁴ Nunia ataksha kanunam engkemrar, Sidónnumia jiinkir, juun entsanam wekaasar, nase nujinmanini umpuau asamtai, isra Chipre tutaingkia ii menarinini ukukir nuni wekaasamiaji. ⁵ Tura juun entsa katingkiar, Cilicia nungka yantamen nangkamakir, nunia Panfilia nungka yantamen nangkamakir wekaa wekaaka, Mira yaktanam nungka Licia tutainum nujamkamiaji.

⁶ Nuni nujamkarin, kapitán chikich juun kanun Alejandría yaktanmaya jeaun wainkamiayi. Nu kanuka Italia nungkanam wetin asamtai: Nuni engkemaram tusa akuptamkamiaji. ⁷ Tura untsuri kinta yaitik wekaasamiaji. Tura Gnido yaktanam jintumsar wekaasar, nase nujinmanini kakar nasentu asamtai, nuni wetatkamar tujinkar, isar Creta tutai tenteenkir, yakat Salmón tutai yantamenini nase majatau asamtai nuni wekaasamiaji. ⁸ Tura nuni pengké wechamin asamtai, wait wajakir nu isra tsakarin tenteenkir chikich nujamtainum, “Pengker Nujamtai” tutainum jeamiaji. Nuniangka yakat Lasea tutaingkia arakchichuyayi. ⁹ Tura wekaa wekaaka untsuri kinta mengkakau asar, tura yumanch jeatak wajasu asamtai, juun entsanmaka wekaasachminuitai. Tura asamtai Pablo suntara kapitangkrin chicharak:

¹⁰ —Juun ainautiram, yamai wekaakurkia, nekasar sapij wait wajaktatji, tu nintimjai. Nekas juun kanusha jakurtatui. Tura warinchu ainausha jeekatatji. Tura aintstisha kajingminuitji, —tu chicharkamiayi.

¹¹ Tamaitiat suntara kapitangkri Pablo chichamenka anturtsuk, kanu anuntrin chichamen, tura kanurtinu chichamenak anturkamiayi. ¹² Tura yumanch amanumak nu nujamtainum pujuschamin asamtai, mash iruntrar nintimsar: Ataksha juun entsanam wekaakurkia, chikich Cretanmaya nujamtainum Fenice tutainum jeami tiarmiayi. Nu

✠ 27:2 (Hech. 19.29)

nujamtainum tsaá akaatai untsurinini tura menarininisha nase jumchik nasentu asamtai, nuni pujusar yumanch inangkarmi tiarmiayi. Antsu Pabloka tuuka nintimrachmiayi.

Juun entsanam nase kakar nasenkamuri

¹³ Tura surnumia nase yaitas nasenmatai: Yamaikia Fenicenam jeatatji, tu nintimsar pujusarmiayi. Tura Pengker Nujamtainumia jiinkir isar Creta yantamen arakchichu wekaasamiayi. ¹⁴ Tura jumchik arusar tsaá waakmaunum menanmanini aneachmau nase kakar nasenmiayi. ¹⁵ Tura nase nujinmanini kakarman nasenmatai, kanu iikiatatkamar tujinkar, waketchichmin asar: Aintsarkesha wemi tusar wemiayi. ¹⁶ Tura isar tuupich Cauda tutai tenteenkir, atu yantame nase jumchik majantiamtai, nuni wekaasar, kanu yairach nenakar wemiayi nu japikir waitnasar juun kanunam engkermiayi. ¹⁷ Tura kanu yairach engkerar umisar, juun kanunam takakmin ainau kanu netsepen chapikjai jingkiawarmiayi. Nunia juun entsa páparim amanum, Sirte tutainum juun kanu pataamini tusar, nase kakarman nasentu asamtai, tarach juun nase umputinka kuakir, nunia tarachrinchau nase nasentak juun kanu umati tusar nakasmiai. ¹⁸ Kashin tsawaarar nase tuke kakarman nasentu asamtai, juun kanu wampuptit tusar, warinchu meram ainaunka juun entsanam ujugkarmiayi. ¹⁹ Nunia kempatam kinta nangkamaramtai, juun kanu nitkarin engketiarmia nunasha ni uwejejai utsangkarmiayi. ²⁰ Tura untsuri kinta tsaasha waintsuk, tura yaa ainausha waintsuk pujau asar, nasengka tuke nunisang kakarman nasenmiayi. Tura kakarman nasenmatai: Yamaikia uwemrashtatjiapi, tu nintimiat nangkamamiayi.

²¹ Tura aints mash yurumkancha yutsuk, untsuri kinta takakmasu asaramtai, Pablo mash aints ainamunam japen wajaki chicharak:

—Juun ainautiram, anturtuktaram. Isar Cretanmaya jiintsuk nakasmi, wi timiaja nu umirtukuitkurminkia, juun kanusha meserchau ayi. Tura warinchu ainausha entsanam ujugchamu ayi. ²² Antsu juun kanu jakur tuke mengkakamtaisha, aintska kichkisha jakashtatui. Tura asamtai yamaikia napchau nintimtsuk asataram. ²³ Wikia Yusnau asan, tura Yuse inatiri asamtai, Yuse awemamuri ju kashia juwi wína wantinturak: ²⁴ ‘Pabloa, shamtsuk asata. Ameka romano juun apuri pujamunam jeatin asakmin, ju kanunam amijai wekainauka mash jakarchati tusa, Yus wainkatatui,’ turutui. ²⁵ Juun ainautiram, Yuse awemamuri wína turutin asamtai, wikia Yusen nekasampita tinu asan: Pengker nintimsaram kakaram wajastaram tajarme. Yus ta nunaka miatrusang umiktatui. ²⁶ Antsu chikich isranam pataamtatji, —Pablo timiayi.

²⁷ Tura asamtai jimia tuming nase kakarman nasentak, juun entsa Adria tutainum entsa tamparak juun kanun mai jiimtik mai jiimtik awajmatai, kashi japeng kanunam takakmin ainau pampa uj wajainaun arák antukar: Entsa kaanmatkarin jeatak wajasji tu nintimrarmiayi. ²⁸ Tura ¿warutam kunaki? tusar nekapminak: Treinta y seis (36) metro kunarin nekapmawarmiayi. Tura jumchik arusar ataksha nekapminak, veintisiete (27) metro kunarin nekapmawarmiayi. ²⁹ Tura uj wajamtai, pampa ijukai tusar shaminak, juun kanu tatangkenini jiru meram jirujai jingkiamu, ancla tutai, cuatro (4) amia nuna juun entsanam jungkarmiayi. Nase jektamrai tusar, tura kanu nuni nanasat tusar turuwarmiayi. Tura shaminak: Wári tsawaarat tusar Yusen searmiayi. ³⁰ Tura tsawaarat tusar nakainai, kanunam takakmin ainau nintimsar: Kanunmaya iik jiinkir uwemrami, tusar kanu yairach juun kanunam jingkiamu tepemia nuna atiwat: Entsanam nanasti tusar, chapikjai akupkarmiayi. Nunia chichainak:

—Juun kanu nujinini ancla nangkimiatar weaji, —nangkamiar anangminak tiarmiayi. ³¹ Tinamtai Pablo suntara kapitangkrin, tura suntar ainaun ujaak:

—Ju takakmin ainau kanunmaya jiinkiamtaikia, atum juwakutirmeka uwemrashtatrume, —ti miayi.

³² Pablo tamati, suntar ainau kanu yairach chapikjai nenaamun met charutkarmiayi. Turinamtai nu kanuka juun entsanam jakermiayi.

³³ Kashik tsawaatsaang Pablo: Aints ainau yutan yuwarat tusa chicharak:

—Yamaikia jimia tuming yurumak yutsuk pujarme. Tura asaram tunarta-trume. ³⁴ Tura nekasrum uwemratarum wakerakrumka, wait aneasrum jumchiksha yuwataram, jakairam tusan tajarme. Antsu yuwakrumka, kichkisha jakashtatrume, —timiayi.

³⁵ Nuna tusa pangkan juki, mash wainminamunam Yusen maaketai tusa pangkan puuk yuwamiayi. ³⁶ Turamtai nuna wainkar, mash pengker nintimsar yuwararmiayi. ³⁷ Tura juun kanunam engkemamiaji nuningkia jimia pachak, nunia setenta y seis (276) aints armiaji. ³⁸ Tura mash yuwar tutuarar umisar, juun kanun wampumamtiartas trigonka kanunmayan mash utsangkarmiayi.

Juun kanu entsanam wayaamuri

³⁹ Tura tsawaaramtai, kanunam takakmin ainau nungkan wainkarmiayi. Turayat ¿warí nungkaki? tusarka nekaacharmiayi. Tura juun entsa yantamen engketkau miakun wainkarmiayi. Tura nuni kaanmatkan wainkarmiayi. Tura nuna wainkar: Auni nu-jamkami tusar wakeriarmiayi. ⁴⁰ Tura kanu wetsuk nanatu asamtai, jiru meram ancla tutai, nuna jirurin met charutkar, mash juun entsanam japawar ukukiarmiayi. Nunia juun kawin jingkiamuri ataksha atiwari, nunia tarach juuntan chapikrin japikar, tarachin yakí nenawarmiayi. Tura nase kakaram nasentu asamtai, juun kanu kaanmatkanam nujamtanak wajasmiai. ⁴¹ Tura entsa tamparamuri juninisha, tura atuninisha nukap tamparau asamtai, entsa páparim amia nuni juun kanu nuji muchikchamin patamiayi. Tura juun entsa timiá kakarman tamparau asamtai, kanu tatangkrin jakurmiayi.

⁴² Turamtai suntar ainau: Achikmau ainau yukumkiar tupikiakiarai, tusar mash maatar wakeriarmiayi. ⁴³ Antsu suntara kapitangkri Pablon uwemtikratas wakerau asa: Maawairap, tusa surimkamiayi. Tura chicharak:

—Yukumin ainau eemkar juun kanunmaya jiinkiar yukuakiar kukarnum achimkarti. ⁴⁴ Tura yukumchau ainauka taunum achimkar, tura chikich ainau warinchunam achimkar katingkarti, —tusa akupkamiayi. Tu timiau asar, mash kukarnum achimkar iikia uwemramiaji.

28

Pablo Malta isranam pujusmauri

¹ Tura mash kukarnum achimkar uwemrau asar, ju israka Maltaitai tusar nekaamiaji. ² Nunia iincha aints ainau wait anentramau asar nukap yainmakarmiaji. Tura yumi jitau asamtai, micha amati jin keemakar:

—Juni iruntraram ji yamitarum, —tusar untsurmakarmiaji. ³ Turaminamtai Pablo chapuman jinum shushuaun, napi ji sukuam chapumnumia tsekengki, ni uwejen esai nemaramiaji. ⁴ Turamtai nunia aints ainau nuna wainkar chichainak:

—¿Ju aintska nekas mangkartinchawashi? Juun entsanmayangka uwemrayat, ni Yusri iwiaaku pujusai tusa najmatrayi, —tiarmiayi.

⁵ Tinamaitiat Pablo uwejen peaamtai, napi jinum epenamiayi. Tura najaimiatsuk pengker pujumiai. ⁶ Turamtai nunia aints ainau: ¿Warutam arusang uweje inurat? tura: ¿Warutam arusang jaak ayaantit? tusar nakasarmiayi. Nunia naka nakaka najaimiatsuk pengker pujamtai, niisha nintimrar: Yuschaukai tunaiarmiayi.

⁷ Ii pujumiaji nuni nu isra apuri ajari arakchichu amiayi. Nu apuka Publio naartin-uyayi. Nuka: Wina pujutirun winitaram, tusa iin wait anentramak kempatam kinta pengker awajtamsamiaji. ⁸ Turamtai Publio apari tsuwea tsuweaka ijarak jaak tepemiayi. Turamtai Pablo jiiistaj tusa, ni tepamurin waya, nuni Yusen seamiayi. Tura Yusen sea umis, uwejejai muuken achirkam pengker wajasmiai. ⁹ Nuna turamtai nu isranam chikich sungkurintin ainau Pablon jiiisartas kautkaru ainauka tsaararmiayi. ¹⁰ Tura iincha pengker awajtamsar nukap yainmakarmiaji. Tura ii wetin jeamtai, kanunam engkematar pujarin, ii yuumamurin mash suramsarmiaji.

Pablo Romanam jeamuri

¹¹ Tura kempatam nantu yumanch amanum nu isranmak pujusar, nunia Alejandría yaktanmaya juun kanunam engkemamiaji. Yumchati wekaasachmin asamtai, nu kanuka nuni nanaasmiayi. Nu kanu nujin romano yusri Cástor nunia Polux naartin nakumkamu yakí nujkamu ayayi. ¹² Tura nunia jiinkir, Siracusa yaktanam nujamkar, nuni kempatam kinta kanurmiaji. ¹³ Nunia jiinkir, entsa kaanmatkari arakchichu ai wekaasar, Regio yaktanam jeamiaji. Tura kashin tsawaarar, nase surnumanini nasentu asamtai, nunia jiinkir, jimiaarchik kinta wekaasar, Puteoli yaktanam jeamiaji. ¹⁴ Tura nuni jear, Cristonu ainau wainkamiaji. Turakrin nuka: Iijai pujusmi, turammiaji. Turaminau asaramtai, iikia nuni kichik tuming pujusar, nunia Roma yaktanam kukarak wemiaji. ¹⁵ Tura asakrin Romanmaya Cristonu ainau ii winamun pachisar antukaru asar, sumatinam “Apio Sumati” tutainum jear, nuni ingkiunikmiaji. Tura chikich ainau Romanmaya jiinkiar, “Kempatam Kanuti Jea” tutainum wininau nuni ingkiunikmiaji. Tura asamtai Pablo Yusen maaketai tusa pengker nintimias wajamiayi. ¹⁶ Tura Roma yaktanam jeakrin, Pablon karsernumka engketsuk, chikich jeanam pujusti tusa, suntara apuri tsangatkamiayi. Antsu tupikiaki tusa kichik suntar: Pablo nakasta tusa jeanam akupkamiayi.

Pablo Romanam Yuse chichamen etserkamuri

¹⁷ Tura Pablo kempatam kinta Roma yaktanam pujus, nunia tsawaarak Romanmaya judío juuntri ainaun untsuk mash ikiaanak chicharak:

—Yatsur ainautiram anturtuktaram. Wikia judío ainaunka paseeka awajchayajai. Tura ii juuntri akupamurincha pachisnaka paseeka chicharchayajai. Tura waitinayat, Jerusalénnum wína achirkar, romanonam surutkarmiaji. ¹⁸ Turamtai romano ainau chichaman nekartuwartas wína nukap inintsar umisar, wikia tunaunaka turichu asamtai, nangkamir maashtinuitji tusar, wínaka akuptukartas wakerutiarmiaji. ¹⁹ Tura waininayat ii juuntri ainau: ‘Atsa, akupkairap,’ turutiarmiaji. Wína turutinamtai, wikia ayaakun: Antsu judío ainaun pachisan pasé chichaschamin ayatun, romano juun apuri chichamrun nekartuati timiajai.✠

²⁰ “Tura asan wisha atumin chichastaj tusan untsukjarme. Israel ainauti mash iin Uwemtikramratin tati tusar nakaji. Nuna chichamen etseru asan ju jirujai jingkiamu pujajai,” Pablo timiaji.

²¹ Tamati judío ainau chicharinak:

—Amin pachitmasar Judea nungkanmaya papin kichkisha akupturmakcharmaji. Tura ii weari ainau juni taar, amin pachitmasar: Pasé turayi, kichkisha turamcharmaji. ²² Antsu mash nungkanmaya ainau nu yamaram chichaman umirinaun pachisar pasé chichainau asaramtai, ¿ame itiuur nintime? nu nekaatar wakeraji, —tiarmiaji.

²³ Nuna tinau asar, nu kinta ataksha antukmi tusar waketkiarmiaji. Nu kinta tsawaaramtai, untsuri aints Pablo pujamunam kaunkarmiaji. Tura kaunkaramtai, Pablo kashik nangkama, Yuse chichamen etse etserka kiarai inaisamiayi. Tura Yus aints ainaun itiuur inawa nuna pachis Moisésa armaurincha ujaak, tura yaanhuik Yuse chichame etserin ainau armaurincha ujaak, Jesúsán: Nekasampita tiarat tusa ujamiayi. ²⁴ Turamtai chikich ainau ni timiaurin antukar: Nekasaintai tiarmiaji. Antsu chikich ainauka: Nekasaintai ticharmiaji. ²⁵ Tura tuke chicharnaisar, metekchau nintimtunisar: Wetai tinamtai, Pablo ataksha chicharak:

—Yuse chichame etserin Isaías naartinun Yuse Wakani ii juuntri ainaun tímia nuka nekasaintai. Isaías chichame nuwaitai:

²⁶⁻²⁷ Yus Isaíasan chicharak:

‘Nu aints ainau jiisam chicharkata. Atumka paan antayatrume antukchatnuitrume. Tura paan wainmatcha wainmayatrume nekaashtinuitrume. Nu aints ainau katuram nintintin asar, kuwishi epekua nunisarang antukartatkamawar tujintinawai. Tura wainmichua nunisarang pujuinau asar wainmaktatkamawar

✠ 28:19 (Hech. 25.11)

tujintinawai. Tu ainiachkungka paan nekaawarminuitai. Tura nekasar antukarminuitai. Tura nintijai paan nintimsar ni tunaarin inaisaramtaikia, wikia nu aints ainaun uwemtikratnuitjai,' Yus Isafasan timiayi.☆

²⁸ Tura asamtai nunasha tajarme. Yamai ju uwemratin chichaman Yus judíochu ainaun akuptawai. Tura junaka nekasar antukartatui, —Pablo timiayi. ²⁹ Tamati judío ainau nukap chicharnaikiar jiinkiar miayi.

³⁰ Turamtai Pabloka jea ikiamsamunam jimia musach pujusmiayi. Tura nuni niin jiisartas winiarmia nunaka mash pengker nintimias: Wayataram, timiayi. ³¹ Tura Yus aints ainaun tu inawai tusa, ii Apuri Jesucriston pachis shamkartutsuk aints ainaun nuiniarmiyai. Turamtai nu etsermaunaka etserkaip tusarka pengké suritkacharmiyai. Maaketai.

☆ 28:26-27 (Isa. 6.9-10; Mat. 13.14-15; Juan 12.39-40)

Pablo Romanam Pujuinaun Papin Akuptukmauri

Chichaman akuptukmauri

¹ Wiitjai Pabloitjai. Jesucristo inatirinjai. Tura asamtai Cristo wina eatak, Yusnum uwemratin chicham etserkata tusa akuptukmiayi.

²⁻³ Yaanchuik Yus ni Uchirin pachis ni chichamen etserin ainaun aamtikramiayi. Ni Uchirin pachis aamtikramia nunaka ni Uchiri Jesucristo taa miatrusang umikmiayi. Ii Apuri Jesucristo Yuse Uchiri ayat aints wajas, apu Davidta weari akiinamiayi. ⁴ Tura asamtai Yus ni Uchirin nekas jakau wainiat, ni kakarmarijai inankimiayi. Turamtai Yuse Wakani nekas pengker aa nuka ii Apuri Jesucriston jakamunmaya inankin asa: Nuka Yuse Uchirintai tusa, aints ainautin nekamtikramamiaji.✠

⁵ Jesucristoka wina wait anentrak pengker awajtususu asa: Wina chichamur etserkata tusa, tura mash nungkanam wina chichamur etserkakmin, wina pachisar: Nekasampita tusar umirtukarti tusa akuptukmiayi. ⁶ Tura mash nungkanmaya ainaujai metek atumsha uwemratarum tusa, Jesucristo atumin eatmakmiarume. ⁷ Cristo atumin: Nekasrum tunaarinchau winar ataram tusa eatmaku asamtai, Yuse aneetiri ainautirmin, Roma yaktanam pujuinautirmin, ju papin aaran akuptajrume. Ii Apaachiri Yus ii Apuri Jesucristojai atumin wait anentraminak pengker awajtamsarti, tura angkan pengker pujustinnasha suramsarti tajarme.

Pablo Roma yaktanam irastas wakerukmauri

⁸ Nu nangkamtaik atumin nuna tajarme. Mash nungkanmaya ainau atumin pachitmasar: Criston miatrusarang umirinawai tinawai. Tura asamtai Jesucristo atumin pachis wina nintimtikruru asamtai, Yusen maaketaj tai. ⁹ Wikia Yusen tuke nintimran niin umirkau asan, ni Uchiri chichamen etserjai. Tura tuke inaitsuk atumin pachisan Yusen seatjarne nunaka Yuska nekawai. ¹⁰ Wikia Yusen tuke seakun: Apaachiru, ame wakerakmeke Romanam akuptukchainmeash tusan tuke seakun pujajai. ¹¹ Wikia atumin jeanka, Cristo miatrusrumek umirkataram tusan atumin kakamtikratasan wakerajrume. Tura asan nekasan atumin jiiistan wakerajrume. ¹² Tura atumsha Cristo nekasampita tinu asakrumin, wisha nunisnak Cristo nekasampita tinu asan, atumjai iruntran pengker nintimtunisak kiakanirmi tusan wakerajai.

¹³ Yatsur ainautiram, nusha nekaataram tusan tajarme. Wisha chikich chikich nungkanmaya ainaun kakamtikramiaja nunisnak atumin kakamtikratasan wakerimiajai. Antsu atumin jiiistan nukap wakerayatun, winitatkaman tujinkamiajai.✠ ¹⁴ Antsu aints tumashmia pujawa nunisnak, mash aints ainamunam, nuimiaru ainamunmasha, tura nuimiarchau ainamunmasha, tura papi nekau ainamunmasha, tura papi nekachu ainamunmasha Yuse chichamen etserkamnawaitjai. ¹⁵ Tura asan atumnasha Roma yaktanam pujuinautirmincha uwemratin chichaman ujaktasan nukap wakerajrume.

Uwemratin chichame kakarmari pachis etserkamuri

¹⁶ Mash aints ainau Yusnum uwemratin chichaman nekas kakaram aa nuna antukar, Criston nekasampita tusar uwemrarinuitai. Tura asamtai wikia nu chichaman etsertan pengké natsaamatsjai. Judío ainau nu chichaman eemkar antukaru asar uwemrarin ainawai. Tura chikich nungkanmaya ainausha nu chichaman antukar uwemrarinuitai.✠

¹⁷ Yus aints ainautin nu uwemratin chichaman nekamtikramau asamtai, nekas tunaarinchau pujusminuitrume tusa, iincha nekarmaji. Cristo nekasampita tinu asakrin, Yus: Nekas ame pengkeraitme turamji. Antsu chikich uwemratin chichamka pengké atsawai. Yaanchuik Yuse chichame etserin nuna pachis tu aarmiayi: “Yusen nekasampita tinauka tuke iwiaaku pujusartin ainawai.”✠

Mash aints ainau tunaarintin ainawai timiauri

¹⁸ Aints ainau tunau asar, chicham nekas aa nuna antutan nakitinak, pasé aa nuna turinau asaramtai, Yus nayaimpinam puja nuka nuna wainak, nu aints ainaun kajerau asa wait wajaktinnum akupawai. Yus nunasha nekamtikramji. ¹⁹ Yus tu pujajai tusa, iin nekamtikramau asamtai, aints ainauti: Yus itiur pujawa tusar, paan nekaawartinuitji. ²⁰ Yus nu nangkamtaik mash aa nuna najanau asamtai, iikia Yuska wainchautiatrik, ni najanamuri mash wainu asar: Nekas Yus asa, ni kakarmari tuke nangkankashtinuitai tusar paan nekaatnuitji. Tura asamtai aints kichkisha: ¿Yus pujatsuash? Wikia nekatsjai, pengké tichatnuitai.✠

²¹ Tura aints ainau: Yus tu pujawapi tusar nekainayat, Yus juuntapita tutsuk, nunia maaketai ticharmiayi. Antsu nangkamiar nintiminau asar, nintinchau wajasarmiayi. Tura paan nintimrartatkamawar tujinkar teenam pujuinawa nunisarang pujuarmiayi.✠

²² Tura wikia nekawitjai tinayat nintinchau ainawai. ²³ Tura Yus nekas kakaram aa nuka tuke pujau waininayat, niin umirtan inaisarmiayi. Tura aints jakatin ainayat, ni nakumkamurin najanawar: Wína Yusruitai tusar searmiayi. Tura nanamtin ainau nakumkamuncha, tura napi ainau nakumkamuncha, tura pachim nakumkamuncha najanawar: Wína yusruitai tusar searmiayi.✠

²⁴ Tura ni wakeramurin nintimtinak tuke tunau wajasar, jimiar tsaningkiar natsanpiaku aa nuna turinau asaramtai, Yus nu aints ainaun ajapa ukukmiayi. ²⁵ Tura Yuse chichame nekas aa nuna nekasampita tutsuk, wait chichaman nekasaintai tusar, Yus najanamia nuna ningki nakumkar: Wína Yusruitme tusar tikishmatrar searmiayi. Tura Yus nekas pengker aa nuka pujau waininayat, Yusnaka seatsuk tura umirtsuk pujuarmiayi. Antsu Yus tuke pujau asamtai, aintstisha tuke maaketai titinuitji. Nekasaintai.

²⁶ Tura aints ainau Yusen umirtan inaisaru asaramtai, ni wakeramurin natsanpiaku aa nuna najanawarti tusa, Yus ajapa ukukmiayi. Nuwa ainausha mai nuwatak pasé aa nuna takau armiayi. ²⁷ Aishmang ainausha nunisarang chikich aintsjai mai aishmangtak natsanpiaku aa nuna turunawartas wakeruninawai. Tura nu tunauka timiá pasé asamtai, ni namangkencha pasemamtikrar wait wajaktinnasha juwinawai.✠

²⁸ Tura Yusen nintimtan nakitinau asaramtai, tunau nintimrarti tusa, tura pasé aa nuna turuwarti tusa, Yus nu aints ainaun ajapa ukukmiayi. ²⁹ Tura asamtai mash tunau aa nuna waring achat mash pachitsuk turinawai. Pengker aa nuna nakitin ainawai, tura pasé nintintin ainawai, tura kichnau aa nuna wakerin ainawai, tura chikich ainauncha pasé awajsartas wakerin ainawai, tura suwirpiaku jiinisar pujuinawai, tura mangkartin ainawai, tura kajernain ainawai, tura anangkartin ainawai, tura pasé nintintin ainawai, tura tsanukratin ainawai. ³⁰ Tura aujmakratin ainawai, tura Yusen kajerin ainawai. Tura jiyaanitnasha jiyaanin ainawai, tura chikich ainaun pachisar: Nuka mianchawaitai, tura: Wikia miajuitjai, tinu ainawai, tura tunau turin ainawai, tura aparincha, tura nukurincha umirtsuk pujuinawai. ³¹ Tura nintinchau ainawai, tura wi nuna turatatjai, tinayat nunaka umichu ainawai, tura anengkratchau ainawai, tura chikich ainaun tsangkurtan nakitinak wait anentsuk puju ainawai. ³² Yus nu tunaun turinauka jakartin ainawai, tamaun nekainayat, nu tunaunaka tuke takainawai. Antsu nunaka nintimtsuk, chikich tunau takau ainaun jiisar: Au tura auka nekas pengkeraitai tinawai.

2

Tunau turamunka Yuska mash nekawai

¹ Atumsha nintimratarum. Atumka chikich ainau pachisrum: Nuka timiá tunaawaitai tayatrumek, atumsha nunisrumek tunau turau asaram, nuka tichamnawaitrumek. Antsu chikich aints timiá tunaawaitai tayatrumek, atumsha nu tunauk turau asaram: Wisha tunaawaitjai timinuitrumek.✠ ² Tura asakrumin Yus nekas chichaman tuke umiku asa, tunaun takau ainaun wait wajaktiniun susatnuitai tusar iisha nekaji. ³ ¿Atumsha itiur

✠ 1:20 (Hech. 17.24-27) ✠ 1:21 (Efes. 4.17-18) ✠ 1:23 (Jer. 2.11) ✠ 1:27 (Lev. 20.13) ✠ 2:1 (Mat. 7.1; Luc. 6.37)

nintimrume? Tunau turin ainau pachisrum: Nuka tunaawaitai tayatrumek, atumsha nunisrumek nu tunau turau asaram ¿wikia wait wajakchatatjai tu nintimsarmek pujaram? Atsa, tuuka pengké nintimrashtinuitrume. ⁴ Atumka tunau arumning, Yus atumin pengker awajtamsamiarume. Tura wait wajaktinnasha suramsachmiarume. Tura Yus atumin pengker awajtamsau wainiatrumek nuka nintimtsuk pujarme. Yus wait wajaktiniun suramtsuk: Nintimaaurum yapajiarum, tunaarum inasaram wina umirtuktaram tusa, iin wait anentramak nakarmak pujawai. Atumka nuka nintimtsuk pujarme. ⁵ Tura atumi nintimauri yapaijtsuk, tura atumi tunaarisha inaitsuk nintimchau asaram nukap wait wajaktinuitrume. Tunau ainau wait wajakartin kinta jeamtai, Yus nekas tunaarinchau aa nuka tunaarintin ainau wait wajakartintrin susatas wantinkatnuitai. ⁶ Tura kichik kichik aintsun ni turamurijai metek tunau takau ainaun wait wajakartinium susartinuitai. Antsu pengker aa nuna takau ainaunka pengker awajartinuitai. ⁷ Aints Yusjai tuke nayaimpinam pujusartas wakerinaunka, tura Yusen pengker awajartas pengker aa nuna tuke turinaunka Yus pujut nangkankashtinin susartinuitai. ⁸ Antsu Yusen nakitin ainau tuke tunau turin asar, tura nekas chichamnaka nakitin asaramtai, Yus nu aints ainaun kajerak, wait wajaktiniun nukap susartinuitai. ⁹ Tura nu kinta jeamtai, judío ainausha tura judíochou ainausha nunisarang tunau turinau asar, mash nukap wait wajakartin ainawai. ¹⁰ Antsu nekas pengker aa nuna takau ainau nayaimpinam jearamtai, Yus judío ainaun eemak chicharak: Nekas pengker aa nu takau asaram, tuke wijai pujustaram tusa, angka pengker pujustinnasha susartinuitai. Tura judíochou ainauncha nunisang turatnuitai.

¹¹ Yus judío ainauncha, tura judíochou ainauncha mai metek jiawai. ¹² Moisésa chichamen nekachu ainau tunau takau asar, mengkakarta inawai. Tura Moisésa chichamen nekautisha nunisrik tunau takau asar mengkakarta iniaji. ¹³ Tura asamtai chikich ainau Yus umirkatin chichaman antukariat, nuna umirtsuk pujuinaunka Yuska: Nuka pengke aintsuitai tatsui. Antsu Yus umirkatin chichaman antukar umirinaunka Yuska: Nuka pengke aintsuitai tawai. ¹⁴ Judíochou ainau Yus umirkatin chichaman antutsuk pujuinayat, ningki nintimsar nu chichaman umirinamtaikia, chikich aints ainau nuna wainkar: Ju aintska pengker aa nuna takaawai tusar nekainawai. ¹⁵ Tura judíochou ainau pasé aa nuna turinauka ni nintijai nintimsar: Pasé aa nuna turajai tusar napchau nintiminawai. Tura pengker aa nuna turinauka ni nintijai nintimsar: Pengker aa nuna turajai tusar pengker nintiminawai. Tura Yus umirkatin chichaman nekainachiat, ni nintin aarmawa nunisarang ainawai. ¹⁶ Aintsu tunaari jistin kinta jeamtai, Yus ni Uchirin Jesucriston chicharak: Aintsu nintimaurisha mash nekarin asam, tunau ainau wait wajakartin susarta tusa akupkatnuitai. Tura asamtai wikia Yusnum uwemratin chichaman etserjai.

Judío ainau Yus umirkatin chichaman umirkachmauri

¹⁷ Yamaikia judío ainautiram: Itiur pujaji tusaram nintimrataram. Atumka: Iikia judío aintsuitji tusaram, tura Yus umirkatin chichaman iin akupturmaku asa, iinka pengker nintimturmajai, jampesrumek tatsurmeash. ¹⁸ Tura Yuse wakeramurisha nekarme. Tura Yus umirkatin chicham nuimiaru asaram, nekas pengker aa nu nuwaapita tusaram nekarme. ¹⁹ Tura Yuse chichame nekachu ainau wainmichua nunisarang teenam pujuinawa nuna nuininuitjai tatsurmeash. ²⁰ Tura Yus ni umirkatin chichaman wina nekamtikruau asa, nekas aa nuna nintimtikruri tatsurmeash. Tura asan nekachu ainauncha tura uchua nunisarang nintiminauncha nuiniartinuitjai tatsurmeash. ²¹ Tura chikich aints Yuse chichame nuiniyatrumsha ¿waruka nu chichamsha umirtsurme? Tura chikich ainau ujaakrum: Kasamkairap tayatrumsha ¿waruka kasamu wearme? ²² Tura chikich aintsu nuwaringkia takaschatnuitai tayatrumsha ¿waruka aishrinusha takarme? Tura chikich aintsu yusrin nakitayatrumsha, ¿waruka nu aintsu yusri jeeniangka warinchu kasamrume? ²³ Tura Yus umirkatin chichamka pengkeraitai tayatrumek,

☆ 2:6 (Sal. 62.11-12; Eze. 33.20; Mat. 16.27)

nu chicham umirtsuk pujau asaram, Yuska pasé awajrume. ²⁴ Tura asakrumin Yuse chichame tu aarmawaitai: “Yusen umirchau ainau atum tunau turamun wainkar, Yuse naarin pachisar pasé chichainawai.”✠

²⁵ Atumka Moisés umirkatin chicham nekasrum umirkurmeka, atumi nuwapchiri charukrumka, nekasrum Yus pengker awajsatnuitrume. Antsu Moisésa chichame umirtsuk pujakrumka, judíochua nunisrumek pujarme. ²⁶ Antsu judíochu ainau ni nuwapchirin charukchamu ainayat, Yus umirkatin chichaman umirkar pujuinamtaikia, Yus nu aints ainaun pachis: Juka judíochu ainayat, nekasar wina aintsur ainawai, tu nintimui. ²⁷ Aints judíochu ainayat, Yus umirkatin chichaman umirinauka, ni nuwapchirin charukchamu ainayat, atumin nangkamasarang timiá pengker aints ainawai. Tura asar judío ainautirmin: Nekasrum timiá tunaawaitrume turamiartinuitai. ²⁸⁻²⁹ Tura asamtai judío ainauti ii nuwapchiri charukmau ayatrik, ii ninti yapajiachu asar, Yuse chichame aarmau nekayatrik, nu umirtsuk pujakrikia Yuse aintsrinchuitji. Antsu chikich aints Yuse Wakani ni nintimaurin yapaijtuamu asa, nuka Judíochutiat nekas Yuse aintsrintai. Tura waininayat chikich aints ainau: Nu aintska pengkeraitai tu weenatsui. Antsu Yusek nekas pengke aintsuitai titinuitai.✠

3

¹⁻² Tura asamtai judío ainau ningki nintimsar: ¿Ilikia chikich ainau nangkakawaitji. Tura ii nuwapchirisha tuke charinuitji tu nintiminatsush? Tu nintiminaunka aiktasan wakerajai. Yus nu nangkamtaik judío ainaun chikich ainaun nangkamasang ni aarmaurin akupkau asamtai, niisha chikich nungkanmaya ainaun nangkakau ainawai.✠ ³ Antsu aints ainau Yuse chichamen nekasampita tutsuk, tura umirtsuk pujuinau wainiat ¿Yus ni timiaurin umitsuk inaisatniukai? ⁴ Atsa, Yuska nunaka turashtinuitai. Aints ainau mash wait chichaman etserin ainaing, Yuska pengké waitrichu asa, ni timiaurinka tuke umiawai. Ni chichamesha tu aarmawaitai:

“Ame tunaawaitme turutme nunaka nekasaintai tajame. Tura ame tunau asam wait wajaktatme turutme nunasha pengkeraitai tajame.”✠

⁵ Tura aints nuna antuk ningki nintimias: Yusek nekas pengkeraitai, antsu aintstikia mash pasé ainiaji tinu asamtai ¿iikia warintajik? ¿Yus tunau ainaun wait wajaktiniun suwau asamtai paseetai titinkai? Wikia junia aints ainau nangkamiar nintimina nunisnak chichajai. ⁶ Atsa, Yuska nekas paseechawaitai. Yus paseetkungka, ¿aints mash nungkanam pujuinaun tunaarinja jiis: Atumka tunaawaitrume titinkai?

⁷ Tura chikich aints ningki nintimias: Wikia wait chichaman etsermataikia, chikich aints ainau wina wait chichaamurun antukar, Yus pengkeraitai tinamtaikia, ¿warukang winasha tunaawaitai turutiarting? ⁸ Tuuka nintimrachmin ainayat: “Pengker aa nuna wainkartas wakerinakka ¿waruka tunau turutskesha?” nangkamiar anangkinak tinawai. Aints ainau wina pachisar tsanurinak: “Tunau aa nu turakrumka pengker aa nu wainkatatrume,” tu nuikiartawai, atumin anangraminak tinawai. Tu tinu asar, nekasar wiasmamkartin ainawai.

Aints ainautikia mash tunaawaitji

⁹ Tura asamtai ¿warintajik? ¿Judío ainauti chikich ainau nangkamasrik pengker ajik? Atsa, wi aarmaja nuna ataksha tajarme: Judío ainautisha mash tunaarintin ainiaji. Tura judíochu ainausha mash iya nunisarang tunaarintin ainawai.

¹⁰ Nuna pachis Yuse chichame tu aarmawaitai:

“Aints pengkeran turinka kichkisha atsawai.

¹¹ Aints Yusen nintimias pujauka kichkisha atsawai.

Tura Yusen eauka kichkisha atsawai.

¹² Aints mash mengkakatnunam weenawai, tura pasé nintimin ainawai. Tura aints nekas pengker aa nuna turinauka kichkisha atsawai.✠

✠ 2:24 (Isa. 52.5) ✠ 2:28-29 (Gál. 6.14-15; Fil. 3.3; Col. 2.11-13) ✠ 3:1-2 (Sal. 147.19-20) ✠ 3:4 (Sal. 51.4)

✠ 3:12 (Sal. 14.1-3)

¹³ Ni jangken metchau asar, jakau iwiarsamu urakmawa nunisarang paseen chichau ainawai. Ni chichamejai tuke anangkartin ainawai. Tura napi tseasria nunisarang najamniun chichau ainawai. ✠ ¹⁴ Tuke inaitsuk chikich ainaun jiyainak pasé chicharin ainawai. ✠
¹⁵ Aints ainaun maatai tusar papeen ainawai.
¹⁶ Tura tunia wekainawa nunisha aints ainaun wait wajaktiniun suwinak, tuke pasé awajin ainawai.
¹⁷ Antsu angkan pengker nintimtunisar kajernaitsuk pujutnaka nekainatsui.
¹⁸ Tura kichkisha Yusnaka shaminatsui.” Tu aarmawaitai. ✠
¹⁹ Moisésa chichamen Yus mash umiktaram tusa, yaanchuik akupkau asamtai, aints mash nu chichaman umikcharu asar: Wikia tunaachawaitjai tichamnawaitai. Antsu: Wikia tunaachawaitjai tinaunka mash itatmamtikiatas nu umiktin chichaman akupkau asamtai, aints mash: Wikia tunaawaitjai tiartinuitai. Iisha nuka nekaji. ²⁰ Tura asamtai Yus aints ainautin ii tunaarin nekamtikramatas Moisésa chichamen akupturmaku asamtai, nu chicham umirkachu asar, mash tunaarintin ainiaji. Tura asamtai aints ningki nintimias: Wikia Moisésa chichamen miatrusnak umirkau asan tunaachawaitjai, aints kichkisha tichamnawaitai. ✠

Yusen nekasampita tinauk uwemrartinuitai

²¹ Tura asamtai ¿itiur aints ainauti tunaarin sakarminuita? tusa, Yus yamaikia aints ainautin nekamtikramamiaji. Moisésa chichame umirkakrinka, Yuska ii tunaarinka sakarchamnawaitai. Iikia Moisésa aarmauri aujsar, tura Yuse chichame etserin aararmia nusha mash aujsar paan nekaatnuitji. ²² Yus ni Uchirin Jesucriston ii tunaarin sakarat tusa, akupturmaku asamtai, aints ainautikia mash Jesucristo nekasampita takurningkia, Yus yamaikia ii tunaarin sakturmaru asa: Nekasrum tunaachawa nunisrumek pujarme turamji. ✠

²³ Aints ainautikia tuke mash tunaarintin ainiaji. Tura asar Yus pujamunmaka jeachminuitji. ²⁴ Antsu Cristo Jesús iin wait anentramak pengker awajtamsatas ii tunaarin akiimiattramkatas jarutrakau asa: Yamaikia tunaachawa nunisrumek ainiarne turamji. Tura asamtai ii tunaarisha iikia akiimiatsuk pujayatrik, tunaachawa nunisrik pujaji. ²⁵⁻²⁶ Yaanchuikia Jesucristo taatsaing, Yus wári kajeche asa, aintsti tunaarintin arin wainiat, ii tunaarinka pachischamiayi. Tura ii tunaarin sakturmarmas ni Uchirin maawarat tusa akupturmaku asa, numi winangmanum ajintra numparmiayi. Tura asamtai Jesucristo nekasampita tinautinka ii tunaarin sakturmarmiaji. Tura asamtai aints ainautikia nu mash nekainau asar: Yuska nekas pengkeraitai, titinuitji. Yus nekas pengker asa, ni Uchiri Jesús an ii tunaarin sakarat tusa akupturmaku asamtai, Jesús nekasampita tusar niinu asar, yamaikia tunaachawa nunisrik pujustinuitji. Tura asamtai Yus nekas pengker asa, aints ainautin nunasha nekamtikramatas ni Uchirinka akupturmarmiaji.

²⁷⁻²⁸ Tura asamtai nu nekau asar, Yus iin pachitmas: Pengkeraitme turamji taji. Antsu pengker aa nu takau akurningkia, nunaka turamtsuji. Antsu iikia Jesús nekasampita tinu asakrin, Jesús ii tunaarin sakturmaru asamtai: Ameka tunaachawa nunisketme turamji. Tura asamtai iik nintimtumasar: Wikia pengker aa nuna takau asamtai, Yus wínaka tunaachawaitme turutui tichamnawaitji. Iikia pengker aa nu takaakrishia, ii tunaaringkia sakarchamnawaitji. Antsu Jesús ii tunaarin sakturmaru asamtai, iikia Jesús nekasampita tinu asakrin, Yuska iin pachitmas: Nuka tunaachawa nunisketai turamji.

²⁹ Anturtuktaram. ¿Yuska judío ainautinak: Wína aintsur ataram tusa, uwentikram-ratasang wakera? ¿Judío chu ainaunka uwentiktanka nakitawak? Atsa, judío chu ainauncha uwentikratas wakerawai. ³⁰ Yuska nekas kichkitai. Tura asa aints ainautinka mash metek uwentikramratnuitji. Judío ainauti Jesús nekasampita takurningkia, ii tunaarin sakturmarmatji. Judío chu ainautirmincha Jesús nekasampita tusaram pujakrumningkia,

atumi tunaarinja nunisang sakturmartatrome. ³¹ Tura Jesús nekasampita takurkia, ¿Yus umirkatin chicham ajapatnukitaj? Atsa, ajapashtinuitai. Antsu Yus umirkatin chicham nekas pengkeraitai taji.

4

Abrahaman pachis nuikiartamu

¹ Yamaikia ii yaanchuik juuntri Abraham nintimrarmi. ¿Yus Abrahaman pachis waruka nuka pengkeraitai timiayi? ²⁻³ Yuse chichame Abrahaman pachis tu aarmawaitai: “Abraham Yusen nekasampita timiayi. Tura asamtai Yus Abrahaman pachis: Wina nekasampita turutu asamtai, ni tunaarin sakturan tunaachawa nunisang pujaun jiiajai,” timiayi. Tu aarmau asamtai, Abraham pengker aa nuna takau ayat, tuuka uwemrachmin ayayi. Antsu tu uwemramin akungka, Abraham Yusen: Pengke aintsuitjai timinuyayi. Antsu aints kichkisha Yusen: Wikia pengke aintsuitjai tichamnawaitai.✠

⁴ Junia aints ainau takaamuri nintimrarmi. Aints kuikian achiktas takakmasamtaikia, inau ni takakmamunam akiktinuitai. Tura takatan inau ni takakmamunam akiu asa: Ju kuikianka nangkamin suajme tichatnuitai. ⁵ Antsu chikichan takakmatsuk pujaun wainak kuikian suak: Ju kuikianka nangkamniak suajme titinuitai. Yus pachisar nunisrik nintimratnuitji. Aints pengker aa nuna takaachiat: Yus wina tunaarun sakturati, tu nintimias pujamtaikia, Yus nu aintsu tunaarin mash sakturu asa, tunaachawa nunisang pujaun jiiawai. ⁶⁻⁷ Tura asamtai aints: Wikia pengker aa nuna takaachiatun, Yus wina tunaarun sakturau asa: Ameka tunaachawaitme turutin asamtai, nekas waraajai titinuitai. Tura asamtai apu Davidcha nunisang nuna pachis tu aarmiayi: “Yus aintsu tunaarin mash sakar tsangkuramu asa, nu aintska waraawai.

⁸ Tura nu aintsu tunaarin mash sakturu asa, Yuska ni tunaarinka nintimtatsui. Tura asamtai nu aintska nekas waraawai.” David tu aarmiayi.✠

⁹ ¿Judío ainauti iikik warastinui? Atsa. ¿Tura judíocho ainausha nunisar warasartinkai? Ja ai. Yus Abrahaman pachis: Wina nekasampita turutu asamtai, tunaachawa nunisang pujaun jiiajai timiayi. ¹⁰ Tura Yus Abrahaman pachis: Ni tunaarin sakaru asan, tunaarinchawa nunisang pujaun jiiajai, tímia nunaka ¿warutik tímia? ¿Ni nuwapchirin charukmau asamtaik nunaka tímia? Atsa, antsu ni nuwapchirin charukchamu wainiat nunaka timiayi. ¹¹ Tura ni nuwapchirin charutsuk pujau wainiat, Yus taa nuka nekasaintai timiau asa, Yus Abrahaman pachis: Tunaachawa nunismek pujamin jiiajme, timiayi. Tura: Nuka wina aintsruitai tusan, aints ainau nuna mash nekaawarti tusa Yus Abrahaman: Nuwapchiram charukta timiayi. Tura asamtai chikich aints ainau ni nuwapchirin charukchariat, Yusen nekasampita tinauka Abrahama wearia nunisarang ainawai. Tura asamtai Abrahama nunisarang Yusen nekasampita tinauka tunaachawa nunisarang pujuinaun jiiajai, Yuska tawai. ¹² Abraham nekas ni nuwapchiri charutkamu ainau aparintai. Tura Abraham ni nuwapchirin charutsuk, Yusen nekasampita tinu asamtai, chikich aints ainau Abrahama nunisarang Yusen nekasampita tinauka Abraham yajutmarmawa nunisarang ainawai.✠

Yus Abrahaman: Pengker awajsatjame timiauri

¹³ Yus Abrahaman yaanchuik chicharak: Amincha nukap yujratatjame. Tura ami wearmincha nukap yujranka, mash nungkanam wina umirtin ainau ami uchirmea nunisarang artinuitai timiayi. Antsu Moisésan Yus chichaman akuptukmia nuna umirkaru ainaunka nunaka tichamiayi. Antsu wina nekasampita turutinaunka: Wina aintsur asaram, tunaachawa nunisrumek pujarmin jiiajrume tusa, Yus Abrahaman tura ni wearincha nunaka timiayi.✠

¹⁴⁻¹⁵ Aints Yusen nekasampita tutsuk, Moisésa chichamen umirinaunka Yuska: Abrahama weariya nunisrumka wina aintsur atatrume tichamiayi. Nuna tichau waininayat,

✠ 4:2-3 (Gén. 15.6; Gál. 3.6) ✠ 4:8 (Sal. 32.1-2) ✠ 4:12 (Gén. 17.4-6, 10) ✠ 4:13 (Gén. 17.4-6; 22.17-18; Gál. 3.29)

aints ainau nangkamiar chichainak: Judíochu ainau Moisésa chichamen nekainachu asar, Yusen nekasampita tichartinuitai. Tura asar Abrahamama weariya nunisarka achartinuitai, nangkamiar tinawai. Antsu Yus chichaak: Wi taja nunaka nekasampita tinauka mash Abrahamama weari artinuitai, timiayi. Yus ni chichamen tuke umiktin asa, nunaka nangkamikia tichamiayi. Antsu aints ainau Moisésa chichamen mash umirkar-tatkamawar yumatinawai. Antsu Moisésa chichame atsamtaikia, ¿ii tunaaringkia itiur nekaatjik? Tura Yus ni umirkatin chichaman aints ainautin akupturmaku asamtai, nu chichaman umirtsuk pujuinauka wait wajakartin ainawai.✠

¹⁶ Antsu Yus nekasampita tinu asakrin, ni tímia nunisang Yus iin wait anentra-mak pengker awajtamsatas wakerawai. Yus Abrahamama weari ainaun mash pengker awajsatas wakerau asa, Moisésa chichame nekau ainautinka, Yus nekasampita tinu asakrin, pengker awajtamsatas wakerawai. Tura Moisésa chichamen nekachu ainauncha nunisang Yusen nekasampita tinu asaramtai, Yus pengker awajsatas wakerawai. Tura asamtai Abrahamka Yus nekasampita tinu ainauti aparintai.✠ ¹⁷ Tura asamtai Yuse chichame Abrahaman pachis tu aarmawaitai. Yus Abrahaman chicharak: “Ameka untsuri nungkanmaya ainau apariya nunismek atinuitme,” timiayi. Tu timiau asa, Abraham Yus nekasampi jakau ainauncha inankitnuita, turasha najanachmau ainauncha nekasampi najanatnuita, timiayi.✠

¹⁸ Yus Abrahaman: “Ami wearam untsuri nungkanam pujusartinuitai,” tinu asamtai, Abraham juuntach ayat, tura uchin yajutmarchamin ayat: Yuska nekas tujinchau asa, ni tímia nunaka nekasampi umiktatua tusan, wikia untsuri nungkanmaya ainau apariya nunisnak atinuitjai, timiayi.✠ ¹⁹ Abraham nekas juuntach cien (100) musach jeatak pujus, uchin yajutmarchamin ayat, tura ni nuwari Sarasha nunisang juuntach asa, uchin jurerchamin juuntach pujau wainiat, Abraham: Yus turutmia nunaka mash umiktatuapi timiayi.✠ ²⁰ Tura Yus nekasash taj tichamiayi. Antsu niin kakamtikramu asa, tuke inaitsuk: Yuska nekas tujinchawapita, timiayi. ²¹ Tura asa ni tímia nunaka nekasampi umiktatua, tu nintimramiayi. ²² Tura asamtai Abrahaman: Nekas tunaachawa nunismek pujamin jiiajme, Yus timiayi.

²³⁻²⁴ Tura Abrahaman pachis aarmauka iincha pachitmas aarmawaitai. Ii Apuri Jesús jakau wainiat, Yus jakamunmaya inankimiayi. Tura asamtai iisha nunisrik: Jesús nekasampita takurningkia, Yus iincha pachitmas: Ni tunaarin sakaru asan, nekas tunaachawa nunisang pujaun jiiajai turamji. ²⁵ Yuska ii tunaarin sakturmartas, wína Uchirun maawarti tusa tsangkatramkamiayi. Tura iincha nekas tunaachawa nunisrik pujarin jiirmastas wakerau asa, jakamunmaya Jesúsán inankimiayi.

5

Jesús ii tunaarin sakturmaru asamtai angkantaitji

¹ Ii Apuri Jesucristo ii tunaarin sakturmaru asamtai, ni nekasampita tinu asar, Yuska iinka wait wajaktinnaka suramsashtatji tusar, shamtsuk angka pengker nintimsar pujaji. ² Tura Cristo ii tunaarin sakturmaru asamtai, ni nekasampita tinu asar, tura Yus iin pengker awajtamsatnusha nekau asar, Yuska miatrusrik umirkatnuitji. Tura Yuse pujutirin jearkia, nijai tuke pengker pujustinuapitji tusar waraaji. ³ Tura Cristonu asakrin, ii wait wajakrincha jaimiasar pujustinun Yus iin nuitamji. Nu nekau asar, wait wajayatrik iisha waraaji. ⁴ Tura Yus iin tu nuitamrau asamtai, miatrusrik umirkurningkia, Yus iin pengker nintimturmajji. Tura asamtai pengker nintimsar Yusnum pujustatjiapi tu nintimji. ⁵ Antsu tu pujau asar natsaarchatnuitji. Antsu Yus ni Wakanin ii nintin engketramau asamtai, ni anengkratairin suramsamiaji. Tura asamtai Yus pujamunam pujustatjiapi tusar waraaji.

⁶ Tura iikikia pengké uwemrachmin asakrin, ni kintari jeamtai, Cristo tunaarintin ainautin uwemtikramratas jarutramkamiayi. ⁷ Junia aints ainautikia chikich aints

✠ 4:14-15 (Gál. 3.18) ✠ 4:16 (Gál. 3.7) ✠ 4:17 (Gén. 17.5) ✠ 4:18 (Gén. 15.5) ✠ 4:19 (Gén. 17.17)

uwemtikratasar jataka nakitaji. ¿Tura aints kichiksha chikich aints wait anengkratnun uwemtikratas jatan wakerawak? ⁸ Atsa, antsu iikia tunau arining, Cristo iin uwemtikram-ratas jarutramkamiaji. Tura jarutramkau asamtai, Yus iincha timiá anenmaji tusar nekaji. ⁹ Cristo waitnas jarutramak, ninu ainautinka angka awajtamsau asamtai, Yus tunau ainaun wait wajaktinasha susatas ni Uchirin akupamtaikia, Cristonu ainautinka wait wajaktinnaka suramtsuk uwemtikramratnuitji. ¹⁰ Iikia Yuse nemase arining, ni Uchirin ii tunaarin sakturmartas akupturmaku asamtai: Yusjai amikmataram, tusa jarutramkamiaji. Tura jaka nantaki, yamaisha tuke iwiaaku pujau asa, iincha nekas tuke uwemtikramratnuitji. ¹¹ Tura ii Apuri Jesucristo iin uwemtikramrau asa iinka: Yusjai amikmataram turamin asamtai, yamaikia Yuse aintsri asar nukap waraaji.

Adánkan pachis nuikiartamu

¹² Yamaikia Adán nintimrarmi.

Adán nuwá eemak tunau wajasu asa jatan jurumakmiayi. Tura kichik aints tunau wajasu asamtai, mash nungkanmaya ainau tunau wajasarmiayi. Tura tunau wajasaru asar, mash jatan jurumakiarmiayi. ✠

¹³ Yus Moisésan chichaman akuptatsaing, aints ainau yaanchuik tunau turuwarmiayi. Antsu Moisésan chichaman akuptachmataikia, tunausha nekaachmin ayayi.

¹⁴⁻¹⁵ Tura wainiat Adánkan Yus chichaman akatramaitiat, umikchau asa tunau wajasarmiayi. Tura tunau wajasu asamtai, Yus Moisésan chichaman akuptatsaing, aints ainau tuke mash jakarmiayi. Aints ainau Adánjai metek tunaanaka turuwarchayat, mash tunau asar tura jata nepetkamu asar, Adán jakamia nunisarang jakarmiayi.

Antsu Jesucristo aints wajas, tunau ainaun untsurin uwemtikratas jakau asa, aints ainautin pujut nangkankashtinun sukartin ayayi. Yus ni Uchirin kichik akupturmaku asamtai, aints ainautin untsurin pengker awajtamsatas ni wait anengkratairin nekantikramamiaji. Adánka turamuri Cristo turamurijaingkia nekas metekchawaitai. ✠

¹⁶⁻¹⁷ Kichik aints tunau wajasu asamtai, aints ainauti mash tunau asar, wait wajaktin jurumakir jakartin ainiaji. Tura nu nangkamtaik kichik aints chichaman Yus akupkamia nuna umikchamiayi. Tura asamtai aints ainautin mash jata nepetamkau asamtai jakartin ainiaji. Tura wainiat Jesucristo ni aintsri ainautin wait anentramak ii tunaarin sakturmaru asa, yamaikia tunaachawa nunisrik pujarin jirmaji. Tura iin pengker awajtamsatas pujut nangkankashtinun suramak: Wijai tuke pujustinuitrume turamji.

¹⁸ Tura asamtai Adán tunau turamujai aints mash tunau wajasaru wait wajakarmiayi. Antsu Cristo pengker turamujai aints ainauti ni nekasampita tinu asakrin: Mash tunaachawa nunisrumek pujarmin jiajrumetusa, pujut nangkankashtinun suramsami-aji. ¹⁹ Tura kichik aints Adán naartin Yusen umirkachu asamtai, aints untsuri tunau wajasarmiayi. Antsu Cristo aints wajas, Yusen miatrus umirkau asa, aints untsuri ni nekasampita tinu ainaunka tunaachawa nunisrumek pujarmin jiajrumetitinuitai. ✠

²⁰ Aints ainau tuke tunau turin asar, ni tunaarin nekaawarat tusa, Yus Moisésan umirkatin chichaman aamtikramiayi. Antsu tunau timiá yujaru asamtai, Yus aints ainautin pengker awajtamsatas ni Uchirin akupturmaku asamtai, Yuska iincha timiá anenmaji tusar nekaatnuitji. ²¹ Tura asamtai aints mash tunaarintin asar tuke mash jakarmiayi. Tura wainiat ii Apuri Jesucristo wait anentramak ii tunaarin sakturmaru asa: Yamaikia tunaachawa nunisrumek pujarmin jiajrumetusa, Cristonu ainautinka pengker awajtamsatas pujut nangkankashtinun suramji.

6

Cristo kakarmarijai tunau nepetkatnuitji

¹ Tura asamtai ¿tunau pachisar iikia warintajik? Yus winasha pengker awajtusat tusarkia, ¿tuke tunau turatnukai? ² Atsa, iikia Cristonu asar, nijai tsaniasar jakawa nunisrikiti. ¿Antsu aints jakauka ataksha tunau turatnukai? Atsa. Iikia tunau aa nuka

✠ 5:12 (Gén. 3.6-19) ✠ 5:14-15 (Gén. 2.16-17;3.11-12) ✠ 5:19 (1.Cor. 15.21-22)

mash inaisaru asar ¿itiur tuke tunau aa nusha nintimsarsha pujustajik? ³ Cristo iin jarutramkau asantai, Cristo Jesús nemarkatar entsanam maain asar, nijai tsaniasar jakawa nunisrikitji. ¿Atumka nuka nekatsrumek? ⁴ Tura Cristo iin uwentikramratas jakantai iwiarsamu wainiat, ni Apaachiri ni kakarmarijai jakamunmaya inankimu asa, tuke iwiaaku pujawai. Tura asantai Cristonu ainautikia entsanam maakrikia, Cristo jakamuri nintimsar, jakau iwiarsamua nunisrik entsanam mengkaaji, tura yamarma nunisrik: Tuke Cristo nintimsar pujusmi tusar entsanmaya tsapuaji. ⁵ Cristo jarutramak jakamunmaya nantakin asantai, iisha Cristonu asar, Cristojai iwiarsamua nunisrik tura jakamunmaya nantaknua nunisrik tunauka nintimtsuk pujustinuitji.✠

⁶⁻⁷ Aints jakauka tunaunaka nintimtsui. Tura ni wakeramurincha najantsui. Iisha nusha nekaji. Tura Criston numi winangmanum maawarmau asa, Cristonu ainautikia yaanchuik pasé nintimtainka mengkatramkamiaji. Tura Cristo jarutramak, ii tunaarin japrutmau asantai ¿itiur tunau inatiria nunisriksha pujustajik?✠ ⁸ Yamaikia Cristo jaka nantaknua nunisrik nintimu asar, nijai metek tuke pujustinuapitji, tu nintimji. ⁹ Cristo jakamunmaya nantakin asa, ataksha pengké jakashtinuitai tusar nekaji. ¹⁰ Tura asa kichik kinta jarutramak, aints ainauti tunaarin mash sakturmaru asa, ataksha pengké jakashtinuitai. Antsu yamaikia tuke iwiaaku pujau asa, Yusjai tsanias pujawai. ¹¹ Tura asantai atumsha Cristo Jesúsna asaram: Cristo wina tunaarun sakturatas jarutruku asantai, wikia nijai tsaniasan jakamiajai, tu nintimsaram pujustaram. Tura asaram yamaikia tunauka nintimtsuk antsu Yusen nintimsan ni wakeramurin najanatjai, tu nintimsaram pujustaram.✠

¹² Tura asaram tunau nepetukai tusaram tsangkamamkairap. Turaram wina wakeramurun najanataj tu nintimkurmin, tunau atumin nepetamkatas wakeramtaisha, tunau winaka nepetukai tusaram kakartaram. ¹³ Atumka Yusnau asaram, tunau wajasai tusaram, wina wakeramurun turatjai, tuuka yamaikia nintimsairap. Antsu jaka nantaknua nunisrumek Yusek nintimsaram: Wikia Yusnau asan, ni wakeramurinak turatasan wakerajai, tu nintimsaram pujustaram.✠ ¹⁴ Tura asaram nangkamrum nintimsaram: Moisésa chichamen umirkau asan, tunau nepetkawaitjai tichamnawaitrume. Antsu Yus atumin wait anentramrau asantai, yamaikia atumka tunauka nepetkatnuitrume.

Tunauka aintsti apuria nunisketai

¹⁵ ¿Atumsha itiur nintimrume? Yamaikia Moisésa chichame umikchamin ayatrik, Yus iin wait anentramrau asantai ¿pachitsuk tunau turamnaukitaij? Atsa. Nuka pengké turachminuitai. ¹⁶ Antsu aintsu inatiri akurmeka, atumin inatmin nakitsuk umirkatnuitrume. Atumka nusha nekarme. Tura aints tunau tuke takau asantai, tunauka ni apuria nunisketai. Tura asantai aints tunau tuke turin asa, tunau inatirintai. Tura aints tunau wajasu asa jakatnuitai. Antsu atumka Yus umirkuram pujakrumka, Yuse inatiri ainiarne.✠ ¹⁷ Atumka yaanchuikia tunau inatiri ayarme. Antsu Yus atumin yainmaku asantai, yamaikia tunau inaisaram, nekas pengke chicham nuimiaru asaram, atumi nintijai miatrusrumek umirkamiarume. ¹⁸ Tura yamaikia tunaanumiangka uwemrau asaram, angka pujusrum Yus wakera nuke umirkuram pujarme. ¹⁹ Atumka junia aints ainau nintimina nunisrumek tuke nintimu asakrumin, junia aints nintimina nunisnak atumin aatjarme. Yaanchuik atumi wakeramuri najanatasrum tuke inaitsuk tunau turin asaram tunau inatiri ayarme. Antsu yamaikia atumi tunaari mash inaisaram, Yus wakera nuke turatasrum Yuse inatiri ataram.

²⁰ Yaanchuik tunau inatiri asaram, tunau umirkuram Yuse wakeramuringkia pachischamiarume. ²¹ Tura yaanchuik tunau turuti nintimrarmeka yamaikia natsaamarme. Aints ainau tuke tunau nintimsar pujuinauka jaaar tuke mengkaakartin ainawai. ¿Nuka pengkerkai? ²² Antsu yamaikia tunaanumiangka uwemrau asaram, tunau inatiringkia

✠ 6:5 (Juan 11.25; Col. 2.12;3.1) ✠ 6:6-7 (Juan 8.34; Gál. 2.20; 2.Ped. 2.19) ✠ 6:11 (Gál. 2.19-20; Col. 2.20)

✠ 6:13 (Fil. 3.10) ✠ 6:16 (Juan 8.34; Rom. 6.6; 2.Ped. 2.19)

atsurme. Antsu Yuse inatiri asaram, ni wakeramuri miatrusrumek umirkatnuitrume. Tura Yusnum tuke iwiaaku pujustinuitrume. Nuka nekas pengkeraitai. ²³ Tura asamtai nunasha tajarme: Tunau akikringkia jataintai. Antsu ii Apuri Cristo Jesús ni aintsri ainauti tunaarin sakturmaru asamtai, Yus iin wait anentramak pujut nangkankashtinun akikchaujai suramsatnuitji.

7

Nuwatnaikiatnun pachis nuikiartamu

¹ Yatsur ainautiram umaarutirmesha, Yus ni aintsri ainautin umiktin chichaman akupturmaku asamtai, aints iwiaaku pujakka tuke nu chichamnaka umirkatnuitai. Atumka Yus umirkatin chicham nekau asaram nusha nekarme. ² Nintimrataram. Yus umirkatin chichamka aishrintin ainaun pachis tu aarmawaitai: “Aishri iwiaaku pujamtaikia, nuwa aishrin ukukchatnuitai. Antsu aishri jakamtai nuniangka angkan atinuitai.” ³ Tura aishri iwiaaku pujau wainiat, nuwari chikichjai tsanirmamtaikia, nu nuwan pachisar: Nuka Yus umirkatin chichamnaka umirtsui tiartinuitai. Antsu aishri jakamtai, nu nuwaka angkan asa, chikich aintsun ninumkamtaisha, nu nuwan pachisar: Nuka Yus umirkatin chichaman umirtsui tiarchatnuitai.

⁴ Yatsur ainautiram umaarutirmesha, atumka Cristonu asaram: Nuwa aishri jakamtai pachisua nunisrumek Moisésa chichamengka pachischatnuitrume. Cristo jaka nunia jakamunmaya nantakin asamtai, iikia Cristojai tsaningkiar Yus wakera nunisrik angkan Ni umirkatnuitji. ⁵ Yaanchuikia Moisésa chichamengka nekayatrik, nu chichamka umirtsuk tuke ii wakeramuri najanatar wakerin asakrin, Yus: Atumka jakarmesha wijaingkia pujuschatnuitrume turammiaji. ⁶ Yaanchuik Moisésa chichamengka umirkachu asar shamakur: Tuke wait wajaktinuapitji tu nintimnuyaji. Antsu Cristo jarutramkau asamtai, yamaikia Cristojai jakar nantaknuwa nunisrikitji. Tura asar yamaikia arut chicham yaanchuik aarmawa nuka nintimtsuji. Antsu Yus ni Wakanin ii nintin engketramau asamtai, yamarma nunisrik Yuse wakeramuri umirkatar angkan pujaji.

Tunau iin pujurtamji tusar etserkamu

⁷ ¿Tura Moisésa chichamesha pachisar warintajak? ¿Nuka paseekai? Atsa, nuka paseechawaitai. Moisésa aarmauri atsamtaikia, nuwaapita tunauka tusarkia nekaachminuyaji. Tura Moisésa aarmaurin nekachkurkia: “Chikichnau aa nu wakerukairap,” ta nuka nekaachminuyaji. ⁸ Tura tunaarintin asan, Yus umirkatin chichaman nekayatnak, mash aa nuna pachitsuk wakerinuyajai. Antsu Moisésa aarmauri atsamtaikia, wikia tunaawapitja tusanka nekachuyajai. ⁹ Yaanchuik Moisésa aarmauri nintimtsuk pujau asan: Pengkeraitjai tu nintimtumasan pujuyajai. Antsu nukap arusan, Moisésa aarmaurin tenap nintimran: Wikia timiá tunaawapitja tusan, ¹⁰ jakamin nekapnuyajai. Tura nuna nekau asan, Yus Moisésan umirkatin chichaman aints ainau pengker pujusarti tusa akupkau wainiatnak, nu chichamnaka umikchau asan: Wi jakamtaikia Yus wait wajaktiniun surustinuapita, tu nintimsan pujuyajai. ¹¹ Wikia tunaarintin asan, Yus umirkatin chichaman nekayatnak, wi wakerakun tunau turinuyajai. Tura tunau wina anangkruau asamtai, wikia nekasnapi jakatniunam weaja, tu nintimsan pujuyajai.✠

¹² Tura asamtai ¿Moisésa chichamengka paseekai? Atsa, Yuska: Aints ainau pengker pujusarti tusa, umirkatin chichaman akupkau asamtai, nu chichamka nekas pengkeraitai. Tura Yus ni wakeramurin iin nekamtikramatas umirkatin chichaman akupturmaku asamtai, nu chichamka nekas pengkeraitai. ¹³ Tura asamtai ¿Yus ni umirkatin chichaman wina jatan surustasang akupturkamia? Atsa, winia jatan surustinka tunauketai. Yus: Tunau warukuita tusa, wina nekamtikruatas: Wina umirtuktin chicham umirtukchau asam tunaawaitme tusa nu chichaman akupturkamiayi.

¹⁴ Yus umirkatin chichamka aya Yuse Wakani kakarmarijai umikminuitji tusar nekaji. Tura wainiatun wina wakeramurun tuke najanin asan, tunaanum surukmawa nunisnak

✠ 7:11 (Ex. 20.17; Deut. 5.21)

wikia pujajai. ¹⁵ Tura asan pengker aa nunaka turatasan wakerayatnak, nuna turatatkaman tujinuyajai. Antsu pasé aa nuna turutnaka nakitayatnak, nunaka tuke turinuyajai. Nuna turau asan ¿warukanak ainaj? tinuyajai. ¹⁶ Tura wi tunau turamunaka nakitayatun nuna turau asan, wikia Yus umirkatin chichaman pachisan pengkeraitai tajai. ¹⁷ Tura asamtai yamaikia wi wakeraknaka tunaunaka turatsjai. Antsu tunau turutnaka nakitayatun, tunau wina nepetuku asamtai nu tunaunaka turajai. ¹⁸ Tura asamtai wikia pengker aa nuna turatasan wakerayatun, nunaka turatatkaman pengké tujintajai. Tura pengké tujinkau asan, wina namangkruka pengker aa nuna turatatkama pengké tujintawai tusan nekajai. ¹⁹ Tura nekasan pengker aa nuna turatatjai tayatun, nunaka turatsjai. Antsu tunau turashtajai tayatun tunaunaka turajai. ²⁰ Tura wi nakitayatnak tunau turaknaka, wiki wakeraknaka tunaunaka turatsjai. Antsu tunau wina nepetau asamtai tunaunaka turajai.

²¹ Tu pujau asan, pengker aa nunak turatasan wakerayatun, wikia tunaawaitjai tusan nekajai. ²² Tura nintirjai nekasan pengker nintimran: Yus umirkatin chichamka nekas pengkeraitai tajai. ²³ Tura Yus wakeramu aa nunaka mash umirkatatjai, tu nintimsan pujayatun, nuna turatatkaman tujintajai. Tura wina kakarmarjai tunau nepetkatatkaman tujinkan, tunau wina nepetuku asamtai, wikia tunau achikmawaitjai tusan nekajai.

²⁴ Tura tunau nepetkatatkaman pengké tujintau asan, napchau nintimran jakamin nekapeakun: Maj, juun tunaawaitjai. ¿Yáki wina namangkur wakera nuna nepeturkat? tajai. ²⁵ Ii Apuri Jesucristo wina namangkur wakeramun nepeturkatin asamtai, Yusnak maaketai tajai. Tura asan nunasha nekajai: Wiki nintimsanak wina namangkur wakera nuna umirkun, tuke tunau inatiria nunisnak ajai. Antsu paan nintimran Yuse wakeramurin umirkatasan wakerin ajai.

8

Yuse Wakanijai Yuse wakeramuri najanatnuitji

¹ Tura asamtai nunasha tajarme. Iikia Cristo Jesúsnu asakrin, Yus yamaikia iinka pengké mengkaatmakchatnuitji. ² Cristo Jesúsnu asakrin, Yuse Wakani pujutan sukartin aa nuka iin angka awajtamsamiaji. Tura asa yamaikia ni kakarmarjai ii tunau wakerutinka nepeturmakmiaji. Tura asamtai Yus iinka: Tunau turau asaram, tuke jakatniunam wetaram turamtsuji.

³ Aints ainau mash tunaarintin asar, Yus umirkatin chichaman kichkisha umirkacharmiayi. Tura asamtai Yus ni Uchiri iiya nunisang aints wajasti tusa, tura aints ainauti tunaarin mash sakturtas jakati tusa akupturmakmiaji. Tura asamtai Cristo jarutramak ii namangke tunau wakerutin nepeturmakmiaji. ⁴ Tura asamtai yamaikia ii namangke wakera nuka wakerutsuk, antsu Yuse Wakani wakera nuke wakerau asar, yamaikia Yus umirkatin chicham miatrusrik umirnitji.

⁵ Aints ni namangke wakeramurinak umiruka tuke ni namangkenak nintimias pujawai. Antsu Yuse wakeramurinak nintimias pujakka tuke Yusen nintimui. ⁶ Ni namangkenak nintimina nuka tuke jakatniunam weenawai. Antsu Yusen nintimina nuka Yusjai tuke angka pengker pujusartin ainawai. ⁷ Aints ainau ni namangke wakeramurinak nintimina nuka Yuse chichamen umitan nakitinau asar, Yuse nemase ainawai. Tu nintimsar pujuinauka Yusen umirkartatkamawar pengké tujintinawai. ⁸ Tura asar ni namangke wakeramurinak nintiminauka Yusen pengker awajsartatkamawar pengké tujintinawai.

⁹ Antsu Yuse Wakani atumi nintin pujurtamu asamtai, atumka atumi namangke wakeramuri umirtsuk pujau asaram, Yuse Wakani wakeramuri nintimtinuitrume. Antsu Yuse Wakani Cristo akupa nuka aintsu nintin pujurchamka nu aintska Cristo aintsrinchuitai. ¹⁰ Antsu Cristo atumjai pujamtaikia, atum tunaarintin asaram, waitnasrum jakarmesha, Cristo atumi tunaarin sakturmaru asamtai, atumi wakaningkia tuke

☆ 7:15 (Gál. 5.17) ☆ 8:9 (1.Juan 4.13)

iwiaaku pujustinuitai. ¹¹ Tura Yus Cristo Jesúsán jakamunmaya inankin asamtai, Yuse Wakani atumi nintin pujurtamkurminkia, atumka jakarmin wainiat, Yus ni Wakanin akupturmak, atumi namangken jakamunmaya inantamkitnuitrume. ✠

¹²⁻¹³ Yatsur ainautiram umaarutirmesha, atumi namangke wakera nu umirkurmeka tuke jakatniunam wetinuitrume. Antsu Yuse Wakani atumin pujurtamkurmin, atumi namangke wakera nu nepetkarmeka, tuke Yusnum iwiaaku pujustinuitrume. Tura asamtai iikia ii namangke wakeramuringkia yamaikia pengké umirkashtinuitji.

¹⁴ Yuse Wakani umirin ainautikia mash Yuse uchiri ainiaji. ¹⁵ Yaanchuikia tunau inatiria nunisrik pujuyaji. Antsu Yuse Wakani iin pujurtamu asamtai, yamaikia Yuse uchiri asar, shamtsuk Yus seakrin, Yuse Wakani: “Apaachi” tumamtikramji. ¹⁶ Tura Yuse Wakani ii nintin engkemturmau asa: Atumka Yuse uchiri ainiarme tusa nekamtikramji. ¹⁷ Tura Yuse uchiri asakrin, Yus ni uchiri ainautin suramsatas wakera nunaka mash umiktatui. Tura asamtai Cristonu aa nuka mash iinu atinuitai. Tura Cristojai tuke warastasar wakerakrikia, Cristo wait wajakmia nunisrik iisha ju nungkanmaka wait wajaktinuitji. ✠

Ukunam atiniun pachis etserkamu

¹⁸ Nekasar ju nungkanmasha nukap wait wajayatrik, ukunam tuke wait wajatsuk Cristo pujamunam nekasar warastinuapitji, tu nintimsar pujau asar, ii ju nungkanam wait wajaji nuka jumchikitai, tu nintimsan pujajai. ¹⁹ Yus najanamu ainau waring achat mash yamaisha nukap wait wajainawai. Tura ni kintari jeamtai, Cristonu ainautikia ii Apurijai wantinkatnuitji. Tura asakrin Yus najanamu ainauka mash nu kinta jeati tusar nakainawai. ²⁰ Nu nangkamtaik Yus mash pengker najanamaitiat, nuniangka mash pasemarmiayi. Nuka ni neaskeka turunachmiayi. Antsu Yus ukunam ataksha iwiarnarti tusa, aints tunau wajakmiaunum pasemarat tusa tsangkamkamiayi. Tura asamtai mash Yus najanamu ainau nungka iwiarnartin kintan nakainawai. ✠ ²¹ Nu kintati mash Yus najanamu ainauka nungka meseamunam waitnasar jingkiamua nunisarang pujuinau asar, Yuse uchiri ainaujai metek angkan pujusartas nakainawai. ²² Yamaisha Yus mash najanamu ainauka nuwa jateema waitnawa nunisarang wait wajainawai. Iikia nuka nekaji. ²³ Antsu chikich najanamu ainaukeka waitninatsui. Iisha nunisrik nukap waitnaji. Yuse Wakani iin pujurtamu wainiatrik, yamaisha wait wajayatrik, Yus ii namangken yapajiatin kinta nakaji. Tura Yuse uchiri asar Yusnum pujustin kinta nakaji. ✠ ²⁴⁻²⁵ Tura Yus: Wi uwentikratatjarme tinu asamtai, iisha uwemrawaitji. Iikia Cristojai tuke pujustin asakrin, Cristo iinu namangkenka yapajiatnuitai. Tura asamtai iinu namangke yapajiachmau pujayatrik, Yus tímia nunaka umiktatuapi tusar nakaji. Tura Yus nuna yaanchuik umikuitmataikia iikia: Yus nunaka umiktatuapi tichamnawaitji.

²⁶ Ii wait wajakrincha, Yuse Wakani iincha yainmaji. Iikia: ¿Itiur Yus seatnuitji? tusar nekachu arining, Yuse Wakani ii wait wajamurin nekau asa, iikia ¿warintua nuka? nekaatatkamar tujintarning, iin pachitmas Yusen chichartamji. ²⁷ Tura Yuse Wakani Yuse aintsri ainautin pachitmas Yusen sea nunaka Yuska mash anturui, tura ii nintimaurincha mash nekau asa, ni Wakani Yuse wakeramurijai metek seatramkurin mash anturui.

Yuse kakarmarijai mash aa nuka nepetkatnuitji

²⁸ Yus: Wína uchir asaram, wi wakeramur najanatararam tusa, iinka eatmaku asamtai, iikia Yus aneen asakrin, tuke iincha pengker awajtamji. Tura asamtai Yus wakera nuka mash pengkeraitai tusar nekaji. ²⁹ Tura asamtai Yus yaanchuik ¿ya wína aintsur atatua? tusa mash nekau asa: Wína aintsur atatrume timiayi. Tura Yus ni Uchirin Apu ata tusa, nuná eemak jakamunmaya inankimiayi. Tura Cristonu ainautinka: Cristoa nunisrumek wína uchir ataram tinu asa, jakamunmaya inantamkitnuitji. ³⁰ Tura Yus nu nangkamtaik: Wína uchir atinuitrume tinu asa iin eatmakmiaji. Tura nekasrum

✠ 8:11 (1.Cor. 3.16) ✠ 8:17 (Gál. 4.5-7) ✠ 8:20 (Gén. 3.17-19) ✠ 8:23 (2.Cor. 5.2-4)

tunaarinchawa nunisrumek ataram tusa, ii tunaarincha sakturmarmiaji. Tura wína uchir asaram, tuke wijai nayaimpinam pujusmintrum turammiaji.

³¹ ¿Tura nu nekau asar warintajik? Yus iin yainmakrinka, ¿yáki iincha nepetamkataij? ³² Yus ni Uchirin suritramtsuk iincha mash uwemtikramratas jakat tusa akupturmakmi-aji. Tura asa ni Uchirijai metek pengker aa nuna mash suramsatnuitji. ³³ ¿Yuse aintsri ainautinka yáki tunaawaitme turamtaij? Tu tinamtaisha Yuska pachischatnuitai. Yus ii tunaarin sakturmaru asa: Atumka pengkeraitrume turamji. ³⁴ Tura ¿yáki Cristonu ain- autincha jinum epenati turamtinuitai? Cristo Jesús nunaka pengké turashtinuitai. Antsu Ni jarutramkau asa, nunia jakamunmaya nantaki, Yuse untsurinini pujus, iin pachitmas ni Apaachirin seatramji. ³⁵ Cristo iin miatrusang anenmau asamtai ¿yáki iincha akan- tamkatnuitaij? Ii wait wajakrincha, tura itiurkachmin pujakrincha, Cristo iincha tuke anenmaji. Chikich ainau iin pasé awajtamsartas wakerutminakrincha, tura tsukajai wait wajakrincha, tura entsati yuumakrincha, tura shamrumtinnun pujakrincha, tura iin mantamawartas wakerutminakrincha, Cristo iinka tuke inaitamtsuk anenmaji. ³⁶ Iincha mantamawartas wakerutminau asaramtai, nuna pachis Yuse chichame tu aarmawaitai: “Yuse nemarniuri asakrin, uwijan maawartas juwinawa nunisarang kintajai metek iincha mantamawartas wakerutminaji.”✠

³⁷ Tura wainiat Yus iin tuke anenmau asamtai, waring achat mash tuke nepetji. ³⁸ Yus iin timiá anenmau asamtai, chikichkisha Yuse anengkratairin jurutramkishtinuitji tusan nekajai. Ii jaakrincha, tura iwiaaku pujakrincha, Yus iincha tuke inaitamtsuk anenmaji. Tura Yuse awemamuri, tura ju nungkanmaya apu ainausha, tura nayaimpinam kakaram ainausha, yamai iruna nusha, tura ukunam atinua nusha, ³⁹ tura yáki iruna nusha, tura nungkanam nitak iruna nusha, tura Yus mash najanamu iruna nusha, waring achat mash Yuse anengkratairin pengké jurutramkishtinuitji. ¿Yus ni anengkratairin ii Apuri Cristo Jesús a turamurijai paan inakturmasmiaji!

9

Yus Israel ainaun: Wína aintsur ataram tusa eakmauri

¹ Wi yamai titatja nuka nintimrataram. Cristonu asan Yuse Wakani wina nintimtiruru asamtai, wína nintirjai nintimraja nuka nekasaintai tusan titatjarme. Tura wait chichamnaka ujaatsjarme. ² Wína wear Criston umirchau asaramtai, wi wait anentakun tuke napchau nintimsan pujajai. ³ Tura asan wína wear mengkatatnunam wearai tusan, niin uwemtikrachmin ayatnak, niin uwemtikramnawaitkunka, wikia Cristonmaya kanakan ni wait wajaktintrincha juruktasan wakerin ajai. ⁴ Israela weari ainautin Yus: Wína uchir ataram tusa wakerimiayi. Tura asa Yus ni aintsri ainamunam ni paaniurijai wantintukmiayi. Tura: Wína aintsruitrume timiayi. Tura: Wína chichamur umirtuktaram tusa, Yus ni umirkatin chichaman Moisésnum akupkamiayi. Tura iruntai jeanam wijai irunrataram timiayi. Tura ukunam atiniun pachis ii weari ainaun chichaman akuptukmiayi. ⁵ Tura ii juuntri ainamunmaya ni weari ainiaji. Tura Mesíaska Israela weari ainamunam akiina aints wajasmiayi. Tura Mesíaska Yuse Uchiri asa, mash aa nuna apuri asamtai tuke: Ameketme Yusem titinuitji. Nuka nekasaintai.

⁶ Antsu Israela weari ainau mashkia Yuse aintsrinchu ainawai. Tura wi wear ainau Yuse chichamen umikchau asaramtai, Yuska ukunam atiniun pachis tímia nunaka umikchawaitai tichamnawaitai. ⁷ Abrahama wearisha mashkia Yuse aintsringkia wajascharmiayi. Antsu Yus Abrahaman chicharak: “Ami uchirmi Isaaca weari ainauk nekasar wína aintsur wajasartinuitai,” timiayi.✠ ⁸⁻⁹ Tura asamtai Isaac akiintsasing, Yus Abrahaman tímia nuka nuwaitai: “Chikich musachti amin jiiatjame. Tura nuningkia nuwem Saraka uchin takakun wainkatatjai,” tu aarmau asamtai, nusha nekaamnawaitji. Antsu aints Abrahama weari ayat, pachitsuk Yuse uchiri wajaschatnuitai. Antsu Yus Abrahaman tímia nunisarang akiinauka nekasar Yuse aintsri ainawai.✠

✠ 8:36 (Sal. 44.22) ✠ 9:7 (Gén. 21.12) ✠ 9:8-9 (Gén. 18.10)

¹⁰ Tura ii juuntri Isaac uchin yajutmak numatik jimiarian yajutmarmiayi. Tura asamtai nuwari Rebeca nu juretik uchin jimiarian jurermiayi. ¹¹⁻¹³ Tura asamtai nu uchin jimiarian jureatsaing, Yus Rebecan chicharak: “Eemkauri ni yachiin ekerin umirkatnuitai,” timiayi. Tura asamtai ukunam Yuse chichamen etserin tu aarmiayi. Yus chichaak: “Jacobon aneemiajai. Antsu yachiin Esaún aneechmiajai,” timiayi. Tu aarmau asamtai, Rebeca uchin jureatsaing, nu uchikia pengker aa nuna turachun tura tunaunasha turachun wainiat, Yus ningki wakeruku asa, kichik uchinak pachis: Wína aintsur atatu tusa, aints ainaun mash nekamtikiatas wakerimiayi.✠

¹⁴ Nu chicham nintimsar pujakrisha ¿warintajak? Yus pengker nintimias pujatsui ¿tu nintimratnukai? Atsa, tuuka nintimrachminuitai. ¹⁵ Yus Moisésan chicharak: “Wi Yus asan, wiki nintimsanak aintsun wait anentratasan wakeraknaka wait anentratnuitjai. Tura aintsun pengker awajsatasan wakeraknaka turatnuitjai,” timiayi. ¹⁶ Tura asamtai aints ningki nintimias: Wikia pengker aa nuna takau asamtai, Yuska nekasampi winaka wait anentrutatua tamatikia, Yuska nu aintsun wait anentatsui. Antsu Yus ningki wakerak aints ainautin wait anentramaji. ¹⁷ Tura Yuse aarmauri Egipto apurin pachis tu aarmawaitai. Yus faraónkan chicharak: “Wikia Yus asan, aints ainau wína kakarmarnasha wainkarti tusan, tura ami turamurmin nekaawar, wína naarun pachitsar mash nungkanmaya ainau: Yuska juuntapita turutiarti tusan, amin apu inaikiamiajme,” timiayi.✠ ¹⁸ Tura asamtai Yus ningki wakerak aintsun wait anentratnuitai. Tura kichnasha: Nuka wína nintimurchau asa, nuna nangkamasang nintimurchau ati tusa pachischatnuitai.

¹⁹ Tura chikich aints ningki nintimias chichaak: “¿Warukakung Yus aints wait wajaktinasha sua? Tura ¿Yus aints tu pujusarti tusa wakeramtaikia itiurkatjik?” wína turutchanpiash. ²⁰ ¿Atumka ya aints asarmae Yuscha pajakrumsha aiktinuitrume? ¿Atumka itiur nintimrume? Nuwe pining najanam, nuwen najaniun chicharak: ¿Waruka aisha najatame timinkai? Atsa, nuka tichamnawaitai. ²¹ Nuwe najanin nuwen juki ningki wakerak piningkian nekas shiirman najanatnuitai. Tura nuwe ampintraun juki tachaunasha najanatnuitai.✠

²²⁻²³ Yus tunau ainaun wait wajaktiniun susatatiat: Aints ainau wína kakarmarun wainkarat tusa tunau ainaun wait wajaktiniun wári sutsuk nukap arus susatnuitai. Tura asamtai Yus aints ainautin wait anentramak, iincha juramkitas: Tuke nayaimpinam wijai pujusmintrum tusa, ningki wakerau asa ni kakarmarin inakturmasmiaji. ²⁴ Yus judío ainautincha: Wína aintsur ataram tusa eatmakmiaji. Tura judíocho ainautirmincha nunisang: Wína aintsur ataram tusa eatmakmiarume. ²⁵ Yuse chichame etserin Oseas naartin nuna pachis tu aarmiayi.

Yus chichaak: “Wikia Yus asan, wína aintsruchu ainaun wína aintsur arti titatjai. Tura aints wína anentsuk puju armia nunasha wína aneetir arti titatjai,” timiayi.

²⁶ Tura mash nungkanmaya ainaun pachis Yus: “Wína aintsruchuitrume, timiaja nu aints ainaun ukunam: Nekasrum Yus iwiaaku pujustinun sukartinu uchirintrume titinuitjai,” timiayi. Oseas tu aarmiayi.✠

²⁷⁻²⁸ Tura Yuse chichame etserin Isaías naartin Israel ainautin pachitmas chichaak: “Yus tímia nunaka miatrusang wári umiktatui. Tura Israel ainau mash nungkanam pujuinau wainiat, Yus wait wajaktiniun akuptuktinuitai. Tura asamtai Israel ainauti yaikmia timiá untsuri ayatrik jumchik uwemratnuitji,” Isaías tu aarmiayi.✠

²⁹ Tura Yus Isaíasan chikich chichamnasha yaanchuik tu aamtikramiayi: “Yus nekas kakaram aa nuka aints ainautin jumchiksha uwemtikramrachamtaikia, iikia Sodoma yaktanam tura Gomorra yaktanam pujuarmia nunisrik mengkakatnuitji,” tu aarmiayi.✠

Israel ainau Criston nekasampita tinauka uwemrartinuitai

✠ 9:11-13 (Gén. 25.23) ✠ 9:17 (Ex. 9.16) ✠ 9:21 (Jer. 18.1-6) ✠ 9:26 (Os. 1.10;2.23) ✠ 9:27-28 (Isa. 10.22-23) ✠ 9:29 (Gén. 19.24-28; Isa. 1.9)

³⁰ ¿Judíochu ainau pachisar warintajik? Judíochu ainau Yus pengker awajsatnun yaanchuikia nintimchau ainayat, Criston nekasampita tinu asaramtai, Yus yamaikia tunaachawa nunisarang pujuinaun jiiawai. ³¹ Antsu Israel ainau umirkatin chichaman umirkartas wakerinayat umirkatatkamawar tujinkarmiayi. Tura asaramtai Yus niin tunaachawa nunisarang pujuinaun jiiischamiayi. ³²⁻³³ ¿Waruka tu pujuarmia? Israel ainau Criston nekasampita tutsuk: Pengker aa nu turakrikia, iik uwemratnuitji, nangkamiar tu nintimsar pujuarmiayi. Tura asar Criston umirtan nakitrarmiayi. Tura nuna pachis tu aarmawaitai:

Yus ni Uchirin pachis chichaak: “Wainkataram. Wikia Sión yaktanam kaya juuntan pujsatnuitjai. Wi turamtai aints ainau nu kayanka nakitrartinuitai. Tura nu kayanka tukumkar iyartinuitai. Antsu nu kayan: Nekas pengkeraitai tinauka pengké natsaararchatnuitai,” Yus timiayi.✠

Tura Cristoka nu kaya tumau asamtai, Israel ainau Criston kajerkar: Nekasampi Yuse Uchirinta tutsuk, Moisésa chichame umirkarkia uwemratatjiapi, tu nintimsar pujuarmiayi.✠

10

¹ Yatsur ainautiram umaarutirmesha, tuke wína nintirjai wakerakun, wína wear ainau uwemrarat tusan Yusen seatinajai. ² Tura wína wear nintimaurin nekajai. Ningki nintimsar Yusen miatrusarang umirkartas wakerinayat ¿itiur Yuse wakeraururin najanamnawaitji? tusarka nekainatsui. ³⁻⁵ Moiséscha tu armiai: “Aints Yus umirkatin chichaman umirak Yusen pengker awajsatas wakerakka, Yus tíaia nunaka mash nuwatsuk miatrusang umirkatnuitai.” Tu aarmau wainiatrik, aints ainautikia kichkisha Yus umirkatin chichamka nuwatskeka umirkachmiaji. Tura wina wear ainau: ¿Yusen itiur pengker awajsatnuitja? tusar nekainachu asar, ni pengker turamurijai Yusen pengker awajstartas wakerin armiai. Tura wainiat Yus aintsu tunaarin tuuka sakarchamin asamtai, wi wear ainau Yusen pengkerka awajsacharmiayi. Cristo ningki Yus umirkatin chichaman miatrusang umirkau asamtai, Moisésa chichamen umirkarkia uwemratatjiapi tichamnawaitji. Antsu Cristo nekasampita takurkia, Yuska pengker awajsatnuitji.✠

⁶ Tura Cristo yaanchuik iin uwentikramratas tau asamtai, aints ainauti Cristo nekasampita tinu asar: ¿Yáki nayaimpinmasha waka, Cristoncha junisha itati? tuuka nintimrachminuitji. ⁷ Tura Cristo yaanchuik jakamunmaya nantakin asamtai: ¿Yáki jakau ainamunam waya, Criston jakamunmaya inanki junisha itati? tuuka nintimrachminuitji. ⁸ Antsu Yus pengker awajsatasar wakerakrikia, Yuse aarmaurijai metek nintimratnuitji. Cristo nekasampita titaram tusar, chicham ii etserji nuka nuwaitai: “Yuse chichame umirtaka yumtichuitai. Nintimjaisha Yus nekasampita tusam, tura jangkemjaisha Yus nekasampita tusam ujaktinuitme,” tu aarmawaitai.✠ ⁹ Tura asamtai Yus ni Uchirin Jesúsán jakamunmaya inankimia nu nintimtakum, tura jangkemjai: Jesús nekasampi wína apuruita takumka tunaanumiangka uwemratatme. ¹⁰ Tura asamtai Jesucristo nekasampita tu nintimtakminkia, Yus aminka pengkeraitme turamtatui. Tura jangkemjai Jesucristo wína apuruitai takumka uwemratatme.

¹¹ Yuse chichame tu aarmawaitai: “Cristo nekasampita tu nintimtina nuka natsaarchartinuitai.”✠ ¹² Tura Cristoka judío ainau Apuri asamtai, nuniasha judíochu ainau Apuri asamtai, mash metek ii Apuri seakur: Tunaanumia uwentikrurta takurningkia, ii Apuri aints ainautin mash metek anenmau asa mash uwentikramratnuitji. ¹³ Tura asamtai Yuse chichame tu aarmawaitai: “Aints ii Apurin seak: Uwentikrurta tamaka uwentikratnuitai.”✠ ¹⁴ ¿Antsu Criston nekasampita tutsuk pujuinauka itiur nijaisha chichasarting? ¿Tura Criston pachisar chichaman antutsuk pujuinauka itiur Criston

✠ 9:32-33 (Isa. 28.16) ✠ 9:32-33 (1.Ped. 2.6-8; Rom. 10.11) ✠ 10:3-5 (Lev. 18.5) ✠ 10:8 (Deut. 30.12-14)
✠ 10:11 (Isa. 28.16; Rom. 9.33; 1.Ped. 2.6-8) ✠ 10:13 (Joel 2.32)

nekasampita tiarting? ¿Tura aints kichkisha Cristo chichamen etserchamtaikia itiur chikich ainausha antukarting? ¹⁵ ¿Tura aints akupinachmaka itiur ningki nintimsarsha Cristo chichamencha etserkarting? Tura ni chichame etserin ainaun pachis tu aarmawaitai: “Aints uwemratin chichaman etserki weenauka, pengker chichaman etserin asar nekasar pengker ainawai.”[☆]

¹⁶ Antsu aints mashkia uwemratin chichaman Criston pachisar nekasampita ticharmi-ayi. Yaanchuik nuna pachis Isaías tu aarmiayi: “Apu ru ¿yáki ii etserkamun antukaria?”[☆]

¹⁷ Tura asamtai aints ainau Cristo chichamen antuku asar nekasampita tinawai. ¹⁸ Antsu wi nintimsan tajai: ¿Wína wear ainau nekasar nu chichaman antukcharmasha? Ja ai, nekasar antukarmiayi. Yuse chichamesha tu aarmawaitai:

“Mash nungkanam Yus ni najanamuri nekamtikiamu asar, mash nungkanmaya ainausha antukarminuitai.”[☆]

¹⁹ Tura: ¿Wína wear ainau nu uwemratin chichaman antukariat, paan nekaawarmakia? Tu inintrusminuitai. Tu inintrinak pujuinaunka wikia tajai: Wína wear ainauka nu chichamnaka antukariat nakitrarmiayi. Moiséscha nuna pachis tu aarmiayi. Yus chichaak:

“Atumka chikich ainau pachisrum: Nuka ii wearinchuitai tayatrumek, nu aints ainau wína aintsur wajasaramtai, atumka nu aints ainaun suwirpiaku jistinuitume. Tura chikich ainau pachisrum: Nintimchau ainawai tayatrumek, nu aints ainau wína aintsur wajasaramtai, atumka judóchu ainaun kajerkatnuitume,”

Yus timiayi. Tu aarmau asamtai, wína wear ainau Cristo chichamen nakitrartinuitai, nunaka taku tawai tusar nekaji.[☆] ²⁰ Tura Isaías ni weari ainaun shamtsuk chichaman aatramiayi. Nu aarmauka nuwaitai. Yus judóchu ainaun pachis chichaak:

“Wínaka eatinachiat winaka waitkarmiayi. Tura wína seatinachu wainiatun Wiki wantintukmiajai,” timiayi.

²¹ Tura ni weari ainaun pachis Isaías tu aarmiayi. Yus chichaak:

“Wína chichamrun nakitin ainaun wína umirtutsuk pujuinau asaramtai, kintajai metek wini winiarti tusan untsumnuyajai,” timiayi.[☆]

11

Israel ainau jumchik uwemrartin ainawai

¹ Tura asamtai ¿Yus ni aintsri ainautin tuke japrama ukurmakmakiaj? Atsa, ukurmakchamiaji. ¿Wikia Israel aintschaukitaj? ¿Tura Abrahamama wearinchukitaj? ¿Tura Benjamínka wearinchukitaj?[☆] ² Yus yaanchuik Israela weari ainautin: Wína aintsur ainarme, tinu asa, ni aintsri ainautinka mash japrama ukurmakchamiaji. ¿Yuse chichame etsernun Elíasan pachis aarmawa nuka antukchamkuram? Elías ni weari ainaun pachis napchau nintimias Yusen chicharak: ³ “Apu ru, ami chichammin etserin ainaun mash maawaru asaramtai, wiki ampintrajai. Tura tangku epetincha mash mesrari. Tura asar winasha mantuwartas wakerutinawai,” timiayi.[☆] ⁴ Tamaitiat Yus ayaak: “Nuka tiip, wína aintsrun untsurin maawarmaitiat, siete mil (7,000) ainau Baalan tikishmatrar: Wina Yusruitme tutsuk pujuinawai,” timiayi.[☆] ⁵ Tura yamaisha nunisarang aints ainautin Yus wait anentramak: Wina aintsur ataram tinu asamtai, aints ainauti jumchik Cristo umirkur pujaji. ⁶ Antsu Yus iin wait anentramau asa, pengker aa nu takachu arining, tunaanumiangka uwemtikramramiayi. Antsu iikia pengker aa nu takau akurningkia, Yus iincha tunaanumiangka uwemtikramrashtinuitji. Antsu iikia pengker aa nuka turichu arining Yus iinka wait anentramau asa uwemtikramratnuitji.

⁷ Tura asamtai ¿warintajik? Tu uwemrachminun waininayat, wína wear ainau nangkamiar: Wi tuke pengker aa nuna turaknaka uwemratatjapi, tu nintimrarmiayi. Antsu Yus ni eakmau ainautinka uwemtikramramiayi. Antsu chikich ainau Yusen

☆ 10:15 (Isa. 52.7) ☆ 10:16 (Isa. 53.1) ☆ 10:18 (Sal. 19.4) ☆ 10:19 (Deut. 32.21) ☆ 10:21 (Isa. 65.1-2)

☆ 11:1 (Fil. 3.5) ☆ 11:3 (1.Rey. 19.10, 14) ☆ 11:4 (1.Rey. 19.18)

nekasampita ticharu asaramtai, katuram nintintin arti tusa Yus tsangkamkamiayi.

⁸ Tura asamtai tu aarmawaitai:

“Nu aints ainauka katuram nintintin asar, nintinchawa nunisarang pujusarti tusa Yus tsangkamkamiayi. Tura ni jiijai pengker wainminayat, Yus wakera nunaka nekaacharti tusa tsangkamkamiayi. Tura Yus tímia nunaka antukcharti tusa, kuwishincha epetkamiayi. Tura asamtai yamaisha nunisarang ainawai.” Tu aarmawaitai. ✠

⁹ Davidcha Yusen umirtan nakitinaun pachis tu aarmiayi:

“Aints ainau uma umaka tura yuwa yuwaka nakunakut pujuinauka Yusen nakitinau asaramtai, Yus wait wajaktiniun susartinuitai.

¹⁰ Tura wainmichua nunisarang Yuse wakeramurin nekatsuk pujusartinuitai. Tura merman entsakua nunisarang tuke wait wajakartinuitai,” tu aarmawaitai. ✠

Judíochu ainau Yuse aintsri wajasmauri

¹¹ Tura asamtai atumin iniastasan wakerajrume: Ii juuntri ainau Criston umirtan nakitinau asaramtai, ¿Yus wi wear ainaun tuke ajapa ukukmiakia? Atsa, ukukchamiayi. Antsu ii juuntri ainau Criston umirtan nakitinau asaramtai, Yus judíochu ainaun uwentikramiayi. Turamtai wína wear ainau nuna wainkar, nusha nunisarang Criston umirtan wakerukarti tusa Yus turamiayi. ¹² Tura wína wear ainau Criston umirtan nakitinau asaramtai, Yus judíochu ainaun nekas pengker awajsamiayi. Tura asamtai wína wear ainau ataksha Yusen nekasampita tinauka, nuna nangkamasarang nekasar timiá pengker pujusartinuitai.

¹³ Judíochu ainautirmin yamaikia nunasha tajarme: Yus wína atumin akuptuku asamtai, wikia Yuse chichamen tuke inaitsuk atumin ujaajrume. ¹⁴ Tura nuna turakun, atum uwemrarume nunisarang wína wear jumchiksha nuna nekaawar uwemrarti tusan wakerajai. ¹⁵ Tura asamtai Yus wína wear ainaun ajapa ukukiat, mash nungkanmaya ainaun wait anentak: Wína aintsur ataram tinu asa, Yus wína wear ainaun ataksha: Wína aintsur ataram, tamatikia, nuka yaanchuik jakarua nunisarang pujuinayat, jakamunmaya nantaknua nunisarang nekasar pengker nintimsar warasartinuitai. ¹⁶ Tura pang eemkar najanamuka Yus susam pengkeraitmataikia, nunia pang ukunam najamusha nunisang pengker atinuitai. Tura numi kangkape pengkeraitmataikia, kanawesha pengker ainawai. Tura asamtai ii yaanchuik juuntri ainau Yusen nekasampita tinu asar, Yuse aintsri wajasaru asaramtai, ni weari ainausha nunisarang ukunam: Yusen nekasampita tusar Yuse aintsri wajasartinuitai.

¹⁷ Tura Yuska kichik kichik wina wear ainaun numi kanawe charukmawa nunisang ajapa ukukmiayi. Tura atumin judíochu wainiat Yuska: Wína aintsur ataram tusa, numi íkiakmawa nunisang judío ainaujai metek wína aintsur ataram timiayi. Tura asa Yus judío ainautin pengker awajtamsamia nunisang atumnasha nekas pengker awajtamsamiarume. ¹⁸ Tura asamtai judíochu ainautiram, Yuse aintsri ayatrumek nangkamrum: Judío ainaun Yus ajapa ukukin asamtai, wikia judío ainaun nangkamasnak pengke aintsuitjai, tuuka nintimrairap. Antsu tu nintimrataram: Yus judío wearin kichik mash aints ainaun uwentikratin ati tusa akupkau asamtai, judíochu ainauti yamaikia Yuse aintsri ainiaji, tu nintimrataram.

¹⁹ Turayatrume atumka: Yus iinka: Wina aintsur ataram turamtias, judío ainaun ajapa ukukmiayi, tu nintimsaram pujakrumningkia, wikia tajarme: ²⁰⁻²¹ Wína wear ainausha Yus tímia nunaka nekasampita tichau asaramtai, Yus niin ajapa ukukmiayi. Antsu atumin: Wína aintsur ataram, titaska wína wear ainaun ajapangka ukukchamiayi. Antsu atum Yus tímia nunaka nekasampita tinu asaram, Yuse aintsri wajasurme. Wína wear ainau Yuse aintsri ainayat, Yus tímia nunaka umirkacharu asaramtai, Yuska niin ajapa ukukmiayi. Tura asamtai atumsha Cristo umirat inaisakrumningkia, atumnasha ajaprama ukurmaktinuitrume. Tura asamtai wikia nu aints ainaun nangkamasnak timiá pengkeraitjai, tuuka nintimsairap. Antsu wainkataram. ²² Tura asaram tu

✠ 11:8 (Isa. 29.10) ✠ 11:10 (Sal. 69.22-23)

nintimsaram pujustaram: Yus aints ainaun mash aneayat, ni umirkacharu ainaunka wait wajaktiniun susatnuitai. Tura atumka Yus umirkuram pujakrumningkia, atumin wait anentramak ajapramangka ukurmakchatnuitrume. Antsu Yuse wait anengkratairi nintimtsuk, tura ni umirtsuk pujakrumningkia, wína wear ainaujai metek atumnasha ajaprama ukurmaktinuitrume. ²³ Tura wína wear ainau ataksha Yusen nekasampita tinamtaikia, Yus: Ataksha wína aintsur ataram titinuitai. Tura asamtai wína wear ainau yamaikia Yusen umirkacharu ainayat, ataksha Yuse aintsri wajasartinuitai. ²⁴ Antsu atumka yaanchuikia Yuse aintsri acharmin wainiat, Yus atumin pachitmas: Wína aintsur ataram tusa wakerimiayi. Tura ii juuntri ainau yaanchuik Yuse aintsri ainayat, Yus tímia nunaka umikcharu ainau wainiat, ukunam ni weari ainaun chicharak: Atumsha wína chichamur umirkurmeka, wína aintsur atinuitrume titinuitai.

Israel ainau ukunam ataksha uwemrartin ainawai

²⁵ Tura asamtai yatsur ainautiram, wikia nekawaitjai, tu nintimsaram pujusairap tusan nunasha tajarme. Chikich ainau nuna nekaachminun wainiat, Yus nu chichamnaka nekamtikruamiayi. Nu chichamka nuwaitai: “Wína wear ainau jumchik Criston umirkaru pujuinaing, chikich ainau katuram nintintin asar, Criston umirtan nakitinawai.” Tura judíochu ainautiram: Cristo umirkuram pujakrumningkia, wína wear ainausha katuram nintimtain inaisar Criston umirkartinuitai. ²⁶ Tura asamtai Yuse chichamesha tu aarmawaitai:

“Sión yaktanmaya atumin uwentikramratin taamtai, Jacobo weari ainautirmi tunaarin mash japitramratnuitrume.”[☆]

Tu aarmau asamtai Yus Israel ainautin mash tunaanumia uwentikramratnuitji.

²⁷ Nuniasa tu aarmawaitai:

“Wína aintsur ainau tunaarin mash sakturan nijai yamaram chichaman najanatnuitjai,” Yus timiayi.[☆]

²⁸⁻²⁹ Tura wína wear ainau uwemratin chichaman pachis nekasampita tichau asar, Yuse nemasea nunisarang ainawai. Tura asaramtai atumka mash uwemratin chicham Cristo pachisrum antukmiarume. Tura wainiat Yus tímia nunaka mash umiktinuitai. Yaanchuik ii juuntri ainaun Yus chicharak: Wi Yus asan, atumi weari ainaun pengker awajsatnuitjai, tu tinu asa, ni tímia nunaka yapajiachmin asamtai, wína wear ainau tuke Yuse aneetiri ainawai. ³⁰⁻³¹ Tura asamtai yaanchuik Yus umirtsuk pujuyarme nunisarang wína wear ainau yamaikia Criston umirtsuk pujuinawai. Tura yamaikia atum Cristo umirkau asakrumin, Yus atumin wait anentramramia nunisang wína wear ainauncha wait anentratnuitai. ³² Aints ainau mash metek jingkiamua nunisarang Yusen umirkartatkamawar tujinkaru asaramtai, Yus aints ainaun mash wait anentak tunaanumia uwentikratnuitai.

³³ Maj ¿Yus timiá pengkerchaukai? ¿Warina Yuscha nekatsua? Aintstikia Yuse nintimauringkia pengké nekaachminuitji. Tura ¿Yus warina turawa? tusarsha iisha nekaachminuitji. ³⁴ ¿Yus itiur nintimua tusarsha yáki nekaat? ¿Tura yáki Yusen nuiniarat?[☆] ³⁵ ¿Tura yáki Yus pengker awajtusat tusasha akiimiakminui? Nuka pengké turachminuitai. ³⁶ Yus mash aa nuna ningki najanamu asar ninu ainawai. Tura mash najanamu ainau wína pengker awajtusarmi tusa Yuska najanamiayi. Tura asamtai iisha tuke inaitsuk Yus pengker awajsarmi tajarme. Nekasaintai.[☆]

12

¿Yus itiur miatrusrisha umirkatnuitji?

¹ Yatsur ainautiram umaarutirmesha, Yus atumin miatrusang wait anentramrau asamtai nunaka tajarme: Atumka Yusnau asaram, tura atumek wakerau asaram, Yus pengker awajsataram. Iwiaaku pujakrum, wína namangkur Yusnawaitai tusaram Yuse wakeramuri najanatarum. Tu pujakrumka, Yus nekasrum pengker awajsatnuitrume.

[☆] 11:26 (Isa. 59.20) [☆] 11:27 (Jer. 31.33-34) [☆] 11:34 (1.Cor. 2.16) [☆] 11:36 (Efes. 4.6; Col. 1.16)

Yus tu pujustaram tusa wakerawai. ² Nunia tajarme: Ju nungkanmaya ainau nintimrairap. Antsu Yus wina nintimaurun yapaijturat tusaram tsangkamkataram. Tu pujau asaram Yuse wakeramuri nekas pengkeraitai tusaram, tura itiur Yusen pengker awajsatnuitja tusaram, tura jitiur Criston miatrusnak umirkatnuitja? tusaram nekaamnawaitrume.

³ Tura Yus wina pengker awajtusu asa: Wina chichamur etserkata turutin asamtai, wisha atumin tajarme. Atumka nangkamrum: Wikia chikich ainaun nangkamasnak pengkeraitjai tuuka nintimrairap. Antsu tupin nintimsaram Yus: Wina nekasampita turuttiam turamin asamtai, nu takatcha takakmastatji, titinuitrume. ⁴ Iinu namangkesha warukuita tusar nintimrarmi. Iinu namangke kichkitiat muchitmau untsurintai. Tura metekchau ainawai. ⁵ Tura asamtai Cristonu ainautikia untsuri ayatrik, kichik aintsu namangkea nunisrik aji. Tura Cristonu asar mai nuwamtak yuumaniaji. ☆

⁶ Yus ii takatrinka metekchau ati tusa, ni wakera nunisang iin suramsau asamtai takat takakmastinuitji. Tura asakrin: Wina chichamur etserkata turamataikia, Yus nekasampita tinu asar, ni wakera nunisrik ni chichamengka etserkatnuitji. ⁷ Tura Yus: Wina umirtuku ainau tuke yaingtaram turamataikia, ni wakera nunisrik chikich ainau yaingtinitji. Tura Yus chikich ainau: Wina chichamur nuiniartaram turamataikia, ni wakera nunisrik ni chichamesha nuiniartinuitji. ⁸ Tura: Chikich ainau wina miatrusarang umirtukarat tusaram kakamtikrataram, Yus turamataikia, ni wakera nunisrik chikich ainausha kakamtikratnuitji. Tura chikich ainau yuumamuri susataram, Yus turamataikia, wina pengker awajtusarat, tuuka nintimtsuk, yuuminak pujuinau ni yuumamurisha tuke susatnuitji. Tura Yus chikich ainau wainin ata turamataikia, wikia apuitjai, tuuka nintimtsuk, antsu Yus wakera nunisrik chikich ainausha wainkartinuitji. Tura Yus: Wait wajainau yaingtaram, turamataikia, iikia pengker nintimsar wait wajainausa yaingtinitji. ☆

Cristonu ainautikia chikich ainau pengker awajsatnuitji

⁹ Nunasha tajarme: Chikich ainaujai suwirpiaku jijnitsuk nekasrum aneenitaram. Turaram pasé aa nuka nakitakrum, pengker aa nuke turataram. ¹⁰ Tura wait anengkratin asaram, Cristonu ainau aneen ataram. Tura wikia mianchawaitjai tusaram pengker nintimtunisrum pujustaram.

¹¹ Ii Apuri Cristo pengker awajsatasrum, ni takatrin atumin suramsamia nuka nakimtsuk, antsu ii Apuri wakera nunisrumek kakaram wajasrum turataram.

¹² Atumka pengker nintimsaram: Cristojai tuke pujostatjiapi tusaram warastaram. Tura wait wajakrumsha napchauka nintimtsuk pujustaram. Antsu tuke inaitsuk Yus seataram.

¹³ Cristonu ainau yuuminak pujuinausha yaingtaram. Tura aints irak taamtaisha yuratararam, tura wini kanurta titaram. ☆

¹⁴ Atumin pasé awajtaminamtaisha yapaijtsuk: Yus wait waktiniun susati tutsuk, antsu Yus yainmakti titaram. ☆

¹⁵ Cristonu ainau warainamtaikia, atumsha nunisrumek warastaram. Tura wake mesekar juutu pujuinamtaisha, atumsha nunisrumek wake mesekrum juutiam.

¹⁶ Chikich aints ainaujai pengker nintimtunisrum pujustaram. Tura wikia miajuitjai, tuuka nintimtsuk asataram. Antsu wikia mianchawaitjai titaram. Tura atumek: Wikia mash nekajai, tuuka nintimtusairap.

¹⁷ Aints atumin pasé awajtaminamtaisha: Wisha yapaijkiataj tuuka nintimsairap. Antsu mash metek ainiaji tusaram pengker aa nu turataram. ¹⁸ Chikich ainaujai kajernaitsuk pengker nintimtunisrum: Angkan pujusmi tusaram wakerin ataram. ¹⁹ Wina aneetir ainautiram, atumin kajertaminamtaisha atumka yapaijtsuk, antsu Yus ningki wait waktiniun susati tusaram inaisataram. Yuse chichame tu aarmawaitai. Yus

☆ 12:5 (1.Cor. 12.12) ☆ 12:8 (1.Cor. 12.4-11) ☆ 12:13 (Hebr. 13.2; 1.Ped. 4.9) ☆ 12:14 (Mat. 5.44; Luc. 6.28-29)

chichaak: “Tunau ainaun yapaijkiatnunka wiitjai. Wiki wait wajaktinnaka sukartinu-itjai,” tawai.✠

²⁰ Yuse chichame tu aarmau asamtai, atumi nemase yaparinamtaisha yuratarum, tura kitaminamtaisha umutisha artaram. Tu pujakrumka, atumin pasé awajtamina nu inatsaartinuitrume.✠ ²¹ Tura asamtai aints atumin pasé awajtaminamtaisha: Wisha nunisnak yapaijkian pasé awajsataj, tuuka nintimsairap. Antsu atumin pasé awajtamina nuka pengker awajsatarum.

13

¹ Nunasha tajarme: Apu ainau aints ainaun inararti tusa, Yus pujsamu ainawai. Tura Yus wakerau asamtai aints ainaun ínainawai. Tura asamtai atumka apu ainau mash umirkatnuitrume. ² Tura Yus apu ainaun: Aints ainaun inararti tusa pujsamu asaramtai, aints apun umirtsuk puja nuka Yusnasha umirtsuk pujawai. Tura asa wait wajaktinasha jukitnuitai. ³ Tura pengker aa nuna turinauka apu ainaun shamkarchatnuitai. Antsu pasé aa nuna turinauka apu ainaun shamkartinuitai. Apu ainaun shamtsuk pujustasrum wakerakrumka, pengker aa nu turatarum. Turakrumin apu atumin pengker nintimturmastinuitrume. ⁴ Yus apu ainaun nangkamniaka pujsachmiayi, antsu aints ainaun yaingkiarmi tusa, tura pasé takau ainaun wait wajaktiniun susarmi tusa, Yus apu ainaunka pujsamiayi. Tura asamtai pasé turakrumka, apu ainau nekasrum shamkatnuitrume. ⁵ Tura Cristonu asaram, apu ainausha tuke umirkatnuitrume. Tura wait wajaktin juki tusaram, tura nuna nangkamasrik pengker nintimsar pujusmi tusaram, apu ainausha tuke umirkatnuitrume. ⁶ Tura asakrumin Yus: Aints ainau pengker pujusarti tusa, apu ainaun akupkau asamtai, apu ainau Yuse inatiri asar, ni aintsri ainaun akikiartas atumnian kuikiancha juwinawai.

⁷ Apu ainau ni takatrin takasarti tusar, ni aintsrin akupinak: Apu akiktaram tinamtaikia nakiarairap. Tura apu atumin mash takakmastaram tinamtaisha, nakimtsuk nu takatka takakmastaram. Juun apu chikich ainauncha: Apu ata tusa inaikiamu asamtai, pajakrum aitsuk umirkatarum. Tura apu ainau Yus inaikiamu asaramtai, pengker awajsatarum.✠

⁸ Atumka tumash akurmeka, atumi tumashri nakimtsuk akimiaktaram. Tura tuke inaitsuk mai aneenin ataram. Aints chikich ainaun tuke aneak pujakka, Yus umirkatin chichaman Moisés aarmia nunaka mash umiawai. ⁹ Yus Moisésan umirkatin chichaman aamtikramia nuka nuwaitai: “Chikicha nuwari wainiatrum tsanirmawairap. Tura aints maawairap. Tura kasamkairap. Tura waitruwairap. Tura chikichnau aa nusha wakerukairap,” tu aarmawaitai. Tura mash irurar kichik chichamjai timinuitai. Nu chichamka nuwaitai: “Atumi namangke anearme nunisrumek chikich ainausha aneetaram.”✠ ¹⁰ Aints chikich ainaun aneauka paseeka awajtsui. Tura asa Yus umirkatin chichaman mash miatrusang umiawai.

¹¹ Iikia nu nangkamtaik Cristo nekasampita tusar: Nukap arus ii Apuri Cristo iin juramkitas tatinuitai timiaji. Antsu yamaikia aints kanur kuraat shintawa nunisrik: Cristo tatanak wajasi tusar paan nintimratnuitji. ¹² Ii Apuri tatanak wajasu asamtai, tunau ainau teenam pasé turina nuka inaisarmi. Tura paaniunam pujuinawa nunisrik paan nintimsar tunau nepetkaru armi. ¹³ Tura asar paaniunam pujuinawa nunisrik pengker nintimsar pujusarmi. Tura nampetcha nampetsuk, tura jampetcha jampetsuk, tura tsanirmatcha tsanirmatsuk, tura jiyaanitcha jiyaanitsuk, tura suwirpiaku jiinitsuk asarmi. ¹⁴ Tura atumka ii Apuri Jesucristonu asaram, ni kakarmarijai atumi namangke wakera nuka nepetkaram, Cristo wakera nunisrumek pujustaram.✠

14

Cristonu ainau pachisrum pasé chichakairap

✠ 12:19 (Deut. 32.35) ✠ 12:20 (Prov. 25.21-22) ✠ 13:7 (Luc. 20.25) ✠ 13:9 (Ex. 20.13; Lev. 19.18; Deut. 5.17) ✠ 13:14 (Efes. 6.11-17; 1.Tes. 5.8)

¹ Aints Cristonu ainiayat mianchaw wajainamtaisha nujai iruntrataram. Tura: Ameka Cristo umirat inaisame tiirap. ² Nintimrataram. Chikich aints ainau: Mash aa nu páchitsuk yuwatnuitji tinawai. Antsu chikich ainau Cristonu ainayat tenapkesar nekainachu asar: Kuntinu namangken yuwanka, tunau wajasai tu nintimsar kuntinu namangken yutsuk pujuinawai. ³ Tura mash yuuka namangken yuchaun pachis: Nuka nintinchawaitai tichatnuitai. Antsu Yus nu aintsun pachis: Wina aintsruitai tinu asamtai, namangken ychauka namangken yuun pachis pasé chichaschatnuitai. ⁴ Atumka chikich aintsu inatiri pachisrum: ¿Inatiram tenap umirtamsui titinkitrum? Atsa, nuka tichamnawaitrume. Antsu inakratin ni inatirin pachis: Wina pengker umirtawai, turachkusha pengkerka umirtatsui, ningki titinuitai. Tura asamtai ii Apuri Cristosha: Nekasar pengker pujusarti tusa, ningki ni inatiri ainaun nintimtikratnuitai.

⁵ Tura chikitcha nintimrarmi: Cristo umirin chichaak: Nu kintati Yus maaketai titasar iruntratnuitji, tu nintimui. Antsu chikichka: Kintajai metek tuke Yusen maaketai titasar pachitsuk iruntratnuitji, tu nintimui. Tura metekchau nintimsar pujuinayat, mai metek ¿ni nintimaurinka itiurak awa? tusa, ningki nekaamawartinuitai. ⁶ Aints nu kintati Yusen maaketai titasar iruntratnuitji tinauka Yusen pengker awajartas tu nintiminawai. Tura kintajai metek Yus nintimratnuitji tinauka nusha nunisarang Yusen pengker awajartas wakerinawai. Tura Cristo nemarin pachitsuk mash yuuka Yusen maaketai tusa yuwawai. Tura chikich aints kuntinu namangken yutsuk pujausha nunisang Yusen maaketai tawai.✠

⁷ Tura asamtai Cristonu ainautikia iik nintimsarkia iwiaaktsuji. Antsu Yus wakerau asamtai iisha iwiaakji. Tura Yusnau asar: Nu kintatiapi jakatatja tumamchatnuitji. ⁸ Iwiaaku pujakriki, ii Apuri pengker awajartasar pujaji. Tura jaakrish, ii Apuri wakerau asamtai jakatnuitji. Tura asamtai iwiaaku pujakrish, nuniasha jaakrish tuke ii Apuri Cristonuitji. ⁹ Cristo ni umirin jakaru ainaun Apuri atas, tura ni umirin iwiaaku ainautin Apuri atas jarutramkami. Nunia ataksha tuke iwiaaku pujustas nantakmiayi. ¹⁰⁻¹¹ Yuse chichame tu aarmawaitai. Yus chichaak:

“Wikia nekas tuke iwiaaku pujau asamtai, mash aints ainauka wina tikishmatrurar: Ameketme Yusem turutiartinuitai,” tawai.✠
Tu aarmau asamtai, Yuse kintari jeamtai, Yus pujamunam naka wajasakrinkia, mash aints ainautinka Yus ii takatrincha, tura ii nintimaurincha itiur ainawa tusa nekaantikramatnuitji.

Tura asamtai ¿waruka Cristonu ainau pachimesha: Nuka mianchawaitai tame? Tura chikich Cristonu ainau pachimesha ¿waruka nakitajai tame? ¹² Tura asamtai Yus iin ininmakrin, ii turamu pachisar kichik kichik iik ujaktinuitji.✠

Cristonu ainau tunau wajasai tusaram wainkataram

¹³ Tura asar chikich ainaun pachisar: ¿Waruka ainawa? tuuka nintimtunitsuk pujusarmi. Antsu Cristonu ainau tunau wajasarai tusa, tura Cristo nemartan inaisarai tusa tupin nintimratnuitji. ¹⁴ Ii Apuri Jesús wina nekantikruau asamtai, Yus najanamuka paseeka atsawai tusan nekajai. Antsu aints: Nu yutan yuwinauka tunau turinawai, tu nintimias pujayat, nu yutancha yuwakka nekas tunau nintimias yuwawai. ¹⁵ Tura atumi yutairi pachitsuk yuwau asakrumin, Cristo nemarin nuna wainak, tunau nintimias pujamtaikia, nu aints tunau nintimtikrau asaram, nu aintska aneetsuk pujarme. Antsu Cristo nu aintsun aneau asa, niincha uwentikratas jakamiayi. Tura asamtai atumi yutairi pachitsuk yuwakrumka, chikich aints Criston umirtan inaisai tusaram wainkataram. ¹⁶ Tura asaram atumka: Wi turaja nuka pengkeraitai tarumning, chikich ainau atumi turamurin pachisar paseetai turutiarai tusaram inaisataram. ¹⁷ Yuse aintsri ainautikia ¿warí yuta nekas pengkeraita, tura warí umutiya nekas pengkeraita? tuuka nintimtsuji.

✠ 14:6 (Col. 2.16) ✠ 14:10-11 (Isa. 45.23) ✠ 14:12 (2.Cor. 5.10)

Antsu Yuse Wakani ii nintin engkemturmau asamtai, Yusnum pujustasar tunau nintimsuk Yus wakera nunisrik angka pengker nintimsar pujustin asar tuke warastinuitji.

¹⁸ Criston tu umirkar pujuinauka Yushasha tura aints ainauncha pengker nintimtinawai.

¹⁹ Tura asamtai chikich aints ainaujai kajernaitsuk angka aneensisar pujusarmi tusar, tura Cristo miatrusrik umirkarmi tusar pengker nintimtunisar pujusarmi. ²⁰ Yus ii yutairincha pachis: Pengkeraitai tau wainiat, Cristonu ainau: Nu yutaka paseetai tamatika, atumka nu yutai pachitsuk yuwau asaram, nu aintska tunau nintimtikratnuitrume. Tura asamtai Cristonu ainau Yusen umirtan inaisarai tusaram, atumi yutairi pachitskeka yuwairap. ²¹ Iikia kuntu namangkesha pachitsuk yuwau asakrin, tura ii umutirisha pachitsuk umau asakrin, Cristonu ainau tunau nintimsar pujuinamtaikia, tura Criston miatrusar umirtsuk pujuinamtaikia, kuntu namangkengka yuwastinuitji, tura ii umutirisha umurchatnuitji. Tura Cristonu ainau tunau nintimrarai tusar, tura Criston umirtan inaisarai tusar, ii wakeramuringkia najanashtinuitji. ²² Yus ii yutairin mash aa nuna najanau asamtai, mash yuwamawaitji tu nintimsaram pujakrumka, tuke inaitsuk tu nintimsaram pujustaram. Atumka Yus nintimtakrum, mash aa nu turakrumka, Yuska waramtiksatnuitrume. ²³ Antsu nu yuta yuwaknaka tunau wajaschatjash tu nintimsaram yuwakrumka tunau wajarme. Tura asamtai waring achat mash pachisrum: Nunaka turastinuitjai, tu nintimsaram pujayatrum, nu turakrumka tunau wajarme.

15

Atumi wakeramuri najantsuk, chikich ainausha pengker awajsataram

¹ Nunasha tajarme: Aints Cristonu ainayat mianchau wajainauka iijai metek nintimsuk pujuinau wainiatristo miatrusrik umirkautikia nu aints tunau nintimsarai tusar yaingtinuitji. Tura ii wakeramuringkia turastinuitji. ²⁻³ Cristoka ni wakeramurinka turachmiayi. Antsu Yuse chichame niin pachis aarmaunka mash umikmiayi. Nu aarmauka nuwaitai: “Amin kajertaminak pasé chichartamkartas wakermia nuka wina turutinak tiarmiayi,” timiayi. Tu aarmau asamtai chikich aints ainau Criston miatrusarang umirkarat tusar, ii wakeramuringkia najantsuk chikich ainau pengker awajsatnuitji. ⁴ Yaanchuik Yus ni chichamen etserin ainaun aamtikramia nuka iin nuitamratas aamtikramramiayi. Tura asa: Wait wajakrumsha napchauka nintimsuk antsu pengker nintimsaram pujustaram tusa Yus nintimtikramji. Tura asamtai iinu Apuri tatintri nakakur warastinuitji. ⁵⁻⁶ Yuska ii Apuri Jesucristo Apaachirintai. Tura asamtai mash metek nintimsaram ii Apuri maaketai titaram. Yus: Wina miatrusrumek umirtuktaram, tura pengker nintimsaram pujustaram tusa iin nintimtikramji. Tura asamtai Cristo Jesús pujumia nunisrumek, mash metek pengker nintimtunisrum pujustaram tusa wakerawai. Yus tu pujustaram tusa atumin yainmakarti.

Uwemratin chicham judíocho ainamunam etserkamuri

⁷ Cristo Yusen pengker awajsatas iincha pengker awajtamsamijai. Tura asamtai atumsha nunisrumek chikich ainaujai pengker awajnaisataram. ⁸ Nunasha tajarme: Iinu yaanchuik juuntri ainaun Yus: Wi nunaka turatatjai tinu asa, ni timia nunaka mash umiktas, tura judío ainautin nuna nekamtikramatas, ni Uchirin Criston judío ainautin yaingti tusa akupturmakmijai. ⁹ Tura nukap arus judíocho ainaun wait anentau asa nusha nunisarang: Yus juuntaitai tiarat tusa Cristo tamiayi. Judíocho ainaun pachis Yuse chichame tu aarmawaitai:

Cristo ni Apaachirin chicharak: “Tura asan mash nungkanmaya ainau iruntramunam amin: Ameketme juuntam titatjame. Tura amin naarmin pachisan kantan kantamruatjame,” timiayi.✠

¹⁰ Tura chikich aarmausha nuwaitai:

“Mash nungkanmaya ainautiram, Yuse aintsri ainaujai iruntram warastaram.”✠

¹¹ Tura chikich aarmausha nuwaitai:

✠ 15:9 (Sal. 18.49) ✠ 15:10 (Deut. 32.43)

“¡Mash nungkanmaya aints ainautiram ii Apuringkia: Ameketme juuntam titaram!”[☆]

¹² Tura Isaías Jesúsan pachis tu aarmiayi:

“Davidta apari Isaí naartinu weari kichik wantinkatnuitai. Nuka mash nungkanmaya apuri atinuitai. Tura mash nungkanmaya ainaun uwentikratin asamtai niin pachisar: Nekasampi iin uwentikramratatji tiartinuitai.” Tu aarmawaitai.[☆]

¹³ Tura Yus iin uwentikramratin asamtai, nu nakaji tusaram, nekasampita tinu asakrumin, Yus atumin nukap waramtikramsarti. Tura angka pengker nintimsaram pujustaram tusa nintimtikramrarti. Tura nekasnapi Yusnum pujustatja titaram tusa, Yuse Wakani ni kakarmarijai atumin pengker nintimtikramrarti tusan tajarme.

¹⁴ Yatsur ainautiram umaarutirmesha, atumi nintijai pengker nintimtunisrum pujarme, tura Yus atumin ni nekamtairin suramsau asamtai, atumsha Yuse chichame tu umirkataram tusaram, mai nuwamtak chicharnaikiatnusha nekarme, wikia tu nintimsan pujajai. ¹⁵ Turayatun atum kajinmakiram tusan, atumin nintimtikratan nekasn paan aarmajai. Yus wína chichamur etserkata tusa, akuptuku asamtai nunaka aatjarme.

¹⁶ Jesucristo judíochu ainamunam wína chichamur paan etserkata tusa akuptuku asamtai, tura Yuse Wakani nintirun engkemturau asamtai: Yus pengker awajsaram nekasrum ninu atinuitrume tusan, Yus nu chichaman judíochu ainaun nekamtikiatas wakerau asamtai, wikia Yusnum uwemratin chichaman ujayajai.

¹⁷ Tura Cristo Jesúsnu asan, wikia pengker nintimsan: Yuse wakeramurin najanau asan, ni takatrin miatrusnak takau ayajai timinuitjai. ¹⁸⁻¹⁹ Tura wiki nintimsanka nunaka tatsujrume. Wikia Yuse chichamen etserkun, Yuse Wakani wína kakamtikruru asamtai, aints wainchatai takatnasha turinuyajai. Tura Jerusalénnumian nangkaman, Yuse chichamen etserkin weakun, Iliria nungkanmasha jean, judíochu ainau Criston umirkarat tusan, tuke inaitsuk uwemratin chichaman Cristo pachisan etsernuyajai.

²⁰⁻²¹ Yuse chichame tu aarmawaitai:

“Yuse chichamen pengké antukcharu ainau nekaawartinuitai. Tura pengké antukcharu ainau nu chichamnaka tu awai tusar nintimrartinuitai.”[☆]

Nu aarmawa nunisnak wikia chikich aints Cristo chichamen yaanchuik etserkarmia nuningkia etsertan nakitnuyajai, antsu Cristo chichamen antukcharu ainamunam uwemratin chichaman tuke etserkatasan wakerinuyajai.

Pablo Romanam wetas nintimramuri

²² Tura asamtai atumin irastasan nukap wakerayatun winitatkaman tujinnuyajai.[☆]

²³ Tura yamaikia Yuse takatrin juningkia mash umisu asan, tura untsuri musach atumin irastasan wakerau asan, ²⁴ yamaikia Españanam wetasan wakerakun, atumniasha jiistan wakerajrume. Tura atumin jeanka, jumchik atumjai wararnaisarmi tusan wakerajrume. Nunia weta tusaram winaka yainkamnawaitrume. ²⁵⁻²⁶ Macedonia nungkanmaya ainau tura Acaya nungkanmaya ainausha Jerusalénnum Cristonu ainau yuuminak pujuinaun yaingkiartas kuik akuptuktai tinau asaramtai, yamaikia Cristonu ainau Jerusalénnum pujuinaun ni yuumamurin susartasan weajai.[☆] ²⁷ Ningki nintimsar kuikian akupkartas wakeriarmiayi. Jerusalénnumia Cristonu ainau yaanchuik judíochu ainamunam Cristo chichame etsernun akupkarmia nutiksarang yamaikia judíochu ainausha Jerusalénnumia Cristonu ainau yuumamurinha susartinuitai. Nuka nekas pengkeraitai.[☆] ²⁸ Tura asamtai wikia Jerusalénnum jeanka, tura nuni pujuinaun kuikian mash susanka, nunia jiinkin, nu wekaamurnasha umisan, nuniangka Españanam wetasan, atumniasha jiiatjarme. ²⁹ Cristo wína akuptuku asamtai, atumin jeanka nukap kakamtikratatjarme tusan nekajai.

³⁰ Yatsur ainautiram umaarutirmesha, ii Apuri Jesucristonu asakrumin, tura Yuse Wakani: Aneenisrum pujustaram tusa, iin yainmaktin asamtai, tuke inaitsuk winasha Yusjai yainkataram. Tura wína pachittsaram Yus nukap seatritaram tajarme. ³¹ Tura

☆ 15:11 (Sal. 117.1) ☆ 15:12 (Isa. 11.10) ☆ 15:20-21 (Isa. 52.15) ☆ 15:22 (Rom. 1.13) ☆ 15:25-26 (1.Cor. 16.1-4; 2.Cor. 8.1-5) ☆ 15:27 (1.Cor. 9.11)

Yus seakrum: Judea nungkanam wekaaksha, Cristo umirkacharu ainamunam Yus uwemtikrati tusaram seatritaram. Tura Jerusalénnumia Cristonu ainau yuuminak pujuinausha kuikian pengker nintimsar jukiarat tusaram Yus seataram. ³² Nunia Yus wakeramtaikia, wisha atumin jean, atumjai iruntran warasan jumchik ayamsatnuitjai. Nu pachisrum Yus seatritaram. ³³ Yus angka pengker pujustinasha sukartin aa nuka atumjai mash pujusti tajarme. Nuke ati.

16

Pablo aints ainaun chichaman akuptukmauri

¹⁻² Ju papin aaran umisan, ii umaji Febe naartinun atumin akuptajrume. Juka Cencrea yaktanmaya ainaun untsuri yain ayayi. Tura wisha nu yaktanam pujamtai, winasha yainuyayi. Tura asamtai Cristonu ainaun tuke yaininawa nunisrumek ii Apuri naarijai ii umaji pengker yaingtaram, tura ni yuumamurisha mash susataram tajarme.

³ Tura umaar Priscilan, tura aishrin Aquilancha chichaman akuptajai. Nuka Cristo Jesúsnu asar, wijai miatrusarang takau ainawai. ⁴ Yaanchuik wína mantuwartas wakerutinamtai, nuka wína surimrukarmiayi. Tura asaramtai wisha niincha maaketaj tai. Antsu wikikia nunaka tatsujai, antsu judíochu Cristonu ainausha mash nunisarang tinawai. ⁵ Tura ni jeen Cristo chichamen antukartas iruntrarur ainautirmincha mash chichaman akuptajrume. Wína aneetir Epeneton chichaman akuptajai. Wi Asia nungkanam Cristo chichamen etsermatai, nuka nuwá eemak Criston umirkamiayi. ⁶ Tura umaar Marínasha chichaman akuptajai. Nuka atumin yainmaktas nukap takakmasmiayi. ⁷ Tura wína wear ainaun Andrónicon, tura Juniasnasha chichaman akuptinajai. Nuka wína nangkatar nuwá eemkar Criston umirin armiayi. Tura wijai tsaniasar kársernum engkemawarmiayi. Tura Cristo nuiniatiri ainaujai Cristo takatrin miatrusarang takakmasarmiayi.

⁸ Tura Ampliatoncha chichaman akuptajai. Nuka ii Apuri Cristonu asa wína aneetiritaitai. ⁹ Tura Urbanoncha chichaman akuptajai. Nuka wijai Cristo takatrin takakminuyayi. Tura wína aneetir Estaquisnasha chichaman akuptajai. ¹⁰ Tura Apelesnasha chichaman akuptajai. Nuka Criston miatrusang umirkawaitai. Tura Aristóbulo jeen pujuinauncha chichaman akuptinajai. ¹¹ Tura wína wearun Herodiónan chichaman akuptajai. Tura Cristo umirin Narciso naartinu jeen pujuinauncha chichaman akuptinajai. ¹² Tura umaarun Trifenan, tura umaarun Trifosancha chichaman akuptinajai. Nuka ii Apurin umirin asar Yuse takatrin takakminawai. Tura ii aneetiri umaji Pérsidan chichaman akuptajai. Nuka ii Apuri takatrin takaak wait wajamiayi. ¹³ Tura ii yachi Rufoncha chichaman akuptajai. Nuka ii Apurin miatrusang umirnuyayi. Tura ni nukur-incha chichaman akuptajai. Nuka wína nukurua tumawaitai. ¹⁴ Tura Asíncriton, tura Flegontencha, tura Hermesnasha, tura Patrobasnasha, tura Hermasnasha; tura Cristonu ainaun nijai iruntrar pujuinauncha chichaman akuptinajai. ¹⁵ Tura Filólogoncha, tura Juliancha, tura Nereoncha, tura ni umajincha, tura Olimpasnasha, tura Cristonu ainau nijai iruntrar pujuinauncha mash chichaman akuptinajai.

¹⁶ Cristonu ainautiram, mash pengker nintimtunisrum aneenisrum: ¿Pengkerak pujaram? titaram. Cristonu ju nungkanam iruntrar pujuinaka mash atumin: Pengker pujustaram tusar chichaman akupturminawai.

¹⁷⁻¹⁸ Yatsur ainautirmin umaarutirmincha, nunasha tajarme: Aints niish nintimsar Cristonu ainaun anangkinak: Kanakrum pujustaram tusar atumin pasé awajtaminamtaisha, nu aints ainau wainkataram. Ii atumin nuiniarmiaji nunaka nuininatsui. Tura ii Apuri Jesucristoncha umirinatsui. Antsu ni wakeramurinak najaninawai. Tura pengker chichainayat, papi nekachu ainaun anangkinawai. Tura asamtai nu aints ainau wainkaram, atumka nuwakai tusaram, tura kanakar pujusai tusaram, nu aints ainaujai iruntrairap. ¹⁹ Antsu atumka Cristo chichame tuke umirkau asakrumin, aints

✠ 16:3 (Hech. 18.2-3) ✠ 16:13 (Marc. 15.21)

ainau nunasha mash nekainau asaramtai, wikia atumin nintimtusan waraajai. Tura pengker aa nuka turataram, tura pasé aa nuka nintimtsuk asataram tusan wisha wakerajai. ²⁰ Iwianchi apuri Satanás wári nepetkataram tusa, Yus nekas angka pengker nintimratnun sukartin aa nuka atumin kakamtikramratatrume. Ii Apuri Jesús atumin yainmakarti tajarme.

²¹ Timoteo wijai Yuse takatrin takakmau asa, atumin chichaman akupturmarme. Wína wear ainau Lucio, tura Jasón, tura Sosípatersha atumin chichaman akupturminawai.

²² Ju papin aarja juka wiitjai Tercioitjai. Wisha ii Apuri naarin pachisan chichaman akuptajrume.

²³ Tura Gayo chichaman akupturmarme. Wikia nuna jeen pujajai. Tura Cristonu ainau Yuse chichamen antukartas ni jeen tuke kauninawai. Tura ju yakta kuikiari wainusha, Erasto naartin, tura ii yachi Cuarto atumnasha chichaman akupturminawai. ²⁴ Ii Apuri Jesucristo atumnasha mash yainmakarti. Nuke ati.

Inangnamu Yusen maaketai timiauri

²⁵ Yamaikia Yus maaketai tiarmi. Yus wína miatrusrumek umirtuktaram tusa, atumnasha kakamtikramratnuitrume. Yaanchuikia Jesucriston pachis uwemratin chichaman aints ainau pengké nekaachminun wainiat Yus wína nekamtikruau asamtai nu chichaman etsernuitjai. ²⁶ Yus tuke iwiaaku puja nuka yaanchuik ni chichamen etserin ainaun kichik kichik: Wína chichamur aatrurtaram tusa akupkamiayi. Tura mash nungkanmaya ainau nu chichaman antukar nintimrar umirkarat tusa, Yus nu chichamnaka paan nekamtikiamiayi.

²⁷ Yus ningki mash nekau asa, ni Uchirin Jesucriston akupturmaku asamtai, tuke inaitsuk: Yus pengker awajsarmi. Maaketai.

☆ 16:23 (Hech. 19.29; 2.Tim. 4.20)

Pablo Corintonam Pujuinaun Papin Eemak Akuptukmauri

Chicham akuptukmau

¹ Wiitjai Pabloitjai. Yus wakerau asa, Jesucristo: Wína chichamur etserin ata tusa eatkamiayi. Ii yachi Sóstenes wijai tsanias pujawai. ² Cristonu ainautirmin Corinto yaktanam pujuinautirmin ju papin aaran akuptajrume. Atum pengké tunaarinchau winar ataram tusa, Cristo Jesús atumin eatmakmiarume. Chikich chikich nungkanam pujuinauncha ii Apuri Jesucriston: Ameka wína Apuruitme tinaunka: Wína uchir aarti tusa Yuska eawai. ³ Ii Apaachiri Yus ii Apuri Jesucristojai atumin wait anentramak pengker awajtamsarti, tura angka pengker pujustinasha suramsarti tajarme.✠

Pablo Criston maaketai timiauri

⁴ Atum Cristo Jesúsnu asakrumin, Yus atumin wait anentramak pengker awajtamsau asamtai, wisha Yusen tuke maaketai tajai. ⁵ Atumka Cristonu asaram, ni pachisrum nekas chicham pengker chichastaram tusa, Yus ni nekamtairin atumnasha suramsamarume. ⁶ Tura Criston pachisar etserina nu antuku asaram nintimrume. ⁷ Tura ii Apuri Jesucristo tatin kinta nakau asaram, Yus atumin suramsa nuka yuumatsuk pujarme. ⁸ Tura atumi tunaarin sakaru asa, ii Apuri Jesucristo taatsaing, pengké tunaarinchau ataram tusa, atumin waitmaktinuitrume. ⁹ Yus: Wína Uchirjai tsaniasrum pujustaram tusa, atumin eatmaku asa, Ni tímia nunisang tuke mash umiktinuitai. Ni Uchiri Jesucristoka iinu Apurintai.

Kanakrum pujusairap timiauri

¹⁰ Yatsur ainautiram umaarutirmesha, ii Apuri Jesucristo naarin pachisan atumniaka tajarme: Mash iruntraram metek nintimraram pujustaram. Tura metekchau nintimsuk asataram. Antsu kichik nintiya nunisrumek chicham iwiararam, metek nintimtunisrum pujustaram. ¹¹ Yatsur ainautiram, Cloé jeen pujuinau atumin pachitmasar: Jiaani pujuinawai tinamun wisha antukmajai. ¹² Wi antukmaja nuka nuwaitai: Atumsha tu chichaarme: Chikich ainautiram wína pachitsaram: Wikia Pablo umirnitjai tarume. Tura kichtirmesha: Wikia aints Apolos naartinu umirnitjai tarume. Tura kichtirmesha: Wikia Pedro umirnitjai tarume. Tura kichtirmesha: Wikia Cristonak umirnitjai nuketjai tarume.✠ ¹³ ¿Waruka tuusha chichaarme? ¿Cristo untsuringkai? Atumin uwentikramrat tusarka, numi winangmanumka winaka mantuacharmiayi. Tura atumsha entsa maakrumsha, wína nemartustasrumka maichmiarume. ¹⁴⁻¹⁵ Wikia aya Crisponcha tura Gayoncha imaimiajai. Antsu kichnaka imaichmiajai. Tura atumka wína pachitsaram: Nu wína imiatin asamtai, wikia Pablo umirnitjai turutiarai tusan, aintsun untsurinka imaichu asan, pengker nintimsan pujajai.✠ ¹⁶ Maj, kichnasha Estéfanasa wearincha imaimiajai. Antsu chikich wi imaimunka aneaktsujai.✠ ¹⁷ Cristo wínaka: Aints imaita tusangka akuptukchamiayi. Antsu uwemratin chicham etserkata tusa, winaka akuptukmiayi. Chikich nekau ainau aya ningki nintimsar chichaina nunisnaka chichaatsjai. Antsu Cristo iin uwentikramratas numi winangmanum jarutramkamiaji, taja nuna aints ainau kajinmakiarai tusan nu chichamnaka etserjai.

Cristo Yuse kakarmarincha tura nekamtairincha nekamtikramamiaji

¹⁸ Cristo numi winangmanum jarutramkamiaji tusan, nu chichaman etserjai. Antsu mengkartin ainauka nuna antukar, nintimchau asar: Nangkami tawai tuweenawai. Antsu uwemratin ainautikia nu chicham nintimtakrikia, Yus ni kakarmarijai iin kakamtikramji tu nintimji.✠ ¹⁹ Yuse chichame etserin yaanchuik tu aarmiayi. Yus chichaak:

✠ 1:3 (Hech. 18.1) ✠ 1:12 (Hech. 18.24; 1.Cor. 3.4) ✠ 1:14-15 (Hech. 18.8;19.29) ✠ 1:16 (1.Cor. 16.15-16)
✠ 1:18 (Rom. 1.16)

“Junia ainau nekamtairinka mengkatkatatjai. Tura nangkamiar: Wikia nekau aintsuitjai, tinu ainau chichamencha mengkatkatatjai,” tu aarmawaitai.✠

²⁰ Tura asamtai nintimrarmi: ¿Nekau ainau nekamtairi nekakrikia uwemratnukitaj? Atsa. ¿Tura papi nekau ainau chichamen nintimtakrikia uwemratnukitaj? Atsa. ¿Tura junia chicharkartinu chichamen antukrikia uwemratnukitaj? Atsa. Junia aints ainau ningki nintimsar: Nekau aintsuitjai tinu wainiat Yuska: Nekas nintinchau ainawai tawai. ²¹ Tura junia aints ainau ni nekamtairijaingkia winasha nekaracharti tusa, Yus surimkamiayi. Antsu nu aints ainau ningki nintimsar Cristo chichame etserkamun pachisar: Nu chichamnaka nangkamiar etserinawai tuweenawai. Tu tinu wainiat, Yus ni chichame etserkamun antukar, nekasampita tinaunaka uwemtikratas wakerimiayi.

²² Judío ainau chichainak: Yuse kakarmarijai wainchatai takat wainkarkia: Nekasampita tichainjiash tinawai. Tura griego ainau chichainak: Iikia junia aints ainau nekaina nu nekataras wakeraji tinawai. ²³ Antsu iikia: Ii Apuri Cristo numi winangmanum jarutramkamiayi tusar, nu chichamka etserji. Judío ainau nuna antukar: Nuka natsanpiakuitai tuweenawai. Tura judíocho ainau nu chichamnasha antukar wishikinak: Nintinchau ainawai tuweenawai. ²⁴ Tura wainiat Yus judío ainauncha, tura judíocho ainauncha uwemtikratas eaku asamtai, Cristo Yuse kakarmarin tura ni nekamtairincha nekamtikramji. ²⁵ Junia aints ningki nintimsar wishikinak: Yus tímia nunaka nangkami timiayi tuweenawai. Antsu junia aints nekaina nuka mianchawaitai tusa Yuska nekawai. Yuse nekamtairi junia aintsu nekamtairin nangkamakuitai. Cristo numi winangmanum jakamtai, junia aints ainau: Yuse kakarmaringkia atsawai tinu wainiat, Yuse kakarmari junia aintsu kakarmarinka nangkakawaitai. ²⁶ Yatsur ainautiram, umaarutirmesha nintimrataram: Junia aints nekaina nunisrumka atumka nekatsrume. Tura atumsha apu naamkarmeka wajatsrume. Tura kuikiartinu uchirinuitrume. Untsuri tu pujuinauka atumjai iruninachu wainiat Yuska: Winar ataram tusa, atumniasha eatmakmiarume. ²⁷ Antsu junia nekau ainau Cristo umirkaru ainaun pachisar: Nu aintska nintinchau ainawai, tinu wainiat, Yuska nu nekau ainaun inatsaartas nekachu ainaun: Wína uchir ataram tusa eakmiayi. Tura kakaram ainau Cristo umirkaru ainaun pachisar: Nu aints ainauka kakaichu ainawai tinu wainiat, Yuska nu aints ainauncha inatsaartas, kakaichu ainaun: Wína uchir ataram tusa eakmiayi. ²⁸ Tura inati ainauncha, tura chikich ainau nakitin ainauncha, tura mianchau ainauncha: Wína uchir ataram tusa Yuska eakmiayi. Tura chikich aints nangkamiar: Wikia miajuitjai tinaunaka Yuska: Mianchawaitai tusa pachiat sui. ²⁹ Tura asamtai aints ningki nintimsar: Wikia miajuitjai, tura pengkeraitjai tinayat, Yusnaka tichamin ainawai. ³⁰ Antsu atumka Yuse uchiri asaram, Cristo Jesús nawaitrume. Tura Yus wakerau asamtai, Cristo Jesús Yuse nekamtairincha iin nekamtikramamiayi, tura ii tunaarinchau sakturmarmiaji, tura pengké tunaarinchau ataram tusa iinka kakamtikramramiaji, tura ii tunaarinchau akiimiatramak uwemtikramramiaji. ³¹ Tura asamtai Yuse chichame tu aarmawaitai: “Aints pengkeraitjai tumamtas wakerakka, nunaka tutsuk Criston ningki nekas pengkeraitai titinuitai.”✠

2

Cristoka krusnum jakamiayi timiauri

¹ Yatsur ainautirmin umaarutirmincha, wikia atumjai pujaknaka, Yuse chichamen nekas aa nuna atumin ujaakun, junia ainau nekamtairijaingkia Yuse chichamenka ujakchamijrume, antsu nu chichamnasha paan antukminun ujakmijrume. ² Tura wikia aya Jesucristonak pachisan atumjai chichastatjai tusan, tura Cristo numi winangmanum jarutramkamiayi tusan, nunak pachisan atumjai chichastatjai, tu nintimnuyajai. ³ Tura wína kakarmar atsau asamtai, Yuse wakeramuri miatrusnak umirkashtinuapitja tusan,

✠ 1:19 (Isa. 29.14) ✠ 1:31 (Jer. 9.23-24)

tura Yusen nekasan pengkerka awajsashtinuapitja, tu nintimsan nintirjai shamakun kurainuyajai.✠

⁴⁻⁵ Tura junia ainau nekamtairijaingkia atumin chicharkachmiajrume, antsu Yuse kakarmari nintimsaram Cristo nekasampita titaram tusan, wikia Yuse chichamenka ujayajrume. Yuse chichamen ujaaknaka, junia nungkanam nekamtaingkia nintim-rataram tutsuk, antsu Yuse Wakani kakarmarijai Yuse chichamen atumniaka ujayajrume.

Yus tu awai tusa ni Wakani iin nekamtikramji

⁶ Yuse chichame umirin ainautikia Yuse nekamtairi etserji. Tura Cristonu ainau nuna antukar: Nuka Yuse nekamtairintai tinawai, tura ii nekamtairi ju nungkanmaya nekamtairincha asa, junia apu nekamtairinchnuitai. Junia apu aintsun inau ainayat wári mengkakartin ainawai. ⁷ Antsu iikia chikich aints ainau nekashtai etserji. Yuska nungkan najantsaing, ukunam wina nekamtairun aints ainaun nekamtikiatnuitjai, tura tuke uwemtikratnuitjai tusa, Yuska nintimramiayi. ⁸ Tura waininayat junia apu ainau nu nekatinka kichkisha nekainatsui. Antsu nuna nekawaruitkungka, ii Apuri ni kakarmarijai mash najanamia nunaka numi winangmanumka maacharminuyayi. ⁹ Tura Yuse chichame tu aarmawaitai:

“Aints kichkisha wainkachmin aa nuna Yusen aneena nuka wainkarti tusa Yus umismawaitai. Tura aints kichkisha antukchamnau aa nunaka Yusen aneena nuka antukarti tusa Yus umismawaitai. Tura aints chikichkisha nintimrachim aa nunaka Yusen aneena nuka nintimrarti tusa Yus umismawaitai,” tu aarmawaitai.✠

¹⁰ Tura Yuska ni Wakanin akupturmak, ni nintimaurincha nekamtikramamiaji. Ni Wakani mash nekau asa, chikich aints ainau pengké nekaachminun wainiat, mash paan nekaawarti tusa iincha nekamtikramamiaji.

¹¹ Nintimrarmi: ¿Yáki chikich aintsu nintimaurincha nekamnawai? Chikich aintsu nintimauringkia pengké nekaachminuitai. Antsu iik nintimsarik ii nintimauri nekaamnawaitji. ¿Tura yáki Yuse nintimaurincha nekamnawai? Aints kichkisha Yuse nintimaurinka pengké nekaachminuitai. Antsu Yuse Wakani nuke Yuse nintimaurinka nekawai. ¹² Tura Yus ju nungkanmaya nekamtainka iinka nekamtikramachmiaji. Antsu ni nekamtairinka mash iin nekamtikramatas, ni Wakanin nekas pengker aa nuna ii nintin engketramamiaji. ¹³ Tura Yuse chichamen pachisar chichaakrikia, ju nungkanmaya nekau ainau nuikiartina nunisrikia iikia chichaatsji. Antsu Yuse Wakani iin nuitamrau asantai, nu chichamka Yusen nintimina nuke ujaaji.

¹⁴ Antsu Yusen umirchau ainau Yuse nekamtairinka ni Wakani sukarta nunaka juwinatsui. Nu nekamtainka nekaawartatkamawar yuumatinau asar, ningki nintimsar Yuse nemarkin ainaun pachisar nintinchawa nunisarang chichainawai tinawai. ¹⁵ Tura Yuse Wakani aintsu nintin engkemtuumuka Yus niin nekamtikiatas wakera nunaka mash nekamtikiatnuitai. Antsu junia aints ainau Yuse aintsri nintimaurinka pengké nekaachartinuitai. ¹⁶ Tura Yuse chichame tu aarmawaitai: “¿Yaachia Yuse nintimaurincha nekaamnawaita? ¿Tura yaachia Yusnasha nuiniarminuita?” Tu aarmawaitai. Tura wainiatrik Cristonu ainautikia Cristo nintimia nunisrik iisha nintimji.✠

3

Cristo chichame etserin mash Cristo inatiri ainawai

¹ Yatsur ainautiram umaarutirmesha, wikia atumjai pujaknaka Yuse Wakani piatkamu ainaun chicharja nunisnak atumniasha chicharkatatkaman tujinkamiajrume. Antsu atumka kuwirchia nunisrume nintimu asakrumin, ju nungkanam aa nuna nintiminaun chicharja nunisnak atumniaka chicharnuyajrume. ² Uchi kuwirach aya muntsunak muntsuwitai. Atumin chicham yumtichu antukminun ujayajrume nuka muntsua tumawaitai. Antsu chicham yumtin aa nuka kuntu namangkea tumawaitai. Nu

✠ 2:3 (Hech. 18.9-10) ✠ 2:9 (Isa. 64.4) ✠ 2:16 (Isa. 40.13; Rom. 11.34)

chichamnaka atumniaka ujakchamiajrume. Tura nu chichamsha yumtin asamtai, nintimratkamaram yamaisha tuke tujintarme. ³ Tura asaram chikich ainau suwirpiaku jiiisrum pujarme. Tura jiyani pujau asaram atumi wakeramuri nintimsaram pujarme. Tura ju nungkanmaya ainau nintimina nunisrumek tura pujuina nunisrumek atumsha tuke pujarme. ⁴ Tura asaram chikich ainautiram: Wikia Pablon umirnitjai, tura chikich ainautirmesha: Wikia Apolosan umirnitjai tarume. Tu chichaakrumka ju nungkanmaya ainau chichaina nunisrumek chichaawearme. ⁵

⁵ ¿Waruka tuusha chichaawearme? ¿Wikia warí aintsuitja tura Apoloscha warí aintsuita? Iikia Yuse inatirinji nuketji. Ii Apuri ii takatrin tu ati tusa, iin suramsamiaji nuke takakminuyaji. Tura iikia atumin Cristo chichame etserkau asakrin, atumsha: Cristoka nekasampita timiarume. ⁶ Wikia arakan arakminua nunisnak nuná eemkan Cristo chichamen etsernuyajai. Yumi jitachmatai aints árak araamu kajingkai tusa, yumijai ukatua nunisang Apolos Yuse chichamen kajinmakiarai tusa atumniaka nuitamramiarume. Antsu arakan tsapamtiknua nunisang ni chichamen atumin nintimtikramratnuka Yusketai. ⁷ Aints arakan araksha ningkikia tsapamtikiachminuitai. Tura yumijai ukatua nuka arakan ningkikia tsamamtikrachminuitai. Antsu arakan tsamamtiknua nuka Yusketai. ⁸ Aints arakan araawa nuka Yuse chichame nu nangkamtaik etserua nunisketai. Tura kitcha árak kajingkai tusa, yumin ukatua nuka Yuse chichamen ukunam nuiniawa nunisketai. Mai metek Yuse takatrin takakmasaru asar, ukunam Yusnum jearantai, Yuska niin pengker awajartinuitai. ⁹ Yus: Tu takakmastaram tinu asamtai, iikia ni takatringkia ni kakarmarijai takaaji. Tura Yus atumi nintin takasu asamtai, atumka Yuse ajaria nunisketrume. Tura Yuse jee jeamkamua nunisketrume. ¹⁰ Tura Yus: Wina chichamur tu etserkata tusa wina akuptuku asamtai, jea jeamin pengker nekawa nunisnak wikia: Criston nekasampita titaram tusan, nu nangkamtaik atumin Yuse chichamenka ujayajrume. Tura chikich ainau: Yuse chichame pengker umirkarat tusar atumin nuitaminawai. Tura kichik kichik nuikiartin: ¿Itiurkanak nekas pengkeran Yuse chichamencha nuiniaraintaj? tu nintimrartinuitai. ¹¹ Jean jeamin kayan jeamkartas nuná eemkar nungkan tainiar kaya juuntan wewe amij tusar jintinawai. Jesucristo nu kaya nunisang asa iin uwemtikramratnuka nuketai. ¹² Nunasha tajarme: Jean jeamin ainau jean jeaminak nekasar wári mamurchamnun jeamkartas wakerinakka kurijai, tura kuikijai, tura kaya shiirmajai jean jeaminawai. Nuniasha numijai, tura nukajai, tura paatjai jean jeaminawai. Yuse takatrin takakmin ainausha niish niish pengkernasha tura mianchaunasha takakmincha ainawai. ¹³ Chikich chikich aintsu takatri nekas pengkerashi tusa, Cristo nekaatas taamtai, paan wainkartinuitai. Nu kinta jeamtai, chikich chikich aintsu takatri itiurak awa tusa Yuska jiiistinuitai. ¹⁴ Aints Criston nintimias jea kaparchamniaun jeamua nunisang Yuse takatrin nekas pengker takau asamtai nuna takatringkia mengkakashtinuitai. Tura ukunam Yusnum jeamtai, nu aintsnaka Yus pengker awajartinuitai. ¹⁵ Tura aintsu jee numijai, tura nukajai, tura paatjai jeamkam nintimrarmi: Jijai keemamka nu jeaka keawai. Turamtaikia nu aintsu takatringkia mash mengkawai. Yuse umirin ainausha nunisarang Yuse takatrin mianchau takau asaramtai, Jesucristo taamtai, ni takatri mash jijai keemamua nunisarang mengkakartinuitai. Tura nu aintska mengkakashtinuitai, antsu jea keamtai, misu jiiinua nunisang uwemratnuitai.

¹⁶ Nusha nintimrataram: Yuse Wakani atumi nintin engkemturmau asamtai, atumka Yus seatai juun jea nunisketrume. ¿Nuka nintimtsurmek? ¹⁷ Aints Yuse jeen mesramtaikia, Yuscha nu aintsnaka mengkaaktinuitai. Atumka Yuse jea tumau asakrumin, Yus nunaka turawai. ¹⁸

¹⁸ Tura asamtai junia aints ainau nekaina nujaingkia metekaitjai, tuuka nintimtumasairap. Antsu Yuse nekamtairi nekaatasrumka, ju nungkanmaya ainau nekamtairingkia

☆ 3:2 (Hebr. 5.12-14) ☆ 3:4 (1.Cor. 1.12) ☆ 3:7 (Hech. 18.4-8;24-28) ☆ 3:16 (1.Cor. 6.19; 2.Cor. 6.16; Efes. 2.22) ☆ 3:17 (Rom. 8.11)

nintimsuk asataram. ¹⁹ Yus ju nungkanmaya nekau ainaun pachis: Nuka nintimchawaitai tawai. Tura asamtai Yuse chichamesha tu aarmawaitai:

“Aints ningki nintimsar: Wikia nekau aintsuitjai, tura Yuska atsawai tinamka, Yuska nu aintsnaka ejatkajai achiawa nunisang achiawai.”

²⁰ Ataksha tu aarmawaitai:

“Aints ainau ningki nintimsar: Wikia nekau aintsuitjai, tinau wainiat ii Apuri nu aintsnaka pachis: Nangkami tawai tusa nekawai.”[✠]

²¹ Tura asamtai aints nuikiartiniun pachis: Nuka chikich nuikiartin ainaun nangkakawaitai pengké tichamnawaitai. Yuse chichamen nuikiartin ainautin mash metek Yus akupkamuitji. ²² Wisha, tura Yuse chichame etserin Apoloscha, tura Pedroscha atumin yainmakarat tusar akupkamuitji. Tura ju nungkanam aa nunasha mash Yus atumnau ati tusa najanawaitai. Iwiaaku pujakrishna, tura jakarsha tuke Cristonuitji. Yamai ainia nunasha, tura ukunam atinua nunasha Cristoka mash atumnau ati tusa najanawaitai. ²³ Atumsha Cristonuitrume. Tura Cristosha Yusnawaitai.

4

Cristo inatiri ainau takatri pachis etserkamuri

¹ Atumka iin pachikratsaram: Nuka Cristo inatiri asar, tura Yus akupkamu asar, chikich ainau nekaachminun wainiat, Yuse chichamen iin nekamtikraminaji, tu nintimratnuitrume. ² Tura asamtai aints ni inatirin: Jear waitrukta tusa ukukmiau asa, nu aintska jeeniu chichamen miatrusang umirkatnuitai. Yuscha nunisang: Wina chichamur umirtuktaram tusa, akupkamu ainauka miatrusarang umirkartinuitai. ³ Atumka wina pachitsaram: Nekas Yuse chichamen pengker etsertsuash turutrumin wainiatnak wikia nunaka pachiatjsai. Tura Yusen nintimtichu ainausha wina pachitsar: Yuse chichamen nekas pengker etsertsuash turutinau wainiatnak nunaka pachiatjsai. Antsu wiki nintimsanak: Nekasan Yuse chichamen pengker etsernuitjai tumamtsujai. ⁴ Tura wina tunaarusha awash tusanka nekatsjai. Antsu wiki nintimsanak: Tunau turachmiajai tumammataisha, nunasha ii Apuri nuke nekawai. Ningki: Aminu tunaarumka atsawai turutinuitai.[✠] ⁵ Tura asamtai ii Apuri taatsaing, chikich ainau pachisrum: Nu aintska ni takatrinka tenapka takaatsui tutsuk asataram. Antsu nintinam ukusmau aa nuna chikich aints nekaachminun wainiat, ii Apuri taa paan nekamtikramatnuitji. Tura ame tu pujusmiame tusa, ni umikchamurinka paan nekamtikiatnuitai. Antsu pengker takau ainaun kichik kichik: Atumi takatri pengker takakmasurme ningki titinuitai.

⁶ Yatsur ainautiram, anturtuktaram: Wikia Apolosan pachisan, tura wiki nintimtumasan nunaka takun tajai tusan, atumsha nuimiartaram tusan nunaka tajarme. Yuse chichame aarmawa nuna nangkamasrumek etserkairap. Tura chikich aints pachisrum: Nuka Yuse takatrin timiá pengker takaawai, tura chikich aints pachisrum: Nuka Yuse takatrin tenapka takaatsui tutsuk asataram. ⁷ ¿Yaachia atumin chikich aints ainaun nangkamasang timiá pengkeraitai turamua? Nuka pengké nekaachminuitai. ¿Yuse chichamen yaachia atumin nekamtikramama? Atumin nekamtikramama nuka Yusketai. Tura atumin mash nekamtikramau asamtai ¿waruka wiki mash nekawaitjai tuusha nintimrume?

⁸ Atumek nintimsarmek: Yus iin nekamtikramatas wakera nusha iikia mash nekaji ¿nangkamrum tatsurmeash? Tura iincha Yus suramsatas wakera nusha yaanchuik mash jukinuitji ¿nangkamrum tatsurmeash? Tura iincha pachikratsaram: Nekas mianchawaitai tayatrum atumek: Iikia apua nunisrik pujau asar, chikich ainauka yuumatsji ¿nangkamrum tatsurmeash? Antsu apua nunisrumek pujakrumningkia, iisha atumjai iruntrar apua nunisrik pujusminuitji. ⁹ Wiki nintimsanak: Cristo chichame etserin ainautinka Yus: Uku wajastaram tusa iinka akuptamkamiaji tajai. Turamtai aints ainau Cristo chichame etserin ainautin maatai turaminaji. Turamin asaramtai, Yuse awemamuri ainausha tura mash nungkanmaya ainausha jiiisarti tusa Yus akupkamuitji,

[✠] 3:20 (Sal. 94.11) [✠] 4:4 (1.Juan 1.8-10;3.19-21)

wikia tajai. ¹⁰ Iikia atumjai metekka ainatsji. Iikia Cristonu asakrin: Nintinchau ainawai turaminaji. Antsu atumek nintimsaram: Cristo iin nekamtikramatas wakera nusha mash nekaji tatsurmeash. Iikia kakarmachuitji. Antsu atumek nintimsaram: Iikia kakarmaitji tatsurmeash. Atumin pachitmasar pengkeraitrume turaminawai. Antsu iin pachitmasar paseetrume turaminaji. ¹¹ Iikia Cristo chichame etserin asar, yamaisha tsukajai, tura kitakjai tuke wait wajaji, tura mamuaji. Tura tuke waitkarminaji. Tura jeenchawaitji. ¹² Ii yuumamuri sumarmaktasar ii uwejejai nukap takakmakur pimpiaji. Tura iin kajertaminamtaisha: Yus yainmakti tuweaji. Tura iin kajertaminausha pajakrishha ayaatsji. ¹³ Iin pachitmasar napchau chichartaminamtaisha, iikia napchauka chichartsuk yaitasar chicharuweaji. Yamaikia tuke ju nungkanmaya ainau iincha nakitraminak tsauka nunisarang iin japramawartas wakerutminaji.

¹⁴ Atumin inatsaartaj tusanka nunaka aatsujrume. Antsu wina aneetir uchirua nunisrumek asakrumin, atumin chicharkatasan nunasha aatjarme. ¹⁵ Aints timia untsuri atumin Cristo chichamen nuitaminak pujuinayat, atumi aparingkia untsuringkia ainatsui. Antsu wiyá eemkan atumin Cristo Jesúsnum uwemratin chichaman etserkau asan, nekasan atumi aparía nunisnak ajai. ¹⁶ Tura asan wait aneasrum, wiya nunisrumek Yus umirkataram tajarme. [☆]

¹⁷ Tura asan Timoteon akuptajrume. Nuka wina aneetir uchirua tumawaitai. Nuka iinu Apuri chichame nekas pengker umirnuitali. Tura wi Cristo Jesúsnum umirja nunaka mash kajinmakiram tusa atumin nintimtikramratatrume. Tura wi Cristonu ainaun chikich chikich yaktanam nuininuyaja nunisang atumin nuitamratatrume. ¹⁸ Tura atumjai pujuinauka miajuitjai tumamsar wina pachitsar: Iin shamramau asa tachatnuitai tinawai. ¹⁹ Tu tinau wainiatnak Yus wakeramtaikia, wari atumin irastasan wakerajai. Tura miajuitjai tuweena nuna chichamen nekaatasanaka winishtatjai. Antsu nekasarash Yuse kakarmarijai Cristo takatrin takakmina tusan, nuna nekaatasan winitatjai. ²⁰ Yus aints ainaun inartinun pachiska nangkamniaka chichaschamnawaitai. Antsu Yuse kakarmarijai ni chichamen etserinawash tusa nekaamnawaitai. ²¹ ¿Atumsha itiurtukat tusarimea wakerutarme? ¿Awaturat tusarmek wakerutaram? ¿Turachkurmesha wait anentrurat tusarmek, tura yaitik aujtusat tusarmek winit tusaram wakerutaram? Atumek nintimrataram.

5

¿Cristo umirin pasé takauka itiurkatnuita?

¹ Aints atumin pujaun pachisar chichainak: Aints Cristonu ayat ni apari nuwarijai kanawai, tamaun antukmajai. Antsu Yusen nekachu ainausha nu tunaunaka pengké turinatsui. ² Antsu atumka nu aintsu turamuri nekayatrumsha, ¿waruka jampesrumsha pujarme? Nu aintsu tunaari nintimsaram wake mesekrum juutinuitrume. Nuna tura nuka atumniangka jiktinuitrume. ³ Wikia atumjai pujawaitkuncha: Warintinjak tusan, nu tunau tura nuna wait wajaktintri tuyapi atinuita tusan, ii Apuri Jesucristo naarin pachisan tajarme. ⁴ Atumka ii Apuri Jesucristo naari pachisrum iruntraram pujusrum: Itiurkatjik takurmin Yuse Wakani: Nuka turataram tusa nekamtikramatatrume. Wisha atumjai pujachiatnak, atumin nintimsan pujustatjai. ⁵ Nu tunau takaunaka iwianchi apuri Satanás ni namangken pasemantikrati tusaram tsangkatkataram. Tura asaram ii Apuri Jesús taamtai, nu aintska uwemrati tusaram turataram.

⁶ Atumka: Ii turamuka pengkeraitai tuwearme nuka napchawaitai. Atumka kichik aints tunau turati tusaram tsangkamkau asakrumin, chikich aints ainau nuna wainkar, mash tunaun wakerukartin ainawai. ¿Atumka nuka nekatsrumek? ⁷ Ii ainauti Pascua fiesta jeatsaing, uwija uchiri mainuyaji. Turarin wainiat Cristo uwijaya nunisang jarutramak, ii tunaarin akiimiatramkamiaji. Tura asamtai yamaikia ii ainauti pang mangkarat tusar, engkeamiaji nu ii jeenia mash japnuyaji nunisrumek atumi tunaari

☆ 4:12 (Hech. 18.3-6) ☆ 4:16 (1.Cor. 11.1; Fil. 3.17)

mash inaisaram ukukrum, nekasrum tunaarinchau wajastaram. Cristo atumi tunaarin japrutmau asamtai, yamaikia pang mangkarchawa nunisrumek arume. ⁸ Tura asamtai ii ainautikia Pascua fiesta inangkartai tusar, pang pachimtai mash japin armiajina nunisrik Cristo jakamuri nintimsar, ii tunaari mash inaisar, chicham nekas aa nu umirkar Pascua fiesta inangkaru armi. ⁸

⁹ Yaanchuikia atumin papin aatkun, Cristonu ainayat nuwan nuwatsuk tsanirmin ainajungkia, tura aintsun ninumtsuk tsanirmin ainajungkia tsaningkairap timiajrume. ¹⁰ Antsu Yusen nekachu ainajai tsaningkairap tatsujrume. Tura kuikian nukap wakerin ainajai, tura kasa ainajaisa, tura Yuschau waininayat: Ameka wina yusruitme, nangkamiar tinu ainajaisa tuke tsaningkairap tatsujrume. Nu aints ainajai tuke iruntsuk pujustasrum wakerakrumka, ju nungkanmaya tuke jiinkitnuitrume. ¹¹ Tura asaram aints mash ukuktaram tatsujrume. Antsu Cristonuitjai tinayat tsanirmin ainausha, tura kuikian nukap wakerin ainausha, tura Yuschau waininayat: Ameka wina yusruitme, nangkamiar tinu ainausha, tura pasé chicharnain ainausha, tura nampeu ainausha, tura kasa ainausha ukuktaram tajarme. Nu aints ainaun pachisan: Nujaungkia yuwairap.

¹²⁻¹³ Yusen nekachu ainau tunaarin pachisar: Ni wait wajaktintri tu ati tichatnuitji, antsu Yusek titinuitai. Antsu atumka aints: Yusnawaitjai tinayat, Yusen umirtsuk pujuinauka: Tunaarum inaisataram tusaram chicharkatnuitrume. Tura asamtai nu tunau takauka atumniangka jiiktaram tajarme.

6

¿Kajernaiyamu amataisha itiurkatnuita?

¹ Atumka Cristonu ayatrum kajernaiyakrum pujakrumka, ¿waruka junia apu ainau Yusen umirchau wainiatrumsha, chicham iwiarami tusarmesha jiarme? Chicham iwiarami tusaram, ¿waruka chikich aints Yusnau ainauka jiatsrume? ² Nintimrataram. Nungka amumati, ju nungkanmaya tunaarintin ainau wait wajaktintri tu ati tusar Yusnau ainautikia susatnuitji. ¿Atumka nuka nekatsrumek? Tura nu chicham mash nekaatin ayatrumsha ¿warukarmek chicham jumchik pasé aa nuka iwiarashtarme? ³ Iikia nayaimpinam jearkia, Yuse awemamuri ainaun inartinuitji. ¿Atumka nuka nekatsrumek? ¿Tura asaram ju nungkanam chicham jumchik aa nuka itiur iwiarashtarmek? ⁴ Cristonu ainamunam kajernaiyamu amataikia ¿Yusen umirchau ainau Cristonu ainautirmin yainminachusha waruka chicham iwiaratai tusarmesha jiarme? ⁵ ¿Atumka natsaamatsrumek? tusan tajarme. ¿Atumningkia Cristonu ainau chichaman iwiaraniauka kichkisha atsawak? ⁶ ¿Mai Cristonu ainautak kajernaikiamu iwiarami tusar pujuinamunam Yusen umirchau ainausha jiisartas weena nuka pengkerkai?

⁷ Atumka Cristonuitiatrum mai nuwamtak kajernaiyakrum pujakrumka, Cristo umirchau ainau chichaman iwiararti tusaram jiarme nuka paseetai. Atumin waitkarminamtaisha ¿waruka tsangkurtsurme? Tura atumnau aa nuna kasartaminamtaisha, ¿waruka nangkami sakarti tusaram inaiyatsrume? Nu turakrumka nekas pengker turarme. ⁸ Antsu atumka Cristonu ainajai pasé awajnaiyarme. Tura atumi yachijai kasarnain arume.

⁹ Yus aints ainautin inatmartata nuna pujutirin Yusen umirchau ainauka pujuschartinuitai. ¿Atumka nuka nekatsrumek? Atumkeka anangmamawairap. Pachitsuk tsanirmin ainausha, tura Yuschau waininayat: Ameka yusetme, nangkamiar tinu ainausha, tura mai aishmangtak tsanirmin ainausha, ¹⁰ tura kasa ainausha, tura kuikian nukap wakerin ainausha, tura nampeu ainausha, tura tsanumin ainausha, tura anangmin ainausha Yus aints ainaun inartata nuna pujutirin pengké jechartinuitai. ¹¹ Atumniangka jumchik aints tu puju armiaiyi. Antsu yamaikia Yus atumi tunaarin

✠ 5:7 (Gál. 5.9) ✠ 5:8 (Ex. 12.5-15; Lev. 23.5)

javitramramiarume. Tura pengké tunaarinchau ataram tusa, ii Apuri Jesucristo atumi tunaarin mash sakturmarmiarume. Nunia Yus ni Wakanin atumin suramsamiarume.

Ii namangke Yusnawaitai

¹² Chikich aints ainau chichainak: Wi wakeraja nunaka waring achat mash pachitsuk turamnawaitjai tina nuka nekasar tinawai. Antsu ni wakerina nuna mash turinakka, Yusen nekasar pengkerka awajinatsui. Nekasar ni wakerina nunaka waring achat mash pachitsuk turawartinuitai. Tura mash pachitsuk turinauka nuniangka inaisatatkamawar pengké tujintinawai.[☆] ¹³ Chikich aints ainausha chichainak: Ii yutairi yuwakriki, wakenam engkemniayi. Yus yutai yuwataram tusa, iin waken najatramamiaji tina nuka nekasaintai. Tura ii yutairisha, tura ii wakesha mengkakin ainawai. Antsu tunau takastaram tusangka, ii Apuri Cristo ii namangkenka najatramachmiaji. Antsu winar ataram tusa, ii namangkenka najatramamiaji. ¹⁴ Tura Yus ii Apurin inankimia nunisang iincha ni kakarmarijai inantamkitnuitji.

¹⁵ Cristonu ainautiram nintimrataram: ¿Ii namangkengka Cristonuitai tusarmeka nekatsrumek? Tura asamtai ¿Cristonutiatu nuwa kungkatip nuwatkashtatiatur nujai tsaningminkai? Atsa, turachminuitji. ¹⁶ Yuse chichame tu aarmawaitai. Yus chichaak: “Aints nuwajai tsaning jimiaraitiat, kichik namangkea nunisketai,” timiayi.[☆] Tu aarmau asamtai aints nuwa kungkatpin nuwatkashtatiatur, nujai tsaningka kichik namangkea nunisang atinuitai. ¿Atumka nuka nekatsrumek? ¹⁷ Tura aints ni Apuri Cristojai tsaning puja nuka Yuse Wakani ni nintin engkemtuamu asa, Cristo Wakanijai kichik wakania nunisketai.

¹⁸ Tura asamtai nuwa nuwatsuk tsanirmatka tuke inaisataram. Chikich tunau ainaujai ii namangke pasemantikrashtinuitji. Antsu aints nuwajai tunau takauka ni namangken pasemantikui. ¹⁹ Yus ni Wakanin atumin suramsau asamtai, atumi namangke Yuse jeea nunisketai. Tura Yuse Wakani atumi nintin pujurtamu asamtai, atumi namangkengka atumnauchawaitai. ¿Atumka nuka nekatsrumek? ²⁰ Cristo atumi tunaarin akiimiatramkatas ni numpejai atumin sumarmaku asamtai, yamaikia atumi namangkengka Yusnawaitai. Tura Yusnau asamtai, yamaikia maaketai tusaram Yus pengker awajsataram.[☆]

7

Nuwa nuwatkatnun pachis chicharkamu

¹ Atum wina papi aatrakrum: Nuwa nuwatkatin chicham pachisrum inintsamarume. Nuna pachisan yamaikia titatjarme: Aints nuwan nakitak nuwatsuk pujaksha pengkeraitai. ² Turayat chikich nuwan takasai tusa, aints kichik nuwanak nuwatkati. Tura nuwasha nunisang kichik aintsnak ninumkati. ³ Ni nuwari asamtai, aints ni nuwarin pengker awajsatnuitai. Tura nuwasha nunisang ni aishrin pengker awajsatnuitai. ⁴ Nuwa namangkengka ninuchuitai, antsu ni aishrinuitai. Tura aishmangku namangkesha nunisang ninuchuitai, antsu ni nuwarinuitai. ⁵ Aints ni nuwarijai tsuutnaisuk tsaniasar pujusartinuitai. Antsu Yus nukap seatasar ¿warutam kintak iijai kanutskesha pujustaij? tu nintinauka mai nuwamtak metek nintimtunisar nunaka turuwartinuitai. Antsu aints ninu nuwarijai kanutsuk untsuri kinta pujamtaikia, iwianchi apuri Satanás: Chikich nuwanam tepeeta turuti tusa, ataksha ni nuwarijai kanurtinuitai.

⁶ Yatsur ainautiram, tuke atumi nuwarijai tumatsuk asataram tusanka nunaka tatsurume. Antsu atum wakerakrumka, nusha turunataram tusan tajarme. ⁷ Aints mash wijai metek nuwenschau arti tusan wakerajai. Antsu Yus mash aints ainaun metekka najanachmiayi. Tura asamtai chikich ainauka nuwan nuwatkatin ainawai. Antsu chikich ainauka nuwan nuwatkashtin ainawai.

⁸ Antsu nuwartichu ainautirmin, tura waje ainautirmincha chicharkun: Wi nuwartichu aja aintsaram pujakrumnisha pengker pujarme tajarme. ⁹ Antsu nuwartichu

☆ 6:12 (1.Cor. 10.23) ☆ 6:16 (Gén. 2.24) ☆ 6:20 (1.Cor. 3.16; 2.Cor. 6.16)

pujuschamin nekapinaka, nuwa angkantin aa nuna nuwatkarti. Tura nuwa aintsun ninumtsuk pujuschamin nekapinaka aints nuwenchawa nuna ninumkarti. Nusha pengkeraitai. Antsu natsa nuwan tuke wakerayat nuwatsuk pujakka nuka napchawaitai.

¹⁰ Antsu aishrintin ainauka aishrinka ajapangka ukukchartinuitai. Wiki nintimsanka nunaka tatsujrume. Antsu ii Apuri Cristo: Nu chichamsha umiktaram tusa akupkamiayi.

¹¹ Antsu nuwa ni aishrin ajapa ukukingkia, nuniangka aints naka ninumtsuk pujusti, tura aintsjai tsaning pujustas wakerakka, ni aishrinak waketrukti. Tura aintcha ni nuwarincha ajapangka ukukchati tajarme.✠

¹² Tura chikich nuwentin ainaun iinu Apuri nu chichamnaka akupkachu wainiatun nunaka tajai: Aints Cristonu asa, ni nuwari Criston umirchau wainiat, nijai pujustas wakerakka, nuwarinka ajapashtinuitai. ¹³ Tura nuwasha nunisang Cristonu asa, aishri Criston umirchau wainiat, nijai tsanias pujustas wakerakka, aishrincha ajapashtinuitai.

¹⁴ Nuwa Cristonu asa, aishri Criston umirchau wainiat Yus: Mai kichkia nunisang arti timiau asa, aishrin ajapashtinuitai. Tura aishmangsha nunisang Cristonu asa, nuwari Criston umirchau wainiat, nuwarincha ajapashtinuitai. Nuwa Criston umirchau wainiat aishri: Wína uchir Yusnau arti timiau asa, ni uchirisha Yusnau ainawai. Tura aishmangsha Criston umirchau wainiat ninu nuwari: Wína uchir Yusnau arti timiau asa, ni uchirisha nunisarang Yusnau ainawai. Antsu nuwa Criston umirchau aishrin ajapa ukukmiaka ni uchirisha Yusen umirchau artinuitai. Tura aints Criston umirchau asa, nuwarin ajapa ukukmiaka, ni uchirisha Yusen umirchau artinuitai.

¹⁵ Antsu aints Criston umirchau asa, ni nuwari Cristonu asamtai, nuwarin ukuktas wakerakka turatnuitai. Tura nuwari aishrincha: Weep tusangka surimkashtinuitai. Tura nuwari ataksha angkanta nunisang atinuitai. Tura nuwasha nunisang Cristo umirchau asa, aishri Cristonu asamtai, aishrin ukuktas wakerakka turatnuitai. Tura aishri nuwarin: Weep tusangka surimkashtinuitai. Tura aishri ataksha nuwenchawa nunisang atinuitai. Antsu Yus: Kajernaitsuk pengker nintimtunisrum aneenisrum pujustaram tusa wakerau asamtai, nuna pachisan aatjarme. ¹⁶ Aints Criston umirchayat, nuwarin ukutsuk pujakka, nuwa aishrin nintimtikmau asa, nisha ukunam Criston umirak uwemrashtimpiash tusarkia nekaachminuitji. Tura nuwasha nunisang Criston umirchayat, aishrin ukutsuk pujakka, ni aishri nuwan nintimtikmau asa, nisha ukunam Criston umirak uwemrashtimpiash tusarkia, nusha nekaachminuitji. Tura asamtai nu aintska Cristonu asa ni nuwari Criston umirchau wainiat ukukchatnuitai. Tura nuwasha nunisang Cristonu asa, ni aishri Criston umirchau wainiat ukukchatnuitai.

¹⁷ Yus aints ainautin: Tu pujustaram turamin asamtai, kichik kichik Cristonu ainau Yus wakera nunisang pujusarti. Nu chicham umiktaram tusan, tuke Cristonu ainau iruntramunam etserjai. ¹⁸ Tura asamtai judío Criston umirtsang, ni nuwapchirin charutkarmia nuka Criston umirak pujakka natsaamak: Ameka judío aintsuitme turutiarai tusa, nu charutkamun uukainjash tu nintimtsuk asati. Tura aints ni nuwapchirin charukchamu ayat, Cristonu asa, nuwaprun charukainjash, tu nintimtsuk asati tajarme.

¹⁹ Cristonu ainautikia nuwapech charukmauka tura charukchamuka pachiatjsi. Antsu Yuse chichamen miatrusrik umirkatasar wakeraji, tu nintimsar pujaji. ²⁰ Cristonu ainautikia Cristo umirtsurning nuwapech charukmau autikia aintsarik pujusminuitji, tura charutkachmau ainausha aintsarang pujusartinuitai. ²¹ Tura atum Cristo umirtsuk pujusrum aintsu inatiri akurmesha, nunia Cristonu wajasrum napchau nintimtsuk asataram. Antsu inatmin atumin chichartamak: Angkan pujustasam wakerakmeka jiinkitnuitme turaminamtaikia, nekasrum jiinkitnuitrume. ²² Ii Apuri Cristo aintsu inatirin: Wína umirtukta tusa eak, ni tunaarin akiimiatkamu asa, aintsu inatiri ayat, yamaikia angkanta nunisang Criston umirkatnuitai. Tura aintsu inatirinchu Cristo: Wína umirtukta tusa eakmau asa, aintsu inatirinchiat Cristo inatirintai. ²³ Cristo atumi tunaarin akiimiatramkatas waitnas jaka, atumin sumarmaku asamtai, yamaikia Cristonu ainarme. Tura asaram ju nungkanmaya ainau atumin: Wina umirtukta tinauka

✠ 7:11 (Mat. 5.32;19.9; Marc. 10.11-12; Luc. 16.18)

pachischatnuitrume. ²⁴ Yatsur ainautiram umaarutirmesha, Yus atumin eatmak: Wína umirtakrum tu pujustaram tinu asamtai, chikich chikich ainautirmesha Yus wakera nunisrumek pujustaram.

²⁵ Yamaikia nawantan pachisan, nunia natsancha pachisan tajarme nuka anturtuktaram. Ii Apuri nuna pachis chichaman akupkachu wainiatnak wiki nintimsanak nunaka aatjarme. Ii Apuri wait anentrak ni chichamen nekantikruau asamtai, wi taja nuka atumsha nekasaintai titinuitrume. ²⁶ Tura yamaikia wait wajaktin nukap au asamtai, nuwa nuwatsuk aintsarik pujustin pengkeraitai, tu nintimsan pujajai. ²⁷ Nuwartin akurmeka, nuwaram japawairap. Antsu nuwartichu akurmeka nuwasha eakairap. ²⁸ Antsu nuwa nuwatkurmeke tunauka turatsrume. Tura nuwa nawan aintsun ninumkusha nuka tunaunaka turatsui. Antsu nuwenawaru ainauka nukap wait wajakartin asaramtai, atum waitnawairam tusan nunaka tajarme.

²⁹ Yatsur ainautirmin umaarutirmincha nunasha tajarme: Ii Apuri tatintri jeatak wajasi. Tura asamtai yamaisha nuwartin ainau nuwartichua nunisarang Yusnaka umirkartinuitai. ³⁰ Tura wake mesekar pujuinausha wake meseachua nunisarang Yusnaka umirkartinuitai. Tura nakurin ainausha nakurichua nunisarang Yusen umirkartinuitai. Tura warinchun sumin ainausha sumichua nunisarang Yusnaka umirkartinuitai. ³¹ Ju nungkanam aa nuka mash mengkakatin asamtai, ju nungkanam aa nunaka wakerutsuk Yusnaka umirkartinuitai.

³² Ju nungkanam aa nu nintimtsuk asataram tusan, nunasha tajarme: Nuwartichu ainauka Yusen pengker umirkatasan wakerajai, tu nintimsar pujuinawai. ³³ Antsu nuwartinka ¿itiur nuwarnasha pengkersha awajsatjak? tusar ju nungkanam aa nunak nintimsar pujuinawai. ³⁴ Tura aishrintin ainau aishrinchau ainaujai metekchau nintiminawai. Nuwa aishrinchau ainauka: ¿Itiur wína namangkrujai, tura wína nintirjaisha tunaarinchau Yusen pengker awajsatjak? tusar ii Apuri Criston nintimsar pujuinawai. Antsu aishrintin ainauka: ¿Itiur aishruncha pengkersha awajsatjak? tusar ju nungkanam aa nuna nintimsar pujuinawai.

³⁵ Atumsha mash nuwartichu pujustaram tusanka nunaka tatsujrume. Antsu atumin yaingtasan nekas pengker aa nu turataram tusan, tura ii Apuri Cristo miatrusrumek nintimrataram tusan nunaka tajarme.

³⁶ Antsu aints chichaak: Nawan yaanchuk aintsun ninumkamin ayat, ninumtsuk pujakka napchawaitai, tura asan nuwaktasan wakerajai, tu nintimias pujakka, nu nawannaka nuwatkati. Nuka tunaachawaitai. ³⁷ Antsu chikich aints yusen miatrusnak umirkatasan, nuwan nuwatan nakitajai tu nintimias pujauka pengker aa nuna turawai. ³⁸ Tura asamtai aints nawantan nuwatuka pengker aa nuna turawai. Tura aints nuwan nuwatsuk pujausha nuna nangkamasang pengker nintimias pujawai.

³⁹ Nuwa aishri iwiaaku pujamtaikia, tuke nijai tsanias pujustinuitai. Antsu aishri jakamtai angka wajas, ni wakerakka Cristo nemarniun ninumkatnuitai. ⁴⁰ Tura wiki nintimsanak: Waje chikich aintsun ninumtsuk pujakka, timiá pengker nintimias pujustinuitai tajai. Yuse Wakani nunasha wína nekantikruau asamtai, tu nintimsan pujajai.

8

Yuschau waininayat wína yusrutme tinu ainaun pachis timiauri

¹ Yatsur ainautiram, Cristo umirchau ainau ni yusrin, Yuschau waininayat, tangkurin susartas maawaramtai ¿nuna namangke Cristonu ainauti yuwatnuashi? tu inintsamarume nuna pachisan aatjarme. Antuktaram: Iikia nukap nekaji taji nuka nekasaintai. Antsu iijai metek nekainachu ainaun pachisar: Nuka mianchawaitai taji nuka napchawaitai. Antsu Cristonu ainau aneakrikia, iisha Yus miatrusrik umirkur pujustinuitji. ² Aints nangkami nintimias: Mash aa nunaka nekajai tayat, Yus niin nekamtikiatas wakera nunaka mashkia nekatsui. ³ Antsu Yusen anea nuna pachis Yus: Nuka wina aintsruitai tawai.

⁴ Tura asamtai Cristo umirchau ainou ni yusrin susartas tangkun maina nusha yuwamnawashi, tu nintimsaram pujau asaram nintimrataram. Yuska kichkitai nuketai. Antsu ju nungkanam pujuinauka: Juka wina yusrutai tina nuka Yuschawaitai tusar nekaji. ⁵ Aints ainou wakan ainaun, tura iwianch ainauncha shaminak, untsuri umirin ainayat nangkamiar: Nayaimpinmasha, tura nungkanmasha yuska untsuri pujuinawai, tu nintiminawai. ⁶ Antsu iikia Yuska kichkitai taji. Nuka iinu Apaachirintai. Nusha mash aa nuna najanau asa iincha: Wina umirtuktaram tusa najatmamiaji. Tura ii Apuringkia kichkitai. Nuka Jesucristoketai. Nuka ii Apaachiri Yusjai mash ainia nuna najanau asamtai, iisha nuna kakarmarijai iwiaakji.✠

⁷ Antsu aints ainou mashkia nunaka nekainatsui. Chikich ainou nangkamiar: Yuschau waininayat nuka ii yusrintai tinawai. Tura asamtai ni yusrin maaketai tiartas, ni tangkurin maawaru asaramtai, Cristonu ainou nuna namangken yuwinakka, napchou nintimsar shaminayat yuwinawai. ⁸ Antsu ii yutairi yuwakrincha Yuska nunaka pachiatui. Tura ii yutsuk pujakrishia Yuska napchouka awajtsuji. Tura ii yutairi yuwakrishia Yuska pengkerka awajtsuji. ⁹ Antsu nuka nintimrataram: Atumka nuka tunaachawaitai tusaram, nu yutasha wakerakrumka yuwamnawaitrume. Antsu nu yuta yuwakrumningkia, chikich aints nuna wainak: Nuka tunaawitai tu nintimratnuitai. Tura asamtai chikich aints ainaun tunau nintimtikrai tusaram nintimrataram. ¹⁰ Atumka aintsu yusri jeen pujusrum, nuka Yuschawaitai tusaram nekau asaram, tangku namangke ni yusrin susaru yuwau asakrumin, chikich aints Cristo nemarin atumin waitmak, nusha nunisang nuna yuwau asa, Criston umirtan inais, tuke chikich aintsu yusri jeen maaketai titas wayaamnawaitai. ¹¹ Tura asamtai atumka: Chikich aintsu yusri nekas Yuschawaitai tusaram, nekayatrume nuni yuwau asakrumin, chikich aints Criston miatrusang umirchauka Cristo nu aintsun uwemtikratas jarukmaitiat, nu aintska mengkatatnuitai. ¹² Turamtai nu tangku namangke yuwau asaram, Criston nemarnuka tunau nintimtikrume. Nu turakrumka Cristoka umirtsuk tunau wajarme. ¹³ Tura asakrumin wikia tajarme: Wi yutan yuwamtaikia, Cristonu ainou tunau wajasarai tusan, wikia yamaikia nu yutanka pengké yuwashatjai.✠

9

Pablo ni pujamurin etserkamuri

¹ ¿Wikia Cristo akupkamuchukitaj? Wikia Jesús jakamunmaya nantaknuncha wainkamiajai. Tura atumin Cristo chichamen etserkau asamtai, atumsha Cristo umirin ainiarne. Wikia Cristo akupkamu asan chikich aints Cristo akupkamu turina nunasha wisha nunisnak turamnawaitjai.✠ ² Chikich ainou wina pachitsar nangkamiar: Cristo akupkachmawaitai turutinau waitiatrume atumka nekasrum: Cristo akupkamuitai turutinuitrume. Cristo: Wina chichamur etserkata tusa akuptuku asamtai, atumsha wi etsermau antuku asaram, Cristonu ainiarne. Tura asaram wina pachitsaram: Cristo akupkamuitai tusaram paan nekaramnawaitrume.

³ Aints ainaun wina pachitsar: Itiur pujawa tusar nekarawartas wakerutinaunka wisha nunasha tajai: ⁴ Wikia nekasran Cristo chichame etserin asan, Cristonu ainaun: Yutasha tura umutisha surustaram timinuitjai. ⁵ Tura Cristo akupkamu asan, nuwan nuwatnkanka, nujai tsaniasan wekaasamnawaitjai. Chikich aints Cristo akupkamu ainou, tura ii Apuri Cristo yachí ainausha, tura Pedroscha ni nuwarijai wekajinawai. Tura asamtai wisha wakeraknaka turamnawaitjai.

⁶ ¿Atumka itiur nintimrume? Cristo akupkamu ainou ni uwejejai takakminachu wainiatrume, atumka ni yuumamurisha suarme. Antsu wisha Bernabéjai atumin Cristo chichamen etseriatrik, iik takakmasar ii yuumamuringkia sumarmaji. ¿Nuka pengkerkai? ⁷ Suntar nintimrarmi: ¿Aints suntar naamkau ni yutairin akiimiawak? Atsa, antsu suntara apuri ni yutairinka akiimiatiui. ¿Tura ajartin ni ajarinian juuk yutsukek

✠ 8:6 (Rom. 11.36; Efes. 4.6; Col. 1.16) ✠ 8:13 (1.Cor. 10.28-29) ✠ 9:1 (Hech. 9.3-6; 1.Cor. 15.8-10; Gál. 1.11-16)

puja? Atsa. ¿Tura uwijartin ni tangkurin tsakatmaruka nuna muntsurin umutskek puja? Atsa, pachitsuk umawai. Tura asamtai Cristo: Wina chichamur etserkataram tusa iincha akuptamkau asamtai, iisha Cristonu ainau yutairisha nangkamrik yuwamnawaitji, tura kuikian iin suraminamtaikia, iisha ii yuumamuringkia sumarmakminuitji. ⁸Junia aints nintimina nunisnaka tatsujrume. Antsu Moisés umiktin chichaman akupak nunasha timiayi. ⁹Yus umiktin chichaman akupkau asamtai, tu aarmawaitai: “Waaka trigo neren pakartas nájamtaikia, trigo pachitsuk yuwati tusaram jangkengka jingkiatawairap.”✠
¿Antsu Yus waakan nintimsang nunaka tímia? Atsa. ¹⁰Antsu iincha nintimtikramratas nunaka aatramramiaji. Nunaka taku tawai: Yuse chichame etserin Yuse takatrin takakmau asamtai, chikich ainauka Yuse chichamen antinau asar, ni yuumamurinja susartinuitai. Aints arakan araina nuka, tura neren juwina nuka mai metek yuwarmin ainawai.✠

¹¹¿Aints ajarin araamia nuna neren juuk yutsukek pujusminui? Atsa, pachitsuk yuwamnawaitai. Tura asamtai iikia Yuse chichame nekas pengker aa nu atumka nintimtikramu asaram ii yuumamurisha sukartusminuitrume. ¿Nuka paseekai? ¹²Iikia nu nangkamtaik atumin Cristonam uwemratin chicham etserkamiaji. Tura chikich ainau ukunam atumin Cristo chichamen nuitamrarmia nuka atumi yutairincha, tura atumi kuikiarin juwiarminia nunisrik iisha jukimnawaitji.✠

Turayatrik iikia turachmiaji. Antsu chikich aints itiurchat nintimsar antutan nakitrarai tusar, iikia waitnasar takakmasar ii yuumamuringkia sumarminuyaji. ¹³Nintimrataram: Yus seatai juun jeans takakminausa chikich ainau Yusen susartas tangkun maawar itainaun nuna namangken yuu armiayi. Sacerdote ainausha aintsu tangkurin maawar, Yusen susartas epeena nuna namangkencha yu armiayi. ¹⁴Tura asamtai ii Apuri nu chichamnasha iin akupturmak: Aints ainau uwemratin chichaman antin ainauka Yuse chichamen etserin ainaunka ni yuumamurin susarti timiayi.✠ ¹⁵Antsu wikia chikich aintsun: Yuumamur surusta pengké tichamiajai. Tura yuumamur surustaram tusanka atumniaka aatsujrume. Chikich ainaun: Yuumamur surusta takunka ¿natsantrujai jakamin nekapchainjash? Antsu chikich ainau kuikiarin jurukchau asan, pengker nintimsan warasan angkan pujajai.

¹⁶Ii Apuri Cristo: Uwemratin chicham etserkata tusa akuptuku asamtai, wi nu chichaman etserkunka: Pengkeraitjai tumamtsujai. Antsu wi nu chichaman etsertsuk pujamtaikia, Cristo winaka wait wajaktiniun surustinuitai. ¹⁷Tura asamtai wi wakeraknaka Cristo chichamen etserkunka warasminuitjai. Tura Cristo: Wína chichamur etserkata turutin asamtai, wikia nakitaknasha ni chichamenka tuke umiktinuitjai. ¹⁸Tura wikia Cristonam uwemratin chichaman etserin asan, aints ainau akirkarti tuuka nintimtsujai. Antsu chikich ainau wína akirtsuk antukarti tusan, pengker nintimsan nu chichaman etserjai. Nu uwemratin chichaman wi etsermatai, chikich ainau nu chichaman antukaru asar, nekasar wína akirkarminiun wainiatun nunaka pengké nakitajai.

¹⁹Wikia chikich ainau inatiringkia achayatnak, aints untsuri Cristo chichamen antukar uwemrarti tusan, mash aintsu inatiriya nunisnak pujajai. ²⁰Judío ainau Criston umirkarti tusan, wikia judío ainaujai iruntran, judío aintsua nunisnak pujuyajai. Tura Moisésa chichamen umirin ainaujai iruntran, Criston umirkarti tusan, Moisésa chichamen umirnuyajai. Moisésa chichamen umirkunka, tuuka uwemrachmin ayatnak nunaka turinuyajai. ²¹Yus wína chichamur umirtuktaram tusa, chichaman akupkamia nuna umirin asan, Cristosha wína chichamur umirtukta tusa akuptukmia nuna umirkawaitjai. Tura Moisésa chichamen nekachu ainausha Criston umirkarat tusan, wikia Moisésa chichamenka nekachua nunisnak pujuyajai. ²²Tura Cristo chichamen miatrusarang umirkacharu ainausha miatrusarang Criston umirkarat tusan, nijai iruntran

✠ 9:9 (Deut. 25.4) ✠ 9:10 (1.Tim. 5.18) ✠ 9:12 (Rom. 15.27) ✠ 9:14 (Mat. 10.10; 1.Tim. 5.18)

pujuyajai. Tura aints ainau mash uwemrarat tusan, judío ainau pujuinawa nunisnak nu-jai iruntran pujuyajai. Tura judíocho ainaujaisha nunisnak iruntran pujuyajai. Kichikia menakar uwemrarmi tusan tu pujuyajai. ²³ Tura aints ainau untsuri uwemrartin chichaman antukar uwemrarti tusan, wikia Cristonam jeanka winaka: Nekasam pengker umirtukmiamé, turutmi tusan tu pujajai.

²⁴ Aints ainau nekapnainak ampuinawka nekarme. ¿Yáachia eemak jeati? tusar ampukiar weenak, kichik aintsuk tsengkrutin jukitnun waininayat mash ampuinawai. Atumsha tsengkrutin jukiartas ampuina nunisrumek Cristo pengker umirkataram. ²⁵ Aints nekapnaisartas eemkar jeartas wakerinawka, ii namangke kakarat tusar kintajai metek ampuinawai. Tura ampukiar: Wikia eemkan jeanka tsengkrutin jukitatjai, tu nintimsar turinawai. Tura nu tsengkruti jumchik arus minartinuitai. Tura iikia tsengkruti minartin aa nu jukitasrikia Cristoka umirtsuji. Antsu nayaimpinam jeakrin, ii Apuri iin chichartamak: Atumka wina pengker umirtakrum pujuyarme, iin turammi tusar wakeraji. ²⁶ Aints ainau nekapnainak ampuina nuka nangkamiarka ampuinatsui. Antsu nekapnainak, chikich nepetkami tusar nekapnainawai. Wisha nunisnak nangkamiar nasenam kutsma kutsma wajaina nunisnaka Cristonka umirtsujai. ²⁷ Antsu tunau wajasai tusan, wina wakeramurnaka najantsujai. Cristo chichamen etserin ayatnak, ni chichamen miatrusnak umirtsuk wi jakamtaikia, Cristo wina chichartak: Wina chichamur etsernutiatum ¿waruka miatrusmek umirtukchamiamé? turuti tusan, Cristo chichamenak umirkatasan wakerajai.

10

Yuschau waininayat wina yusruitme tinu ainaun chicharkamuri

¹ Yatsur ainautiram umaartirmesha, yamai taja nuka nintimrataram. Yaanchuik Moisés ii juuntri ainaun Egipto nungkanmaya jikim, ii juuntri ainau mash mukuntiujai wekaasarmiayi. Tura mash juun entsa japencha wekaasarmiayi. ² Ii juuntri ainau mash mukuntiujai wekaasaru asar, tura juun entsanmasha mash wekaasaru asar, entsanam mainawa nunisarang: Wikia Moisésan nemarsatasan wakerajai tiarmiayi. ³ Tura nayaimpinmaya yutanacha mash yuwarniayi. ⁴ Turinamtai Yus pampanmaya yumin akupkamtai, nu yumincha mash umurarmiayi. Tura Cristoka nu pampa nunisang aints jakaarchati tusa iwiaaku pujustinun suramji. ⁵ Turamaitiat ii juuntri ainau Yusnaka pengkerka awajsacharmiayi. Tura Yusen umirinachu asar, aints atsamunam untsuri jakaarmiayi.

⁶ Ii juuntri ainau ni wakeramurin najanawarmia nunisrumek tunau wakerukairap tusa, Yus iincha nuitamratas wakerutmaji. ⁷ Tura Yuschau waininayat ni yusrin ningki najanawar: Juka ii yusrintai tiarmia nunisrumka atumka tiirap. Yuse chichamesha tu aarmawaitai: “Nu aints ainau yutanacha yuwar, tura umutnasha nukap umurar nunia wajakiar nakurusarmiayi,” tu aarmawaitai. ⁸ Tura asamtai nuwajai turunitsuk asarmi. Ii juuntri ainau yaanchuik nuwajai turunawaru asar, kichik kintatik veintitrés mil (23,000) aints jakarmiayi. ⁹ Tura ii juuntri chichainak: Wikia tunau turamtaikia, watska, Yus wait wajaktiniun suruschanpiash, iisha nekapsami tu nintimtsuk asarmi. Yaanchuik ii juuntri ainau nuna turinamtai, Yus napin aints ainaun esaiti tusa akuptukmiayi. Turamtai napi esainam untsuri jakaarmiayi. ¹⁰ Tura Yus pachisrum pasé chichakairap. Yaanchuik ii juuntri ainau Yusen kajerinak pasé chichasaru asaramtai, Yus sungkuran ni awemamurijai akuptuk aints ainaun maamiayi.

¹¹ Ii juuntri ainau turunamuri nintimrarmi: Nu aintsua nunisrumek pujusairam tusar, Yuse chichame etserin ainau tu aarmiayi. Nungka amukatin jeatak wajasu asamtai, atumka tunau wajasairam tusa, Yus yamai pujuinautinka nuitamratas wakerutmaji.

☆ 10:1 (Ex. 13.21-22;14.22-29) ☆ 10:3 (Ex. 16.35) ☆ 10:4 (Ex. 17.6; Núm. 20.11) ☆ 10:5 (Núm. 14.29-30)
 ☆ 10:6 (Núm. 11.4) ☆ 10:7 (Ex. 32.6) ☆ 10:8 (Núm. 25.1-18) ☆ 10:9 (Núm. 21.5-6) ☆ 10:10 (Núm. 16.41-49)

¹² Tura asamtai aints: Wikia tunaunaka pengké turashtatjai tauka anearti. Nisha ii juuntriya nunisang tunau wajastinuitai. ¹³ Atumin nekapramsatin jeamtaikia: Wikiapi tu pujaja, tuuka nintimsairap. Chikich ainausha atumjai metek tu pujuinawai. Antsu Yus tímia nunaka nekas umiktinuitai. Satanás: Tunau turata, turamu wainiat, Yus atumin: Tunau wajasairam tusa yainmaktatrume, nuniasha tunau nepetkataram tusa kakamtikramratatrume.✠

¹⁴ Aneetir ainautiram, nu nintimrau asaram, aints ni yusrin ningki najanina nuka nintimtutsuk asataram. ¹⁵ Atumka nekau asaram, wi taja nuka pengkeraitai tusaram nintimratnuitrume. ¹⁶ Iikia Cristo jakamuri nintimsar, tura ni numpe numparmaurisha nintimsar, iisha iruntrar maaketai tiri, kichik piningjai umaji. Nu umakur Cristo nintimsar pujaji. Tura Cristo jakamuri nintimsar, kichik yurumkak yuwaji. Nu yuwakur Cristo nintimsar pujaji.✠ ¹⁷ Iikia untsuri ayatrik, Cristo jakamuri nintimtusar, kichik yutak yuwaji. Iikia mash Cristonu asar, kichik namangkea nunisketji.

¹⁸ Israel ainau turamuri nintimrataram: Sacerdote tangkun maawar namangken Yusen maaketai tiartas yuu armiaiyi. Tura tangku namangke Yus suamu yuwinau asar, Yusen nintimsar yuu armiaiyi. ¹⁹⁻²⁰ Wi yamai titatjarne nu nintimrataram. ¿Tangku namangken aints ni yusrin suwina nuka warimpita? Nuka aya tangku namangkentai. Antsu Yusen tenap nintimtichu ainau nangkamiar: Juka ii yusrintai tusar, ni yusrin ningki najanawariat, ni yutairincha maaketai tiartas suwinak ¿nekas Yusnak suwina? Atsa, nunaka Yusnaka suwinatsui, antsu iwianchin suwinawai. Tura asamtai atumsha nu yuwau asaram, iwianch ainaujai tsaningtinuitrume. Antsu iwianch ainaujai tsaniasrum pujusairam tusan tajarme. ²¹ Atumka Cristo jakamuri nintimsaram, umuti kichik piningjai umuru asaram, nuniangka iwianch susamuka umurchatnuitrume. Tura ii Apuri Cristo misarin yuwau asaram, nuniangka iwianch susamuka yuwastinuitrume.✠

²² Ii Apuri Cristo umiriatur ¿nu inaisar ataksha iwianch umirkurin, ii Apuri kasma-tramkatnukitai? Tura: ¿Ii Apuri nangkamasrik kakarmaitji timinkitai?

Angkan pujusrum aneentaram timiauri

²³ Chikich aints chichainak: Ii wakerakrikia pachitsuk mash turamnawaitji tina nuka nekasaintai. Antsu ii wakeraji nu mash turakrikia, chikich ainau yaingchatnuitji. Nekasar ii wakeraji nuka pachitsuk turamnawaitji, antsu nu pachitsuk turakrikia, chikich aints Cristonu ainausha miatrusarang Criston umirkarat tusar yaingtat kamarsha yuumataji.✠ ²⁴ Tura asar ¿itiur pujaknak pengkersha pujusaintaj? tuuka nintimtsuk, antsu ¿chikich aintsun itiur yaingkainjak? tu nintimratnuitji.

²⁵⁻²⁶ Yuse chichame tu aarmawaitai: “Yus mash najanau asamtai, iinu nungkar-ingkie Yusnawaitai. Tura ju nungkanam aa nusha mash Yusnawaitai.”✠ Tu aarmau asamtai, namang sumatinam tangku namangke sumaktasrum jearmeka, ¿aintsu yusri susamuashi? tuuka nintimtsuk sumaktaram. Tura sumakrum ¿juna yuwanka tunau wajaschatjash? tuuka nintimtsuk pachitsuk yuwataram.✠

²⁷ Cristo umirchau ainau: Wína jearun yuwita, atumin turaminamtaikia, atum wetasrum wakerakrumka yuutaram. Tura ni jeen yuwakrum: ¿Namangsha ii yuwaji juka ni yusrin maaketai tiartas maamuchuashi? tura ¿nuna yuwanka tunau wajaschatjash? tuuka nintimtsuk pachitsuk yuwataram. ²⁸ Turayat chikich aints ujatmak: Juka ni yusrin susatas maamuitai tusar ujatminamtaikia, chikich aints Cristo miatrusar umirchau ainau tunau nintimrarai tusaram, nu namangka yuwairap. ²⁹ Atumka pachitsuk yuwamin arumin, chikich ainau tunau nintimrarai tusan nuka yuwairap tajarme.✠

Antsu atumka chichaakrum: Wikia wína yutairun pachitsuk yuwamin aisha, chikich ainau: Nuka yuwachminuitme tinamtaisha ¿warukanak wikia yuwastaj? ³⁰ Wikia Yusen maaketai tusan, wina yutairun yuwamtaisha ¿itiur chikich aints wína pachitas: Nuka

✠ 10:13 (Gén. 39.7-23) ✠ 10:16 (Mat. 26.26-28) ✠ 10:21 (2.Cor. 6.15-16) ✠ 10:23 (1.Cor. 6.12) ✠ 10:25-26 (Sal. 24.1-2) ✠ 10:25-26 (Ex. 24.6-8) ✠ 10:29 (1.Cor. 8.7-13)

tunau turayi, turutiarting? atumka timinuitrume. ³¹ Anturtuktaram. Atumi yutairi yuwakrumka, tura atumi umutiri umakrumsha, tura waring achat mash turakrumsha, aints ainau nuna mash wainkar: Yusen pengker nintimtusarat tusaram turataram. ³² Judío ainau, tura judíocho ainausha Criston umirtan nakitrarai tusaram, tura Cristonu ainau tunau wajasarai tusaram, tuke tu nintimsaram pujustaram. ³³ Aints ainau tuke mash pengker nintimsar pujusarti tusan, tura wina pachitsar pasé chichartukarai tusan, wikia wina wakeramurnaka najantsujai, antsu chikich ainau untsuri uwemrarti tusan, wikia aints ainaun yaingtasan wakerajai.

11

¹ Wikia Criston nemarkau asamtai, atumsha wiya nunisrumek chikich ainau yayaakrum Cristo nemarkataram tajarme.✠

Nuwa ainau Yuse jeen tu pujusartinuitai timiauri

² Yatsur ainautiram, wina tuke kajinmatrukchau asakrumin, tura wi atumin nuiniarmiajrume nuka miatrusrumek umirtuku asakrumin, wisha atumin pengker nintimtajrume. ³ Tura chikich chichamnasha atumin nekamtikiatasan wakerajrume. Anturtuktaram: Cristo ni Apaachiri Yusnak umirnitai. Tura Cristo umirin ainantikia mash ii Apuri Cristok umirnitai. Tura Yus wakerau asamtai, nuwa ainau ni aishrinak umirin ainawai. ⁴ Tura aishmang ni nuwarin inartin asa, Cristonu ainau iruntramunam Yusen aujsatas, tura Yuse chichamen etserkatas tarachin nukumak wajaska, nuwa tumau wajau asa nuka natsanpiakuitai. ⁵ Antsu nuwa aishrintin Cristonu ainau iruntramunam tarachin nukumatsuk Yusen aujsatas tura Yuse chichamen etserkatas wajakka, aishmangkua nunisang wajau asa nuka natsanpiakuitai. Nuna turakka intashi awamrawa tumawaitai.

⁶ Tura asamtai nuwa Cristonu ainau iruntramunam tarachin nukumatsuk wajastas wakerakka, intashincha awartinuitai. Antsu nuwa intashin awarka nuka natsanpiakuitai. Tura asamtai nuwa aishrinak umirin asa, Cristonu ainau iruntramunam tarachin nukumaktinuitai. ⁷ Yus aintsun najana chicharak: Ju nungkanam ainia nuka wiya nunismek mash inarta timiau asa, aints waring achat Yus najanamia nunaka mash inartinuitai. Tura asa tsengkrutin tsengkrutsuk wajastinuitai. Turamta nuwa aishrin pengker umirak pujakka, aishrin pengker awajsatnuitai. ⁸ Yus aintsun najanak aishmangnaka nuwanmayanka najanachmiayi, antsu aishmangkun eemak najana, paje kuitak nuwanka uku najanamiayi. ⁹ Aishmang nuwan umirkat tusangka Yuska najanachmiayi, antsu nuwa aishmangkun umirkat tusa najanamiayi.✠ ¹⁰ Tura asamtai nuwa aishrin umirak pujakka, Yuse awemamuri ainau nuna wainkar: Nu nuwaka aishrin umirui tiarat tusar tarachin nukumaktinuitai. ¹¹ Antsu mai ii Apuri Cristonu asar, aishmangtisha iikikia Cristoka umirkashtinuitai. Tura nuwa ainausha ningkikia Cristonka umirkachartinuitai. ¹² Nu nangkamtaik Yus nuwan aishmangnumia najanamiayi. Turayat aishmang ainausha nuwanmaya akiininawai. Antsu Yus mai najanamiayi.

¹³ Atumek nintimrataram. Cristonu ainau iruntramunam nuwa tarachin nukumatsuk Yusen seakka ¿nuka pengkerkai? ¿Atum ainautiram nuka napchawaitai tatsurmeash?

¹⁴ Corintonmaya ainautiram, aishmang ainau nuwa nunisarang intashin sarman tsakatmaramtaikia, ¿nuka natsanpiakuitai tatsurmek? ¹⁵ Antsu nuwa intashi tarachjai nukukmawa nunisang ati tusa, Yus nuwa intashin sarman najatamiayi. Turamu asa nuwa intashpikia nekas pengkeraitai. ¹⁶ Antsu chikich ainau ju chichaman umitan nakitinamtaisha, wikia nunaka pachiatjsai. Iikia Cristonu ainau iruntramunam tuke tu nintimsar pujaji. Tura Cristonu ainau chikich nungkanam pujuinausha nunisarang nintiminawai.

Yuse misari pachisar nuikiartamu

¹⁷ Yamaikia chikich chichaman atumin aatratasan wakerajrume. Yuse misari yuwatarum iruntraram pujakrumsha, Cristo miatrusrumek umirkatasrumka iruntsurme. Tura

✠ 11:1 (1.Cor. 4.16; Fil. 3.17) ✠ 11:9 (Gén. 2.18-23)

irunkurmesha pasé pujau asakrumin: Atumka pengker turarme tatsujrume. ¹⁸ Wi anturkamjarme nuka nuwaitai: Cristonu ainautirmin pachitmasar: Iijai iruntrar yuwami tiariat kanakar yuwinawai. Nu tamaun antukan, nekasashi tu nintimsan pujajai. ¹⁹ Chikich aints ainau: ¿Yaachik Yusen miatrusang umirak puja? tusar paan nekarawarti tusaram, atumka kanákrum pujarme. Antsu ¿kanákrum pujakrumsha nekasrum pengkerak pujaram? Atsa. ²⁰ Tura iruntai jeanam wayaaram kanákrum yuwakrumka, atumka Cristo jakamuri nintimtusrumka Yuse misari yuwatasrumka iruntsurme. ²¹ Antsu kichik kichik eemkar jear, kichnaka nákatsuk, ni yutairin kichnaka jamtsuk yuwinawai. Tura eemkar jearma nusha umutirin nukap umuru asar nampekar pujuinawai. Antsu uku jearuka yutsuk pujuinawai. ²² Tu yuwatasrum wakerakrumka, tura tu umurtasrum wakerakrumka ¿warukaya atumi jeening kanákrum yuwatsrume? Cristonu ainau iruntramunam tu yuwakrumka nuka natsanpiakuitai. Tura yutan jumchik itarusha inatsaarme. ¿Tura asakrumin warintajrumek? ¿Pengker turarme titajrumeash? Atsa, nunaka tatsujrume.

Yuse misari yuwatin pachisar etserkamu
(*Mat. 26.26-29; Marc. 14.22-25; Luc. 22.14-20*)

²³ Ii Apuri chichamen wína ujatkaru asaramtai, wi atumin ujakmiajrume nu kajinmatsuk asataram tusan tajarme: Ii Apuri Jesúsán nu kashi surukarmia nuni ii Apuri yurumkan achik, ²⁴ Yusen maaketai tusa puuk: “Ju yuwakrum wína namangkur nintimrataram. Wikia atumin uwemtikratasan jakatatjai. Ju yuwakrumka tuke wína jakamur nintimrataram,” timiayi. ²⁵ Tura piningnasha achik Yusen maaketai tusa chichaak: “Ju umuti umakrumka, wína numpar nintimrataram. Wína mantinamtai, atumi tunaari sakartaj tusan wína numpar numpartatui. Tuke ju umuti umakrumka wína nintimtursaram umurtaram,” timiayi. ²⁶ Tura asamtai ii Apuri taatsaing, nu yurumak yuwakrumka, tura nu umutisha umakrumka: Ii Apuri Cristo iin uwemtikramratas jarutramkamiaji tu nintimratnuitrume.✠

¿Yuse misari itiuur yuwatnuitji?

²⁷ Tura asamtai aints ii Apuri jakamuri nintimtsuk, nu yurumkan yuwauka, tura nu umutincha umauka, ii Apuri iin jarutramkau wainiat, ni jakamurin nintimtsuk yuwau asa tura nintimtsuk umuru asa, ningki wiasmatmamkatatui. ²⁸ Antsu aints Yuse misarin yutsuk: ¿Tunaar atsuash? tu nintimias ningki ni nintin iwiaratnuitai. Nunia nu yurumkancha yuwatnuitai, tura nu umutnasha umurtinuitai. ²⁹ Cristo nu aintsu tunaarin sakturtas jarukmaitiat, aints nuna nintimtsuk nu yurumkancha yuwa, tura nu umutnasha umur, ni wait wajaktiniun jurumaktias turawai. ³⁰ Tura asamtai atumjai iruntrar pujuinau untsuri kakaichu ainawai, tura najaiminawai. Tura chikich ainausha jakaru ainawai. ³¹⁻³² Antsu Yusen umirchau ainaujai metek ji kajintrashtinum mengkakarai tusa, ii Apuri Cristo ni nemarnutinka: Tunau inaisataram tusa, iin wait wajaktiniun suramji. Tura asamtai ii tunaari mash nintimrar: Wikia tunaawitjai, antsu wina tunaarunka mash inaisatjai tinu asakrin, Yuska iinka wait wajaktinnaka suramsashtinuitji.✠

³³ Yatsur ainautiram umaarutirmesha, iruntai jeanam Yuse misari yuwatasrum irunkurmeke, mash kaunkarti tusaram nakastaram. ³⁴ Atumka wait wajaktin jurumakiram tusan nunasha tajarme. Antsu aints yaparakka, ni jeen yuwatnuitai. Tura chikich chicham atum aaturmarume nunaka atumin jean chicharkatatjarme.

12

Yuse Wakani sukartusmauri pachis etserkamu

¹ Yatsur ainautiram, umaarutirmesha, Yus ni aintsri ainautin: Wina takatur pengker takakmastaram tusa, ni Wakani sukartusmauri pachisrum nekaataram tusan ujaktatjarme.

✠ 11:26 (Jer. 31.31) ✠ 11:31-32 (Hebr. 12.5-11)

² Atumka yaanchuikia Cristo umirchau asaram, atumi yusri aints najanamu wainia-trumek umirkuram pujuyarme. Nusha aints najanamu asar chichachu armiaiyi. Atumka nusha nekarme. ³ Tura asakrumin ¿yaachia nekas Yuse kakarmarijai chichaa? tusan nuna nekamtikiatasan wakerajrume. Yuse Wakani nintimtikramu asar, aints kichkisha: Jesúska yumingkramu ati ticharminuitai. Tura: Jesús wína Apuruítai, tinauka aya Yuse Wakani nintimtikramu asar tiartinuitai.

⁴ Yuse sukartusmaurinkia untsuri ayat nuna sukarta nuka kichik Yuse Wakani nuketai. ⁵ Tura Cristonu ainauti takatri untsuri irunu wainiat, kichkin kichkin ni takatrin sukartinka kichik ii Apuri Cristo nuketai. ⁶ Tura Cristonu ainauti untsuri ayatrik, kichik kichik metekchau ni takatrin takakmasarti tusa, iin kakamtikramratnuka kichik ii Apaachiri Yus nuketai. ⁷ Yus mash pengker yainiktaram tusa, Cristonu ainautinka kichik kichik ni Wakanin suramji. ⁸ Tura asamtai Yuse Wakani chikich ainautinka Yuse chichamen nekas pengker etserkarat tusa nekamtikramji. Tura chikich ainauncha Yuse chichamen pengker nuiniarat tusa nintimtikramji. Tura nu aintsun ni nekamtairin suwa nuka Yuse Wakanintai. ⁹ Tura chikich aints ainautincha nekaachmin arining, Yuse Wakani ni wakeramurin nekamtikramji. Tura chikich aints ainautincha jau ainauncha tsuwararat tusa kakamtikramji. Tura nu aintsun ni kakarmarin sua nuka Yuse Wakanintai. ¹⁰ Tura kichnasha wainchatai takat turatnun suawai. Tura kichnasha ukunam atiniun pachis chichaman paan etserkatnun suawai. Tura kichnasha Yuse Wakani turamu nekamtikiatnuncha, tura pasé wakantrintin nekamtikiatnuncha suawai. Tura kichnasha niish chichamtiksatnun suawai. Tura kichnasha niish chichainaun paan nekamtikiatnun suawai. ¹¹ Tura Cristonu ainautin Yuse Wakani nuke takamtikui. Tura ningki wakerak, ni takatri takakmastinun kichik kichik suramji.✠

Cristonu ainautikia kichik namangkea nunisrik aji

¹² Nintimrataram. Iinu namangke kichkitiat aintsti muchitmauri untsurintai. Tura untsuri ayat, mash iruram kichik aintsu namangkentai. Cristo nemarnutisha nunisrik untsuri ayatrik Cristonu asar, mash iruram kichik aintsu namangkea nunisrik aji.✠

¹³ Cristonu ainautikia untsuri nungkanmaya ainiaji. Judíosha, tura judíochu ainausha Criston nemarkin irunui. Tura aintsu inatiri ainausha, tura aintsu inatirincha ainausha Criston nemarkin irunui. Tura Yuska: Kichik namangkea nunisrumek ataram tusa, ni Wakani ni nintin piatkamiayi.

¹⁴ Aintsti namangke muchitmauri kichkichuitai. Antsu untsurintai. ¹⁵ Tura asamtai aintsu nawe nintimrarmi: Aintsu nawe chichakchamin ayat: Wikia aintsu uwejenchuitjai. Tura asan takakmaschamnawaitjai tayat ¿aintsun yaingchamnaukai? ¹⁶ Tura aintsu kuwishi nintimrarmi: Nusha chichakchamin ayat: Wikia aintsu jinchuitjai. Tura asan aintsun yaingchamnawaitjai tayat ¿aintsun yaingchamnaukai? ¹⁷ Antsu iikia jiiik jiiik akurkia, ii kuwishi atsamtaikia ¿itiur antuktinuitji? Tura ii kuwishik kuwishik akurkia, ii nuji atsamtaikia ¿itiur nekapratnuitji? ¹⁸ Yuska ningki wakerau asa, aintsti muchitmaurin niish niish metekchau ati tusa najanamiayi. ¹⁹ Aintsti muchitmauri atsamtaikia ¿iinu namangke itiuur muchitkating? ²⁰ Antsu Yus ii muchitmaurin untsurin najanamaitiat, iinu namangke kichkitai.

²¹ Ii jiiingkie pengker ataing, ii uwejesha yuumaji. Tura ii muukasha pengker ataing, ii nawesha yuumaji. Yus ni umirkautinka mash metek takakmasmintrum tusangka najatmachmiaji. Antsu mash metekchau asaram, kichik kichik wína takatrin takakmasmintrum tusa, iinka najatmamiayi. Tura asamtai Cristonu ainautikia: Aminka yuumatsjame tunaichamnawaitji. ²² Antsu aintsti namangke muchitmauri kakaichu wainiatu nukap yuumaji. ²³ Ii muchitmauri mianchau ainia nu natsantakur jiirsarai tusar nukumaji. Tura nu muchitmau natsanpiaku ainu waitkarai tusar tenap nukumaji. ²⁴ Antsu iinu muchitmauri natsanchawa nuka nukumatsji. Tura asakrin Cristonu ainautin mianchau arin wainiat, Yus iin najatmau asa: Ameka nekas pengkeraitme turamji. ²⁵ Tura asamtai suwirpiakuka jiiinitsuk pujustinuitji. Antsu Cristonu ainautikia mash

✠ 12:11 (Rom. 12.6-8) ✠ 12:12 (Rom. 12.4-5; Efes. 4.16)

metekchau ayatrik, pengker nintimtunisar iruntrar pujusar, Cristonu ainaujaingkia yainin atinuitji. ²⁶ Cristo neparin kichik wait wajamtaikia, Cristonu ainautisha mash ni wait wajamuri nintimtusminuitji. Tura Cristo neparin chikich wara warat pujamtaikia, Cristonu ainautisha nunisrik wara warat pujusminuitji.

²⁷ Tura atumsha kichik kichik Cristo neparin asaram, mash iruntraram Cristonuitrume. ²⁸ Tura Cristonu ainautin: Winia takatur takakmastaram tusa, Yuska ni kakarmarin suramsamiaji. Chikich takatan nangkamasang Cristo akupkamu ainaun ni takatrin susamiayi. Tura Yuse chichamen etsernuncha ni takatrincha susamiayi. Tura Yuse chichamen nuikiartinnasha ni takatrincha susamiayi. Tura chikich ainu wainchati takatan turawarti tusa, ni kakarmarincha susamiayi. Tura chikich ainu jau ainaun tsuwararti tusa, tura chikich ainu Cristonu ainaun yaingkiarti tusa, ni kakarmarincha susamiayi. Tura Cristonu ainaun pengker inararti tusa, chikich ainauncha ni kakarmarin susamiayi. Tura chikich niish chichau ainaun tu chichasarti tusa chichamtikiamiayi.✠

²⁹ ¿Cristonu ainauti mashik Cristo akupkamu ainaij? Atsa. ¿Tura mashik Yuse chichame etserin ainaij? Atsa. ¿Tura mashik Yuse chichame nuikiartin ainaij? Atsa. ¿Tura mashik Yuse kakarmarijai wainchatai takat takau ainaij? Atsa. ³⁰ ¿Tura mashik Yuse kakarmarijai jau ainausha tsuwau ainaij? Atsa. ¿Tura mashik niish chichau ainaij? Atsa. ¿Tura mashik nu chichamnasha nekamtikin ainaij? Atsa. ³¹ Antsu mash Cristo sukartusmauri pengker ainia nu wakerin ataram. Tura itiuur timiá pengker pujusminuitrume tusan, yamaikia atumin nekamtikiatasan wakerajrume.

13

Nekas aneenitnun pachis timiauri

¹ Wikia junia aints ainu chichamen untsuri chichaayatnak, tura Yuse awemamuri chichamencha chichaayatnak, chikich ainaun aneetsuk pujaknaka nangkami chichainjai. Tura tampur mesramu nangkami tuntuyamua nunisnak pujuinjai.

² Tura Yuse chichamen nekas pengkeran etseriatnak, tura chikich ainu nekaachminun wainiatnak, Yus nekawa nunisnak mash nekayatnak, tura Yusen nintimsan ni kakarmarijai muran muchkiamin ayatnak, chikich ainaun aneetsuk pujaknaka wikia nangkamnak pujuinjai.✠ ³ Tura winar aa nunaka yuuminaun mash suayatnak, tura Yusen pengker awajsatasan wina namangkrun astuwarti tayatnak, chikich ainaun aneetsuk pujaknaka, pengké nangkamin tajai.

⁴ Antsu aints ainaun itiuur aneetnuita tusan yamaikia ujaktatjarme. Antuktaram: Chikich ainaun aneuka pasé awajinamsha pachichuitai, antsu wait anentratnuitai. Tura chikich ainauncha suwirpiakuka jiichuitai. Tura: Miajuitjai tumamtsuk pujuwitai. Tura chikich ainaun pachis: Nuka mianchawaitai tutsuk pujuwitai. ⁵ Tura chikich ainaun aneuka natsanta nunaka turichuitai. Tura ninunkeka nintimchawaitai. Tura kajechuitai. Tura ni pasé awajinamsha yapaijmichuitai. ⁶ Tura chikichan pasé awajinamtaisha warartichuitai. Antsu nekas chichaman antuk waras pujuwitai. ⁷ Chikich ainaun aneuka, niincha pasé awajinamsha tsangkurnuitai. Tura chikich ainaun aneuka ni chichamencha antuk: Nekasaintai tusa pujuwitai. Antsu tunau ainaun pachis: Nuka tunaarin inaisarti tusa nakawaitai. Tura chikich ainu pasé awajinamsha, kajertsuk jaimias tsantratnuitai.

⁸ Nekas aneenitka tuke atinuitai. Ju nungka amukamtaikia, Yuse chichame etsermauka atsutnuitai. Tura chikich chichamjai niish chichastinaka inaisartinuitai. Tura Yusnum jearkia, mash aa nu nekau asar nekatka yuumakchatnuitji.

⁹ Antsu yamaikia mashkia nekatsji. Tura Yuse chichamengka miatrusrikiya etsertsuji. ¹⁰ Antsu ii Apuri taamtaikia, iikia mash paan nekaatnuitji. Tura ju nungkanam nintimtaingkia amukatnuitai.

¹¹ Yaanchuik uchi akun, uchua nunisnak chichaiyajai. Tura uchi nintimina nunisnak nintimnuyajai. Tura uchi nekainawa nunisnak nekaiyajai. Antsu yamaikia juun asan,

✠ 12:28 (Efes. 4.11-13) ✠ 13:2 (Mat. 17.20;21.21)

uchi akur nintimtainka inaisawaitjai. ¹² Tura asamtai yamaikia ispi kusurujai paanchau wainmamji nunisrik jumchik nekaji. Antsu ukunam ii Apuri ii nintimaurin mash aa nuna nekau asa nu taamtaikia, iisha nunisrik ii nekachmau aa nusha mash paan nekaatnuitji. [✠]

¹³ Tura asamtai kempatam tuke amukashtin ainia nuka juwaitai: Yus nekasampita tusar nintimtustin, tura ukunam atata nu nakastin, tura Yuscha tura aintcha aneakur pujustin. Antsu anengkrataingkia mash ainia nuna nangkamasang timiá pengkeraitai.

14

Aints niish chichastinun pachis etserkamu

¹ Tura asamtai chikich ainaun nekasan aneetasan wakerajai, tu nintimsaram pujusaram. Tura Yus ni sukartusmauri surusti tusaram wakeruku ataram. Takat timiá pengker aa nuka Yuse chichame etsernu takatrintai. ² Antsu aints niish chichauka, chikich aints antukarti tusangka chichaatsui, antsu Yusjai chichaawai. Tura Yuse Wakani niin chichastinun sua nunaka chikich ainu antinachu asar: ¿Warintua? tusarsha nekaachartin ainawai. ³ Antsu aints Yuse kakarmarijai Yuse chichamen etserkungka, chikich ainaun kakamtikratas, tura Criston miatrusarang umirkar pengker nintimsar pujusarti tusa etserui. ⁴ Aints chichaman nuimiarchayat niish chichauka: Wikia miatrusnak Yusen umirkatasan wakerajai tawai. Tura aints Yuse chichamen paan antumain etserkungka, Cristonu ainu mash miatrusarang Yusen umirkarat tusa nu chichamnaka etserui.

⁵ Tura asamtai atumka chikicha chichame nuimiarchayatrumek, mash tu chichamintrum tusan wakerajrume. Tura nuna nangkamasrumek Yuse chichame mash paan etserkataram tusan wakerajrume. Yuse chichame paan etserkatin timiá pengkeraitai. Antsu niish niish chichastinka chikich ainu antinachu asaramtai nuka mianchawaitai. Antsu aints antukchamniaun chichaamtai, chikich aints: Tu taku tawai tusa, paan antukminun etsermataikia, Cristonu ainu nu chichamnasha paan antukar nintimrartinuitai. ⁶ Yatsur ainautiram, umaarutirmesha nintimratarum. Wikia atumin irakun chikich chichamjaingkia antukchamniaun chichaamtaikia, ¿warintua tusaram, itiu nekaatrumek? Antsu Yus wina nekamtikruamia nuna paan etsermataikia, tura wi nekaja nuna paan etsermataikia, tura ukunam atata nuna pachisan wi etsermataikia, tura chikich chichaman wi atumin nuiniakun pujamtaikia, mash paan antukrum Cristo miatrusrumek umirkatnuitrumek.

⁷ Nangku umpuamu tura arawir tuntuyamu nintimrarmi. Aints yumatayat nangkami nangkun umpuamtaikia, nunaapi umpuawa tusarkia nekaachminuitji. Tura yumatayat arawiran nangkami tuntuyamtaikia, nunaapi tuntuyawa tusarkia nekaachminuitji. ⁸ Tura suntar ainu nintimrarmi: Suntar ainu mesetnum weartas maanit nangkamami tusar, maaniakur kantamtain pupunrijai pupuntrinawai. Tura suntar nangkami pupuntrin pupuntramtaikia, suntar ainu nuna antukar, ¿itiur maanitnasha nangkamawarting? ⁹ Atumsha nunisrumek chikich ainujai chicham antukchamin chichaakrumka ¿chikich ainu atumi chichaamurincha itiu anturtamkarting? Atum antukchamin chichau asaram nangkamrum chichaarme.

¹⁰ Nekas chikich nungkanmaya ainausha niish niish chichainu untsuri irunui. Tura nu chichaman nekainauka mash paan antukmin ainawai. ¹¹ Antsu wikia chikich nungkanmaya aintsu chichamen antachunka ¿warinkung taj? tusanka nekaachminuitjai. Tura anturnaikiachmin asamtai, chikich nungkanmaya aintsu chichamen niish chichau asa wi chichaamurnaka nekatsui. ¹² Tura atumka Yuse Wakani sukartusmaurin timiá wakerau asaram, Cristonu ainu miatrusrumek kakamtikratasrum takat timiá pengker aa nu wakerin ataram.

¹³ Tura asamtai Cristonu ainu iruntramunam aints niish antukchamin chichauka, chikich ainausha antukarti tusa, Yus nu chichamnasha nekamtikiawarat tusa Yusen seatnuitai. ¹⁴ Yuse Wakani wina chichamtikrau asamtai, wikia chikich chichamjai Yusen seeknaka ¿warintajak? tusanka nintimtsujai. ¹⁵ ¿Tura wisha itiuurkatjak? Yuse Wakani

✠ 13:12 (1.Juan 3.2)

wina chichamtikrau asamtai, nu chichaman nekachiatnak Yusen seatatjai. Tura wina chichamrujaisha paan nintimran Yusen seatatjai. Tura: Yuse Wakani wina kantamtikrau asamtai: ¿Warí kantanak kantamataj? tusan nunasha nekachiatnak kantan kantamatatjai. Tura paan nintimsan kantancha kantamatatjai. ¹⁶ Tura Yuse Wakani atumin chichamtikramau asamtai, Yus seakrum: Maaketai tinu asakrumin, chikich ainau atum Yus seamun antinayat: ¿Warintua? tusar nekainachu asar Yusen: Maaketai ticharmin ainawai. ¹⁷ Atumka nekasrum Yus maaketai tarumning, chikich ainausha: ¿Warintua? tusar nekainachu asar, Criston miatrusar umirkartatkamawar tujintinawai. ¹⁸ Wikia atumin nangkamasnak chikich ainau chichame nuimiarchau ayatun untsuri chichaaajai. Tura asan Yusnaka maaketai tajai. ¹⁹ Antsu chikich aintsu chichamejai antukchamin nukap chichaayatnak, chikich ainau nunaka antinachu asaramtai nangkamnak chichaaajai. Antsu Cristonu ainau iruntramunam wikia jumchik chichamnak paan antukminun etserkunka, Criston miatrusarang umirkarti tusan wakerajai.

²⁰ Yatsur ainautiram umaarutirmesha, uchi ainau nintimina nunisrumka nintimrairap. Tura uchichia nunisrumek nintimkurmesha, tunauka nintimtsuk asataram. Antsu atumka juun asaram, juun ainau nintimina nunisrumek nintimratararam. ²¹ Yuse chichame tu aarmawaitai. Yus chichaak: “Chikich nungkanmaya aintsu chichamejai wina aintsur ainaujai chichastinuitjai. Tura waininayat wina chichamrunka antukchartinuitai,” timiayi. Tu aarmau asamtai, Yus ni aintsri ainaun chikich ainau chichamejai chichamtikui tusar nekaatnuitji. ²² Tura asakrin Cristonu ainau iruntramunam aints chikich aintsu chichamejai antukchamin chichauka, Cristonu ainau uwemrarat tusangka chichamtiksui. Antsu Cristo umirchau ainau nuna antukar: Yuska nekas juuntapita tiarat tusa, Yus chikich aintsu chichamejaikia chichamtikui. Tura Yuse chichamen paan antukminun etseruka, Cristo umirchau ainau Criston miatrusarang umirkarat tusangka chichamtiksui, antsu Cristonu ainau Criston miatrusarang umirkarat tusa chichamtikui. ²³ Tura asamtai Cristonu ainau iruntramunam mash Yuse kakarmarijai niish niish chichau asakrumin, chikich aints Yuse chichamen nekachu tura chikich aints Criston umirchau nuni wayaangka, atumin pachitmasar: ¿Waurinatsuash? tiartinuitai. ²⁴ Antsu mash iruntrar Yuse kakarmarijai Yuse chichamen etserinamtaikia, Cristo umirchau tura Yuse chichamen nekachusha nuni wayaangka, nuna antuk ni tunaarin nintimias: Wisha tunaawitjai titinuitai. ²⁵ Tu tinu asamtai nu aintsu nintimaurin paan nekaatnuitai. Tura asamtai nuka ni tunaarin mash etserak, Yusen maaketai titas tikishmatar: Yus nekas atumjai pujawai turamtinuitai.

¿Cristonu ainau iruntramunam itiur pujustinuita?

²⁶ Yatsur ainautiram, Cristo umirin iruntramunam pujakrumka, chikich aints Yus kantan pengker kantamui, tura chikitcha Yuse chichamen pengker nuiniawai, tura chikitcha Yus niin nekamtikiamu asa, ni chichamen pengker etserui. Tura chikitcha antukchamin chichaayat, Yuse kakarmarijai niish chichaawai. Tura chikitcha nu chichaman paan antuku asa, nuna taku tawai tusa paan etserui. Mash iruntraram tu pujakrumka, Cristo miatrusrik umirkarmi tusaram turatararam. ²⁷ Aints Yuse kakarmarijai antukchamin chichainauka, jimiarchiksha, tura kempatmaksha chichasarti. Tura kitcha chichas umisamtaiki kitcha chichasti. Tura kichka nu chichamnaka paan antau asa, nuna taku tawai tusa etserkatnuitai. ²⁸ Tura nuna taku tawai tusa etserkamin atsamtaikia, Cristonu ainau iruntramunam chicham antukchamnaujaingkia chichakchatnuitai. Antsu aints ningki kanák pujus, chicham antukchamin aa nujai Yusnaka seatnuitai. ²⁹ Tura aints jimiarchiksha, tura kempatmaksha Yuse kakarmarijai Yuse chichamen etserkartinuitai. Turinamtaiki ¿pengkerashi? tusar chikich ainausha nekaawartinuitai. ³⁰ Tura chikich aints Yuse chichamen antú pujaun Yuse Wakani chikich chichaman chichasti tusa nintimtikramu asa, eemak chichauka itatkatnuitai. ³¹ Yuse chichamen tu etserkatarum wakerakrumka, mash nuimiararti tusaram, tura mash miatrusarang Criston pengker

☆ 14:21 (Isa. 28.11-12)

nintimsar umirkarti tusaram, kichik kichik Yuse chichamen etserkiram jeekatarame tajarme.

³²⁻³³ Yuska pachim chichamnaka nakitawai. Antsu pengker nintimsaram angka pujustaram tusa wakerawai. Tura asamtai Yuse chichamen etserin ainauka, Yus ni chichamen nintimtikramu asar, nu chichamnaka etserkartinuitai. Antsu nintimtsukka nangkamiarka chichakchartinuitai.

Chikich nungkanam Cristonu ainau iruntramunam turina nunisrumek atumsha turatnuitrume. ³⁴ Cristonu ainau iruntramunam nuwa ainau chichakcharti tusar surinkamuitai, antsu Yuse chichame aarmawa nunisarang chichatsuk takamtaik antukartinuitai. ³⁵ Cristonu ainau iruntramunam nuwa chichaaka mianchawaitai. Tura asamtai nuwa tenap antukchau asa inintrustas wakerakka, ni jeen waketki, ni aishrin nuni iniastinuitai.

³⁶ Ju chichamsha nintimratarame. Yus atumin chikich ainaun nangkamaskeka ni chichamen nekantikramachmiarume, tura atumkeka ni chichamenka jukichmiarume. ³⁷ Aints: Wikia Yuse chichame etsernuitjai tauka tura: Wikia Yuse kakarmarijai Yuse takatrin takawitjai tauka atumin aatjarame nuna nintimias: Yus akupkamu asa aaweawai tusa paan nekaatnuitai. ³⁸ Tura wina pachitas: Cristo akupkachmawaitai turutuka nuka Cristo akupkachmawaitai.

³⁹ Yatsur ainautiram, Yuse chichame etserkatin wakeruku ataram. Tura aints niish chichaamtaisha, antukchamin ayatrumek suritkairap. ⁴⁰ Cristonu ainau iruntramunam aints ainau kaunkaramtaisha, pachim chichamka chichatsuk, pengker nintimraram wi taja nuka mash umirkuram turatarame tajarme.

15

Cristo jakamunmaya nantakmiauri

¹ Yatsur ainautiram umaarutirmesha, yamaikia chikich chichamnasha atum kajin-makiram tusan, atumin nintimtikratan wakerajrume. Uwemratin chichaman atumin etserkamiaja nusha jukimiarume. Tura asaram nu chichamka umirume. ² Tura nu pengker chichamnasha wi atumin ujakmiajrume nu tuke inaitsuk nintimtau asaram uwemrarume. Antsu nu chicham umitsuk pujakrumka, Cristo nekasampita nangkamrum tiintrume.

³ Chicham timia pengker aa nuna antuku asan, wikia atumin ujakmiajrume nuka nuwaitai. Yuse chichame aarmawa nunisang Cristo ii tunaarin akiimiatramkatas jarutramkamiaji. ⁴ Turamtai ni namangkenka iwiarsarmiaji, turamaitiat Yuse chichame aarmawa nunisang kempatam kinta jaka tepayat ataksha nantakmiaji. ⁵ Nunia Pedro wina waitkat tusa Cristoka wantintukmiaji. Tura ni nuiniatiri ainau: Wina waitkarat tusa ataksha wantinkamiaji. ⁶ Tura ataksha cinco pachak aints nangkamasarang ni nemarkin ainaun Cristoka wantintukmiaji. Tura nu wantintukmau ainauka yamaisha untsuri iwiaaku ainayat, jumchik jakaru ainawai. ⁷ Nuniasha Santiago wina waitkat tusa Cristoka wantintukmiaji. Nuniasha ni nuiniatiri ainaun mash: Wina waitkarat tusa wantinkamiaji.

⁸ Tura nukap arus wikia Cristo kajerin aing, wina eatak: Chichamur etserkata tusa, Cristo winasha wantinturkamiaji. ⁹ Wikia Yuse umirin ainaun kakerakun, wait wajaktiniun sukartin asan yamaikia natsaamakun, Cristo akupkamuitjai tumamchamnawaitjai. Tura asamtai chikich aints Cristo akupkamu ainau wina nangkatuku ainawai. ¹⁰ Antsu Yus wina wait anentruru asamtai, wisha Cristo akupkamuitjai. Tura nangkamnaka winaka pengkerka awajtuschiamaiaji. Tura wiki nintimsanak Cristo takatrin takakmaschamajai. Antsu Yus wina wait anentruru asamtai, Cristo nuiniatiri nangkamasnak Cristo takatrinka takakminuyajai. ¹¹ Tura Cristo chichamen wi etserja nuka tura chikich aints Cristo chichame etserina nusha mai metek pengker ainawai.

✠ 15:3 (Isa. 53.5-12) ✠ 15:4 (Sal. 16.8-10; Mat. 12.40; Hech. 2.24-32) ✠ 15:5 (Luc. 24.34) ✠ 15:6 (Mat. 28.16-17; Juan 20.19) ✠ 15:8 (Hech. 9.3-6) ✠ 15:9 (Hech. 8.3; Efes. 3.8)

Tura atum Cristo nantakmiau pachisar etsermau antuku asaram, Cristo nekasampita timiarume.

Jakausha nantaktinuitai tusa etserkamu

¹² Iikia chicham Cristo jakamunmaya nantakmiauri pachisar etserji. Nu etserkamu antuku arumning, atumjai pujuinau chichainak: Jakau ataksha nantakchatnuitai ¿tuweena nunasha warukaya tuweenawa? ¹³ Tura aints jakamunmaya nantakchamin awaitmatikia, Cristosha jakamunmayanka nantakchau ayi. ¹⁴ Tura Cristo nantakchawaitmatikia, ii etserji nuka nangkamir etserinji. Tura atumsha nangkamrum: Cristo nekasampi Yuse Uchirinta tiintrume. ¹⁵ Nu nekasainmatikia, Yus Criston jakamunmaya inankimiayi, takurkia anangmawainji. Tura jakau ainau nantakchamnawaitmatikia: Yus Criston jakamunmaya inankichu ayi. ¹⁶ Tura jakau nantakchamnawaitmatikia, Cristosha nantakchau ayi. ¹⁷ Tura Cristo nantakchawaitmatikia, atumsha Cristo nekasampi Yuse Uchirinta nangkamrum tiintrume. Tura atumi tunaari sakarchau asamtai, atumka tuke tunaarintin aintrume. ¹⁸ Nu nekasainmatikia Cristonu jakaru ainau tuke mengkakarua aintai. ¹⁹ Iikia Cristonu asar iwiaaku pujakrikia, nijai tuke pujustin nakaji. Antsu ii jakar nantakchamin akurkia, chikich ainaun nangkamasarang iin timiá wait anentramrarninuitji.

²⁰ Antsu tuuka nintimrashtinuitji. Chikich jakaru ainaun nangkamasang Yus nuná eemak Criston nekas jakamunmaya inankimiayi. Tura asamtai Cristonu ainauti jakakrincha, iincha nunisang inantamkitnuitji. ²¹⁻²² Nu nangkamtaik Yus aints Adán naartinun najanamia nu tunau wajas jakau asamtai, mash nungkanmaya aints ainau tunau asar jakartin ainawai. Tura wainiat Cristo jakamunmaya nantakin asamtai, Cristonu ainautikia mash Cristoa nunisrik nantakiartin ainiaji. Tura asamtai kichik aints Adán naartinjai jakatin nangkamnau asamtai, jakamunmaya nantaktincha nunisang kichik aintsjai nangkamnamiayi. Nu aintska Cristoyayi. ²³ Tura Cristo chikich jakaru ainaun nangkamasang eemak nantakmiayi. Tura nukap arus Cristo wantinkamtai, ni aintsri ainautikia jakamunmaya nantakiartinuitji. ²⁴ Tura nungka amuamunam Cristo apu ainauncha mash, tura inakratin ainauncha mash, tura ni nemase ainauncha mash, timiá kakaram ainau wainiat nepetak amuktinuitai. Tura nunia Cristo ni Apaachiri Yusen mash ainia nuna susamu asa, Yus ningki mash inartinuitai. ²⁵ Ii Apuri Cristo ni nemase ainaun mash nepetak tuke mash inartinuitai. ²⁶ Tura ni nemase mash nepetkatin asa, nungka amuamunam aints ainau pengké jakacharti tusa Cristo jatancha nepetkatnuitai. ²⁷ Tura asamtai Yus ni Uchirin: Mash ainia nuna apuri ati tusa akupkamiayi. Tura mash ainia nuna ínyat, ni Apaachiri Yusnaka inarchatnuitai. Nuka paan nekaatnuitji. ²⁸ Tura Cristo ni nemase ainaun mash nepetkau asa, nuniangka ni Apaachirin: Yamaikia amek Apu ata titinuitai. Tu tamau asa, nuniangka Yuska mash ainia nuna nangkamasang juun atinuitai.

²⁹ Nusha nintimrataram: Cristo nemarkin jakamtaik, chikich aints nu aintsu pengker pujamurin wainkau asar, iisha Criston umirkarmi tusar entsanam maiinawai. Jakaru ainau jakamunmaya nantakchamniaun waininayatcha ¿warukantsuk entsanmasha maiina? ³⁰ Tura jakaru ainau jakamunmaya nantakchamniauncha ¿warukantsuk kintajai meteksha iincha mantamawartascha wakerutminaji? ³¹ Yatsur ainautiram umaarutirmesha, kintajai metek iincha mantamawartas wakerutminau asaramtai nunasha tajarme: Atum ii Apuri Jesucristonu asakrumin, wisha waraajai. Tura atumin Cristo chichamen etserkau asan, kintajai metek itiurkachminnum pujakun: Mantinaksha mantuwarti tusan, jakatnua nunisnak pujajai. ³² Wi Efeso yaktanam pujamtaik, aints ainau juun yawaaya nunisarang winasha mantuwartas wakerutinau asaramtai, wikia wait wajayajai. Iikia jakar nantakchatin akurkia ¿tuusha pujustin wakerukminkai? Atsa. Jakau ainau pengké nantakchamnawaitai, tu nintimina nuka nangkamiar chichainak: “Kashin ii jakatin asar, yamaisha nukap yuwami, tura nampekmi,” tinawai. Jakaru ainau

✠ 15:21-22 (Rom. 5.12-18) ✠ 15:27 (Sal. 8.6)

pengké nantakchamawaitmatikia, nuna tinauka nunaka nekasar tiarminuitai. Antsu jakaru ainau nekasar nantakiartin asaramtai, tuuka nintimrashtinuitji.✠

³³ Chikich ainau anangkruwarai tusaram aneartaram. “Aints pengker pujayat, pasé ainaujai tsanias pujakka, nusha nunisang pasé pujustinuitai.” Tu tinu ainia nuka nekasar tinawai. ³⁴ Atumjai Yusen nekachu ainausha pujuinawai. Tura asamtai atumsha yamaikia tupin nintimsataram. Tura atumi tunaauri inaisataram tusan tajarme. Nunaka atumin natsaarat tusan tajarme.

¿Jakaru ainau itiur nantakiartinuita?

³⁵ Tura chikich aints inintrak: ¿Jakau ainau itiur ataksha iwiaaku pujusartinuita? Tura ninu namangke mash mengkakamtai, ¿warí namangkejing ataksha nantaktinuita? timinuitai. ³⁶ Tu inintra nuka nintimchawaitai. Arak araarma nu saapchiri kawaachmatikia tsapaichminuitai. ³⁷ Tura asamtai árak araakrumka, ¿yanchuk nukarauk araa wearam? Atsa, antsu trigo araakrumka, tura chikich árak araakrumsha, jingkiajin araarme. ³⁸ Tura Yus árak araamun niish niish tsapaiti tusa tsapamtikui. Tura Yus wakera nunisang tsapaayi. ³⁹ Yus ningki wakerak, ni najanamia nuna metekchau ati tusa mash najanamiayi. Tura asamtai aintstikia iisha aji. Tura kuntin ainausha, tura nanamtin ainausha, tura namak ainausha niish niish ainawai. ⁴⁰ Nayaimpinmasha yaa ainau niish niish jintin ainawai. Tura nungkanam Yus najanamu ainausha niish niish arti tusa metekchau najanamu ainawai. Tura nayaimpinmaya ainau shiirmari, tura nungkanmaya ainau shiirmarisha niish niish ainawai. ⁴¹ Tura tsaa tsanmausha niish ayi. Tura nantu tsanmausha niish mushatmin ayi. Tura yaa ainau tsanmausha niish niish asaramtai, yaa ainau shiirmari metekchau ainawai.

⁴² Tura jakau ainausha nunisarang yamaram namangjai nantakiartin ainawai. Jakau namangke kaurtin aa nu iwiaarsam, nuniangka jakashtinum nantaktinuitai. ⁴³ Jakau namangke kawarak mejeeni tusar tsuutakur iwiarji. Antsu jakamunmaya nantaakka shiiram nantaktinuitai. Ii namangke kakaichu aa nuka iwiarji. Antsu yamaram namang kakaram atinua nujai nantaktinuitji. ⁴⁴ Jakau namangke junia namang asamtai iwiarji. Tura Yusjai nayaimpinam pujustasar yamaram namangjai nantaktin ainiaji. Jakau namangke ju nungkanmaya namangketai, antsu jaka nantaktin namangke aa nuka nayaimpinmaya namangketai.

⁴⁵ Yuse chichame tu aarmawaitai: “Nu nangkamtaik Yus aintsun Adán naartinun najanak suut umpui: Iwiaaku ati tusa, mayatairin engketamiayi.” Tu aarmawaitai. Nunia nukap arus Cristo aints wajas, Yuse Wakani kakarmarijai aints ainau tuke iwiaaku pujustinun suyayi. ⁴⁶ Nu nangkamtaik Yus aintsu namangken nungkanmaya najanamiayi. Nuniangka chikich yamaram namang nayaimpinam pujustinnaka uku najanamiayi. ⁴⁷ Nu nangkamtaik Yus aintsun nungkanmaya najanamu asa, ju nungkanmaya aintsuyayi. Antsu ii Apuri Cristoka nayaimpinmaya aintsuitai. ⁴⁸ Adánka nunisarang ainauka junia namang ainawai. Tura Cristoa nunisarang pujusartin ainauka nayaimpinmaya namang artinuitai.✠

⁴⁹ Yamaikia Adánka nunisrik ju nungkanmaya aints ayatrik, ukunam nayaimpinam jearkia, Cristoa nunisrik nayaimpinmaya aints atinuitji.

⁵⁰ Yatsur ainautiram umaarutirmesha nunasha tajarme. Aints junia namangjai tura junia numpajai Yus pujamunmaka pujuschartinuitai. Tura junia namangka kaurtin asamtai, nayaimpinmaka kaurtinnumka jeachartinuitai. ⁵¹ Yuska chikich chicham uukmaunasha wína nekamtikruau asamtai, yamaikia atumin nekamtikiatasan wakerajrume. Antuktaram: Cristo umirkautikia mashkia jakashtinuitji. Antsu iinu namangkenka Yus mash yapajiatnuitai. ⁵² Yuse awemamuri pupunan pupuntramtai, aints mitsum mitsum wajawa nunisang Yus ii namangken yapajiturmatnuitji. Tura pupunan pupuntramtai, Cristo umirin jakaru ainau Yusjai tuke jatsuk pujusartas nantakiartinuitai. Tuminamtai iwiaaku ainau namangkencha Yus yapajiatnuitai.✠

✠ 15:32 (2.Cor. 1.8) ✠ 15:48 (Gén. 2.7) ✠ 15:52 (1.Tes. 4.15-17)

⁵³ Ju namangka jakakrin kaurtinuitai. Antsu nunia yapaijmiamar chikich namang kaurchatin aa nujai, tura pengké jakashtin aa nujai Yusnum pujustinuitji. ⁵⁴ Tura ii namangke jakatin aa nu yapaijmiamar, chikich yamaram namang jakashtin aa nujai pujustinuitji. Tura asamtai Yuse chichame etsernu armaurisha umiktinuitai. Nu armauka nuwaitai: “Jatanka Yus nepetkawaitai. ⁵⁵ ¿Yamaikia jatasha iincha itiur nepetamkatjik? Tura asamtai ¿iikia warukarik jatasha shamkataij?” tu aarmawaitai. ⁵⁶ Yaanchuik Yus Moisésnum umiktin chichaman akupkau asamtai, aints ainauti nu chichamka umitsuk mash tunau wajasar jakatnuyaji. ⁵⁷ Tura ii Apuri Jesucristo turamurijai jatanka Yus nepetkamiayi. Tura jatancha nepetkau asamtai, iisha jatasha nepetkatin asar, Yus maaketai tiarmi.

⁵⁸ Wína aneetir yatsur ainautiram umaarutirmesha: Jatasha nepetkatin asaram kakaram wajasrum, tuke yawetsuk Yuse takatri takakmin ataram. Tura ii Apuri Cristonu asaram, ni takatringkia nangkamrumka takaatsrume. Atumka nusha nekarme.

16

Kuik irumratniun pachis etserkamuri

¹ Yamaikia kuik irumraram chikich aints Cristonu ainu akuptuktaram tusan aatjarme. Wi Galacianmaya ainaun: Nu turataram tusan timiaja nunisnak atumnasha tajarme. ² Wi taamtai nu kuik irumrai tusaram, atum tumingjai metek kuik Yus susatasrum atumi jeen akankaram ukustaram. Kuik nukap jukirmeka Yus nukap susatnuitrume. Antsu jumchik jukirmeka jumchiksha susatnuitrume.

³ Tura wi atumin jeamtai, pengke aints atumjai pujuinau wainkaram: Jerusalénnum Cristonu kuikiartichu ainaun yaingkiartas, atumi kuikiari takusar wearti tinu asakrumin, wikia papin aaran akupkatatjai. ⁴ Tura wi weminuitmataikia, wijai tsaniasar wearminuitai. ⁵

Wetintrin pachis armauri

⁵ Wikia Macedonia nungkanam wetin asan, nunia jiinkin Corintonam atum pujamunam jeatatjai. ⁶⁻⁷ Yamaikia atumin jeanka, jumchik kinta iratnaka nakitajai. Antsu Yus wakeramtaikia, nukap kinta atumjai tsaniasan pujustasan nintimjai, tura yumanch nangkamarti tusan, atumjai pujuschainjash tu nintimjai. Nuniangka atum: Weta tusaram, winaka akuptukmintrum tu nintimjai. ⁸ Tura yamaikia Efeso yaktanam Pentecostés fiestan inangkartatjai. ⁹ Junia aints ainu untsuri Yuse chichamen antukartas wakerinawai. Antsu Criston umirtan nakitinausha untsuri irunui.

¹⁰ Timoteo atumin jeamtai, nisha wiya nunisang ii Apuri takatrin takau asamtai, pengker nintimias atumjai pujusti tusaram wainkataram. ¹¹ Antsu Timoteo pachisrum mianchawaitai tiirap. Antsu pengker nintimias angka waketkiti tusaram akup-turkataram. Nunia chikich aints Cristo umirnujai tati tusan juni nakajai. ¹²

¹² Tura ii yachi Apolosan chikich ii yachijai atumin winiar jiirmasarat tusan nukap iniasmajai, turayat yamaikikia iratan nakimiawai. Antsu ni angka akungka winishtimpiash.

Inangnamu chicham akupkamuri

¹³ Chikich ainu atumin anangkramawarai tusaram aneartaram. Tura Cristo nekasampita tusaram, kakaram wajasrum, uchua nunisrumka nintimsairap. ¹⁴ Tura asaram chikich ainu tuke inaitsuk anen ataram tusan tajarme.

¹⁵ Yatsur ainautiram, atumsha Estéfnas itiur pujumia nusha nekarme. Niisha ni weari ainuajai Acaya nungkanam nu nangkamtaik Cristo chichamen umirkarmiayi, tura Cristonu ainaun tuke yaingkiarmiayi. Atumsha nuka nekarme. ¹⁶ Tura Estéfnasa nunisarang Criston umirnak pujuinauka umirkataram. Turaram Cristonu ainaun yaingkiartas takakminauka umirkataram tajarme.

☆ 15:55 (Os. 13.14) ☆ 16:4 (Rom. 15.25-26; 2.Cor. 8.1-5, 9-15; 9.1-15) ☆ 16:11 (1.Cor. 4.17)

¹⁷ Estéfanás, tura Fortunatosha, tura Acáicosha juni taaru asaramtai wisha waraajai. Atum winitatkamaram tujintrakrumin, niisha wína jiirsartas tarutiarmayi. ☆ ¹⁸ Tura winasha jiirsar nintirun pengker nintimtikrurarmayi. Tura atumin waketkiar, atumnasha nunisarang pengker nintimtikramrartatui. Tura asamtai nu aints ainau pengker awajsataram tajarme. ¹⁹ Asianmaya Cristonu ainau atumin: Pengker pujustaram tusar, chichaman akupturminawai. Aquila ni nuwari Priscajai, tura Cristo nemarin ni jeen kaunin ainaujai Cristonu asar, atumin nukap pachitminawai. ☆ ²⁰ Cristonu ainausha mash atumin: Pengker pujustaram tusar chichaman akupturminawai. Cristonu ainautiram, pengker nintimtunisrum: ¿Pengkerak pujaram? tunaitaram.

²¹ Yamaikia ju aarmaunka wína uwejrujai aaran akuptajrume. Wiitjai Pabloitjai.

²² Aints ii Apuri Jesucriston aneetsuk pujuinaunka Yus jiisti. Apuru Jesúsá, wári tarata.

²³ Ii Apuri Jesucristo atumin pengker awajtamsarti tajarme. ²⁴ Atum Cristo Jesúsánu asakrumin, mash aneajrume. Nunak tina amujai. Nuketai.

Pablo Corintonam Pujuinaun Papin Ataksha Akuptukmauri

Chicham akuptukmauri

¹ Wiitjai Pabloitjai. Yus wakerau asamtai Jesucristo: Wina chichamur etserkata tusa eatkamiayi. Yuse aintsri Corintonam pujuinautirmin, nunia Acaya nungkanam pujuinautirmincha, wina yatsur Timoteojai ju papin aaran akuptajrume. ² Ii Apaachiri Yus ii Apuri Jesucristojai atumin pengker awajtamsarti, tura angkaan pengker pujustinasha suramsarti tajarme.

Pablo wait wajakmauri

³ Yus ii Apuri Jesucristo Apaachiri aints ainautin wait anengkratin asa, tuke iin pengker nintimtikramrau asamtai maaketai tiarmi. ⁴ Ii wait wajakrinkia, Yuska tuke iin pengker nintimtikramrau asamtai, chikich ainausha wait wajainamtaikia, Yus iin tuke pengker nintimtikramramiaji nunisrik iisha chikich wait wajainausha pengker nintimtikrartinuitji. ⁵ Cristo timiá wait wajakmia nunisrik iisha wait wajau asakrin, Cristoka napchau nintimtsuk asataram tusa, tuke pengker nintimtikramji. ⁶ Tura asamtai iikia wait wajayatrik: Pengker nintimsaram pujustaram tusar wait wajaji. Tura atum uwemramnuram tusar iikia wait wajaji. Tura Yus iincha tuke pengker nintimtikramrau asamtai ii wait wajaji nunisrumek atumsha wait wajakrumsha, napchau nintimtsuk, antsu iia nunisrumek Yus nintimsaram wait waktinuitrume. ⁷ Tura asakrumin iikia atum nintimtusar: Iijai metek wait wajau asakrumin, Yuska iin pengker nintimtikramji nunisang atumnasha pengker nintimtikramratatrume, tu nintimsar iikia pujaji.

⁸ Yatsur ainautiram umaarutirmesha, Asia nungkanam timiá wait wajakmiaji nuna atumin nekamtikiatasan wakerajrume. Timiá wait wajakmuka pengké atsuwapi tu nintimsar, tura jakatatjiapi, tu nintimsar pujuyaji. ⁹ Antsu aints maatar achikmawa nunisrik: Nekasriapi jakatatji tu nintimnuyaji. Tura timiá wait wajakur: Uwemrashtinupitji, tu nintimsar pujarning Yus: Wi jakaun inankitin asan, atumin uwemtikratatjarme tusa iin nuitamramiaji. ✨

¹⁰⁻¹¹ Atumsha Yusnum yainkau asakrumin, timiá shamrumtinnun pujakrishia: Jakatnuapitji, tu nintimsar pujarning, Yus iincha: Jakairam tusa uwemtikramramiaji. Tura asa iincha tuke uwemtikramji. Tura asamtai Yus iincha nekas uwemtikramratatjiapi, tu nintimsar pujaji. Tura asar aints untsuri iin pachitmasar Yusen seatramiaru asaramtai, Yus iincha pengker awajtamsamji. Tura asamtai aints untsuri iincha pachitmasar Yusen maaketai tiartatui.

¿Warukang Pablo Corintonam wechaya?

¹² Yatsur ainautiram, ju chicham nekaataram tusar wakeraji. Iikia atumjai pujakur, anangmatsuk antsu Yus umirkur pujuyaji. Tura junia aints ainau nintimina nunisrikia pujuchmiaji, antsu Yus iin pengker awajtamsau asa, iin nekas pengker pujustinun suramsamiaji. Iikia tu nintimsar pujakur pengker nintimji. ¹³⁻¹⁴ Tura asar iikia atumin aatjirme nu aujsaram ¿warintua? tusaram paan nekaatnuitrume. Antsu chicham nekaachminun aa nunaka aatsujrume. Ii Apuri Jesús taamtai, atumka iin pachikratsaram warastinuitrume. Tura iisha atum pachisar warastinuitji.

¹⁵ Tura pengker nintimtuniaji, nuna nekau asan, atum warasmi tusan, jimia irastasan wakerimiajai. ¹⁶ Wikia Macedonia nungkanam weakun jiirkuta nangkaikiarmi tusan wakerimiajai. Tura waketkuncha ataksha jiisarmi tusan wakerimiajai. Tura atumin pujunantaj nunia Judea nungkanam akuptukarmi tusan wikia wakerimiajai.

✨ 1:9 (1.Cor. 15.32)

¹⁷ Antsu atumin winishtatiatun ¿nangkamniak atumin winitatjai timiakiaj? Atsa. ¿Tura junia aints ainau: Winitatjai tiariat yapajiasarang: Winishtatjai, tu nintimsar pujuinawa nunisnak wikia tu pujaj? Atsa. ¹⁸ Iikia winishtatitrik atumin nangkamir: Winitatji tusarkia chichamka akupkachmiaji. Yuscha nunaka nekawai. ¹⁹ Wikia Silvanojai tura Timoteojaisha Yuse Uchiri Cristo Jesúsá chichamen atumin ujakmiajrume nuka yapajiasrikia ujakchamiajrume. Cristo timiauringkia nekasaintai. Tura asamtai iisha ni chichamengka tuke yapaijtsuk ni tímia nunisrik etserji. ²⁰ Yus tímia nunaka mash Cristo miatrusang umikmiayi. Tura mash umiku asamtai, iikia Yus maaketai titasar, Cristo Jesúsá naari pachisar nuka nekasaintai taji. ²¹ Tura Cristonu asakrin, iincha kakamtikramji nuka Yusketai. Tura winar ataram tusa eatmakmiaji. ²² Tura Yus ni Wakanin ii nintin engketramau asa, tuke wijai pujustinuitrume tusa iincha nintimtikramramiaji.✠

²³ Tura asamtai wikia atumin nukap aneayatun, Corintonam pujautirmin jiistan winichmajai. Yus nintirun nekau asa ¿nekasash taj? tusa nekarui. ²⁴ Atumka yanchuk Cristonu asakrumin, yamaikia ataksha Cristo: nekasampita titaram tatsujrume. Antsu miatrusrumek warastaram tusar, atum nintimtikratasar wakeraji.

2

¹ Tura wiki nintimtumasnak: Atumin jeanka ataksha wake mesemtikaijrum tusan, wikia yamaikia atumniaka jiischatattirme timiajai.

² Wi atumin jeamtai, wake mesekrum pujakrumningkia ¿yaachik winasha waramtikrusat? Atumek winaka waramtikrusminuitrume. ³ Tura asakrumin winaka wake mesemtikrukairam tusan, atumnaka jiischamiajrume, antsu wina waramtikrustaram tusan wakerajai. Tura asan papinak aatran akuptukmiajrume. Tura atumin jean wisha warasamtaikia, atumsha mash warasmintrum, tu nintimsan pujuyajai. ⁴ Wikia nuwik atumin aatkun, atumin napchau nintimtikratasnaka aatrachmiajrume. Antsu atumin nukap aneau asan napchau nintimsan, tura wake mesekan juutkamaikiakun atumniaka aatramiajrume.

Tunau takauka tsangkuratnuitai timiauri

⁵ Wikia nuwik papin aatkun, aints tunau takaun pachisan aatramiajrume. Nu tunau takauka winakeka wake mesemtikrukchamiayi. Antsu atumsha mash jumchik wake mesekmiarume. Turayatun nuna nangkamasnak chichakai tusan, “jumchik wake mesekmiarume” tajai. ⁶ Atumsha mash iruntraram pujusrum: Nu aintska iijai iruntrashti tinu asaram, yamaikia nuke ati tusaram tsangkatkataram. ⁷ Yamaikia nuka timiá wake mesek pujau asa, katurman nintimsai tusaram, ni tunaarisha tsangkuraram nunia yaingtaram. ⁸ Tura wait aneasrum, ataksha nu aints yamaikia aneau asaram: Anejme tusaram nekamtikiataram. ⁹ Wi nuwik aatramiajrume nunaka miatrusarang umirtukaraintash tusan nekaatasan aatramiajrume. ¹⁰ Atum chikich aintsu tunaari tsangkurarume nunisnak wisha tsangkurajai. Nekas tsangkuramu amataikia, atumjai metek nintimsarmi tusan, nu aintsu tunaarin tsangkurajai. Cristo nunasha nekawai tusan tajarme. ¹¹ Satanás iincha nepetamkai tusar, nu aints yamaikia tsangkuratnuitji. Satanás iincha itiur nepetamkatas wakerutmaji nusha nekaji.

Pablo Troasnum napchau nintimias pujusmauri

¹² Wikia Troas yaktanam Cristonam uwemratin chichaman etserkatasan jeamtai, ii Apuri takatri nekas pengker takakmasminun wainkamiajai. ¹³ Turayatun yatsur Titon wainkatatkaman tujinkan napchau nintimramiajai. Tura Titon eaktasan Cristonu ainaun ukukin, Macedonia nungkanam wemiajai.✠

Cristojai tunau nepetkatnuitji timiauri

✠ 1:22 (Efes. 1.14) ✠ 2:13 (Hech. 20.1)

¹⁴Tura Cristo Jesús tuke tunau nepetin asa, iincha tuke kakamtikramji. Tura asamtai ii nintin pujawapi tusar, ii tunía wekaaji nunisha ni kakarmarijai aints ainau ni chichamen nekamtikiawaitji. Tura asar Yuska maaketai taji.✠

¹⁵Iikia Cristo chichame etserin asar, nekapeamka iikia kungkuaji. Ii Yuse chichame ujakarmau asar, uwemrartin ainau tura mengkakartin ainausha ii kungkuamurinka nekaprartin ainawai. ¹⁶Tura mengkakartin ainauka ii kungkuaji nunaka jakamnau mejeaun nekapraminaji. Antsu uwemrartin ainauka tuke pujustinum wetin asar, kungkurman nekapraminaji. ¿Tura yaachia ningki nintimsangsha nunasha turamnawaita? ¹⁷Chikich ainau untsuri kuik jukitaj tusar, Yuse chichamenka yapajiasarang etserina nunisrikia iikia etsertsuji. Antsu Yus akupkamu asar, tura Cristo inatiri asar, Yus iincha jiirmaji tusar, pengker nintimsar Yuse chichame anangmatsuk paan etserji.

3

Yamaram chicham najanamu

¹Iikia nu tau asakrin, ¿atumsha ataksha ningki nintimtumasar: Wikia pengke aintsuitjai tumaminawai tuuk nintimrum? Chikich aints turina nunisrik: Ju aints nekasar Yuse chichame etserin ainawai tusar ¿atum papi aarmau inaktustinkitaj? ¿Tura nu papi aatrurtaram tusar iisha atum seatnukitaj? Atsa. ²Atumka ii papiriya nunisketrume. Ii chichame antuku asaram, atumka ii nintin papi aarmawa nunisrumek pujarme. Tura asakrumin chikich aints ainau mash atum itiur pujarme tusar paan waitmakar, papin aujinawa nunisarang nekawartinuitai. ³Atumka Cristo papin aar suramsawa nunisketrume. Nuka papi aatijaisha aarchamu wainiat, Yus ni Wakanijai aarmawaitai. Moisésan Yus kayanam aamtikramia nuniska aarchamuitai. Antsu atumi nintin aarmawaitai. ⁴Yus iincha: Wína chichamur etserkataram tusa akuptamkau asamtai, iikia Cristonu asar nuka timinuitji.

⁵Ii kakarmari atsau asamtai, iik nintimsarik Yuse takatringkia takakmaschamnawaitji. Antsu Yus ni kakarmarin suramsau asamtai nuka turaji. ⁶Tura yamaram chichaman Cristo najanamia nuna iincha: Pengker etserkataram tusa Yus nekaamtikramamiaji. Yaanchuik Moisésa aarmaurin umitsuk pujuinaunka tuke main armiaiyi. Antsu yamaikia Moisésa aarmaurin miatrusrumek umirkataram turamtsuji, antsu Yuse Wakani ii nintin engkemturmau asa, tuke pujutan suramji.✠

⁷Yus umirkatin chicham yaanchuikia kaya tauwa tumaunum aarmau ayayi. Tura Yus nu kayan aarmaun, Moisésan susam, ni yapii wincha jiitsumir amiaiyi. Tura timiá jiitsumir asamtai, Israel ainau Moisésa yapiin jiistatkamawar tujinkarmiaiyi. Turayat Moisésa yapiin wincha amia nu yaitik mushatmaki sakarmiaiyi. Moisés umirkatin chichaman umitsuk pujuinaunka maawartinun wainiat, Yus Moisésa yapiin winchaan wainmantikiamiyai. ⁸Yus umirkatin chichamka pengker ayat, yamaram chicham Yuse Wakani sukarta nuka nuna nangkamasang timiá pengkeraitai. ⁹Yus umirkatin chichaman umirinachmatai maawartinun wainiat, Yus Moisésa yapiin winchaan awajsamiaiyi. Antsu Cristo aints ainauti tunaarin sakturmaru asamtai, Cristo chichamengka Moisésa chichame nangkamasang timiá pengkeraitai. ¹⁰Nintimrataram. Nu yamaram chichamka timiá pengker asa, yaanchuik Yus Moisésan chichaman susamia nuna nangkamasang Cristo chichamengka timiá pengkeraitai. ¹¹Tura Moisés umirkatin chicham ukunmaka inaisartinun wainiat pengker ayayi. Antsu Cristo chichame tuke pujustinun sukartin aa nuka nuna nangkamasang timiá pengkeraitai.

¹²Tura asamtai iikia tuke Yusnum pujustin asar, pengké natsaamtsuk Yuse chichamengka paan etserji. ¹³Moisésa yapii winchari yaitas mengkakatin asamtai, aints ainau wainkarai tusa, yapiin panuijai nukumakmiyai. Antsu iikia turatsji.✠
¹⁴⁻¹⁵Tura Yuse paaniurin mengkakaun aints ainau wainkarai tusa, Moisés panuijai yapiin nukumakmia nunisarang Israel ainau Moisésa chichamen aujinak pujuinayat

¿warinkung taj? tusarsha nintimtsuk puju armiaiyi. Tura yamaisha nunisarang katuram nintintin asar, tuke paan antukaru ainayat, ni jii kusurua nunisarang nintiminawai. Antsu aints ainau paan nintimtikratnuka ii Apuri Cristoketai. ¹⁶ Tura asamtai aints ii Apurin umirinauka jii kusurua nunisarka ainatsui. ¹⁷ Ii Apuri nekas Wakanitai. Tura Yuse Wakani aintsu nintin engkema pujakka, nu aintsu nekas angkanmamtikui. ¹⁸ Tura asamtai Moisés ni yapiin panuijai nukumakmia nunisrikia pujatsji. Antsu iikia ispiya nunisketji. Iisha ii Apuri paaniurisha itiur awa tusar nekas asar, chikich ainausha paan nekamtikiatnuitji. Tura asar Yuse Wakani ii nintimaurin yapajiau asamtai, yaitasar ii Apuria nunisrik nintimsar pujaji. ✠

4

Yuse chichame tu etserji timiauri

¹ Yus iincha wait anentramrau asa, yamaram chicham etserkataram tusa akuptamkau asamtai, iikia yawetsuk tuke etserji. ² Antsu chikich ainau natsanpiaku aa nuna úukar turina nuka iikia inaisawaitji. Tura anangkartin ainau turina nuka iikia turatsji. Tura Yuse chichamengka iikia pengké jumchiksha yapaijtsuji. Antsu Yuska iincha jiirmaji tusar, ni chichame etserkursha, Yuse chichame aarmawa nunisrik etserji. Turakrinka mash aints ainau nuna antukar: Nekas Yuse chichamentai tiarat tusar turaji. ³ Tura Yusnum uwemratin chicham ii etserji nuka paantaitai. Tura waininayat mengkakarta inainau: Nu chichamka paanchawaitai tinawai. ⁴ Tura asaramtai iwianch ju nungka apuri asa, nu aints ainau Yusnum uwemratin chicham timiá pengker aa nunaka paan nintimrarai tusa, tura Cristo Yusea nunisang pujawapi tu nintimrarai tusa, jii kusurua nunisarang pujusarat tusa anangkamiyai. ⁵ Tura asamtai iik nintimtumaskria tu pujaji tusarkia, chichamka etsertsuji, antsu Jesucristo ii Apurintai tusar, ni chichamengka etserji. Tura Jesús iin anenmau asamtai, iikia atumi inatirinji taji. ⁶ Yus nu nangkamtaik teen: Paantin ati, tímia nuka ii nintincha paantin ati tusa nintimtikramramiaji. Jesucristo timiá kakaram aa nuka iincha: Yuse kakarmari tu awai tusa, nekamtikramatas ii nintincha paan nintimtikramramiaji. ✠

¿Itiur Yus nintimsar pujustinuita?

⁷ Ii kakarmari atsau wainiat, Yus timiá kakaram aa nuka iin pachitmas: Wína aintsru kakarmaringkia niinuchuitai, antsu winaruitai tusa, aints ainautin mash nekamtikramatas, ii namangke nuwe najanamua nunisang kakarmachu mesertinun wainiat, Yus ni kakarmarin engketramji. ⁸ Tura asamtai iikia timiá wait wajayatrik, wait wajamunmayangka jiiinkitnuitji. Tura itiurkachmin pujayatrik waurtsuji. ⁹ Tura aints pasé awajtamkurnisha iinka Yuska ajaprana ukurmatsji. Tura asamtai iin mestamrartas wakerutminaksha tujintraminaji. ¹⁰ Jesúsana maawartas wakeriarmia nunisarang iincha tunia wekaaji nunisha tuke mantamawartas wakerutminaji. Turayat mantamawarchau asaramtai, iikia tuke Jesúsana kakarmarijai iwiaakji. Tura jakachu asar, aints ainau Jesúsana kakarmarincha wainkarat tusar wakeraji. ¹¹ Tura Jesúsana asakrin, kintajai metek mantamawartas wakerutminaji. Tura asamtai ii namangkengka jakatin ayatrik, Jesús jakayat tuke iwiaaku puja nuka iin pujurtamji tusar, aints ainausha nekamtikiatnuitji. ¹² Tura asar atumsha tuke iwiaaku pujusmintrum tusar, iikia wait wajakar jakatin ayatrik, Yuse chichame etserji.

¹³ Yuse chichame tu aarmawaitai: “Yusen nekasampita tinu asan, Yusen pachisan chichakmiajai.” David tu aarmau asamtai, iisha nunisrik Yus nekasampita tau asar, tu chichaaji. ✠ ¹⁴ Yuska ii Apuri Jesúsana jakamunmaya inankimiyai. Tura asa iincha nunisang inantamkitnuitji. Tura atumjai metek ni pujamunam iincha juramkitnuitji tusar nekaji. ¹⁵ Tura asar atum yaingtasar iisha wait wajaji. Tura asakrin aints untsuri Yuse wait anengkratairi itiurak awa tusar, nunaka nekaawar, Yusen pengker awajinak maaketai tiartinuitai.

✠ 3:18 (Rom. 8.29) ✠ 4:6 (Gén. 1.3) ✠ 4:13 (Sal. 116.10)

¹⁶ Tura asamtai iikia napchau nintimtsuk pujaji. Ii namangkengka weamki weamtaisha, Yus ni kakarmarijaingkia ii nintinka kintajai metek kakamtikramji. ¹⁷ Tura ju nungkanam wait wajamuka wári nangkankatin asa nuka mianchawaitai. Tura yamaikia nukap wait wajayatrik ukunam paaniunam pujusar, nuna nangkamasrik nukap warastinuitji. ¹⁸ Tura asar ju nungkanam wait wajaji nuka yamaikia nintimtsuji. Antsu ii waittsuji nuka nekasar nintimji. Ju nungkanam wait wajamuka wári nangkankatnuitai. Antsu tuke pujustinka pengké nangkankashtinuitai.

5

¹ Yamaikia aintsti namangke nintimrarmi. Aintsti namangkesha jea tumau asa wári mengkatatnuitai. Tura ii jakar, nayaimpinam iinu namangke yamaram atinua nuka aintstikia najanachminun yanchuk Yus umismawaitai tusar nekaji. ² Ju nungkanam iwiaaku pujakrikia nekasar wait wajaji. Tura asar nayaimpinam yamaram namangjai pujustasar wakeraji. ³ Tura asar aints wejmakn entsawa nunisrik ii wakanisha ataksha yamaram namangnum engkemati tusar wakeraji. ⁴ Tura asar ju nungkanam iwiaaku pujakrikia wait wajakur wake mesemar pujaji. Turayatrik nekasar jakatasrikia wakeratsji. Antsu aints entsatin yamarman entsawa nunisrik yamaram namangjai tuke pujustasar wakeraji. ⁵ Yamaram namangken ii jukitnun najatramamiaji nuka Yusketai. Tura Yus: Yamaram namangnaka susatatarjarme tusa, nuna eemak ni Wakanin iin suramsawaitji.✠

⁶⁻⁷ Tura asamtai tuke pengker nintimsar pujaji. Yus yamaram namangken iin suramsatin aa nuka wainchayatrik, Yuska wínaka nekas surustinuapita, tu nintimsar pujaji. Tura junia namangjaingkia ii Apurijaingkia tsaniasrikia pujuschatnuitji tusar nekaji. ⁸ Turayatrik tuke pengker nintimsar pujaji. Tura junia namangka ukukir, yamaram namangjai ii Apurijai pujustasar wakeraji. ⁹ Tura asar iwiaaku pujakrisha tura jakarsha, ii Apuri tuke warartustasar wakeraji. ¹⁰ Mash aints ainautikia jakarkia nunia nantakir, ii Apuri Cristo pujamunam eemkar wajasakrinkia, ii turamurinja mash jirmastinuitji. Tura nuni wajasakrin pengker aa nuna turinauka pengker aa nuna jukiartin ainawai. Antsu pasé aa nuna turinauka pasé aa nuna jukiartin ainawai.✠

Angkan pujustinun pachis etserkamu

¹¹ Ii Apuri mash tunaarintin ainaun wait wajaktiniun susatin asamtai, iikia nu nekau asar, Cristo umirchau ainausha: Cristo umirkataram tusar chicharkur pujaji. Yuska iincha paan nekarmau asamtai, atumka ii turamuri paan nekaataram tusar wakeraji. ¹² Nu takur iik nintimsarkia: Pengke aintsuitji tumamtsuji. Chikich ainausha ningki nintimtumasar: Miajuitjai tumamsar chikich aintsu nintinka nekainachiat: Nuka mianchawaitai tinawai. Antsu atumka ii turamuri nekau asaram chikich aints ainausha tenapkesar nekaawarti tusaram pengker nintimtusum ujaktaram. ¹³ Tura asakrumin chikich ainausha iin pachitmasar: Waurinak tinawai nangkamiar turaminamtaikia, iikia Yuska pengker awajsatar tu pujaji. Tura paan nintimsar pujakrikia, atum yaingtasar tu pujaji. ¹⁴ Cristo iin timiá anenmau asamtai, ii turaji nuka Cristo anengkratairijai turaji. Tura nusha nekaji: Cristo mash aints ainautin uwemtikramratas jarutramkau asamtai, Cristonu ainautikia mash Cristo jakamia nuni iisha nijai metek jakawaitji taji. ¹⁵ Tura asamtai Cristo mash aints ainautin jarutramak nunia nantakmiayi. Nuni asamtai iwiaaku pujaji juwik ii wakeramuringkia najantsuk, antsu Cristo wakeramuri najanatnuitji. ¹⁶ Tura asamtai yamaikia junia nungkanmaya aints ainu nintiminawa nunisrikia nintimtsuji. Yaanchuikia aints ainu jiisar: Juka pengkeraitai, antsu auka mianchawaitai tinuyaji. Tura Cristosha pachisar tu nintimtinuyaji. Antsu yamaikia tuuka nintimtsuji. ¹⁷ Tura asar Cristonu ainautikia Yusnumia akiinaw asar, yamaram akiinawa nunisrik ainiaji. Ii yaanchuik tunau nintimtairingkia mash inaisar, pujut yamaram jukin asar, yamaikia ii nintimauringkia nekas yarmarmaitai.✠

¹⁸ Mash yamaram aa nunaka Yus turawai. Yaanchuik iikia tunaarintin asar, Yusjaisha nemasnaikiar pujuyaji. Tu puju arin, Cristo jarutramkau asamtai, yamaikia Yuse nemasengka atsuji, antsu Yus: Wína amikur ataram turammiaji. Tura yamaikia chikich ainausha: Yusjai nemasnaitsuk asataram, antsu atumi tunaari inaisaram, Wijai amikmataram tusaram, uwemratin chicham etserataram tusa, Yus iin akuptamkamiaji. ¹⁹ Nu tsangkurnaiyamu chichamka nuwaitai: Yus aints ainauti tunaarinka nintimtsuk pujus: Wijai nemasnaitsuk asarti, antsu ni tunaarin inaisar wina amikur wajasarti tusa, ni Uchirin Criston akupturmakmiaji. Tura iincha: Nu chicham chikich ainausha nekamtikiataram tusa akuptamkamiaji. ²⁰ Tura Cristo: Wína chichamur aints ainau ujaktaram tusa, iin akuptamkau asamtai, Yus chichawa nunisrik iikia atum chicharkur: Yusjai nemasnaitsuk asataram, antsu Yus amikmataram, tusar ujajirume. ²¹ Yus iincha tunarinchawa nunisrik pujarin jiirmastas wakerutmau asa, Cristoka tunaarinchautiat aints ainauti tunaarin sakturmartas tunau aintsua nunisang jakati tusa Yus wakerimiayi.

6

¹⁻² Yaanchuik Yuse chichame etserin Isaíasaa armauri nintimrarmi. Nuka tu aar-mawaitai: Yus chichaak:

“Uwemratin kinta jeau asamtai, ame seatmiame nuna anturkamjame. Yusnum uwem-ratin kinta jeau asamtai, wikia amincha yaingmajme,” timiayi.

Tu aarmawa nunisang yamaikia Yusnum uwemratin kinta jeayi. Tura yamaikia Yus seatin kinta jeayi. Tura asamtai iikia Yuse takatri takau asar, atum chicharkur: Yuse anengkratairi nintimtsuk pujusairam tusar ujajirume.

Pablo ni wait wajakmauri pachis etserkamuri

³ Aints kichkisha Yuse chichame etserin ainautin pachitmasar pasé chichartamkarai tusar, iikia tuke pengker pujustasar wakeraji. ⁴ Tura Yuse inatiri asar, itiur pujuinawa tusar, aints ainausha pachitsuk nekaawartinuitai. Iikia wait wajayatrik, tura yuumaya-trik, tura yumtin pujayatrik, Cristo takatringkia tuke inaitsuk takakmakur pujaji. ⁵ Iikia awattai ayaji, tura kársernum engketai ayaji, tura mantamawartascha papeetmin armi-ayi. Nuniasha taka takakmaka pimpikir pujuyaji. Nuniasha kanutskesha tsawain ayaji. Tura tsukajaisha wait wajayaji. ⁶ Tura timiá wait wajayatrik, tuke tunauka nintimtsuk pu-jujuyaji. Tura chicham nekas aa nu nekau ayaji. Tura jaimiasar pujuyaji. Tura aintska mash pengker awajnujuyaji. Yuse Wakani ii nintincha pujurtamnuyaji. Tura chikich ainausha nekasar anen ayaji. ⁷ Tura nekas chicham etsernuyaji. Tura Yuse kakarmarijai Yuse takatrisha takakminuyaji. Iikia Cristo inatiri asar, tunauka nintimtsuk Yuse chichamejai iwianchka nepetnuyaji. Tura iin pachitmasar pasé chichartaminamtaisha, iikia Cristo nekasampita tinu asar tunauka nepetnuyaji. ⁸ Chikich ainau iin pachitmasar: Pengker aintsuitai turaminaji. Antsu chikich ainausha iincha pachitmasar katsekraminaji. Tura chikich ainauka iin pachitmasar pengker chichartaminaji. Antsu chikich ainausha iin pachitmasar pasé chichartaminaji. Nekas aa nu chichaarín waininayat, iin pachitmasar waitrinak: Nuka anangkartin ainawai turaminaji. ⁹ Chikich aints iincha waitmakar wishikraminak: ¿Warí aintsuita? turaminaji. Antsu chikich ainausha nekasar itiur pujuinawa tusar paan nekarminaji. Iikia jaachak wajakmiaji. Turayatrik tuke iwiaakji. Tura mantaminachu asaramtai jachauyaji. ¹⁰ Tura wake mesekar pujayatrik, tuke pengker nintimsar pujaji. Tura kuikiartichu ayatrik, untsuri aints ainau yainuyaji. Ii waririsha pengké atsau wainiatrik: Yusnau aa nuka mash iinuitai taji.

¹¹ Corintonmaya yatsur ainautiram, iikia ii nintimaurisha uutsuk mash paan ujaya-jrume. ¹² Iikia atumin tuke inaitsuk pengker nintimtusar pujarin wainiatrumek, atumka iin pachikratsaram tuuka nintimsarmeka pujatsrume. ¹³ Tura asakrumin aints ni uchirin chicharinawa nunisnak atumin chicharjarne. Atumsha nunisrumek winasha atumi nintimmauri paan ujakataram tusan seajrume.

¿Cristo iwianchjai tsaning pujusminkai?

¹⁴ Atumka Cristo umirchau ainaujaingkia tuke tsaningkrumka pujusairap. ¿Cristo umirkau ainau Cristo umirchaujai metekak nintimina? Atsa. ¿Tura paantin teejai metek aminkai? Atsa. Tura asamtai ¿Cristo umirkauti itiurkarik Cristo umirchau ainaujaisha tsaningtaij? ¹⁵ ¿Cristo iwianchjai tsaning pujusminkai? Atsa, tsaningchamnawaitai. ¿Tura Cristo umirkau Cristo umirchaujai tsaningkiar pengkerak pujusminui? Atsa. ¹⁶ ¿Tura chikich ainau Yuschau waininayat, nuna yusri jeen nekas ii Yusri jeejai metekkai? Atsa, pengké metekchawaitai. Antsu iikia ii Yusri tuke iwiaaku puja nuna jeea nunisketji. Yus nuna pachis chichaak:

“Níjai tsaniasan pujustinuitjai. Tura nijai wekaasatnuitjai. Tura ni Yusri atinuitjai. Turamtai nisha wína aintsur artinuitai,” timiayi. ¹⁷ Nunia Yus chichaak: “Wína umirtichu ainamunmaya jiinkitaram. Turaram níjai tsaningkrum pujusairap. Tura tunauka takasairap. Tunau takatsuk pujakrumningkia, wikia atumin jukitnuitjarme. ¹⁸ Tura asan wikia atumi Apaachiri atinuitjai. Turamtai atumka wína uchir tura wína nawantur atinuitrume,” tusa ii Apuri nekas kakaram aa nuka timiayi.

7

¹ Aneetir ainautiram, Yus iincha nu chichaman akupturmaku asamtai, iikia yamaikia tunau takatsuk asarmi. Tura tunau nintimtsuk asarmi. Tura iikia: Ii Apuringkia Yusketai tinu asar, Yus miatrusrik umirkaru armi.

Pablo warasmauri

² Ataksha iikia pengker nintimtunisar pujusarmi. Iikia aintska kichkisha paseeka awajsachmiaji. Tura aintska kichkisha paseeka nuiniarchamiaji, tura aintska kichkisha anangkachmiaji. ³ Atumin wasmatkataj tusanka, nunaka tatsujrume. Antsu yaanchuik timiaja nunaka ataksha tajarme: Wikia atumin aneau asan, jaaknasha atumjai jakatasan wakerajai. Tura iwiaaku pujaknasha atumjai pujustasan wakerajai. ⁴ Wikia atumin pachisan pengker nintimtusar pujurjarme. Tura yamaisha winaka pengker nintimtikruru asakrumin, wait wajayatnak nintirka nukap waraawai.

⁵ Tura Macedonianam jean, namangkrusha pimpikin asamtai, angkan pujutsuk tuke wait wajayajai. Aints ainau iijai maanikiartas wakerinau asaramtai, tura Cristo umirin ainau Cristo umirtan inaisarai tusan nintirsha kurarmayi. ⁶ Wikia napchau nintimsan pujamtai, Yus napchau nintimsar pujuinauncha pengker nintimtikin asa, ii yachí Titon akupturkami. Tura asa winasha pengker nintimtikrurmayi. ⁷ Turamtai Tito juni taa, atum wína pengker nintimtursamarume nuna ujatkeyi, tura wína waitkatasrum nukap wakerutamun wína ujatkau asamtai wikia warasmajai. Tura aints tunau turamtai, atum napchau nintimtikmakuram, tura atum wína pengker nintimturmaun ujatkau asamtai, wikia nuna nangkamasnak nukap warasmajai.

⁸ Tito wína ujabat: Ame Corintonam papi akupkamame nuna aujsar nukap wake mesekar pujuarmiayi tusa, ujatkau wainiatun, yamaikia napchau nintimtsuk pujajai. Yaanchuik nu papin atumin akuptukan, atumin nukap wake mesemtikiau asan, napchau nintimramiajai. Turayatrum tukeka wake mesekrumka pujuschamiarume, antsu jumchik arusrum ataksha inangkarmiarume. ⁹ Atum nukap wake meseku asakrumningkia, wikia waraatsjai. Antsu wake mesekrum atumi nintimauri yapajiau asakrumin, wikia nuna nekaan waraajai. Tura asaram Yus pengker awajsamiarume. Tura asakrumin wikia nu papin akuptukmiajrume nujaingkia atumniaka paseeka awajsachmiajrume.

¹⁰ Yusen pengker awajsartas wake mesekar pujuinauka ni tunaarin inaisaru asar uwemrartin ainawai. Tura asar napchau nintimtsuk pujuinawai. Antsu junia nungkanmaya ainau ni tunaarin inaitan nakitinau asar, wake mesekar pujusar, nunia jakar tuke mengkakartin ainawai. ¹¹ Atumsha nintimrataram. Yus pengker awajsaram wake mesekrum pujau asaram, wi aatjarme nunisrumek tunaarintin atumjai pujau atumnia wári jiiktasrum wakerukmiarume. Tura winasha ayamrutkatasrum wakerutkamarume.

☆ 6:16 (Lev. 26.12; 1.Cor. 3.16;6.19;10.21)

Tura aints tunau wajasmia nuna tunaarisha nakitramiarume, tura Yus shamakrum nu aintska kajerkamiarume. Nu turau asaram, nu aintsu tunaaringkia pengké nakitaji tusaram ujakkamiarume. ¹² Yaanchuik wi papin atumin akuptukmiajrume nuna: Nu aintska tunaarin inaisati tusan aatramiajrume. Tura nuna apari wake mesekmia nuka ataksha pengker nintimrati tusan aatramiajrume. Antsu nuna nangkamasrumek Yus umirkau asaram, iincha anengkratrume tusan atumin nintimtikratan aatramiajrume. ¹³ Tura wi timiaja nusha mash umiku asakrumin, iisha pengker nintimsar pujaji.

Tura Tito pengker nintimrati tusaram, atumsha mash pengker awajsau asakrumin, Titosha waraak nunasha iincha ujatmaku asamtai, nuna nangkamasrik iisha nukap warasmaji. ¹⁴ Wikia atumin ujakmiajrume nuka mash nekasaintai. Tura wisha Titon atumin pachisan: Nuka pengker aints ainawai, timiajrume nunasha Titosha nekarmamiarume. Tura asakrumin iikia atumin pachisar Titon ujakmiaji nunaka: Nangkami tawai tutsuk, antsu nekasaintai Titosha timiayi. ¹⁵ Tura iin jiyatmaktas winitramtsujiash tusaram shamayatrum, ni tía nuka mash miatrusrumek umirkamiarume. Tura asakrumin Tito nuna nintimias nukap waraawai. ¹⁶ Tura asamtai wisha nunisnak atum nekas pengker turamurmin nekau asan, pengker nintimsan waraajai.

8

Yusnau ati tusar kuik irumratniun pachis timiauri

¹ Yatsur ainautiram, Cristonu ainau Macedonianam pujuinaun Yus ni wait anengkratairi nintimtikrau asamtai, nuna yamaikia atumin nekamtikiatasan wakerajrume. ² Nisha itiurkachminnum pujuinayat nukap warainawai. Tura kuikiartichu ainayat, kuikiartin ainaun nangkamasarang ampitsuk: Ii kuikiari Yusnau ati tusar mash susarmiayi. ³ Nuka kuik ampirmaunaka susacharmiayi, antsu pengker nintintin asar, kuikiari jumchik au waininayat, ningki wakerinak ni kuikiarin Yusen susarmiayi. Wikia nuna wainkau asan ujaajrume. ⁴ Tura iincha seatraminak: Wait aneasrum, iisha Cristonu ainau yuuminak pujuinau kuik akuptuktin tsangkatrutaram turamiarmiaji. ⁵ Tura iik nintimsar: Kuikiachin jumchik Yusen susachartimpiash, tu nintimsar pujarin, nuna nangkamasarang nukap susarmiayi. Antsu nuwá eemkar: Iikia Yusnau asar, iinu aa nuka mash Yusnawaitai tusar, nunia iincha: Iisha yaingtatjirme turamiarmiaji. ⁶ Tura asaramtai Tito yaanchuik atumin jea, kuik irumratniun nangkamamia nuka ataksha turati tusar, atumin akupkatar wakeraji. ⁷ Atumsha Cristo tuke nekasampita tusaram, tura pengker nuikiartin asaram, tura Yuse chichame pengker nekau asaram, tura Yus miatrusrumek nintimrau asaram, tura iincha miatrusrumek anengkratu asaram, Cristonu ainau yuuminak pujuinau wait anentakrum kuikiasha nukap akuptuktinuitrume.

⁸ Antsu wína umirtuktaram tusanka nunaka tatsujrume, antsu Macedonianmaya ainau chikich ainaun miatrusarang yaingkiartas wakerinau asaramtai, atumin nuna nekamtikiatasan wakerajrume. Tura atum nekasrumeash Yus anearam tusan, chikich ainaun nekamtikiatasan wakerajrume. ⁹ Atumka ii Apuri Jesucristo wait anengkratairingkia tu awai tusaram nekarme: Nuka nayaimpinam pengké yuumatsuk pujayat, ju nungkanam yuumak pujumiayi. Tura ju nungkanam yuumak pujau, atumin anenmak jarutramkau asamtai, atumsha nayaimpinam yuumatsuk pujustinuitrume.

¹⁰ Wikia tu nintimsan pujajai tusan, atumin yaingtasan tajarme. Chikich musach atumek wakerau asaram, pengker nintimsaram kuik irumat nangkamamiarume. ¹¹ Tura yaanchuik pengker nintimsaram kuik irumratarum wakerimiarme nuka yamaisha turamin amatikia turataram. ¹² Nintimrataram. Aints ni kuikiarin Yusen susatas wakeramtaikia, Yuska nu aintsu kuikiarin takakun nekau asa, pengker nintimias nu kuikianka jurawai. Antsu kuikian takakchau ainaun: Kuik wína surustaram tusangka seatsui.

☆ 8:5 (Rom. 15.26)

¹³ Tura chikich aints yayaakrum, atumka yuumaktaram tusanka tatsujrume. Antsu mash metek yuumatsuk pujusmintrum tusan nunaka tajarme. ¹⁴ Yamaikia niisha yuuminak pujuinau asaramtai, atumsha niisha yaingtinitrume. Tura chikich kintati atumsha yuumakrumin, niisha nunisarang atumnasha yainmakartinuitai. Tura asamtai mash yuumatsuk pujustinitrume. ¹⁵ Yuse chichame nunaka pachis tu aarmawaitai: "Aints nukap jukiarmia nuka ampirmaurin chikich ainaun susaru asar ampichu armiaiyi. Tura ni ampirmaurin chikich ainaun susarmau asar, nusha yuumatsuk pujuarmiaiyi."☆

Pablo Titon Corintonam akupkamuri

¹⁶ Wi atumin miatrusnak yaingtasan wakeraja nunisang Yus Titoncha nintimtikrau asamtai, wikia Yusen maaketai tajai. ¹⁷ Wi Titon: Weta tamau asa: Ayu turutui. Tura niisha atumin anenmau asa, ningki wakerak atumin irastas winitatui.

¹⁸ Tura Titojai tsanias weti tusan, ii yachiin chikichan akuptuktatjarme. Nuka Yusnum uwemratin chichaman nekas pengker etseru asamtai, Cristonu ainau mash niin pachisar pengker chichainawai. ¹⁹ Tura Cristonu ainau iruntramunam: Nu aints Titojai wekaasati tusar, tura nijai kuikian irumrarti tusar inaikiarmiaiyi. Tura ii Apuri maaketai titasar, iik wakerakur yuuminau wait anentakur kuik akuptuktasar turaji tiarmiaiyi. ²⁰ Tura asar iin pachitmasar: Ningki kuikian wakerinak tinatsuash turamiarai tusar, Titojai tsanias ii yachí kuikian irumrarat tusar akupaji. ²¹ Tura asar Yus wainmaunum tura aints ainau wainminamunam ii turaji nuna mash paan nekaawarat tusar turaji. ²² Nunia ju jimia aintsjai tsanias wearti tusar chikichan akuptuktatjirme. Nuka Cristo takatrin tuke takakmastas wakerawai tusar nekaji. Tura atumin nekas pengker nintimturmau asa, yamaikia nuna nangkamasang Cristo takatrin eemtikiatas wakerawai. ²³ Antsu Titon pachisar inintrinamtaikia: Juka Pablojai tuke tsanias wekainuitai titaram. Tura atumin yainmaktas tuke Yuse chichamen etserui titaram. Tura ii yachí jimiar Titojai tsaniasar wekainuncha pachisar inintrinamtaikia: Juka Criston pengker awajartas, junia Cristonu ainau mash ni yachiin akupkari titaram. ²⁴ Tura atumi anengkratairin Cristonu ainau mash nekaawarti tusaram, ii yachí ainau pengker wainkataram. Nu turakrumningkia atumin pachisar timiaji nuka pengke aintsuitai tiartinuitai.

9

Cristonu ainaun kuik akuptukmauri

¹⁻² Atumka Cristonu ainau kuik akuptuktasrum wakerarme nuna nekau asan, nuna pachisnaka aatrachminuitjarme. Atumsha kuik susatasrum wakerau asakrumin, wikia Macedonianam wekaakun atumin pachisan: Acaya nungkanam pujuinau chikich musachti kuik irumtan nangkamawar yamaisha tuke atumin yainmakartas wakerinawai tajai. ³ Tura atumin pachisan: Yuminak pujuinaun nekasar kuikian akuptukartas wakerinawai, timiaja nunaka nangkami tawai turutiarai tusan wikia nakitajai. Tura asan kuik irumraram umistaram tusan, ii yachiin kampatam akupinajai. ⁴ Tura wi ukunam Macedonianmaya Cristonu ainaujai atumin jeakrin, atum kuik irumratin umitsuk pujakrumka natsaartinuitrume. Tura ii atum pachisar: Kuik irumratniun umisari, tinu asar, iisha nunisrik natsaartinuitji. ⁵ Tura kuik surimshim irumraram tusan yamaikia tajarme: Atumek nintimsarmek: Iikia yuuminak pujuinau kuikiaka akuptuktatji tinu asaram, nu kuik eemkaram irumraram. Turakrumin ii yachí ainau atumin eemkar jear, kuikian surimtsuk suamun irumrarti tusan akupajai. Nunia wi atum mash irumraram pujarmin jeatatjai.

⁶ Ju chichamsha nintimraram: Aints arakan jumchik araangka, jumchik juuktinuitai. Antsu arakan nukap araangka, nukap juuktinuitai. Kuik suamusha nunisketai. ⁷ Tura aints mash ni nintijai nintimina nunisarang ni kuikiarin pengker nintimsar Yusen susarti tajarme. Aints pengker nintimias Yusen ni kuikiarin sua nunaka Yuska aneawai.

☆ 8:15 (Ex. 16.18)

Tura asamtai: Nakitayatnak suajai tuuka nintimrashtinuitji. Tura: Kuik susata turutinamtai suajai tuusha nintimrashtinuitji. ⁸ Yuska atumin tuke anenmau asa, atumka tuke yuumatsuk pujustaram tusa, pengker aa nuna mash suramtanka tujintatsui. Tura asa chikich aints nukap yaingtinun atumnasha nukap suramsatnuitrume. ⁹ Yuse chichame tu aarmawaitai:

“Aints yuuminak pujuinaun nukap susau asamtai, Yuska ni pengker turamurinka pengké kajinmatsui.”[✠]

¹⁰ Tu aarmau asamtai, Yuska aints ainautin: Arak araataran, tura yutasha yuwataram tusa, ii yuumamurin suritramtsuk tuke sukartin asa, arakan tsapamtikui tura nukap neremtikui. Tura atum pengker turamun pachis nunaka taku tawai.[✠] ¹¹ Atum: Chikich ainausha yaingtaram tusa, Yuska waring achat mash atumnasha suramsatnuitrume. Kuik irumramu akupturmaktatrume nu iisha mash jukir, yuumin ainausha susatnuitji. Turakrin nuka Yusen nukap maaketai tiartinuitai. ¹² Tura ni yuumamuri susamu asar, Cristonu ainu yuuminak pujuinausha yuumatsuk pujusartinuitai. Tura atum yaingmau asar, nuna pachisar Yusen nukap maaketai tiartinuitai. ¹³ Atumka yuuminu kuik akuptukmau asar, Cristonam uwemratin chichaman miatrusarang umirinawai tusar nekarmawartinuitai. Tura asar: Nekas Yuska juuntapita tiartinuitai. Tura atumi kuikiari surimtsuk susamu asar, niisha Yusen maaketai tiartinuitai. ¹⁴ Tura yuuminu kuik akuptuktaram tusa, Yuska atumin nintimtikramrau asamtai, atumsha wait anentakrum kuik akuptukmau asar nu kuikian jukiari ainu atumin pachisar Yusen seatramiartinuitai.

¹⁵ Yuska ni Uchirin suritramtsuk iin akupturmaku asamtai, iikia tuke inaitsuk Yuska maaketai tiarmi.

10

Pablo ni takatrin pachis chichasmauri

¹ Aints ainu wina pachisar chichartinak: Pablosa iijai pujakka mianchawapita, antsu arák pujus kartan akupturmak: Miajuitjai tusa, kakarman chichaayi turutinawai. Tu turutinau wainiatnak, Cristo winaka pengker nintimtura asamtai, tura wait anentruru asamtai, wikia Cristo nintimia nunisnak atumin chicharjarme. ² Tura atumi irutkamuri iin pachitmasar chichainak: Junia nungkanmaya ainawa nunisarang pujuinawai, tinaunka ¿waruka nusha tarume? tusan chicharkatnuitjai. Tura iin pachitmasar nangkamiar tsanuminak pujuinamtaikia, wisha atumin jeamtaikia, nu aints ainaun kakarman chicharkai tusaram Yus seatritaram. ³ Iikia ju nungkanam pujakrishia, junia nungkanmaya maanina nunisriki iikia maaniatsji. ⁴ Junia nungkanmaya ainu nangkijai maaninawai. Antsu ii nangkingkia Yuse kakarmarintai. Nujai iwianchi kakarmari nepetji. ⁵ Tura asar junia nungkanmaya ainu nangkami nintimtainkia Yuse kakarmarijai nepetji. Tura Yus tu pujawai tusar, nekatan nakitinayat ningki nintimsar: Nekau aintsuitji, tinausha Yuse kakarmarijai nepetji. Tura Cristo tuke pengker umirkarmi tinu asakrin, junia nungkanmaya ainu nintimtairingkia waring achat mash tu awai tusa iincha nekamtikramji. Ju nungkanmaya ainu nintimina nuka nintimtsuk pujakur iwianchi nintimtairisha nepetji. ⁶ Tura atumka Cristo miatrusrumek umirkurminkia, nuniangka chikich ainu nangkamiar Cristonuitjai tinayat, Criston umirtsuk pujuinamtaikia, ni turamuri pachisar chicharkatnuitji.

⁷ Atumka aints ainu itiu nintiminawa tusarmeka paanka nekatsrume. Antsu aints: Wikia Cristonuitjai tauka iincha pachitmas: Wiya nunisarang Cristonu ainawai, tu nintimratnuitai. ⁸ Tura Yus ni kakarmarin wina surusu asamtai: Wina chichamur umirtuktaram takuncha natsaarchatnuitjai. Atum mengkakat tusangka, Yuska wina akuptukchamiayi, antsu Yus miatrusrumek umirkataram tit tusa, wina akuptukmiayi. ⁹ Tura asamtai atum shamruktaram tusanka papinka akuptatsjarme. ¹⁰ Antsu wina pachisar: Niisha papin aar kakarman chichartamji. Antsu ni taa mianchawaitai, tura asamtai ni chichaamuringkia pachischamnawaitai turutinawai. ¹¹ Turutinawau nunasha

[✠] 9:9 (Sal. 112.9) [✠] 9:10 (Isa. 55.10)

nekaawarti: Iikia arák pujayatur, papi aarar chicham akupaji nunisrik atumjai pujakriki umiktatji.

¹² Aints ningki nintimtumasar: Iikia timiá pengkeraitji tinawainiatrik: Iikia nu aintsjai metekaitji tichamnawaitji. Tura niya tumawaitji tichamnawaitji. Nu aints ainauka ningki nekapmaminawai. Tura nangkamiar mai nuwamtak chicharnainak: Iikia timiá pengkeraitji tumaminauka nintinchau ainawai. ¹³ Antsu Yus tu nintimsuk asataram, tinu asamtai, iikia nu aintsjai metekaitji tichamnawaitji. Antsu Yus tu takakmastaram tusa akuptamu asa, iinka atumin jeatnun tsangkatramkamiaji. ¹⁴ Yus iin akuptamchamtaikia atumin jeachminuyaji. Antsu Yus iin nekas akuptamkau asamtai, iiyá eemkir atumin Cristo chichame ujaimiajrume. ¹⁵ Tura ukunam chikich aints Cristo chichamen etserin jear, atumin yainmakaru asaramtai, nu aintsu takatringkia ii umismiaji tatsuji. Antsu atumka miatrusrumek Yus nintimsaram pujakrumningkia, Yus wakera nunisrik atum nukap yaingtasar wakeraji. ¹⁶ Tura atumin jear, ii takatri Corintonam umisar, nuniangka nangkamakir, chikich nungka ainamunam Yusnum uwemratin chicham etserkatarasar wakeraji. Antsu chikich ainawu takatrin pachisriki: Nu takatka iik takakmasmaji tichatnuitji. ¹⁷⁻¹⁸ Aints ningki nintimtumas: Pengker takakmasjai taunaka ii Apuringkia: Pengker takakmame tatsui. Antsu ii takatri tu awai tusa, ii Apuri ningki nekau asa: Wína takatruka pengker takakmame, titinuitai. Tura asamtai aints ainawu: Miajuitjai tumamtsuk, antsu Yusnak: Juuntapita tiartinuitai.

11

Pablo anangkartin ainaun pachis chichasmauri

¹ Yamaikia nintinchau chichainawa nunisnak jumchik atumin chicharkatasan waker-ajrume. Tura asamtai wait aneasrum tsangkuhurtaram. Tura nekasrum anturtuktaram. ² Wiyá atumin Cristo chichamen etserkau asamtai, Cristonu wajasmiarume. Tura asakrumin yamaikia anangkartinu chichame umirkairap tusan, nawan aintsjai tumichu kichik aintsu ninumkati tusa, ni apari suruku asa, chikichjai pujuschatu tusa kasmatniayi. Yuscha nunisang ni aintsri ainawu timiá anenmau asa, chikich yus umirtsuk asataram tusa, ni aintsrin kasmatak pujawai. Wisha nunisnak atumin aneau asan kasmatajrume. ³ Nu nangkamtaik napi anangkartin asa, Evan anangkamia nunisarang nu aints ainawu atumin anangkramawarai tusan napchaw nintimjai. Tura atum tuke pengker nintimsaram Cristo miatrusrumek umirkayatrum, atumin yamai anangkraminamtai, Cristo umirat inaisairam tusan napchaw nintimjai. ⁴ Tura asamtai aints Yus akupkachmautiat atumin jeartamiar, ii Jesús pachisar chicham etserji nunisarka etsertsuk, antsu Jesús pachisar niish etserinawu wainiatrumek: Jusha pengkeraitai tusaram anturume. Tura Yuse Wakani pachisar ii etserji nunisarka etsertsuk, chikicha wakanin pachisar niish etserinawu wainiatrumek: Jusha pengkeraitai tusaram anturume. Tura Yusnum uwemratin chicham ii etserji nunisarka etserinawu wainiatrum, antsu chikich chichaman uwemrashtinun etserinawu wainiatrumek: Jusha pengkeraitai tusaram anturume. ⁵ Tura nu aints ainawu Yuse chichamen timiá shiirman etserinawu tinawu wainiatun, wína nangkatusarka Yuse chichamenka etserinatsui, tu nintimsan pujajai.

⁶ Wikia antukchamnaun chichaw ayatnak, Yuse chichamen paan nekajai. Tura atumjai pujakun, atumin nu chichamnasha tuke nekamtikiamjarume.

⁷ Tura mianchaw asan, uwejrujai takakmknasha, atumin pengker awajsatasan akirkataram tutsuk, antsu kuikiachujai nangkamin Yusnum uwemratin chichaman atumin etserkamiaja ¿nu pachisrumek tunaawitai tarum? ⁸ Atumin Yuse chichamen etserkatasan chikich nungkanmaya Cristonu ainawu kuikiarin jukin, nujai yuumamurnaka sumarmunuyajai. ⁹ Tura atumin pujusan, kuikian yuumaknaka atumniaka seachmiajrume. Antsu Macedonianmaya Cristonu ainawu jear, wína yuumamurnaka surusarmiayi. Tura asan atumniaka: Kuikiaram surustaram tusanka seachuyajrume, tura yamaisha kuikianka seashtatjarume. ¹⁰ Cristo nekas chichaman wínaka nekamtikruau asamtai,

☆ 11:3 (Gén. 3.1-5) ☆ 11:9 (Fil. 4.15-18)

Acaya nungkanmaya ainau wína pachitsar: Nuka ii kuikiarinka pengké nakitawai, tuke turutiartatui tusan nekajai. ¹¹ ¿Atumin aneachkunak tu chicharjaram? Atsa, wikia atumin nekasan nukap aneau asan tu chicharjarme. Nunaka Yuska nekawai.

¹² Tura wi turaja nunaka tuke turatatjai. Chikich chichaman etserin ainau ningki nintimtumasar: Iikia Pablo tura nunisrik turaji, tinu ainau nuna turutiara tusan, wikia Yuse chichamen yamaikia etserja nunisnak tuke etserkatatjai. ¹³ Tura asan nunasha tajarme: Nu aints ainau Yus akupkachmau asar anangkartin ainawai. Tura asar Cristo iin akuptamkamji, nangkamiar anangminak tinawai. ¹⁴ ¿Tura auka waruka timiá shiirmancha chichaina? tuuka nintimrashtinuitai. Satanás tuke anangkartin asa, Yuse awemamuri paanniunam pujawa nunisang wantinui. ¹⁵ Satanás tu wantinu asamtai, ni inatiri ainausha: Nekasar iikia pengker aintsuitji tusar, Yuse inatiria nunisarang wantininawai. Antsu anangkartin asar, ni tunaarjai metek tuke wait wajaktinnum jeartinuitai.

Pablo ni wait wajakmauri pachis ataksha etserkamuri

¹⁶ Ataksha nunasha tajarme: Aints kichkisha wína pachitas: Waurkawitai tu nintim-tursastinuitai. Antsu tu nintimtursaram pujakrumningka, wisha wiki nintimtumasnak: Miajuitjai tumamtiasan, waurinak chichainawa nunisnak chichaktin tsangkatruktaram. ¹⁷ Wi yamaikia taja nunaka ii Apuri tita turutchau wainiatnak wikia wiki nintimsanak: Miajuitjai tusan, waurinak chichainawa nunisnak chicharjarme. ¹⁸ Junia nungkanmaya ainau untsuri: Miajuitjai tumaminamtaikia, wisha nunisnak: Miajuitjai tusan, jumchik atumin tu chicharkatatjarme. ¹⁹ Atumka nekawaitjai tayatrum, waurinak chichainau wainiatrum, pengker nintimsaram anturume. ²⁰ Aints atumin inatminak, tura atumnau aa nunaka juwinak, iisha miajuitji tusar, atumin yapiin awataminamtaisha, atumka achikmawa nunisrumek pujayatrum, nu aintsu chichame anturin arume. ²¹ Wikia natsaamayatnak atumin tajarme: Iikia kakaichu asar, atumjai pujakrishu tuuka pujuschamijai.

Antsu waurinak chichainawa nunisnak chichaayatnak nunasha tajarme: Chikich ainau miajuitjai tumamsar chichainawa nunisnak wisha chichakminuitjai. ²² Niisha hebreo ainamtaisha, wisha nunisnak hebreo aintsuitjai. Tura niisha Israela wearinjai tinamtaisha, wisha nunisnak Israela wearinjai. Tura niisha Abrahamama wearinjai, tinamtaisha, wisha nunisnak Abrahamama wearinjai tajai. ²³ Tura niisha: Cristo inatirinjai tinamtaisha, wisha nuna nangkamasjetjai. Antsu nunaka takun waurua nunisnak chichaajai. Wikia nu aints ainaun nangkamasnak kakarman takakminuitjai. Tura nu aints ainaun nangkamasnak kársernum untsuri engkeamuitjai. Tura nu aints ainaun nangkamasnak wikia awatramuitjai. Tura nu aints ainaun nangkamasnak untsuri jaachak wajakmiajai. ²⁴ Tura achirkar judío ainu nuwap chapikmarmaujai awá awataka treinta y nueve (39) awaturarmiayi. Tura ataksha achirkar, tura ataksha achirkar, cinco (5) achirkar nunisarang awaturarmiayi. ²⁵ Numijaisha kempatam katsumrukarmiayi. Tura mantuwartas kayajai tukuriarmiayi. Tura kanujai wekaakun juun entsanam kempatam ukanmiajai. Chikich kanu ukanmatai, wikia kichik kinta kashisha, tura tsawaisha juun entsanam taunum achimkan nanasmiajai.✠

²⁶ Wikia jinta wekaa wekaaka nukap wait wajayajai. Tura entsa nujangkruamtai, kat- ingtatkaman wait wajayajai. Tura jinta wekaaknasha, kasa ainu achirkar mantuwarai tusan, tura wi weau ainausha, tura judío chu ainausha wína achirkar mantuwarai tusan shamnuyajai. Tura yaktanam pujusan, wína achirkarai tusan nintimnuyajai. Tura aints atsamunam pujusan, pachim ainu yuruwai tusan shamnuyajai. Tura juun entsanam ukani tusan shamnuyajai. Tura aints nangkamiar: Iisha Cristonuitji tusar, Cristonu ainaun anangkawarai tusan nintimnuyajai. ²⁷ Wikia taka takakmaka yaweyajai. Tura kanutskesha tsawainuyajai. Tura yutancha yuumakun yaparnuyajai. Tura kitamtancha

✠ 11:25 (Hech. 14.19)

kitamnuyajai. Tura untsuri kinta ijarman pujuyajai. Tura entsatirnasha yuumakun tsetsekjai wait wajayajai.

²⁸ Tura nuna nangkamasnak ¿Cristonu ainau chikich chikich yaktanmasha itiuur pujuinawak? tusan kintajai metek nintimnuyajai. ²⁹ Tura Cristo umirin kakainachmataisha, wisha nunisnak kakarchamin nekapniajai. Tura aints ainau: Cristo nemarkin tunau takasti tusar nintimtikinamtaisha, wisha natsaamakun tunau takamtikinaun kajerniajai. ³⁰ Wiki nintimsanak: Miajuitjai tumamtanka nakitajai. Antsu wina pujutrun pachisan chichaaknaka, wi wait wajakmaurun pachisan chichastatjai. ³¹ Wi taja nuka nekasaintai. Yus nunasha nekawai. Ii Apuri Jesucristo Apaachiri asamtai, tuke Yuska maaketai titinuitji. ³² Wi Damasco yaktanam jeamtai, juun apu Aretas chikich apun: Nu yakta apuri ata tusa inaikiamu asa, ni suntari ainaun wina pachitsar: Nu aints achiktaram tama, yakta waitirin mash epeniar winaka nakarkarmiayi. ³³ Turutinamtai Cristonu ainau winaka juun changkinnun engketawar, yakta wenukri angkaakmaurinia naekjai nungka itararu asaramtai uwemramiajai.✠

12

Pablo karanma nunisang Criston wainkamuri

¹ Wiki nintimsanak: Miajuitjai tumamtanka nakitajai. Antsu karanma nunisnak ii Apuri wantinkamun pachisan yamaikia ujaktatjarme. ² Aints Cristo nemarkin wi waintain Yus ni pujamurin nayaimpinam iwiakmiayi. ¿Tura namangtukeash iwiakia? Turachkusha ¿wakaninkeash iwiarkaya? tusanka nekatsjai. Antsu Yusek nekawai. Nu turunamuka yamaikia catorce (14) musach nangkamaruitai. ³ Ataksha tajarme: ¿Nekasash namangtukeash nayaimpinam wakaya? tusanka nekatsjai. Turachkusha ¿wakaninkeash Yus jurukia? tusanka nekatsjai. Yusek nekawai. ⁴ Tura wainiatun nunasha nekajai. Cristonu ainau jakau pujutinam iwiakmau asa, chichaman aints kichkisha etserkachminun antukmiayi. Tura ni antukmia nunaka etserkaip tusa suritkamiayi. ⁵ Nu turunamun pachisan: Nekas pengkeraitai titinuitjai. Tura wiki nintimsanak: Nekasan pengkeraitjai tumamchamawaitjai. Antsu wina wait wajakmaurun timia untsuri amia nuna pachisan chichakminuitjai. ⁶ Wikia chikich aintsun nangkamakuitjai tumamtiasan wakeraknaka, wikia nunaka nangkamniaka tumamchainjai, antsu nekasan tumaminjai. Turayatun nunaka tatsujai. Atum wi turamur wainkaram, tura wi chichaamur antukrum, itiuur pujawa tusaram paan nekararam, nuke nintimtursataram tusan wakerajai.

⁷ Wi nayaimpinam wainkamiaja nu timia pengker asamtai, nangkami nintimtus: Miajuitjai tii tusa, Satanás wait wajamun jangkia tumaun akuptukat tusa Yuska tsangkamrukmiayi. ⁸ Tura asan nu wait wajamurun jurutkit tusan, ii Apurin kampakman seamiajai. ⁹ Wi seamaitiat wina chichartak: “Wait wajamur jurutkita” turutme nunaka turashtatjame. Antsu tuke inaitsuk pengker awajsatatjame. Tura asamtai wina kakarmarjai kakaichu ainaun kakamtikraja nunajai amincha kakamtikratatjame turutmiayi. Turutin asamtai, Cristo ni kakarmarin wina surusti tusan, kakarmachutiatnak pengker nintimsan Yusen maaketai tajai. ¹⁰ Tura Cristonu asan, wina katsekrinamtaisha, tura wina mantuwartas wakerutinamtaisha, pengker nintimsan pujajai. Wi yuumakun pujayatnak, nunia yumtin pujayatnak, nunia wina kakarmarka atsurtau wainiatnak wikia pengker nintimsan pujajai. Cristo ni kakarmarijai wina kakamtikruru asamtai, wina namangkruka kakarmachu ayatnak kakaram nekapeajai.

Pablo Corintonmaya ainaun pachis timiauri

¹¹ Wi pengkeraitjai tumamkun waurua nunisnak chichaajai. Antsu atumsha wina pachitsaram pengker chichartukmin ayatrumek, atumka chichachu asakrumin tu chichaajai. Wikia mianchau ayatnak, chikich ainau nangkamiar: Cristo akupkamuitji tinauka wina nangkatusarka ainatsui. ¹² Wikia atumin jean, wait wajasan Yuse takatrinka

✠ 11:33 (Hech. 9.23-25)

takakmin ayajai. Tura wainchatai takatnasha takauyajai. Tura Yuse kakarmarijai jau ainauncha tsuwayajai. Tura asamtai: Nekas Yus akupkamuitai tusaram nekaramiarume. ¹³Tura chikich yaktanam Cristo umirin pujuinauncha atumjai metek pengker awajnuyajai. Turayatun atumin: Kuik surustaram tusanka pengké seachmiajrume. Tura nuka tunaawaitmatikia, wait aneasrum tsangkutrurtaram.

¹⁴ Atumin jimia irasu asan, jujaingkia atumin kempatam irastasan wakerajai. Tura atumin jeanka, etsermaunum akirkataram tichatatjarme. Atumnau aa nunaka wakeratsjai. Antsu atumka Cristo miatrusrumek umirkataram tusan wakerajrume. Uchikia ni aparinunka kuikian kiauntukchamnawaitai, antsu apari ni uchirinun kuikian kiauntukminuitai. ¿Tura atumka wína uchirchaukitrum? ¹⁵ Wikia atumin yaingtasan wína kuikiarnaka amuktatjai. Tura atumin yaingtasan, taka takakmaka pimpikin jaaknasha jakatjai, tu nintimsan pujajai. ¿Wikia atumin miatrusnak aneamaitiatrumsha waruka winaka anentsurme?

¹⁶ Wikia atumi kuikiarin pengké jurukchamiajrume. Tura waininayat chikich ainau wína pachitsar: ¿Nuka tsanukratin asa, itiuur atumi kuikiarin jukishtatua? turutinawai.

¹⁷ ¿Itiuur atumniasha tsanurmiajrume? ¿Wi aintsun atumin akuptukmiaja nuka atumniaka tsanurmarmakiamaram? Atsa, atumniaka tsanurmarchamiarume. ¹⁸ Antsu wikia Titon chicharkun, atumin jiriti tusan akuptukmiajrume. Tura chikich aints Cristo nemarniun nijai tsanias weti tusan akupkamiajai. Tura ¿Titosha atumniasha tsanurmarmakiamaram? Atsa. Niisha iya nunisang Yuse takatrin takakmawai. ¿Nekaschaukai?

¹⁹ Wína aneetir yatsur ainautiram ¿atumka itiuur nintimrume? Atumka wína pachit-saram: Niisha nekas pengker aintsuapita turutiarat tusa, ¿ni pengker turamurin pachis chichaatsuash, tu nintimtursarmek pujaram? Antsu wikia tuuka nintimtsujai. Wikia Cristonu asan, Yuska winasha nekaruapi tusan, atumin kakamtikratan tu chicharjarme. ²⁰ Wi atumin jeancha, pengker pujuinaun wainkarchatjash tu nintimsan pujajai. Tura atumsha wina waitkatasrum wakerutarme nunisrumka winaka waitkashtatrum, wi tu nintimsan pujajai. Wi atumin jeantai ¿pasé chicharnaiyamusha achanpiash? ¿Tura suwirpiaku jiniamu achanpiash? ¿Tura kajernaiyamu achanpiash? ¿Tura wi nangkamakuitjai tichartimpiash? ¿Tura mai jiyani wajamusha achanpiash? ¿Tura aujmatnaiyamusha achanpiash? ¿Tura wikia miajuitjai tumamchartimpiash? ¿Tura kanarar pujamusha achanpiash? tu nintimkun yumtin nintimjai. ²¹ Tura wi atumin jeantai, atumi tunaari inaitsuk pujakrumningkia, Yus wínaka inatsatrai tu nintimsan pujajai. Untsuri atumjai tsaniasar pujuinau ni yaanchuik tunau turutirincha inaitsuk, pasé aa nuna nintimtinak, tura nuwan tsanirmatan wakerinak, tura ni wakeramurin tuke nintiminak pujuinamtaikia, wikia atumin jean juutancha juutminuitjai tajarme.

13

Inangnamu chicham akupkamuri

¹ Yaanchuik atumin jimia irasmiajai. Tura jujaingkia kempatman irastatjai. Tura atumin jean, itiuur pujarme tusan, chichaman nekaatasan, aintsun jimiaarchiksha, tura kempatmankesha iniastatjai. ² Yaanchuik atumin jean, tunau takau ainaun, tura chikich ainauncha mash wi timiaja nunaka yamaikikia arák pujayatun, ataksha aatjarme: Wi ataksha atumin jean, tunaarum inaiyachkurminkia tsangkurashatjarme. ³ Tura wi Cristo kakarmarijai chichaaja nu nekaatasrum wakerau asaram nekaamnawaitrum. Cristoka kakarmaitai. Tura asa ni kakarmarin atumin nekamtikramrume. ⁴ Cristo namangke ii namangkea nunisang kakaichu amiayi. Tura asamtai niincha numi winangmanum maawarmiayi. Tura maawarmaitiat Yuse kakarmarijai jaka nantakin asa tuke iwiaakuitai. Ii namangkesha kakaichutiatur Cristonu asar, tuke Yuse kakarmarijai atum yaingtasar pujaji.

⁵ Atumka anangmamawairam tusaram: Nekasnash Yusnawashitaj tusaram nekaamatarum. ¿Jesucristo wína nintirun nekasampi pujurtawa tusaram atumka nekasrumek? ⁶ Antsu iikia nangkamrikia Cristo umirnitiji tatsuji. Atumsha nusha

nekaataram tusar wakeraji. ⁷ Tura atum tunau takasairam tusar Yushasha seatjirme. Tura iincha pengker chichartamsarat tusarkia nunaka tatsujrume. Antsu atum nekas pengker aa nu turataram tusar nunaka tajarme. Tura iin pachitmasar pasé chichainauka nuka pachiatjsi. ⁸ Iikia Yuse chichame nekas aa nuka pengké yapajiachmin aji. Antsu ii turaji nuka nekas chicham pengker aa nujai turaji. ⁹ Tura asakrin iinka pachitmasar: Kakaichu ainawai turaminaw wainiatrik, atumka kakaram wajakrumningkia iikia waraaji. Tura atum pachisar: Miatrusarang Yusen umirkarat tusar Yusha seaji. ¹⁰ Tura asar atumin pasemantikrarat tusangka, Yuska winaka akuptukchamiayi. Antsu atumin kakamtikrat tusa, Yuska winaka akuptukmiayi. Tura asantai wi atumin jeanka, kakarman chicharkaijrum tusan, winitsuk ju papin aatjarme.

¹¹ Ayu, yatsur ainautirmin umaarutirmincha, inangnamunam nunasha tajarme: Pengker nintimsaram pujustaram. Tura Cristojai tuke kiakanirtaram. Tura miatrusrik Cristo umirkarmi tusaram chicharnaikiataram. Tura kichik ninti nintimtunistaram. Tura pengker awajnisaram pujustaram. Tu pujakrumningkia, Yus atumin anenmau asa, tura nekas angkan pengker nintimtikartin asa, atumniasha tuke pujurtamsatatrume. ¹² Pengker nintimtunisrum chicharnaikiataram. ¹³ Junia Cristonu ainaw mash atumin chichaman akupturminawai.

¹⁴ Ii Apuri Jesucristo atumniasha tuke yainmakarti. Tura Yuska ni anengkratairin atumniasha nekamtikramawarti. Tura Yuse Wakani atumi nintin engkema, tuke atumjai tsanias pujusti tajarme. Maaketai.

Pablo Gálatas Ainaun Papin Akuptukmauri

Chicham akuptukmauri

¹ Wiitjai Pabloitjai. Aints ainau: Wína chichamur etserkata tusarka akuptukcharmiayi. Tura Yus chikich aintsun akatak: Pablo wína chichamrun etserin ati tusam inaikiaata tusangka, wínaka akuptukchamiayi. Antsu ii Apaachiri Yus ni Uchiri Jesucriston jakamunmaya inankimia nu: Wína chichamur etserin ata tusa akuptukmiayi. ² Cristonu ainau wijai iruntrar pujuinausha Galacia nungkanam Cristonu ainautirmin chichaman akupturminawai. ³ Ii Apaachiri Yus ii Apuri Jesucristojai wait anentraminak atumin pengker awajtamsarti tusan, tura angkan pengker pujustinasha suramsarti tusan seatjarne. ⁴ Ii Apaachiri Yuska nuna wakerau asa, junia nungkanmaya ainau tunau turamun inaisarat tusa, iin uwemtikramratas ni Uchirin akupturmaku asamtai, Cristo ii tunaarin sakturmartas jarutramkamiayi. ⁵ Tura asamtai Yuska juuntapita tusar tuke maaketai tiarmi. Tu ati.

Chikich uwemratin chichamka atsawai

⁶⁻⁷ Maj ¿atumka nekasrumek kakarmachu Yus umirat inaisarum? Cristo iin timiá anenmau asamtai, Yus wína aintsur ataram tusa, atumin eatmaku wainiatrum, tura chikich uwemratin chicham atsau wainiatrum, chikich aints atumin tarutmiar, Cristonam uwemratin chichaman yapajiawartas wakerinau wainiatrum, atumka nangkamrum: Nu chichaman umirkunka uwemratatjapi tarume. ⁸ Antsu wikia tajarme: Iikia uwemratin chicham Cristo pachisrum etserkataram, Yus turamin wainiatrum yapajiar etserkurningkia, Yus iinka wait wajaktiniun suramsatnuitji. Tura Yuse awemamurisha Yusnum uwemratin chichaman ii etsermiaji nuna yapajiawar etserinakka nusha nunisarang wiasmamkartin ainawai. ⁹ Yaanchuik atumin timiajrume nuna ataksha nunisnak tajarme. Aints atumin anangkramawartas chikich uwemratin chicham iikia etserkachmiaji nuna etserinakka wiasmamkartin ainawai.

¹⁰ Wikia nuna takun, aints ainau wína pengker nintimtursarat tusanka nunaka tatsujai, antsu winaka Yus pengker nintimtursati tusan nunaka tajai. Antsu aints ainau pengker awajsatsanaka nunaka tatsujai. Antsu aints ainau wína pengker awajtusarat tusan nuna takunka, Cristo inatiringkia achainjai.

¿Pablo itiu Yuse chichame etserin wajasmiayi?

¹¹ Yatsur ainautiram umaarutirmesha, Cristonam uwemratin chichaman wi etserja nuka aintsu chichamenchuitai. Nu nekaataram tusan tajarme. ¹² Aints ainauka nu uwemratin chichamnaka ujakcharmiayi. Tura nu chichamnaka aints ainauka nuiturcharmiayi. Antsu Jesucristo wína wantinturkau asa, nu chicham etserkata tusa nekamtikruamiayi. ¹³

Tura wi yaanchuik itiu pujuyaja nuka antukmiarume. Tura judío umirkatin chichaman miatrusnak umirkataj tusan, wikia Cristo aintsri ainaun tuke kajerakun, tura mash amuktasan wakerakun, miatrusnak wait wajaktiniun suyaja nuka antukmiarume. ¹⁴ Tura wína wear ainau wijai metek yaanchuik ii juuntri timiauri nuimiaru ainau nuna nangkamasnak miatrusnak umirnuyajai. ¹⁵ Tura wikia akiintsain, Yus wait anentrak wína eatkau asa: ¹⁶ Wina Uchir itiu awa tusa, paan nekamtikruau asa: Judíocho ainamunam uwemratin chicham wína pachitsam etserkata tusa akuptuku asamtai, wikia chikich ainaun warinak etserkaintaj tutsuk, nunaka inintrutsuk pujuyajai. ¹⁷ Tura wína eemkar Cristo nuiniatiri armia nuna chichamen nekaatansnaka Jerusalénnumka wechamijajai. Antsu Arabia nungkanam aints atsamunam Cristo chichamen nintimratan wemijajai. Nunia waketkin ataksha Damasco yaktanam tamijajai.

✠ 1:4 (1.Tim. 2.5-6) ✠ 1:12 (Efes. 3.3) ✠ 1:13 (Hech. 8.1-4;22.4-5;26.9-11) ✠ 1:16 (Hech. 9.3-6)

¹⁸ Nunia kempatam musach nangkamaramtai, Pedron jiistan wemiajai. Tura Jerusalénnum jean, nuni Pedrojai jimia tuming pujusmiajai. ¹⁹ Tura ii Apuri yachiin Santiagoncha wainkamiajai. Antsu Cristo nuiniatiri chikich ainaunka wainkachmiajai. ²⁰ Wi aarja juka nekasaintai. Yusjai tajai. Waitchawaitai.

²¹ Nunia Siria nungkanmasha, tura Cilicia nungkanmasha wemiajai. ²² Antsu Cristonu ainau Judea nungkanam pujuinauka winaka waitkacharmiaji. ²³ Antsu wína pachitsar chichaman antukar: “Yaanchuik Cristonu ainautin wait wajaktiniun suramnuyaji nunaka inais, iin yaanchuik amutmaktas wakerinutiat, yamaikia Cristonam uwemratin chichaman etserak wekaawai,” tiarmiayi. ²⁴ Tura asar wina pachitsar: Yuska juuntapita tiarmiayi.

2

Cristo nemarnu juuntri ainau Pablon pengker awajsamuri

¹ Nunia catorce (14) musach nangkamaramtai, wikia Bernabéjai ataksha Jerusalénnum wemiajai. Tura Tito wijai wekaasati tusan jukimiajai. ² Tura Yus: Weta tusa akuptuku asamtai, nuni jeamtai winaka: Nangkamim judíochu ainamunam Cristo chichame etseru weame, turutiarai tusan, Cristo nemarnu juuntri kanakar pujuinamunam nuni pachinkan: Yusnum uwemratin chichaman judíochu ainamunam tu etserjai timiajai. ³ Tura Titosha judíochutiat, wijai wekaimia nuna pachisar: Nuwapchirin charutkami ticharmiaji. ⁴ Tura chikich aints ainau anangminak: Iisha Cristonuitji tusar, aneachmau ii pujamunam wayaawar, ii Cristo Jesúsnum angkan pujamun nekarmawar, napchau awajtamkartas wakerutmiarmiaji. Tura iin chichartaminak: Nekasrum uwemratasrum wakerakrumka, ataksha Moisésa armauri umirkataram turamiarmiaji. ⁵ Tura wainiatrik atum Yusnum uwemratin chicham antukmiarume nuka tuke yapaijtsuk antuktaram tusar, nu aints ainauka iikia pengké pachischamiaji.

⁶ Tura Cristonu ainau juuntrisha winaka yamaram chichamnaka ujatkacharmiaji. Nuka Cristonu ainau juuntri ainayat, Yus mash aints ainautinka metek jiirmaji tusan, nu aints nekau irunuitmataisha, wikia nunaka pachiatsjai. ⁷ Tura wína yamaram chichaman pengké ujatkacharu wainiatnak, Yuska: Cristonam uwemratin chicham judíochu ainamunam etserkata tusa, winaka akuptuku asamtai, antsu Pedronka judío ainamunam Cristonam uwemratin chichaman etserkati tusa akupkau asamtai nunaka nekaawarmiaji. ⁸ Tura Pedron: Judío ainamunam weta, tímia nu Yusek winasha: Judíochu ainamunam weta tusa akuptukmiaji.

⁹ Tura asamtai nuna nekaawar Santiagosha, nunia Pedroscha, nunia Juansha Cristonu ainau juuntri asar, wína pachitsar: Nekas Cristo akupkamuitai, tu nintimtursar, winasha tura Bernabéncha: Nekasar metek nintimji tusar, ii untsur uwejen achirtamkar: Atumka judíochu ainamunam werum, Cristo chichame etserkataram. Antsu iikia judío ainamunam weri, Cristo chichame etserkatatji turammiarmiaji. ¹⁰ Tura iin chichartaminak: Judío yuuminak pujuinau yaingtaram turutinamtai, wikia nunaka wakerau asan tuke turinuyajai.

Pablo Pedron chicharkamuri

¹¹⁻¹² Tura wi Antioquía yaktanam pujai Pedro tamiayi. Tura taa judíochu ainau iruntramunam pachitsuk yuwamiayi. Tura Santiagonumia akupkamu ainau kaunkaramtai, Pedro nu aintsun wainak: Ameka judíotiatmesha tura nuwapchiram charukmaitatmesha ¿waruka judíochu ainaujaisha iruntram yuwame? turutiarai tusa, natsaamak judíochu Cristonu ainaujai iruntrar yutan yuwamu inaisau asamtai, wikia Pedron wainkan tupnik chicharkamiajai. ¹³ Tura Pedro judíochu ainaujai iruntrar yuwamun inaisamtai, chikich judío Cristonu ainau Pedroa nunisarang judíochu Cristonu ainaujai pengker nintimsar iruntrar yuwaariat, nunia yapajiasarang nintimsar, judíochu ainaujai yutanka inaisarmiaji. Turinau asaramtai Bernabéscha nunisang turamiayi. ¹⁴ Turamtai

✠ 1:18 (Hech. 9.26-30) ✠ 2:1 (Hech. 11.30;15.2-4) ✠ 2:11-12 (Hech. 11.2-17)

nuna jiisan, Cristonam uwemratin chichaman mianak umirkacharu asaramtai, wikia mash antinamunam Pedron chicharkun: “Ameka judíotiatmesha nuwik judíochu ainawa nunisam pujayatmesha ¿waruka yamaikia judíochu Cristonu ainaun chicharkum: Judío ainau pujuina nunisrumek atumsha pujustaram tame?” timiajai.

Judío ainau tura judíochu ainausha mai metek uwemrartin ainawai

¹⁵ Iikia nekasar akiinamunmaya judío asar, chikich nungkanmaya tunaarintin ainaujai pengké metekchawaitji. ¹⁶ Turayatur iikia nusha nekaji: Aintsti Moisés umirkatin chicham umirkarkia uwemratatji tayatrik, tuuka uwemrashtinuitji. Antsu Cristo nekasampita takurkia, tunaanumia uwemratatjiapi tusar nekaji. Nu nekau asar, Jesucristo nekasampita takurkia, Yus pengker awajsatnuitji. Antsu Moisés umirkatin chichaman umirinaksha kichkisha tunaanumiangka tuuka uwemrachartin ainawai.✠

¹⁷ Tura judío ainautikia judíochu ainaujai metek tunaarintin asar: Cristo ii tunaarin sakturmaru asamtai, angkantaitji takurkia nuka nekasar taji. ¿Antsu Cristoka iinka: Judíochua nunisrumek tunau turataram turamjik? Atsa, pengké turamtsuji. ¹⁸ Nintimrataram. Wikia yaanchuik: Tunau inaisataram timiaja nuna wainkin: Ataksha tunau turataram takunka, wikia nekasana tunau wajasminuitjai. ¹⁹ Moisés umirkatin chichaman wikia umirkatatkaman pengké tujinnuyajai. Tura Moisés umirkatin chichaman umirkachu asan, jakamin nekapnuyajai. Tura yamaikia Yus wakera nunak umirkatasan, Moisés umirkatin chichamnaka pachischamnawaitjai. ²⁰ Yuse Uchiri wína anentu asa, wína uwemtikrurtas ningki wakerak numi winangmanum jarutruku asamtai, wikia Cristo nekasampita tinu asan, Cristojai numi winangmanum jakawa nunisnak tura nantaknua nunisnak nintimjai. Tura Cristo nekasampita tau asan, tura pujut nangkankashtinun jukin asan, yamaikia Cristonak nintimsan pujajai.✠

²¹ Yus iin timiá pengker awajtamsatas ni Uchirin akupturmaku asamtai ¿warukanak Cristoka nangkami jakamiayi titaj? Wi Moisés umirkatin chichaman umirkan uwemramin amataikia, Cristoka nangkami jakaayi. Antsu iin uwemtikramratas jarutramkau asamtai nuka tichamnawaitji.

3

Cristo nekasampita takur uwemrawaitji

¹ Gálatas ainautiram ¿warukaya waweamua nunisrumkesha timiá wauru wearme? ¿Yaachia atumin chicham nekaschau umirkataram tusasha anangkramamiarume? Cristo atumin uwemtikramratas numi winangmanum jarutramkamiayi nuna pachisan wikia chichaman paan etserkaisha ¿waruka kakarmachussha kajinmakniurme? ² Kichik chichaman iniastasan wakerajrume. Nu airkataram. ¿Atumi nintin Yuse Wakani engkemamia nuka waruka engkemamiayi? ¿Atumka Moisés umirkatin chicham umirkau asakrumning, atumi nintin engkemamia? Atsa, antsu Cristo chichame antukrum nekasampita tinu asaram, Yuse Wakanisha jukimiarume. ³ ¿Warukaya timiá nintinchausha ainiarme? Yuse Wakani nu nangkamtaik atumi nintin engkemturmau wainiatrumek ¿yamaikia atumi kakarmarijaisha Moisés umirkatin chichamsha umirkatasrumsha wakerarme? ⁴ ¿Atumka nangkamrumek wait wajakmiarum? ¿Tura pengké kichkisha nuimiarchamkiarum? ⁵ Nintimrataram. Yuska ni Wakanin atumin akupturmak: Wainchatai takat turataram turamiarme nuka ¿warukaya ni kakarmarinka suramsamiarume? Atumka Moisés umirkurminkia ni kakarmarin suramsachmiarume, antsu Cristo pachisar etsermau antukrum, nekasampita tinu asakrumin ni kakarmarin suramsamiarume.

⁶ Ii yaanchuik juuntri Abraham nintimrarmi. Abraham Yusen nekasampita timiayi. Tura asamtai Yus Abrahaman pachis: Wína nekasampita turututu asamtai, tunaachawa nunisang pujaun jiiajai timiayi.✠ ⁷ Tura asamtai Yusen nekasampita tinauka Abrahamana

✠ 2:16 (Rom. 3.20-22) ✠ 2:20 (Gál. 6.14; Fil. 1.21; Col. 2.20) ✠ 3:6 (Gén. 15.6; Rom. 4.3)

wearia nunisarang ainawai. Atumsha nuka paan nekaamnawaitrume. ✧ ⁸ Yus yaanchuik mash nekau asa, nukap arus mash nungkanmaya ainau wína nekasampita turutinaunka wikia tunaarinchawa nunisarang pujuinaun jistinuitjai tusa, nuná eemak Abrahaman uwemratin chichaman ujaak: “Ameka wína nekasampita turutu asam uwemratnuitme. Tura mash nungkanmaya ainau amea nunisarang wína nekasampita turutin ainaun nekasan pengker awajsatnuitjai,” timiayi. ✧ ⁹ Tura Abraham Yusen nekasampita tinu asamtai, chikich aints ainau Yusen nekasampita tusar pujuinaunka Yuska Abrahama nunisang pengker awajui.

¹⁰ Yuse chichame tu aarmawaitai: “Aints Moisés umirkatin chichaman aarmawa nunaka mash umirkachu ainauka Yus kajer kamu ainawai.” Tu aarmau asamtai, aints ainau Moisés umirkatin chichaman mash miatrusarang umikcharu asaramtai, tuke Yus kajer kamu ainawai. ¹¹ Yuse chichamesha tu aarmawaitai: “Yusen nekasampita tinauka, tuke iwiaaku pujusartin ainawai.” ✧ Tu aarmau asamtai Moisés umirkatin chicham umirkurkia, Yuska iinka tunaachawa nunisrik pujarningkia jiirmatsji. ¹² Tura aints ningki nintimias: Moisés umirkatin chichaman umirkanka uwemratatjapi tauka nunaka nangkami tawai. Yuse chichame tu aarmawaitai: “Aints Moisés umirkatin chichaman umirak tunaanumia uwemratas wakerakka, Moisésa aarmaurinka mash miatrusang umirkati,” tu aarmawaitai. ✧

¹³ Cristo ii wait wajaktiniun juki, numinam waitnas jarutramak uwemtikramrau asamtai, Moisésa chichame umirchau ainauka Yus kajer kamu ainawai, yamaikia turamtsuji. Yuse chichame aints numinam nenaamun pachis tu aarmawaitai: “Aints jakati tusar, numinam nenaamua nuka kajer kamuitai,” tu aarmau asamtai, Cristo ii tunaarin akiimiatramkatas numinam nenaawarmia nuka aints kajer kamuyayi. ✧ ¹⁴ Yuska yaanchuik Abrahaman chicharak: “Mash nungkanmaya ainau wína nekasampita turutinaunka, amijai metek wína aintsur artinuitai,” tinu asa, mash nungkanmaya ainaun uwemtikratas Jesucriston akupturmakmiaji. Tura Yus: Wína nekasampita turutinaunka wína Wakantrun akuptukartinuitjai tinu asa, ni Wakanin iin akupturmakmiaji.

Yus Abrahaman tura Moisésnasha chicham akuptukmauri

¹⁵ Yatsur ainautiram umaarutirmesha, yamaikia junia aints ainau turamurin pachisan ujaajrume. Aints chikich aintsjai chichaman najanawar, nu chichaman papinum aarar, tura ni naarincha mai aarar umisar, nu chichamnaka yapaijtsuk umikiartin ainawai. Antsu: Nu aarmaun yapajian, chikich chichamnasha aartajai, pengké tichamnawaitai. ¹⁶ Tura asamtai Yus Abrahaman ni wearin pachis chicharak: Ami wearam akiinatnua nuka mash nungkanmaya ainaun pengker awajsatnuitai timiayi. Antsu untsuri aintsun pachiska nunaka tichamiayi, antsu kichik aintsun ni Uchirin Criston pachis Yus nunaka timiayi. ✧

¹⁷ Wi taja nuka nintimrataram. Yus Abrahamjai chichaman eemak najanamia nuka umitskeka inaisachminuyayi. Tura Abraham jakamtai, cuatrocientos treinta (430) musach nangkamaramtai, Yus Moisésan umirkatin chichaman ukunam akuptukiat, Abrahaman nuná eemak tímia nunaka umitskeka inaisachmiayi. ¹⁸ Tura Yus Abrahaman: Wina nekasampita turutin asam uwemratatme tinu asa, Moisés umirkatin chicham umirkamka uwemratatme, Abrahamnaka tichamiayi. Iikia Yus pengker awajsatasar wakerakrikia, Moisésa chichamenka umirkachu ayatrik, Yus nekasampita takurkia Abrahama nunisrik uwemramnawaitji. ✧

¹⁹ Tura ¿Yus iincha waruka umiktin chichamnasha akupturmakmiaji? Yus Abrahaman: Ami wearam akiinatnua nuka mash nungkanam pujuinaun pengker awajsatnuitai, tímia nunaka Cristo taatsaingkia umikchamnauyayi. Tura asamtai aints ainau mash tunau wajasaru asaramtai, Yus ni awemamurin akatar akupak: Umiktin chicham Moisés susataram tusa akupkamiayi. ²⁰ Yus Moisésan chichaman akuptak: Aints ainau

✧ 3:7 (Rom. 4.16) ✧ 3:8 (Gén. 12.3) ✧ 3:11 (Hab. 2.4) ✧ 3:12 (Lev. 18.5) ✧ 3:13 (Deut. 21.23) ✧ 3:16 (Gén. 12.7) ✧ 3:18 (Rom. 4.14)

wína wakeramur ujakta tusa, ni awemamurin akupkamiayi. Antsu Abrahamjaingkia mia ningki chichasmiayi.

¿Yus waruka umiktin chichamnasha akupkamiayi?

²¹ Yus Moisésan umiktin chichaman akuptukmau asa ¿eemak Abrahaman tímia nunaka umitsuk inaisamnaukai? Atsa, nuka umitskeka inaisachminuitai. Yus aints ain-aun uwentikratas Moisésan chichaman akuptukuitmatikia, aints ainau nu chichaman umirkar tunaarinchau pujusartin armiayi. Antsu aints ainauka tuuka uwemrachmin armiayi. Aints ainau tuke Wijai pujusarti tusangka, Moisésan umirkatin chichamnaka Yuska akuptukchamiayi. ²² Antsu Yuse chichame tu aarmawaitai: “Aints mash jingki-amua nunisarang tunau ainawai.” Tu aarmau asamtai, iikia Jesucristo nekasampita takurkia, Yus yaanchuik Abrahaman tímia nunisrik uwemratnuitji.✠

²³ Antsu Cristo taachmataikia Criston nekasampita tichamin armiayi. Tura Yus Moisésan umirkatin chichaman akupkau asamtai, iisha jingkiamua nunisrik nu chicham umirin ayaji. Antsu Cristo ukunam taa: Wína nekasampita turutkurmeka nekasrum uwemratnuitrume tusa iincha nekantikramamiaji. ²⁴ Tura asamtai Yus Moisésan chichaman akuptukmia nuka uchin wainua tumawaitai. Uchin wainuka uchi chichaman umiktinun nuimiarat tusa nakawai. Tura asamtai Yus Moisésnum chichaman akupkau asa, ii tunaarin nekantikramamiaji. Tura Cristo ii tunaarin sakturmartas tau asamtai, iikia Cristo nekasampita takurkia Yus pengker awajsatnuitji. ²⁵ Tura yamaikia Cristo nekasampita tinu asar, uchi ni wainmaun umirua nunisrikia yamaikia pujatsji. Tura asar Moisés umirkatin chichaman umirkunka uwemratatjapi tichamnawaitji. ²⁶ Tura asamtai atumka Cristo Jesús nekasampita tinu asaram mash Yuse uchirintrume. ²⁷ Tura mash Cristo naari pachisrum maiintirmeka Cristo pujumia nunisrumek atumsha pu-justinuitrume. ²⁸ Tura asamtai judío ainautirmesha, tura judíocho ainautirmesha, tura aintsu inatiri ainautirmesha, tura aintsu inatirinchu ainautirmesha, tura aishmang ainautirmesha, tura nuwa ainautirmesha yamaikia mash metek Cristo Jesúsnu asaram, kichkia tumawaitrume. Tura iisha aji tuuka nintimrashtinuitrume. ²⁹ Tura Cristonu asaram, Abrahama weariya tumawaitrume. Tura asamtai Yus Abrahaman chicharak: “Ami wearmin pengker awajsatnuitjai” tinu asa, Yuska atumnasha pengker awajtam-satnuitrume.✠

4

¹ Wi taja nuka nintimrataram. Kuikiartinu uchiri nampuaramtai, nu aints takaka nuka ukunam ninu uchirinu atinuitai. Antsu uchi akungka, ni aparí inatiriya nunisketai. ² Tura nu uchikia nampuachkungka ni wainurin umirnuitai. Tura ni aparí kuikiarin wainuncha umirnuitai. Antsu nampuarka, ni aparí tu tinu asamtai, ni aparínu aa nunaka mash wainkatnuitai. ³ Cristo taachmataikia, iikia uchua nunisrik pujuyaji. Tura asar uchi ni wakeramurin najantsuk pujusarti tusa, ni aparí inatirin umirak pujawa nunisrik Moisésa chichame umirkur pujuyaji. ⁴ Tura ni kintari jeau asamtai, Yus ni Uchirin ju nungkanam akupkamu asa, nuwanam akiinamiayi. Tura aints wajas, Moisésa chichamen miatrusang umirnuyayi. ⁵ Antsu aints ainauti Moisésa chichame umirkatatkamar tujintau asakrin, Yuska iin angkanmantikramkatas: Wína uchir ataram tusa, ni Uchirin akupturmakmiaji. ⁶ Tura asamtai yamaikia Yuse uchiri wajasu asakrumin, Yus ni Uchiri Wakanin atumi nintin akupturmaku asa: “Apaachi,” turutmintrum tusa nintimtikram-ramiarume. ⁷ Tura asamtai yamaikia aintsu inatiria tumachawaitrume. Antsu Yuse uchiri ainarme. Tura Yuse uchiri asakrumin, Yusnu aa nuka mash atumnau atinuitai.✠

Pablo ¿Cristonu ainaun itiu pujuinawak? tusa nintimusmauri

⁸ Yaanchuikia Yuska tu awai tusaram nekachu asaram, chikicha yusri Yuschau wainiatrum, aintsu inatiriya nunisrumek umirkuram pujuyarme. ⁹ Antsu yamaikia Yus tu awai tusaram nekarme. Tura Yuscha atumniasha nekarmarme. Tura asamtai ¿waruka

✠ 3:22 (Rom. 3.9-19;11.32) ✠ 3:29 (Gén. 17.4-6;22.17-18; Rom. 4.13) ✠ 4:7 (Rom. 8.15-17)

ataksha waketkirmesha Cristo umirat inaiyakrumsha, ataksha aintsu inatiriya nunisrumkesh aints umirkatin chichamsha umirkatasrumsha wakerarme? Tu pujakrumka uwemrachminuitrume, tura Yuse kakarmarisha jukichminuitrume. ¹⁰ Atumka judíochu ayatrum, ¿waruka judío fiestarisha inangkartasrumsha wakerarme? Tu uwemrachmin ayatrum, kinta pachisrum, tura nantu pachisrum, tura musach pachisrum, tura fiesta ainausha pachisrum tuke nintimsarmesha pujarme. ¹¹ Atumka tu pujau asakrumin, wi atumin waitnasan Yuse chichamenka ujakmiajrume nunaka nangkamniash etserkaya tusan wake mesekan pujajai.

¹² Yatsur ainautiram, wikia atumjai pujaknaka atumjai metek pujuyajai. Tura asamtai yamaikia wait aneasrum wiya nunisrumek pujustaram. Wi atumjai pujamtaisha, winaka paseeka awajtuschariame. ¹³ Wi nu nangkamtaik atum pujamunam jean, sungkurmau asan pimpiayatnak uwemratin chichaman ujayajrume. ¹⁴ Tura sungkurmau asan, wína namangkur pasemaru wainiatrumek, atumka tsuutrichmiarume. Antsu Yuse awemamurin anturinawa nunisrumek, tura Jesucriston anturinawa nunisrumek anturtinuyarume.✠

¹⁵ Maj, nekasan tajarme: Yaanchuikia wina yainkatasrum, atumi jii kuinkachmin ayatrum, kuinkaram surutcha wakerutmiarume. ¿Antsu yamaikia waruka winaka pengker nintimturtsuksha pujarme? ¹⁶ Wikia atumin nekas chichaman aa nuna ujaa-maitiatrumsha ¿yamaikia atumi nemasenkitaj?

¹⁷ Chikich aints ainau atum pujamunam jear anangkraminak: Iisha atum yaingtasar wakeraji turaminayat, nunaka nekasar atumin yainmakartaska turaminatsui. Antsu wína pachitsar: Nuna chichame antutsuk asataram, antsu ii chichameng antuktaram tusar, atumnaka tu nintiminawai. ¹⁸ Turinamtai wi atumjai pujaisha, tura wi atsaisha, chikich ainau atumin nekasar yainmakartas wakerutminakka nuka nekas pengker araintai. ¹⁹ Wína uchir ainautiram, yamaikia Cristo nintimtichu asakrumin wikia wake mesekan, nuwa uchin jurertas wait wajawa nunisnak: Cristo nemarkamniuram tusan, wikia ataksha wait wajajai. ²⁰ Tura yamaisha atumjai iruntran pujusan, nuna pachisan atumjai chichastasan wakerajrume. Turayatun atumjai pujachu asan ¿itiurkatjarmek? tusan cha nekatsjai.

Agar Sarajai chichaman nuikiarturmauri

²¹ Atumka Moisés umirkatin chicham umirkatasrum wakerau asakrumin kichik ini-astajrume. ¿Moisés umirkatin chicham aujchaukitrum? ²² Yuse chichame Abrahaman pachis tu aarmawaitai: “Abrahama uchirisha jimiar ayayi. Tura Sara inatiri Agar naartin kichkin jurermiayi. Tura kichnaka Abrahaman nekas nuwari Sara jurermiayi.”✠

²³ Antsu Abrahaman uchiri Sara inatiri Agar jurermia nunaka Yuska: Turata tichau wainiat, Abrahaman ningki nintimias yajutmarmiayi. Antsu kichnaka Abrahaman nuwari kaa ayat: Uchin jurertatui, Yus timiau asa Sarasha jurermiayi. ²⁴⁻²⁵ Wi taja nunaka taku tawai: Sara inatiri Agar uchin jurermiayi. Nuka inatiri uchiri asa, Moisésa chichamen umirnuwa tumawaitai. Tura Arabia nungkanam mura Sinaí tutainum yaanchuik Moisésnum umirkatin chichaman Yus aamtikramiayi. Tura asamtai yamai Jerusalénnum pujuinausha: Iikia uwemratasriki Moisés umirkatin chicham umirkatnuitji nangkamiar tinauka aintsu inatiria nunisarang ainawai. ²⁶ Antsu iikia yamaram Jerusalénnum, nayaimpinmaya akupkatin aa nuni pujustin asar nunia aintsuitji. Tura asar nu nayaimpinmaya Jerusalénnumia uchua nunisketji, nuniasha angkantaitji. ²⁷ Tura asamtai tu aarmawaitai:

“¡Kaa ayatmek warasta! Uchiram atsau wainiatmek, tura uchi jurertasam jatemam nekapchau ayatmek, pengker nintimsam nukap warasta. Nuwa japamu ayat, aishrintin ainaun nangkamasang uchin untsuri wainkatnuitai.” Tu aarmawaitai.✠

✠ 4:14 (Hech. 16.6-7) ✠ 4:22 (Gén. 16.15;21.2) ✠ 4:27 (Sal. 113.9; Isa. 54.1)

²⁸ Yatsur ainautiram umaarutirmesha, Yuska: Wína uchir ataram turamin asamtai, iisha Isaaca nunisrik Yuse uchirinji. ²⁹ Yaanchuikia Agara uchiri Ismael, Yus wakerachmau akiinaw asa, Sara uchirin Isaacan kajerak pasé awajnyuya nunisarang yamaisha Yusen umirchau ainauka Yusnumia akiinaw ainaunka tuke kajerin ainawai. ³⁰ Tura Yuse chichame tu aarmawaitai: Sara Abrahaman chicharak: “Ame jakakmin wína uchir aminu aa nunaka mash jukitnuitai. Antsu Agara uchiringkia nunaka jukishtnuitai. Tura asamtai wína inatir ni uchirijai jikim akupkata,” timiayi. ³¹ Tu aarmaw asamtai iikia Cristonu asar, inati uchiria tumauchuitji. Antsu angkantaitji. Tura asar Sara uchiriya tumawaitji.

5

Yusnaw asaram tuke angkan pujustaram

¹ Cristo iin uwentikramratas angkan awajtamsamijai. Tura asamtai yamaikia angkan pujaw asaram kakaram wajastaram. Tura uwemratasrumka ataksha Moisés umirkatin chicham umirkami tiirap. ²

² Anturtuktaram. Wikia nekasam tajarme: Atum uwemratasrum atumi nuwapchiri charukakrumnisha, Cristoka atumin pengkerka awajtamsashtinuitrume. ³ Tura asamtai ataksha tajarme. Aints ni nuwapchirin charuk tu uwemratas wakerakka, umirkatin chichamnasha Moisés aarmawa nunaka tuke mash inaitsuk umirkatnuitai. ⁴ Atumka Moisés umirkatin chichaman umirkanka uwemrainjapi, tu nintimsaram pujaw asaram, Yuse anengkratairiniangka kanaku asakrumin, Cristo atumniaka pengkerka awajtamsashtinuitrume. ⁵ Antsu Yuse Wakani ii nintin engkemturmau asamtai, Cristo nekasampita tau asakrin, Yuska ii tunaarin mash sakturmaru asamtai: Nekasriapi Yusnum pujustinuitji tusar nakaji. ⁶ Ni nuwapchiri charukmau ainauka, tura ni nuwapchiri charutkachmau ainausha mai metek Cristo Jesúsnuw asar, ii nuwap charutka pachischatnuitji. Antsu mash Cristo nekasampita tinu asar, chikich ainausha aneetnuitji.

⁷ Atumka Cristo pengker umirkuram pujuyarme. ¿Yaachia nekas chicham inaisataram turamrume? ⁸ Yuska nunaka turachmiayi. Antsu angkan pujustaram tusa, atumin untsurmaku asa: Ataksha Moisésa chichame umirkataram tichamiayi. ⁹ Antsu nu aints wait chichaman jumchik chichainayat, kariaw kariachunam jumchik engkeam, mash karimtikia nunisang nu chichaman antuku ainaunka anangkawartinuitai. ¹⁰ Atumka ii Apuri umirkau asakrumin, wi timiaja nunaka tuke umirinak pujuinawai tu nintimjai. Antsu atumin wait chichaman etsera nunaka Yus wait wajaktiniun susatnuitai. Antsu ¿warí aintsiki? tusanka wikia pachiatjsai.

¹¹ Yatsur ainautiram umaarutirmesha, Cristo umirin ainaw ni nuwapchirin tuke charutkartinuitai, wi tamatisha, judío ainauka winaka kajertukchartinuitai. Antsu nunaka wikia tatsujai. Antsu Cristo numi winangmanum jarutramkau asa, iin uwentikramratnuitji. Chikich uwentikramratnuka atsawai tau asamtai, wína tuke kajertinawai. ¹² Aints atumin itit awajtaminak: Atumi nuwapchiri charutsuk pujakrumka, nekasrum uwemrashtinuitrume, tinauka niinun ningki charukarti tusan wakerajai. ¹³⁻¹⁴ Yatsur ainautiram umaarutirmesha, Cristo atumin: Angkan pujustaram tusa untsurmaku asamtai, yamaikia atumi namangke wakera nuka nintimtsuk asataram. Antsu Yus umirkatin chichamka mash kichik chichamjai timinuitai. Nu chichamka nuwaitai: “Atumi namangke anearme nunisrumek chikich ainausha aneetaram.” Tu aarmaw asamtai, nekasrum aneeniakrum yainiktaram. ¹⁵ Tura aneenitsuk jiyaani pujakrumka, pachim esaniniar yunainawa nunisrumek pujarme. Tura asaram amuniktinuitrume. Tu pujusai tusaram wainmamkataram.

Aintsu wakeramuringkia Yuse Wakani wakeramurijangkia metekchawaitai

¹⁶ Tura asamtai tajarme: Yuse Wakani wakera nuka tuke umirkuram pujustaram. Tu pujakrumka atumi namangke wakera nuka umirkashtinuitrume. ¹⁷ Yuse Wakani wakera

☆ 4:30 (Gén. 21.9-10) ☆ 5:1 (Juan 8.32-36) ☆ 5:9 (1.Cor. 5.6) ☆ 5:13-14 (Lev. 19.18; Rom. 13.9-10)

nuka aintsti namangke wakeramurijangkia metekchawaitai. Yuse Wakani wakera nunaka ii namangkengka nakitawai. Tura ii namangke wakera nunaka Yuse Wakanisha nakitawai. Tura asamtai atumi namangke wakeramuri najankurmeka, Yuse Wakani wakera nuka turatatkamaram tujintarme.[☆] 18 Antsu Yuse Wakani: Tu pujustaram tusa, atumin nuitamak pujurtamatikia, Moisés umirkatin chichamka pachischatnuitrume.

¹⁹ Aintsu wakeramuringkia paan nekaamnawaitji. Aintsu wakeramuri tu ainawai: Tsanirmatin, tura pasé aa nu turatin, tura natsanpiaku aa nusha turatin,²⁰ tura Yuschau waininayat: Ameketme Yusem tusar seartin, tura wawekratatin, tura nemasnaikiatin, tura maaniktin, tura suwirpiaku jiiinistin, tura aints kajerkatatin, tura miajuitjai tumamtin, tura chikich ainaujai irunat nakitakur kanaktin,²¹ tura chikichnau aa nu wakeruktin, tura nampektin, tura yutak nukap wakeruktin, nunia chikich tunaa aa nu pachitsuk turatin, aintsu wakeramuri tu ainawai. Tura asamtai wi yaanchuik ujakmiajrume nunaka ataksha tajarme: Aints nuna tuke turinauka Yus pujamunmaka pengké jeachartin ainawai.

²² Antsu Yuse Wakani aintsu nintin piatkau asa, árak nereawa nunisang neremtikiu. Yuse Wakani turamuringkia tu ainawai: Chikich ainau aneenitin, tura warastin, tura angka pengker nintimratin, tura jaimiasar nintimtustin, tura chikich ainau wait anentratin, tura chikich ainau pengker awajsatin, tura ii timiauri miatrusrik umiktin,²³ tura mianchawaitjai tumamtin, tura ii wakeramuringkia turashtin, Yuse Wakani turamuri tu ainawai. ¿Nu turatnunka yáki surimkat? ²⁴ Tura Cristonu ainautikia ii namangke wakera nuka, tura pasé turuti ainia nusha aints numi winangmanum jakamia nunisrik inaisawaitji.[☆] ²⁵ Tura yamaikia Yuse Wakani iin engkemturma pujamtaikia, ni wakera nuke umiktinuitji.

²⁶ Antsu wikia miajuitjai tutsuk, tura nekapnaisatai tunaitsuk, tura suwirpiaku jiiinitsuk pujusmi tu nintimtunistinuitji.

6

Yainiktaram timiauri

¹ Yatsur ainautiram umaarutirmesha, Cristo umirkausha aneachmau tunaunaka turatnuitai. Turamtaisha Yuse Wakani piatkamu ainautiram, nu tunaun turau wainkurmesha: Wisha mianchawaitjai tusaram, nu aints jaimiasrum chicharkuram: Nu tunaun inaisata, tusaram yaingtaram. Wisha tunaun wajasai tusaram nuka turataram. ² Chikich ainau merman nanaakinawa nunisarang wait wajainamtaikia, nu aints nekasrum yaingtaram. Tu pujakrumka Cristo ni chichamen akupkama nuka umirkatnuitrume.

³ Aints mianchau ayat nangkami: Wikia miajuitjai tauka ningki anangmamui. ⁴ Tura ¿ii turamuri itiurak awa? tusar iik nintimratnuitji. Ii turamuri pengkeraitmatikia, chikicha turamuri nintimtusrikia waraatsji, antsu ii turamuring nintimsar waraaji. ⁵ Aintstikia mash ¿ii turamuri itiurak awa? tusar nintimratnuitji.

⁶ Yuse chichame atumin nuitaminak pujuinau nekasar yuumatsuk pujusarat tusaram, tuke mash pengker awajsaram yaingtaram.

⁷ Anangmamawairap. Yuska anangmichuitai. Aints arakan arauka juuktinuitai. Ii turamuringkia árak araamua nunisarang ainawai. Ii turaji nunasha iincha nunisarang turutmatnuitji. ⁸ Tura asamtai aints ni namangke wakera nuna turinauka, wait wajaktiniun jukiartinuitai. Antsu Yuse Wakani wakera nuna turinauka tuke Yusnum pujut nangkankashtinun jukiartinuitai. ⁹ Tura asamtai pengker turatin aa nuka tuke inaitsuk tura yawetsuk turatnuitji. Nu turau asar ii kintari jeamtai, aints arakan juwaak waraawa nunisrik iisha nukap aruser warastinuitji. ¹⁰ Tura asamtai yaingmin amatikia, aints ainau mash pengker awajsatnuitji. Tura nuna nangkamasrik Cristonu ainau timiá pengker awajsatnuitji.

Inangnamu chicham akupkamuri

☆ 5:17 (Rom. 7.15) ☆ 5:24 (Rom. 6.3-14; Gál. 2.20)

¹¹ Inangnamunam nekasan wína uwejrui aaran, warutam juunna aari tusaram wainkataram. ¹² Judío aints ainau Criston numi winangmanum maawaru asar, Cristonu ainautin pe kajertaminaji. Tura asaramtai aints atumin chichartaminak: Cristonu ayatrumek, tuke atumi nuwapchiri charuktaram turaminauka, judío ainaun shaminau asar, kajertamkarai tusar nunaka tinawai. ¹³ Tura nu aints ainau nuwapchirin charutkariat, Moisés umirkatin chichamnaka miatrusarka umirinatsui. Turayat atumi nuwapchirin charutramkartas wakerutminawai. Tura atumin pachisar: Au jiisia, au aintsu nuwapchiri charukmawaitai tiartas wakerinawai. ¹⁴ Tura wainiatun wikia aya ii Apuri Jesucristonak wararsatnuitjai. Antsu chikichan pachisnaka waraschatnuitjai. Ii Apuri jarutramkau asamtai, wikia numi winangmanum jakawa nunisnak ju nungkanmaya ainau wakeramurinka pachiatsjai.[☆] ¹⁵ Ni nuwapchiri charutkachmau ainausha, tura ni nuwapchiri charutkamu ainausha mai metek Cristonu asaramtai, aintsu nuwapen charutkachmau tura charutkamusha pachischatnuitji. Antsu Yusnumia yamaram akiinatin wakeruktinuitji. ¹⁶ Yuse aintsri wi taja nunaka umirinak pujuinaun tuke mash angka nintimratnun Yus susarat tusan, tura Yus wait anentrarat tusan wakerajai.

¹⁷ Yamaikia nunasha tajarme: Wikia Jesúsá inatiri asamtai, aints wína awatinak charutrarmau chimirmaurun paan waitrukartinuitai. Tura asaramtai aints kichkisha yamaikia wínaka ititka awajtuschartinuitai.

¹⁸ Yatsur ainautirmin umaarutirmincha, ii Apuri Jesucristo atumniasha pengker awajtamsarti. Tu ati.

[☆] 6:14 (Rom. 2.28-29; Gál. 2.20;6.14-15; Fil. 3.3; Col. 2.11-13)

Pablo Efesonam Pujuinaun Papin Akuptukmauri

Chicham akupkamuri

¹ Wiitjai Pabloitjai. Yus wakerutak Jesucristo chichame etserin ata, turutin asa wina akuptukmiayi. Cristonu ainautirmin Efesonam Cristo Jesús tuke umirkuram pujautirmin ju papin aatran akuptajrume. ✠ ² Ii Apaachiri Yus ii Apuri Jesucristojai atumin wait anentramak pengker awajtamsarti. Tura angkaan pujustinnasha suramsarti.

Cristo aints ainautin pengker awajtamsamuri

³ Ii Apaachiri Yuska, ii Apuri Jesucristo Apaachiri asamtai, iikia: Ameketme juuntam tusar maaketai tiarmi. Iikia Cristonu asakrin, Yus iincha timiá pengker awajtamsamiji. Tura ni Wakanin ii nintin engketramau asamtai, iikia nayaimpinam pujuinawa nunisrik pengker nintimsar angkaan pujaji. ⁴ Tura asamtai Yus nu nangkamtaik nungkan najantsuk nintimias: Wina Uchir Cristo nukap arus aints niin umirinak pujusartinua nuna tunaarin sakatramu asa, tura aintstin timiá anenmau asa iincha pachitmas: Nu aints ainauka nekasar tunaarinchau wina Uchirnau arti tu nintimturmasmiji. ⁵ Tura iincha Yus miatrusang anenmau asa, iin pachitmas: Ukunam wina Uchirun Jesucriston akupkamtai, nuka aints ainaun uwentikratas jakamtai, wina aintsur wajasarti tusa, ningki wakerutmak tu nintimturmasmiji. ⁶ Yus nekas timiá pengker asa, ni aneetiri Uchirin iin akupturmaku asa, wait anentramak iin pengker awajtamsamiji. Yus nuna turau asamtai, ni aintsri ainautikia mash iin pengker awajtamsamuri nintimsar: Yus juuntapita taji. ⁷ Yus iincha nukap anenmau asa, ni Uchirin akupturmaku asamtai, ii tunaarin akiimiatramkatas, Cristo jarutramak ni numpe numparmiayi. ⁸⁻⁹ Yus iincha wait anentramak pengker awajtamsau asa, ni nekamtairincha iincha suritramtsuk, ni nintimaurincha yaanchuik aints ainau nekaachminun wainiat iincha nekamtikramamiji. Tura iin uwentikramratas Criston akupturmaku asamtai, yamaikia iisha nuka paan nekaatnuitji. ¹⁰ Yus iin nekamtikramatas wakerimia nuka nuwaitai. Yus wi turatnuitjai timia nunaka mash umis, Cristo ataksha tatin kinta jeamtai, nayaimpinmaya ainauncha, tura nungkanmaya ainauncha mash irur, wina Uchir Cristo nunaka tuke inartinuitai tu nintimramiayi.

¹¹ Tura asamtai Cristonu ainautikia akiintsurning, Yus ningki iin uwentikramratas wakerak iin pachitmas: Wina aintsur arti tusa, tura tuke Cristojai iruntrar wijai pujusarmi tusa wakerimiayi. ¹² Yus nuna wakerau asamtai, iikia nuwá eemkar, Yus tuke nintimraru asar, Cristojai tuke nayaimpinam pujustinuapitji tusar, tura Yus nekas pengkerapita tusar, ni wakeramuri tuke inaitsuk najanatnuitji. ¹³ Tura atumsha iiya nunisrumek nekas uwemratin chicham Criston pachisrum antuku asaram, Cristo nekasampita timiarume. Tura asamtai Yus: Wina Wakantrun aints ainau nintin engketatatjai tinu asa, ni Wakanin nekas pengker aa nuna atumi nintin engketramamiarume. Tura asamtai atumsha: Wikia nekasnapi Yusnawaitja tusaram, atumek nekamatnuitrume. ✠ ¹⁴ Cristo ii tunaarin akiimiatramak uwentikramrau asamtai, Yuse Wakani ii nintin engkemturmau asakrin, wina umirtuku ainaujai mash iruntraram, nekasrum wijai tuke pujustinuitrume tusa, Yuse Wakani iincha nintimtikramramiayi. Tura Yuska timiá pengker asamtai, mash aints ainautikia pengker awajartin ainiaji. ✠

Pablo Cristonu ainaun pachis seatmauri

¹⁵ Atumka ii Apuri Jesús nekasampita tinu asaram, Yusnau ainau mash anearme. Tura asamtai wisha nu chichaman antukan, ¹⁶ atumin pachisan Yusen seatkun tuke maaketai tajai. ¹⁷ Ii Apuri Jesucristo Apaachiri timiá pengker asamtai, atumin ninu Wakanin suramak, ni nekamtairincha atumniasha nekamtikramawarti tusan seatjarne.

✠ 1:1 (Hech. 18.19-21;19.1) ✠ 1:13 (Luc. 24.49; Juan 14.26; 16.13-15; Hech. 1.4;2.33) ✠ 1:14 (1.Cor. 1.22)

Tura Yus itiur awa tusaram, miatrusrumek nekaamniuram tusan seatjarne. ¹⁸ Tura Yus atumin eatmaku asamtai, atum nayaimpinam jearam tuke nijai pujusmintrum tusan, tura atumin paan nekamtikramawarat tusan, Yusen seatjarne. Tura Yus warina ni uchiri ainautinka tsangkatramkatnuitji nusha nekaamniuram tusan Yusen seatjarne. ¹⁹⁻²⁰ Aints ainau Criston maawaru wainiat, ni tujinkamuri nekas atsau asamtai, Yuska ni kakarmarijai Criston jakamunmaya inankimiayi. Nunia nayaimpinam iwiak, mash aa nuna inarti tusa, apu keemtainum ni untsurinini kentsamiayi. Yuska timiá kakaram asa, ni kakarmarijai Cristonu ainautin kakamtikramratnuitji. Nusha nekaamniuram tusan, wisha Yusen seatjarne. ²¹ Ii Apuri Cristo junia apu ainaun nukap nangkakawaitai. Ni kakarmarisha nayaimpinam pujuinau kakarmarincha nukap nangkakawaitai. Tura ii wainji nunasha mash ni kakarmarijai inamui. Tura ii waintsuji nunasha pachitsuk mash inamui. Cristo tuke iwiaaku asa, yamai pujuina nunasha, tura ukunam pujusartinua nunasha mash nukap nangkakawaitai. ²² Tura mash ainia nu Cristonka umirkartinuitai. Tura mash ni umirin ainautin inarti tusa, Yus Cristonak inaikiamiayi. Tura asamtai Cristo aintsri ainautikia kichik namangkea nunisrik ainiaji. ²³ Tura Cristo mash aa nuna najanau asa, ni aintsri ainautinka inatmartin asamtai, iikia mash iruntrar Cristonuitji. Tura Cristonu asakrin, ni Wakanin ii nintin piatramkau asamtai, mash Cristojai iruntrarsha kichik namangkea nunisrik ainiaji. ✧

2

Yus iin timiá anenmau asa uwemtikramramiaji

¹ Atumka yaanchuikia tunaarintin asaram, jakawa nunisrumek pujuyarme. ² Tura ju nungkanam Criston umirchau ainau pujuinawa nunisrumek yaanchuikia atumsha pujuyarme. Tu pujau asaram atumsha iwianchi apuri Cristo umirtan nakitinau apuri aa nuna wakeramuri tuke umirkuram pujuyarme. ✧ ³ Yaanchuikia iisha Cristo nemarchau asar tu pujuyaji, tura ii namangke wakerak nuke najankur, tura ii nintijai wakeraji nuke nintimsar pujuyaji. Tura tunaanumia akiinau asar, chikich aints Yusen umirchau pujuina nunisrik pujuinau asar, Yuse kajekmauri jukitin amiaji. ⁴⁻⁵ Tu pujarning Yus iincha wait anentramak pengker awajtamsatas wakerutmimiaji. Turamtai iikia tunaarintin asar, jakawa nunisrik pujarning, Yuska iincha miatrusang anenmau asa, Cristojai tuke iwiaaku pujusmintrum tusa, iincha uwemtikramramiaji. ⁶ Tura asamtai iikia Cristo Jesúsnau asar, yamaikia nijai tsaniasar jakamunmaya nantaknua nunisrik tura nayaimpinam pujuinawa nunisrik, pengker nintimsar angka pujusmintrum tusa uwemtikramramiaji. ⁷ Tura nukap arus ni anengkratairincha, tura iin pengker awajtamsatnurincha nekamtikramatas turamiayi. ⁸ Tura atumsha Cristo nekasampita tau asakrumin, Yus wait anentramak atumniasha tunaanumia uwemtikramramiarume. Antsu atumkeka nuka turunachmiarume. Antsu Yuska ningki wakerak kuikiachujai turamiayi. ⁹ Aints ningkikia uwemrachmin ayat, ni pengker takaamurijai tunaanumia uwemramnawaitkungka: Wiki tunaanumia uwemrawaitjai, tumamtinuitai. Antsu aints kichikisha tuuka uwemrachmin asamtai, Yuska atumniaka ningki wakerak tunaanumia uwemtikramramiarume. ¹⁰ Iikia akiintsurning, Yusek iin uwemtikramratas ni Uchirin Cristo Jesúsna akupturmaku asa, tura iincha yamaram nintimaun suramsau asa: Yamaikia Cristonu asaram, pengker aa nuke turataram tusa iincha yainmaktinuitji.

Cristonu asar pengker nintimsar pujaji

¹¹ Tura asamtai judíocho ainautiram yaanchuik itiur pujuyaji tusaram nintimrataram. Judíocho akiinautiram Yuska umirchau asakrumin, judíoti ainauti atum pachisar: ¿Warí, ni nuwapchiri charutkamukai? tsuutakur tinuyaji. Antsu judíotikia ii uwejejai ii uchiri nuwapchirin charutin asar, iik nintimsarik: Iikia Yusnawaitji tu nintimnuyaji. ¹² Antsu atumka yaanchuik Cristo pachisrum yamaram chichamka nekachu ayarme. Tura asaram Yuse aintsrinchu ayarme. Tura Yuska judío ainautin ni chichamen akupturmak: Tuke

wijai pujustinuitrume, tímia nuka antichu ayarme. Tura nu chicham antichu asaram tura Yuska umirchau asaram uwemrachmin ayarme. ¹³ Antsu yaanchuikia Yuska umirchau ayatrum, yamaikia Cristo atumi tunaarin sakturmartas jarutramak numparu asamtai, atumka Cristo Jesúsnau asaram Yusnum iruntratnuitrume.

¹⁴⁻¹⁵ Yaanchuikia judío ainauti Moisésa chichame umirin asar, judíocho ainautirmijai kajernain armiaji. Tura wainiat Cristo judío ainautin tura judíocho ainautirmincha nunisang uwentikramratas jarutramkamiaji. Tura asamtai Yus yaanchuik Moisésnum chichaman akupkamia nuna nangkamaku asamtai, yamaikia judío ainautinha, tura judíocho ainautirmincha: Mash iruntraram kichik aintsua nunisrumek kajernaitsuk angkan pengker pujusmintrum tusa, Cristo atumin angkan awajtamsamiarume. ¹⁶ Tura Cristo numi winangmanum waitnas jarutramkau asa: Mash metek pengker nintim-tunisrum pujustaram tusa, judío ainautinha tura judíocho ainautirmincha: Atumi kajernaiyamuri inaisataram tusa chichamnaka iwiamamiayi.✠

¹⁷ Judíocho ainautiram, yaanchuikia Yus umirtsuk pujarmin wainiat, Cristo aints ainauncha mash uwentikratas wantinkau asa: Judío ainou tura judíocho ainausha mash metek angkan pengker nintimsar kajernaitsuk pujusarti tusa, nu chichamnaka atumin nekantikramamiarume. ¹⁸ Tura mash Cristonu asaram, judíocho ainautirmincha, tura judío ainautinha mash irur ni Wakanin ii nintin engketramau asamtai, ii Apaachiri Yuska seatnuitrume. ¹⁹ Tura yamaikia atumsha Cristonu asaram, chikich nungkanmaya aintsua tumauchuitrume. Antsu Cristonu ainoujai mash iruntraram Yuse aintsrintrume. ²⁰ Atumka jea jeamkamua tumawaitrume. Kayajai jean jeamin ainou jea yumpunkai tusar, painia tumaun kayan nungka taimunam jintin armayi. Yaanchuik Yuse chichame etserin ainou tura Cristo nuiniatiri ainausha jean jeaminawa nunisarang aints ainaun Yuse chichamen ujau armiai. Tura kaya nekas juunta tumau aa nuka Jesucristoketai. ²¹ Tura asamtai Cristonu ainautikia untsuri asar, mash iruntrar metek nintimtisaris ii Apuri jee nekas pengker jeamkamua nunisrik ainiaji. ²² Tura Yuse Wakani atumi nintin engkemturmu asamtai, atumka mash iruntraram Yuse jee nunisketrume.✠

3

Cristo Pablon judíocho ainamunam akupkamuri

¹ Wikia Cristo Jesúsna chichamen judíocho ainautirmin etserkau asamtai, wína achirkar kársernum engketawarmiayi. ² Tura asamtai Yuska: Wína chichamur etserkata tusa, ningki wakerutak akuptuku asa, tura atumin wait anentramak pengker awajtamsatas wakerau asa, wína chichamur etserkata tusa nekantikruamiayi. Atumka nuka nekaamnawaitrume.✠ ³ Ju chichaman yamaikia jumchik aarja junaka aints ainou yaanchuikia nekaacharmiayi. Antsu Yus ningki wakerak winaka nekantikruamiayi.✠ ⁴ Yaanchuik aints ainou nu chichaman nekaachminun wainiat, Yuska nu chichaman wína nekantikruau asamtai, wi aarja ju atumsha aujsaram nekaamnawaitrume. ⁵ Yaanchuikia aints kichkisha nu chichamnaka nekaacharmiayi. Antsu yamaikia Yuska ni Wakanin akupturmaku asa, Cristo akuptukmau ainautinha, tura chikich Yuse chichame etserin ainauncha, Criston pachisar etserkarti tusa, nu chichamnaka nekantikramamijai. ⁶ Nu chichamka juwaitai: Judíocho ainautirmesha judío ainautijai metek Cristo Jesúsna asar, uwemratin chicham umirkar kichik aintsua nunisrik atinuitji. Tura Yuse uchiri asar, mash iruntrar Cristonu ainiaji. Judío ainautin Yuska yaanchuik ni chichamen akupturmak: Wijai tuke pujusmintrum tímia nunisang yamaikia judíocho ainautirmincha ju chichamnasha akupturmarme.✠

⁷⁻⁸ Wikia yaanchuikia Cristo umirtan nakitin asan, mash Cristonu ainaun nangkamasnak mianchayajai. Tura aing Yuska: Wína inatir wajasta tusa, ningki wakerutak tura wait anentrak, wína pengker awajtustas uwentikruru asa, judíocho ainamunam wína chichamur etserkata tusa ni kakarmarin surusmiayi. Tura asamtai wi Cristo chichamen

✠ 2:16 (Col. 1.20) ✠ 2:22 (1.Cor. 3.16-17; 1.Ped. 2.4-5) ✠ 3:2 (Col. 1.25) ✠ 3:3 (Gál 1.12) ✠ 3:6 (Col. 1.26-27)

etserkun: Cristo ningki wakerutkau asa, wait anentramak iincha tuke uwemtikram-ratnuitji tusan, nu chichamka kuikian nangkamasang timiá pengker asamtai etserjai.✠
⁹ Yus mash najanamia nuna nintimias: Judíochu ainau mash wína aintsur artinuitai tusa, ningki mash nekayat, nu nangkamtaik aints ainaun nunaka paanka nekamtikiachmiayi. Antsu nu chichaman paan nekamtikiata tusa wína akuptukmiayi. ¹⁰ Tura yamai Yuse awemamuri apuri ainau nayaimpinam pujuinauka mash ni aintsritin Yus turunamun mash waitmakar nintimsar: Yuse nintimauri nekas pengker aa nuna paan nekamtikiatas, ¹¹ Yus yaanchuik aints ainautin najatmatsuk, aints ainau uwemrarti tusa: Nukap arusan uchirun akupkatnuitjai, tu nintimrau asa, ni tímia nunisang ii Apuri Jesucriston akup-turmakmiaji. ¹² Turamtai iikia Cristo nekasampita tinu asar, shamtsuk tura natsaamtsuk angka Yuska seamnawaitji. Tura Cristonu asar, Yus seakur: Nekasampi anturtamji titinuitji. ¹³ Tura asamtai wikia atumin Cristo chichamen etserkau asan, wait wajamur nekakrumsha: Napchau nintimtsuk asataram tusan tajarme. Antsu wikia wait wajaing, atumka warasmintrum tusan wakerajai.

Cristo anengkratairi pachis etserkamuri

¹⁴ Tura asamtai wikia tikishman ii Apuri Jesucristo Apaachirin seatjarme. ¹⁵ Yus nayaimpinmaya ainauncha tura nungkanmaya ainauncha mash najanau asamtai, iikia junia aints ainauti ii aparijai chichaaji nunisrik Yuska seakur: “Apaachia,” titinuitji. ¹⁶ Wisha atumin pachisan tu seatjarme: Yus timiá pengker asa, tura timiá kakaram asa, ni Wakani atumi nintin piatramkau asamtai, ni kakarmarijai atumniasha kakamtikram-rarti. ¹⁷ Tura Cristo nekasampita tinu asakrumin, Cristo atumi nintin pujurtamsam-niuram tusan, tura nekasrum aneenisrum pujusmintrum tusan Yusnaka seatjarme. ¹⁸ Tu pujakrumka Cristo umirin ainaujai mash iruntraram, Cristo anengkratairi tu awai tusaram, nekaataram tusan Yusen seatjarme. Cristo aints ainautin tuke inaitamtsuk timiá anenmau asamtai, atumsha nunisrumek Yuska aneetaram tusan seatjarme. ¹⁹ Tura ¿Cristo anengkratairi itiurak aa? tusaram ¿tura aints ainautin waruka timiá anenmaji? tusaram miatrusrumek nekaachminun wainiat, Yus atumin nintimtikramrat tusan seatjarme.

²⁰ Tura asan Yusen maaketajai. Yuska timiá kakaram asa, ni tujinkamuringkia pengké atsau asamtai, ni kakarmarijai iincha kakamtikramrau asa, ni kakarmari ii seaji nuna nangkamasang iincha suramsamnawaitji. Tura ii nintimji nuna nangkamasang iincha nintimtikramramnawaitji. ²¹ Tura Cristo Jesús iin uwemtikramrau asamtai, Cristonu ainautikia mash ninu asar, Yuska nekasar tuke inaitsuk pengker awajsarmi. Tu ati.

4

Mash Yuse kakarmarijai pengker nintimtunismi

¹ Wikia ii Apuri Cristo inatiri asamtai, wína achirkar kársernum engketawarmiayi. Tura asan atumin akatkun, Yuska: Wína uchir ataram tusa, atumin eatmaku asamtai, atumsha Yuska umirin asaram, ni wakera nunisrumek pujustaram tusan nunasha tajarme. ² Atumka: Mianchawaitjai tusaram, jaimiasrum yaitasrum aujnain ataram. Tura pengker nintimtunisrum aneenin ataram.✠ ³ Tura Yuse Wakani atumi nintin engkemturmau asamtai, atumka mash iruntraram metek nintimsaram angka pengker pujustaram. ⁴ Yuse Wakaningkia kichkitai. Nuka ii nintin mash metek engkemturmau asamtai, Cristonu ainautikia mash iruntrar kichik namangkea nunisrik atinuitji. Tura Yuska iincha mash eatmaku asamtai, mash metek iruntrar nekasar Cristojai nayaimpinam pujustinuitji tu nintimji. ⁵ Ii Apuringkia kichkitai: Jesucristoketai. Tura asamtai mash metek Cristok nekasampita titinuitji. Cristonu ainauti Cristo nemarkatasar mash metek maiinuitji. ⁶ Tura Yuscha kichkitai: Nuka mash aints ainauti Apaachirintai. Tura asa mash aa nuna inawai. Tura mash aints ainau wina wakeramurun najanawarti tusa nintimtikrartinuitji. Tura asa ii nintin engkemturmawaitji.

✠ 3:7-8 (1.Cor. 15.9) ✠ 4:2 (Col. 3.12-13)

⁷ Tura Cristo iincha pengker awajtamak: Yainikmintrum tusa ningki wakerutmak, Yuse takatrisha metekchau atumsha atumsha takakmasmintrum tusa, ni kakarmarinka suramsawaitji. ⁸ Tura asamtai Yuse chichame yaanchuik Criston pachis tu aarmawaitai: “Ni nemase ainaun mash nepetak nayaimpinam wakamiayi, tura mash ainia nuna inartin asa, ningki wakerak aints ainaun metekchau kichik kichik ni kakarmarin susamiayi.” Tu aarmawaitai.✠

⁹ “Ni wakamiayi,” tu aarmawa nuka ¿warina takua tawa? Nuka yaanchuik ju nungkanam tara, aints wajas, nunia jakau asamtai iwiarsarmiaiyi. ¹⁰ Turinau wainiat nunia jaka nantakin asa, mash iruna nuna ni kakarmarijai inartas nayaimpinam wakamiayi. ¹¹ Tura mash aa nuna inakratin asa, ni akuptukmau ainautinka: Wina chichamur etserkataram tusa kakamtikramamiayi. Nunia Yuse chichame etserin chikich ainauncha: Wina chichamur etserkataram tusa ni chichamenka nekamtikramiaiyi. Nunia chikich ainauncha: Yusnum uwemratin chicham paan etserkamniuram tusa kakamtikramiaiyi. Nunia chikich ainauncha Cristo umirin ainau wainkamniuram tusa nintimtikramiaiyi. Nunia chikich ainauncha Yuse chichame nuikiartin ataram tusa inaikiamiayi. ¹² Cristo ni aintsri ainautin mash ni takatrin suramak: Cristonu ainau yaingmintrum tusa tura: Wina wakeramur miatrusrumek umirtukmintrum tusa, Cristo ni inatiri ainautinka mash ni kakarmarin suramsamiaji. ¹³ Cristo iin kakamtikramrau asamtai, iikia mash metek Cristo miatrusrik umirkarmi tusar, tura Yuse Uchiri tu awai tusar, miatrusrik nekaami tusar yainiktinuitji. Tu pujakrikia mash metek Cristoa nunisrik nintimrartinuitji. Tura Cristoa nunisrik nintimrar, Cristo wakeramuringkia tuke najanatnuitji.✠

¹⁴ Tu pujakrikia uchi nintiminawa nunisrikia nintimrashtinuitji. Uchi ainau nase mai umpu mai umpu waja nunisarang nintiminak chichaman antukar pachitsuk nintimaurin yapajin ainawai. Tura wait chichaman antukar mengkakartin ainawai. Tura asaramtai anangkartin ainauka wait chichaman chichainau asar, chikich ainauncha pachitsuk anangkinawai. ¹⁵ Antsu iikia aneeniakur nekas chicham aa nu ujaniktinuitji. Tura ii Apuri Cristo miatrusrik umirkurkia, ni nintimia nunisrik nintimsar, Cristonu ainautikia uchi nampuarua nunisrik nintimrartinuitji. ¹⁶ Tura asamtai Cristonu ainautikia untsuri ayatrik, kichkia nunisrik mash iruntrar metek nintimtunisar, miatrusrik aneenisar yainiktinuitji. Tura asar Cristo ni takatri metekchau ati tusa iin suramsau asamtai, Cristo kakarmarijai mash iruntrar Cristo miatrusrik umirkatnuitji.✠

Cristonam pujut yamaram jukitnuitji timiauri

¹⁷ Ii Apuri Cristo ju chichamnasha aarta turutin asamtai, nunasha tajarme. Yusen umirtsuk pujuinawa nunisrumek nangkamrum nintimsarmeka pujusairap. Nu aints ainauka Yuse wakeramurin pachinachu asar nangkamiar nintiminawai. ¹⁸ Nuka Yuse chichamen nekatan nakitinau asar paanka nintiminatsui. Tura nintinchau asar pengker pujustinun Yus sukarta nunaka nintiminatsui.✠ ¹⁹ Tura ni tunau turamurinha natsaamtsuk turin asar, warainak pasé aa nuna turin ainawai. ²⁰ Antsu atumka Cristo chichame paan antuku asaram, tu pujusmintrum tusarkia nuiniarchamuitrume. ²¹ Atumka nekasrumek Jesúsá chichame antukuitkurmeka, tura ni chichame nuimiaru akurmeka, ni chichame pachisrum atumsha: Nuka nekasaintai timinuitrume. ²²⁻²³ Yaanchuikia atumi wakeramuri nintimkuram anangmamkuram tuke inaitsuk tunau nintimin ayarme. Tura asaram mengkakatnunam pujuyarme. Antsu yamaikia nu arut nintimtaingkia inaisaram, Yuse Wakani atumi nintin engkemturmau asamtai, yamaram nintiminawa nunisrumek pujustaram. ²⁴ Tura nekas chicham antuku asaram, Yus wakera nunisrumek tunaarinchau pujakrum, nekasrum pengker aa nuke turatnuitrume. Tura asaram yamaikia yamaram nintimau nuke nintimsaram pujustaram.✠

²⁵ Tura atumka mash kichik namangkea tumau asaram, waitrutsuk nekas chicham aa nuke chichastaram.✠

✠ 4:8 (Sal 68.18) ✠ 4:13 (1.Cor. 12.28) ✠ 4:16 (Rom. 12.4-5; 1.Cor. 12.12) ✠ 4:18 (Rom. 1.21) ✠ 4:24 (Col. 3.9-10) ✠ 4:25 (Ex. 20.16; Lev. 19.11)

²⁶ Kajernaikiararam tunau nintimsarmeka kanurairap. Antsu chikich ainaujaisha tsangkurnairaram angkan kanurtaram.[☆] ²⁷ Satanás atumi nintin engkemturawai tusaram aneartaram.[☆]

²⁸ Yaanchuik kasamin akurmesha, yamaikia Cristonu asaram kasamat inaisaram pengker takakmastaram. Tura yuuminak pujuinau yuumamurin susami tusaram, pengker takakmastaram.[☆]

²⁹ Atum chichaakrumsha, chicham nakitamuka chichakairap. Antsu chikich aints ainaun pengker awajsamín aa nuke chichaktaram. Tura antujamniau chichau asaram, chikich ainausha miatrusarang Criston umirkarat tusaram, chicham pengker aa nuke chichastaram. ³⁰ Yuse Wakani nekas pengker aa nuka wake mesentikairap. Yuse Wakani atumi nintin engkemtur mau asamtai atumsha: Wikia nekasnapi Yusnawaitja tusaram paan nekaamamin arume.

³¹ Pasé aa nuka mash inaisaram kajernaitasha, tura nakitnairatnusha, tura jiyantikintincha, tura katsekmaktincha, tura pasé chichamsha mash inaisataram. ³² Antsu wait anennaisaram, tura pengker awajnisaram pujustaram. Yus atumi tunaarin mash tsangkutramrau asamtai, atumka Cristonu asaram tsangkurnairataram.

5

¿Yuse uchiri ainau itiur pujusartinuita?

¹ Atumka nekasrum Yuse aneetiri uchiri asaram, Yus puja nunisrumek pujustaram. ² Cristo ningki wakerak, iin uwentikramratas jarutramkau asa, Yusen pengker awajsamíayi. Tura asamtai Cristo iin anenma nunisrumek atumsha aneenitaram. ³ Atumka Yusnau asaram, tsanirmatnusha, tura pasé turatnusha, tura chikichnau aa nu wakerukintincha pachisrum chichaschatnuitrume. ⁴⁻⁵ Aints chikich nuwajai tsanirminauka, tura pasé turatnun wakerinauka, tura ninuchu aa nuna tuke wakerin ainauka nayaimpinam Yus ni Uchiri Cristojai aints ainautin inatmartas puja nuna pujutirinka pengké pujuschamnawaitai. Atumsha nuka paan nekarme. Ninuchu aa nuna wakerinauka chikich aintsu yusrin tikishmatrar seainawa nunisarang ainawai. Tura chicham natsanpiaku aa nuka chichakairap, tura nintinchawa nunisrumek nangkamrumka chichakairap. Nu chichamka nakitaintai. Tura chikich ainausha pachisrum wishikrairap. Antsu Cristonu asaram maaketai titaram. ⁶ Chikich ainau nangkamiar wait chichaman chichainamtaisha, anangkruwai tusaram nintimrataram. Yusen umirchau ainauka tuke inaitsuk tunau turin asamtai, Yuska nu aints ainaun wait wajaktiniun susartinuitai. ⁷ Tura asamtai nu aints ainaujai pengké pachinkairap tajarme.

⁸ Yaanchuikia Cristo umirchau asaram, teenam pujuinawa nunisrumek pujuyarme. Antsu yamaikia ii Apuri Cristonu asaram, paaniunam pujuinawa nunisrumek pujarme. Tura asaram tuke inaitsuk paaniunam pujusrum Cristosha umirin ataram. ⁹ Paaniunam pujuinauka pengker nintintin ainawai. Tura nekas pengker aa nuna turinak nekas aa nuna chichainawai. ¹⁰ Tura asamtai ii Apuri wakera nu turin ataram. ¹¹ Tura Yusen nintimsuk teenam pujuinawa nunisrumek atumka: Tunau wajasai tusaram, nu aints ainaujaingkia iruntrairap. Antsu teenam pujuinauka tunaanum pujusarai tusaram chicharkataram. ¹² Nu aints ainau anumkar tunau turina nuna tunaaringkia pachisar chichastinka nekas natsanpiakuitai. ¹³ Antsu aints paaniunam pujuinau turamuringkia paan nekaratnuitji. Tura tunau ainau turamurisha nunisang mash paan nekaratnuitji. ¹⁴ Tura asamtai tunau takainaun pachis tu aarmawaitai:

“Jakawa nunisrumek kanurum tepakrumsha shintartaram. Turaram shintarum nantaktaram. Turakrumningkia Cristo atumin paan nintimtikramratnuitrume.”[☆]

¹⁵⁻¹⁶ Tu aarmau asamtai: Itiur pujaji, tusaram nintimrataram. Yamaikia tunau ainau untsuri pujuinau wainiatrumek, atumka nintinchawa nunisrumka pujusairap. Tura ii jakatin kinta wári jeatin asamtai, kintajai metek Yuska pengker awajsataram.[☆]

[☆] 4:26 (Sal. 4.4; Sant. 1.19-20) [☆] 4:27 (1.Ped. 5.8) [☆] 4:28 (Ex. 20.15) [☆] 5:14 (Rom. 13.11-13) [☆] 5:15-16 (Col. 4.5)

¹⁷ Tura asaram nintinchau ainau turina nuka turuwairap. Antsu Yuse wakeramuri itiur awa tusaram nintimrataram. ¹⁸ Atumi umutiri umakrumsha nampekairap. Atum nampeakrum pujakrumka inaisatatkamaram tujintarme. Antsu wína nintirun Yuse Wakani tuke pujurtusti tusaram, Yus nintimsaram pujustaram. ¹⁹ Tura atum chichaakrumsha, Yuse chichame pachisrum chichastaram. Tura Yus kanta kantamaram, atumek nintimsaram yamaram kantasha kantamataram. Tura ii Apuri nintimsaram atumi nintijai kanta kantamataram. ²⁰ Tura mash aa nu pachisrum ii Apuri Jesucristo naari nintimtusurum, tuke ii Apaachiri Yus maaketai titaram.✠

¿Cristo nemanin ni wearijai itiur pujustinuita?

²¹ Atumka Cristonu asaram umirnain ataram.

²²⁻²³ Tura Cristoka ni aintsri ainautinka uwemtikramratin asa, ii muukea tumawaitai. Tura nuwentin ainauka ni nuwari muukea tumau ainawai. Tura asar ii Apuri nuna wakerau asamtai, aishrintin ainautiram atumi aishri umirkartaram.✠ ²⁴ Tu pujustaram turamin asamtai, aishrintin ainausha Cristonu asar, Criston umirina nunisarang mash ni aishrinak umirkartinuitai.

²⁵ Cristo ni aintsri ainautinka timiá anenmau asa, iin uwemtikramratas jarutramkami-aji nunisrumek nuwentin ainautirmesha atumi nuwaringkia aneetaram.✠ ²⁶ Cristo ni aintsri ainautinka: Aints entsanam maii pakuichau pujawa nunisrumek nekasrum tunaarinchau ataram tusa, ii tunaarinka mash japitramramiaji.✠ ²⁷ Cristo aintsri ainautikia mash iruntrar Cristonu asakrin, ii Apuri ni aintsri ainauti tunaarin sakturmartas jarutramkami-aji. Tura Cristo iin juramkitas taamtai, ni wakera nunisrik pengké tunaarinchau pujustinuitji. ²⁸⁻³⁰ Cristo aintsri ainautikia mash iruntrar Cristonu asar, Cristo ni aintsri ainautin timiá anenma nunisarang nuwentin ainauka nekasar ni nuwarin aneenak ni namangkea nunisarang niincha pengker awajsartinuitai. ¿Yáki ni namangken nakitnui? ¿Antsu ni namangken pengker awajsatas yáki yutan yuwatsu? ¿Tura yáki ni namangken pengker awajmamtsu? Tura asamtai nuwentin ainau ni nuwarijai kichik namangkea nunisarang asar, nuwennuka ni namangken anea nunisang ni nuwarincha aneetnuitai. ³¹ Tura asamtai Yus nu nangkamtaik chichaak: “Aints ni aparincha, tura ni nukurincha inais ukuki, ni nuwarijai tsaningtinuitai. Tura aishmang ni nuwarijai jimiaraitiat, kichkia nunisang atinuitai,” timiayi.✠ ³² Yus nu nangkamtaik aints nuwatnaikiatnun pachis nunaka timiayi. Tura yaanchuikia nunaka nekaachminun wainiat, Yus wína nekamtikruau asamtai wisha tajarme: Ju chichamka Cristonu ainauti mash iruntrar kichik namangkea nunisrik pujuinaji taku tawai. ³³ Tura wi atumin aatramjarme nunak ataksha tajarme: Nuwentin ainautiram atumi nuwarisha atumi namangkea nunisrumek aneetaram. Tura aishrintin ainautirmesha atumi aishri anturin ataram.

6

¹ Uchi ainautirmin tajarme: Ii Apuri Cristonu asaram, atumi aparisha, tura atumi nukurisha umirin ataram. Nuka nekas pengkeraitai.✠ ²⁻³ Yus nu nangkamtaik chichaman akupak: Ju chicham umirkuram, nekasrum pengker pujustinuitrume turam-miaji nuka nuwaitai: “Atumi aparisha, tura atumi nukurisha umirkataram. Turakrumka pengker aints atinuitrume, tura untsuri musach ju nungkanam pujustinuitrume.”✠

⁴ Uchirtin ainautirmincha tajarme: Atumi uchiri nangkamrumka kajkairap. Antsu pengker nuiniakmaikiakrum, tunau wajasaim tusaram, tura Yusen pengker nintim-tusarat tusaram, Cristo wakera nunisrumek tsakatmartaram.✠

⁵ Aintsu inatiri ainautirmincha tajarme: Atumka Cristo umirin asaram, Cristo wína pasé awajtusai tusaram, shamakrum pengker nintimsaram nakimtsuk atumi inatmin Cristo umirume nunisrumek pengker umirin ataram. ⁶ Atumin inatmin jiirmamtaisha,

✠ 5:20 (Col. 3.16-17) ✠ 5:22-23 (Col. 3.18; 1.Ped. 3.1) ✠ 5:25 (Col. 3.19; 1.Ped. 3.7) ✠ 5:26 (Tito 3.5)
✠ 5:31 (Gén. 2.24) ✠ 6:1 (Col. 3.20) ✠ 6:2-3 (Ex. 20.12; Lev. 19.3; Deut. 5.16) ✠ 6:4 (Col. 3.21)

wína pengker awajtusat tuuka nintimtsuk takakmastaram. Antsu atumin inatmin waitmachu wainiatrumek, Cristo inatiri asaram, nakimtsuk pengker nintimsaram takakmakrum Yuse wakeramuri najanin ataram. ⁷ Atumka pengker nintimsaram atumin inatmin umirkurmeka aintskeka umirtsurme, antsu ii Apuri Cristosha umirume. ⁸ Tura Cristo taamtai, aintsu inatiri ainausha, tura aintsu inatirincha ainausha ii Apuri Cristo ni pengker turamurijai metek kichik kichik pengker awajsatnuitai.✠

⁹ Tura inakratin ainautirmincha tajarme: Atumsha Cristonu asaram, atumi inatir- ingkia yaishi yaintsuk asataram. Nusha nintimrataram: Cristo nayaimpinam puja nusha atumka umirkatnuitrume. Tura atumi inatirisha nunisarang niincha umirkartinuitai. Tura Cristoka mash ainia nuna inau asa, mash aints ainautin metek inatmaji.✠

¿Cristonu ainautisha itiur iwianch nepetkatnuitji?

¹⁰ Yatsur ainautirmin umaarutirmincha tajarme: Atumka Satanás nepetkatarum, ii Apuri Cristo nintimsaram: Cristo ni kakarmarijai wína kakamtikrurti tusaram kakaram wajastaram. ¹¹ Romano suntari mesetnum weartas jirun entsasar weenawa nunisrumek atumsha Yuse kakarmarijai Satanáska nepetkatnuitrume. ¹² Iikia aintsjaingkia maaniatsji. Antsu iwianch ainaujai ii jiijai waitnsuji nujai, tura Satanásjai, tura pasé nintimtikartin ainau teenam pujuinawa nujai maaniaji. ¹³ Tura asamtai suntar mesetnum weenak iwiarmamina nunisrumek Yuse kakarmari jukitaram. Tura asaram Satanás atumin nepetamkartas wakera nu nepetkau ataram, tura Satanás Yuse kakarmarijai nepetkau asaram tuke inaitsuk anearum kakaram wajastaram.

¹⁴ Tura asaram wainmamkataram. Satanás nepetkatarumka nekas aa nuke nintimrataram. Tura wait chichamka etsertsuk nekas aa nuke etserkataram. Tura Cristo atumi nintin japitramrau asamtai, tunaarumsha mash japaram ukukrum, tunaachawa nunisrumek pujustaram. ¹⁵ Tura asaram suntar iwiarmaminak sapatun wejina nunisrumek chikich ainamunam wetasrum, angka pengker pujustin chicham etserkatin iwiarnartaram. ¹⁶ Nunia suntar maaninak tantaaran takakinawa nunisrumek Cristoka nekasampita tusaram nintimtustaram. Turakrumningkia Satanás atumin: Tunau turataram tusa nepetamkatas wakeraksha, atumin nepetamkatatkama tujintramkatatrume. ¹⁷ Tura Cristo atumin uwemtikramrau asamtai, wína tuke waitkatatui, tu nintimsaram, suntar jirun tsengkrakinawa nunisrumek au asaram, Satanáska nepetkau ataram. Tura suntar nangkin takakinawa nunisrumek Yuse chichamesha nintimrau ataram. Nuka Yuse Wakani nangkirintai.✠

¹⁸ Yuse Wakani itiur Yus seatnuitrume tusa atumniaka nekamtikramatnuitrume. Tura asamtai tuke inaitsuk Yus seataram. Tura kajinmatsuk tuke Yus seakrumka, Cristonu ainausha mash pachisrum Yus seattiarum. ¹⁹⁻²⁰ Tura winasha Yus seatritaram. Tura Yus winia chichartak: Wína chichamur etserkata tusa akuptukuitai. Wikia ni chichamen etserin asan kársernum engkeamuitjai. Tura kársernum engketiatun, warinak titaj tusan, yamaikia nekaachmin ayatun, shamtsuk tura natsaamtsuk Yusnum uwemratin chicham nekas pengker aa nuna paan etserkatnun Yus wína nekamtikiati tusaram seatritaram tajarme.✠

Inangnamu chicham akupkamuri

²¹ Yamaikia ju papin aaran umisu asan, ii aneetiri yachiin Tíquicon atumin akuptuktatjarme. Nuka ii Apuri Cristo pengker inatirintai. Nuka atumin jea, wína pachitas atumin ujatmak wi turamurnasha mash nekaamtikramatatrume. ²² Tura asamtai atumka iin pachisrum mash nekaataram tusan, tura atumin pengker nintimtikrarti tusan akuptuktatjarme.✠

✠ 6:8 (Col. 3.22-25) ✠ 6:9 (Col. 3.25;4.1) ✠ 6:17 (Rom. 13.12-14; 1.Tes. 5.8; Hebr. 4.12) ✠ 6:19-20 (Col. 4.2-4) ✠ 6:22 (Col. 4.7-8)

²³ Ii Apaachiri Yus ii Apuri Jesucristojai ni nemarkautirminka mash angkan pengker pujustinun suramsarti tajarme. Tura Cristo nekasampita tinu asakrumin, tuke aneenisrum pujustaram tusa, atumin yainmakarti. ²⁴ Ii Apuri Jesucristo tuke inaitsuk aneakrumningkia, Yus atumin mash pengker awajtamsarti tajarme. Maaketai.

Pablo Filiposnum Pujuinaun Papin Akuptukmauri

Chicham akupkamuri

¹ Wiitjai Pabloitjai. Yatsur Timoteojai ju papin atumin aatjarme. Iisha mai Cristo Jesús a inatirinji. Jesucristonu ainautirmin Filiposnum pujuinautirmin mash atum aatkur pujaji. Tura Cristonu ainau wainin ainautirmincha, tura ni yain ainautirmincha aatkur pujaji. ² Ii Apaachiri Yus ii Apuri Jesucristojai, atumniasha pengker awajtam-sarti, tura angkan pengker pujustinasha suramsarti.

Maaketai timiauri

³ Atumka Yusnau asaram, tura wína yainkau asakrumin, atumin nintimsan pujakun, wína Yusrunka maaketai tajai. ⁴ Tura atumin mash pachisan Yusrun seaknaka, nekasan warasan Yusen sejai. ⁵ Nu nangkamtaik Cristonam uwemratin chichaman wi etser-matai, atumka mash iruntraram wína yainkau asakrumin, tura yamaisha tuke yaintu asakrumin, nuna nintimsan warasan Yusen seatjarme. ⁶ Yus atumin pengker awajtam-satniun nangkamau asa, Cristo Jesús tatin kintaka jeatsaing, Cristonu ainautirmin tuke pengker umirtuktaram tusa, Yus atumniaka yainmaktatume. Yus nekasampi turatata tusan, wisha nekajai. ⁷ Wikia atumin aneau asan, atumin pachisan tu nintimsan pujajai. Yamaisha kársernum engketkuncha, tura apu iruntrar pujuinamunmasha: Cristonam uwemratin chicham nekas Yuse chichamentai tusan, tura nu chichamka waitchawapita tau asantai, winasha wait anentrak Yus yaintui. Atumsha winasha yaintu asakrumin, Yus wait anentramak atumniasha mash yainmarme. ⁸ Jesucristo atumin wait anentramak mash anenmau asantai, wisha nunisnak atumin warutmak aneajrum nunasha Yuska nekawai. ⁹ Atum aneenisrum pujarme nuna nangkamasrumek aneenitaram tusan, tura Yus ni nekamtairin atumniasha suramsarat tusan Yusen seatjarme. ¹⁰ Tura Yusen tu seakun, nekas pengker aa nuna timiá pengkeraitai, tiarat tusan Yusen seatjarme. Tura Cristo tatin kinta jeantai, atum nekasrum tunaarinchau wajasmintrum tusan, tura wait wajakairam tusan Yusen seatjarme. ¹¹ Jesucristonu asaram, ni kakarmarijai atumsha nekasrum tunaarinchau pujustinuitume, tura pengker aa nuka nekasrum tuke mash turatnuitume tusan, atumin pachisan Yusen seatjarme. Tu pujakrumningkia chikich ainausha: Yus juuntapita tiartnuitai.

Cristonak nintimsan pujajai timiauri

¹² Yatsur ainautiram umaarutirmesha, wi kársernum engkeman pujai, aints untsuri Cristonam uwemratin chichaman antukari. Nu nekaataram tusan wisha wakerajai. ¹³ Juun apu jeen wainin ainausha, tura chikich inatiri juun apu jeen pujuinausha wína pachitsar: Cristo nemarkin asantai, kársernum engkewari tusar mash nekarinawai. ¹⁴ Wi kársernum engkeamu pujantai, Cristonu ainau untsuri ii Apurin umirkar, yamaikia pengker nintimsar, shamkartutsuk Yuse chichamen etserinawai.

¹⁵ Nekasan tajarme: Chikich ainauka wína suwirpiaku jiirsar, tura miajuitjai tinayat, Cristo chichamenka etserinawai. Antsu chikich ainauka pengker nintimtursar Cristo chichamenka etserinawai. ¹⁶ Wikia Cristonam uwemratin chicham nekas Yuse chichamentai tinu asan, juni kársernum engkeamu pujajai. Tura asantai chikich ainau nuna nekainau asar, tura Criston aneanau asar Cristo chichamenka etserinawai. ¹⁷ Antsu chikich ainauka pásé nintimtursar: Wína anturtukarat tusar, wína pachitsar wait wajakti tu nintimtursar, Cristo chichamenka niish etserinawai. ¹⁸ Tinau wainiatnak wikia pachiatjai. Antsu mai metek Cristo chichamen etserkarti wikia tajai. Chikich ainau pásé nintijaisha, antsu chikich ainauka nekasar pengker nintijai Cristo chichamen etserinamtai, nuna nekaan wisha warajai. Tura asan tuke warastatjai.

☆ 1:1 (Hech. 16.12)

¹⁹ Nunia atumsha Yus tuke seatrau asakrumin, Jesucristo Wakani kakarmarijai wisha tuke Yusnum uwemratatjapi tusan nekajai. ²⁰ Wikia nekasan natsaamtsuk: Cristo wina Apuruitai tusan, tuke ni naarin pachisan aints ainaun paan ujakartasan wakerajai. Wi nuna turantai, Cristo kakarmari wini puja nuna paan nekaawarat tusan wakerajai. Wina mantinachmataikia, tura wina mantinamtaisha wikia shamkashtatjai, tura asan aints ainou: Cristo nekas juuntapita tiarat tusan wakerajai. ²¹ Wikia iwiaaku pujaknaka tuke Cristonak nintimsan pujajai. Antsu jakanka tuke Cristojai tsaniasan pujustinuitjai. Nuka timia pengkeraitai. ²² Yamaikia iwiaaku pujaknaka, Cristo ni takatrin wina surusmia nuna takaajai. Turayatnak ¿tukí timia pengkerai? tusanka nekatsjai. ²³⁻²⁴ Wikia jakanka Cristojai tsaniasan pujustasan wakeraja nuka timia pengkeraitai. Antsu atumi yainmakartin yuumau asakrumin, wikia iwiaaku pujusminuitjai. Tura asan ¿tukí timia pengkerai? tusan nekaatatkaman tujintajai.✠

²⁵⁻²⁶ Cristo Jesús wina yaintu asamtai, atumjai ataksha iruntran pujamtaikia atumsha: Cristo nekas juuntaitai tusaram, nukap warasmintrum tusan, wárikia mantuachartatui tusan nekajai. Tura tu nintimsan pujaknaka, wisha atumniaka mash: Miatrusrumek Cristo umirkataram tusan kakamtikratnuitjarne. Tura atumniaka mash waramtiksatnuitjarne.

²⁷ Tura Cristonam uwemratin chichamka timia pengker asamtai, atumsha pengker aa nuke turataram. Tura asakrumin atumin jiisan, tura atumin jiitsuk yaja pujaknasha, atum pengker turamurmin anturkatasan wakerajume. Tura mash metek iruntraram Cristo nekasampita tusaram chikich ainausha Cristonam uwemratin chicham mash metek nintimsaram ujaktaram. ²⁸ Atumi nemase ainausha jumchiksha shamkairap. Atum shamtsuk pujakrumningkia, nu aints ainouka: Jjinmapi wetatja tinaunka nunaka Yus nekamtikiatnuitai. Tura Yus atumniasha nekamtikramau asamtai: Nekasnapi uwemratatja titinuitume. ²⁹ Atumka Cristonu asakrumin, ni nekas nintimtustinasha tura nuna nangkamasrumek wait wajaktinasha Cristo tsangkatramkawaitume. ³⁰ Atumsha wiya nunisrumek Cristonu asaram wait wajarme. Yaanchuik wi wait wajamurka waitkamiarume. Tura yamaisha wait wajamurka tuke antarme.✠

2

Cristo nintimias pujumia nunisrumek atumsha pujustaram

¹ Cristo atumin pengker nintimtikramrau asamtai, tura Yuse Wakani atumi nintin engkemturmau asamtai, atum Cristo nintimsaram pujau asaram, tura chikich ainou wait anentakrum pujau asaram, tura winasha anentau asaram, ² wina waramtikrustasrum mash metek iruntraram aneenisrum pengker nintimtunisrum pujustaram. ³ Antsu chikich ainou suwirpiakuka jiisairap. Tura: Miajuitjai tuuka nintimtumasairap. Antsu mianchawaitjai, tu nitimtumasrum pujustaram. Tura chikich ainausha pachisrum: Nuka timia pengkeraitai tu nintimsaram pujustaram. ⁴ Atumnou aa nuke nintimsarmeka pujusairap. Antsu ¿chikich ainaun itiurak yaingkaintaj? tu nintimsaram pujustaram.

⁵ Cristo Jesús nintimias pujumia nunisrumek atumsha nintimsaram pujustaram.

⁶ Cristo Yusea nunisang pujayat:

Wikia Yusjai metekaitjai,

tu nintimsangka pujuchmiayi.✠

⁷ Antsu ni pujutirin nayaimpinka ukuki,
aintsua nunisang akiina,
mash aints ainou inatiria nunisang ayayi.
Jesús tunaarinchau ayat aints wajas:

⁸ Wikia mianchawaitjai tusa
ni Apaachirin umirkau asamtai,
mangkartinua nunisarang

✠ 1:23-24 (Gál. 2.20) ✠ 1:30 (Hech. 16.1-3) ✠ 2:6 (Juan 1.1-3)

numi winangmanum natsanpiakun maawarmiayi.✠

⁹⁻¹¹ Tura asamtai nayaimpinam puju ainausha mash,
tura nungkanam puju ainausha mash,
tura nungka nitkarin puju ainausha mash
Jesúsán tikishmatrarti tusa,
tura Jesúsán nakitin ainausha: “Ameketme Inakratnum,” tiar ni Apaachiri Yusnaka
waramtiksertinuitai.
Yus Jesucriston: Mash apu inau ata tusa,
ni naarin chikich ainau naarin nangkamasang
nekas pengker awajsamiayi.✠

Cristonu ainauka yaa tsantinawa nunisarang ainawai

¹²⁻¹³ Tura asamtai aneetir ainautiram, yaanchuik wi atumjai pujakun, Yuse chichame
etsermatai antukrum umirtukmiarume nuna nangkamasrumek yamaisha arák pujai
wainiatrumek pengker umirtuktaram. Atumka: Yuse wakeramuri najanatatajai titaram
tusa, atumin yainmaktinka Yusketai. Tura ni wakeramuri takamtikramsatnuka Yusketai.
¹⁴ Atum turarme nuka mash chikich ainau pachisrum aujmatnaitasuk tura jiyansuk
asataram tajarme. ¹⁵ Nu turakrumka pengké tunaarinchau pujau asaram, chikich ainau
atumniaka wiasmatramtsuk pujusartinuitai. Tura asaram Yuse uchiri atinuitrumek. Tura
tunau ainaujai pachinkaram pujayatumek, nekasrum tunaarinchau pujau asaram, yaa
teenam tsantinawa nunisrumek ¹⁶ pujut nangkankashtin pachisrum Cristo chichame
chikich aints ainausha nekamtikiataram. Nu turakrumka Cristo tatin kinta jeamtai
wínaka waramtikrustinuitrumek. Nu turakrumningkia wisha nintimsan: Wikia wait
wajayatnak tuke wekaasan, Yuse chichamen etserkamiaja nunaka nangkamniaka et-
serkachmiajai titinuitjai.

¹⁷ Wína mantinamtaisha wikia warasainjai. Tura atumsha Cristo nekasampita tinu
asaram, wait wajayatrum wi waraaja nunisrumek warasminuitrumek. ¹⁸ Tura atumsha
waraakrumningkia metek warasarmi.

Timoteon pachis tura Epafroditon pachis etserkamuri

¹⁹ Ii Apuri Jesús wakeramtaikia, Timoteo wína pengker nintimtikrurat tusan wári
atumin akuptuktasan wakerajrumek. Nuka atum itiuur pujarme nuna nekaa, wína ujatkatu
tusan wisha wakerajai.✠ ²⁰ Tura Timoteowa nunisar nintimsar pujuinaunka kichkisha
waininatsjai. Timoteoka wiya nunisang atumin pachis: ¿Pengkerash pujuina? tusa
nintimturmarne. ²¹ Chikich ainauka ni wakeramurinak tuke nintimu weenawai. Antsu
Jesucristo wakeramurinka nintimu weenatsui. ²² Tura atumka Timoteo pachisrum ni
pengker pujamuringkia nekarme. Nuka wijai tsanias Cristonam uwemratin chichaman
etsernuyayi. Tura uchi ni aparin yayawa nunisang winasha tuke yainuyayi. ²³ Tura wina
turunatnur itiuur ating tusan nuna nekaanka, Timoteonka kakarmachu atumin akuptuk-
tasan wakerajrumek. ²⁴ Tura ii Apuri wakeramtaikia, karsernumia wina jirkiamtaikia,
atumin wáriapi wainkartatja, tu nintimsan pujajai.

²⁵ Yamaikia Epafroditoncha akuptuktasan nintimtajrumek. Juka wína yatsurua tu-
mawaitai. Tura wiya nunisang wait wajayayi. Tura wiya nunisang shamkartutsuk
Cristo chichamen etsernuyayi. ²⁶ Atumka ni sungkurmakmaurisha nekau asakrumin,
Epafrodito nuna nekaa napchau nintimias, atumin jiirmastas wakerutmarme. ²⁷ Nuka
nekas jaachak wajakin asamtai, wisha wake mesekmajai. Tura wainiat Yus wait
anentak tsuwarmayi. Ni jakawaitmataikia, wikia nuna nangkamasnak wake mesekan
pujusachajash. Tura Yus winasha wait anentruru asa niincha tsuwarmayi. ²⁸ Tura
asamtai atumsha ataksha wainkaram warastaram tusan, tura wisha nunisnak napchau
nintimtsuk pujustaj tusan, ii yachiin wári akuptuktatjarme. ²⁹ Tura ni atumin jeamtai,
ii Apuri Cristo maaketai tusaram, nukap warasrum wainkataram. Chikich ainau niya
nunisarang Criston pengker umirkar pujuinausha pengker awajsataram. ³⁰ Atumka wína

✠ 2:8 (Mat. 26.39; Juan 10.18) ✠ 2:9-11 (Hebr. 2.9;12.2) ✠ 2:19 (Hech. 16.1-3)

yainkatatkamaram tujintau asaram, ni wína yaingti tusaram, atum akupkamu asa, ii yachí jatancha shamtsuk wina yaintak jaachak wajakmiayi.

3

Cristo nekaatnuka mash aa nuna nangkamasketai

¹ Wina yatsur ainautirmin umaarutirmincha, yamaikia ataksha tajarme: Ii Apuri Cristo nintimsaram warastaram. Nuwik aatramjarme nuna ataksha antuktaram tusan, napchauka nintimtsuk atumin ataksha aatjarme. ² Anangkartin ainau pasé aa nuna nuikiartinak pujuinau wainkataram. Nu aints ainau chichainak: Atum uwemratasrum wakerakrumka, Moisés tímia nunisrumek atumi nuwapchiri charuktaram, nangkamiar tinawai. ³ Nuwaprun charuknaka uwemrainjapi, tichamnawaitji. Antsu Yuse Wakanijai Yus pengker awajkur: Yus juuntaitai taji. Tura Cristo Jesúsnu asar uwemratatjiapi tusar waraaji, antsu ii nuwapchiri charukmau asar uwemratatjiapi tatsuji. ⁴ Chikich ainau nangkamiar: Wikia miatrusnak Moisésa chichamen umirkawaitjai tu nintimtumasar pujuinau wainiatnak, nu aints ainaun nangkamasketjai timinuitjai. ⁵ Wi akiinamur ocho (8) kinta nangkamaramtai, Moisés chichaman akupkamia nunisarang nuwapchirun charutrukarmiayi. Wikia nekasán Israela weari asan, Benjamínka wearinjai. Tura wína wear ainausha tuke hebreo chichamen chichau asaramtai wisha nunisnak nunasha chichayajai. Tura fariseo aints asan, Moisésa aarmaurin tuke umirnuyajai. ⁶ Tura wikia Moisésa aarmaurin miatrusnak umirkau asamtai, wína pachitsar: Moisésa aarmaurin umirchawaitai pengké turutcharminuitai. Tura wiki nintimtumasnak Yusen miatrusnak umirkataj tusan, Cristonu ainaun kajerakun wait wajaktiniun suyajai. ⁷

⁷ Yaanchuikia tu nintimsan pujuu asan, nangkamin nintimnuyajai. Antsu yamaikia Cristonu asan, wi yaanchuik nukap nintimnuyaja nunaka yamaikia inaisawaitjai. ⁸ Yaanchuik turutirun turaknaka tuuka uwemrachminuitjai tusan nuna nekaan, tura nunaka mash inaisau asan, yamaikia pachischawaitjai. Antsu wína Apur Cristo Jesús itiurak awa tusan, nuna nekaatasan wakerajai. Tura Cristonu tuke ataj tusan, yaanchuik nintimnuyaja nunaka pachisan: Tsuwata nunisketai, tu nintimsan pujajai. ⁹ Tura Cristojai tsaniasan pujustasan wakerau asan, Moisésa aarmaurin umirkun nekasnapi tunaarinchau pujusainja, tuuka yamaikia nintimtsujai. Antsu Criston nekasampita tinu asamtai, tura Yus wína tunaaruncha japrutau asamtai, Yus winaka tunaarinchawa nunisnak pujai jiiroi, tu nintimjai. ¹⁰ Tura mash ainia nuna nangkamasang wakeramurka juwaitai: Criston miatrusnak nekaatasan wakerajai. Tura Yuse kakarmarijai nantakmiaurinch nekaatasan wakerinjai. Tura ni wait wajakmia nunisnak wait wajaktasan wakerinjai. Tura Cristo jatancha shamtsuk jakamia nunisnak wisha jatancha wakerinjai. ¹¹ Tura asan Cristo jaka nantakmia nunisnak wisha jakamunmaya nantaktasan wakerinjai. ¹²

Pablo tu pujajai timiauri

¹² Antsu Cristo wakeramurin miatrusnak umirnuyajai tatsujai. Tura tunaaruka nekas atsawai tatsujai. Tura wainiat Cristo Jesús: Winar atatme tusa untsurkamiayi. Tura asamtai Cristo wakera nunaka tuke inaitsuk miatrusnak umirkatasan wakerajai. ¹³ Yatsur ainautiram umaarutirmesha, wisha Cristo pujumia nunisnak pujajai tatsujume. Antsu kichnasha tajarme: Wi turinuyaja nunaka yamaikia mash kajinmaran, Cristoa nunisnak atasan wakeraja nunaka tuke nintimsan pujajai. ¹⁴ Wikia nekasnapi Cristo Jesúsjai tsaniasan pujustatja, tu nintimsan pujajai. Tura Yus wína untsurak: Cristojai tsaniasam nayaimpinam tuke pujusta turutit tusan, tu nintimsan pujajai.

¹⁵ Tura asamtai Cristo nekasampita tinu ainautikia mash metek tu nintimraru armi. Antsu atum tu nintimtsuk pujakrumningkia, Yus: Tu pujustaram tusa, atumin nunasha nekantikramatatrume. ¹⁶ Tura yanchuk Cristo tu umirkatin nekau asaram, tuke nunisrumek umirkataram tajarme.

☆ 3:3 (Rom. 2.28-29; Gál. 6.14-15; Col. 2.11-13)

☆ 3:5 (Hech. 23.6;26.5; Rom. 11.1)

☆ 3:6 (Hech.

8.1-3;9.1-2;22.4-5;26.9-11) ☆ 3:11 (Rom. 6.11-13)

¹⁷ Yatsur ainautiram umaarutirmesha, wi tu pujaja nu nekau asaram, wiya nunisrumek atumsha pujustaram. Tura aints iiya nunisarang Cristo nemarkinau wainkaram, nu aintsua nunisrumek pujustaram. ✧ ¹⁸ Yaanchuik atumin nukap ujakmiajrume nuna yamaisha juutkamaikiakun ataksha atumin ujaktasan wakerajrume. Cristo numi winangmanum jakamia nuna chichamen untsuri aints ainau antutan nakitinawai. ¹⁹ Tura ni namangke wakerina nunak tuke nintimsar pujuinau asar, ni namangkengka ni Yusrintai. Tura tunau takainau asar, natsanpiaku aa nunaka natsaamtsuk: Nuka pengkeraitai tinawai. Tura ju nungkanmaya ainau nintiminawa nunisarang nintiminawai. Tura asar tuke mengkaakartin ainawai. ²⁰ Antsu iikia Yusnau asar, tura nayaimpinam pujustin asar, iin uwemtikramratin nayaimpinmaya wári tati tusar nakaji. Iin uwemtikramratnuka ii Apuri Jesucristoketai. ²¹ Ni taa, iinu namangke jakatin aa nunaka ni namangkea nunisang ati tusa yamarman yapaijturmatnuitji. Tura asamtai nu yamaram namangjai pengké jakashtinuitji. Tura ni tujinkamuringkia atsau asamtai, Cristo waring achat mash aa nunaka ni kakarmarijai inartinuitai.

4

Ii Apuri nintimsaram tuke warastaram

¹ Yatsur ainautirmin umaarutirmincha atumin aneau asan, atumniasha jiiistan wakerajrume. Tura wi etsermaur antuku asaram, Cristo miatrusrumek umirkau arume. Tura asakrumin wisha tuke warajjai. Atumka wina aneetir asaram, tuke Cristo umirkuram kakaram wajastaram tajarme.

² Yamaikia ii umaji Evodianam chichaman akupajai. Tura ii umaji Sintiquenmasha chichamnasha akupajai. Wait aneasrum atumka mai Cristonu asaram, pengker nintimtinisrum pujusmintrum tusan chichaman akuptajrume. ³ Yatsuru, amesha nekasam wina takatur yaintin asakmin wi seatjame: Ii umaji mai pengker nintimtinisar pujusarti tusam yaingta. Wi yaanchuik Cristonam uwemratin chichaman etsermatai, ii umaji mai Clementejai, tura chikich aints ainaujai Yuse takatrin takakmasar, wina nukap yainkarmiyai. Nuna naaringkia papinum tuke iwiaaku pujustinum aatramu ainawai.

⁴ Ii Apuri Cristonu asaram, tuke mash warastaram. Ataksha tajarme: Tuke warastaram. ✧ ⁵ Tu pujakrumningkia chikich ainau atumin waitmakar mash: Nu aints ainauka nekasar pengker nintintin ainawai tiartinuitai. Ii Apuri arakchichu pujau asa iincha tuke waitmajai.

⁶ Atumka yumtinka nintimtsuk asataram. Antsu tuke Yus seakrum waring achat mash Yus ujaktaram. Tura Yus seakrum tuke maaketai titaram. ✧

⁷ Yus ni Uchirin Cristo Jesús anakupturmaku asa, atumi ninti nekas angka nintimratnun aintstikia pengké nekaachmin aa nuna atumniasha suramsatatrume. Tura Cristo Jesús nua asakrumin, Yus atumin angka awajtamsau asa, atumi nintimaurincha tunau engkemtuwai tusa atumin waitmaktatrume.

Pengker aa nuke nintimsataram timiauri

⁸ Yatsur ainautirmin umaarutirmincha, chikichnasha inangnamunam tajarme: Atum chicham nekas aa nunak nintimrataj tusaram, tura juun ainauncha: Nekasnapi pengker awajsatatja, tu nintimsaram pujustaram. Tura tupin nintimsanapi pujustatja tusaram, tura tunaarinchawapi pujustatja tu nintimsaram pujustaram, tura chikich ainauncha aneetatjapi tusaram, tura pengker aa nunaapi nintimratatja tusaram, waring timia pengkerai, tu nintimsaram maaketai tusaram pujustaram.

⁹ Wi atumin nuiniarmiajrume nuka umiktaram. Tura wi etsermaur antukmiarume nusha umiktaram. Tura wi takaamur wainkamarume nusha nunisrumek turataram. Nu turakrumningkia ii Yusri nekas angka nintimratnuncha sukartin aa nuka atumjai pujustinuitai.

Filiposnumia ainau Pablon kuikian akuptukmauri

✧ 3:17 (1.Cor. 4.16;11.1) ✧ 4:4 (1.Tes. 5.16) ✧ 4:6 (Col. 4.2-6;1.Tes. 5.17-18)

¹⁰⁻¹¹ Atumka ataksha wína nintimtursaram kuik akupturkau asakrumin wikia Apurun maaketai tusan warasmajai. Yaanchuikia nekasrum wína yainkatasrum wakerutayatrum yainkachmiarume. Tura wainiatun wi papin aaran: Wína kuikiar atsau asamtai yainkataram tusanka nunaka aatsujrume. Wi waring achat mash yuumayatnak, napchau nintimtsuk pujustinasha nuimiaruitjai. ¹² Kuikiartichu pujaknasha: Kuikiartichu ainau itiur pujuinawa tusancha nekauyajai. Tura kuikiartin pujaknasha kuikiartin ainau itiur pujuinawa tusancha, nunasha nekauyajai. Yutair nukap amatikia, tutuaran pengker nintimnuyajai. Tura yutair atsamtaisha, yaparaknasha nunisnak pengker nintimnuyajai. Yuumatsuk pujaknaka tura yuumaknasha, pachitsuk pengker nintimsan pujustinasha nuimiaruitjai. ¹³ Cristo ni kakarmarin surusu asamtai, Cristo wakera nunasha mash turamnawaitjai. ¹⁴ Turai wi wait wajamtai, atumka wait anentrakrum wína yainkau asaram, nekas pengker aa nuka turamarume.

¹⁵ Filiposnum pujuinautiram, nu nangkamtaik Cristonam uwemratin chichaman atumin ujakmau asaram, tura wisha Macedonia nungkanmaya jiinkin asamtai, chikich yaktanmaya Cristonu ainau kuikian suruscharu wainiatrumek, atumek maaketai turutsaram kuik irumraram akupturkamarume. ¹⁶ Tura wi Tesalónica yaktanam pujamtaisha, atumka kuik irumraram, ni yuumamuri sumarmakat tusaram akupturkamarume. ¹⁷ Kuikianka miatrusnaka wakeratsjai. Antsu atumka kuik akupturkau asakrumin, Yus atumin nukap yainmaktatrumek, tu nintimsan pujajai. ¹⁸ Yatsur Epafrodito itama nuka atum akupturkamarume nunaka mash jukimjai. Tura nukap akupturkau asakrumin, nuna mash metek jukin asan yamaikia yuumatsjai. Wína surayatrumek nuka Yus susamarume. Tura asaram kungkuti jinum epeamua nunisrumek Yus pengker awajsamarume.

¹⁹ Atumka Cristo Jesúsnu asakrumin, wina Yusur mash ainia nuna najanau asa, atumi yuumamurin mash suritramtsuk suramsatnuitrumek. ²⁰ Tura asamtai ii Apaachiri Yus nekas pengker aa nu tuke maaketai tiarmi. Nuke ati.

Inangnamu chicham akupkamuri

²¹ Jesucristonu ainautirmin: Mash pengker pujustaram tusan chichaman akupturminawai. Tura ii yachi iijai iruntrar pujuinausha: Pengker pujustaram tusar chichaman akupturminawai. ²² Cristonu ainau ju yaktanam pujuinauka mash pengker pujustaram tusar, chichaman akupturminawai. Tura juun apu Césari inatiri ainia nusha Cristonu asar atumin chichaman akupturminawai.

²³ Ii Apuri Jesucristo atumnasha pengker awajtamsarti. Maaketai.

Pablo Colosasnum Pujuinaun Papin Akuptukmauri

Chicham akuptukmauri

¹⁻² Wiitjai Pabloitjai. Yus wakerau asa, Jesucristo chichame etserin ata tusa wína akuptukmiayi. Cristo: Nekasrum tunaarinchau winar ataram tusa, atumin eatmaku asamtai, Cristonu ainautirmin Colosasnum pujuinautirmin ii yachí Timoteojai ju papin aaran akuptajrume. Ii Apaachiri Yus atumin wait anentramak tuke pengker awajtamsarti. Tura angkan pengker pujustinasha suramsarti.

Pablo Cristonu ainaun pachis Yusen seatmiauri

³⁻⁴ Atumka Cristo Jesúsnaun asakrumin, tura Cristonu ainau mash aneau asakrumin, iisha atum pachisar chicham antukar, Yus ii Apuri Jesucristo Apaachiri asamtai, atum pachisar seakur tuke maaketai taji. ⁵ Atumka Yusnum uwemratin chicham nekas aa nu antuku asaram, nayaimpinam pujustatjapi tinu asakrumin, iisha atum pachisar tuke maaketai taji. ⁶ Yusnum uwemratin chichaman mash nungkanmaya ainau antukarmia nunisrumek atumsha antuku asaram, tura Yus miatrusrumek umirkau asaram, Yuse anengkratairi pachisrum: Nekas tu awapi tusaram nekaamiarume. Tura asakrumin nu chicham árak nereawa nunisang mash nungkanam yujaawai. ⁷ Ii aneetiri yachí Epafras nu chichamnaka atumin nekamtikramramiarume. Nuka iiya nunisang Cristo inatirintai. Tura Criston miatrusang umirkau asamtai, atumin akuptukmiajrume. ⁸ Tura nuka atumin pachitmas: Yuse Wakani ni nintin pujurmu asar, aneenisar pujuinawai tusa iincha ujatmakmiaji.

⁹ Tura nu chichamka antuku asar, nunia nangkamar tuke inaitsuk atum pachisar Yus seakur pujaji. Tura ni wakeramurin atumin nekamtikramawarat tusar, tura nuna atumin mash nintimtikramrarat tusar, atum pachisar Yus seaji. ¹⁰ Atumka Yusnaun asaram, pengker aa nuka turataram tusar, tura Yuse wakeramuri miatrusrumek nekaataram tusar, ii Apuri tuke umirkau asaram, atum tuke Yus pengker awajsamniuram tusar, atum pachisar Yus seaji. ¹¹ Tura Yus ni kakarmarijai atumin kakamtikramrat tusar, tura itiurkachmin pujayatrum, napchau nintimtsuk jaimiasrum warasrum pujusmintrum tusar Yus seaji. ¹² Tura ii Apaachiri Yus: Wína uchir asaram, wína aintsur ainaujai mash nayaimpinam tuke paaniunam Wijai pujusmintrum turamin asamtai, tuke maaketai titinuitrume. ¹³ Yaanchuikia iikia teenam pujuyaji. Tu pujarin ii Apaachiri Yus iin teenmaya jiirmakin asa: Wína aneetir Uchir pujamunam atumsha pujusmintrum tusa angkanmamtikramamiaji. ¹⁴ Yuse Uchiri jarutramak ii tunaarin sakturmaru asa iin uwemtikramramiaji. ¹⁵

Cristo jarutramak angkan awajtamsamiaji

¹⁵ Yuse Uchiri Cristo nungkancha najantsaing tuke pujuyayi. Tura asa mash najanamu apurintai. Yuska wainchamaitiat, ni Uchiri aints wajasu asa, aints ainau wainkarat tusa wantinmamtikiamiayi. ¹⁶ Cristo mash ainia nuna najanau asa, nayaimpinam aa nuna mash, tura nungkanam aa nunasha mash najanamiayi. Tura ii wainji tura ii waintsuji nunasha mash najanamiayi. Tura Yuse awemamuri ainausha mash, tura nuna apurisha mash, tura junia apu ainausha mash Criston umirkarti tusar najanamu ainawai. ¹⁷ Mash ainia nunaka najantsaing Cristoka tuke pujuyayi. Tura yamaisha tuke pujau asa, tu ati tusa, mash aa nunaka wainnuitai. ¹⁸ Cristo nu nangkamtaik tuke iwiaaku pujuu asa, ni aintsri ainauti apurintai. Tura mash aa nuna inau ati tusa, Yus ni Uchirin chikich aints ainaun nangkamasang nuná eemak jakamunmaya inankimiayi. ¹⁹ Tura asamtai Cristo mash ainia nuna najanau asa, tura mash ainia nuna inartin asamtai Yus: Wijai metek ati tusa wakerimiayi. ²⁰ Yus ni Uchirin: Numi winangmanum maawarti tusa akupkamu

☆ 1:7 (Col. 4.12) ☆ 1:14 (Efes. 1.7) ☆ 1:15 (Juan 1.1-3; Hebr. 1.2; 1.Juan 1.1; Apoc. 19.13) ☆ 1:18 (Efes. 1.22-23; Apoc. 1.5)

asa, ni numpe numparmaujai mash nungkanam pujuinauncha, tura nayaimpinam mash pujuinauncha: Angkan pengker nintimsar pujusarti tusa Yus wakerukmiayi.✠

²¹⁻²² Atumsha yaanchuikia Yus umirchau asaram, tura tunau tuke nintimsaram pujau asaram, Yusnumka jeachmin ayarme. Tura Yuse nemase arumning, Cristo aints wajas: Wina Apaachirjai pujustasrum yamaikia tunaarinchawa nunisrumek ataram tusa waitnas jakau asa, atumi tunaarin sakturmarmiarume. Tura asamtai Yus: Yamaikia wijai pengker nintimsaram pujustaram turamrume. ²³ Tura asamtai nekasrum tuke inaitsuk Cristo nekasampita titinuitrume. Tura Cristonam uwemratin chicham antuku asaram, tuke inaitsuk: Wikia Cristojai nayaimpinam pujustasan wakerajai tinu asaram, nekasrum nayaimpinmaka pujustinuitrume. Nu uwemratin chichamnaka mash nungkanam etserkaruitai. Tura Cristo wina akuptuku asamtai, wisha nu chichaman etsernuitjai.

Pablo Cristonu ainau inatirinjai timiauri

²⁴ Criston miatrusarang umirkau ainau wait wajakartin ainawai. Tura asaramtai wisha nunisnak Cristonu asan, ni timia nunisnak wait wajajai. Cristo wait wajakmia nunisnak atumin yaingtasan wait wajayatun, Cristonu asan wikia waraajai. ²⁵ Yus wina akatur akuptak: Wina aintsur ainamunam mash wina chichamur miatrusmek etserkum, Cristonu ainau inatiri ata tusa akuptuku asamtai, wikia atumi inatiri ajai.✠

²⁶⁻²⁷ Yuska nekas pengker chichaman mash nungkanam pujuinaun nekamtikiatas wakerayat, nu nangkamtaikia aints ainautin nekamtikramachmiaji. Antsu yamaikia Yus nu chichamnaka Cristonu ainautinka nekamtikramji. Nu chichamka nuwaitai: Mash nungkanam Cristonu ainautin ni Wakanin engketramau asamtai, Cristo atumi nintin pujau asamtai, nijai tsaniasrum tuke iwiaaku pujustinuitrume.✠

²⁸ Tura asakrumin iisha Cristo pachisar chicham etserji. Tura Criston miatrusarang umirnak nekasar tunaarinchau Cristonu arti tusar, Cristo nekatirijai tuke nu chichamka nuikiartaji. ²⁹ Tura asamtai Cristo ni kakarmarin wina surusu asamtai, ni kakarmarijai Yuse chichamen tuke etserkun pujuyajai.

2

¹ Yatsur ainautirmin, nunasha nekamtikiatasan wakerajrume. Wikia atumin yaingtasan, tura Laodicea yaktanam pujuinauncha yaingkiartasan, tura wina waitkacharu ainauncha Yuse chichamen ujakartasan nukap wakerajai.✠ ² Tura aints ainau mash Criston pengker umirkarat tusan, tura aneenisar metek nintimtunisar pujusarat tusan wakerajai. Nu chichamnaka yaanchuikia aints ainauka nekaacharmiayi. Tura wainiat Yus: Nu chicham aints ainau nekamtikiata turutin asamtai, paan nekamtikiatasan wakerajai. Nu chichamka Cristo chichamentai. ³ Cristo mash nekau asa, mash aa nunaka iin nintimtikramratnuitji, tura mash nekamtikramatnuitji. ⁴ Aints waitrinak atumin anangkramawarai tusan nunaka tajarme. ⁵ Wikia atumjai pujachiatnak, tuke atumin nintimtakun nukap pachiajrume. Tura atumka tuke inaitsuk Cristo nekasampita tusaram miatrusrumek umirkau asakrumin, wikia nuna nekau asan waraajai.

Cristo pujut yamarman suramji

⁶ Tura asamtai Jesucristo wina Apuruitai tinu asaram, Cristojai tuke tsaniasrum pujustaram. ⁷ Tura Cristonu asaram, Cristo tu awapi tusaram nuimiaru asaram, tuke Cristok nintimsaram pujustaram. Tura Cristo miatrusrumek umirkau asaram, tuke inaitsuk Yus maaketai titaram.

⁸ Yatsur ainautiram aneartaram. Aints ainau waitrinak anangkartutai chichaman etserinak nangkamiar chichainau asar, ii yaanchuik juuntri tinu armia nu antuktaram tusar, junia aints ainau nekatirin nuitaminak pujuinamtaisha, Cristo nu chichamka antuktaram tichau asamtai, anangkruwai tusaram, tura Cristo umirtan inaisai tusaram aneartaram.

✠ 1:20 (Efes. 2.16) ✠ 1:25 (Efes. 3.2) ✠ 1:26-27 (Efes. 3.4-6) ✠ 2:1 (Apoc. 3.14-22)

⁹ Yus wainchau arin, Cristo Yus ayat aints wajas: Yuska tu awai tusa iin nekamtikramamijai. ¹⁰ Tura Cristo Yuse awemamuri ainaun tura mash apu ainauncha tura mash ainia nunasha inau asa, ni aintsri ainautin tuke uwemtikramrau asamtai, atumsha nijai tuke tsaningku asaram, Yuse Wakani piatkamu ainiarme. ¹¹ Tura Cristonu asaram, atumi nuwapchiri aints charukchamu wainiat Cristo: Atumi wakeramuri tuke inaisataram tusa, atumi tunaarinka nakakar ashiniar japinawa nunisang mash atumi nintiniancha jiiki, Cristoka atumniaka pengker awajtamsamiarume. ¹² Tura atumsha Cristo nemarkatasrum entsanam maakrumka, Cristo jakamtai iwiarsarmia nunisrumek entsanam mengkarme. Nuniasha Yus nekas ni kakarmarijai ni Uchirin jakamunmaya inankimia nunisrumek atumsha Criston nekasampita tusaram entsanmayangka ataksha tsapuarme.✠

¹³ Tura yaanchuik atumi tunaarijai jakawa nunisrumek pujarmin wainiat, Cristo atumi tunaarin mash japitramrau asamtai Yus: Cristojai tuke iwiaaku pujustaram tusa, pujut yamarman suramsamiarume.✠ ¹⁴ Tura Cristo ii tunaarin pengké akiimiakchamniau au wainiat mash sakturmarmijai. Tura asa numi winangmanum jirujai ajinkarti tusa tsangkatramkamijai. Tura waitnas jarutramak aintsti tunaarinka ningki akiimiatramkamijai. ¹⁵ Tura Cristo numi winangmanum jarutramak, iwianch ainaun tura ni nemase ainaun mash nepetkau asa, mash ainia nuna paan nekaawarat tusa jakamunmaya nantaki, ni nemase ainaun inatsarmiayi.

Nayaimpinam aa nuke nintimtin ataram

¹⁶ Tura asamtai yamaikia aints kichkisha: Tunau wajasai tusaram, nu yutaka yuwairap, tura nu umutisha umurairap turamiarchatnuitai. Tura tunau wajasai tusaram, nu fiestasha inangkartaram, tura yamarman nantusha fiesta najanatararam, tura nu kinta ayamratararam turamiarchatnuitai.✠ ¹⁷ Cristo taatsaing Yus Moisésan chichaman akatar akupak: Nu chichamka mash umirtuktaram timiayi. Antsu nunia Cristo iin uwemtikramratar tarutmi jarutramkau asamtai, nu chichamka yamaikia pachischatnuitji. ¹⁸ Tura asamtai aints ainu nangkamiar chichainak: Iikia mianchau asar, Yuska tupnik aujtsuk, antsu Yuse awemamuring seatnuitji tinauka anturkairap. Nuka nangkamiar: Wikia karanam Yuse awemamurin wainkau asan, chikich aints ainaun nangkamakuitjai tinayat, Criston umirchau ainu nintimina nunisarang nintiminawai. ¹⁹ Nu aints ainauka Cristojai tsaniasarka pujuinatsui. Antsu Cristo mash aa nuna apuri asa, ni aintsri ainautinka pengker waitmaji. Tura asa metek nintimsaram Yus wakera nunisrumek pujustaram tusa, ni aintsri ainautinka kichkia nunisang jiirmaji. Tura: Miatrusrumek umirtuktaram tusa, ni kakarmarijai ni aintsri ainautinka yainmaji.

²⁰ Atumsha Cristo jakamia nunisrumek yamaikia pujakrumka, junia aints ainu nintimina nuka umirkashtinuitume. Tura asaram uwemrataj tayatrumsha ¿waruka ju nungkanmaya ainu chichame tuke umirkurmesha pujarme?✠ ²¹ Nu aints ainu chichainak: Uwemratararam wakerakrumka, nu yutasha yuwachminuitume, tura nu umutisha umurchamnawaitrume, tura nusha takaschamnawaitrume tinawai. ²² Nu aints ainu nungkanmaya ainu chichame tuke umirkurmesha pujarme?✠ ²³ Aints nu chichaman umirnak pujuinauka ningki nintimsar: Nekasan Yusen umirnitjai tinawai. Tura wina namangkruka mianchawaitai tusar, ni namangkenak nukap waitkinawai. Tuminau asaramtai chikich aints ainu nuna wainkar nangkamiar: Nu aints ainu nungkanmaya ainu chichame tuke umirkurmesha pujarme?✠ ²¹ Nu aints ainu chichainak: Uwemratararam wakerakrumka, nu yutasha yuwachminuitume, tura nu umutisha umurchamnawaitrume, tura nusha takaschamnawaitrume tinawai. ²² Nu aints ainu nungkanmaya ainu chichame tuke umirkurmesha pujarme?✠ ²³ Aints nu chichaman umirnak pujuinauka ningki nintimsar: Nekasan Yusen umirnitjai tinawai. Tura wina namangkruka mianchawaitai tusar, ni namangkenak nukap waitkinawai. Tuminau asaramtai chikich aints ainu nuna wainkar nangkamiar: Nu aints ainu nungkanmaya ainu chichame tuke umirkurmesha pujarme?✠

3

¹ Tura asamtai Cristojai jakamunmaya nantaknua nunisrumek pujau asaram, nayaimpinam iruna nu wakerin ataram. Nuni Cristo Yuse untsurinini pujawai. ² Tura

✠ 2:12 (Rom. 6.4-11; Col. 3.1-3) ✠ 2:13 (Efes. 2.1-5) ✠ 2:16 (Rom. 14.1-6) ✠ 2:20 (Rom. 6.6-11; Gál. 2.19-20)

asantai ju nungkanmaya aints wakerina nuka nintimtsuk nayaimpinam aa nuke nintimtin ataram. ³ Atumka Cristojai tsaniasrum jakawa nunisrumek au asaram, tura Cristojai tsaniasrum iwiaaku pujau asaram, tuke Yusnau ainiarne. ⁴ Tura Cristo tuke pujustinun iin suramsatin aa nu nayaimpinmaya wantinkamtai, atumsha nijai tsaniasrum wantinkatnuitrume. Tura Cristoa nunisrumek atinuitrume. ⁵

Tunau inaisaram Cristo wakera nunisrumek ataram

⁵ Tura asantai ju nungkanmaya ainu turina nuka aints jaka inaiyawa nunisrumek tuke mash inaisataram. Tura nuwa nuwatkashtatium tsanirmatka tuke inaisataram. Tura tunau wakeruktincha mash inaisataram. Tura chikichnau aa nu wakerutisha inaisataram. Chikichnau aa nuna timia wakerin ainauka ni Yusria nunisarang nintimtinawai. ⁶ Tu nintimsar Criston umirtsuk pujuinaunka Yuska nekas wait wajaktiniun susartinuitai. ⁷

⁷ Yaanchuikia atumsha nu tunausha tuke turin ayarme. ⁸ Antsu yamaikia nu tunauka mash inaisataram: Kajektincha, tura chikich ainu pasé chicharkatnusha, tura tsanumnairatnusha, tura tunau chichatcha mash inaisataram. ⁹ Yaanchuik tunau nintimtaurum inaisamiarme. Tura yaanchuik tunau turutirmesha mash inaisau asaram, wait chichamka ujaanitsuk asataram. Atumka tunau nintimtaurumka wejmak mamurun japina nunisrumek inaisawaitrume. ¹⁰ Tura yamaram nintimtai wejmakam yamarman entsainawa nunisrumek jukimiarme. Tura Yuska mash aa nuna najanau asa: Wijai metek nintimin ataram tusa, atumniaka kintajai metek nintimtikramrume. ¹¹ Cristo ni umirin ainautinka timia nintimtikramrau asantai, yamaikia judiochu ainausha, tura judio ainausha, tura ii nuwapchiri charukmau ainausha, tura nuwapchiri charukchamu ainausha, tura chikich nungkanmaya ainausha, tura papi nekachu ainausha, tura aintsu inatiri ainausha, tura aintsu inatirinchu ainausha mash warí aintski tichatnuitji. Antsu Cristo mash najanamasa, tura mash aints ainautin inatmin asa, ni aintsri ainauti nintin engkemturmau asantai, Cristok nintimtustinuitji.

¹² Tura asakrin Yus atumin anenmau asa: Winar ataram tusa, atumniaka eatmakmiarume. Tura asantai yamaikia iwiarmanrawa nunisrumek pujau asaram, chikich ainausha wait anentratarum, tura pengker awajsataram. Tura mianchawaitjai tusaram, yaitasrum aujnaisataram, tura kajernaitsuk pujustaram. ¹³ Tura jaimiasrum tsangkurnain ataram. Tura chikich aints ainausha atumin pasé awajtaminak pujuinau wainiatrumek, Cristo atumin tsangkutramrau asantai, atumsha nunisrumek tsangkurnain ataram. ¹⁴ Tura nu mash umiau asaram, nuna nangkamasrumek nukap aneenitaram. Tura aneenisrum pujakrumka, kichik namangkea nunisrumek asaram, Cristoka miatrusrumek umirume. ¹⁵ Atumka untsuri ayatrumek, kichik namangkea nunisrumek pujau asaram, Yus wina aintsur ataram tusa, atumin untsurmaku asantai, angka pengker nintimtunisrum pujustaram. Tura Yus tuke maaketai titaram.

¹⁶ Cristo chichame atumi nintijai tuke nintimin ataram. Tura nu chicham nekau asaram, Cristo mai nemarnutirmek Cristo chichame nekapruniataram. Tura Cristo mai nemarnutirmek Cristo chichame nintimtiknairatarum. Tura Yuse chichame kantamatarum. Tura Yus kanta kantamarum, Yuse Wakani atumin nintimtikramrau asantai, yamaram kantasha kantamarum, Yuska maaketai titaram. ¹⁷ Tura chichaakrumsha, ii Apuri Jesús nintimkamaikiakrum chichastaram. Tura takakmakrum pujakrumsha nunisrumek Jesús nintimkamaikiakrum takakmastaram. Waring achat mash turarme nusha tuke nunisrumek Jesús nintimkamaikiakrum turatarum. Tura ii Apuri Jesúsna naari pachisrum iinu Apaachiri Yuska tuke maaketai titaram. ¹⁸

Ii wearijai pengker pujusmi timiauri

☆ 3:3 (Rom. 6.4-11; Col. 2.12) ☆ 3:4 (Gál. 2.20; Fil. 1.21) ☆ 3:6 (Efes. 2.3) ☆ 3:10 (Efes. 2.10;4.22-24)
☆ 3:13 (Efes. 4.2,32) ☆ 3:17 (Efes. 5.19-20)

¹⁸ Aishrintin ainautiram atumi aishringkia umirin ataram. Ii Apuri nuna wakerau asamtai turataram. ☆ ¹⁹ Tura nuwentin ainautirmesha atumi nuwari tuke aneen ataram. Tura katsuram nintimtutsuk asataram. ☆

²⁰ Uchi ainautiram, atumi aparisha, tura atumi nukurisha tuke umirin ataram. Ii Apuri Cristo: Nu turataram tusa wakerawai. ☆

²¹ Uchirtin ainautiram, atumi uchiri wake mesekar pujusarai tusaram, nangkamrum chicharkuram kajkairap.

²² Aintsu inatiri ainautiram, tuke atumin inatmin umirin ataram. Atumin inatmin jiirmaj wajamtai, wina pengker awajtusat tuuka nintimtsuk takakmastaram. Antsu pengker nintintin asaram, atumi inatmin waitmachu wainiatrumek, ii Apuri Cristo tuke iincha waitmaji tusaram shamakrum nakimtsuk takakmastaram. ²³⁻²⁴ Ii Apuri Cristo ni timia nunaka miatrusang umiktinuitai tusaram nu nekau asaram, nekasrum nijai tuke pujustinuitume. Tura asaram waring achat mash turarme nu turakrumka, atumi inatmin umiatrumek, ii Apuri Cristo inatiri asaram, ii Apuri pengker awajsataram, pengker nintimsaram nakimtsuk kakaram takakmastaram. ²⁵ Yus aints ainautin mash metek jiirmau asamtai, aints pasé aa nuna takauka ni pasé turamurijai metek wait wajaktintrin jukitnuitai. ☆

4

¹ Tura aints inau ainautirmincha nunasha tajarme: Atumsha Cristo umirin asaram, wina inatnusha nayaimpinam pujawai tusaram, paan nekau asaram, atumi inatiri pengker awajsam ni yuumamurisha susataram. ☆

² Nunia mash Cristonu ainautirmincha nunasha tajarme: Tuke inaitsuk Yus seataram. Tura tuke kajinmatsuk Yus seakrum maaketai titaram. ³ Tura Yus seakrumka, iincha pachikratsaram Yus seataram. Yaanchuikia aints inau Cristo chichamen nekaachminu wainiat, Yus iinka nu chichamnaka nekamtikramamijai. Tura asamtai nu chichamka ataksha aints inau antumtikiatar wakeraji. Antsu Cristo chichame etserin asan, wikia kársernum engkeamu pujajai. ⁴ Tura Cristo wakera nunisnak nu chichamnaka aints ainaun paan nekamtikiatar wakerajai. Tura asamtai nu pachisrum Yus seataram. ☆ ⁵ Atumka Cristo nekamtairi jukin asaram, Cristo umirchau inau Criston pengker nintimrarti tusaram, nangkamrumka kinta japawairap. ☆ ⁶ Atumka chikich inaujai chichaakrumsha tuke antuujamin chichastaram. Tura aints inau atumin ininminamtaisha, warinak titaj tu nintimsaram nekasrum pengker aimkatnuitume. ☆

Inangnamu chicham akupkamuri

⁷ Yatsur ainautiram, yamai ju papin aaran umisan, ii aneetiri yachiin Tíquicon atumin akuptuktatjarme. Nuka wiya nunisang ii Apuri inatirintai. Tura asa iin nukap yainmin ayayi. Nuka wi turamurnasha pachis atumin ujatmaktatume. ⁸ Turamtai iin pachisrum mash nekaataram tusan, tura atumin pengker nintimtikramrarat tusan akuptuktatjarme. ☆ ⁹ Nunia Tíquicojai ii aneetiri yachí Onésimon akuptuktatjarme. Nuka atumniayaintai. Nu jimiar aintska: Ii itiur pujaji nuna pachis mash ujatmaktatume. ☆

¹⁰ Aristarco, wijai kársernum engkeamu puja nuka chichaman akupturmarme. Nuniasha Bernabé kaná yachi, Marcoscha chichaman akupturmarme. Yaanchuik niin pachisan atumniasha chichaman ujakmiajume. Ni atumin jeamtai pengker awajsataram. ☆ ¹¹ Nunia Justo, chikich naari Jesús, atumin chichaman akupturmarme. Ju kampatam aints irunuka Yusen nemarkin asar, wijai tsaniasar Yuse chichamen etserkarmia nuka judío aints ainawai. Chikich judío wijai pujauka atsawai. Antsu juka winaka pengker nintimtikrurarmayi.

☆ 3:18 (Efes. 5.22; 1.Ped. 3.1) ☆ 3:19 (Efes. 5.25; 1.Ped. 3.7) ☆ 3:20 (Efes. 6.1) ☆ 3:25 (Efes. 6.5-9) ☆ 4:1 (Efes. 6.9) ☆ 4:4 (Efes. 6.18-20) ☆ 4:5 (Efes. 5.16) ☆ 4:6 (Fil. 4.6; 1.Tes. 5.17-18) ☆ 4:8 (Efes. 6.21-22) ☆ 4:9 (Filem. 10-12) ☆ 4:10 (Hech. 27.2;12.25;13.13;15.37-39)

¹² Nuniasha atumnia aints Epafrascha chichaman akupturmarme. Nuka Cristo Jesúsá inatirintai. Tura tuke inaitsuk atumin pachitmas: Miatrusarang Yusen umirkarat tusa, tura Yus wakera nuna mash nekaawarat tusa Yusen seatramrume.✠ ¹³ Juka atumin nukap nintimurmarme. Tura Laodicea yaktanam pujuinauncha, tura Hierápolis yaktanam pujuinauncha pachis nukap nintimui. Tura asamtai nuna nekau asan, nunasha atumin nekamtikiatasan wakerajrume. ¹⁴ Ii aneetiri tsuwakratin Lucascha chichaman akupturmarme. Nunia Demascha nunisang chichaman akupturmarme.✠

¹⁵ Nunia Cristonu ainaun Laodicea yaktanam pujuinauncha chichaman akuptinajai. Nunia Ninfan chichaman akuptakun, ni jeen Yuse chichamen antin ainauncha chichaman akuptinajai. ¹⁶ Atumka ju papikia mash aints antinamunam aujsataram. Tura aujsaram umisrum, Cristo umirin Laodicea yaktanam pujuinaun antumtikiatasrum akupkataram. Tura Laodicea yaktanam pujuinaun papin akuptinaja nu jukiram atumsha aujsataram.✠ ¹⁷ Nunia Arquipon ju chichaman akuptakun: “Ami takatrumin ii Apuri suramsau asamtai, nu pengker umikta” tawai titaram.✠

¹⁸ Wiitjai Pabloitjai. Ju chichamnaka wína uwejrujai aatjarme. Ju aarmauka wainkaram, nekas ni aarmaurintai tusaram nekaatnuitrume. Wikia kársernum pujau asamtai, kajinmatrutsuk Yus seatritaram. Yus atumniasha tuke pengker awajtamsarti. Maaketai.

Tesalónicianam Pujuinaun Pablo Papin Eemak Akuptukmauri

Chicham akupkamuri

¹ Wiitjai Pabloitjai. Silvanojai tura Timoteojai Tesalónica yaktanam Cristonu pujuin-
autirmin aatjarme. Ii Apaachiri Yusnau asaram, tura ii Apuri Jesucristonu asakrumin,
Yus wait anentramak atumin yainmakarti, tura angkan pengker nintimsar pujustinasha
suramsarti. ☆

Tesalónicianam Criston umirinawai timiauri

²⁻³ Atumka Ii Apuri Jesucristo nekasampita tusaram, pengker aa nuka takakmakrum
pujarme. Tura Cristo aneau asaram, chikich ainausha tuke inaitsuk yayakrumsha
yaweatsrume. Tura asaram Cristo tati tusaram kajinmatsuk naka pujarme. Tura
asakrumin iikia nu nintimsar maaketai tusar, atum pachisar Yus tuke seakur pujaji.

⁴ Yatsur ainautirmin umaarutirmincha, Yus atumin anenmau asa, nekas wina uchir
ataram tusa, atumniasha eatmakmiarume. Nusha iisha nekaji. ⁵ Iikia Cristonam
uwemratin chicham etserin asar, nangkamrikia nu chichamka etserkachmiaji. Antsu
Yuse Wakani ni kakarmarin iin suramsau asamtai, chicham nekas aa nu etserkurin,
Yuse Wakani nu chichamnaka atumniasha nekantikramamiarume. Iisha atumjai itiur
pujuyaji nusha nekarme.

⁶ Tura asaram atumsha iiya nunisrumek Yuse uchiri wajasrum, iincha nemarkart-
inuyarme, tura ii Apurisha nemarnuyarme. Ii chichame pengker nintimsaram antuku
asaram, atum nukap wait wajayatrume, Yuse Wakani atumi nintin piatramkau asamtai,
nukap warasmiarume. ☆ ⁷ Atum timiá pengker pujau asaram, Cristonu ainau Macedonia
nungkanam pujuinaun, tura Acaya nungkanam pujuinausha: Iisha Cristonu ainautisha tu
pujaji tusaram, tura atumsha iiya nunisrumek tu pujustaram tusaram nuiniarmiarume.

⁸ Tura Macedonianam tura Acayanmasha chicham ii Apuri Cristo pachisrum etsernu-
yarme. Tura asakrumin mash nungkanam atumin pachitmasar: Criston nekasampita
tinawai tinu asar, Cristo chichamencha antukarmiayi. Tura chikich nungkanmaya
ainausha yaanchuik Yuse chichamen nekawaru asaramtai, nu chichamka iikia etsertsuk
pujusminuitji.

⁹ Tura chikich nungkanmaya ainausha atumin pachitmasar etserinak: Iisha nu
aintsnum irastasar wemiaji nuni iincha pengker awajtamsarmiaji. Nunia ni yusri aints
najanamu ainaunka inaisar, Yus nekas iwiaaku aa nuna umirinak pujuinawai tusar
etserinawai. ¹⁰ Nunia atumin pachitmasar etserinak: Yuse Uchiri Jesús nayaimpinmaya
taratata nuna nakainak pujuinawai turaminawai. Yus ni Uchirin jaka tepau wainiat
inankimiayi. Tura tunau ainaun wait wajaktiniun susartas tara iinka uwemtikramrat-
nuitji.

2

Tesalónicianam Pablo Yuse chichame etserkamuri

¹ Yatsur ainautirmin umaarutirmincha, iisha atumin nangkamrikia iraschamiaji.
Atumka nuka nekarme. ² Iikia atumningkia iratsuk Filiposnuma wemiaji. Nuni Yuse
chichame etseru asar, ii nukap wait wajamiaji. Tura nangkamiar iinka awatamrarmiaji.
Atumsha nusha nekarme. Tura atumin jearsha, chikich ainau iincha pasé awajtaminau
wainiatrik, Yus iinka yainmau asamtai, pengké shamkartutsuk atumin Cristonam uwem-
ratin chichaman ujakmiajrume. ☆ ³ Iikia wait chichamka etsertsuk, tura pasé aa nusha
nintimtsuk, tura atumka anangtsuk chicharkamiajrume. ⁴ Antsu Yuska ii nintimaunasha
mash nekau asa: Cristonam uwemratin chicham etserkataram tusa, iin akuptamkau

☆ 1:1 (Hech. 17.1-2) ☆ 1:6 (Hech. 17.5-9) ☆ 2:2 (Hech. 16.19-24;17.1-9)

asamtai, Yus wakera nunisrik iikia etserji. Aints ainau ningki nintimsar, chichaman antukartas wakerina nuka etsertsuji. Antsu Yus pengker awajsatasar, ni chichamengka etserji. ✧

⁵ Aints ainau iin pengker awajtamsarti tusarkia: Atumka pengke aintsuitrume pengké tichamiajrume. Atumka nusha nekarme. Nuniasha atumi kuikiari wakerakriki nangkamriki: Atumniaka nukap aneajrume tichamiajrume. Yuska nunasha nekawai. ⁶⁻⁷ Nunia atumsha tura chikich aints ainausha iin: “Apuru,” turamiarai tusar nakitnuyaji. Cristo akupkamutiatrik, apua nunisrik aints ainausha inatka pengké nakitnuyaji. Antsu iisha atumin jear, atum aneau asar, nuwa ni uchirin aneak minakas muntsurin muntsua nunisrik iisha atumjai pujuyaji. ⁸ Tura atum timiá aneau asar, iisha Cristonam uwemratin chicham atumin pengker nintimsar ujaktasar wakerimiaji. Tura nuna nangkamasrik atum timiá aneau asar, atum yaingtasar jakatasar wakerimiaji. ⁹ Yatsur ainautirmin umaarutirmincha, atumin Yusnum uwemratin chicham etserkur pujakur, ii yuumamuri sumaktasar atumi kuikiari juta nakitau asar, tsawaisha tura kashisha tuke takakmau asar pimpiyaji. ¿Nuka aneakrumek? ✧

¹⁰ Antsu Cristonu ainautirmijai iruntrar pujakur, Yus umirkur nekasar pengker aa nuke turinuyaji. Tura chikich ainau iin pachitmasar pasé chichasarai tusar tunaarinchau pujuyaji. Atumsha nusha wainmakmiarume. Yus mash wainkau asa nunasha nekawai. ¹¹⁻¹² Iisha uchirtin ainau ni uchirin chicharua nunisrik: Yus umirkataram tusar, tura shamtsuk kakaram wajastaram tusar, kichik kichik chicharkamiajrume. Atumsha nusha nekarme. Yus atumin: Wína pujutirun nayaimpinam paaniunam wijai pujusmintrum tusa untsurmakmiarume. Tura Yuse uchiri asaram, tuke Yus umirkuram pujustaram tajarme.

¹³ Yuse chichame ii etsermiaji nuka antuku asaram atum: Aintsu chichamentai tutsuk, antsu Yuse chichamentai timiarne nuka nekasantai. Nu chichamka atum antuku asaram, Cristo nekasampita tusaram, Yus atumin nintimtikramramiarume. Tura asamtai tuke inaitsuk Yuska maaketai taji. ¹⁴ Yatsur ainautiram umaarutirmesha, atumkeka waitka wajatsrume. Antsu Cristo Jesúsnaun ainaun Judea nungkanam pujuinaunka ni weari ainau wait wajaktiniun susarmiyai. Tura asar atumniasha nunisarang atumi yaktari pujuinaun waitkarminawai. Tura wainiatrumek atumsha Judea nungkanmaya Cristonu ainia nunisrumek pengker nintimsaram pujarme. ¹⁵ Nu judío ainau ni wearintiat Yuse chichamen etserin ainaun yaanchuik maawarmiyai. Nunia ii Apuri Jesúsnaun maawarmiyai. Nunia iincha ni yaktarinianangka jiirmakiarmiaji. Nuka Yusen pengkerka awajtsuk pujuinawai, tura asar aints ainaun mash kajerin ainawai. ✧ ¹⁶ Iikia judíocho ainamunmasha Cristo chichame etserkatasar wakerarin waininayat, judío ainau iinka surimramkarmiaji. Tura ninu nintin tuke tunau piatkamu asaramtai, Yus: Nuke ati tusa, nu judío ainaunka kajerak, ni wait wajaktinrincha nukap susartinuitai.

Pablo ataksha Tesalónicianam wetas wakerukmauri

¹⁷ Yatsur ainautirmijai, tura umaarutirmijaisha jumchik kinta wainaitsuk kanakar pujakrisha, tuke kajinmatsuk atum nintimsar pujumiaji. Tura asar atumin irastasar nukap wakerimiaji. ¹⁸ Wikisha atumin jiistasan wakerayatun tujinkan, ataksha atumin jiistasan wakerimiajai. Tura iikia ataksha atumin jiistasar wakerayatrik, ii winitasar wakerarin wainiat, iinka Satanás tuke surimramkarmiaji. ¹⁹ Ii Apuri Jesucristo taamtai, ¿yaachia ni wajamurin naka wajastatua? Nuka atumetrume. Iikia ii Apuri chichame atumin etserkau asakrin, atumsha ii Apuri umirkau asaram, ni wainkatnuitrume tusar, nu kinta iikia nakakur pujaji. Nu kinta jeamtai, atum pachisar maaketai tusar warastinuitji. ²⁰ Atum Cristo miatrusrumek umiru asakrumin, iisha atum pengker nintimsar maaketai tusar waraaji.

✧ 2:4 (Gál. 1.10) ✧ 2:9 (Hech. 18.3; 2.Tes. 3.8) ✧ 2:15 (Hech. 9.23,29;13.45,50;14.2,5,19;17.5,13;18.12)

3

¹ Tura asakrin wikia atumin nintimsan: ¿Pengkerash pujuina? tusan, atumin winitatkaman tujinkan, tura chichaman nekaatatkaman yumatkau asan, wiki Atenas yaktanam juwakmiajai.✠

² Tura ii yachí Timoteon atumin akuptukmiajrume. Nusha iijai iruntrar Cristonam uwemratin chichaman etsernuitai. Tura asamtai atum tuke inaitsuk Cristo nekasampita titaram tusan, tura Cristo umirkuram kakaram wajastaram tusan, Timoteon atumin akuptukmiajrume. ³ Atumka Cristonu asaram: Waitnasan pujaknasha, Cristo umirtanka inaisashtajai tiarat tusan, atumin Timoteonka akuptukmiajrume. Iisha Cristonu asar, tuke wait wajaktinuitji tusaram nekarme.

⁴ Yaanchuik atumjai iruntrar pujasar, iikia atum chicharkur: Iikia nekasar Cristo umirkurkia, wait wajaktinuitji timiajrume. Ii timiaji nunisrumek yamaikia Cristonu asaram, atumsha wait wajarme nuka nekarme. ⁵ Tura asakrumin atumin nintimsan: ¿Pengkerash pujuina? tusan, nekaatatkaman yumatkan: ¿Tuke Criston umirinatsuash? tusan, tura: ¿Cristo umirtaka inaisataram tusa iwianch atumin anangkramachmasha? tura Cristo umirmau inaisau asakrumin, ¿iisha waitnasar Yuse takatri nangkamriash takakmasiaij? tu nintimsan Timoteon atumin akuptukmiajrume.

⁶ Yamaikia Timoteoka atumniangka tamayi. Tura taa, atum tuke Cristo nekasampita tusaram aneenisrum pengker pujamurminka ujatmaji. Tura atumsha iin pengker nintimkartusrum pujarme tusa, tura iincha waitmakartas wakerutminaji tusa ujatmaji. Tura asamtai iisha nunisrik atumsha jiistasar wakeraji. ⁷ Tura iisha nukap wait wajayatrik, tura itiurkachmin nukap pujayatrik, atum tuke Cristo nekasampita tinu asakrumin, nu chichamka antuku asar pengker nintimsar pujaji. ⁸ Atumka ii Apuri tuke umirkuram kakaram wajasu asakrumin, iisha nekasar pengker nintimsar pujaji. ⁹ Tura iin nukap waramtikiartusu asakrumin, iisha warasar atum pachisar Yus maaketai tayatrik, nuna nangkamasrik tuke maaketai titasar wakeraji. ¹⁰ Tsawaisha tura kashisha tuke Yus seakur, ataksha atum jiistasar wakeraji. Yus nuna tsangkatramkat tusar seaji. Tura atumin jear: Yus miatrusrumek umirkataram tusar atum nuiniartasar wakeraji.

¹¹ Ii Apaachiri Yus, tura ii Apuri Jesús atumin iin akuptamkat tusar, tura ii wetinun eemak iwiarat tusar Yuska seaji. ¹² Tura Yus seakur: Nekasrum atumka nukap aneenitaram tusar, tura ii Apuri atumin nukap nintimtikrarat tusar, tura iisha chikich ainausha mash aneaji nunisrumek atumsha chikich ainausha aneetaram tusar Yuska seaji. ¹³ Tura ii Apaachiri Yus miatrusrumek umiru asakrumin, ii Apuri Jesús ni aintsri ainaujai taamtai, atumsha pengké tunaarinchau naka wajatsamniuram tusar Yuska seaji.

4

Yuska pengker aa nu turataram tusa wakerutmaji

¹ Yatsur ainautirmin umaarutirmincha, kichnasha tajarme. Iisha: Yuska tu pengker awajsatnuitrume tusar, atumin ujakmiajrume nusha umirkuram pujarme. Tura yamaisha ii Apuri Jesús: Tu chicharkataram tusa, iin akuptamkau asamtai, ii timiaji nuna nangkamasrumek Yus umirkuram pujustaram tusar atum chicharkur pujaji.

² Ii Apuri Jesús: Nu chicham umiktaram tusa, iin akupturmaku asamtai, iisha atumin etserkamiaji nuka nekarme. ³ Yuse wakeramuri nuwaitai: Nekasrum pengké tunaarinchau pujustaram. Tura asaram nuwa nuwatsukka tsanirmawairap. Tura aints ninumtsukka turunawairap. ⁴ Kichik kichik aints ni nuwarinak nuwatak, nujaingkia tunaarinchau pujusartinuitai. ⁵ Yusen umirchau ainauka pachitsuk nuwan takasartas wakerinawai. Antsu atumka nu aintsua nunisrumka pujusairap.

⁶ Yaanchuiksha atum akatkur timiajrume nunaka ataksha nunisnak wisha tajarme. Chikich aints ainausha anangkawairap. Tura chikich aintsu nuwaringkia tsanirmatsuk asataram tajarme. Antsu nuna turinaunka ii Apuri wait wajaktiniun nukap susatnuitai.

⁷ Yuska: Tunau turataram pengké turamtsuji. Antsu nekasrum tunaarinchau wína

✠ 3:1 (Hech. 17.15)

umirtuktaram turamji. ⁸Tura aints ju chichaman nakitina nuka aints naka nakitinatsui, antsu Yusen nakitinawai. Yus: Nekasrum tunaarinchau pujustaram tusa, ni Wakanin nekas pengker aa nuna iin suramsawaitji.

⁹Tura Cristonu ainaujai pengker nintimtunisrum pujustaram tusa, Yus iinka paan nuitamrau asamtai ¿warukanak atumin aneenitaram tusancha nunasha aartaj? ¹⁰Atumka nekasrum Cristonu ainau Macedonianam pujuinausha mash anearme. Tura Cristonu asaram, nuna nangkamasrumek Cristonu ainau aneetaram. ¹¹Tura ¿itiurak pengker nintimsancha pujusaintaj? tu nintimsaram pujustaram. Tura chikich ainauka waitkatsuk pujustaram. Tura atumi yuumamuri sumaktasrum atumi uwejejai takakmas-taram. Yaanchuik atumin chicharkamiajrume nunisrumek turataram. ¹²Tu pujakrumka pengké yuumakchatnuitrume. Nunia Yusen umirchau ainausha atumin pachitmasar: Nuka pengke aintsuitai turamiartinuitai.

Ii Apuri tatintri pachis etserkamuri

¹³Yatsur ainautiram umaarutirmesha, ¿Cristonu jakaru ainau warukatnuki? tusaram nekaataram. Cristo umirchau ainauka ni weari jakamtai: Pengké nantakchatnuitai tusar nukap juutin ainawai. Atumka Cristo umirchawa nunisrumka wake mesekrum puju-sairam tusan yamaikia ujaajrume. ¹⁴Jesús nekas jakamiayi, tura ataksha nantakmiayi, tu nintimtakrinkia, Cristonu jakaru ainaunka Jesús inankimia nunisang Yus ataksha inankiartinuitai.

¹⁵Ii Apuri Cristo iin ujatmaku asamtai, iisha yamaikia atum ujaajrume: Ii Apuri taamtai, iwiaaku pujuinautikia iiyá eemkarkia nayaimpinmaka wakashtinuitji. Antsu Cristonu jakaru ainau nuwá eemkar nayaimpinam wakartinuitai. ¹⁶Ii Apuringkia nayaimpinmaya jiinkitnuitai. Turamtai Yuse awemamuri juuntri kakar untsamaun antukar, tura Yuse pupuntrin kakar pupuntramun antukar, Cristonu jakaru ainau nuwá eemkiar nantakiartinuitai. ¹⁷Nunia iisha tuke iwiaaku pujuinautisha Cristonu jakaru ainaujai iruntrar ii Apuri Cristojai nasenam yakí mukuntiumam ingkiunikmi tusar wetinuitji. Nuniangka tuke ii Apurijai tsaniasar pujustinuitji.✠

¹⁸Tura asaram atumka Cristonu ainaujai iruntraram nu chichamka ujanikrum: Wake mesekrum pujusairap tusaram nintimtiknairataram.

5

¹⁻²Yatsur ainautiram umaarutirmesha, ii Apuri kasa aintsua nunisang aneachmau tatinuitai. Atumka nuka paan nekarme. Tura asakrumin ¿Cristo tatintri warutik ati? tura ¿warí nantutik ati? tusan nunaka nekachu asan aatrashtatjarme.✠

³Aints ainau chichainak: Maj, iisha angka pengker pujaji. Maaniamuka atsawai tinaw wainiat, Yuska aneachmau nungkanaka yumpungtinuitai. Nuwa jamtin: ¿Uchin warutik jurertaj? tayat aneachmau uchin jurertas jematnuitai. Nungka yumpunkatin kintasha nunisang aneachmau atinuitai. Nu kinta jeamtaikia, tunaarintin ainauka uwemrartatkamawar tujinkartinuitai. ⁴Antsu yatsur ainautiram, umaarutirmesha, atumka teenmaka pujatsrume. Tura atumsha anearum pujau asakrumin, Cristo kasa aintsua nunisang aneachmau winaksha, atumniaka awaktamkashtinuitrume. ⁵Atumka Yuse uchiri asaram paaniunam pujarme. Tura paaniunam pujau asaram teenmaka pujatsrume. ⁶⁻⁷Aintstikia kashikia kanutayi. Antsu nampektasar wakerinauka kashi nampenawai. Antsu iikia nu aintsua nunisrikia pujatsji. Tura kanurua nunisrikia, tura iwianch umirnua nunisrik pujusai tusar, aints kanutsuk iwiaawa nunisrik anearu armi. ⁸Yus paaniunam puja nu iinka inatmau asamtai, iisha nunisrik paaniunam pujakrikia, nampetsuk paan nintimin atinuitji. Suntar ainau: Netseprun nangkijai ijutiarai tusar, wejmak jiru najanamun entsarar, tura muukrun charutkarai tusar, tsengkruti jiru najanamun tsengkrugar maaniamunam weenawai. Tura asamtai Satanás iincha pasé awajtamsatas wakerutmamtaikia, iisha Cristo nekasampita tinu asar, tura

✠ 4:17 (Mat. 24.30-31; Marc. 13.26-27; 1.Cor. 15.51-52) ✠ 5:1-2 (Mat. 24.43-44; Luc. 12.39-40; 2.Ped. 3.10)

Yus anen asar, suntar jirun entsarua nunisrik, tura jirun tsengkrakinawa nunisrik: Nekasan uwemratatjapi tu nintimsar pujusarmi. ⁹ Yuska: Atumka ji kajintrashtinum engkematarum tusangka iinka kajertamkashtinuitji, antsu ii Apuri Jesucristo iincha uwentikramratnuitji. ¹⁰ Cristo: Wijai metek iwiaaku amintrum tusa jarutramkamiaji. Tura asamtai iwiaaku pujakrikia, tura nunia jakarsha, Cristonu ainautikia tuke nijai pujustinuitji. ¹¹ Tura asamtai tuke turarme nunisrumek pengker nintimtunisrum mai kiakani wajatarum tajarme.

Pablo Cristonu ainaun chicharkamuri

¹² Yatsur ainautirmin umaarutirmincha nunasha tajarme: Wait aneasrum anturtuk-taram: Aints ainaun ii Apuri Cristo akupamu asar, tuke atumin yainmakartas wait-nasar takakminamtaisha, tura atumin chichartaminamtaisha, tura nuitaminamtaisha, pengker awajsataram tusan tajarme. ¹³ Yus ni takatrin nu aints ainaun susau asamtai, nu aints aneetaram, tura nekasrum pengker anturkaram umirkataram. Tura asaram tuke kajernaitsuk angka pujustaram tusan tajarme.

¹⁴ Yatsur ainautirmin, nunasha tajarme: Cristo nemarkin takatan takakmichu ainu takakmatarum tusaram chicharkataram. Tura napchau nintimsar pujuinausha pengker nintimtusrum chicharkaram kiakartaram. Tura kakaichu ainausha yaingtaram. Tura aints ainu mash jaimiasrum chicharkataram.

¹⁵ Aneartaram. Aints atumin pasé awajtaminamtaisha, kichkisha kajertsuk asatarum. Antsu: Wisha pengker awajsatjai, tu nintimsaram pujustaram. Tura Cristonu ainaun tura Cristo umirchau ainauncha mash pachitsuk pengker awajsatjai, tu nintimsaram pujustaram.

¹⁶ Tuke inaitsuk warastaram. [☆]

¹⁷ Yus seat kakantrataram.

¹⁸ Atumka Cristo Jesúsnu asaram, pengker pujakrumka, tura iturchat pujakrumsha, Yus tuke maaketai titaram. Yus nuna wakerau asamtai turatarum. [☆]

¹⁹ Yuse Wakani atumin nintimtikrama nuka umirtsukka pujusairap.

²⁰ Yuse chichamen etserin Yuse chichamen ujatminamtaisha, nangkami tawai tiirap.

²¹ Antsu mash antarme nuka nintimsaram: ¿Nu chichamnaka nekas Yus akupkachiash? tusaram nekaatarum. Tura nekas pengker aa nuka tuke metatarum. ²² Tura pasé turina nuniangka kanaktaram tajarme.

²³ Ii Apaachiri Yus angka pujustinasha suramji nu atumin yainmakti. Tura mash tunaarinchau winar ataram tusa, atumi nintincha, tura atumi namangkencha Yuska waitmakti. Ii Apuri Jesucristo taatsaing, kichkisha atumin pachitmasar: Nuka tunaawaitai turamiarchati tusa, Yuska atumin waitmakarti tusan tajarme. ²⁴ Yuska: Winar ataram tusa, atumin untsurmaku asa, ni tímia nunisang mash umiktinuitai.

Inangnamu chicham akupkamuri

²⁵ Yatsur ainautiram umaarutirmesha, Yus seatritaram.

²⁶ Cristonu ainautiram aneenisrum: ¿Pengkerak pujaram? tunaitaram.

²⁷ Ii Apuri Jesucristo wina akuptuku asamtai, ju papin atumin akupaja juka Cristonu ainu mash antukarti tusaram aujsatarum.

²⁸ Ii Apuri Jesucristo atumniasha pengker awajtamsarti tajarme. Maaketai.

Tesalónicanam Pujuinaun Pablo Ataksha Papin Akuptukmauri

Chicham akupkamuri

¹⁻² Wiitjai Pabloitjai. Silvanojai tura Timoteojai Tesalónicanam Cristonu ainautirmin aatjarme. Ii Apaachiri Yusnau asaram, tura ii Apuri Jesucristonu asakrumin, ii Apaachiri Yuska, tura ii Apuri Jesucristo wait anentramak angka pengker pujustinasha suramsarti.✠

Cristo taamtai Yus tunaarintin ainaunka wait wajaktiniun susartinuitai

³ Yatsur ainautiram umaarutirmesha, atumka miatrusrumek Cristo umirkau asaram, tura miatrusrumek aneeniau asakrumin, tuke atum pachisar nekasar Yuska maaketai timinuitji. ⁴ Atumka wait wajayatrumek pengker nintimsaram jaimiasrum pujarme. Tura itiurkachmin pujayatrum, tuke inaitsuk Cristo pengker umirkuram pujarme. Tura asakrumin iisha chikich nungkanmaya Cristonu ainausha atum pachisar etserkur: Criston miatrusarang umirinawai taji. ⁵ Atumka Yus miatrusrumek umiru asaram nekasrum wait wajarme. Tura asakrumin Yus atumin inatmin asa: Wina aintsur asaram, wijai tsaniasrum pujusmintrum turamrume. Yuska atumin pachitmas tu nintimias pujawai tusar iisha nekaji.

⁶ Yuska nekas tunaarinchau asa, aints ainau atumin waitkarmina nunaka wait wajaktiniun susa ningki yapaijkiatnuitai.

⁷⁻⁸ Atumka wait wajau asakrumin, ii Apuri Jesús atumniaka ayamtikramsatnuitrume, tura iincha atumjai metek ayamtikramsatnuitji. Nu kinta jeamtaikia, Jesús nayaimpinmaya wantinak, ni awemamuri nekas kakaram ainaujai ji keawa nunisang wantinkatnuitai. Tura asa Yus niin nintimtichu ainaunka, tura ii Apuri Jesúsnum uwemratin chichaman umirchau ainaunka wait wajaktiniun susa yapaijkiatnuitai. ⁹ Turamtai Yusen umirchau asar, ii Apuri paaniunam puja nunaka waintsuk, tura ni pujamurinja waintsuk tuke nangkantsuk wait wajaktiniun jukiartin ainawai. ¹⁰ Cristo taamtai, nu kintatikia ninu ainautikia mash Cristoa nunisrik wajasar, ii Apuri wainkar: Ameketme juuntam titinuitji. Atumsha ii etsermau nekasampita tinu asaram, Cristoka wainkaram pengker awajsatnuitrume.

¹¹ Tura asakrumin Yus atum uwemraram nekasrum pengker ataram tusa, atumin untsurmaku asamtai, iisha tuke ii Yusri seakur pujaji. Tura atumka Yus nekasampita tinu asakrumin, tuke pengker aa nuka Yuse kakarmarijai turataram tusar, atum pachisar tuke seakur pujaji. ¹² Ii Yusri tura ii Apuri Jesucristo atumin pengker awajtamsau asamtai, chikich ainau atumin pachitmasar: Nekasar Criston pengker umirinawai turamiarat tusar, iisha tuke Yus seakur pujaji. Tura ii Apuri Jesúsna naarin pachisrum: Ameketme pengkeram, tu nintimsaram pujusmintrum tusar, iisha Yus tuke seakur pujaji.

2

Juun Tunau wantinkatnuri

¹ Yatsur ainautiram umaarutirmesha, ii Apuri Jesucristo iijai ingkiuniktas tatintri pachisar atum aatratasar wakeraji.✠ ² Aints atumin chichartaminak: Yuse Wakani wina ujatkau asamtai, Cristo tatintringkia yanchuk nangkamari, anangkraminak tinamtaisha, nu chichamka anturkairap. Tura chikich aints nu chichaman ujatminamtaisha, tura iisha atumin papi aarar akupakur: Cristo tatintringkia yanchuk nangkamari, tu aarmau wainkarmesha, ¿nekasash tina? tu nintimkuram pachim nintimrairap. Tura shamtsuk asataram tajarme. ³ Aints kichkisha wina anangkruwarai tusaram aneartaram. Cristo tatinka jeatsaing, Yusnumia kanaamu atinuitai. Nunia nuna nangkamasang aints

✠ 1:1-2 (1.Tes. 1.1) ✠ 2:1 (1.Tes. 4.15-17)

nekas juun tunau tuke mengkakatnununam wetinua nu wantinkatnuitai. ⁴ Nuka Yusen nemasentai. Tura aya wínak nintimtursarat tusa, aints waring achat ii yusrintai tusar seainawa nunasha nakitau asa, aints mash antinamunam: Wikia Yusetjai tusa, Yus seatai juun jeansatnuitai. Tura asa aints mash: Juwaitai Yus turutiarat tusa turunatnuitai.✠

⁵ Yaanchuik atumin irakun nunasha ujakmiajrume. ¿Nuka kajinmakniurmek? ⁶ Tura ni wantinkatnuri kinta jeachu asamtai, nu Juun Tunau wantinkai tusa, yaachia surimiawa nuka atumsha nekarme. ⁷ Yamaisha chikich aints ainau nekaachmin ainayat, aints untsuri Yusen umirtan nakitinawai. Tura Tunau Surimin aa nuka yamaisha Juun Tunau wantinkashti tusa surimiawai. Antsu Tunau Surimin jiinkiamtaikia, nu Juun Tunau wantinkatnuitai. ⁸ Nu Juun Tunau taamtaikia, ii Apuri Jesús paaniunmaya taangka, aya chichasang ni mayatmaurijai nepetak mengkaaktinuitai. ⁹ Nu Juun Tunau wantinkatnua nuka Satanása kakarmarijai wantinkatin asa, aints ainaun anangkatas, wainchatai takatan tura aints turachminun turatnuitai.✠

¹⁰ Tura asamtai aints mengkakarta in ainia nu nekas chichamnaka nakitinau asar uwem-tancha nakitinawai. Tura Juun Tunauka nu aints ainaun: Tunau tuke turataram tusa anangkatnuitai.✠ ¹¹ Tura asamtai nu aints ainau anangmamu chichaman antukartas wakerinau asaramtai, wait chichaman antukar umirkarat tusa Yuska tsangkamkatnuitai. ¹² Tura asamtai nekas chichaman nakitin ainauka: Tunau aa nuka nekas pengkeraitai tusar, tuke ni tunaarijai warainau asaramtai, Yuska nu aints ainaun ji kajintrashtinum akupkatnuitai.

Yus atumin uwemrataram tusa eatmakmiarume

¹³ Yatsur ainautiram umaarutirmesha, ii Apuri atumin anenmau asamtai, iisha atum pachisar Yus tuke maaketai titinuitji. Atumka nekas chicham umirkau asakrumin, Yuse Wakaningkia atumi nintin pengker awajtamsamiarume. Tura asakrumin nu nangkam-taik Yus atumniaka uwemramnawaitrume turammiarume. ¹⁴ Yus iinka: Cristonam uwemratin chicham etserkataram tusa akuptamkau asamtai: Atumka nu chicham antukrum, wína aintsur wajasmintrum tusa wakerau asa, ii Apuri Jesucristo: Wiya nunisrumek paaniunam pujusmintrum tusa atumniaka untsurmakmiarume.

¹⁵ Tura asamtai yatsur ainautiram umaarutirmesha kakaram wajastaram. Tura wikia yaanchuik atumin irakun ujakmiajrume nu tura papin aaran akuptukmiajrume nusha kajinmakirap. ¹⁶ Ii Apuri Jesucristo tura ii Apaachiri Yus nekas pengker asa iincha anenmaji, tura iincha pengker awajtamasa, iincha pengker nintimtikramji. Tura asa tuke pengker pujustinaka suramji. ¹⁷ Tura asamtai nekas pengker aa nu chichasmintrum, tura nekas pengker aa nu takakmasmintrum tusa, atumniaka nintimtikramrarti tajarme.

3

Iin pachikratsaram Yus seataram

¹ Yatsur ainautiram umaarutirmesha, kichnasha inangnamunam tajarme. Ii Apuri chichame nukap etserkau asakrin, chikich chikich nungkanam wári jearti tusaram Yuska seataram. Tura atumka Yuse chichame pengker antuku asakrumin, tura Yuska nekas juuntapita tinu asakrumin, chikich nungkanmaya ainausha Yuse chichamen antukar, atumjai metek Yus juuntapita tiarti tusaram Yuska seataram. ² Aints mashkia Yusnaka umirinatsui. Tura asaramtai nu aints ainamunam pujakrin, iin pasé awajtamsarai tusaram Yuska seatritaram. ³ Tura ii Apuri: Wi nuna turatnuitjai, tímia nunisang umiktinuitai. Tura atumin kakamtikramratnuitrume, tura tunau takasairam tusa atumniaka waitmaktinuitrume. ⁴ Atumsha Yusnau asaram, ii timiaji nu nekasrum umirkuram pujarme, tura tuke umirkatatrume tu nintimsar pujaji. ⁵ Tura Yuska iincha timiá anenmaji tusa, ii Apuri atumin nintimtikramrarti. Tura Cristoa nunisrumek wait wajarmining, itiur jaimiasrum pujustinuitrume tusa, ii Apuri Cristo atumniaka nekamtikramawarti tusan Yusen seatjarme.

✠ 2:4 (Isa. 14.13-14) ✠ 2:9 (Mat. 24.24-25) ✠ 2:10 (Apoc. 13.14)

Cristonu ainau takatrin pachis chicharkamuri

⁶ Yatsur ainautiram ii Apuri Jesucristo naari pachisar tajirme: Aints Cristonuitjai tayat, pengke takat aa nunaka takatsuk, tura ii chicham nuiniarmiaji nuna umitsuk pujuinamtaikia, nu aintsnumia kanaktaram. ⁷⁻⁸ Iikia itiur atumjai pujuyaji nusha nekarme. Iikia atumjai pujakur takakmatskeka pujuchmiaji. Tura atumi yutairingkia akiimiatskeka yuwachmiaji, antsu itiurkachmin ahati tusar, ii yuumamurin sumarmaktasar tsawaisha tura kashisha waitnasar takakminuyaji. Tura asakrin atumsha iia nunisrumek turatnuitrume. ⁹ Ii Apuri iin akuptamkau asamtai, ii wakerakrikia, yuumamur nangkamrum surustaram tusar, seammin ayatrik seamchayaji. Antsu iia nunisrumek takakmasmintrum tusar iisha takakminuyaji. ¹⁰ Iisha atumjai pujakur, nu chichamka ujakmiajrume: Aints takatan nakitauka yutanacha yutsuk pujustinuitai. ¹¹ Antsu atumjai iruntrar naki ainau takakmatsuk pujusar, nangkami chichaj pujuinawai tinamun antukmajai. ¹² Nu takakmichu ainau chicham akuptaji. Ii Apuri Jesucristo chichamejai tajirme: Naki ainau ni yuumamurin ningki sumarmakartas nakimtsuk, tura nangkamniaka chichatsuk takakmasarti.

¹³ Yatsur ainautiram, pengker aa nuke yawetsuk turataram. ¹⁴ Ju papi ii aarji nuna umirtan nakitinau wainkurmeka: Umichuitai tusaram, ni kanák pujus natsaarat tusaram ukuktaram. ¹⁵ Tura nu aints wainkurmeha, atumi nemasea nunisrumka nintimtusairap, antsu atumi yachiiya nunisrumek tupnik chicharkataram.

Yus yainmakarti timiauri

¹⁶ Ii Apuri ningki angkan pengker pujustinun suramji nu atum tuni pujarme nunisha tuke inaitsuk angkan pengker pujustinnasha suramsarti. Tura atumin mash yainmakarti.

¹⁷ Wiitjai Pabloitjai. Ju chichamnaka wina uwejrui yamaikia aatrajrume. Tuke aintsanak aajai. Tura asamtai ju aarmau wainkaram, nekas ni aarmaurintai tusaram nekaataram. ¹⁸ Ii Apuri Jesucristo atumniasha mash pengker awajtamsarti. Maaketai.

Pablo Timoteon Papin Eemak Akuptukmauri

Chicham aatramuri

¹ Wiitjai Pabloitjai. Jesucristo akupkamuitjai. Yus iin Uwemtikramratin ii Apuri Jesu-cristosha nákakur pujaji nu: Wína chichamur etserkata tusa akuptukmiayi. ² Timoteowa, ju papin aatjame. Ameka wi etsermauka nekasampita tinu asakmin, wikia aminka yajutmarchayatnak: Wína nekas uchirua tumawaitme tajame. Ii Apaachiri Yus tura ii Apuri Cristo Jesús amincha yainmakarti, tura amincha wait anentramrarti, tura angka pengker pujustinasha suramsarti tusan amin aatkun pujajai. ✠

Wait chichamka antukaip timiauri

³ Wi Macedonia nungkanam wekaakun: Ameka Efeso yaktanam juwakta timiajme. Tura nuni pujau asam, chikich aints irunuka chicham ii nuiniarchamu waininayat nuininak pujuinamtaikia, nuka nuiniarairap tusam surimkata tajame. ⁴ Tura ii juuntri naari pachisar tuke aujmatinak pujuinauka nu nuikiartamujaingkia aintsun kichkisha pengkerka awajinatsui, antsu jiyanita wakerumtikinawai. Turinau asar ii yaanchuik juuntri aujmatin armia nuna aujmatinak pujuinauka nuka antukairap tusam surimkata. Nuna turinakka Yus pengker umirkatnunka yainmatsji.

⁵ Yuse aintsri ainautikia tuke nintijai Criston nekasampita tusar, tura tunauka nintimsuk, aya pengker aa nuke wakerakur nekasar anengkratin wajastasar wakeraji. Tura asar: Aneenitaram tusar nu chichamka etserji. ⁶ Chikich ainau nekas chichaman jukiariat nunaka inaisar, chicham nekaschaun jukiar, tuke nangkamiar chichaj pujuinawai. ⁷ Nu aints ainau Moisés umirkatin chichaman nuiniartas wakerinamaitiat, chikich ainau: ¿Ame tame nuka warina takua tawa? tusar ininminamtai, nu aints ainau nangkamiar chichainau asar, tura nekachu asar paan: Nuna taku tawai tusar, etserkartatkamawar yuumatinawai.

⁸ Moisésa aarmaurisha pengkeraitai tusar nekaji. Yus yaanchuik nu chichaman akupkau asamtai, ni wakeramurisha tura tunau surimiaktincha nekaatnuitji. ⁹ Tura umiktin chichaman aints umirkarat tusar akupina nusha waruka akupinawa tusar nekaji. Apu ainauka pengke aints ainau umikiarat tusarka ni akupamurinka akupinatsui. Antsu tunau turin ainau nuna umikiarat tusar akupinawai. Tunau ainauncha tura chichaman umichu ainauncha tura Yusen nakitin ainauncha tura ju nungkanam pasé aa nuna turin ainauncha chichaman mash umirkarat tusar akupinawai. Tura aparincha, tura nukurinch main ainauncha, tura mangkartin ainauncha mash, ¹⁰ tura tsanirmin ainauncha, tura mai aishmangtak tsanirmin ainauncha, tura aintsun mesatkan ju ainauncha, tura wait chichaman etserin ainauncha, tura waitrinak: Yusjai tajai tinu ainauncha, tura pengker nuikiartamun nakitin ainauncha apu ainau chichaman umirkarat tusar akupinawai. ¹¹ Yus nekas pengker aa nuka: Nu pengker nuikiartamun nuiniakmekka Cristonam uwemratin chicham etserkata tusa akuptukmiayi.

Pablo Yus wait anentramu asa maaketai timiauri

¹² Ii Apuri Jesucristo wína akuptak: Amin pengker nintimtajme tusa, tura wína inatir ata tusa, ni kakarmarinka surusmiayi. Tura asamtai wikia Jesucriston maaketajajai. ¹³ Yaanchuikia Criston pachisan napchau chichauyajai. Nunia ni nemarkin ainaunka achikian katseknuyajai, tura maataj tusan, tura kársernum engkeataj tusan wekaatinuyajai. Tura wi nekachu asan, Jesús Yuse Uchirintai tichauyajai. Turai wainiat Yuska winaka wait anentrurmiayi. ¹⁴ Tura ii Apuri wínaka nekas pengker awajtusmiayi. Tura Cristo Jesúsjai tsaningkiar pujamu asa, ni nekas pengker nintimtustinasha tura ni anengkratairincha surusmiayi. ✠

✠ 1:2 (Hech. 16.1-3) ✠ 1:14 (Hech. 8.1-4;9.1-6)

¹⁵ Cristo Jesús tunau ainaun uwentikrataj tusa, nungkanam taramiayi. Ju chichamka nekasaintai. Aints mash nuna pachisar nekasaintai tiarminuitai. Wikia chikich ainaun nangkamasnak nekasau juun tunaun turinuyajai. ¹⁶ Wikia timiá tunau ain, Yus winaka wait anentruru asa, tunaunka mash sakturamiayi. Jesucristo jaimias pujau asa, ukunmasha aints ainu mash nuna nekaawar nekasampita tiartin ainauncha tuke pujustinun susatas wakerimiayi. ¹⁷ Ii Apuri Yus tuke jakashtinuitai. Ii jiijaingkia waitasha wainchautiatur: Yuska nekas kichik aa nuka mash nekawitai taji. Tura nu nintimsar: Tuke iinu Apuri ata tusar Yus nekas pengker awajsatnuitji. Tu ati.

¹⁸ Uchiru Timoteowa wi ju chichaman akuptajme. Wi amin nuiniarmau asam, nu chicham chikich ainausha ujakta. Tura pengker pujusam kakaram wajasta. Yuse chichame etserin ainausha amin pachitmasar: Yuse chichame etserin atatu tiarmia nunismek nintimsam pujusta. ¹⁹ Tura pengker nintimsam Yus umirkatnuka inaisaip. Chikich ainu pengker aa nuna nekainayat, tura Criston nekasampita tinayat, Yus umirtan inaisarmiayi. ²⁰ Himeneo tura Alejandrosha Yusen umirtan inaisaru asaramtai, Yusen pachisar pasé chichatirin inaisarti tusan, iwianchi apuri Satanás ni wait wajakt-intrin susarti tusan ajapan ukukmiajai. ✠

2

Yus seatnun pachis nuikiartamuri

¹ Yamaikia nunasha tajame: Yus seakriki, aints ainu mash pachisar: Ni yuumamuri susat tusar seatnuitji. Tura Yus ni tunaunincha tsangkurat tusar seatnuitji. Tura chikich ainauncha Yus wait anentrarat tusar seatnuitji. Tura mash aints ainu pachisar Yuska tuke maaketai titinuitji. Aints mash tu Yusen searat tusan wisha wakerajai. ² Tura chikich ainu pengker angkan pujusmi tusar, tura tuke maanitsuk pujusmi tusar, tura Yuska pengker awajarmi tusar, tura aints mash iin pachitmasar pasé chichartamkarai tusar, tura apu ainausha tura aintsu juuntri ainausha ni aintsrin pengker inararat tusar Yuska seatnuitji. ³ Yus tu seakriki, nekasar pengker seaji. Yus iin Uwentikramratin tuke tu seattaram tusa wakerawai. ⁴ Tura mash aints ainaun uwentikratas wakerau asa, wina chichamrun nekas aa nuna aints mash nekaawarti tusa wakerawai. ✠ ⁵ Yuska aya kichkitai. Nuka ni Uchirin Jesucriston aints wajasti tusa akupkawaitai. Tura aints wajas: Yusjai amikmataram tusa, ⁶ aints ainautin mash uwentikramratas, tura ii tunaunincha akiimiatramkatas jarutramkamiaji. Tura asamtai aints ainu mash nuna nekaawarat tusa Yuska iinka nekantikramamiaji. ✠ ⁷ Tura Yuska mash aints ainautin uwentikramratas wakerutmau asa, judíochu ainausha nu chicham nuiniarta tusa Yuska wina akuptukmiayi. Tura asamtai chicham nekas aa nu nuiniakminkia: Cristo nekasampita tiarat tusa winaka akuptukmiayi. Wikia waitrutsuk nunaka nekasau tajai. ✠

⁸ Tura asamtai Yuse umirin iruntrar Yusen seainak, aishmang ainu pengker nintim-tunisar, ni tunaunincha inaisar kajernaitsuk, tura Yuska anturtatsuapi tuuka nintimtsuk, uwejen takuiniar Yusen searat tusan wakerajai. ⁹ Nuwa ainausha, wina jiirsarat tutsuk, antsu pengke entsatin entsasar Yusnak nintimrarti tusan wakerajai. Muukencha pengker temashmiarar antsu: Shaakun nukap nungkutsuk entsati akiknasha entsatsuk pujusarti tusan wakerajai. ✠ ¹⁰ Antsu Yusnau asar, pengker aa nuna takainak chikich ainauncha wait anentrarti tusan wakerajai. ¹¹ Nuwa ainuka aishrin umirinak Yuse chichamen takamtaik nuimiarartinuitai. ¹² Antsu aishmang iruntramunmaka Yuse chichamenka nuwaka nuikiarturchartinuitai. Tura asamtai nuwaka aishmangkun inarcharti, antsu aints Yuse chichamen etsermati takamtaik antukarti tusan wakerajai. ¹³ ¿Waruka nunasha turawartinuita? tusan tajame. Yus aishmangkun Adán naartinun eemak najanamiayi, nuniá ukunam nuwancha Eva naartinun najanamiayi. ✠ ¹⁴ Turamtai iwianch Adánna anangkachmiayi, antsu Evan anangkamiayi. Tura anangkamu asa

✠ 1:20 (2.Tim. 4.14) ✠ 2:4 (Eze. 33.11) ✠ 2:6 (Gál. 1.4; Tito 2.14) ✠ 2:7 (2.Tim. 1.11) ✠ 2:9 (1.Ped. 3.3)
✠ 2:13 (Gén. 2.7,21-22)

tunau wajasmiayi. ¹⁵ Tura waininayat nuwa ainau uchin jatemawar waitnasar jurerar, tuke Criston nekasampita tusar, Yusen aneenauka ni tunaaurin mash inaisar uwemrartin ainawai.

3

Cristonu ainau wainin itiur pujusartinuita timiauri

¹ Aints Cristonu ainau wainin naamkatas wakerakka, nuka nekas pengker takatan wakerawai. Ju chichamka nekasaintai. ² Tura Cristonu ainau wainin naamkatas wakerakka, nekas pengker aints atinuitai. Tura pengker aints asamtai, chikich ainau nuna jiisar: Auka paseetai pengké tichartinuitai. Nuka kichik nuwentin atinuitai. Tura chichamnasha antin, tura pasé aa nuna chichas nakurichu, tura pengker nintintin atinuitai. Tura aints iraunasha pengker nintimtus: Juni kanurta tusa nunia yuratnuitai. Nuna turak pengker nuikiartin atinuitai. ³ Tura nampechu atinuitai, tura maanitnasha maanichu atinuitai, tura kuikian itiur nukapsha achiktajak, tuuka nintimtsuk pujustinuitai. ⁴ Tura ni jeen pujuinauncha pengker inartinuitai. Ni uchirisha pasé chichamnasha chichachu atinuitai. Nunia aparincha pengker umirkatnuitai. ⁵ Ni jeen pujuinaun tenap inachkusha ¿itiur Yuse nemarnuncha pengkersha inarting? ⁶ Aints yamai Cristo nemarin wajasuka, Cristonu ainau wainin at tusarkia inaikiashartinuitai. Satanás Yusen nangkamasang juun wajastas wakerau asamtai, Yus Satanásan nepetkamia nunisang nu aintsnaka wait wajaktiniun susai tusar, nu aintska Cristonu ainau wainin naamkan wisha apu wajastaj, tu nintimrai tusar inaikiashartinuitai. ⁷ Tura Satanás Cristonu ainau wainiun anangkawai tusa, tura Cristo umirchau ainau wina pachitsar pasé chichasarai tusa, nekas pengker aints atinuitai. ⁸

Cristonu ainaun yaincha itiur pujusartinuita timiauri

⁸ Cristonu ainaun yaincha pengker aints artinuitai. Tura pasé aa nuna chichas nakurichu artinuitai. Tura ni timiaurinka miatrusar umiu artinuitai. Tura nampetnasha nampechu artinuitai. Tura kuikian itirak nukap achiktaj tuuka nintimtsuk pujusartinuitai. ⁹ Ni tunaarinka mash inaisar, tura pengker nintimsar, Yuse chichame nekas aa nuna nekau asar, Yus ni chichamen nekamtikiamia nuna tuke nekasampita tiartinuitai. ¹⁰ Nu nangkamtaik: ¿Nu aints nekasash pengker puja? tusam nekaata. Tura nu nekaam, Cristonu ainaun yain ati tusam inaikiata. ¹¹ Nuna nuwarisha nekas pengker asamtai, aints mash niin pengker nintimtusartinuitai.

Tura nuwarisha tsanumchau, tura pasé aa nuna chichas nakurichu, antsu pengker aa nuna tuke mash umiu atinuitai. ¹² Tura Cristonu ainau yain kichik nuwentin atinuitai. Tura ni jeen pujuinauncha, tura ni uchiri ainauncha pengker inau atinuitai. ¹³ Nu takatan nekas pengker takakminamtaikia, chikich aints ainausha: Nu aintska nekas pengkeraitai tiartinuitai. Cristonu ainau yain Cristo Jesúsán nekasampita tinu asa, natsaamtasuk Criston pachis chichastinuitai.

Yus iin pengker awajtamsamurin pachis timiauri

¹⁴⁻¹⁵ Uchiru, amin wári jiistasan wakerajme. Turayatun ju papin wi aarja ju jukim, Yuse aintsri ainau itiur pujusartinuita tusam nekaata. Yus tuke puja nuna nemarin ainau ni uchiri asar, nekas chicham aa nuna pengker nintimsar jukiar tuke inaitsuk nintimrartinuitai. ¹⁶ Yus iinka pengker awajtamsamurin mash aints ainau nekaachminun wainiat, iin nekamtikramamiaji nuka nekas pengkeraitai. Nuka juwaitai: Yuska aints wajas, ju nungkanam wantinturmakmiaji. Tura nayaimpinam waketkimiayi. Yuse Wakani niincha pachis: Nekas pengkeraitai timiayi. Yuse awemamuri niincha wainkarmiayi. Tura niin pachisar mash nungkanam etserkarmiayi. Tura asamtai nuna nekasaintai tinauka mash nungkanam pujuinawai.

✠ 2:14 (Gén. 3.1-6) ✠ 3:7 (Tito 1.6-9)

4

Criston umirtan inaisartinun pachis etserkamu

¹ Uchiru, Yuse Wakani paan etserui: Kinta amuamunam aints Criston umirinayat iwianch nuikiartamun antukar, tura anangkartin wakantrinu chichamen antukar, Criston umirtanka inaisartinuitai. ² Nu anangkartin ainauka aints ni uwejen jiru tsuwerjai sukuamsha nekapinachua nunisarang ni tunaarinka pengké nekaprachartinuitai. Tura asar tuke aints ainaun anangkawartas wait chichaman etserkartinuitai. ³⁻⁴ Nuka nangkamiar chichainak: Nuwa nuwatkatnuka paseetai, tura Yus yutanacha mash najamu waininayat, tura Cristonu ainautikia nekas chichaman nekau asar, yutaka pachitsuk yuwamnawaitji tusar nekainayat nu yutaka yuwashtinuitai tinawai. Antsu Yus yutanacha mash najanamu asamtai, Cristonu ainautikia nakitajai tutsuk nekas chicham paan nekau asar, Yus maaketai tusar mash yuwamnawaitji. ⁵ Yus nunaka: Pengkeraitai tinu asamtai, iisha Yus sear pachitsuk yuwamnawaitji. ✨

Cristo inatiri ainau pachisar etserkamu

⁶ Uchiru, wi taja nuka Cristonu ainau nuiniakmeka, Jesucristo pengker inatiri atatme. Tura Yuse chichame nekasampita tusam, pengker nuikiartuktinka mash jukin asam, nu nintimsam kakaram wajastatme.

⁷ Antsu yaanchuik juuntan aujmatinauka antukaip. Tura nintimsuk chichainauka antukaip. Antsu Yuse wakeramuri umirkataj tusam kakaram wajasta. ⁸ Iinu namangke kakaram awajsatnuka jumchik pengkeraitai. Antsu Yuse wakeramuri umirkatnuka nuna nangkamasang pengkeraitai. Nu umirkurkia ju nungkanmaka pengker pujustinuitji. Nunia jakarsha tuke Yusnum iwiaaku pujustinuitji. ⁹ Ju chichamka nekas asamtai, aints ainauka mash nekasaintai tiartinuitai. ¹⁰ Yus tuke iwiaaku puja nuka iin Uwentikramratin asa, aints ainautin mash uwentikramratnuitji. Tura asa nu chichamka nekasampita tinu asar, katsekraminamtaisha waitnasar kakaram takakmaji.

¹¹ Wi taja nuna mash umikiarat tusam chicharkarta. Tura Cristonu ainauka mash nuiniarta tajame. ¹² Ame pengker pujakminkia: Auka uchitai turamiarchatnuitai. Tura ame pengker chichaakum, tura pengker pujusam Yuse anengkratairingkia tu awai tusam, chikich ainausha nuiniarta. Nunia Yus nekasampita tusam tunaarinchau pujusam, Cristonu ainau wiya nunisarang pujusarti tusam nuiniarta tajame. ¹³ Uchiru wi jeatsaing, aints iruntramunam Cristonu ainauka nuiniartasam tura kakamtikratasam Yuse chichame aujsata tajame. ¹⁴ Cristo nemarnu wainin ainau ninu uwejejai muukmin achirmakar, Yuse kakarmari jukit turamiaru asaramtai, kakaram wajasam Yuse taka-tringkia inaisaip.

¹⁵ Tura aints ainau mash ame pengker turamun nekaawarat tusam, wi tajame nuka tuke nintimjai nintimsam turata. ¹⁶ Ame tenapkesam: Wisha tu pujajai tu nintimram, Yuse chichamengka tuke mash nuiniarta. Nu turakmeka amesha uwemratnuitme. Turakmin ami chichamin antinausha uwemrartinuitai.

5

¿Cristonu ainauti itiur pujustinuitji?

¹ Uchiru, juuntach ainau jiyakaip. Antsu ami aparmijai chichaame nunismek chichasta. Tura yachim ainau pengker awajme nunismek natsa ainausha pengker awajsata. ² Nuwa juuntach ainausha ami nukurmea nunismek pengker awajsata. Tura nawan ainausha umaimia nunismek tunauka nintimtutsuk pengker awajsata.

³ Waje ainau ni yaingmintri atsau asamtai, ame yaingta. ⁴ Antsu waje nawantrintin tura uchirtin pujakka, tura tirangkisha pujakka, ni weari asar niin wainkartinuitai. Nuka ni aneenak tsakatmarmau asar, ni aparincha, tura ni nukurincha wainkartinuitai. Yuscha nunaka wakerau asa, nekas pengkeraitai tawai. ⁵ Tura waje nekas ningki pujakka: Yus wina yainkati tusa, tuke inaitsuk tsawaisha kashisha nintimui, tura tuke inaitsuk

✨ 4:5 (Gén. 1.9-25)

Yusen seak pujawai. ⁶ Antsu waje tuke ni wakeramurin nintimias pujakka, iwiaaku pujayat jakawa nunisang pujawai.

⁷⁻⁸ Cristonu ainau ni wearin wait anentinachuka, tura ni weari waje ainaun nintimtinachuka Yusen nekasar umirinatsui. Nu aintska nekasar Yuse uchiri ainayat, Criston umirchawa nuna nangkamasarang pasé pujuinawai. Ju chichamnaka Cristonu ainau antukarti tusam etserkata. Turakmin Cristonu ainau ju chichaman miatrusarang umirinamtai, chikich ainau Yuse nemarkin pasé pujuinawai tichartinuitai.

⁹ Nuwa nekas juuntach kichik aishrintin wajema pujamtaikia, Cristonu ainau nu wajenka wait anentrartinuitai. ¹⁰ Aints mash nu waje turamurin nekaawar: Nusha pengkeraitai tiartinuitai. Ni uchirin tsakatmaramtaikia, tura irau ainauncha pengker yuramtaikia, tura Cristonu ainauncha yaingkiamtaikia, tura wait wajainauncha wait anentrantaikia, tura pengker aa nuna mash takakmasamtaikia, nu wajenka Cristonu ainauka wait anentrartinuitai.

¹¹ Antsu nuwa nawan aintsun yamai ninumkayat wajemamtaikia, Cristonu ainausha chikich waje juunchin wait anentinak yaina nuniska yaingkiarchatnuitai. Antsu nu nuwa wajemayat, ni wakeramurin nintimias pujau asa, Cristonka nintimtsuk, aintsun ataksha ninumkataj tu nintimias pujawai. ¹² Nuka Cristonuitjai tayat, Criston nintimtsuk pujamtaikia, aints ainausha nuna nekaawar, nuka tunaawitai tiartinuitai. ¹³ Nu nuwa ainauka takatan nakiminak, chikich chikich jeanam wayaawar, nangkamiar aujmakratu pujuinawai. Chikich aints chichaamtai, ningkikia tichamin ainayat nangkamiar chichau ainawai. ¹⁴ Tura asamtai nunasha tajame: Nawan wajema pujakka, ataksha aintsna ninumkati. Tura uchinya jurerti. Tura ni jeencha tenap wainkati tajame. Nuwa tu pujamtaikia Criston nakitin ainausha: Nu nuwaka paseetai tichartinuitai. ¹⁵ Chikich nawan wajema pujuinauka menakar, Criston umirtan inaisar, iwianchi apurin Satanásan nemarsarmiayi.

¹⁶ Nuwa Cristonu asa, ni jeen wajen pujas pujauka chikich Cristonu ainaun: Ju wajeka atumsha yaingtaram tutsuk ningki yaingtinuitai. Antsu waje pengké ningki pujamtaikia, yaingmintri atsau asamtai, Cristonu ainau mash nu wajenka wait anentrartinuitai.

¹⁷⁻¹⁸ Uchiru, Yuse chichamesha tu aarmawaitai: “Waaka trigo neren pakartas ná-jamtaikia, trigo pachitsuk yuwati tusaram jangkengka jingkiatawairap.”[☆] Chikich chichamsha tu aarmawaitai: “Aints takakmak pujamtaikia akiktinuitai.” Tu aarmau asamtai, Cristonu ainau wainin Yuse takatrin pengker takakminak, tura pengker nuikiartinamtaikia, tura Yuse chichamen kashincha kashincha etserinamtaikia, nekas pengker umirkartinuitai. Tura Cristonu ainau ni yuumamurinja susartinuitai.[☆]

¹⁹ Aints ningki chichaak: Cristonu ainau wainin tunau takasi tamatikia nuka antukaip. Antsu jimichiksha, tura kampatmaksha tsanumtsuk nuna tinamtaikia, nu chichamka antukta.

²⁰ Cristonu ainau tuke tunau turukiar weenamtaikia, ame Cristonu ainau mash iruntramunam ni tunaarin nekaawarti tusam chicharkata. Turakmin chikich ainau nuna antukar: Wína tunaaruncha turutiarai tusar shamkar inaisartinuitai.

²¹ Ii Apaachiri Yus, tura ii Apuri Jesucristosha, tura Yuse awemamuri ainau Yus: Winia inatir ataram tusa inaikiamia nusha ii tunaarinja mash metek nekartaminaji. Tura asaramtai nunasha tajame: Cristonu ainau wainin tunau takauka nekas aminu amikrum wainiatmek chicharkata. Aints ainau mash metek jiista, tura metek chicharkata. ²² Ameka Cristonu ainau wainin inaikiatasam wakerakmesha wárikia inaikaip. Tura ame inaikiamaitiat, nuka tunau turamtaikia, ame ni tunauringkia jurumaktiatme. Antsu pasé aa nuna turinamunmaka pengké pachinkaip.

²³ Wakemin tuke najaimin asam, yumikia umuraip. Antsu vinosha jumchiksha umurta.

☆ 5:17-18 (Deut. 25.4) ☆ 5:17-18 (Mat 10.10; Luc. 10.7; 1.Cor. 9.14)

²⁴ Ju chichamsha nintimrata: Chikich aints ni wait wajaktintri jeachu wainiatrik ni tunaaurin paan nekaatnuitji. Tura chikich aintsu tunaaurinka yamaikia paanka nekaashtinuitji, antsu ukunam paan nekaatnuitji. ²⁵ Tura aintsu pengker takatrisha nunisrik paan wainkatnuitji. Antsu yamaikia paanka nekachiatrik ukunam paan nekaatnuitji.

6

¹ Inati ainautiram, chikich aints ainau Yusen pachisar, tura Yuse chichame ii nuikiartaji nuna pachisar pasé chichasarai tusaram, atumin inatminka pengker umirkataram. ² Inamnujai mai metek Cristonu asar, inati ni inamurincha nakitrachartinuitai. Antsu ni inamurisha Yuse aneamuri tura Cristo nemarkin asamtai, chikich inati ni apurin umirina nuna nangkamasarang pengker umirkartinuitai.

Kuik wakeruktinun pachis etserkamu

Ju chichamka nuiniarta. Tura umirkataram tusam etserkata. ³ Aints ii Apuri Jesucristo chichamen nekas aa nuna nuikiartachuka, tura Yus pengker umirkatnun nuikiartachuka, antsu niish wait chichaman nuikiartak pujauka ⁴ nekachiat nangkami: Wikia miajuitjai tawai. Nuka nangkami chichaman chichaa chichaaka jiyanitnasha, tura kajernaitancha, tura katseknaitancha tura pengker nintimtunitsuk pujustinasha wakerawai. ⁵ Nu aints ainau tunau tuke nintimnau asar nekas chichamnaka pachinatsui. Tura asar jiyanita tuke wakerinawai. Tura kuikian nukap jukin Yusnaka pengker awajsachainjash tu nintiminawai. ⁶ Iikia Yus umirkurkia, tura tunau takatsuk pujakrikia, warinchuwach tura kuikiasha nukap wakerutsuk pujakrikia, nekasar maaketai titinuitji. ⁷ Iikia warinchusha takutsuk akiinamiaji. Tura jakarsha nunisrik warinchusha kichkisha jukishtinuitji. ⁸ Tura asar ii yutairi amatisha, tura ii entsatiri amatisha, maaketai tusar pengker nintimsar pujustinuitji. ⁹ Antsu kuikiartin wajastaj tu nintiminauka kuikian timiá wakerinawai asar tunau wajainawai. Tura asaramtai kuikian nukap achikiartas wakerin ainaunka kuntin ejatkanam napinawa nunisang iwianch nu aintsnaka achiawai. Tura jakatniunam nunia wait wajaktinnum akupawai. ¹⁰ Kuikian nukap aneenuka tunau tuke turatnun nangkaminawai. Tura asaramtai chikich aints kuikian aneenu asar, Criston nekasampita tinachu asar, nukap wait wajakarmiayi. ¹¹

Cristo umirkum kakaram wajasta timiauri

¹¹ Uchiru, ameka Yusnau asam, kuikiaka nintimtsuk asata. Antsu tunauka nintimtsuk Yus pengker awajsata. Tura Cristo nekasampita tusam chikich ainausha aneeta. Tura jaimiasam: Wikia miajuitjai tumamtsuk asata. ¹² Antsu Cristo pengker umirkum kakaram wajasta. Nu turakmeka pujut nangkankashtin jukitnuitme. Yuska nu jukita tusa aminka eatmakmiayi. Tura asamtai aints untsuri antinamunam ameka Cristo nekasampita tinuyame. ¹³⁻¹⁴ Ataksha tajame: Ii Apuri taatsaing, wi taja nuka kajinmat-suk tura yapajtsuk umikta. Nu turakmeka natsaamtsuk pujustinuitme. Yus iwiaaku ainautin mash pujutan sukartin asa amincha waitmawai. Tura Poncio Pilato Criston iniam, Ni shamtsuk nekas chichaman etserkamia nuka amincha waitmawai. ¹⁵

¹⁵ Ni kintari jeamtai, Yus ni Uchirin nayaimpinmaya akupkatnuitai. Ningki timiá pengker asa, junia apu ainau Apurintai. Tura junia juun ainau nangkamasang juuntaitai. ¹⁶ Ni tuke pujuu asa pengké jakashtinuitai. Tura tuke paaniunam pujuwitai. Tura asamtai aints kichkisha ningkikia nuningkia jeacharminuitai. Aints kichkisha Yusnaka pengké wainkacharmiayi, tura pengké wainkachartinuitai. Tura asamtai Yus timiá kakaram asa, aints ainaun tuke inartinuitai. Nekasaintai.

¹⁷ Uchiru, kuikiartin ainau ujakta: Atumka jampesrum kuikiartinuitjai tiirap tita. Kuik wári mengkakatin asamtai, kuikiarka nukap pujawai, tuuka nintimtsuk pujustaram tusam, antsu Yusek nintimrataram tita. Yuska tuke iwiaaku pujuu asa, ii yuumamur-incha tuke mash sukartin asamtai, iisha pengker nintimsar yuumatsuk pujustinuitji. ¹⁸ Kuikiartin ainausha ujakta: Chikich ainau wait anentakrum pengker aa nuka mash

☆ 6:7 (Sal. 49.17) ☆ 6:10 (Hebr. 13.5) ☆ 6:13-14 (Juan 18.37)

turataram. Turaram chikich aints yuuminak pujuinausha nukap susataj tusaram, pengker nintimsaram yainiktaram. Nuna turinaunaka Yuska pengker awajsatnuitai tita. ¹⁹Kuikiartin nuna turinauka nukap arusar Cristonam jear, chikich ainaun susarmia nuna nangkamasarang nisha warasartinuitai. Tura pujut nangkankashtinun Cristo susatnua nuna jukiartinuitai.

Inangnamu Timoteon chichaman akatramuri

²⁰Uchiru Timoteowa, Yuse chichame etserkata timiaja nuka aints ainamunam tenapkesam etserkata. Antsu chikich chichaman etserina nuka, tura ju nungkanmaya pachisar aujmatina nuka antukaip. Tura nangkamiar: Wisha nekajai tinauka nuna chichamengka antukaip. ²¹Tura chikich aints tu nintimsar pujuinauka Cristo umirtanka inaisarmiayi.

Ii Apuri amin yainmakti. Maaketai.

Pablo Timoteon Papin Ataksha Akuptukmauri

Chicham aatramuri

¹⁻² Aneetiru uchiru Timoteowa: Wiitjai Pabloitjai. Yus wakerau asantai Jesucristo akupkamuitjai. Cristo Jesúsjai tsaningkiaru ainaun mash pujut nangkankashtinun susatatjai Yus tinu asa, nu etserkata tusa akuptukuitai. Ii Apaachiri Yus, tura ii Apuri Jesucristo amincha yainmakarti, tura wait anentramrarti, tura angkan pengker pujustinasha amincha suramsarti tusan, amin aatkun pujajai.✠

Cristo pachisar chichastinka natsaaraip

³ Uchiru, wikia tsawaisha kashisha tuke: Yus amin yainmakti tusan, amin pachisan maaketai tajai. Yaanchuik wína wear Yusen umirin armia nunisnak wisha tunaanaka nintimtsuk Yusen umirkun pujajai. ⁴ Uchiru, wi kanaamtai ame eantramiamena nuna tuke nintimsan pujajai. Tura asan ataksha wararnaisami tusan amin jiistasan wakerajme. Tura amin wainkanka nekasana warastatjai. ⁵ Ameka Cristo nekasampita timiame nunaka kajinmatsjai. Ami nukuchrum Loida tura ami nukuram Eunicesha yaanchuik Yusen nekasampita tinu armiayi. Tura amesha nunismek tu pujame tusan nekajme.✠

⁶ Tura asan tajame: Wi muukmin uwejruijai achikian Yusen seamtai, Yus ni kakarmarin amin suramsamia nujai ataksha Yuse takatringkia kakaram takakmasta. ⁷ Yus shama-munka suramsachmiaji, antsu ni kakarmarin, tura ni anengkratairinha, tura nekas paan nintimratnuncha iin suramsamiaji.

⁸ Ii Apuri Cristo pachisar chichastincha natsaaraip. Tura wikia Cristo chichame etserin asan, kársernum pujamtaisha natsantruraip. Tura amesha Cristonam uwemratin chicham etserin asam, wait wajaktincha shamkaip. Ame wait wajakmincha Yus ni kakarmarincha suramsatnuitai. ⁹ Yuska iincha uwemtikramramiaji. Tura wína takatur takakmastaram tusa, pengker takakmakur pujatsrining iincha untsurmakmiaji. Tura Cristo Jesús yaanchuik aints ainaun najanchayat, iin anenmau asa, ni aintsritin uwemtikramratas wakerutmakmiaji. ¹⁰ Tura Yuska yamai iin uwemtikramratnun Jesu-criston akupturmaku asa, ni anengkratairin nekamtikramamiaji. Ni Uchiri jakamun-maya inankin asa jatancha nepetkamiayi. Nunia tuke wijai pujustaram tusa, pujut nangkankashtinun ninu ainautinka suramsamiaji. Nu nekaataram tusa, Cristonam uwemratin chichaman iinka nekamtikramamiaji.

¹¹ Nu chichamka etserin ata tusa Yus winaka inaitukmiayi. Tura judíocho ainamunam wína chichamur nuiniarta tusa akuptukmiayi.✠ ¹² Ju takatan takakmau asan, wikia waitnajai, antsu pengké natsaamatsjai. Cristo yaachita tusan nekau asan, tura niincha umiru asan, wikia nunaka nekajai. Nungka amukatin kinta jeatsaing, Cristo timiá kakaram asa, wína takatan surusmia nunaka tuke mash pengker waitruktinuitai.

¹³ Wi pengker nuikiartamu antuku asam, nuka kajinmatsuk metek nuikiartukta. Ameka Cristo Jesúsnau asam, ni nekasampita tusam chikich ainausha aneeta. ¹⁴ Yus ni nuikiartutirin amin suramsau asantai, Yuse Wakani iin pujurtamji nuna kakarmarijai aints ainau pengker nuiniarta tajame.

¹⁵ Uchiru, Asia nungkanmaya ainau winaka mash ukurkiari. Figelosha, tura Hermógenesha wina ukurkiari. Amesha nusha nekaamame. ¹⁶⁻¹⁷ Wikia kársernum pujai, Onesíforo juni Romanam taa, natsantrutsuk ningki eatkinij wajau asa, winaka waittsuka inaituschamiayi. Tura wína waitkau asantai, nintirun nukap waramtikrusmiayi. Tura asantai Onesíforo wearinka Yus wait anentrati tajai. ¹⁸ Iikia Efesonam pujarin, nusha iin nukap yainmakmiaji. Amesha nuka nekame. Tura nungka amukatin kinta jeamtai, ii Apuri niincha wait anentrati tajai.

✠ 1:1-2 (Hech. 16.1; 1.Tim. 1.2) ✠ 1:5 (Hech. 16.1-2) ✠ 1:11 (1.Tim. 2.7)

2

Jesucristo inatiri pachis timiauri

¹ Uchiru, Cristo Jesúsnau asam, ni kakarmarijai kakaram wajasta. ² Yuse aintsri iruntramunam wisha amin nuiniarmiajme nu chichaman pengker umirin ainauka nuiniarta. Nu turakmin nisha nunisarang chikich ainauncha nuiniararti tusam turata.

³ Amesha Jesucristo pengker umirkau asam, péngke suntara nunismek wait wajaktinka shamkaip. ⁴ Suntar mesetnum weenak, ni apurin miatrusarang umirin asar, ni wearinka jiitsuk, tura ni wakeramurinha najantsuk pujuinawai. Iisha nunisrik ii wakeramuringkia najantsuk, ii Apuri Cristok umirkatnuitji. ⁵ Tura nakurakur nekapnaiyamu nintimrata. Nekapnaiyakrum pujakrumka, tu nakurustaram tinamaitiat, aints miatrusang umitsuk pujamtaikia, chikich aints ainausha niincha: Pengker nakurusume tichartinuitai. Iincha nunisang Yus umirtsuk pujakrinkia, Yuska: Pengker umirtukume turamchatnuitji. ⁶ Tura aints ni ajarin takakmak pujauka juuktin kinta jeamtai, ni ajarinianka pachitsuk yuwatnuitai. ⁷ Wi taja nuka nintimrata. Tura ii Apuri nuna taku tawai tusa aminka mash nekamtikramatatu.

⁸ Uchiru, Jesucristo jakamunmaya nantakmiauri nintimrata. Ni apu Davidta weari asa, Cristoka juun apu atinuitai. Yusnum uwemratin chichaman wi etserja nuka nuwaitai. ⁹ Nu chichaman etseru asan, jirujai jingkiamu mangkartinua nunisnak kársernum waitnajai. Antsu Yuse chichamenka pengké jingkiachartinuitai. ¹⁰ Tura asamtai Cristo Jesúsnau ainau tuke uwemrarti tusan, tura pujut nangkankashtinun jukiarti tusan, wait wajaktinum pujayatun tsantran pujajai.

¹¹ Ju tamauka nekasaintai:

Cristonu ainautikia waitnasar jakarsha Nijai tuke pujustinuitji.

¹² Cristonu asar waitnasar pujakrishia, Nijai tsaniasar aints ainausha inartinuitji.

Antsu Criston natsantamka, Niisha nunisang natsantramratnuitji. ✠

¹³ Iisha Criston nekasampita tutsuk pujakrinkia, Niisha ni tǎmia nunaka tuke umiktin asa ni chichamenka tuke umiktinuitai.

Yuse chichamen pengker takainaun pachis etserkamu

¹⁴ Uchiru, wi taja nuka chikich aints ainausha nintimtiktarta. Turakum ii Apuri Cristo wakeramuri etserkata. Nangkamiar aujmatnainak pujuinauka: Nunaka inaisarti tusam, ii Apuri wainmaunum chicharkata. Aujmakratinak pujuina nuka pengké kichkisha yaingkratinatsui. Antsu nuna antinauka paseminawai. ¹⁵ Pengker aa nuka kakaram takasta. Nu takaakminka Yuska amincha: Pengker takakmasume turamtatui. Tura nekas chicham nuiniakum tupnik nuiniarta. Turakmeka natsaarchatnuitme. ¹⁶ Antsu ju nungkanmaya ainau nangkamiar chichainamunmaka nuningkia pachinkaip. Tu chichainauka nukap tunaun nintimsar pujuinawai. ¹⁷ Tura nuna chichamengka aintsu namangke kaurua nunisang tsuwarchamin ayi. Tura Himeneo tura Filetoshia tu pujuinawai. ¹⁸ Nuka nekas chichamnaka inaisar nekaschau aa nuna chichainak, Cristo nemarin jakaru ainauka yanchuk nantakiaru asaramtai, atumka nantakchatnuitrume tusar Cristonu ainau anangkinawai. ¹⁹ Antsu Yuse chichamengka yapajiachminuitai. Nu chichamka tu aarmawaitai: “Ii Apuri Cristo ni aintsrinka yaachita tusa mash nekawai.” Tura chikiticha tu aarmawaitai: “Wisha Cristonuitjai tina nuka ni tunaarinja mash inaisartinuitai.” ✠

²⁰ Kuikiartinu jeenkia pining kuri najanamua tura kuik najanamusha irunui. Tura nunaka kuikiartin ainau nuke takainawai. Tura numi najanamusha, tura nuwe najanamusha pining irunui. Antsu mianchau ainau nunaka pachitsuk takainawai. ²¹ Aints ni tunaarinka mash inais, nekas pengker pujakka, pining kuri najanamua nunisketai. Jeentin pining kuri najanamunka pengker wainui. Yuscha nunisang ni aintsri ainautinka: Wína inatir ataram tusa, tura wína takatur pengker takakmastaram tusa ju nungkanam pujsamuitji. ✠

✠ 2:12 (Mat. 10.32-33; Luc. 12.9) ✠ 2:19 (Núm. 16.5; Juan 10.14; 1.Cor. 8.3) ✠ 2:21 (Jer. 18.1-6)

²² Uchiru, natsa tunau wakerutan nintimina nunismeka nintimraip. Antsu nekas pengker aa nuke nintimrata. Tura Cristo nekasampita tusam chikich ainau aneeta. Tura pengker nintimsam angkan pujusta. Tura Cristonu ainau tunauka nintimsuk Yusen seaina nujai irunrata. ²³ Aints nangkamiar aujmatnainamtaisha, tura netse chichainamtaisha nuni pachinkaip. Nuka jiyanitnasha nintimtikinawai. ²⁴ Ii Apuri inatiri ainautikia chikich ainaujai jiyantsuk pujustinuitji, antsu aints ainaun mash pengker awajsatnuitji. Tura aints ainaun pengker nuiniartinuitji. Tura jaimiasar pujustinuitji. ²⁵ Tura pengker nintintin asar, Yusen nakitin ainausha: Antuktaram tusar ujaktinuitji. Tura ni nintimaurincha yapajiawar nekas chichaman nekaawarti tusar nakastinuitji. ²⁶ Nu turakrinkia Yusen nakitin ainausha shintawa nunisarang: Wikia Satanása inatirinjai tusar, paan nintimrar kuntin ejatkanmaya jijnua nunisarang Satanása wakeramurinka inaisar uwemrartin ainawai.✠

3

Nungka amukatin jeamtai ¿aints ainausha itiur pujusartinuita?

¹ Uchiru, nusha nekaata: Nungka amukatin kinta jeatsaing, wait wajaktin nukap artinuitai. ² Aints ainau niinunak nukap nintimrartinuitai. Tura kuikian nukap wakerinak, Yusnasha pachisar pasé chichasartinuitai, tura aparincha, tura nukurincha umirtsuk pujusar, maaketai tutsuk Yusnaka nakitrartinuitai. ³ Tura chikich ainauncha wait anenchau artinuitai. Tura tsanumin artinuitai. Tura ni namangke wakeramurin nepetchau artinuitai. Tura kajeu artinuitai, tura pengker aa nunaka nakitrartinuitai. ⁴ Tura amikrincha anangkawartinuitai. Tura arantutsuk tunaun turuwartinuitai. Tura ningki nintimtumasar: Shiirmapitja tumamin artinuitai. Tura Yuse wakeramurinka najantsuk ni wakeramurinak najanawartinuitai. ⁵ Nuka nangkamiar Yusnawaitjai tinayat, Yuse kakarmaringkia atsawai tiartinuitai.✠

Uchiru, nu aints ainaujainkia pengké pachinkaip. ⁶ Nu aints ainauka chikich chikich jeanam pachitsuk wayaawar, nuwawach nintinchaun juun tunaarinnun jiisar, pengker chichainayat anangkinak ni wakeramurin tuke najanawarti tusar nintimtikinawai. ⁷ Tura nu nuwa ainauka nu aintsu chichamen tuke anturkariat, chicham nekas aa nunaka nekaawartatkamawar yuumatinawai. ⁸⁻⁹ Yaanchuik wishin Janes naartin, tura kitcha Jambres naartin, nekas chichamnaka nakitinak Moisésan pachisar: Nangkami tawai tiarmiayi. Tura ni anangmamurincha aints ainausha mash nekaawarmiayi. Nu wishin jimiar yaanchuik turinamurin nekaawarmia nunisarang yamaiya aintcha nintinchau turinamurincha mash paan nekaawartinuitai. Nu aints ainauka nekas chichamnaka nakitinawai. Tura wikia nuikiartinuitjai tinayat, nekaschau aa nuna nuikiartinawai. Tura Yusen nekasampita tichau asaramtai, nu aints ainaunka Yuska nakitawai.

Inangnamu Pablo Timoteon akatramuri

¹⁰⁻¹¹ Antsu ameka Uchiru, wi nuikiartamur antukam umirnuyame. Tura wi pengker pujamursha waitkam nunismek turinuyame. Tura wi nintimaur nekauyame. Tura Yus umirkamursha nunismek amesha umirnuyame. Tura Yusen nakitin ainaun wi tsantramiaya nunismek amesha tsantramiame. Tura wi aints ainaun aneenuyaya nunismek amesha aneenuyame. Tura wi wait wajamurun pachichuyaya nunismek amesha pachichuyame. Tura Antioquía yaktanam, tura Iconio yaktanmasha, tura Listra yaktanmasha wína mantuwartas papeetinamtai, wi wait wajakmaurusha nekaamiame. Antsu Yus winaka nuni uwemtikrurmiayi.✠ ¹² Aints Cristo Jesúsnu asar, pengké tunaarinchau pujusmi tusar wakerinamtaisha, Cristo nakitin ainauka tuke nakitrartinuitai. ¹³ Tura tunau ainausha, tura anangkartin ainausha, niisha anangkamu asar, chikich aints ainauncha nuna nangkamasarang tunaun turukiar weartinuitai.

¹⁴ Antsu ameka nuimiarmiam nu nekasampita tusam, nuka tuke inaitsuk umirkata. Amincha nuitarmarmia nuka waitrichu ainawai tusam nekame. ¹⁵ Ameka uchiwach

✠ 2:26 (Eze. 33.9) ✠ 3:5 (2.Ped. 3.3; Jud. 18) ✠ 3:10-11 (Hech. 13.14-52;14.1-23)

asamek, Yuse chichame nekas pengker aa nu antuku asam nekauyame. Tura Cristo Jesús nekasampita takurningkia, iin uwemtikramratnuitji tusam nusha nekauyame. ¹⁶ Yus ni aintsri ainaunka ni chichamen aamtikramiaiyi. Tura asamtai Yuse chichame nekas pengkeraitai. Yus ni chichamen aints ainautinka nuitamratas, ni tunaarin inaisarti tusa, tura ni chichamen umirtukarti tusa, tura tunaarinchau pujusarti tusa aamtikramramiaji. ¹⁷ Tura Yus ni aintsri ainautin mash aarmawa nunisrumek umirtuktaram tusa, tura pengker aa nuka mash turataram tusa, ni chichamenka aamtikramramiaji.

4

¹ Ii Apaachiri Yus tura ii Apuri Cristo Jesús iinka waitmaji. Nuka iwiaaku ainau, tura jakaru ainau tunau turamurinha jiiestas winitnuitai. Tura asamtai ju chichamnasha akatjame: ² Aints Yuse chichamen antutan wakerinamtaisha, tura antutan nakitinamtaisha nunismek tuke ukutsuk ujakta. Atumi tunaari ukuktaram tusam tura: Pengker aa nu turataram tusam, aints ainau nuiniarta. Antutan nakitinau wainiatmek, kajertsuk pengker nintimsam tuke Yuse chichame nuiniarta tajame. ³ Kinta jeamtai aints ainau pengker nuikiartamun antutan nakitrartinuitai. Antsu niish niish nuikiartiniun untsuri ni wakeramurinak nuikiarturat tusar eakartinuitai. ⁴ Tura nekas chicham aa nunaka tuntupeawar ukukiar, yaanchuik juunta aujmattairin antutan wakerukartinuitai. ⁵ Antsu ameka nu wainkam nintimrata. Tura waitnamurmesha jaimiasam nepetkata. Tura uwemratin chicham tuke etserkata. Tura ami takatrumsha mash pengker umista tajame.

⁶ Uchiru, wi jakatin kintar jeatak wajasi. Turamtai Cristo chichamen pachisar winaka mantuwartatui. ⁷ Wikia iwianchin nepetkau asan, tura Yuse wakeramurin miatrusnak mash umiku asan, Criston nekasampita tutanka inaisachmajai. ⁸ Turamtai ii Apuri nekas pengker asa, aints ainauti takatrin jiirmastas winitata nuka: Ameka nekas pengker aa nu takakmasume tusa, tsengkruti nekas pengker aa nunaka winasha surustinuitai. Aya winakeka suruschatnuitai, antsu chikich aints ainausha Criston aneenak: Wári tarata tinaunaka nunasha mash susartinuitai.

Chikich aints ainaun pachis chicham akuptukmauri

⁹ Uchiru, wári winimnawaitkumka wári jiirita. ¹⁰ Demas ju nungkanmaya aa nuna timiá wakerau asa, winaka japrua ukurki, Tesalónica yaktanam weyi. Tura Crescentesha Galacia nungkanam weyi. Tura Titosha Dalmacia nungkanam weyi. ¹¹ Lucasak nuke juwak wijai pujawai. Marcos eakam wína takatru yainkatin ayatrukta. ¹² Tíquiconka Efeso yaktanam akupkamjai. ¹³ Ame winakum wína entsatir nuparam aa nuka, tura papi ainausha, tura nuwapen wi aarmiaja nuka Troas yaktanam Carpo jeen ukukmiaja nu takurtukta.

¹⁴ Alejandro, jiru takakminua nuka, wína pachitas nukap pasé chichartukmiaiyi. Tura asamtai ii Apuri ni turamurinka yapaijkiatnuitai. ¹⁵ Ii chichamen arantak nakitau asamtai, amincha pachitmas pasé chichartukai tusam wainkata.

¹⁶ Apu ainamunam chicharmamsatasan nu nangkamtaik wiki wajakmiajai. Tura aints kichkisha: Wisha amin chicharsatjame tusarka wajakcharmiyai, antsu mash winaka ukurkiarmiayi. Tura wainiatun Yus nu aintsnaka yapaijtsuk asati tusan wakerjai. ¹⁷ Tura wainiat ii Apuri Cristo wína yainkamiyai. Tura asa ni kakarmarin nintirun engketruamiyai. Tura asamtai judíochu ainausha mash Cristonam uwemratin chichaman antukarti tusan ujakarmiajai. Nunia Yuska juun apu winaka juun yawaanum akupkashti tusa surimrukmiyai. ¹⁸ Yamaisha nunisang wína pasé awajtusartas wakerinau wainiat, Yuska winaka uwemtikrurtatui. Tura iin inatmartin asa, nayaimpinam juruktatui. Aints ainau tuke mash Yusen: Ameketme juuntam tiarti. Tu ati.

Yus atumin yainmakarti timiauri

☆ 4:10 (2.Cor. 8.23; Gál. 2.3; Tito 1.4) ☆ 4:11 (Hech. 12.25; 13.13; 15.37-39; Filem. 24) ☆ 4:12 (Efes. 6.21; Col. 4.7-8) ☆ 4:13 (Hech. 20.6) ☆ 4:14 (Rom. 2.5-6; 1.Tim. 1.20)

¹⁹ Prisca tura Aquila tura Onesíforo weari ainausha mash chichasam: Pablo atumin chichaman akupturmarme tusam ujakta.[✠] ²⁰ Erasto Corinto yaktanam juwakmiayi. Tura Trófimo Mileto yaktanam sungkurmak tepaun ukukmiajai.[✠] ²¹ Ame winimnawaitkumka yumchaka jeatsaing winita. Eubulo, tura Pudentesha, tura Linosha, tura Claudiasha, tura Cristonu ainausha mash amin chichaman akupturminawai.

²² Uchiru, iinu Apuri Jesucristo amijai pujusti. Tura Yus atumin tuke mash yainmakarti. Maaketai.

[✠] 4:19 (2.Tim. 1.16-17) [✠] 4:20 (Hech. 21.29; Rom. 16.23)

Pablo Titon Papin Akuptukmauri

Chicham aatramuri

¹ Wiitjai Pabloitjai. Yuse inatirinjai. Jesucristo wína chichartak: Wína chichamur etserkata tusa akuptukmiayi. Yus eakmau ainau nekasampita tiarat tusa, tura nekas chicham aa nunaka nekaawarat tusa, Yuska winaka akuptukmiayi. ² Yusnau ainau pujut nangkankashtinun jukiarat tusa, Yuska pengké waitrichu asa, yaanchuik aintsnaka najantsuk nunaka timiayi. ³ Tura yamai ni chichame nekaatin kinta jeau asamtai, Yuska iin Uwemtikramratin aa nu: Ju chicham etserkata tusa akuptuk, ni chichamen iinka nekamtikramamiaji. ⁴ Uchirua Titoa amin aatkun pujajme. Wi taja nuka amesha nunismek nekasampita tau asakmin, wi yajutmarchayatnak: Ameka wína uchiruitme tajame. Yus ii Apaachiri, tura Jesucristo iin Uwemtikramratin aa nu amincha yainmakti. Tura pengker nintimsar angkan pujustinasha suramsati tusan aminka aatjame.✠

Tito takatri pachis etserkamuri

⁵ Wikia Yuse umirin ainau itiur pengkersha pujusarting tusan, ame nu chichamsha tenapkesam etserkata tusan, aminka Cretanam ukukmiajme, tura Cristonu ainau wainin chikich chikich yaktanmasha inaikata tusan ukukmiajme. ⁶ Tura Cristonu ainau wainunka pachisar chikich ainau: Pengke aintsuitai tiartinuitai. Tura kichik nuwentin artinuitai. Ni uchirisha Cristonu asar tunaanaka takachu, chichamnasha pengker umiu artinuitai. ⁷ Cristonu ainau wainin ainauka Yuse aintsrin wainkarti tusar inaikiamu ainawai. Tura asar ni wakeramurin najantsuk, tura katsuram nintimsuk, wári kajechu nunia nampechu nunia maanichu artinuitai. Tura kuikiancha itiur nukapsha achiktajak tuuka nintimsuk pujusartinuitai. ⁸ Tura aints irastas winamtaisha, pengker nintimtusar: Juni wayaata tiartinuitai. Tura pengker aa nunaka mash wakerin artinuitai. Tura pengke nintintin asar, Yusnaka pengker awajartinuitai, tura ni wakeramurinka nepetkartinuitai. ⁹ Tura nekas chichaman nuimiarmaurinka kajinmatsuk nuiniarartinuitai. Tura chikich ainaun nekas chichaman nuininau asar, pengker nintimtikrartinuitai. Tura Yuse chichamenka nekaschawaitai tinauncha nekasampita tiarat tusar nuiniarartinuitai.✠

¹⁰ Yuse chichamen umirchauka judío aints ainamunmasha untsuri irunui. Nuka nangkamiar chichau asar aints ainaun anangkinawai. ¹¹ Nu aints ainau chikicha jeen wayaawar, kuikian nukap achikiartas wakerinak, nu jeanam pujuinaun chichaman nekaschaun nuikiartinawai. Tura asaramtai nuka itatkataram tusam chicharkata.

¹² Nunia aints ni weari ainaun pachis chichaak: “Cretanmaya ainau mash wait chichamtin irunui. Tura yukartinua nunisarang ainawai. Takakmichu ainayat tuke yuj pujuinawai,” timiayi. ¹³⁻¹⁴ Nu tamauka nekasaintai. Tura asamtai Cretanmaya ainau chicharkata: Judío ainau aujmatinamunka pachischarti. Tura nekas chichaman nakitin ainia nuna chichamenka antukcharti, antsu tuke Criston nekasampita tiarti tusam chicharkarta.

¹⁵ Pengke nintintin ainauka Yus ni nintin japiramu asar, mash aa nuna pachisar pengker nintiminawai. Antsu Yusen nekasampita tichau ainauka pasé nintintin asar, ni nintimaurisha tuke paseetai. Tura Yusen umirchau asar, pengker aa nunaka nintiminatsui. ¹⁶ Nuka nangkamiar Yusnawaitjai tinayat, pengker aa nunaka turuwartatkamawar tujintinawai. Tura tunaarintin asar, Yusnaka nakitin ainawai. Tura asar tsuutmai ainawai.

2

Pengker nuikiartamu pachis etserkamuri

✠ 1:4 (2.Cor. 8.23; Gál. 2.3) ✠ 1:9 (1.Tim. 3.2-7)

¹ Uchiru, chicham pengker nuikiartakum amesha tuke etserkata. Antsu Yus tachamuka etserkaip. ² Juun ainausha tu nuiniarta: Nuka nampechu tura nakurichu pengker nintintin artinuitai. Tura Yusen nekasampita tusar pengker umirin tura aneenin artinuitai. Tura itiurkachmin pujuinaksha nepetin artinuitai tusam, juun ainauka tu nuiniarta. ³ Tura nuwa juuntach ainausha ujakarta: Yus umirkuram pengker pujustaram. Tura chikich ainou tsanumrairap, tura nampekairap. Antsu chikich ainou pengker pujusarti tusaram atumsha pengker pujustaram tusam ujakarta. ⁴ Tura yamaram aishrintin ainauka: Aishrumsha tura uchirmesha aneetaram tusaram nuiniartaram. ⁵ Tura waurtsuk pengker nintimin ataram. Tura atumi jeen pujuinauka pengker wainkataram. Tura chikich ainausha wait anentratararam. Tura aishrumsha umirin ataram tusam ujakarta. Nuwa tu pujuinamtaikia, chikich aints ainausha Yuse chichamen pachisarka: Paseetai tichartinuitai.

⁶ Nunia natsa ainausha ujaakum: Waurtsuk pujustaram tita. ⁷ Uchiru, amesha pengke aints akumningkia, chikich aints irunusha ame pengker turamurmin waitmakar amin pachitmasar: Pengkerapi pujawa turamartinuitai. Tura nuuniakum, pengker nintimsam nakurutsuk pujusam aints ainauka nuiniarta. ⁸ Nu turakminka atumin kajertamin ainauka: Nekas chichaman nuikiartinawai tusar, natsaarar atumin pachitmasar pasé chichamnaka chichaschartinuitai.

⁹ Inati ainausha ujakta: Inatmin pengker umirkataram. Tura ni wakeramuri mash umirkuram aitsuk pujustaram. ¹⁰ Tura kasamkairap. Antsu pengké kasamsuk pujusrum inatmin miatrusrumek umirkataram tusam chicharkata. Nu turakminka chikich aints ainou nu aintsu inatiri nekas pengker pujaun wainkar: Yus iin uwentikramratnu chichame nekas pengkerapita tiartinuitai.

¹¹ Yus aints ainautinka wait anentrantau asa, mash uwentikramratas wakerutmaji. ¹² Yuska iin wait anentramu asa, tunau aa nuka mash inaisatararam tusa, tura ju nungkanam pasé aa nuka wakerutsuk asatararam tusa, antsu pengker nintimsaram ju nungkanam pujusrum, paan nintimsaram tuke Yus umirkuram pujustaram tusa iinka nuitamji. ¹³ Ii Yusri nekas juun aa nu, tura Jesucristo iin Uwentikramratin aa nuna tatin kintari jeati tusaram, pengker nintimsaram wara warat nakastaram. Ni wantinkatniuri nekas pengker atinuitai. ¹⁴ Cristo iin tunaanumia uwentikramratas tura ii tunaarin mash sakturmartas: Wína aintsur ataram tusa, tura nekasrum pengker aa nuke turatararam tusa ningki wakerak jarutramkamiaji.✠

¹⁵ Uchiru, wi taja nuka amesha nunismek nuiniarta. Tura Yuse kakarmarijai ju chichamka aints ainou nintimtikrarta. Tura natsaamsuk chicharkarta. Nunia aints ainou wina pachitsar pasé chichartukarai tusam pengker pujusta.

3

Cristonu ainou umirmaurin pachis timiauri

¹ Uchiru, Cristonu ainou apu chichamen umikiarti tusam nintimtikrarta: Nu umirkurmeka nekasrum pengker pujustinuitume. Nu turakrum pengker aa nuka mash takakmastinuitume tita. ² Tura chikich ainou pachisar pasé chichatsuk asarti tusam chicharkarta. Tura tsanumnaitasuk, tura kajernaitasuk, antsu mash aints ainoujai pengker nintimtunisar pujusarti tusam nintimtikrarta.

³ Iisha yaanchuikia nintinchau ayaji. Turasha Yus umirchau ayaji. Tura iwianchi inatiri asar, ii wakeramuring nuke nintimsar pujuyaji. Tura pasé takau ayaji. Tura chikich ainoujaisha suwirpiaku jiinisar pujuyaji. Tura asar tsuutnain ayaji. Tura chikich ainoujai pe kajernain ayaji. ⁴ Antsu Yus iin Uwentikramratnuka mash aints ainoutincha wait anentramak anenmau asa, ni anengkratairin nekamtikramamiaji. ⁵ Ii pengker turamuka atsau wainiat, Yuska iin wait anentramak uwentikramramiaji. Yuse Wakani ii nintin pujurtamu asa, entsanam nijarmawa nunisrik yamaram akiinawaitji. Tura asar pujut yamaram jukimiaji.✠

✠ 2:14 (Gál. 1.4; 1.Tim. 2.5-6; 1.Ped. 2.9) ✠ 3:5 (Efes. 5.26)

⁶ Jesucristo iin uwemtikramrau asamtai, Yuska ni Wakanin tuke iijai pujustinun iincha suritramtsuk akupturmakmiaji. ⁷ Tura iincha pengker awajtamak: Atumka Wijai pujustaram tusa, atumi tunaaringkia mash sakaruitai turammiaji. Tura tuke pujustiniun suramsatnua nuke iikia nakaji.

⁸ Wi taja nuka nekasaintai. Tura asamtai Yusnau ainau pengker aa nuna takasarti tusam, tuke kajinmatsuk ju chichamka etserkata tusan wakerajai. Tura ju chichamka pengker asamtai, aints ainau mash juna wakerukartinuitai. ⁹ Antsu aints ainau nangkamiar nintimtsuk chichainamunmaka pachinkaip. Tura yaanchuik juuntan pachisar nangkamiar aujmatinamtaisha nunisha pachinkaip. Tura jiyaniamunmasha pachinkaip. Tura Moisésa aarmaurin pachisar nangkamiar chichainamtaisha nunisha pachinkaip. Aints nangkamiar chichaina nuka pengker pujustinaka yaingkratinatsui.

¹⁰ Aints Cristonu ainau kanakar pujusarti tusar nintimtikinamtaikia nu aintska chicharkata. Tura antinachmataisha ataksha chicharkata. Antsu pengké tujinkam, nu aintska iruntramunmaya jikim akupkata. ¹¹ Nu aintska nekas chichamnaka inaisaru asar tuke pasé pujuinawai. Tura ningkikia: Tunaawitjai tumamtsuk pujuinau wainiat, nu aints ainauka ningki wiasmamkartin ainawai tusam paan nekaamawaitme.

Aints ainaun pachis chicham akuptukmauri

¹² Wisha Artemasan akuptuktasan nintimjai. Niin akupachkunka Tíquicon akuptuktatjame. Ni jeantai, amesha wári wína ingkunkatasam Nicópolis yaktanam winita. Yumanch winamtaikia, nuni pujuschatjash tu nintimjai. ¹³ Papin nekau Zenas naartin Yuse chichame etserin Apolosjai tsanias jeantai, nu jimiar aints yaingta. Tura yuumatsuk wekaasarti tusam yuumamurisha susarta. ¹⁴ Cristonu ainau nangkamiar pujusarai, tura chikich ainauncha pengker awajsarti, tura yuuminaun yaingtinasha nuimiararti tusan wakerajai.

Yus yainmakarti timiauri

¹⁵ Wina irutkamur mash amin pengker pujusta tusar chichaman akupturminawai. Cristonu ainau iin anenminak pujuina nu pengker pujustaram tita. Atumnasha mash Yus yainmakarti. Maaketai.

☆ 3:12 (Efes. 6.21-22; Col. 4.7-8) ☆ 3:13 (Hech. 18.24; 1.Cor. 16.12)

Pablo Filemónkan Papin Akuptukmauri

Chicham akuptukmauri

¹ Wiitjai Pabloitjai. Cristo Jesúsá inatiri asan, kársernum achikmau pujajai. Tura ii yachí Timoteosha wijai pujawai. Yatsur Filemónka, ame wijai metek Yuse takatri takakmin asam, iinu aneetiri yachiinme. Tura asakmin ju papin amin aatjame. ² Tura Cristonu ainau Yuse chichamen antukartas ami jeemin iruninauncha ju papin aaran akuptinajai. Tura ii umajin Apian, tura ii yachí Arquipon, iijai tsaniasar Yuse takatrin kakarman takakmasaru asaramtai, ju papin aaran akuptinajai. ³ Ii Apaachiri Yus tura ii Apuri Jesucristo atumin yainmakarti tusan, tura pengker nintimsar angkan pujustinasha suramsarti.

Filemónka wait anengkratairi

⁴⁻⁵ Yatsuru, amesha ii Apuri Jesús nekasampita tinu asakmin, tura Cristonu ainausha aneau asakmin, wikia amin nintimsan wina Yusrun seaknasha tuke maaketai tajai. ⁶ Tura wi Yusen seakun, chikich aints ainau ami chichamin antukar nekasar Yusen nintimsar pujusarti tusan seajai. Tura Cristo iin pengker awajtamsamijai nu mash nekamtikramati tusan Yusnaka seajai. ⁷ Yatsuru, Cristonu ainau aneau asakmin wisha waraajai. Tura Cristonu ainau pengker nintimtikrau asakmin, wisha pengker nintimsan pujajai.

Pablo Onésimon pachis Filemónkan seamuri

⁸⁻¹⁰ Wikia Cristo akupkamu asan, wi wakeraknaka: Nu turata timinuitjame. Antsu wi amin aneau asan, nunaka tajame: Wikia juuntach asan, tura Cristo Jesúsá inatiri asan, kársernum engkeamu pujau asan: Onésimo wait anentrata tusan seajme. Wi kársernum pujai, Onésimo juni taa, wi etsermaurun antuku asa, yamaikia Cristonuitai. Tura asa winia uchirua nunisketai.

¹¹ Onésimo yaanchuikkia aminu inatiram ayat tupikiakmiayi. Tura asa amincha yainmakchamiayi. Antsu yamaikia wína yaintak pujawai. Tura asa amincha yainmaktinuitai. ¹² Tura yamaikia awangtuktatjame. Ameka wína wait anentrau asam, Onésimo wiya nunismek jeemin jukita. ¹³ Wi Yusnum uwemratin chichaman etseru asan kársernum pujamtai, tura ameka arák pujau asam, winaka yainkachmin asakmin, nuka wini pujus yainkati tusan wakerimjai. ¹⁴ Antsu amin ujatskeka nunaka turachmin nintimrajai. Turamtai ame wakerakmeka, amek nintimsam wait anentrakmeka: Ni amincha yainmakti tusam, Onésimoka ataksha winaka akupturkatnuitme. ¹⁵ Onésimo yamaikia amijai tuke pujustin asa, jumchik kinta amincha ukurmakchamasha tu nintimsan pujajai. ¹⁶ Antsu wína inatiruitai tuuka yamaikia nintimsaip. Antsu yamaikia nuna nangkamasang wína aneamur yatsuruitme tu nintimtusta. Wisha junaka nukap anejai. Antsu ami inatiram asamtai, tura yamaikia Yusnau asamtai, wína nangkatusmek amesha nukap aneetnuitme.

¹⁷ Ameka nekasam wína yatsur akumka, wína anenme nunismek jusha ami jeemin jukita. ¹⁸ Turakum tunau turamuri amatisha tsangkurata. Tura tumash amataisha, akirkata tutsuk antsu wína tukumrukta. ¹⁹ Turakmin nekasam akiktatjame tusan, wína uwejruijai juna aarjai. Antsu ameka wína etsermaur antuku asam, tura pujut nangkankashtin jukin asakmin, tuke tumashitme timin ayatun wikia nunaka tatsujme. ²⁰ Yatsuru, ame ii Apuri Cristonu asam, wait aneamur pengker nintimsam Onésimo jeemin jukim nintir waramtikrusta.

²¹ Wi taja nunaka mash miatrusang umiktatui tusan, amincha aatkun pujajme. Tura wi seajme nuna nangkasmek nekasam umiktatme tusan amincha nekajme. ²² Nuniasha tajame: Atum wína Yus seatrau asakrumin, atumin wi winitnuncha Yus tsangkatruktatui tu nintimjai. Tura asamtai wi ani jean, pujustinur iwiarturata.

☆ 1:2 (Col. 4.17)

Yus yainmakarti timiauri

²³ Epafras, Cristo Jesúsnau asa, wijai kársernum engkeamu puja nusha: Pengker pujusti tusa chichaman akupturmawai.✠ ²⁴ Tura Marcoscha, tura Aristarcosha, tura Demascha, tura Lucascha, wína takatrun yaintin ainia nusha: Pengker pujusti tusar amincha chichaman akupturminawai.✠

²⁵ Ii Apuri Jesucristo atumniasha yainmakarti. Maaketai.

Hebreos Ainamunam Papin Akupkamuri

Yus ni Uchirijai iin chichartamkamuri

¹ Yus yaanchuikia ni chichame etserin ainaun untsurin niish niish yaktanam wina chichamrun etserkarti tusar akupkamu asar, ii juuntri ainaun nekamtikiawarmiayi. ² Antsu ni chichamen etserin ainaun akupak umis, inangnamunam ni nekas Uchirin iin chichartamkat tusa akupturmakmiaji. Nu nangkamtaik ni Apaachiri mash nungkanam aa nuna najanmantikiamiayi. Tura uchirin chicharak: Ame najanamu aa nu mash inau ata timiayi. ³ Ni uchiri nekas Yusea nunisketai. Yus pengker asamtai, ni uchirisha nekas pengkeraitai. Tura asa ni Uchirisha aya chichasang mash najanamiayi. Tura yamaisha ni kakarmarijai mash nunisang ati tusa wainui. Tura aints ainauti tunaarin japitramratas jarutramkau asa, ni Apaachiri untsurinini apu keemtainum keemsamiayi.

Yuse Uchiri Yuse awemamurin nangkamasang juuntaitai

⁴ Yuse Uchiringkia Yuse awemamuri nayaimpinam pujuinaun nangkamasketai. Nekas Yuse Uchiri asa, Yus ni Uchirin: Mash aa nuna apuri ati tusa inaikiamiayi. ⁵ Yus ni awemamuri ainaunka:

“Ameka wina nekas uchiruitme, ju kintati wina kakarmarun suajme,” pengké tichamiayi. Tura Yus ni awemamuri ainauncha:

“Wikia ni Apaachirinjai. Tura nuka wina Uchiruitai,” tichamiayi. Antsu Uchirinak Yus nunaka timiayi. ⁶ Tura Yuska nekas ni Uchirin kichik amia nuna ju nungkanam akupak: “Yuse awemamuri mash niin: Ameketme juuntam tiarti,” timiayi.

⁷ Tura Yuse awemamuri ainaun pachis tu aarmawaitai:

“Yuse awemamuri ni inatiri asaramtai, Yus nasea nunisang akupawai. Tura ji kapawa nunisang akupawai.” ⁸

⁸ Antsu Yus ni uchirin chicharak:

“Ameka tuke Yus asam, aints ainau tuke mash inawaitme. Nekasam pengker inakratin asam, aints ainau pengker inawaitme.

⁹ Ameka pengker aa nuke aneau asam, tura tunau aa nuka nakitau asakmin, ami Yusrum chikich ainau nangkamasang aminka nukap waramtikramsamiayi,” tu aarmawaitai. ¹⁰

¹⁰ Tura ataksha Yuse Uchirin pachis tu aarmawaitai:

“Apuru, nu nangkamtaik nungkasha tura nayaimpisha najanamiame.

¹¹ Nuka mai mengkakartin ainawai, antsu Ameka tuke pujustinuitme. Nungkasha tura nayaimpisha tarach arut mamuawa nunisarang mengkakartinuitai.

¹² Tura tarachin pijinawa nunismek turatnuitme. Tarachia nunisang nayaimpisha, tura nungkasha yapajiatnuitme. Antsu ameka yapajmiamashtinuitme. Tura asam ami pujutrumka pengké nangkankashtinuitai,” tu aarmawaitai. ¹³

¹³ Tura Yus ni awemamuri ainaun kichkisha:

“Wina untsurunini Apu keemtainum keemsam nakarsata. Ami nemasem ainaun nepetkan, amin umirtamkarti tusan susatatjame,” pengké tichamiayi. Antsu ni Uchirinak nunaka timiayi. ¹⁴

¹⁴ Yuse awemamuri nekasar Yuse inatiri ainawai. Tura aints ukunam uwemrartin ainauka wainkataram tusa, Yus ni awemamuri ainaunka akupawai.

2

Uwemratin chichamka nakitrashtinuitji

☆ 1:2 (Juan 1.1-3; Col. 1.15-17; 1Juan 1.1; Apoc. 19.13) ☆ 1:5 (Sal. 2.7) ☆ 1:7 (Sal. 104.4) ☆ 1:9 (Sal. 45.6-7) ☆ 1:12 (Sal. 102.25-27) ☆ 1:13 (Sal. 110.1)

¹ Cristo Yuse awemamuri ainaun nuna nangkamasang juun asamtai, mengkakai tusar Yuse Uchiri pachisar antukmiaji nuka pengker umirkatnuitji. ² Yus yaanchuik ni awemamuri ainaun akupak: Wina chichamrun umirtukarti tusa akupkamiayi. Tura nu chichaman akatar akupkama nunaka aints ainau umirtsuk pujuinau asaramtai, Yus nuna wainak Ni tímia nunisarang wait wajaktiniun susarmiayi. ³ Tura asamtai Yuse Uchiri iin uwemtikramratas jarutramkau asamtai ¿nu chicham pachiachkurkia itiur uwemratjik? Nu nangkamtaik uwemtai chichaman etserkama nuka ii Apurintai. Nunia ni chichamen antukaru ainauka nekasaintai tusar iincha ujatmakarmiaji. ⁴ Tura asamtai aints ainau Cristo chichamen nekaawarti tusa, Yus ni kakarmarijai aints wainchati takatnasha, tura aintska turachminnasha untsuri turamiayi. Tura Yuse Wakani Yus wakera nunisang ni kakarmarin, tura ni nekamtairincha aints ainautin kichik kichik suramsamiaji. Tura asamtai aints ainau ii Apuri chichamen pachisar nekasampita tiartinuitai.

Jesucristo ii yachiiya nunisang wajasmauri

⁵ Yus ni awemamuri ainaun: Nungka ukunam atinua nu inartaram tichamiayi. Antsu ni Uchirinak: Mash aa nu inarta timiayi. Iikia ukunam nungka yamaram atin pachisar chichaaaji. ⁶ Tura David yaanchuik Yusen chicharak tu aarmiayi:

“Aintsti mianchau arincha, ¿waruka timiatcha anengkratme? Aintsti jakartin arincha ¿waruka timiatcha nintimkartusmesha pujame?✠

⁷ Aints ainautikia yamaik jakatin asakrin, antsu ame awemamurmeka jakashtin asaramtai, aintstin nangkasmek pengker najanamiamie. Turayatum aintstinka amea tumau najakratau asam, timiá pengker awajkartusmiame. Tura mash najanamuram ainaun aints ainauti inararti tusam tsangkamkamiame.

⁸ Tura mash najanamuram ainau aintsti ainautin umirkarmi tusam najanamiamie.” David tu aarmiayi.✠

Tu aarmau asamtai, Yus mash najanamu ainauka niin umirkartinuitai. Turayatur yamaikia nuka waitnuju. ⁹ Tura ii wainkamiayi nuka Jesúsayayi. Nuka aints wajasu asamtai, Yuse awemamuri ainau jumchik musach Jesúsán nangkamasarang juun wajasarmiayi. Tura Yus aints ainautin timiá anenmau asa, Jesús jakati tusa wakerimiayi. Tura waitnas jarutramkau asamtai, yamaikia mash ainia nuna Apuri ati tusa, Yus Jesúsán inaikiamiayi.✠

¹⁰ Yus: Mash najanamu ainaun wína umirtukarti tusa wakerawai. Tura ni uchiri ainaun mash ni pujutirin nayaimpinam jearti tusa wakerawai. Tura asamtai ni Uchiri Jesús mash aints ainauti uwemtikramratin aa nuna waitkasar maawarti tusa, Yus tsangkamkamiayi. ¹¹ Yuse Uchiri aints ainautin: Nekasrum tunaarinchau ataram tusa iin yainmaji. Tura asamtai Yusnum akiinau asakrin, ninu ainautinka Jesúska: Wína yatsur ainawai tusa natsantramatsji. ¹² Yaanchuik David nuna pachis tu aarmiayi:

Jesús ni Apaachirin chicharak: “Wína yatsur ainaun amin pachisan ujaktinuitjai. Tura amin umirtamkaru ainaujai iruntran kantan kantamruatnuitjame,” timiayi.✠

¹³ Nuniasha chikich Yuse chichame etserin aarmau nintimrarmi. Jesús iiya nunisang nintimias:

“Yusen pengker nintimtustajai,” timiayi.

Nunia ataksha:

“Yus ni uchiri ainaun wína surusmia nujai wikia juni pujajai,” timiayi.✠

Yuse chichame etserin Jesúsán pachis tu aarmiayi.

¹⁴ Aints ainauti namangtin tura numpentin ainiaji. Tura asamtai Jesús aints wajas, ni numpesha tura ni namangkesha iiya nunisang asa, Satanásan nepetkatas jarutramkami-aji. Satanás aints ainautin tuke jatan sukartawai. Tura wainiat Jesús jakau asa, Satanásan nepetkamiayi.✠

✠ 2:6 (Sal. 144.3) ✠ 2:8 (Sal. 8.4-6) ✠ 2:9 (Fil. 2.8-9; Hebr. 12.2) ✠ 2:12 (Sal. 22.22) ✠ 2:13 (Isa. 8.17-18) ✠ 2:14 (1.Juan 3.8)

¹⁵ Aints ainau achikmawa nunisarang tuke jatan shaminawai. Turayat Jesús jatan nepetkau asamtai, yamaikia ni umirkau ainautin jatan shamtsuk pujusarti tusa angka awajtamsamiaji. ¹⁶ Tura Jesús Yuse awemamuri ainaun yaingtaj tusangka tachamiayi. Antsu ii Abrahamama weari asakrin, mash aints ainautin yainmaktas tarutrammiaji. ¹⁷ Tura asa Jesús aintstia nunisang amiayi. Tura aints wajas iin wait anentramau asa, tura ni Apaachirin miatrusang umirkau asa, tura ni jakamurijai aintsti tunaarin sakturmaru asa, sacerdote juuntria nunisang iin pachitmas Yusen seatramji. ¹⁸ Jesús ningki wait wajaku asa, tura Satanásjai nekapnaisau asa, yamaisha Satanás iin: Tunau turataram turamkurnisha, Jesús tuke inaitamtsuk iincha yainmaktinuitji.✠

3

Jesúska Moisésan nangkamasang juuntaitai

¹ Jesús nekasampita tinu ainautirmin, Yus winar ataram tusa, iin eatmakmiaji tusaram, Jesús nekasrum nintimrataram. Jesúska nekas Yus akupkamuyayi. Tura ni aintsri ainautinka tuke yainmaktas, sacerdote apuria nunisang ni Apaachiri Yusen seatramji. ² Tura asamtai Yus ni Uchirin sacerdote apuria nunisang ni aintsri ainautin yaingkiarti tusa akupturmaku asa, Jesúska Moisésa nunisang ni Apaachirin miatrusang umirkauyayi. ³⁻⁴ Yaanchuik Moisés pengker awajsarmiaji nuna nangkamasrik Jesúska timiá pengker awajsatnuitji. Jea jeamin nintimrarmi. Jean jeamnuka jean nangkamasang pengkeraitai. Yus mash aa nuna najanau asa, aints jean jeamnua nunisketai. Tura Jesús Yuse Uchiri asa, Moisésan nangkamasang pengkeraitai. ⁵ Turamtai Moiséska Yuse inatiri asa, Yuse aintsri ainaun pengker wainuyayi. Tura ukunam atinua nuna pachis chichaman etsernuyayi. ⁶ Antsu Cristo Yuse Uchiri asa, Moisésan nangkamasang juuntaitai. Tura Cristo tuke inaitsuk Yuse aintsri ainautin waitmin asa, Cristonu ainauti Apurintai. Tura asamtai tuke inaitsuk Cristojai tsaniasar tuke nayaimpinam pujustatjiapi tusar, ni tatintri warasar nakakur pujakrikia, Yuse jea tumawaitji.

Yuse uchiri ainautikia ayamsartin ainiaji

⁷ Tura asamtai yaanchuik Yuse Wakani tu aamtikramiayi: “Yamaikia Yuse timiauri antukrumka, ⁸ nakitsuk pengker anturkataram. Ii juuntri ainau yaanchuik aints atsamunam wekainayat, Yuse chichamen nakitrarmia nunisrumka nakitirairap. ⁹ Tura asamtai Yus ii juuntri ainaun chicharak: Atumi juuntri ainau wína pasé awajtinak kajtukarmiayi. Tura cuarenta (40) musach aintska turachmin turai waitinayat nakitruarmiayi. ¹⁰ Tura asaramtai nu aints ainaun kajerkaran: Nuka tuke nintinchawa nunisarang asar, wína chichamrun umirtutan nakitinawai timiajai. ¹¹ Tura kajerkaran chicham yapajiachminun chicharinakun: Wi Yus asan, pengke nungkanam tuke pujustinaka tsangatkash-tatjarme, timiajai. Yus timiayi.” Tu aarmawaitai.✠

¹² Yatsur ainautiram, atumka pasé nintimsaram, Yus tuke iwiaaku puja nuna umirtan inaisai tusaram aneartaram. ¹³ Tura asaram chikitirmesha tunau wajasai tusaram, tura Yus kajertukai tusaram, yamaisha Yus atumi tunaarin tsangkutramratin asamtai, tuke kintajai metek pengker nintimtunisrum pujustaram. ¹⁴ Nu nangkamtaik Cristo umirkur pujusmiaji nunisrik tuke metar umirkurkia, Nijai tuke tsaniasar pujustinuitji. ¹⁵ Tura asamtai Yuse chichame tu aarmawaitai:

“Yamaikia Yuse timiauri antukrumka, nakitsuk pengker anturkataram. Ii juuntri yaanchuik aints atsamunam wekainayat, Yuse chichamen nakitrarmia nunisrumka nakitirairap,” tu aarmawaitai.✠

¹⁶ Turamtai Yuse chichamen antinayat, ¿Yusen kajerinak: Waketkimi tiarmia nusha yaa aintsua armiayi? Ii juuntri ainau Moisés Egiptonmaya jiikmia nu aints armiayi. ¹⁷ Tura cuarenta (40) musach Yusen umirinachu asar, Yusen napchau nintimtikrarmiayi. Tura nu aints ainau tunau turinau asar, aints atsamunam kajingkiarmiayi. ¹⁸ Tura

chichaman yapajiachminun Yus chichaak: “Wikia nekas Yus asan, pengke nungkanam tuke wijai angka pJustinaka pengké tsangkatkashtatjarme.” Niin umirinachun nunaka timiayi.✠ 19 Tura asamtai nu aints ainauka Yusen nekasampita tinachu asar, Yusjai pengker pJustinumka jeatatkamawar tujinkarmiayi. Nuka paan nekaamnawaitji.

4

¹ Tura asamtai Yus: “Pengker nintimsaram wijai angka pJustinuitrume,” iin turamu wainiatrumek, Yusnum ayamsatnun nuwakai tusaram aneartaram.

² Yaanchuik nu aints ainaun Yusnum uwemratin chichaman ujakarmia nunisang iincha ujatmakarmiayi. Antsu nu aints ainauka nu chichaman antukaru ainayat, Yusen nintimtinachu asar uwemracharmiayi. ³ Antsu iikia ni chichame nintimtau asar, Yusjai angka Nijai pengker pujusartin ainiayi. Antsu nu chichaman nintimtinachu ainaun pachis Yus chichaak:

“Wi Yus asan kajerkaran chicham yapajiachminun chicharinakun: Wi Yus asan, pengke nungkanam tuke pujustinnaka tsangkatkashtatjarme timiajai,” timiayi.✠

Ii juuntri ainaun pachis tu aarmau wainiat, Yus nu nangkamtaik mash najana umis, angka pengker nintimias ayamsamiayi. ⁴ Ayamtai kinta pachis tu aarmawaitai:

“Yus seis (6) kinta mash aa nunaka najana umis, nunia tsawaar ayamsamiayi.”✠

⁵ Nuniasha tu aarmawaitai: Yus chichaak: “Wijai tuke ayamsatnunka tsangkatkashtatjarme,” timiayi.✠

⁶ Yuse chichame tu aarmau asamtai, aints Yusnum wayaawaru ainauka tuke ayamratin ainawai. Antsu Yusnum yaanchuik uwemratin chichaman antukarmia nuka nu chichamnasha umirkacharu asar Yusnum jeacharmiayi. ⁷⁻⁸ Tura asamtai Josué ii yaanchuik juuntri ainaun pengke nungkanam jeeniar, nuni ayamtikrawaitmataikia, Yus ataksha: Chikich kintati angka pengker nintimsaram tuke ayamsatnuitrume tichau ayi, antsu nukap arus Yus Davidtan tu aarta tusa, ju chichamnaka aamtikramiayi:

“Yamaikia Yuse chichame antukrumka, nakitsuk pengker antuktaram.” Tu aarmau asamtai ¿nu chicham warina takua tawa? tusar nekaawarmi. Yus ataksha chikich ayamtai kinta ati tusa tsangkamkamiayi. Nu kintaka yamai pujaji juwaitai.✠ ⁹ Tura asamtai Yus mash najana umis, pengker nintimias pujumia nunisrik iisha Yuse uchiri asar, angka pengker nintimsar yamaikia pJustinuitji. ¹⁰ Aints Yusjai pengker pujustas, Yus ayamramia nunisang ni takatrin inais ayamratnuitai. ¹¹ Tura asamtai iisha nekasar Yus pujamunam jearmi tusar, Yus pengker nintimtusar kakaram wajastinuitji. Ii weari ainau yaanchuik Yuse chichamen umirkacharu asar, pengke nungkanam jearchamia nunisrik pujusai tusar, angka pengker nintimsar Yusek umirkaru armi.

¹² Yus tuke iwiaaku asa, ni chichamesha timiá pengkeraitai, tura timiá kakarmaitai. Saapi yantari mai ere tsakamua nuna nangkamasang Yuse chichame timiá pengkeraitai. Tura asa aintsu nintin waya, ni nintimaurincha mash, tura ni wakeramurincha mash tu awai tusa paan nekamtikui.✠ ¹³ Tura Yus mash nekau asamtai, Ni najanamu ainautikia pengké kichkisha anumrukchamin ainiayi. Antsu Yus wainmaka mash misuya nunisrik ainiayi. Tura asamtai ii turamuringkia mash Yus ujaktinuitji.

Jesúska junia sacerdote apuria nunisketai

¹⁴ Jesús Yuse Uchiri ni Apaachiri pujamunam nayaimpinam waketki, aintsti tunaarin sakturat tusa, sacerdote apuria nunisang iin pachitmas tuke Yusen seatramji. Tura asamtai tuke inaitsuk Jesúska nekasampita tiarmi. ¹⁵ Tura asamtai iwianch Jesúsán: Tunau turata tamaitiat, Jesús tunaunaka pengké turachmiayi. Iwianch iincha tunau turata turamkurnisha, Jesús yumtin pujamuncha mash nekau asa, iincha wait anen-tramak tuke yainmaji. Tura asa junia sacerdote juuntri nangkamasang Jesús iin tuke wait anen-tramaji.✠ ¹⁶ Yus tuke iin wait anen-tramrau asamtai, iikia pengker nintimsar

✠ 3:18 (Núm. 14.1-35) ✠ 4:3 (Sal. 95.11) ✠ 4:4 (Gén. 2.2) ✠ 4:5 (Sal. 95.11) ✠ 4:7-8 (Sal. 95.7-8)
✠ 4:12 (Efes. 6.17) ✠ 4:15 (Mat. 4.1)

natsaamtsuk Yuska searmi. Tura ii tunaarin sakturmarti tusar, tura itiurkachmin pujakrincha, iin yainmakti tusar Yuska searmi.

5

¹ Sacerdote apuri aints ainaun pachis Yusen seatit tusar, kichkimsar kichkimsar Israel ainamunam inain armiayi. Nuka Yusen seak: Aints ainau tunaarin tsangkurat tusa Yusen seatnuyayi. Tura tangku ainaun maa Yusen suyayi. ² Sacerdote apuringkia aints asar, tura aints itiurkachmin pujuinaun nekau asar, nekachu ainaun tura mengkakarua ainauncha wait anentin armiayi. ³ Tura niisha tunaarinchau pujutan tujintinau asar: Wina tunaarun Yus tsangkururat tusar, tura chikich ainauncha tunaarin tsangkurat tusar, Yusen seartas tangku ainaun maawar Yusen su armiayi.

⁴ Tura aints ningki nintimias: Wikia sacerdote apuri wajastaj tichamnawaitai. Antsu Yusek: Nu ati tusa inaikiatnuitai. Tura asa Aarónkan: Sacerdote apuri ati tusa, Yus ningki inaikiamiayi. ⁵ Tura asamtai Cristo: Wikia sacerdote juuntri atajai, ningki nintimsangka tichamiayi. Antsu Yus chicharak: “Ameka wina nekas Uchiruitme. Ju kintati wina kakarmarun suajme,” ni Uchirinak tu tinu asa, Yus ningki wakerak pengker awajas: Sacerdote apuria nunismek ata tusa inaikiamiayi. ⁶ Tura chikich aarmausha nuwaitai. Yus ni uchirin chicharak: “Melquisedec nuwá eemak sacerdote amia nunismek ameka tuke sacerdote atinuitme,” timiayi. ⁷

⁷ Cristo ju nungkanam aints wajas, wake mesek juutkamaikiak ni Apaachirin seamiayi. Tura seam Yus ni Uchiri seamun antuk kakamtikramiayi. Nunia Yuse wakeramurin miatrusang umirkau asamtai, jakamunmaya inankimiayi. ⁸

⁸ Jesús Yuse Uchiri ayat, aintsua nunisang wait wajayayi. Tura wait wajau asa, ni Apaachirin umirtan nuimiarmiayi. ⁹ Tura pengké tunaarinchautiat waitnas jakau asa, niin umirinak pujuinaun: Wijai tuke nayaimpinam pujusarti tusa uwemtikramiayi. ¹⁰ Tura asamtai Yus ni uchirin chicharak: “Melquisedec sacerdote juuntri amia nunismek tuke sacerdote juuntri atinuitme,” tusa inaikiamiayi.

Jesúsán umirtan inaisai tusaram aneartaram

¹¹ Nu Melquisedec naartinun pachisan chichaman untsuri atumin ujakminuitjarme. Turayatrum atumi kuwishi jampekua nunisrumek pujau asakrumin, yamaikia atumin ujaktatkaman yuumatajrume. ¹² Atumka Yuse chichame mash untsuri musach antuku asaram, chikich ainau nuiniartinuitrume. Turayatrum nu nangkamtaik chicham yumtichu kakarmachu jukitin aa nunaka ataksha nuiturat tusaram yuumarme. Tura asaram uchi kuwirchia tumawaitrume. Kuwirach yutan yuwatatkama yumatau asa muntsunak muntsuyi. ¹³ Tura Yuse chichamen antukartatkama yuumatinauka muntsun muntsuawa nunisarang ainawai. ¹⁴ Antsu nampuaru ainauka yutancha yu ainawai. Nampuaru ainauka yutan yuwinawa nunisarang Criston miatrusarang umirinauka pengkernasha tura tunaunasha paan nekainawai. ¹⁵

6

¹ Tura asamtai nampuarua nunisrik chikich yamaram chicham nuimiaru armi. Tura nu nangkamtaik Cristo pachisar yanchuk nuimiaru asar, nuka ataksha nuimiarchatnuitji. Nu nangkamtaik nuimiarmiaji nuka nuwaitai: Iikia jakawa nunisrik pujau asar, ii nintimauri yapajiar, Yus nekasampita tinu asar, Yuse uchiri ainiaji. ² Nuniasha maaitin nekaatnusha, tura aintsu muuken achikiar Yus seatin nekaatnusha, tura jakamunmaya nantaktin nekaatnusha, tura ji kajintrashtinum wait wajaktin nekaatnusha yanchuk mash nekaamiarme. ³ Tura asakrumin Yus wakeramtaikia, nuna nangkamasrik chikich chicham nuikiarturtinuitji.

☆ 5:4 (Ex. 28.1) ☆ 5:5 (Sal. 2.7) ☆ 5:6 (Sal. 110.4) ☆ 5:7 (Mat. 26.36-46; Marc. 14.32-42; Luc. 22.39-46)
 ☆ 5:8 (Fil. 2.8) ☆ 5:14 (1.Cor. 3.2)

⁴ Tura aints Yus nintimtikramu asa, nusha chichaak: Wikia nayaimpinam Jesúsjai pujustasan wakerajai tayat, tura Yuse Wakani ni nintin engkemau wainiat, ⁵ Yuse chichamen antuku asa, nuka pengkerapita tayat, tura Yus ni kakarmarijai wainchati takatan turamu nekayat, ⁶ nunia: Jesúsán tuke ajapajai tinu asa, nuka Yuse Uchiri Jesúsán numi winangmaunum jirujai jintak maawa nunisang nintimui. Tura asa nu aintska aints antinamunam wishiak: Wikia tuke Jesúsán ajapajai tusa, Yuse Uchirin inatsaru asa, ataksha ni nintimaurin yapajiatatkama pengké tujintawai. Tura asamtai Jesús tuke ajapawairam tusan nunaka tajarme. ⁷ Yus ajan chuprat tusa yumin jitumtikui. Tura aja takau ainau yutanacha yuwaarti tusa, árak araamu pengker tsapait tusa, Yus nungkanka pengker awajui. ⁸ Antsu chikich aja jangkisha, tura narasha nukap tsapau asamtai, nakitakur inaiyaji. Tura asamtai Yusen umirinaunka péngke aja nunisang Yuska pengker awajui. Antsu Yuse chichamen antinayat, Jesúsán tuke ajapajai tinauka yumingkramu ainawai. Tura jangkisha, tura narasha tsapawa nunisarang ji kajintrashtinum ajapatin ainawai.

Tuke inaitsuk Yusek umirkarmi

⁹ Aneetir ainautiram, wikia tu chichaayatnak, atumin pengker nintimtakun: Nekasrum Cristonu asaram uwemratnuitrume tajarme. ¹⁰ Turamtai atum Yus aneau asaram, Cristonu ainau tuke yaingmiarme. Turin asaram yamaisha tuke yayaarme. Tura asakrumin, Yus pengker asa atumi takatrinka kajinmatramtsui. ¹¹ Tura asamtai iwiaaku pujakrum, tuke inaitsuk pengker nintimsaram Yuska umirkataram. Tu pujakrumka nunia jakarmesha atumka mash tuke Yusnum ayamsamnuram tusar iisha wakeraji. ¹² Naki wajasairam tusan nunasha tajarme. Yuska chichaak: “Nayaimpinam wijai tuke ayamsatnuitrume,” timiau asar, Yusnau ainau tuke Yusen nekasampita tusar, nunia jakar nayaimpinam ayamsartas wearmia nunisrumek atumsha ayamsamnuram tusar wakeraji.

¹³ Tura asamtai Yus Abrahaman chicham yapajiachminun chicharak: “Wikia ami wearmin nukap arusan yujratnuitjai. Wikia Yus asan nekasan tajame,” timiayi. Yusen nangkamasang kichkisha pengké atsau asamtai ningki tumamiayi. ¹⁴ Tura Abrahaman chicharak: “Amin nekasan pengker nintimtajme. Tura asan nekasan pengker awajsatatjame. Tura asan nukap arusan ami wearmin timiá untsuri yujratnuitjai,” timiayi. ¹⁵ Yus timiau asa, Abraham nekas jaimias nakau asa, Yus tímia nunaka nukap arus wainkamiayi. ¹⁶ Aints ainauti chicham nekaatasar ¿waitratsuash? takurin, nekas waitratsjai tiartas: Yusjai tajai tinawai. Yus aints ainautin nuna nangkamasang juun asa, tura aintsu nintimaurin mash nekau asamtai, aints ainau nuna tuke tu weenawai. Tu tinu asar nuniangka ¿waitratsuash? tamauka atsawai. ¹⁷ Tura asamtai Yus chichaak: “Nekas chichamrun pengké yapajiashtinuitjai tusan, aints ainau nuna nekaawarti tusan: Wikia Yus asan nekasan tajai,” timiayi. ¹⁸ Tura Yus pengké waitchau asa: “Wi turatatjai,” tímia nu chichamnaka yapajiashtinuitai. Tura: “Wikia Yus asan nekasan tajai,” tímia nu chichamnasha nunisang yapajiashtinuitai. Tura asamtai Cristonu ainautikia Yus seakur: Uwemtikurta tinu asar, pengker nintimsar shamtsuk: Yus waitchau asa, Ni tímia nunaka nekas umiktatuapi titinuitji. Tura uwemrau asar, Yusnum jear iikia ayamsatnuitji titinuitji. ¹⁹ Yuse chichame pengké yapajiachmin asamtai, tura Yuscha pengké waitchau asamtai, iikia nekasar Yuse timiauri nintimsar: Jesús nayaimpinam pujau asamtai, iisha Jesúsnum achitkau asar, iincha ajaprama ukurmatsji tusar nekaatnuitji. ²⁰ Jesús jintan jintamua nunisang ii pujustinun umistas, nunia iin juramkitin asa, nayaimpinam eemak wemiayi. Tura Melquisedec, yaanchuik sacerdote apuri amia nuka, Abrahaman pachis Yusen seaya nunisang Jesúscha iin pachitmas Yusen tuke seatramji.

7

Jesús Melquisedeca nunisang sacerdote wajasmauri

☆ 6:14 (Gén. 22.16-17)

¹ Nu Melquisedec Salem yakta apuri ayayi. Nusha sacerdote asa, Yus nayaimpinam puja nuna umirnuyayi. Tura asamtai iinu yaanchuik juuntri Abraham ni aintsri ainaujai chikich nungkanmaya apu ainaun nepetak nunia waketki Melquisedecjai ingkiunik, Melquisedec Abrahaman Yus yainmakti tusa pengker awajsamiayi. ² Tura Abraham apu ainaun nepetak warinchurin cien (100) jurukin asa, diezan (10) Melquisedecan susamiayi. Melquisedeca naari iiti chichamejaingkia: Pengker inakratin taku tawai. Tura asa ni yaktari Salem inaikiamuyayi. Nuka Angkan pengker pujuti taku tawai. Tura Melquisedec Salema apuri asa, Angkan pengker pujuti apuri taku tawai. ³ Ni aparisha, tura ni nukurisha, tura ni weari ainausha yáki tusar nekaachminuitji. ¿Tura warutik akiinaya? tura ¿nekasash jakaya? tusarsha nekaachminuitji. Tura jakamuri nekachu asar, tuke jakachua nunisrik nintimratnuitji. Tura Yuse Uchiri tuke aints ainaun pachis sacerdotea nunisang Yusen seau asamtai, Yuse Uchirisha Melquisedeca nunisketai.

⁴⁻⁵ Melquisedec timiá juun amia nu nintimrataram. Ii juuntri Abraham apu ainaun nepetkau asa, ni warinchurin jurukin asa, diez (10) Yusnau amia nunaka Melquisedecan susamiayi. Moisés chichaman akupak: “Leví weari ainou sacerdote takatrin takau asar, Yusnau aa nunaka chikich Israel ainamunmaya jukiarti,” timiayi. Tura Leví Abrahamana weari waininayat, Israel ainou ni kuikiarincha, tura ni tangkurincha, tura ni ajanmaya juukmaurincha cien (100) amatai, diez (10) Yusnau asamtai, nunaka Leví weari ainou su armiai. ⁶ Tura asamtai Melquisedec Leví wearincha ayat, Yusnau aa nuna jukimiayi. Turamtai Yus Abrahaman chicharak: “Amin pengker nintimtajme. Tura asamtai nukap arusan ami wearam wina aintsur artin asaramtai, nayaimpinam yaa untsuri iruna nunisnak untsuri yujrartinuitjai. Tura ami wearam ainaun pengker awajsau asamtai, chikich nungkanmaya ainou ami wearmincha pengker awasartinuitai,” tu timaitiat, Abraham Melquisedecan pachis Yusen seatchamiayi. Antsu Melquisedec Abrahaman pachis Yusen seatmiayi. ⁷ Tura Melquisedec Abrahaman pachis Yusen seau asamtai, Abrahaman nangkamasang juuntaitai tusar paan nekaatnuitji. ⁸ Nuniasha Leví weari ainou Yusnau aa nuna jukiariat mash jakatin armiai. Antsu Melquisedecka jakamiayi tu aarchamuitai. Tura asamtai tuke iwiaakua nunisrik nintimratnuitji. ⁹⁻¹⁰ Tura Leví akiintsang, Abraham Melquisedecjai ingkiunik Yusnau aa nuna susau asamtai, tura Leví Abrahamana tirangki asamtai, Melquisedecka Leví nangkamasang juuntaitai. Tura Leví weari ainou sacerdote asar, Yusnau aa nuna Israel ainamunmaya jukiaru wainiat, ii yaanchuik juuntri Abraham nuwá eemak Yusnau aa nuna Melquisedecan susau asamtai, Melquisedec chikich sacerdote ainaun nangkamasang juuntaitai.

¹¹ Israel ainou Yusen umirkarti tusa, Moisés Leví weari ainaun tuke sacerdote arti tusa inaikiamiayi. Yus nuná eemak Moisésan: Yachim Aarón sacerdote juuntri ati tusa chichaman akuptukmiayi. Tura asamtai nu sacerdote takatrijai tunaun nekas sakarmnuitmatikia, nuniangka chikich sacerdotekia Aarónka wearinchuka inaikiachminuyayi. Turayat Jesús tuke pujau asamtai, Yus Jesús chikich sacerdote Melquisedeca tumau tuke nayaimpinam sacerdote ati tusa inaikiamiayi. ¹² Yus sacerdote ainaun yapajiamtaikia, nuniasha Moisés umirkatin chichamsha yapajiamnawaitai. ¹³⁻¹⁴ Warina pachisna taja nuka paan nekaataram: Ii Apuri Jesús Leví wearinchutiat Israela chikich uchiri, Judá naartinu wearintai. Tura Yus Moisésan: Judá weari sacerdote arti tichamiayi. Tu tichau asamtai, Judá weari ainou sacerdote archamiayi. Tura Judá weari ainou sacerdote takatrin takakmichu armiai. Tura asamtai Moisés umirkatin chichamsha yapajiamnawaitai.

¹⁵ Tura ii Apuri Jesús tuke puja nu Melquisedec naartinua nunisang sacerdote asa, chikich sacerdote ainaujai pengké metekchawaitai tusar iisha paan nekaji. ¹⁶⁻¹⁷ Moisés: Judá weari sacerdote arti tichamiayi. Antsu Jesús Judá weari wainiat Yus ni uchirin chicharak: “Melquisedec nuwá eemak sacerdote amia nunismek ameka tuke sacerdote atinuitme,” timiayi.

☆ 7:2 (Gén. 14.17-20)

Tu aarmau asamtai, Jesús jakayat, Yuse kakarmarijai nantakin asa, tura tuke iwiaaku pujau asa, sacerdotea nunisang pujawai. ¹⁸⁻¹⁹ Iikia Moisés umirkatin chichaman sacerdoten pachis akupturmakmia nu umirkur pujayatrik tuuka uwemrachmin ayaji. Tura asakrin Jesúska ni aintsri ainautin tunaarin sakturmaru asa, yamaikia nayaimpinam pujus aints ainautin pachitmas ni Apaachirin seatramji. Tura asamtai iikia nayaimpinam pujustatjiapi tusar Yus seatnuitji. Tura asar Jesúsnaun ainautikia sacerdote ainou: Yus seatrita yamaikia tatsuji.

²⁰⁻²¹ Tura chicham yapajiachminun Yus chichaak: “Wikia Yus asan, nekasan tajai: Wína uchir nekasan sacerdote tuke atinuitai,” timiayi. Tura junia sacerdote ainou jakartin asaramtai, nuna pachiska tichamiayi. Antsu David tu aarmiayi:

Chicham yapajiachminun Yus ni uchirin chicharak: “Wina nintimaurun yapajiashtatjai. Tura wi Yus asan nekasan tajame: Ameka tuke sacerdote atinuitme,” timiayi.

²² Tu timiau asamtai Jesús junia sacerdote nangkamasang juuntaitai taji. Jesús iin uwentikramratas jarutramkau asa, yamaram chichaman akupak: “Wína nekaspita takurmeka, nayaimpinam tuke wijai pujustinuitrume,” tusa chichaman akupturmakmijai nu chicham nekasan umiktinuitji. ²³ Yaanchuik sacerdote ainou jakaar, ni takatrin inaisaramtai chikichnasha inain armiayi. Tura asar untsuri armiayi. ²⁴ Antsu Jesúska tuke jakashtin asa, ni takatrin kichnaka ukurkishtinuitai. ²⁵ Tura tuke iwiaaku asa, ni Apaachirin iin pachitmas seatramu asamtai, aintsti Jesús seakur Yus chichartusta takurningkia, yamaisha tuke uwentikramratnuitji.

²⁶ Tura Jesús tuke iwiaaku pujau asa, sacerdote apuri yuumaji nuka nuwaitai. Niisha pengké tunaarinchau asa nekasan pengkeraitai. Tura tunau ainoujai pujatsui, antsu nayaimpinam Yusjai tuke pujawai. ²⁷ Jesúska chikich sacerdote apuria nuniska atsui. Junia sacerdote apuri ainou kintajai metek tangkun Yusen susartas main armiayi. Turinau asar Yus ni tunaarin tura chikich aints ainou tunaarin tsangkurat tusar seu armiayi. Antsu Jesúska pengké tunaarinchautiat, mash aints ainautin tunaarin tsangkutramratas ningki wakerau asa, kichik jatanak jarutramkamijai. ²⁸ Moisés aints ainou tunaarintin ainou wainiat, tura jakartin ainou wainiat, sacerdote apuri arti tusa inaikiamiayi. Antsu ukunam untsuri musach nangkamaramtai, Yus chicham yapajiachminun ni uchirin pachis chichaak: “Wi Yus asan nekasan tajai: Uchir pengké tunaarinchau asa, tura tuke iwiaaku asa, tuke sacerdote apuri ati,” tusa uchirin inaikiamiayi.

8

Jesús yamaram chichaman itamuri

¹ Wi taja nuka nintimraru armi. Jesús chikich sacerdote apuri nangkamasang juun asa, nayaimpinam ni Apaachiri Yuse untsurinini pujus, iin pachitmas sacerdote apuria nunisang ni Apaachirin seatramji. ² Tura aints ainouka Yus seatai juun jea tarach jeamkamunam Yusen seu armiayi. Antsu Jesúska nayaimpinam iin pachitmas ni Apaachiri Yusen seatramji.

³ Tura aints ainou chichainak: Yus tunaarun tsangkutrurat tusar, tangkurin itaaramtai, sacerdote apuri Yusen susartas tangkurin main armiayi. Antsu Jesúska aintsti tunaarin tsangkutramratas tangku ainaunka maachmiayi, antsu ningki wakerak jarutramkamijai. ⁴ Junia sacerdote ainou tuke Moisés tímia nunisarang tangku ainaun Yusen susartas epeu armiayi. Antsu Jesús Leví wearinchu asa, ju nungkanmaka sacerdote takatrin takaschamnauyayi. Antsu nayaimpinam pujus, sacerdotea nunisang iin pachitmas Yusen seatramji. ⁵ Yus yaanchuik Moisésan nayaimpinam iruna nuna inaktus chicharak: “Ju muranam wainkame nu mash nunismek turata,” tusa akupkamu asa, Yus tímia nunisarang sacerdote ainou jea tarach najanamunam aints ainaun pachisar Yusen seatin armiayi. Turinau asaramtai Yus ukunam nayaimpinam ni Uchiri turatiun aints ainaun nekamtikiatas wakerimiayi. ☆

⁶ Jesús iin uwemtikramrau asa, junia sacerdote ainaun nangkamasang nukap nangkamakuitai. Tura asa aintsti tunaarin ii Apaachiri Yus tuke sakturti, Jesús tinu asamtai, yamaram chicham ukunam atiniun pachis iin chichartamji nuka arut chichaman Moisés akupkamia nuna nangkamasketai.

⁷ Tura asamtai yaanchuik chichaman ii juuntri ainaun umirkarti tusa, Moisés akupkamia nu umirkur uwemramnawaitmatikia, Yuska Jesúsán pachis yamaram chichaman akupkachminuyayi. ⁸ Antsu nu aints ainaun pengker pujuinachun wainu asa, yaanchuik Yuse chichame etserin nu aints ainaun pachis tu aarmiayi:

Ii Apuri chichaak: “Ukunam chikich kinta jeamtai, wikia Israela weari ainaujai tura Judá weari ainaujai yamaram chichaman najanatnuitjai. ⁹ Atumi juuntri yaanchuik pujú ainaun: Wijai wekaasataram tusan, Egipto nungkanmaya jiikiaran, wína chichamrun umirtukarti tusan, chichaman najanamiaja nunisnaka ataksha nu chichamnaka najanashtinuitjai. Wikia Moisésan chicharkun: Wína chichamrun aints ainaun umirtukarti tusan timiaja nunaka tuke umikchau asaramtai, wikia ni juuntri ainaunka pachischamijai,” Yus tawai. ¹⁰ Tura ataksha Yus chichaak: “Musach untsuri nangkamaramtai, Israel ainaujai yamaram chichaman najatatja nuka nuwaitai: Wína umirtuktin chichaman mash ni nintin paan nekamtikiawartinuitjai. Tura asan ni Yusri atinuitjai. Tura asamtai niisha wína aintsur artinuitai. ¹¹ Tura mash wína nintimturinau asar, kichik kichik aints ni weari ainauncha tura ni nungkarin puju ainauncha: Yus tu awai tusarka pengké nuiniarchartinuitai. Tura wína aintsur ainausha mash, uchi ainausha, tura juun ainausha, tura mianchau ainausha, tura apu ainausha winaka nekarawartinuitai. ¹² Tura wína aintsur ainaun wait anentin asan, ni tunaarinka mash sakturan kajinmatkitnuitjai,” Yus timiayi. Tu aarmawaitai.✠

¹³ Yus yamaram chichamrun najanatatajai tinu asamtai, arut chicham umirkatatkamaram tujintau asakrumin, nu arut chichaman Moisés najanamia nuka yamaikia mengkatanak wajasi.

9

Yus seatai juun jea pachis nuikiartamu

¹ Yamaikia arut chichaman Moisés ii juuntri ainaun: Mash umirkataram tusa najanamia nuka tura Yus seatai juun jea tarach najanamunam Yusen searmia nuka yamaikia nintimrarmi. ²⁻³ Yus seatai juun jea japen tesaamuyayi. Nekatkauka Pengker Tesaamu tutai ayayi. Nuni ji keemati kuri najanamu ayayi. Tura Yus inaktustin pang misanam patasmau ayayi. Tura tarachjai tesaamu nitkarin Yus timiá pengker aa nuna pujutiri inaikiamu ayayi.✠ ⁴ Nu tarach nenaamu ayaamas misa kurijai imairamu kungkuti kapartin kentsamu ayayi. Tura kaju juun numi najanamu yantamencha, tura nitkarininisha kuri nujtukmau ayayi. Nu kaju nitkarin muits tiuupich kuri najanamu ayayi. Nuni yutai nayaimpinmaya akupkamu, maná tutain engkeu armiayi. Nunia Aarónka wairi kukaru wainiat, Yus tsapamtikmia nuna nuni engkeu armiayi.

Nunia kaya tauwa tumau Yus umirkatin chichaman Moisésan aatramia nuna nuni engkeu armiayi.✠ ⁵ Tura nu kaju tuntupen Yuse ayamtairi kuri najanamu ayayi. Tura Yuse paaniuri nuni wantinkatin asamtai, tura aints ainaun tunaarin nuni tsangkuratin asamtai, Yuse awemamuri nanamtiniun kuri najanamun jimiar kentsamu armiayi. Tura ni nanapejai Yuse ayamtairin nukú armiayi. Antsu nuka mash nekau asakrumin, nuna pachisnaka yamaikia aatrashtatjarne.

⁶ Nunia Yus seatai juun jea tarachin jeamkar umisar, sacerdote ainaun kintajai metek tesaamu pengker tutainum wayaawar, waring achat mash wainkar, nunia aints ainaun pachisar Yusen seatin armiayi. ⁷ Antsu chikich tesaamunam, Yus nekas pengker puja-muri asamtai, musachjai metek sacerdote apuri ningki aya kichik kintanak waainuyayi.

✠ 8:12 (Jer. 31.31-34) ✠ 9:2-3 (Ex. 25.23-40) ✠ 9:4 (Ex. 16.33; Núm. 17.8-10)

Tura ni tunaarincha tura chikich aints ainau tunaarincha Yus tsangkurat tusa, tangku numpen Yuse ayamtairin uwijmiartas waainuyayi. ⁸ Sacerdote apuri ningki Yus timiá pengker aa nuna pujutirin wain asantai, chikich ainautikia nuningkia wayaachminuyaji. Tura asar arut chichaman aints ainau Moisés umirkataram tusa akupkama nuka umiri-atrik, Yusjai tsaniasar iruntrachminuyaji. Aints ainautiram Yus seatai jea nitkarinka pengké wayaachminuitrume tusa, iinka Yuse Wakani nekamtikramamiaji. ⁹ Tura asantai yamai pujuinautisha nuna taku tawai tusar mash nintimratnuitji. Aints Yusen susartas tangkurin main ainayat: Wína tunaarunka Yus kajinmaki pujawapi, tuuka nintimrachmin armiaji. ¹⁰ Yus Moisésan chichaman akuptak yuta ainaun pachis, tura umuti ainauncha pachis, tura ii namangke nijaamartinasha pachis tímia nuna umirkaru ainayat, aintsti nintimauri yapajiachmin asantai, Yus wína tunaarunka kajinmaki pujawapi tuuka nintimrachmin armiaji. Antsu Yusek ii nintimaurin yapajiamnawaitai.

¹¹ Antsu Cristo taa, sacerdote apuria nunisang wajas, ukunam atiniun pachis yamaram chichaman ujatmakmiaji. Niisha Yuse jeen aints jeamkachmaunum pujus ni takatrin takaawai. Nu jeaka ju nungkanmayanchuitai. ¹² Tura Cristo chipu numpen takuska, tura waaka uchiri numpen takuska, Yus seatai juun jeanam aints jeamkamunmaka wayaachmiyai. Antsu kichik kinta ningki wakerak numparu asa, aintstin tuke uwemtikramratas jarutramak nayaimpinam wemiayi. ¹³ Nekasar chipuncha, tura waaka uchirincha maawar, nuna numpejai aintsu namangken patatkenak peashmatramu asar, tura waakan maawar, namangken epeawar, yukuu yumijai pachimrar nujai aints ainaunka peashmatin armiaji. ¹⁴

Antsu Cristo numpe ii tunaarin nekas sakarminuitai. Ni Wakani jakachminutiat Cristo pengké tunaarinchau ayat ningki wakerak, iin uwemtikramratas jarutramak numparmiaji. Tura asa ii tunaarincha nekas japitramratnuitji. Tura asantai Cristonu ainautikia: Nekasampi wína tunaarunka sakturawaita titinuitji. Tu tinu asar, Yus nayaimpinam puja nuka pengker nintimtusar angka umirkamnawaitji.

¹⁵ Tura asantai Cristo Yusnumia taa, yamaram chichaman najanamiyai. Moisésa chichamejaingkia Yus iinu tunaarinka tsangkutramrachmin asantai, Cristo jaka ii tunaarin tuke akiimiatramkatas jarutramkamiaji. Tura mash aintstin uwemtikramrau asa, Cristo: Nayaimpinam wijai tuke pujusmintrum tinu asantai, nekasar nijai tuke pujustinuitji. ¹⁶ Aints jatsuk pujus papin aar: Wi jakamtai aints ainau wina armaaurun ukunam jiisar nekaawarti tusa ukuu armiaji. ¹⁷ Antsu nu aints iwiaaku pujamtaikia, ni armauringkia umirkashtinuitji. Antsu ni jakamtai: Wi wakeraja nuka umirtuktaram tusa aarmia nuka miatrusrik umirkatnuitji. ¹⁸ Yus yaanchuik Moisésan umirkatin chichaman akuptak: Atumka wína seatkuram: Tunaar japitruurta tusaram, tangku numpe ukartaram timiaji. ¹⁹ Moisés Yus umirkatin chicham mash umirkataram tusa aints ainaun ujakmiyai. Tura nuna umis, waaka uchirin maa tura chipuncha maa, numpen juki yumijai pachimiar, uwija ure kapantin amia nuna engkea, Yuse armaaurincha, tura aints ainauncha mash nupaa hisopo tutaijai peashmarmiaji. ²⁰ Tura chichaak: “Ju numpajai Yus chichaman najanamia nu umikminuitrume” timiaji. ²¹ Tura Yus seatai juun jea nitkarincha mash nu numpajai Moisés peashmarmiaji. ²² Yus Moisésan chichaman akuptuku asantai, tuke mash Yuse jeen amia nunasha numpajai peashmatin armiaji. Tura numpachujaingkia tunauka pengké sakarchamnawaitai.

Cristo jakamurijai tunauka sakarminuitai

²³⁻²⁴ Tura asantai Yus yaanchuik Moisésan akatar akupak: Mash najanata timiaja nuka tangku numpejai peashmarta tinu asantai, sacerdote ainau miatrusarang umirin armiaji. Antsu Cristo ii tunaarin tuuka sakarchamin asantai, ii tunaarin japitramratas, Yus seatai juun jeanam aints jeamkarmia nuningkia wayaachmiyai. Antsu iin pachitmas ni Apaachirin tuke seatramtas Yus pujamunam nayaimpinam wemiayi. ²⁵⁻²⁶ Sacerdote apuri musachjai metek Yus seatai juun jea nitkarin wayaatin kinta jeamtai, tangku

✠ 9:7 (Lev. 16.2-34) ✠ 9:13 (Lev. 16.15-16)

numpen yarak takus waiinuyayi. Antsu sacerdote apuringkia numparchamiayi. Antsu Cristoka ningki numparu asa, tangku numpen yarak takuska nayaimpinmaka jeachmiayi. Tura asamtai nu nangkamtaiknumia aints ainou tuke tunaarintin asaramtai, Yus aints ainou tunaarin sakartas uchirin musachjai metek waitnas jakati tichamiayi. Antsu arut chicham amukatin kinta jeamtai, Jesús aints wajas ningki wakerak: “Aints ainou tunaarin mash sakturtaj,” tusa waitnas jarutramkamiayi. ²⁷ Ii jakatin kinta jeamtai, aintstisha jakatin ainiaji. Antsu nuniangka pengké jakashtinuitji. Tura jaakrincha, Yus aintsti turamunka mash nekaatnuitai. ²⁸ Cristo jakatin kintari jeau asamtai, aintsti tunaarin sakturmartas jarutramkamiayi. Nuniangka ataksha pengké jakachminuitai. Tura aintsti tunaarin akiimiatramkataska ataksha wantinkashtinuitai. Antsu ni uwemtikruriti tusar nakainaunka tuke nayaimpinam jukitas ataksha wantinkatnuitai.

10

¹ Yus: Wina uchir aints ainou tunaarin sakartinuitai, tu nintimrau asamtai, yaanchuik Cristo akiintsang, Moisésan akatar akupak: Musachjai metek tuke inaitsuk sacerdote ainou wina seatinak: Ame aints ainou tunaari japirata tusar, tangku ainaun maawarti tusa akupkamiayi. Tura asamtai musachjai metek tuke inaitsuk nunaka turinayat, aints ainou: Wina tunaarunka tuke sakaruapita tichau armiai. ² Tura aintsu tunaarin Yus sakarti tusar tangku numpejai tuke sakaruitmatikia, nuniangka tangkunka maacharmin armiai. Aints Yusen seatas tangkun mau asamtai, ni tunaarin tuke sakarchau asaramtai, wina tunaarunka tuke sakaruapita tichamin armiai. ³ Antsu musachjai metek tangkun maawaru asar, aints ainou: Wina tunaarunka tuke sakarchawaitai, tu nintimrarti tusa Yus turataram tusa nu chichaman akupkamiayi. ⁴ Tura asamtai waaka uchiri maarkia, tura chipusha maarkia, nuna numpejaingkia aintsti tunaaringkia tuke sakarchamnawaitji.

⁵⁻⁶ Tura asamtai Jesús ju nungkanam taa ni Apaachirin chicharak:

“Aints ainou: Tunaar tsangkuturta tusar, tangku ainaun maawar wina surusarti tusamka ameka wakeratsme. Antsu: Aints ata turutin asakmin, nunia wi jakan aints ainou tunaarinka tuke sakturtinuitjai,” timiayi.

⁷ Nuniangka Apaachirin chicharak:

“Yusru, wina pachitas papinum aarmawa nunisnak, ami wakeramurmin umiktasan taawitjai timiajai,” Jesús timiayi. Tu aarmawaitai.✠

⁸ Tu aarmau asamtai, nunaka taku tawai: Moisés chichaman akupkamu aing aints ainou: Yus wina tunaarun japitruriti tusar, tangkun maawar epeu armiai. Tura wainiat Jesús ukunam ni Apaachirin chicharak: “Tangku ainaun maawar wina surusarti tusamka ameka wakeratsme,” tímia nuka yamaikia aminka tuuka pengkerka awajtamsachartinuitai, taku tawai. ⁹ Nunia Jesús ni Apaachirin chicharak: “Yusru, ami wakeramurmin umiktasan taawitjai,” tu tinu asamtai, nu nangkamtaik tangkun maawar, Yusen susartas epeu armia nuna yamaikia turashtinuitai, taku tawai. Antsu Uchir atumi tunaarin sakturmartas jakau asamtai, ni umirkataram Yus tawai. ¹⁰ Tura asamtai Jesucristo kichik jatan jarutramkau asamtai, Yus iinka tunaarinchawa nunisar pujarin jiirmaji.

¹¹ Sacerdote ainou mash kintajai metek Yusen umirkartas tuke inaitsuk tangku ainaun Yusen susartas main armiai. Tura wainiatrik tuuka tunaarinchawa nunisrikia pujuschamnawaitji. ¹² Antsu Jesucristoka kichik jatanak jarutramkau asa, nunia nayaimpinam Yuse untsurinini apu keemtainum keemsamiayi. ¹³ Tura asa wina nemasur ainaun Yus nepetkati tusa, Jesús nuna nakak pujawai. ¹⁴ Tura Cristo kichik jatanak jarutramak ni aintsri ainautin tunaarin tuke sakturmarmiaji. ¹⁵⁻¹⁶ Turamtai Yuse Wakani Cristo umirkau ainautinka nunasha nekamtikramamiayi. Nuna pachis tu aarmawaitai. Yus chichaak:

“Nukap arusan wina aintsur ainamunam yamaram chichaman najanatattja nuka nuwaitai: Wina umirtuktin chichamrun akupkan ni nintin engketawaran paan

✠ 10:7 (Sal. 40.6-8)

nintimtikrartinuitjai. ¹⁷Yaanchuik wína chichamrun umikcharu pujuarmia nuna tunaarinka mash sakturu asan kajinmatkitnuitjai,” timiayi.✠

¹⁸ Tura asamtai, Cristo aintsti tunaarin tuke sakturmaru asamtai yamaikia: Wína tunaarun Yus sakturati tusarkia, tangku Yus susatasriki maachminuitji.

Yusnum jeamnawaitji timiauri

¹⁹ Tura asamtai yatsur ainautiram umaarutirmesha, Jesús jarutramak numpe numparu asamtai, iikia shamtsuk tura tunauka nintimtsuk ii Apaachiri Yuska seatnuitji.

²⁰ Jesús waitnas jarutramkau asa nunia nantaki, aints jintan jintamua nunisang ni Apaachiri pujamunam wakau asamtai, iikia yamaikia wayamnawaitji. ²¹ Jesús tuke iwiaaku pujau asa, sacerdote apuria nunisang Yusnau ainautin pachitmas tuke Yusen seatramji. ²² Tura Cristo ii tunaarin japitramrau asamtai, yamaikia Yus aujkurkia, nekasar pengker nintimsar: Yus nekas anturtawapi tusar, sacerdote ainau Yusen aujsartas yumi pakuichaujai ni namangken nijararmia nunisrik tunauka nintimtsuk Yus aujsatnuitji. ²³ Tura Yus tímia nunisang nekas umiktatuapi tusar, tuke inaitsuk tu nintimsar Yuse chichame metawaru armi. ²⁴ Tura chikich ainaujai nekasar aneenimi tusar, tura pengker awajnaisami tusar yainiku aarmi. ²⁵ Cristonu ainautikia irunat inaisashtnuitji. Chikich ainau inainamtaisha iikia tuke irunin armi. Tura irunkur kiakanirmi. Tura Cristo tatin kinta jeatak wajasu asamtai tuke inaitsuk iruntrarmi.

²⁶ Iikia Yuse chichame nekas aa nuka nekayatur, nunia iik wakerakur Criston tuke ajapajai takurningkia, ¿yáki ataksha ii tunaarin sakturmarat? Nu takurningkia ii tunaarinka Cristoka pengké sakturmarchatnuitji. ²⁷ Antsu Cristo tuke ajapajai takurkia shamkatnuitji. Tu pujakriki Yus ni nakitin ainaun kajerak ji kajintrashtinum japatnuitai tusar, napchau nintimsar nu kinta jeati tusar nakastinuitji. ²⁸ Yaanchuik Moisésa chichamen umirtsuk pujuinamtai, aints jimiaarchiksha, tura kempatmaksha nu aints pasé turamurin wainkar, apu ainau ujakrum turataram, Yus tinu asamtai, nu aintsun wait anentsuk kayajai tukuar main armiai.

²⁹ ¿Atumka itiur nintimrume? Aints yaanchuik Criston nemartan nangkamayai nunia: Cristo pujut yamarman mash aints ainautin suramsatas jakau wainiat: Nangkami numparmiayi taunka, Yuse Wakani iin pengker awajtamsatas wakera nunaka pachis tsuutajai taunka, Yuse Uchirin tuke ajapajai taunka ¿Yus itiur wait wajaktinasha susashting? Moisésa chichamen umikcharun nangkamasang nu aints ainaunka wait wajaktiniun susartinuitai.✠ ³⁰ Yus chichaak: “Tunau ainaun wait wajaktiniun susatnunka wiitjai tura: Wína umirtutsuk pujuinaun yapaijkiatnunka wiitjai,” timiayi. Nunia ataksha tu aarmawaitai: “Wína aintsur ainau tunaarin nekaratnuitjai,” Yus timiayi. ³¹ Tura Yus tuke iwiaaku puja nuka niin umirtsuk pujuinaunka nekas wait wajaktiniun susartinuitai. Tura asamtai nuka shamrumtinuitai.

³² Antsu atumka yaanchuik Cristo umirkuram pujuyarme nuka kajinmatsuk tuke nintimin ataram. Cristo paan nintimrau asaram, atum nukap wait wajayatrumek Cristo umirat inaisachmiarume. ³³ Tura Cristonu asakrumin, aints ainau wainminamunam atumin pachitmasar pasé chichasarmiayi. Tura atumin pasé awajtamsarmiayi. Nunia Cristonu ainaun pasé awajinamtai, atumsha wait anentakrum yaingmiarume. ³⁴ Turakrum kársernum engkeamu ainaun wait anentakrum yaingmiarume. Tura chikich ainau atumin kajertaminak nangkamiar atumi warinchuri jurutramkiaru wainiatrumek, atumka wake mesetsuk atumi warinchuringkia nintimtsuk warasrum: Iikia Cristonu asar, tura pujut nangkankashtin jukin asar, nuka ii wariri nangkamasang timiá pengkeritai timiarume. ³⁵ Tura asamtai Cristo umirkatnuka inaisairap. Antsu Cristo tímia nunaka nekasampi umiktatua tusaram, nayaimpinam nijai tuke pujustinuitume. ³⁶ Tura Yuse wakeramuri najanatasrum, tura ni tímia nuka jukitasrum, wait wajayatrum jaimiasrum pujustinuitume. ³⁷ Yuse chichame etserin yaanchuik tu aarmiayi. Yus chichaak:

✠ 10:17 (Jer. 31.33-34) ✠ 10:29 (Hebr. 13.20)

“Jumchik arus taratata nuka nekas taratnuitai, tura ni tímia nunisang nekas taratnuitai.

³⁸ Antsu wína nekasampita turutin ainauka tuke iwiaaku pujusartin ainawai. Antsu wína umirtutan inaisar pujuinauka winaka waramtikruschartinuitai,” timiayi. ☆

³⁹ Antsu iikia Yuska inaitaka nakitaji. Tura asar iikia mengkaakatniunmaka wechartin ainiaji. Tura Yus nekasampita tinu asar uwemrartin ainiaji.

11

Yus nekas nintimtustin

¹ Yus nekasampita takurkia, Yuska wainchayatrik nekas pujawapi taji. Turamtai Yus: Wisha atumin pengker awajsatatjarme, tímia nunaka nekasampi umiktatua taji. ² Ii juuntri ainau Yusen nekasampita tinu asar Yusen pengker awajsarmiayi.

³ Nu nangkamtaik nungkasha, tura nayaimpisha, waring achat ii wainji nunaka atsau wainiat, Yuska ningki nintimias aya chichasang mash najanamiayi. Nuka tu aarmau asamtai wainchayatrik nekasampita tinu asar nekaji. ☆

⁴ Adánka uchiri, Abel naartin, Yusen nekasampita tinu asa ni Yusen susamuri ni yachí Caín Yusen susamuri nangkamasang pengker amiayi. Tura asamtai Yuska Abelan pachis: Nuka pengkeraitai timiayi. Tura asamtai Abel yaanchuik jakau wainiatrik, Yusen nekasampita timiayi, tu nintimtusar pujaji. ☆

⁵ Ii juuntri Enoc Yusen nekasampita tinu asamtai, Yus nayaimpinam iwiakmiayi. Tura Yus niin jukin asamtai wainkacharmiayi. Tura asamtai Yuse chichame tu aarmawaitai: “Enoc nayaimpinam watsuk nungká pujusang Yusen pengker awajnuyayi.” ☆ ⁶ Tura asamtai Yus nekasampita tachakrikia ¿itiur Yuscha pengkersha awajsatjik? Iisha: Yusjai pujustasar wakeraji takurkia, Yus nekas pujawapi titinuitji. Tura: Wi Yusen nekasan eamtaikia, winaka nekasampi pengker awajtustatua, titinuitji.

⁷ Yamaikia aints Noé naartin nintimrarmi. Yumi jitatsaing: Nujang nukap nu-jangkruatatui, Yus Noén timiau asa, Noésha Yusen nekasampita tusa, ni wearijai uwemrarmi tusar, kanu juuntan najanawarmiayi. Tura kanun takakmak pujus, tuke aints ainaun mash chicharak: “Yus aints ainautin amutmaktatui,” tusa ujakmiayi. Yusen nekasampita tinu asamtai, Yus Noén pachis: Nuka pengkeraitai timiayi. ☆

⁸ Yamaikia Abraham nintimrarmi. Yus Abrahaman chicharak: “Ami nungkarminia jiinkim, chikich nungkanam wi inaktustatjame nuni weta,” timiau asa Abraham: Tuning wetaj tusa nekachiat: Yus nu nungkancha inaktursatatuapi tusa miatrusang umirkamiayi. ☆ ⁹ Tura Yus nu nungkanam weta timiau asa, Yus akupkamaitiat nuni jea, Yusen nekasampita tusa, iraawa nunisang jea tarach najanamunam nu nungkanmasha ninuchua nunisang pujusmiayi. Tura Isaacsha, tura Jacobsha nunisarang jea tarach najanamunam pujuarmiayi. ☆ ¹⁰ Abraham nintimias: Wikia jakanka, Yuse yaktarin nayaimpinam aints jeamkachmaunum, antsu Yus ningki najanamunam wayaatatjapi tusa nuni wekainuyayi. ☆

¹¹ Abrahamana nuwari Sara juunchitiat, tura kaa ayat: Yus timia nunaka nekasampi umiktatua tinu asamtai, Yus uchin jurerti tusa kakarmarin susamiayi. ☆ ¹² Tura Abraham juuntach asa, uchin yajutmarchamin ayat, uchin yajutmaru asamtai, nukap arus Yus tímia nunisang nayaimpinam yaa ainia timiá untsuri yujramiayi. Tura juun entsa yantamen yaikmiria nunisarang nekapmarchamin untsuri yujramiayi. ☆

¹³ Tura nu aints ainau Yus tímia nuna umiatsaing Yusen nekasampita tukamaikiak jakarmiayi. Tura Yus tímia nuna umikchau waininayat: Ii weari ainau ukunam nukap yujarartatuapi tusar warasarmiayi. Tura nintiminak: Iikia ju nungkanmaka iraawa nunisketji tiarmiayi. ¹⁴ Aints tu chichainauka: Ii pujutiringkia juningkia atsawai tusar, chikich nungkan tuke pujustinun eainawai. Nuka paan nekaamnawaitji.

☆ 10:38 (Hab. 2.3-4) ☆ 11:3 (Gén. 1.1; Sal. 33.6, 9; Juan 1.3) ☆ 11:4 (Gén. 4.3-10) ☆ 11:5 (Gén. 5.21-24)
 ☆ 11:7 (Gén. 6.13-22) ☆ 11:8 (Gén. 12.1-5) ☆ 11:9 (Gén. 35.27) ☆ 11:10 (Hebr. 13.14) ☆ 11:11 (Gén. 21.2) ☆ 11:12 (Gén. 22.17)

¹⁵ Tura ni nungkarinia yaanchuik jiinkiarmia nuni waketkiartas wakerinakka, pachitsuk waketkiarmin armiaiyi. ¹⁶ Antsu niisha chikich nungkan nayaimpinam atinua nunak nintimtiarmiayi. Tuminamtai Yus ni yaktarin iwiartur nakau asa: Wikia ni Yusrinjai tutanka natsaamatsui.

¹⁷ Yus Abrahaman: Nukap yujratatjame tinu ayat nekapsatas: ¿Wína miatrusang umir-tukchatpiash? tusa: “Uchiram maam nunia jinam epeam wína surusta,” tinu asamtai, Abraham Yusen nekasampita tusa, ni uchirin maatnun surimkachmiayi. ¹⁸ Antsu Yus Abrahaman chicharak: “Isaaca wearin nukap yujratnuitjai,” tinu asamtai, ¹⁹ Abraham: “Wi uchirun maamtaisha, Yus jakamunmaya ataksha inankitnuitai,” tu nintimramiayi. Tura asa Abraham Isaacan maachiat, nekas jakamunmaya nantaknua nunisang ni jeen jukimiayi.✠

²⁰ Yusen nekasampita tinu asa, Isaac ni uchirin Jacobon nunia Esaúncia ukunam atiniun pachis: “Yuska nukap yujtamrartinuitai” timiayi.

²¹ Jacob juuntach asa, waijai wekaayat, Yusen tuke nekasampita tusa maaketai timiayi. Tura jakatniuri jeatak wajasamtai, José uchirin jimiar amia nunaka ni tirangki asaramtai: “Yuska atumin pengker awajtamsarti,” timiayi.

²² Tura Josésha Yusen nekasampita tinu asa, ni jakatniuri jeatak wajasamtai chichaak: “Israela weari ainau juningkia tukeka pujuschartinuitai. Antsu nukap arus Egipto nungkanmaya jiinink, wína ukunchrunka jukiar, Canaán nungkanam iwiartusarti,” tusa akatmamak timiayi.✠

²³ Nukap arus Moisés akiinamtai, apu faraón tutai Israel ainaun chicharak: “Uchi aishmang yamai akiinauka entsanam ujujntaram,” tusa chichaman akupkau waininayat, Moisésa aparisha tura nukurisha Yusen nekasampita tinu asar, apunka shamkacharmi-ayi. Tura asar uchiri nekas shiiram asamtai, kampakam nantu uukarmiayi.✠

²⁴ Tura faraónka nawantri Moisésan tsakatmarmaitiat, Moisés juunmar Yusen nekasampita tusa: “Faraónka nawantri uchirintai turutiarai tusan wikia nakitajai,” timiayi.✠ ²⁵ Tura asa Egipto nungkanam pengké yuumatsuk nakuru pujuutiat, nu aints ainau Yusen umirchau asaramtai, nujai tsanias pujutan nakitmiayi. Antsu Yuse aintsri ainaujai metek wait wajaktas wakerimiayi. ²⁶ Tura asamtai Cristonu ainaun waitkasarmia nunisang Moisésnasha waitkasarmiayi. Turinamaitiat Moisés: Nuka timiá pengkeraitai tusa: Ukunmaka nekasnapi Yusnum pengker pujustatja, tu nintimramiayi.

²⁷ Tura Moisés Yusen nekasampita tusa, apu faraón kajeramaitiat shamkachmiayi. Tura Yusen wainchayat, Yusen wainua nunisang pengker nintimias Egiptonmaya jinkimiayi.✠

²⁸ Moisés Yusen nekasampita tusa, Pascua fiesta kinta jeamtai, Israel ainaun akatar akupak: “Uwija numpejai jea waitiri yakartaram. Nu turachkurminkia, Yuse awemamuri atumi uchiri eemkaurin maatatui,” timiayi. Moisés tu tinu asamtai, Israel ainau miatrusarang umirkarmiayi.✠

²⁹ Israel ainau Yusen nekasampita tusar, juun entsa kapantin tutain Yus tesaamtai, japen nungka mujurua nunisarang kukarak katingkiarmiayi. Tura Egiptonmaya ain- ausha nunisarang katingkiartatkamawar juun entsan kijiakar mash kajingkiarmiayi.✠

³⁰ Nunia nukap arus Israel ainau Yusen nekasampita tinu asar, siete (7) kinta yakat Jericó tutain tentakni wajainamtai, Yus wenuk wenukmarmaun yumpungmiayi. ³¹ Tura kungkatip Rahab naartin Yusen nekasampita tusa, Israel aints anangkan wekaatinaun shamtsuk ni jeen pujusarti tusa uukmiayi. Tura asa Yusen umirchau ainaujaingkia jakachmiayi.✠

³² Nuniasha Yusen nekasampita tinu ainauka untsuri puju armiaiyi. Gedeónsha, tura Baracsha, tura Sansónsha, tura Jeftéssha, tura Davidcha, tura Samuelsha, chikich Yuse

✠ 11:19 (Gén. 22.1-14) ✠ 11:22 (Gén. 50.24-25) ✠ 11:23 (Ex. 2.2) ✠ 11:24 (Ex. 2.10-12) ✠ 11:27 (Ex. 2.15) ✠ 11:28 (Ex. 12.21-30) ✠ 11:29 (Ex. 14.21-31) ✠ 11:31 (Josué 2.1-21;6.22-25; Mat. 1.5; Sant. 2.25)

chichame etserin ainaujaisha Yusen nekasampita tiarmiayi. Antsu nu aints ainaun pachisnaka kinta atsau asamtai aarchatatjai. ³³ Nu aints ainau Yusen nekasampita tinu asar, chikich nungkanmaya ainaun nepetkarmiayi. Tura Yuse aintsri ainauncha pengker inararmiayi. Tura Yusen nekasampita tinu asaramtai, Yus niincha: Wikia atumin yaingtatjarme timiayi. Chikich aints Yusen nekasampita tinu asamtai, juun yawaa niin yuwaarai tusa Yus jangken epetkamiayi. ³⁴ Nuniasha chikich ainau Yusen nekasampita tinu asar, jinum epewarmaitiat Yuse kakarmarijai uwemrarmiayi. Tura chikich ainaun saapijai maawartas wakerinamaitiat uwemrarmiayi. Tura chikich ainau kakaichau ainayat, kakaram wajasarmiayi. Tura chikich ainau ni nemase ainaun nepetkar papeekarmiayi. ³⁵ Nuwa ainausha, ni uchirin jakaun inankimun wainkarmiayi.

Antsu chikich ainaun Yusen umirin asaramtai, wait wajaktinasha nukap susar maawarmiayi. Tura nu aints ainaun mainatsaing: Yusen umirkashtatjai takumningkia maashtatjame tinamaitiat, Yusen nekasampita tinu asar: Iikia jakarsha nayaimpinam pujustatjai tusar jakarmiayi. ³⁶ Chikich aints Yusen nekasampita tinu asaramtai wishikrar awatrarmiayi, tura jirujai jingkiawar kársernum engkewarmiayi. ³⁷ Chikich aints Yusen nekasampita tinu asaramtai, kayajai tukuar maawarmiayi. Tura chikicha namangkencha serúchjai charukar maawarmiayi. Chikich aints Yusen nekasampita tinu asaramtai saapijai maawarmiayi. Turinamtai chikich ainau entsatiri atsau asamtai, uwija nuwapencha, tura chipu nuwapencha kachumawarmiayi. Tura asar wait wajau armiayi. Tura chikich ainauncha niin pasé awajin armiayi. ³⁸ Yusnau ainau aints atsamunam, tura muranmasha, tura waanmasha, tura nungka taimunmasha waingkiar kanin armiayi, tura tuke wekain armiayi. Nu nungkanmaya ainau nu aints ainaun pachisar: Nuka paseetai tinamaitiat, nu aints ainauka timiá pengker armiayi.

³⁹ Tura mash Yusen nekasampita tusar pengker awajsarmiayi. Antsu Yus: Wína aintsur ainaun susartatjai, tímia nunaka wainkacharmiayi. ⁴⁰ Antsu Yus iincha nayaimpinam juramkitas wakerau asa, Yuse aintsri ainau yaanchuik jakaramtaisha, arumkeka jakamunmayanka inankichmiayi. Antsu nuka ijai metek jakamunmaya nantakiartinuitai, Yus tímia nuka iikia nukap arusar wainkartinuitji.

12

Jesús nintimsarmi

¹ Tura asamtai Yuse aintsri yaanchuik jakaru ainau timiá untsuri Yusen nekasampita tinu asaramtai, iikia nu aints turamurin nekau asar, iisha nunisrik Yuska umirkatnuitji. Tura iinu tunaaringkia waring achat mash inaisar, tuke inaitsuk jaimiasar Yuska umirkaru armi. ² Tura Jesús nintimraru aarmi. Ni aintsritin nangkamasang Yusen nekasampita timiayi. Tura: Wína nekasampita turutinaunka mash uwemtikratan jakatatjai tusa, numi winangmaunum natsanpiaku jakatniunka surimiakchamiayi. Tura ukunam nukap warastin asa jarutramkamiayi. Nunia jaka nantaki, nayaimpinam waketki ni Apaachiri untsurinini apu keemtainum keemsamiayi. ³

³ Tura Jesús naka tunaarinchau waininayat tunau ainau maawarmiayi. Tura asamtai atumka napchau nintimsan pujusai tusaram, Jesús waitnasmauri nintimrau ataram. ⁴ Turaram atumka tunau nepetkatarum Jesús numparmia nunisrumka numparchamiarume, tura tunau nakitajai takurminkia mantamacharmiayi. ⁵⁻⁶ Atum Yuse uchiri asakrumin: ¿Yus atumin turama nuka kajinmakrumek pujaram? Nu aarmauka nuwaitai: “Ii Apuri ni uchirin aneau asa, pengke aints ati tusa wait wajaktiniun susatnuitai.

Tura asamtai uchiru, Apuram amin wait wajaktiniun suramsamtaisha, nunaka nakitajai tutsuk asata, tura napchauka nintimtsuk pujusta.” Tu aarmawaitai. ⁷

⁷ Atum Yuse uchiri asakrumin, Yus atumin: Miatrusrumek umirtuktaram tusa, wait wajaktiniun suramataisha, napchauka nintimtsuk asataram. Uchi ni aparin umirtuk pujam, ¿apari uchirin chichartsukek puja? Atsa. ⁸ Antsu Yus ni uchiri ainaun mash

chicharui. Yuscha atumin chichartamtsuk pujamtaikia, atumka Yuse uchirinchoitruume, antsu chikicha uchiri arume. ⁹ Nuniasha iinu apari ainau nintimrarmi. Ii uchi akurningkia, anturtukat tusar awatamin armiaji. Turutmakrin umirnuyaji. Tura asakrin ii Apaachiri Yus tuke pujustinun suramsatin asamtai ¿warukarik Yuska umirtsuksha pujustajik? ¹⁰ Ii apari ainau ningki nintimsar: Anturtukarat tusar jumchik kinta iin awatamin armiaji. Tura Yuska iincha pengker awajtamsatas wakerutmau asa, wiya nunisrumek tunaarinchau pujustaram tusa iin wait wajaktiniun suramji. ¹¹ Antsu iikia wait wajaktin juwakrikia waraschamnawaitji. Tura wake mesekar napchau nintimsar pujustinuitji. Tura wait wajakrishia, Yus iin nuitamratas wakera nuka nuimiaru asar, angkan pengker nintimsar Yuska umirkatnuitji.✠

Yuse chichamen umirtan nakitajai tiirap

¹²⁻¹³ Tura Yus: Miatrusrumek umirtuktaram tusa, atumin wait wajaktiniun akuptur-maku asamtai, atumin Yus nuitamratas wakera nuka nuimiaru ataram. Tura tupnik nintimsaram, tuke inaitsuk Jesús umirkataram. Tura chikich ainausha Jesús an umirtan inaisartas wakerinamtaisha: Mengkakai tusaram, atum chicharkuram: Atumsha Jesús umirkurmeka mengkakashtinuitruume tusaram kiakartaram.

¹⁴ Atumi tunaari waring achat mash inaisaram Yuska umirkataram. Nuna turinachuka ii Apurinka jiischartinuitai. Tura asaramtai tuke angkan pengker nintimtunisrum mash aints ainaujai maanitsuk pujustaram. ¹⁵ Tura Yus atumin pengker awajtamsatas wakerutmau asamtai, kichkisha Yusen umirtan inaisai tusaram aneartaram. Aints Yusen umirtan inaisaruka chikich aints ainauncha niya nunisarang tunaun turumtikiatnuitai. Tura asamtai atumka tunau wajasai tusaram wainmamkataram. ¹⁶ Tura Yusnau asaram tsanirmawairap. Nuniasha Yus atumin suramsatas wakera nunaka nakitajai, tii tusaram aneartaram. Isaaca uchiri eemkauri, Esaú naartin nunaka turamiyai. Tura Yus niin ukunam susatas wakerimia nuna kichik yuta yuwamujai yapajiamiyai.✠ ¹⁷ Nuniasha Esaú jumchik arus atak nintimiar juutmiyai. Tura aparin Isaacan juutkamaikiak seam, apari ayaak: “Ameka Yusjai tajai timiame nuka yapajiachminuitme,” timiayi. Atumka nusha nekarme.✠

¹⁸ Atumka Cristonu asaram, Israel ainau yaanchuik mura Sinaí tutainum jearmia nunisrumka atsurme. Nu muranam ji keemiayi. Tura asa mukunit tee wajasmiyai. Tura nasesha kakaram nasenmiyai. ¹⁹⁻²⁰ Turamtai Yuse pupuntri kakarman pupuntramun Israel ainau antukarmiayi. Tura chichamnasha antukarmiayi. Chikich chichamsha Yus akupkamia nuka nuwaitai: “Aintcha, tura tangkusha kichkisha ju muranam wekaam-taikia, kayajai tura nangkijaisha maatarame,” tu timiau asamtai, nu chichaman antukar shaminak Moisésan chicharinak: “Wait aneasam, amek Yuse chichame antukta. Antsu Yuska iijai chichatsuk asati,” jakai tusar tiarmiayi. ²¹ Tinamtai Moisés ji keaun wainak, tura mukuntinucha wainak kuraimiayi. Tura chichaak: “Wikia timiá shamau asan kuraajai,” timiayi.

²²⁻²³ Antsu atumka Cristonu asaram, yaanchuik Jerusalén yaktanam Sión muranmasha Yusen seartas wearmia nunisrumka nintimtsurme. Antsu yamaikia Yus nayaimpinam tuke iwiaaku pujau asamtai Yusek tuke seamnawaitruume. Nayaimpinmaka Yuse awemamuri nekapmarchamin irunui. Nuningkia Yuse aintsri naari nayaimpinam aatrarmau ainawai. Tura Yuse umirkaru jakaru ainau wakani pengké tunaarinchau asar nuni ayaminawai. Tura nuningkia mash aints ainau turamurin nekamtikin aa nu pujawai. Nuka Yusetai. ²⁴ Nunia Jesús yamaram chichaman najatramamiyai nuka nuni pujawai. Nuka ni numpe numparmia nujai: Wijai nayaimpinam pujusmintrum tímia nunaka mash umikuitai. Tura asamtai Abela numpe nintimrarmi. Abela numpengka aintsu tunaarinka kichkisha sakarchamnauyayi. Antsu Jesúska aintsti tunaarin mash sakturmartas jaka numparu asa, ni numpengka Abela numpen nangkamasang pengkeraitai.✠

✠ 12:11 (1.Cor. 11.31-32) ✠ 12:16 (Gén. 25.29-34) ✠ 12:17 (Gén. 27.30-40) ✠ 12:24 (Gén. 4.10)

²⁵ Tura asamtai wainkataram. Atumin chichartama nuka Jesúsketai. Ni chichame antutsuk pujusairap. Moisés ju nungkanam pujai, Yus mash umirkataram tusa, chichaman najanau asamtai, aints ainau nu chichamnasha umirtsuk pujuarmia nuka uwem-racharmiayi. Antsu Yus ni Uchirin nayaimpinmaya akupkau asamtai ¿nuna chichame umirtsuk pujakrikia itiur uwemratjik? ²⁶ Yaanchuik Yus ii juuntri ainaun muranam chichaamtai, uuya tumaun nungkan muchkiamiayi. Antsu Yuse chichame etserin nukap arus atiniun pachis tu aarmiayi. Yus chichaak: “Wikia ataksha nungkan uuya nunisnak muchkiatnuitjai. Antsu nungkankeka muchkiashtinuitjai. Antsu nungkanmasha, tura nayaimpinmasha aa nunaka mash muchratnuitjai,” timiayi. ²⁷ Ataksha muchratnuitjai, tímia nunaka: Mash najanamiaja nunaka mesratnuitjai, antsu muchkiashtin aa nunaka mesrashtinuitjai, taku timiayi. ²⁸⁻²⁹ Ii Yusri ji kapawa tumau asa, ni umirin ainautin inatmartinu pujutiri muchkiashtin asamtai, Yuska tuke maaketai tusar, pengker awajkur tunau wajasai tusar tuke umirkarmi. ✧

13

¿Itiur Yus pengker awajsatnuitji?

¹ Atumka Cristonu asaram, tuke inaitsuk aneenitaram. ² Irau taamtaisha, wainchau ayatrumek pengker awajsataram. Nuka kajinmakirap. Yaanchuik Yuse awemamuri irak taamtai, Yuse umirin ainau: Nuka Yuse awemamurintai tusar, nekainachiat pengker awajsarmiayi. ✧

³ Kársernum pujuinausha kajinmatsuk wait anentratararam. Tura atum nijai kársernum engkeamua nunisrumek pengker nintimtusrum pengker awajsataram. Tura chikich aints wait wajainamtaisha atumsha: Nu aintsua nunisnak wisha wait wajaktinuapitja tusaram wait anentratararam. ✧

⁴ Nuwa nuwatnaiyamuka pengkeraitai. Aints ni nuwarijai tsaning kanurтинcha pengkeraitai. Antsu nuwatnaikiaru ainauka kichnaka eakchartinuitai. Tura asaramtai nuwa nuwatchayat tsanirmin ainaunka Yus wait wajaktiniun susatnuitai.

⁵ Yuska iin chichartamak: “Amincha pengké inaisashtatjame. Tura amincha ajapan ukukchatatjame,” turammiaji. Tu turamin asamtai, kuik aneetsuk asatararam. Tura atum tákakrume nuka pachisrum maaketai tusaram, kuik nukapka wakerutsuk asatararam. ✧

⁶ Yus tu turamin asamtai, iisha pengker nintimsar:

“Ii Apuri wína yaintu asamtai, ¿aints turutawartata nunasha warukanak shamkataj?”
timinuitji. ✧

⁷ Tura asakrin atumin Yuse chichamen ujatminak pujusarmia nuka nintimrataram. Nu aints ainauka Criston nekasampita tusar, atumin Yuse chichamen ujatmakaru asar, ni Criston nintimsar pujuarmia nunisrumek atumsha pujustaram.

⁸ Jesucristoka tuke iwiaaku asa, yaanchuiksha tura yamaisha tuke yapaijmiamtsui. ⁹ Chikich ainau ningki nintimsarang atumin nuitamrartas wakerinamtaisha, nuna chichamengka anturkairap. Yus iincha pengker awajtamsatas ii nintincha kakamtikram-ratnuitji. Antsu aints yuta pachisar nuikiartinak: “Nu yuta yutsuk pujakrumka, Yuska pengker awajsatatrumek,” tinayat nunaka nangkamiar tinawai.

¹⁰⁻¹¹ Yaanchuik sacerdote ainau tunaarintin ainau tangkurin Yusen susartas maawarmia nuna namangken yuchau armiayi. Sacerdote apuri tangkun maa, numpen yarak takus, Yus seatai juun jea nitkarin waiinuyayi. Nunia Yus aintsu tunaarin japirat tusa tangkun maawar, namangken yakta aarin jiikiar epeu armiayi. Antsu Jesúska ii tunaarin sakturmartas jarutramkau asamtai, iikia Jesús seu asar, tangkun Yusen susartas main armia nuka pachiatjsi. ✧ ¹² Tura tangku ainaun yakta aari jiikiarmia nunisarang Jesús nasha yakta aarin jiikiar maawarmiayi. Tura asamtai aintsti tunaarin sakturmartas, Jesús jarutramak numpencha numparmiayi. ¹³ Tura asamtai chikich

✧ 12:27 (Hag. 2.6) ✧ 12:28-29 (Mat. 3.12) ✧ 13:2 (Gén. 18.1-8;19.1-3; Rom. 12.13; 1.Ped. 4.9) ✧ 13:3 (Mat. 25.36) ✧ 13:5 (1.Tim. 6.6-10; Fil. 4.10-13) ✧ 13:6 (Sal. 56.3-4,11) ✧ 13:10-11 (Lev. 16.27)

ainau iin nakitraminak, tura wishikraminak pujuinamtaisha, Jesús nasha nunisarang nakitramiayi tusar Jesús nintimraru armi. ¹⁴ Ju nungkaka mash amukatin asamtai, juningkia tukeka pujuschatnuitji. Antsu Yuse pujutirin ukunmaka pujustinuapitji tu nintimraru armi. ¹⁵ Yamaikia tangku ainau Yus susatasrikiya maashitnuitji. Tura asar iin uwentikramrau asamtai, tuke inaitsuk Jesús nintimtusar, ii jangkejai Yus juuntaitai tusar maaketai tiarmi.✠

¹⁶ Nuniasha chikich ainau pengker awajsataram. Tura yuuminak pujuinausha yuumamuri susataram. Nuka kajinmakirap. Nu turakrumka Yus pengker awajrume.

¹⁷ Yusnau ainau juuntri umirkataram. Nuka: Nekasrum Yus pengker umirkataram tusar, atumin waitminak pujuinawai. Nuka Yusnau asaramtai, ni chichamengka umirkataram. Atum pengker umirmaka, nusha warasar atumin pengker waitmakarti-nuitai. Antsu ni umirat nakitamka, nuka wake mesekar pujusartinuitai. Tu pujuinakka ¿atumin itiurak yainmakarti?

¹⁸ Yus seatritaram. Iikia tuke pengker pujustasar wakerakur nekasar angkan nintimji, tu nintimsar pujaji. ¹⁹ Tura Yus seakrum atumjai wainaiiatnun wári tsangkatramkat tusaram Yus seatritaram tajarme.

Yus yainmakarti timiauri

²⁰ Yamaikia nunasha tajarme: Ii Apuri Jesús nekas juun aa nuka uwija wainua nunisang iin waitmaktin asa, iin pujut nangkankashtinin suramsatas jarutramak numpen numparmiayi. Yuska ni uchiri numparmaurin jiis: Yamaikia aints ainau tunaarin tuke sakturartajai, tu nintimramiayi. Tura Yus tuke angkan pengker nintimias puja nuka ii Apuri Jesús an jakamunmaya inankimiayi.✠ ²¹ Tura asamtai atumin pachisan Yusen tu seajai: Yuse wakeramuri miatrusrumek umirkataram tusan, Yus atumin tuke mash pengker awajtamsarti. Jesucristo iincha tuke pengker nintimtikramrau asa, ni wakeramurin mash umisti tusar Cristoka tuke inaitsuk: Ameketme juuntam tiarmi. Tu ati.

²² Yatsur ainautirmin umaarutirmincha nukap aatratnuitjarme. Antsu ainchik aaru asan, chichamrun aarja junaka akatran, atumin akupaja juka wait aneasrum pengker nintimsaram anturtuktaram. ²³ Ju chichamka nekaataram: Ii yachí Timoteo karsernumia jiinki angkan pujawai. Ni wári winimnawaitmatikia, nijai atumin winitatjai.

²⁴ Cristonu ainau juuntri ainautirmincha chichaman akuptajrume. Nunia Cristonu ainautirmincha mash chichaman akuptajrume. Nunia Italianmaya ainausha chichaman akupturminawai.

²⁵ Atumnasha mash Yus pengker awajtamsarti. Maaketai.

✠ 13:15 (Sal. 50.13-14,23) ✠ 13:20 (Luc. 15.4-5; Juan 10.1-16; Hebr. 10.29; 1.Ped. 5.4)

Santiago Papin Akupkamuri

Chicham akupkamuri

¹ Wiitjai Santiagoitjai. Yuse inatirinjai. Tura ii Apuri Jesucristo inatirinjai. Israela uchiri doce (12) amia nuna weari asakrumin, mash nungkanam kanakrum pujuinaitirmin chichaman akuptajrume.✠

Yuse nekamtairin pachis etserkamu

² Yatsur ainautiram umaarutirmesha, waring achat itiurkachmin pujakrumsha pengker nintimsaram tuke warastaram. ³ Yusnau ainau wait wajainamtai, nekas Yusen miatrusarang umirinawai tusar paan nekaawartinuitai. Tura asamtai atumsha itiurkachmin pujakrumsha, pengker nintimsar pujustincha nuimiartinuitrume. Atumka nusha nekarme. ⁴ Antsu tu pujakrumka: Nekasan pengke aints ataj takurmeka, Yus wakera nunisnak pengker aa nunaka mash turatjai tu nintimsaram pujustaram. ⁵ Atumka nekat yuumakrumka, Yus: Nekamtairam surusta tusaram seataram. Yus ni nekamtairin tuke surimtsuk sukartin asa: ¿Warukaya ataksha seatme? tutsuk, aints ainautin mash metek nekamtikramatnuitji.✠ ⁶ Tura Yus seakrumka, nekasampi wina surustatua, tu nintimsaram seataram. Antsu: Chaj suritruktimpiash, wisha nekatsjai, tu nintimsaram Yus seakrumka, nase nasenmatai entsa tamparamuri mai waket mai waket wajawa nunisrumek nintimsaram searme. ⁷⁻⁸ Aints yamai kintati: Nuna wakerajai tusa, antsu kashin: Nunaka wakeratsjai takungka, nekas jimieran nintimu asa, tuke nunisang pujawai. Aints tu nintimkungka: Yus nekas winaka nunaka surustatuapi tuuka nintimrashtinuitai.

⁹ Yuse aintsringkia kuikiartichutiat: Wikia Yusnau asan nayaimpinam jeatatjapi tu nintimias warasminuitai. ¹⁰ Tura kuikiartinka yangkur arumak mina nunisang wári mengkakatin asa: Wikia mianchawaitjai tusa Yusnau asa warasminuitai. ¹¹ Tsaawakamtai tura kakar tsanmati, nupaasha sukuam kakarmachu jajatui. Yangkursha shiiram aa nusha kakarmachu minaayi. Kuikiartincha nunisang waririn surak pujaksha, yangkur mina nunisang mengkakatnuitai.✠

Itiurkachmin pujakrincha Yuska iinka pengker awajtamsatnuitji

¹² Aintsti itiurkachmintrin miatrusrik nepetkau ainautinka Yuska chichartamak: Wina anentin ainautirminka pengker awajsatnuitjarme turamin asa, tuke pujustinasha tsengkrutia nunisang suramsatnuitji. ¹³ Aints tunau turataj, tu nintimias pujakka: Yus tunau turata turutui, pengké tichamnawaitai. Yuska tunau takatnaka aintsun kichkisha nintimtiktsui. Tura asamtai aintsun kichkisha: Tunau turata tatsui. ¹⁴ Antsu aints ni wakeramurin najantan wakerau asa, ningki nintimias: Tunau turataj tusa, tunau turutan wakerawai. ¹⁵ Tura aints pasé aa nuna najanatas wakerau asa tunaun takaawai. Tura tunau takasu asa jakatniunam weawai.

¹⁶ Aneetir yatsur ainautiram umaarutirmesha anangmamawairap. ¹⁷ Nekas pengker aa nunaka mash ii Apaachiri nayaimpinam puja nuka iin akupturmaji. Ni nekas pengker asa, pengker aa nuna suramji. Niisha paaniuncha ningki mash najanamiayi. Antsu niinka teeka atsau asamtai, tuke yapajmiamtsuk paaniunam pujawai.✠ ¹⁸ Yus ningki wakerau asa, eemkaram wina uchir ataram tusa iincha najatmamiaji. Tura ningki wakerau asa, pujut nangkankashtinun suramsatas, ni nekas chichamen akupturmamiaji.✠

Yusen nekasampita tinu ainau turamuri

¹⁹⁻²⁰ Aneetir yatsur ainautiram umaarutirmesha nusha nekaataram: Aints kajea nuka Yusnaka nekas pengkerka awajtsui. Tura asamtai aintsu chichame yaitasar

✠ 1:1 (Mat. 13.55; Marc. 6.3; Hech. 15.13; Gál. 1.19) ✠ 1:5 (Mat. 7.7-11; Juan 16.23-24) ✠ 1:11 (Isa. 40.6-8)

✠ 1:17 (Mal. 3.6) ✠ 1:18 (1.Ped. 1.22-25; Apoc. 14.4)

nekaatnuitji, tura wárikia chichachuitji, tura wárikia kajechuitji. ²¹ Tura asamtai pasé nintimtai aa nuka, tura tunau tuke iruna nusha mash inaisataram. Tura wikia miajuitjai tumamtsuk, Yuse chichame antukmiarume nuka atumi nintin ukusrum nintimrataram. Nu chichamka antuku asaram uwemratnuitrume.

²² Antsu Yuse chichame aya antukrum umirtsuk pujusairap. Aya antukrum umirtsuk pujakrumka, atumek anangmamrume. Antsu Yuse chichame antuku asaram tuke umirkataram. ²³⁻²⁴ Aints Yuse chichamen antayat Yusen umirtsuk pujakka, aints ispin achik yapiin jiimiawa nunisketai. Nuka ispijai yapiin jiimias: Tumawapitja tumamtsuk wári kajinmawai. ²⁵ Antsu Yusen nekas umirak pujakka, nekas pengker angkan pujusminuitai. Yuse chichamengka ispiya tumau asamtai, aints ispin jiiminawai nunisang aints Yuse chichamen tuke kajinmatsuk nintimias pujakka, tura miatrusang umirak pujakka, nekas pengker pujustinuitai.

²⁶ Aints Yusnawaitjai tayat, pasé chichaaka ningki anangmamui. Yuse chichamen umirchau asa nangkami: Wikia Yusnawaitjai tawai. ²⁷ Ii Apaachiri Yus nekas pengker umirkatnuka nuwaitai: Mitaik ainau tura waje ainausha yaingtinitji. Tura ju nungkanmaya ainau wakerina nuka wakerutsuk pujustinuitji.

2

Wait anenairatnun pachis etserkamu

¹ Yatsur ainautiram umaarutirmesha, ii Apuri Jesucristo nekasampita tinu asaram, kuikiartin jisirum: Nuka pengkeraitai tiirap. Tura kuikiartichu jisirum: Nuka mianchawaitai tiirap. ²⁻³ Aints uwejnum wejtai kuri najanamun uwejak, tura wejmak shiirman entsar, atum iruntramunam wayaamtai, tura chikitcha wejmak aruchin entsar nusha nunisang atum iruntramunam wayaamtai ¿itiur nintimtarne? Wejmak pengker aa nuna entsaaru atumka chicharkuram: Juni tutang pengkernum keemita tusaram, antsu chikichka wejmak mamuruchin entsaaru wainkaram: ¿Ani wajasta antsu turachkumka, wína nawernini nungkanam pujusta timinkitrum? ⁴ Tu pujakrumka, ju aintska pengkeraitai, antsu chikichka mianchawaitai, tu nintimsaram pujau asaram, pasé nintimsaram pujarme.

⁵ Aneetir yatsur ainautiram umaarutirmesha antuktaram: Yus kuikiartichu ainauncha umirtuktaram tusa, nekas pengker awajsatas wakerawai. Tura wína uchir asaram, tura wína aneetir asaram, wína pujutirun pengker pujusmintrum wini winitaram. Tura nayaimpinam jearmeka: Atum chikich aints inarmintrum tusa Yuska wakerawai. ⁶ Antsu atumka kuikiartichu ainau natsan ipiatuwearme. ¿Yaachia atumin waitkarmina? ¿Tura yaachia atum kuikiartichu ainautirmin achirmakar apunam akuptamina? Kuikiartin nunaka turinawai. ⁷ Atumka Jesucristo aintsri iruntrumning, kuikiartin ainau Jesucristo naarin pachisar pasé chichainawai.

⁸ Ii Apuri umirkatin chicham timiá pengker aa nuka nuwaitai: “Atumi namangke anearme nunisrumek chikich ainausha aneetaram.” Nu chicham umirkurmeka nekas pengker pujarme. ⁹ Antsu chikich ainau mash metek ainawai tu nintimtsuk pujakrumka, Yus umirkatin chicham umikchau asaram tunau wajarme.

¹⁰ Yus umirkatin chichamka mash umiayatrume, chicham kichkisha umirtsuk pujakrumka, nekasrum umirkatin chichamka mashkia umirtsurme. ¹¹ Tura Yus chichaak: “Tsanirmawairap, tura aints maawairap,” timiayi. Tura aints tsanirmatsuk pujayat, aintsun maakka, Yus umirkatin chichamnaka umitsuk pujawai. ¹²

¹² Tura asamtai atum chichaakrum tura takakmakrum pujakrumsha, tuke Cristo angkan pujustinun suramsatata nu nintimsaram: Winaka jiiruapi tusaram, wisha ni chichamen miatrusnak umirkatasan wakerajai, tu nintimsaram pujustaram. ¹³ Chikich ainaun wait anenchaunaka Yus ni kintari jeamtai, wait anentsuk wait wajaktinum akupkatnuitai. Antsu chikich ainaun wait anenniunka Yus niincha nunisang wait anenratnuitai.

☆ 2:8 (Lev. 19.18) ☆ 2:11 (Ex. 20.13-14)

Cristonu ainau chichakmauri tura turamuri pachis etserkamu

¹⁴ Yatsur ainautiram, umaarutirmesha anturtuktaram. Aints Criston nekasampita tayat, Yuse chichamen umirtsuk pujakka ¿nekas pengkerak puja? Atsa. Yuse chichamen nekasampita tayat, umirtsuk pujakka ¿tu uwemratnukai? Atsa, tuuka uwemrashtinuitai.

¹⁵ Nintimrataram. Aints Yuse namarin entsatiri yuumak pujau wainkaram, tura ni yutairisha pengké atsau wainiatrum, ¹⁶ yutairi suachiatrum: Pengker pujusta, tura tsetsemakum sekmarta, nunia yaparakum nukap yuwata tayatrum ¿nu sutsuk pujakrumka pengkerak turaram? Atsa. ¹⁷ Tura asamtai aints Yusen nekasampita tayat, ni chichamen umirtsuk pujakka nangkami: Wikia Yusen umirnitjai tawai. Tura Yusen umirnitjai tayat, Yuse chichamen umirtsuk pujau asa, jakawa nunisang pujawai.

¹⁸ Aints atumin chichartamak: “Ame Cristo nekasampita tame. Antsu wikia nekasan pengker aa nuna takaajai. Tura ameka pengker aa nuka takatsuk pujayatum nangkami: Nekasan Cristo umirnitjai tame nuna wisha wainkatan wakerajai. Antsu wikia pengkeran takaaja nuka wainkam: Nekasam Cristo umirnitme tusam nekaatnuitme,” titinuitai. ¹⁹ Atumka chichaakrum: Yus kichkitai tarume nuka nekas pengkeraitai, antsu iwianch ainausha Yus kichkitai tinayat, Yusen shaminak kurainawai. ²⁰ Nintimrataram. Aints pengker aa nunaka turichutiat, wikia Cristonuitjai tauka tuuka uwemrachmin asa, jakawa nunisang pujawai. Nu nekachkurmeka nekasrum nintinchau ainiarme. ²¹ Ii juntri Abraham yaanchuik itiurak pujuya nu nintimrarmi. Yus turata tusa akupkamu asa, ni uchirin Isaacan maa Yusen susatas tangku epetinam patasu asamtai, Yus Abrahaman pachis: Nuka nekas pengke aintsuitai timiayi.✠ ²² Nu nekau asaram nintimrataram: Abraham Yusen nekasampita tusa umirnuayai. Tura Yusen nekasampita tinu asa, tura miatrusang umirkau asa, nekas Yusen pengker awajsamiayi. ²³ Tura asamtai Abrahaman pachis Moisés tu aarmiayi: “Abraham Yusen nekasampita tinuyayi. Tura asamtai Yus Abrahaman pachis: Nekas péngke aintsuitai timiayi.” Yus tu tinu asamtai, aints ainau Abrahaman pachisar: Yuse amikrintai tiarmiayi.✠

²⁴ Tura asamtai aints Yusen nekasampita tayat, pengker aa nunaka takatsuk pujaunaka Yuska pengkeraitai tatsui. Antsu aints Yusen nekasampita taunaka, tura pengker aa nuna takaunaka Yuska pengkeraitai tawai.

²⁵ Tura nuwa Rahab naartin nintimrarmi. Nuka yaanchuik kungkatip ayat, nunia Josué aintsri jimiar ni jeen jearantai, nu aintsnaka uukmiayi. Nunia: Mantamawairam atu tupikiaktaram tusa akupkamiayi. Nuna turantai, Yus nu nuwanka pachis: Nuka pengkeraitai timiayi.✠ ²⁶ Tura asamtai nunasha tajarme: Aints ni wakani ukukmiauka jakatnuitai. Tura aints Yusen nekasampita tayat, Yusen umirtsuk pujakka, iwiaakutiat jakawa nunisketai.

3

Aintsu chichaamurin etserkamuri

¹ Wina yatsur ainautiram: Iisha nuikiartin atai tusarmeka, nukapka wakerukairap. Nuikiartin aintai Yuse chichame umitsuk pujakrinkia, Yuska iincha chikich ainaun nangkamasarang nukap wait wajaktiniun suramsatnuitji. ² Iisha mash nuwakar tunausha takau ainiaji. Antsu aints pasé chichamnasha chichatsuk pujakka, nuka nekas péngke aintsuitai. Nu aintska nekas ni jangken metau asa, nekas tunaarinchau pujustinuitai.

³ Kawai nintimrarmi. Kawai inartaj tusar, aints ainau jirujai kawai jangken jingkiatinawai. Tura kawai tu jangken jingkiatawar mai japi mai japi awajmau asa aintsun umirui.

⁴ Nunia kanu juun nintimrarmi. Kanu juun ayat, nase kakarman nasenmatikia, kanu anuntrutiri kawin yairach ayat: Ju weti tusa anuntramasa nunak umirui. ⁵ Ii jangkesha nunisketai. Ii jangkesha yairach ayat, tuke nampuram chichatayi. Jisha nintimrarmi: Ji tuupich ayat, epernasha mash keemaktinuitai. ⁶ Tura aintsti jangkesha jiya nunisketai.

✠ 2:21 (Gén. 22.1-14) ✠ 2:23 (Rom. 4.3,9,22; Gál. 3.6) ✠ 2:25 (Josué 2.1-21)

Aintsti jangke mash tunau ainia nuna nangkamasang nukap tunau turin asa, aints tuke tunau chichakti tusa iinka utsutmaji. Aintsti jangke tungkurua jiri keawa nunisang asa, mash pengker aa nuna mesturmaji.

⁷ Aints ainautikia kuntin ainausha, tura pachim ainausha, tura nanamtin ainausha, tura napi ainausha, tura namak ainausha nepetkatnuitji. Tura asar aints ainauti nuka mash nepetkartin ainiaji. ⁸ Tura mash nepetin ainayatrik, ii jangkengka kichkisha nepetkachminuitji. Aintsti jangkengka tuke ayamtsuk tunau chichaayi. Tura aintsti jangkengka napi tseasri jataya nunisketai. ⁹ Ii jangkejaingkia ii Apaachiri Yuska juuntapita taji. Tura nu jangkejaingkia aints ainou Yus niya tumaun najanamu wainiatrik pasé chicharji. ¹⁰ Yatsur ainautiram umaarutirmesha nintimrataram. Ii jangkejaingkia Yuska juuntapita tayatrik, nunia aints ainou pachisar pasé chicharji nuka pengké turachminuitai.

¹¹⁻¹² Yumi pukuni nintimrarmi. ¿Kichik entsawach nungkaya pukuni jiiinmaunum yumi pengker nunia yapakujai pachinir jiiinuak? Atsa, nuka tumatsui. Yumi yapaku jiiinmaunum péngke yumikia jiiintsui. Yatsur ainautiram umaarutirmesha, numi nereshanintimrarmi. ¿Higuera nereak olivo neren nereawak? Atsa. ¿Tura uva yurangke higon nereawak? Atsa, nunaka pengké tumatsui. Tura asantai pengke nintintin ainouka nunisarang tunau chichamnaka chichainatsui.

Pengker nekamtikiamu pachis etserkamu

¹³ Atum nekau akurmeka, Yusnumia nuimiaru asaram: Wisha miajuitjai tumamtsuk ¿antsu pengker aa nuna itiur takastajak? tu nintimsaram pujustaram. Turakrumin chikich aints ainausha atum pengker takaamun wainkar: Juka nekau aintsuitai turamiartinuitai. ¹⁴ Antsu atumi nintijaingkia pasé nintimsaram suwirpiaku jinisrum pujakrumka, tura wikia miajuitjai, tu nintimsaram pujakrumka: Wikia pengkeraitjai tiirap. Tu pujakrumka, nekas chicham aa nuka nintimchau asaram waitrarme. ¹⁵ Nu pasé nekaatnuka Yusnumiangka winatsui, antsu junia nungkanmaya tura iwianchnumiayaintai. ¹⁶ Tura aints ainou suwirpiaku jiiinisar, tura jiyaaninak pujuinauka mash paseminawai. Tura asar tunau ainia nuna mash takainawai.

¹⁷ Antsu nekamtai Yus suramji nuna jukin ainouka maanitnasha maanichu ainawai, tura pengker nintintin ainawai, tura chikicha chichamencha anturin ainawai. Tura chikich ainoun wait anentin ainawai. Tura pengker aa nuna takau ainawai. Tura aints ainoun anangtsuk tupin chichau ainawai. ¹⁸ Iikia chikich aints ainoujai maanitsuk pujakrikia, pengke arakan arainawa nunisrik angkan pengker nintimsar pujustinuitji, tura nukap juukmawa nunisrik pengker aa nuke turatnuitji.✠

4

Ju nungkanam ainia nuka aneeshtinuitji timiauri

¹ ¿Atumsha waruka maaniwearme? ¿Tura waruka jiyaanisha pujuwearme? Atum pasé wakeramu nukap wakerau asaram turarme. ² Tura atumi wakeramuri najanatatkamaram tujintakrum aints maawearme. Tura kichnau aa nuka wakerayatrum, nuka jukitatkamaram tujinkaram jiyaaniakrum tura maaniakrum pujarme. Tura Yus seachu asaram, atum wakerarme nuka juwatsrume. ³ Tura Yuska seayatrumek, napchau nintimsaram seau asaram, tura atumi wakeramuri najanatasrum seau asaram nuka juwatsrume. ⁴ Maj, atumka aints ni nuwarin ajapa kichan nuwatak pujawa nunisketrume. Yusen umirchau ainou ju nungkanam aa nuna timiá wakerina nu wakerakrumka, Yuse nemase arume. ¿Atumka nuka nekatsrumek? Tura asakrumin ju nungkanam aa nuna wakerinauka Yuse nemase ainawai.✠

⁵ Yuse chichame tu aarmawaitai: “Yuse Wakani ii nintin puja nuka iincha timiá anenmau asa, aya tuke wina anentiarum tusa, iin surimramaji.” ¿Yuse chichame tu aarmawa nuka nangkamikia tu aarmaukai? Atsa. ⁶ Chikich aarmausha tu aarmawaitai:

✠ 3:18 (Sant. 1.5) ✠ 4:4 (Mat. 6.24; Luc. 16.13)

“Aints ningki nintimsang wikia miajuitjai taunka Yuska nakitawai. Antsu wikia mianchawaitjai tumamunka Yuska pengker awajui.” Tu aarmau asamtai: Iikia mianchawaitjai takurningkia, Yus iincha wait anentramak nukap yainmaji.✠

⁷ Tura asamtai Yus umirkuram pujustaram. Turaram Satanása wakeramuri aa nuka umirkairap. Tu pujakrumningkia, Satanáska tujintramak atumniaka ukurmaktinuitai. ⁸ Tura Yus nintimraram nijai chichastaram. Nu turakrumningkia, niisha atumniaka nintimturmastinuitrume. Tunau ainautiram, atum tunau turamuka inaisataram. Atum nintimkuram: ¿Nekasnash Yusen umirkataj? ¿Antsu ju nungkanam aa nunaka wakerukchatjash? tusaram nu yapajiasrumek mai nintim wajarme nuka inaisataram. Tura asaram Yus wína nintirun japitruirti tusaram seataram. ⁹ Atumka tunaarintin asaram, wake mesekrum juutkamaikiakrum atumi tunaaringkia inaisataram. Turaram wishittha wishitsuk juutkamaikiakrum pujusrum, tura nakurutsuk pujusrum, atumi tunaari nintimraram wake mesekrum pujustaram. ¹⁰ Tura Yus seakrum: Wikia tunaawitjai titaram. Takurminkia Yuska atumniaka pengker awajtamsatnuitrume.

Cristonu ainau pachisrum pasé chicharkairap

¹¹ Yatsur ainautiram umaarutirmesha, chikich aints pachisrum pasé chicharkairap. Cristonu ainaun pachis pasé chicharkaruka: Yus umirkatin chicham napchawaitai tawai. Tura Yus: Chikich ainau aneetaram tímia nu chichamnaka umirtsui. Atumka nu umirkatin chicham umirchau asaram: Nu chichamka napchawaitai tarume. ¹² Nu umirkatin chichaman akupauka Yusketai. Tura aintsu tunaarin jiis wait wajaktiniun susatnusha Yusketai. Tura ni aintsri ainautin uwentikramratnuka nuketai. Tura ni umirchau ainaun mengkaktincha nuketai. ¿Tura asamtai waruka chikich aints pachisrumsha paseetai tarume?

Kashin warukatjik tusar etserkamu

¹³ Yamaikia nusha antuktaram. Atum chichaakrum: “Yamai wechanka, kashinkesha wena, chikich yaktanam wetatjai, tura nuni kichik musach pujusan, nuni warinchun untsuri sumarmakan, nunia ataksha surukan, kuikian nukap kiaungkatatjai,” tarume. ¹⁴ Turayatrum kashin itiurak tsawaartaj tusaram, nuka nekaachminuitrume. Ii pujutringkia warimpita tusaram nintimraram. Ii pujutringkia yurangmia tumawaitai. Yurangkim yamaikikia wainmaitiat jumchik arusang mengkawai. ¹⁵ Antsu nekasrum tu chichastinuitrume: Ii Apuri wakeramtaikia, tura iisha iwiaaku pujakrikia, nuka turatatji timinuitrume.✠ ¹⁶ Turayatrum atumka jampesrumek tuke atumi wakeramuri pachisrum: Wi wakeraknaka pachitsuk turatatjai tu chichaawearme. Antsu nuka paseetai. ¹⁷ Tura asamtai tajarme: Aints pengker aa nuna turatnun nekayat, nuna umitsuk pujakka tunau wajawai.

5

Kuikiartin ainau ju chichaman antukarti

¹ Kuikiartin ainautiram antuktaram. Atumka nukap wait wajaktin asaram, kakaram juutkamaikiakrum, wake mesekrum atumi wait wajaktintri nintimraram. ² Atumi wariringkia mamuinawai. Tura atumi entsatirisha shiiram ainia nunaka sengkamawai. ³ Tura atumi kuririsha, tura atumi kuikiarisha ijakmaminawai. Nuka ijakmaminratin wainiatrumek tuke ukuarme. Tura ju nungkanam aa nuka mash mengkaktin au wainiatrumek, atumi kuikiari nukap kiaungkamarume. Yuse kintari jeatak wajasu asamtai, aintsu namangke jinam esawa nunisrumek atumka nukap wait wajaktinuitrume.✠

⁴ Tura atumi ajarin takakmin ainau: ¿Ii takakmasmau akikrisha tuwaita? turaminawai. Antsu aints ainaun anangkuram pujarmin wainiat, Yus mash aints ainaun ina nuka nu aints chichaamunka antawai. ⁵ Atumka ju nungkanam yuumatsuk pujautirmeka, atumi wakeramuri najankuram, kuchi jaeru suruktin pujawa tumawaitrume. Tura asakrumin atum wait wajaktin kinta jeatak wajasi. ⁶ Atumka péngke aints ainau

✠ 4:6 (Mat. 23.12; 1.Ped. 5.5) ✠ 4:15 (Prov. 27.1) ✠ 5:3 (Mat. 6.19)

tunaarinchau wainiatrumek nangkamrum mau arumning, atumin nepetamkartatkama tujintramkarmiayi.

Tuke jaimiasar Yuska seatnuitji timiauri

⁷ Yatsur ainautiram umaarutirmesha, ii Apuri tatintri pengker nintimsaram nakas-taram. Aints ni ajarin arakan arakma: Nukap nerekti tusa nakawai. Tura waurtutsuk: Yumi jiturti tusa nakawai, tura nukap arus ataksha jiturti tusa nakawai. ⁸ Ii Apuri tatanak wajasu asamtai, atumsha yawetsuk nakastaram. Tura pengker nintimsaram kakaram wajastaram.

⁹ Yatsur ainautiram umaarutirmesha, Yuska aints ainau tunaarin jiistin aa nuka tatanak wajasu asamtai atumka: Wait wajaktiniun surusai tusaram, napchauka auj-matnaitasuk pujastaram. ¹⁰ Yatsur ainautiram, yaanchuik Yuse chichame etserin ainau ii Apurin pachisar chichasarmia nuka nintimratarum. Nuka nukap wait wajainayat, pengker nintimsar Yuse chichamen etserkarmiayi. Tura asamtai atumsha nunisrumek turatarum. ¹¹ Aints ainau wait wajainayat, pengker nintimsar puju ainaun pachisar: Yus nu aints ainaun waramtiksatnuitai iikia taji. Atumsha Joba wait wajakmaurisha pachisrum antukmiarume. Tura Job pengker nintimsamusha nekarme. Ii Apuringkia tuke wait anengkratin asa, tura aints ainaun mash pengker awajin asa Jobnasha pengker awajsamiayi. ✧

¹² Yatsur ainautirmin umaarutirmincha tajarme: Atum chichaakrum, Yus nayaimp-inam puja nujai tajai, nangkamrumka tiirap. Tura ju nungkanam aa nu pachisrumka, tura chikich warinchiu ainau pachisrumka, nangkamrum Yuse naari pachisrum Yusjai tajai tiirap. Antsu ja ai titasrum wakerakrumsha tupnik: Ja ai titaram. Tura atsa titasrum wakerakrumsha tupnik: Atsa titaram. Nuke ati. Wikia wait wajaktiniun jurumaki tusaram, tu chichastaram tajarme. ✧

¹³ Atum wait wajakrumka Yuska seataram. Tura pengker nintimsaram pujakrumka, Yuska maaketai takuram Yus kanta kantamataram. ¹⁴ Tura atum sungkurmakrum pujakrumka, Cristonu ainau juuntri ainau Yusen seatriarat tusaram untsuktaram. Turakrumin nusha taar, ii Apuri naarin pachisar Yusen sear, jau ainautirmin namangken olivo macharijai yakatramrarti. ✧ ¹⁵ Tura Yus nekasampi anturtawa, tu nintimsar Yusen seainamtaikia jausha tsaartinuitai. Tura jau tunaari amatikia, Yus ni tunaarinka tsangkuratnuitai. ¹⁶ Tura asamtai mai nuamtak atumi tunaaringkia ujaaniktaram. Nunia Yus seatnaitaram. Turakrumka tsaartinuitume. Aints Yusen nekasampita tusa, miatrusang Yusen umirak pujaunaka tuke nintijai Yusen seu asamtai Yuska anturui.

¹⁷ Yuse chichame etserin Elías naartin nintimrarmi. Nuka iiya nunisang aints ayat, yumi jiturchati tusa Yusen seamiayi. Tu seu asamtai, kempatam musach nunia japchirin yumikia jiturchamiayi. ✧ ¹⁸ Nunia ataksha yumi jiturat tusa Yusen seamtai, yumi ataksha jiturmiayi. Tura yumi jitamtai, árak ainau ataksha nerekarimiayi.

¹⁹ Yatsur ainautiram umaarutirmesha, aints Yuse chichamen nekas aa nuna pachisar nekasampita tinu ainayat inaisaramtaisha, nu aintska ataksha Yuse chichamen umirkarti tusaram yaingtaram. ²⁰ Aints kichik tunaarinnun: Tunaarum inaisata tusa yaingtata nuka, nu tunaarintin tuke mengkakai tusa uwentikratnuitai. Tura nu aintsu tunaari untsuri au wainiat Yus nunaka mash tsangkuratnuitai. Nuka nekaataram tusan tajarme. ✧ Maaketai.

✧ 5:11 (Job 1.21-2.10;42.7-17; Sal. 103.8) ✧ 5:12 (Mat. 5.34-35;23.16-22) ✧ 5:14 (Marc. 6.13) ✧ 5:17 (1.Rey. 17.1;18.1,42-45) ✧ 5:20 (1.Ped. 4.8)

Pedro Papin Eemak Akupkamuri

Chicham akupkamuri

¹ Wiitjai Pedroitjai. Jesucristo akupkamuitjai. Atum Cristo umirin asaram, atumi nungkari ukukrum kanarutirmin ju papin aatjarne. Ponto nungkanam, tura Galacianmasha, tura Capadocianmasha, tura Asianmasha, tura Bitinianmasha pujuinautirmin ju papin aatjarne. ² Ii Apaachiri Yus yaanchuik atumin pachitmas: Wína uchir artatui, tu nintimturmas atumin eatmaku asamtai, Jesucristo umirkataram tusa, atumi nintin ni numpejai japitramrau asamtai, Yuse Wakani: Atumka nekasrum tunaarinchau ataram tusa, atumniaka eatmakmiarume. Yus atumin wait anentramak pengker awajtamsarti, tura angkan pengker nintimratnuncha suramsarti tusan wisha tajarme.

Yusen maaketai timiauri

³ Ii Yusri ii Apuri Jesucristo Apaachiri asamtai: Ameketme juuntam tusar maaketai tiarmi. Tura Yus iin timiá wait anentramau asa: Yamai akiinawa nunisrumek pujustaram tusa, pujut yamarman suramsamiaji. Ii Apuri Jesucristo jakayat jakamunmaya nantakin asamtai, iisha nunisrik tuke Yusnum iwiaakuapi pujustatji tusar nekaji. ⁴ Nayaimpinam pujustinka tuke nangkankashtinuitai. Nuningkia tunauka pengké atsutnuitai. Tura nuningkia weamrashtinuitrume. Yuska nuni pujut nangkankashtinnaka suramsatnuitrume. ⁵ Yus nekasampita tinu asakrumin, ukunam atumin uwemtikramratin asa, ni kakarmarijai atumniaka waitmarme. Atumin uwemtikramratniunka yanchuk umismau asamtai ukunam Yus inakturmastinuitrume.

⁶ Tura asamtai ju nungkanam pujakrum jumchik musach itiurkachmin pujarme. Antsu yamaikia wait wajakrumsha, ukunam pengker pujustinuapitji tusaram nukap wararme. ⁷ Kuri akik asamtai, aints ainau: ¿Nekas kuriashi? tusar jinum tseerar, kurichuitkungka esaatatui tusar turinawai. Yuscha nunisang atumin nekapramsatas: ¿Nekasash wina umirtina? tusa wait wajaktiniun akupturmarme. Kurikia akik ayat mengkakatnuitai. Antsu atumka nekasrum Yus nekasampita takurmeka mengkakashtinuitrume. Tura ii Apuri Jesucristo wantinturmak atumin pengker awajtamsatnuitrume. Tura atumin chichartamak: Wína nekasampita turutu asaram, nekasrum pengker nintimsaram wína pujutirun paaniunam pujustaram tusa juramkitnuitrume.

⁸ Atumka Jesucristo wainchautiatrum anearme. Tura wainchautiatrum Cristo nekasampita tusaram nukap wararme. Nu waraamuka nayaimpinam warastinua nunisketai. Antsu tu awai titatkamaram tujintarme. ⁹ Tura atumka Cristo nekasampita tinu asakrumin atumin uwemtikramratnuitrume. Nu uwemratin nintimsaram nukap wararme.

¹⁰ Yaanchuikia Yuse chichame etserin ainau nintimsar: ¿Itiur uwemratnukitaij? tusar nekaawartas wakeriarmiayi. Tuminamtai yaanchuik nekamtikiamu asar Yus atumin pengker awajtamsatniun pachisar aararmiayi. ¹¹ Yaanchuik Cristo akiintsang, ni Wakani ni wait wajaktintrin pachis, nunia ni jaka nantaktintrincha pachis, nunia nayaimpinam pujustintrincha pachis, Yuse chichame etserin ainaun aamtikramiayi. Tura asamtai ¿yáki at? tura ¿warutik wantinkat? tusar nekaawartas wakeriarmiayi.

¹² Yus ni chichame etserin ainaun yaanchuik nekamtikiamia nunaka niin pachiska aamtikrachmiayi. Antsu atumin nekamtikramratas aamtikramiayi. Tura Yus ni Wakanin nayaimpinmaya akupkau asamtai, ni kakarmarijai Yusnum uwemratin chichaman atumin etserkarmia nuke nu chichamnasha yamaisha ujatmarme. Yuse awemamuri ainausha nu etsermaun pachisar paan nekaawartas wakerinayat yuumatinawai.

Yus tunaarinchau pujustaram timiauri

☆ 1:3 (Juan 3.3-7; 1.Ped. 1.23)

¹³ Yuse wakeramuri itiurak aa tusaram nekau asaram, paan nintimrataram. Tu nintimsaram pujau asaram, ii Apuri Jesucristo wantinak atumin pengker awajtamsatin yawetsuk nakastaram. ¹⁴ Yaanchuik Yus itiurak aa tusaram nekachu asaram, atumi wakeramuri umirkuram pujuyarme. Antsu yamaikia Yuse uchiri asaram, atumi Apaachiri Yus umirin ataram. ¹⁵ Yus wina uchir ataram tusa, atumin eatmakmia nuka pengké tunaarinchau asamtai, atumsha nunisrumek pengké tunaarinchau ataram. ¹⁶ Yuse chichame tu aarmawaitai. Yus chichaak: “Wikia pengké tunaarinchau asamtai, atumsha nunisrumek tunaarinchau ataram,” timiayi.✠

¹⁷ Yus aintsti turutinka mash metek jirmaji. Tura asamtai atumka Yus: “Apaachia,” tau asaram iwiaaku pujakrumka, wait wajaktiniun surusai tusaram shamkataram. ¹⁸ Yaanchuikia atumi juuntri nangkamiar puju armia nunisrumek atumsha pujuyarme. Tura asakrumin Yus atumin: Tu pujusairam tusa uwemtikramramiarume. Atumsha nusha nekarme. Yus kuikijaingkia, tura kurijaisha mengkakatin aa nujaingkia atumi tunaarin akiimiakka sumarmakchamiarume. ¹⁹ Antsu Cristo numpejai sumarmakmiarume. Yaanchuik aints ainau tunaun turinak: Yus tunaaurun tsangkururat tusar, uwija uchirin shiirman sungkurinchaun main armiayi. Cristosha uwija uchiriya nunisang jarutramkau asa, iinka tunaanumia uwemtikramramiayi. ²⁰ Yus nungkanka najantsuk, ni Uchirin Criston aints ainau uwemtikratas jakati tusa nintimramiayi. Tura asa yamai pujautirmin pengker awajtamsartas Cristoka wantinkamiayi. ²¹ Nunia Yus ni Uchirin jakamunmaya inankin asa nayaimpinam iwiakmiayi. Tura asamtai atumsha: Wi jakamtaisha, Yus nekasampi wina inantuki nayaimpinam juruktinuita, tu nintimsaram pujau asaram Cristo nekasampita takuram, Yus tuke nintimsaram pujarme.

²²⁻²³ Nintimrataram. Atumka Yuse chichame antuku asaram, tuke iwiaaku pujusmi tusaram, Yusnumia akiinawaitrume. Nu yamaram pujutnaka atumi apari, tura atumi nukurisha suramsachminuitrume. Antsu atumka Yuse chichame nekas aa nu umirkau asaram, tuke iwiaaku pujustinuitrume. Nu chichamka pengké mengkakashtinuitai. Atumka Cristonu ainaujai nekasrum aneenisrum pujustasrum atumi tunaari inaisaram, atumi nintingkia pengker awajrume. Tura asaram tuke inaitsuk aneenin ataram.✠

²⁴ Tura asamtai Yuse chichame tu aarmawaitai:

“Aints mash nupaaya nunisarang ainawai. Aints miajuitjai tinayat, yangkura nunisarang ainawai. Antsu nupaasha tura yangkursha minar mengkainayi.

²⁵ Antsu ii Apuri chichamengka pengké mengkakashtinuitai.”

Tu aarmawaitai. Nu uwemratin chichamnaka atumniaka tuke ujamkaruitai.✠

2

¹ Tura asamtai tunau ainia nuka mash inaisaram, anangmatnusha tura tunau aya-trumek: Wikia pengkeraitjai tumamtincha, tura suwirpiaku jiinitcha, tura chikich ainau pachisrum pasé chichat tuke inaisataram. ²⁻³ Antsu ii Apuri pengkeraitai tusaram nekau asaram, uchi yama akiina muntsun kintajai metek wakera nunisrumek, Yuse chichame nekas pengker aa nu wakerin ataram. Yuse chichamejai tuke uwemrau asaram, atumi ninti kakamtikratasrum turataram.✠

Cristonu ainauka Yuse jee tumawaitai timiauri

⁴ Ii Apuringkia itiurak awa tusaram nintimrataram. Aints ainau jean kayajai jeaminak chikich kayan pengkeran wainkariat: Ju kayaka paseetai tusar, nakitnak ajapawarmiayi. Ii Apuringkia nu kaya nekas pengkera tumawaitai. Niincha tunaarinchau waininayat nakitrarmiayi. Tura wainiat Yus niin ataksha inankimiayi. Tura asa tuke iwiaakuitai. ⁵ Yus atumin tuke iwiaaku pujustinun suramsau asamtai, atumsha Yuse jee kaya jeamka-mua nunisrumek pujarme. Nunia sacerdotia nunisrumek aints ainau pachisrum Yuska seatinuitrume. Sacerdote ainauka tangku ainaun maawar, Yusen susartas epeu armiayi. Antsu Jesucristo atumi tunaarinka japitramrau asamtai, Yus atumniaka tunaachawa

✠ 1:16 (Lev. 19:2) ✠ 1:22-23 (Juan 3.3-7; 1.Ped. 1.22) ✠ 1:25 (Isa. 40.6-8) ✠ 2:2-3 (Sal. 34.8)

nunisrumek pujarmin jiirmarme. Tura asamtai atumka tuke inaitsuk Yus maaketai titaram. ☆ 6 Tura nuna pachis Yuse chichame tu aarmawaitai. Yus chichaak:

“Wainkataram. Wikia Sión yaktanam kaya juuntan pujsatnuitjai. Tura asamtai nu kayanka nekasampita tiartin ainauka niin umirinau asar pengké natsaarchart-inuitai,” timiayi. ☆

Tu aarmawaitai. 7 Ii Apurin pachis tu aarmau asamtai, atumka ii Apuri nekasampita tinu asaram, Cristoka nekas pengkeraitai tarume. Antsu Cristo umirchau ainaun pachis Yuse chichame tu aarmawaitai:

“Jea jeamin ainau kayanka ajapawarmiayi. Antsu Yus ni Uchirin tayat nu kayanka pachis: Nuka timiá pengkeraitai,” tawai. 8 Tura chikich aarmaunasha miatrusang umikmiayi. Nu aarmauka tu aarmawaitai:

“Nu kayanka tukumkar iyarartinuitai.” Cristo chichamen umirtsuk pujuinauka, kayan tukuminawa nunisarang iyaartin ainawai. Tura kayan tukumkar iyainawa nunisarang pujuinauka wína chichamrunka umirtutsuk pujuinau asar, tuke wait wajakartin ainawai Yuska tawai. ☆

9 Antsu Yuska: Winar ataram tusa, atumin eatmakmiarume. Tura asa sacerdotea nunisrumek chikich aints ainausha pachisrum wína seattiarum tusa, Yuska atumniaka inaitamkmiarume. Tura Yus pengker turatnuka tu awai tusaram, chikich aints ainausha nekamtikiatnuitrume. Atumka teenam pujarmin wainiat, Yuska atumin chichartamak: Winia paaniur nekas pengker aa nuni pujusmintrum tusa atumniaka untsurmakmiarume. 10 Atumka yaanchuikia Yuse aintsringkia achayarume. Antsu yamaikia Yuse aintsri arume. Yaanchuikia Yuska atumniaka waitka anentramchayurume. Antsu yamaikia wait anentramrume.

Yuse inatiri ataram timiauri

11 Aneetir ainautiram, ju nungkanam tuke iraawa nunisrumek pujau asakrumin atumniaka tajarme: Atumi namangke wakera nuka tsangkatkairap. Nu turakrumka atumi nintingkia pasemamtikratnuitrume. 12 Cristo umirchau ainaujai pachintraram pujayatrume, nekasrum pengker pujustaram. Yamaikia atumin pachitmasar: Tunau ainawai tusar pasé chichau ainayat, Yus nu aints ainau turamurin jiistin kinta jeamtai, nu aints ainauka atum pengker turamurmin wainkau asar, Yusnaka pengker awajsartin ainawai. ☆

13 Cristo atumi Apuri asamtai, apu naamkaru ainau mash umirkataram. Juun apu nuna nangkamasang atsau asamtai nusha umirkataram. 14 Tura juun apu chikich apun akupkau asamtai, nu apusha umirkataram. Apu ainauka tunau takau ainaunaka achikiar kársernum akupinawai. Tura pengker takau ainaunaka pengker awajin ainawai. 15 Atumka nekas pengker aa nu turataram tusa Yuska wakerawai. Nu turakrumka nintinchau ainau nekachu asar, atumin pachitmasar nangkamiar chichainau asaramtai, nekas pengker pujau asaram itatmamtikiatnuitrume.

16 Atumka nekasrum angkan pujau asaram, angkan pujuinawa nunisrumek pujustaram. Tura wikia angkan pujau asan, wína wakeramurnaka pachitsuk turatatjai, tuuka nintimsairap. Antsu Yuse inatiriya nunisrumek pujustaram. 17 Mash aints ainau pengker awajsataram. Tura Cristonu ainauka aneetaram. Tura Yuska umirkataram. Tura juun apu pengker awajsataram tajarme.

Cristo wait wajakmauri pachisar etserkamu

18 Aintsu inatiri ainautirmin tajarme: Atumi inatmin pengker awajsaram tuke umirkataram. Tura atumi inatmin pengker awajtaminauk umirtsuk, antsu chikich inatmin pasé chichartaminau wainiatrumek umirkataram. 19 Tura aints tunau takachu ayat, Yusen aneau asa wait wajaksha, nekas pengker nintimias wait wajakminuitai. 20 Antsu tunau turaram jaimiasrumek wait wajakrumka ¿Yuska pengker awajkurmek pujaram? Atsa. Antsu pengker aa nu turayatrum wait wajakrumka, jaimiasrum

☆ 2:5 (Efes. 2.22) ☆ 2:6 (Isa. 28.16) ☆ 2:8 (Rom. 9.32-33;10.11) ☆ 2:12 (Mat. 5.16; Marc. 4.21-23; Luc. 8.16-17;11.33)

wait wajau asaram, nekasrum Yuska pengker awajrume. ²¹ Cristo atumin pachitmas wait wajakmiayi. Tura asa: Wiya nunisrumek atumsha wait wajaktinuitrume tusa, atumin nuitamrau asamtai, atumsha niya nunisrumek wait wajaktinuitrume. ²² Cristoka tunaunaka pengké turachmiayi. Tura aintsnaka kichkisha pengké anangkachmiayi.✠

²³ Tura niin pasé chicharinamsha, pajaki aikchamiayi. Tura waitkinamsha yapaijmiaktaj tichamiayi. Antsu Yus ukunam aints ainau tunaarin mash yapaijkiatin asamtai, wína Apaachir Yus jiisti timiayi.✠ ²⁴ Tura asamtai atumi tunaaringkia mash inaisaram, aints jakau tunau pachiatua nunisrumek tunaarinchau pujustaram tusa, Cristo ningki ii tunaarin akiimiatramkatas numinam waitnas jarutramkamiayi. Atumin uwemtikramratas Cristoka awatnarmiayi.✠ ²⁵ Yaanchuikia atumin waitmaktin atsau asamtai, uwija mengkakawa nunisrumek atumka pujuyarme. Antsu yamaikia Cristonam jeau asakrumin, nuka uwija wainua nunisang atumin waitmarme.✠

3

¿Nuwatnaikiau ainausha itiur pujusartinuita?

¹⁻² Aishrintin ainautiram, atumi aishri umirkataram. Atum Yus miatrusrumek umirkuram pujakrumin, atumi aishringkia Yuse chichamen nekasampita tutsuk pujuinayat, atumi pengker pujamurmin wainkar, atumka chicharchamaitiat, atumi aishringkia Yus umirtan wakerukartinuitai.✠ ³⁻⁴ Atumka nekasrum shiirmawach wajastaj tu nintimkurmeka, iwiarmamratnuka nintimtusairap. Tura atumi intashi shiiram iwiarmatnusha, tura kurijai iwiarmamratnusha, tura wejmak akik entsartincha nintimtusairap. Antsu Yusen nekasrum pengker awajsatatan shiirmawach wajastaj takurmeka, aints ainausha kajertsuk, pengker nintimtin atatjai, tu nintimin ataram.✠ ⁵ Yaanchuikia nuwa pengker nintintin ainau Yusen pengker awajsartas wakeriarmia nuka ni aishrin umirinak ni nintijai pengker nintimsar pujuu armiayi. ⁶ Tura Sarasha Abrahaman umirin asa aishrin: “Apuru” tinuyayi. Nuwa ainautiram, atumka nekas pengker aa nu turakrumka, tura shamrumtin wainiatrum shamtsuk pujakrumka, Sara nunisrumek pujustinuitrume.✠

⁷ Nuwentin ainautirmincha tajarme: Atumi nuwarijai pengker awajnisaram pujustaram. Nuwa ainauka aishmangtijai metekka kakarmaka ainatsui. Antsu Yus aishmang ainautin, tura nuwa ainauncha metek wait anentramak tuke pujustinaka suramsau asamtai, atumi nuwaringkia pengker awajsataram. Yus wi seamun anturtukat tusaram turataram.✠

Pengker aa nuna takau ainauka wait wajakartin ainawai

⁸ Nuniasha Cristonu ainautirmin tajarme: Mash iruntraram metek nintimin ataram. Tura wait anenain ataram. Tura pataachirmea nunisrumek aneenin ataram. Tura pengker awajnisaram: Wikia miajuitjai tutsuk asataram. ⁹ Atumin pasé awajtaminamtaisha, atumka yapaijtsuk asataram. Tura atumin katsekraminamtaisha: Wisha yapaijkiataj tiirap. Antsu Yus atumniaka pengker awajtamsatas wakerau asamtai: Wína pasé awajtinauncha Yus yaingti tusaram, yapaijtsuk pengker awajsataram. ¹⁰⁻¹² Yuse chichamesha tu aarmawaitai:

“Ii Apuri Yuska nekas pengke nintintin ainaun wainin asa, ni seamuncha anturui. Antsu tunau takau ainaunka nakitawai. Tura asamtai aints pengker nintimias wara warat pujustas wakerakka, pasé chichamnasha chichatsuk asati. Tura wait chichamnasha etsertsuk asati. Tura pasé aa nunaka mash inais, pengker aa nuna turin ati. Tura angkan pengker nintimias pujutan wakerukti. Tura tu pujustas wakerau asa, tuke inaitsuk angkan pengker nintimias pujusti.” Tu aarmau asamtai tuke nunisrumek pujustaram tajarme.✠

✠ 2:22 (Isa. 53.9) ✠ 2:23 (Isa. 53.7) ✠ 2:24 (Isa. 53.5) ✠ 2:25 (Isa. 53.6) ✠ 3:1-2 (Efes 5.22; Col. 3.18)
✠ 3:3-4 (1.Tim. 2.9) ✠ 3:6 (Gén. 18.12) ✠ 3:7 (Efes. 5.25; Col. 3.19) ✠ 3:10-12 (Sal. 34.12-16)

¹³ Atumsha tuke inaitsuk pengker aa nu turakrumningkia ¿yáki atumnasha paseesha awajtamsarti? ¹⁴ Antsu atumka pengker aa nu takau asakrumin, atumin pasé awajtaminamtaisha, Yus atumin waramtikramsatnuitrume. Atumin pasé awajtaminamtaisha shamkairap, tura napchau nintimsuk asataram. ✠ ¹⁵⁻¹⁶ Antsu Cristo wína Apuruitai tusaram, tuke tu nintimsaram pujustaram. Tura aints atumin: ¿Warukarme Cristosha umirume? turaminamtaisha, atumka jampetsuk Yus wína jirui, tu nintimsaram: Tuke Yusnum pujustinuapitji tusaram aimkataram. Atumka Cristonu asaram, napchauka nintimsuk nu nangkamiar aujmatramkaru ainauka inatsartasrum pengker aa nu turataram tajarme.

¹⁷ Tunau takau ainu pasé turinau asar wait wajakartinuitai. Antsu atumka pengker aa nu takaayatrume, Yus wakerau asamtai wait wajakrumka, nekasrum pengker nintimsaram wait waktinuitrume. Nuka pengkeraitai. ¹⁸ Cristo ningki wakerak, nuniangka pengké jakashtinun, ii tunaarin sakturmartas jarutramkamiaji. Tura ningkia tunaarinchautiat tunaarintin ainautin Yusnum jeekartuktas wait wajakmiayi. Tura asamtai ni namangken yanchuk jakau wainiat, Yuse Wakani ataksha inankimiayi. ¹⁹ Tura ni namangke jaka tepayat, jakau wakani kársernum engkeamua nunisarang matsatmaunum Cristo Wakani chichaman etserkatas wemiayi. ²⁰ Yaanchuiksha Noé juun kanun takaamtai, Yus aints ainu wína umirtukarat tusa nakamiayi. Yuska nakamaitiat Noé etsermaun aints ainauka umirkacharmiayi. Tura entsa nujangkruamtai, aints ocho (8) nuke uwemrarmiayi. Antsu chikich ainauka mash kajingkiarmiayi. Nu jakaru ainu wakani matsatmaunum Cristoka chichaman etserkatas wemiayi. ✠ ²¹ Entsa nujangkruamunam Noé uwemramia nunisrik iisha uwemratnuitji. Antsu Cristo umirkatasar maakriki, ii namangke pakuichau ati tusarkia maatsji. Antsu Yus seakur: Yamaram ninti pengké tunaachau aa nu surusta titasar maaji. Jesucristo jakamunmaya nantakin asamtai iisha nunisrik uwemrawaitji. ²² Cristo jaka nantaki nayaimpinam wakamiayi. Tura Yuse awemamuri ainauncha, tura ju nungkanmaya apu ainauncha, tura kakaram ainauncha mash inau asa, yamaikia Yuse untsurinini apu keemtainum pujawai.

4

Ii turaji nuka Yuse kakarmarijai turatnuitji

¹ Cristo ju nungkanam aints wajas wait wajakmiayi. Tura asamtai atumsha nunisrumek wait wajakrumka, paan nintimsaram: Wisha Cristoa nunisnak wait wajakminuitjai titaram. Aints Criston nintimias wait wajakka tunaunaka pachiat sui. ² Tura wína wakeramurnaka turashtatjai, antsu iwiaaku pujaknaka Yuse wakeramurinak umiktatjai, tu nintimias pujauka tunaunaka pachiat sui. ³ Yusen umirchau ainu turina nuka atumsha nunisrumek yaanchuikia mash turinuyarme. Tura atumi wakeramuri takau asaram, tuke tsanirmatcha wakerinuyarume. Tura tunau nintimsaram ushu ayarme. Tura nampekum tuke shinutcha shinuyarme. Tura chikich aintsu yusri Yuschau wainiatrum: Ameketme Yusem tinuyarme. ⁴ Antsu yamaikia nu turutka nakitau asakrumin, atumjai nu tunau turiarmia nuka atumin kajertaminak: Maj ¿warukaya ijai tsanitan nakitinawa? tusar pasé chichartaminawai. ⁵ Tura nu aints ainauka ni tunaarinja ukunam mash ujakartinuitai. Cristoka iwiaaku ainu tunaarinja, tura jakaru ainu tunaarinja mash nekau asamtai, niin ujakartin ainawai. ⁶ Yaanchuik kajingkiaru ainausha iwiaaku pujuinaing nu chichamka ujakmau armiayi. Mash aints ainu jainawa nunisarang ni namangkengka jakariat, ni wakani tuke Yusjai iwiaaku pujusarat tusa, Yusnum uwemratin chichamka ujakmau armiayi.

⁷ Ju nungka amukatnuka jeatak wajasi. Tura asamtai atumka paan nintimsaram pujustaram. Tura asaram Yus seat kakantrataram. ⁸ Tura atum mash turarme nusha nangkamasrumek aneenitaram. Tuke aneenisrum pujakrumka, chikicha tunaari untsuri wainiatrumek nuka tsangkuratnuitrume. ✠ ⁹ Tura atumi jeen irasartas wininamtaisha,

✠ 3:14 (Mat. 5.10) ✠ 3:20 (Gén. 6.1-7.24) ✠ 4:8 (1.Cor. 13.7; Sant. 5.20)

jeasha surimshimka nintimtsuk tsangkamkataram.✠ ¹⁰ Yus aintstin mash pengker awajtamusa, ii takatrinka kichik kichik suramsamiaji. Tura asamtai Yus wakera nunisrumek chikich ainaujaisha yaainikrum pengker awajnisaram pujustaram. ¹¹ Yuse chichame etserkurmeka, Yus tita tusa, atumin nekamtikramau asamtai, Ni wakera nunisrumek etserkataram. Tura chikich ainau yayaakrumka, Yus ni kakarmarin atumin suramsau asamtai, nu aints ainau yaingtaram. Mash turarme nuka aints ainau tuke mash: Yus juuntapita tiarat tusaram, Jesucristo nintimsaram turataram. Aints ainau Jesucriston tuke inaitsuk pengker nintimtusarat tusaram tura: Ameketme kakarmam tiarat tusaram nuka turataram. Tu ati.

Cristonu asar wait wajaktinuitji

¹² Aneetir ainautiram, Yus atumin aneachmau nekapramatai, nukap wait wajakrumka: Maj ¿warukantsuk timiá wait wajaij? tuuka nintimsairap. ¹³ Antsu Cristoa nunisrumek wait wajau asaram warastaram. Yamaik nukap wait wajayatrum, Cristo wantinkamtaai nukap warastin asaram, atumka yamaisha warastaram.✠ ¹⁴ Cristo naarin pachisar atumin katsekraminamtaisha, Yuse

Wakani nekas pengker aa nuka atumin engkemturmau asamtai nekasrum warastinuitrume.✠ ¹⁵ Mangkartin ainausha, tura kasa ainausha, tura chikich tunau turin ainausha, nunia kichnau nangkamiar chichaina nusha mash tunau asar wait wajainawai. Antsu wisha nuna turunawai tusaram atumka aneartaram. Tura atunningkia nu wait wajamuka atsuti tusaram, tunaaka turuwairap. ¹⁶ Antsu Cristonu asaram wait wajakrumka, natsaamtsuk wait wajaktinuitrume. Tura asaram Cristo naari pachisrum tuke Yuska maaketaitaram.

¹⁷ Yuse aintsri ainauti wait wajaktin yanchuk jeayi. Tura Cristo: ¿Wína aintsur nekasash umirtina? tusa iin nekapramsatin kintaka yanchuk jeayi. Antsu nungka amuamunam Yusnum uwemratin chichaman umirtsuk pujuinauka ii wait wajaji nuna nangkamasarang nekasar nukap wait wajakartin ainawai. ¹⁸ Tura Yus umirkau ainauti nukap wait wajasar uwemkurnisha, Yusen umirchau ainauka timiá tunau asar, wait wajainak: ¿Warukatnukitaj? tiartinuitai. ¹⁹ Tura Yus wakerau asamtai, Cristo umirkau ainauti wait wajakrishu, tuke inaitsuk nekas pengker aa nuke turatnuitji. Tura Yus iincha najatmau asa, iinka pengké japrama ukurmatsji, tu nintimsar pujustinuitji.

5

Cristonu ainau chicharkamuri

¹ Wikia Cristonu ainau juuntri asan, tura Cristo wait wajakmaurinha wainkau asan, tura Cristo ukunam wantinkamtaai, ni paaniurinha atumjai metek wainkatin asan, Cristonu ainau juuntri atumjai pujuinautirmin yamaikia ju chichaman akuptajrume. ² Uwija wainin ni uwijarin tenap wainua nunisrumek Yusnau ainau pengker wainkataram. Tura nakimtsuk antsu atumek wakerau asaram, Yus wakera nunisrumek turataram. Wi nuna turaknaka kuikian nukap jukitatjapi tuuka nintimtsuk, antsu pengker nintimsaram turataram.✠ ³ Tura wisha Cristonu ainau juuntri asan, aints ainaun inartaj tuuka nintimtsuk, antsu nekasrum pengker pujusrum: Wiya nunisrumek pujustaram tusaram, Cristonu ainau pengker wainkataram. ⁴ Tura asakrumin Cristonu ainau wainin nekas juun aa nuka, iin waitmaktas wantinturmakamtaai, atumka Yusnum jearam Yuse paaniuri wainkaram, pujut nangkankashtin jukitnuitrume.✠

⁵ Nuniasha natsa ainautirmincha nunasha tajarme. Cristo umirnu juuntri ainau umirkataram. Mash pengker nintimtunisrum: Wikia mianchawaitjai tusaram pengker awajnisataram. Yuse chichame tu aarmawaitai:

“Aints ningki nintimsang wikia miajuitjai taunka Yuska nakitawai. Antsu wikia mianchawaitjai tumamunka Yuska pengker awajui.”✠ ⁶ Yuska nekas kakaram asa, ni

✠ 4:9 (Rom. 12.13; Hebr. 13.2) ✠ 4:13 (Rom. 8.17; 1.Ped. 1.4) ✠ 4:14 (Mat. 5.11; Luc. 6.22) ✠ 5:2 (Juan 10.11-13; 21.15-17) ✠ 5:4 (Hebr. 13.20) ✠ 5:5 (Mat. 23.12; Marc. 9.35; Luc. 14.11; 18.14; 22.26; Sant. 4.6)

kintari jeamtai wína: Miajuitme turutti tusaram yamaikia: Wikia mianchawaitjai tu nintimsaram pujustaram. ⁷ Yuska atumin waitmau asamtai, atumi itiurkachmintri waring achat mash pachisrum: Yuska wína yuumamurnaka surusti, tu nintimsaram pujustaram.✠

⁸ Paan nintimraram aneartaram. Satanás atumi nemase asa, juun yawaa kuntinun esai yuwatas wekaawa nunisang: ¿Yanak mesrintang? tusa atumin eatmarme.✠ ⁹ Tura asamtai tuke Yus nekasampita takuram Satanás turutashti tusaram surimiaktaram. Atum wait wajarme nunisarang chikich nungkanmaya Cristonu ainausha wait wajainawai. Nuka kajinmakirap.

¹⁰ Tura ju nungkanam jumchik kinta wait wajau asakrumin, Yuska yamaikia atumin: Tunaarinchau wajastaram tusa pengker awajtamsatnuitrume, tura kiakaatmartinuitrume, tura tuke inaitutsuk umirtuktaram tusa yainmaktinuitrume. Yuska atumin tuke anenmau asa: Jesucristojai tsaniasrum ni paaniuri tuke wainkataram tusa untsurmakmiarume. ¹¹ Yusnaka aints ainau tuke mash: Ameketme kakarmam tiartinuitai. Tu ati.

Inangnamu chicham akupkamuri

¹² Ii yachi Silvano Criston miatrusang umirui, tu nintimsan pujakun, ju papin sutarchin atumin aatu asan, junaka atumin suramsati tusan akuptajrume. Ju papin aaran: Yuse nekas wait anengkratairingkia tu awai tusan nekamtikjarme. Ju chicham antukrum, Yuse nekas anengkratairi nintimsaram: Yus tuke aneetaram tajarme.

¹³ Cristonu ainau Babilonianam pujuinau Yus atumjai metek eakmau asar chichaman akupturminawai. Wína uchir Marcoscha nunisang atumin chichaman akupturmarme.

¹⁴ Pengker nintimtunisrum aneenisrum: ¿Pengkerak pujaram? tunaitaram.

Cristonu ainautirmin mash Yuska pengker nintimtunis arangan pujustinun suramsarti. Maaketai.

Pedro Papin Ataksha Akupkamuri

Chicham akupamuri

¹ Wiitjai Simón Pedroitjai. Wikia Jesucristo inatiri asan, Cristo akupkamuitjai. Iijai metek Jesucristo nintimtautirmin ju papin aaran akuptajrume. Ii Yusri tura iin uwentikramratin Jesucristo nekas pengker asamtai, iikia ni tuke nekasampita taji. ² Ii Apaachiri Yus tura ii Apuri Jesúscha tu pujawai tusaram paan nekau asakrumin, atumin tuke wait anentraminak pengker awajtamsarti, tura angka tuke pengker pujustinnasha suramsarti tusan tajarme.

Cristonu ainau pujutri pachis timiauri

³ Cristo tu pujajai tusa, iin paan nekamtikramau asa: Wína paaniursha, tura wína pengker pujutrusha wainkataram tusa, iin eatmaku asamtai, Yus wakera nunisrumek pujustaram tusa, ni kakarmarin suramsawaitji. ⁴ Niisha juun asa tura tujinkachu asa, ni chichamen ukunam atiniun pachis suramsamijai. Nu chichamka nekas kakarmaitai tura pengkeraitai. Nu chichamjai atumsha atumi namangke wakeramuri nepetkaram, Yuse uchiri wajastinuitrume. ⁵ Tu pujakrumka Cristo nekasampita tinu asaram, pengké tunaarinchau pujustaram. Tura asaram ¿Yuse wakeramuri itiurak aa? tusaram nekaataram. ⁶ Tura nu nekaaram, atumi wakeramuri nepetkataram. Tura wait wajakrumsha jaimiasrum nepetkau ataram. Tura tu pujakrum, Yuska nekas miatrusrumek umirkataram. ⁷ Tu pujakrum Cristonu ainau pengker nintimtustaram. Tu pujau asaram mash aints aneetaram.

⁸ Tura tuke inaitsuk nu turakrumka, ii Apuri Jesucristo tu pujawai tusaram, nekau asaram nangkamrumka pujuschatnuitrume, antsu ni wakeramuri miatrusrumek umiktinuitrume. ⁹ Antsu aints tu pujachuka, yanchuk ii Apuri ni tunaarin japiramaitiat, nunaka kajinmaru asa, wainmichua tumau tura paanchau wainmawa tumawaitai. ¹⁰ Yatsur ainautiram umaarutirmesha, Yus atumin untsurmak eatmaku asamtai, nu chichamka tuke nintimsaram kajinmatsuk asataram. Tu pujakrumka tunauka pengké turashtinuitrume. ¹¹ Tura ii Apuri Jesucristo nayaimpinam tuke puja nuka iin Uwentikramratin asa, tuke pujustinun suritramtsuk atumin ni pujutirin juramkitnuitrume.

¹² Tura asa Yus nu nekas chicham nekaataram tusa atumin nekamtikramau asamtai, nuka mash nekyatrum kajinmakiram tusan, atumin tuke inaitsuk nintimtikjarme. ¹³⁻¹⁴ Tura asamtai iwiaaku pujaja juwik atumin nintimtikratnuitjarme tu nintimjai. Ii Apuri Jesucristo: Ami jakatniuram jeatak wajasi tusa nekamtikruau asamtai, wikia juningkia nukapka pujuschatatjai tusan nekajai. ¹⁵ Tura wi jakamtai, wi aaja juka kajinmakiram tusan, paan aartasan wakerajai.

Cristo kakarmarin wainkamiiji timauri

¹⁶ Ii Apuri Jesucristo kakarmari, tura ni wantinkamuri pachisar atumin etserkamiaiji nu chichamka aints ainau nangkamiar etseriarmiana nuchauyayi. Antsu ni paaniuri tura ni kakarmarisha ii jiijaisha wainkau asar iisha ujakmiajrume. ¹⁷⁻¹⁸ Iikia Cristojai mura pengkernum wakar, nuni pujusar nayaimpinmaya chichau antukmiaiji. Ii Apaachiri Yuska paaniunmaya ni Uchirin pachis chichaak: “Juka wína Uchiruitai, wína aneetiruitai. Junaka pengker nintimtusam pujajai,” tinu asa, ni Uchirin pengker awajsamiayi, tura ni kakarmarin iincha inakturmasmiaiji.✠

¹⁹ Tura yaanchuik Yuse chichame etserin ainau Cristo wantinkatnurin pachisar aar-mau asaramtai, iisha ni armaurin aujsar: ¿Itiurak awa? tusar miatrusrik nekaatnuitji. Nu chicham nekarkia, kantijjai teenam wainji nunisrik: ¿Itiur pujaji? tusar paan nekaatnuitji. Tura nu chichamka atumi nintin ukusu asaram, tsaa jiintsang angkuaji

✠ 1:17-18 (Mat. 17.1-5; Marc. 9.2-7; Luc. 9.28-35)

jiinua nunisang ii Apuri wantintsaing, nu chichamsha warina takua tawa tusaram paan nintimratnuitrume.

²⁰⁻²¹ Ju chichamka chikich chicham nangkamasrumek nintimrataram: Yuse chichame etserin yaanchuik ukunam atiniun pachisar aararmia nunaka aints kichkisha ningki nintimsarka nekaacharminuitai. Tura aints ningki wakerak ukunam atiniun pachis: Tu atinuitai tichamnawaitai. Antsu Yus akupkamu ainau Yuse Wakani nintimtikramu asar, Yuse chichamen tu awai tusar etserkarmiayi.

2

Anangkartin ainaun pachis timiauri (Jud. 4-13)

¹ Yaanchuik ii juuntri pujuinamunam wait chichaman etserin ainau wantinkarmia nunisarang wait chichaman nuikiartin ainau yamaisha wantinkartinuitai. Nu aints ainauka wait chichamnaka uukar nuikiartin ainawai. Tura asar ii Apuri waitnas jaka ii tunaarin akiimiatramkau waininayat, nuka waitaitai tusar pachinatsui. Tura aints ainaun anangkawaru asar, ni wait wajakartintri jeatak wajasi. ² Tura asaramtai nu wait chichaman nuikiartin ainau pasé turinamun wainkar, nuna umirin asar, nusha nunisarang tunau turawartinuitai. Nu aints ainauka: Yuse chichamen nuikiartinuitjai tinayat, timiá pasé turinau asaramtai, untsuri aints ainau Yuse nekas chichamenka pachisar pasé chichakartinuitai. ³ Nu aints ainau wait chichaman nuikiartamunam akiam kuikiartin wajastaj tu nintiminawai. Tura asar aints tu pujuinauka mengkakartin ainawai, Yus yaanchuik timiau asa, ni wait wajaktiniun jukiartin ainawai.

⁴ Yuse awemamuri ainausha tunau takasaramtai, Yuska pengké tsangkurachmiayi. Antsu nayaimpinmaya jiiki tee amanum akupkamiayi. Tura tee amanum jirujai jingkiar, ukunam wait wajaktiniun nakasarti tusa metamu ainawai.

⁵ Tura yaanchuiksha aints tunau turinaunka Yuska tsangkurachmiayi. Antsu nu aints ainaun amuktas, nujang nujangkruati tusa yumin akupkamiayi. Antsu Noé: Yus umirkataram tusa, uwemratin chichaman etsermaun antukar nekasampita tinu asar, ni weari siete (7) ainaujai uwemrarmiayi.✠

⁶ Tura Sodoma yaktancha, tura Gomorra yaktancha jijai keemak yukuu najana inaisau asa, chikich Yusen umirchau ukunam akiinawartin ainauka nuna nekaawar nintimrarmi tusa, nu yakat ainaun Yuska keemakmiayi.✠ ⁷ Antsu chikich aints, Lot naartin péngke aints asa, tunau timiá wakerin ainaun wainak, wake mesekmia nunaka Yuska uwemtikramiayi.✠ ⁸ Nu pengke aintska tunau ainamunam pachinkau asa, kashincha kashincha ni tunau turinamun wainak, tura ni tunau chichainamuncha antuk, napchau nintimias wait wajamiayi.

⁹ Tura asamtai ii Apuri ni aintsri ainautinka tunaanum pachinkau arining, nu tunaun-umiangka uwemtikramratnuitji. Tura ii Apuri ukunam taamtai, Yusen umirchau ainau tuke wait wajakartinnum jeartinun wainiat yamaikikia pujas pujurui. ¹⁰ Nu aints ainauka ni wakeramurinak najanin armiayi. Tura inakratin ainaun pachisar pasé chicharin armiayi. Nuka ni namangke wakeramurinak nintimsar nuke najaninak, ii Apurin umirtan nakitinau asaramtai, Yuska wait wajaktinnum akupkartinuitai. ¹¹ Antsu Yuse awemamuri junia aintsun nangkamasarang kakaram tura juun ainayat, nu inakratin ainaun Yus inaikiamu asaramtai, nunaka pachisar paseeka chicharinatsui.

¹² Pachim ainau nintinchau asar, aya jakatniunam akiinin asaramtai achikiar mainawai. Anangkartin ainausha pachimia nunisarang nintinchau asar, tura pasé chichau asar jakartin ainawai. ¹³ Tura chikich ainaun pasé awajсарu asaramtai, Yuska niincha pasé awajartinuitai. Nu aints ainauka kintajai metek ni wakeramurin najaninak nakurinawai. Tura atumjai tsaniasar fiesta najanami tusar anangminak: Pengker nakuraji tinayat, nekasar natsanpiaku aa nuna turinawai.

✠ 2:5 (Gén. 6.1-7.24) ✠ 2:6 (Gén. 19.24) ✠ 2:7 (Gén. 19.1-16,29)

¹⁴ Nu anangkartin ainauka nuwanka wakerutskeka jiinatsui. Tura tunau turutnaka yawetinatsui. Tura Criston umirkartatkamawar yuumatinak pujuinauncha tunaun pachitsuk turuwarti tusar wakerumtikinawai. Tura chikichnau ainia nunasha mash wakerinawai. Tura asar tuke mengkartinuitai. ¹⁵ Nu anangkartin ainau uwemratin jinta tupin aa nunaka menankiarmiayi. Tura asar Beora uchiri Balaama nunisarang ainawai. Balaam yaanchuik Yuse chichamen etserin ayat, kuikian nukap wakerau asa, Yusen umirtan inais tunaun turamiayi. ¹⁶ Tura tunau nintimias wekaamtai, ni burrori chichakchamnau wainiat, ni tunau nintimaurin inaisat tusa, Yus ni burrorin chichamtikiarmiayi. ☆

¹⁷ Nu anangkartin ainauka nungka taimua nunisarang ainawai. Aints yumin shikikiartas nungkan tainayat, yumi jinchau asamtai inainawai. Tura yurangmia nunisarang ainawai. Esat amanum yurangkim nungkan chuprat tusar, aints ainau nakainawai. Tura wainiat nase ampuam yurangmikia mengkawai. Tura nu aints ainau tuke anangkartin asaramtai, ni tuke teenam wait wajakartintri yanchuk umismawaitai. ¹⁸ Nu aints ainauka: Miajuitjai tusar nangkamiar chichainawai. Tura tunau takainau asar, ni wakeramurin najaninak, chikich aints ainau yanchuk tunaarinka inaisaru waininayat, ataksha tunaun takamtiksartas wakerinawai. ¹⁹ Nu aints ainauka tunau nepeteamu asar tunau inatiri ainawai. Tura asar chikich aints ainaun anangkinak: Atumsha iiya nunisrumek turakrumka, angka pujustinuitrume tinayat, niisha tuke tunau nintiminau asar angkanchau ainawai. Tura asamtai aints ainau mash tunaun turina nuka tunau inatiri ainawai. ☆

²⁰ Ii Apuri Jesucristo, iin Uwemtikramratin aa nuka aints ainautin yaanchuik nintimtikramrau asamtai, ju nungkanmaya ainau tunau turutirinka inaisariat, ataksha wakеткиar nu tunaujai jingkiamua nunisarang pujuinauka yaanchuik pasé pujuarmia nuna nangkamasarang pasé pujuinawai. ²¹ Nu aints ainauka yaanchuik Yuse chichame umiktaram tamaun antukariat, ataksha tunaun waketrukiaru asar, timiá pasé pujuu ainawai. Antsu nu jintan nekaawarchawaitkungka timiá pengker acharaintash. ²² Antsu aintsu timiauringkia nuwaitai: “Yawaa inukiat ataksha wákeki ni inukmaurinak yuwawai. Kuchisha pengker imaimaitiat, ataksha wakетки pakuinum maakimui.” Nu timiaujai metek nu aints ainausha nunisarang ataksha tunaun waketrukiari turinawai. ☆

3

Ii Apuri tatintri pachis timiauri

¹ Aneetir ainautiram, wi yaanchuik atumin papin aatran akuptukmiajrume. Tura yamaikia ataksha juna aatran akuptajrume. Wi papin jimieran aatran: Kajinmatsuk Yus umirkataram tusan, atumin nintimtikratan wakerajrume. ² Yaanchuikia péngke aints ainau Yuse chichamen etserin asar, chichaman etserkarmia nusha nintimrataram. Nunia ii Apuri iin Uwemtikramratin aa nuka, atumin ni chichamen nekamtikramatas ni nuiniatiri ainautin akupkau asamtai, ni chichamengka nintimrataram.

³ Chikich chichaman nangkamasnak ju chichaman atumin nekamtikiatasan wakerajrume. Kinta inangnamunam wishikiartin ainau ni wakeramurin tuke najanawartas: Yus wishikrami tusar taartinuitai. ☆ ⁴ Tura chichainak: “Cristo: Wikia ataksha taratatjai tímia nuka ¿waruka taatsua? ¿Nangkami waitrak tichayawash? Ii juuntri ainau tuke waintsuk mash kajingkiarmiayi. Antsu Yus nu nangkamtaik najanamu ainauka mash tuke nunisarang ainawai,” wishikinak tiartinuitai. ⁵ Tura Yus yaanchuik nungkancha, tura nayaimpincha najanamia nunaka nu aints ainauka nekatan nakitinawai. Tura nungkancha juun entsanmaya tsapuimiayi. Tura juun entsasha nungkan tenteati tusa, aya chichasang Yus najanamiayi. ☆ ⁶ Nuniangka juun entsa nujangkruamtai, Yus nungkancha mesramiayi. Antsu nu wishikiartin ainauka nu nekatnaka nakitinawai. ☆

☆ 2:16 (Núm. 22.4-35) ☆ 2:19 (Juan 8.34; Rom. 6.6-7, 16) ☆ 2:22 (Mat. 12.43-45) ☆ 3:3 (1.Tim. 3.5; Jud. 18) ☆ 3:5 (Gén. 1.6-9; Sal. 24.1-2) ☆ 3:6 (Gén. 7.11)

⁷ Tura Yus tu ati tinu asa, nayaimpisha tura nungkasha yamai ainia nuka ukunam jijai epeami tusar ukusmau ainawai. Tura tunau ainau amukatin kinta jeamtai, Yus nayaimpincha tura nungkancha jijai keemaktinuitai.

⁸ Aneetir ainautiram nusha kajinmakirap: Ii Apuringkia kichik kintan wainiat kichik warang musachia nunisketai tu nintimui. Tura kichik warang musach kichik kinta nunisketai tu nintimui. ⁹ Aints ainau ii Apurin pachisar chichainak: ¿Wi taratatjai, tímia nuka waruka taatsua? tu chichinau wainiat ii Apuri: Wi turatnuitjai, tímia nunaka umitsuk pujuschnawaitai. Antsu iin anenmau asa, aints kichkisha mengkakacharti tusa, antsu mash ni nintimaurin yapajiawar wina umirtukarti tusa wakerawai. ¹⁰

Tura kasa aints aneachmau tatinua nunisang ii Apuri kintari aneachmau jeatnuitai. Ii Apuri tatin kintari jeamtai, ipiamat chichaawa nunisang nayaimpinam aa nunaka mesratnuitai. Tura ju nungkasha keek, tura aintsu wariri ainausha mash keektinuitai. Tura mash esawar mengkaratnuitai. ¹¹

Yus mash aa nunaka mesratin asamtai, atumka nekasrum tunau takatsuk, antsu Yus wakera nunisrumek pujustinuitrume. ¹² Yus nayaimpinam aa nunaka jijai keemakamtai, mash aa nu ukujaj keek, timiá tsuwen asa, jiru ainausha kuwarar entsa nunisarang wajakiartinuitai. Nu kinta wári jeati tusaram, nekasrum nukap wakerau asaram nakastaram. ¹³ Yuska yaanchuik chichaak: Nayaimpincha tura nungkancha mesran yamarman najanatnuitjai, tinu asamtai, Ni tímia nunisang umiktatuapi tusar iisha nakaji. Nu yamaram nayaimpinmaka, tura yamaram nungkanmaka tunauka kichkisha atsutnuitai. ¹⁴

Aneetir ainautiram, nu kinta jeati tusaram nakau asakrumin, ii Apuri taa, iincha nekasrum angkan pengker nintimtunisar tunaarinchau pujarin, tura miatrusrik umirkur pujarin waitmakmi, tu nintimsaram pujustaram. ¹⁵ Tura ii Apuri iin uwentikramratas nukap nakarmaji, tu nintimsaram pujustaram. Yus iinu aneetiri yachi Pabloncha ni nekamtairin susamu asa, nusha nunisang ukunam atiniun pachis atumniaka aatramramiarume. ¹⁶ Ni aarmia nuka mash wi taja nuna pachis chichaawai. Turayat ni aarmauri mashkia te paanka nekaachmin ainawai. Tura nekachu ainau, tura Yusen miatrusarang umirchau ainausha Yuse chichame chikich aints aarmaunasha yapajina nunisarang Pablo aarmaurincha yapajiawar niishá nuikiartinawai. Nuna turinau asar ningki wiasmaminawai, tura asar mengkakartin ainawai. ¹⁷

Aneetir ainautiram, nungka amukatin kinta jeatsaing, iikia atumin ujakmau asaram, pásé nintintin ainau wína anangkruwarai tusaram aneartaram. Tura pengker nintimsaram pujayatrum, tu pujamurun inaisai tusaram aneartaram. ¹⁸ Tura ii Apuri Jesucristo, iin Uwentikramratin aa nuka, atumin wait anentramau asamtai, atumsha nunisrumek chikich ainausha wait anentakrum pengker awajsataram. Tura ii Apuri itiur awa tusaram, yamai nekarme nuna nangkamasrumek nekaataram. Aints ainau mash yamaisha, tura ukunmasha tuke inaitsuk ii Apurin Jesucriston waramtikarti. Tu atí.

☆ 3:8 (Sal. 90.3-4) ☆ 3:9 (Eze. 33.11; Hab. 2.3) ☆ 3:10 (Mat. 24.43-44; Luc. 12.39-40; 1.Tes. 5.2; Apoc. 16.16)
☆ 3:13 (Apoc. 21.1)

Juan Papin Eemak Akupkamuri

Tuke pujutan sukartin aa nu pachisar timiauri

¹ Yaanchuik nungkan najantsaing, Yuse Uchiringkia tuke pujuu asa, tuke pujustinun sukartinuyayi. Tura tuke pujuya nuka iin chichartamak pujamtai, iisha ni chichame antukmiaji. Tura waintasha wainkamiaji. Tura itiur pujumia nusha paan wainkau asar, ni namangkesha ii uwejejai takasmiaji. Nuna pachisan atumin aatjarme. ² Nu tuke pujustinun sukartin asa, ni Apaachiri Yusjai nayaimpinam pujayat, aints ainau waitkarat tusa nungka taramiayi. Ii Apaachiri Yus nu pujutnasha nekaantikramamiaji. Turamtai nusha wainkau asar, nu pachisar chichaakur, atumnasha nu chichamnasha ujaijrume. ³ Tura asar iisha nekasar ii Apaachiri Yusjai, tura ni Uchiri Jesucristojaisha pengker nintimsar pujaji nunisrumek atumsha iijai pengker nintimtunisrum pujustaram tusar, ii wainkamu tura ii antukmau ujaijrume. ⁴ Tura atum nekasrum nukap warastaram tusan junaka aatjarme.

Yuska paantaitai timiauri

⁵ Ju chichamnaka Jesucristo iin nuitamrau asamtai, juka iisha antuku asar yamaikia atumin ujajrume. Yuska nekas paantaitai. Tura asa niinka teeka pengké atsawai. ⁶ Antsu iisha tuke tunau turin asar, teenam pujuinawa nunisrik pujayatrik, Cristojai tsaniasar pujaji takurkia waitraji. Tura wait chicham chichaakrikia, nekas pengker aa nuka turatsji. ⁷ Antsu iisha Yuse paaniuri nintimsar pujakrikia, Yus pujawa nunisrik iisha pujaji. Tura chikich ainaujai iruntrar pengker nintimtunisar pujaji. Nu turakrikia, Yuse Uchiri Jesucristo iin jarutramak, ni numpe numparu asa, ii tunaarin mash japitramji. ⁸ Iik nintimtumasar: Wikia tunaachawaitjai takurkia nuka anangmamkur taji. Tura asar wait chicham etserji. ⁹ Antsu ii tunaari ii ujaamka, Yus nekas pengker aa nuka ni chichamen tuke umiu asa, ii tunaarin mash tsangkutramji, tura ii tunau nintimaaurincha mash japitramji. ¹⁰ Yus aints ainautin mash tunau ainiarme tusa nekarmaji. Tura wainiatrik iikia: Wina tunaaruka pengké atsawai takurkia, Yuska waitaitai taji. Tura nu takurningkia, ni chichamengka ii nintinka pujurtamtsuji.

2

Yusen chichartamsatnuka Cristoketai

¹ Uchichir ainautirmin, tunau wajasairam tusan atumin aatjarme. Tura aneachmau tunau turakrin, iin chichartamsatnusha pujawai. Nuka Jesucristoketai, nekas tunaarinchawa nuwaitai. Nuka iin pachitmas: Wisha nu aintsu tunaarin sakartaj tusan jakamiajai tusa, ni Apaachiri Yusnaka chichartamji. ² Jesucristoka ii tunaarin sakturmartas jarutramkamiaji. Antsu ii tunaarinak sakturmartaska jarutramkachmiaji, antsu mash nungkanmaya ainau tunaarincha sakartas jakamiayi.

³ Yus umirkatin chichaman akupkamia nu chicham umirkurkia: Yuska tuyapi pujawa tusar nekaamnawaitji. ⁴ Tura aints nangkami chichaak: Yuska tuyapi pujawa tusan nekajai tayat, Yus umirkatin chichaman umitsuk pujakka waitrawai, tura asa nekas chichamnaka chichaatsui. ⁵ Antsu aints Yus tímia nuna umirkungka, nuka Yusen miatrusang aneawai. Tura asamtai iisha Yus aneakrikia: Iikia Yusnawaitji tusar nekaji. ⁶ Aints: Wikia Yusnawaitjai takungka, Jesucristo ju nungkanam pujumia nunisang niisha pujustinuitai.

Yamaram chicham etserkamuri

⁷ Aneetir ainautiram, umirkatin chicham yamaram aa nunaka aatsujrume. Antsu nu nangkamtaik umirkatin chicham antukmiarume nunak aatjarme. ⁸ Antsu kinta

✠ 1:1 (Juan 1.1, 4; 1.Juan 2.13-14) ✠ 1:2 (Juan 1.14, 18) ✠ 1:7 (Apoc. 7.14) ✠ 2:1 (Rom. 6.11-13) ✠ 2:4 (Juan 14.15, 21, 23)

tsawaarak paantin wajamtai, nekas teeka mengkawai. Tura asamtai yamaram chichaman Cristo akupkamia nuka, tura atumsha umirume nuka nekas paan asamtai, chichaman atumin aatjarme juka yamarmaitai.✠

⁹ Aints: Wikia nekas paaniunam pujajai tayat, Cristo nemarniun chikichan ka-
jerakka paaniunmaka pujatsui, antsu tuke teenam pujawai. ¹⁰ Antsu chikich ainaun
aneauka nekas paaniunam pujawai. Tura asamtai chikich aints nu aintsnaka tunaanaka
pengké takamtiktsui. ¹¹ Antsu aints chikich ainaujai kajernai pujakka, tuke teenam pu-
jawai. Tura teenam pujau asa, wainmichua nunisang tuning wekaa tusangka nekatsui.✠

¹² Uchichir ainautirmin, Jesucristo ni jakamurijai atumi tunaarinka tsangkutramrau
asamtai, atumin aatjarme. ¹³ Uchirtin ainautirmin, Cristo nu nangkamtaik tuke pujuya
nu: Tuyapi pujawa tusaram, nekau asakrumin atumniasha aatjarme. Natsa ainautirmin,
atum iwianch nepetkau asakrumin atumniasha aatjarme.

¹⁴ Uchichir ainautirmin: Ii Apaachiri Yus tuyapi pujawa tusaram, nekau asakrumin
atumin aatramiajrume. Uchirtin ainautirmincha, Cristo nu nangkamtaik pujumia
nu: Tuyapi pujawa tusaram nekau asakrumin atumniasha aatramiajrume. Natsa
ainautirmincha, atum kakaram wajasrum, Yuse chichame atumi nintin ukusu asaram,
tura iwianch nepetkau asakrumin atumniasha aatramiajrume.

¹⁵⁻¹⁶ Ju nungkanmaya ainau wakerina nuka Yusnumianchuitai, antsu ju nungkan-
mayaintai. Tura asamtai ju nungkanmaya ainau aneena nuka aneenirap. Ju nungkan-
maya ainau aneetiringkia nuwaitai: Ni namangke wakera nuna tura ni jiijai wain-
maun wakerina nuna tura miajuitjai tu nintintumina nuna ju nungkanmaya ainauka
aneenawai. Tura asar nuna aneena nuka ii Apaachiri Yusnaka aneenatsui. ¹⁷ Ju
nungkanam aa nuka mash mengkakatnuitai. Tura ju nungkanmaya ainau timiá wakerina
nuka mash mengkakatnuitai. Antsu Yuse wakeramurin najaninak pujuinauka tuke
iwiaku pujusartinuitai.

Nekas chicham tura wait chicham pachisar etserkamu

¹⁸ Uchichir ainautiram, nungka mesertin kinta jeatak wajasi. Atumka Cristo ne-
mase tatatui tamausha antukmiarume. Yamaikia Cristo nemase untsuri wantinkaru
asaramtai, nungka mesertin kinta jeatak wajasi tusar iisha nekaji.✠ ¹⁹ Nu aints ainau
ijai iruntrar pujuinayat, nekasar Criston umirchau asar jiinkiarmai. Antsu Criston
umirkaruitkungka, iijai tuke iruntrar pujuscharayash. Tura Criston umirinachu asar,
iiniangka jiinkiaru asaramtai, iisha nuka paan nekaji.

²⁰ Cristo atumin Yuse Wakanin suramsau asamtai, mash paan nekarme.✠ ²¹ Atumka
nekachuitrume tu nintimsanka atumniaka aatsujrume. Antsu chicham nekas aa nu
nekau asakrumin aatjarme. Tura asamtai chicham nekas aa nuna chichainauka wait
chichamnaka chichainatsui. Atumsha nusha nekarme. ²² ¿Jesúsán pachisar wait
chichaman etserin ainauka warintinawa? Nu aints ainauka: Jesúska Yus akupkach-
mawaitai tinawai. Nuka Criston nakitinak: Yuse Uchirinchoitai tinau asar ni nemase
ainawai. Tu tinau asar Yusnasha pachinatsui. ²³ Jesúska Yuse Uchirinchoitai tauka nuka
Yuse uchirinchoitai. Antsu Jesús Yuse Uchirintai tauka nuka Yuse uchirintai.✠

²⁴ Tura asamtai chicham nu nangkamtaik antukmiarme nu tuke atumi nintin ukus-
taram. Nu turakrumka Yuse Uchirijai, tura ni Apaachiri Yusjaisha tsaniasrum pujustinu-
itrume. ²⁵ Jesucristo iin chichartamak: Pujut nangkankashtinun nekas susatnuitjarme
turammiaji.

²⁶ Aints atumin anangkraminak pujuinaun pachisan ju chichamnaka aatjirme.
²⁷ Antsu Yus ni Wakanin atumin akupturmakmia nu atumi nintin tuke pujurtamu asa,
mash aa nuna atumin nuitamrume. Yuse Wakani nuikiarta nuka nekasaintai. Antsu wait
chichamnaka atumniaka nuitamtsurme. Tura atumin nuitamu asamtai, chikich aints
wína nuiturat tusarmeka yuumatsrume. Tura asaram Yuse Wakani atumin nuitamramia
nu nintimsaram Cristojai tuke tsaniasrum pujustaram.

✠ 2:8 (Juan 13.34;15.17) ✠ 2:11 (Rom. 13.12-14) ✠ 2:18 (2Juan 7) ✠ 2:20 (1.Cor. 2.10-16) ✠ 2:23 (1.Juan 4.15)

²⁸ Uchichir ainautiram nawantrutirmesha, Cristojai tsaniasrum pujustaram. Nu turakrumka, Cristo wantinmatai, iisha natsaamtsuk pengker nintimsar Nijai ingkiunikt-inuitji. ²⁹ Atumsha Jesucristo nekas pengkeraitai tusaram nu nekakrumka, aints pengker aa nuna tuke turinauka nekasar Yuse uchiri ainawai tusaram nekarme.

3

Yuse uchiri ainaun pachis etserkamu

¹ Nintimrataram. Ii Apaachiri Yus iin timiá anenmau asa: Wína uchiruitrume turamji. Iin turamu asamtai, nekasar Yuse uchiri ainiaji. Tura asakrin ju nungkanmaya ainauka Yusen nekainachu asar iinka: Juka Yuse uchiriyampita tusarka nekarminatsji. ☆

² Aneetir ainautiram, yamaisha Yuse uchiri ainiaji. Tura ukunmasha warukatnukitaj nuka yamaikikia nekatsji. Antsu Cristo wantinkamtai, warukuita tusar paan wainkau asar, iisha Niya tumau atinuitji. Iisha nusha nekaji. ☆ ³ Tura Jesucristo pengké tunaarinchau asamtai, ni tatintrin nakainak pujuinausha Cristo pengké tunaarinchau pujawa nunisarang pujusartas ni tunaarinka ukuinawai.

⁴ Aints tunau takauka Yuse akupamurinka umirtsui. Tura Yuse akupamurin umirchauka tunaun turawai. ⁵ Jesucristo aints ainauti tunaarin tuke mash sakturmartas ju nungkanam tamiyai. Tura Cristoka pengké tunaarinchauyai. Atumsha nusha nekarme. ☆

⁶ Aints Criston nintimias pujakka, tunaunumka tukeka pujatsui. Antsu aints tuke tunau takauka: Cristo tu awai tuuka nintimtsuk pujawai, tura Cristosha itur pujawa tusangka pengké nekatsui. ⁷ Uchichir ainautiram, aints kichkisha atumin anangkramawarai tusan nunasha tajarme: Cristo nekas pengker asamtai, aints pengker aa nuna takauka pengkeraitai. ⁸ Antsu Yus aints ainaun najantsaing, Satanás tuke tunaarintin pujuyai. Tura asamtai aints tuke tunau takauka Satanásnawaitai. Tura wainiat Yuse Uchiri Satanása takatrin mengkaaktas tamiyai. ☆

⁹ Yuse uchiri ainau Yusnumia akiinau asar, tunaanumka tukeka pujuinatsui. Tura Yuse uchiri asar, tunaanumka tukeka pujuschartin ainawai. ¹⁰ Tura asamtai ¿yaachita Yuse uchirisha, tura yaachita Satanása uchirisha? tusar nekaatnuitji. Pengker aa nuna turichuka, tura chikich ainaun aneekchuka nekas Yuse uchirinchuitai tusar nekaatnuitji.

Aneenimi timiauri

¹¹ Chicham nu nangkamtaik antukmiarume nuka nuwaitai: Aneenimi. ☆ ¹² Antsu aints Caín naartin yaanchuik pujumia nunisrikia acharmi. Nuka Satanásnau asa yachiin maamiyai. ¿Tura warukang maaya? Ni yachí Yusen miatrusang umirak pengker aa nuna takau asamtai, antsu ningkia tunau takau asa, yachiinka kajerak maamiyai. ☆

¹³ Yatsur ainautiram, ju nungkanmaya ainau atumin kajertaminamtaisha: Maj ¿warukantsuk iincha kajertaminai? tuuka nintimtsuk asataram. ¹⁴ Yaanchuikia jakawa nunisrik pujayatrik, yamaikia Yus umirkurkia, tuke Yusjai iwiaaku pujustinuitji. Iikia Cristonu ainau aneau asar nuka nekaji. Antsu chikich ainau aneetsuk pujuinauka tuke jakawa nunisarang pujuinawai. ¹⁵ Aints chikich ainaun kajernuka mangkartin aintsua nunisketai. Tura aintsun maatas wakerauka pujut nangkankashtinaka nintimias pujuschamnawaitai. Atumka nusha nekarme. ¹⁶ Jesucristo iin jarutramkau asamtai, ni anengkratairisha nekaji. Iin timiá anenmau asamtai, iisha nunisrik Yusnau ainau aneau asar, ni iwiaaku pujusti tusar iisha jakatnuitji. ☆ ¹⁷ Aints ni yutairin tura ni entsatirin takaiat, ni yachí waitnas pujau wainiat, wait anentachkungka ¿ituir Yusnasha ni nintijaisha aneeting? ¹⁸ Wina uchichir ainautiram, aya chichasrikia: Aneajme tutsuk asarmi. Antsu nekasar pengker aa nu turakur yainikmi tajarme.

Natsaamtsuk Yuska seatnuitji timiauri

☆ 3:1 (Juan 1.12) ☆ 3:2 (1.Cor. 13.12) ☆ 3:5 (Juan 1.29) ☆ 3:8 (Hebr. 2.14-15) ☆ 3:11 (Juan 13.34;15.12)
 ☆ 3:12 (Gén. 4.8) ☆ 3:16 (Juan 15.13)

19-21 Aneetir ainautiram, ii nintijai: Tunaawitjai tutsuk pujakrikia, natsaamtsuk Yuska seatnuitji. Tu pujakrikia, Yuse chichame nekas aa nu umirnuitji titinuitji. Tura asakrin Yus mash nekau asa, ii nintincha nekarmaji. Tura Jesús aints ainaun aneemia nunisrik aneetatkamar yuumataji tusar, napchau nintimsar pujarin wainiat, Yus ii nintincha nekau asa nekas iincha paan nintimtikramji, tu nintimsar pujustinuitji.✠ 22 Yus tu seakrinkia Yus: Wína chichamur umirtuktaram tusa akupturmakmiaji nu umiru asar, tura ni wakeramurisha umiru asakrin ii seaji nunaka mash suramsatnuitji.✠ 23 Yus ni chichamen: Umirtuktaram tusa, akupturmakmiaji nuka juwaitai: Wína Uchir Jesucristo nekasampita titaram, tura wi chichaman akuptukmiajrume nunisrumek aneenitaram.✠ 24 Aints Yuse chichamen umirak pujakka, nuka Yusjai tsanias pujawai, tura Yuscha nijai tsanias pujawai. Tura asar mai kichkia nunisarang ainawai. Tura Yuse Wakani ii nintin pujurtamu asamtai, Yuska iijai pujawai tusar nekaji.✠

4

Yuse Wakani tura Cristo nemase wakani pachisar etserkamu

1 Aneetir ainautiram, ju nungkanam wait chichaman etserin untsuri irunui. Tura nuka: Wisha Yus akupkamuitjai nangkamiar tinu ainawai. Tura asaram nekachiatrumek: Nekas Yus akupkamuitai tiirap. Antsu ¿Nekasash Yuse Wakanijai chichaa? tusaram nekaataram. 2 Nu nekaatasrum wakerakrumka tu nekaatnuitrume. Aints Jesúsán pachis: Nuka Yuse Uchirintiat, nekas aints wajas junia aintsua nunisang akiinamiayi, tu chichaakka, Yuse Wakanijai chichaawai. 3 Antsu aints Jesúsán pachis tu chichachuka Yuse Wakani ni nintinka pujatsui. Antsu Cristo nemase wakani ni nintin pujawai. Tura Cristo nemase wakani tatinuitai tamauka antukmarume. Nu wakantrintin yanchuk ju nungkanam taawitai.✠

4 Uchichir ainautiram, atumka Yusnau asaram, Yuse Wakani atumi nintin pujawai. Antsu ju nungkanmaya ainau nintin iwianch pujawai. Antsu atumi nintin puja nuka timiá kakaram asamtai, atumsha nu wait chichaman etserin ainau nepetkawaitrume. 5 Nu wait chichaman etserin ainau ju nungkanmaya asar, aya nungkanmaya aa nuna pachisar chichainawai. Turinamtai ju nungkanmaya ainau nuna chichamenka pengker anturinawai. 6 Antsu iikia Yusnawaitji. Tura asakrin Yusnau ainauka iinu chichamen anturtaminaji. Antsu Yusen umirchau ainau iinu chichamenka anturtaminatsji. Tura asaramtai ¿yaachia Yuse Wakani nekas aa nuna umirua? tura ¿yaachia anangkartutai wakan aa nuna umirua? tusar nekaamnawaitji.✠

Yuska tuke anengkratui timiauri

7 Aneetir ainautiram, aneeniamuka Yusnumia winau asamtai, iisha aneenimi. Yusen aneenauka Yuse uchiri ainawai. Tura asar Yus tuyapi pujawa tusar nekainawai. 8 Yuska tuke anengkratnuitai. Antsu chikich ainaun aneetsuk pujauka: Yus tuyapi pujawa tusangka nekatsui. 9 Yus iin timiá anenmau asa: Atum wina Uchirjai tuke iwiaaku pujusmintrum tusa, ni Uchirin kichik amia nuna ju nungkanam akupturmakmiaji. Tura asa ni anengkratairin paan nekamtikramamiaji.✠ 10 Yuse anengkratairingkia nuwaitai: Iikia Yuska aneachmaitiat, Yus aints ainautinka timiá anenmau asa, ii tunaarin sakturmartas ni Uchirin akupturmakmiaji.

11 Aneetir ainautiram, Yus iin timiá anenmau asamtai, iisha nunisrik mai aneeni wajarmi. 12 Yuska pengké wainchawaitiatrik iisha mai aneeni wajakrikia, Yus ii nintin pujurtamji. Tura asamtai Yusjai metek anenin atinuitji.✠ 13 Yus ni Wakanin iin suramsau asamtai, Yus iijai tsanias pujawai, tura iisha Nijai tsaniasar pujaji tusar nekaji.✠ 14 Ii Apaachiri Yus mash nungkanmaya ainautin uwemtikramratas ni Uchirin akupturmaku

✠ 3:19-21 (1.Cor. 4.4) ✠ 3:22 (Mat. 7.7-11; Juan 14.13;15.7,16;16.23-24; 1Juan 5.14-15) ✠ 3:23 (Juan 13.34;15.12, 17) ✠ 3:24 (Rom. 8.9; 1Juan 4.13) ✠ 4:3 (Mat. 7.15; 2Juan 7) ✠ 4:6 (Juan 8.47;15.19) ✠ 4:9 (Juan 3.16) ✠ 4:12 (Juan 1.18) ✠ 4:13 (Rom. 8.9; 1Juan 3.24)

asamtai, iikia nu nekau asar, nu chichamsha aints ainau ujaaji. ¹⁵ Aints: Jesús nekas Yuse Uchirintai tauka Yusjai tsanias pujawai. Turamtai Yuscha nijai tsanias pujawai.✠

¹⁶ Tura asamtai Yuska iincha nekasampi anenmaji tusar iikia nekaji. Yuska tuke anengkratnuitai. Tura asamtai aints chikich ainaun tuke aneauka Yusjai tsanias pujawai. Tura asamtai Yuscha nijai tsanias pujawai. ¹⁷ Tura asamtai nekas aneenit nuimiaru asar, iisha Jesucristo ju nungkanam pujumia nunisrik pujaji. Tura asar Cristo aints ainau tunaurni jiistas winamtai, iikia natsaamtsuk tura shamtsuk pujustinuitji. ¹⁸ Nekas aneni-amunmaka shamamuka atsawai. Iikia nekasar anenisar pujakrinka sapijikia mengkawai. Antsu ii tunaarijai wait wajaktin asar shamkatnuitji. Tura asar nangkamrik shamakur pujakrikia anengkratsuji.

¹⁹ Yus eemak iin anenmau asamtai, iisha ni aneaji. ²⁰ Tura aints: Wisha Yusen aneajai tayat, chikich ainaun kajeruj pujakka waitrawai. Nekas chikich aints ainaun aneachusha ¿itiur Yusen wainchausha aneeting? ²¹ Yus iincha ju chicham umirtuktaram tusa akupturmakmijai: Yusen aneauka chikich ainauncha aneeti turammiaji.✠

5

Ju nungkanam ainia nuka nepetkatnuitji

¹ Aints chichaak: Jesúska nekas Yus akupkamuitai ta nuka Yuse uchirintai. Tura asamtai ii Apaachiri Yus aneakrikia, ni uchiri ainausha aneetnuitji. ² Ii Apaachiri Yus aneakur, tura ni chichamen umirkur pujakur, Yuse uchiri ainausha nekasar aneaji tusar nekaji. ³ Yus nekasar aneakrikia, ni chichame: Nu umiktaram tusa iin akupturmakmijai nu umiaji. Tura Yus aneakrikia ni chichame umirkatnuka yumtichuitai.✠ ⁴ Nekasar tunau ju nungkanam ainia nu nepetkatasrikia, tu nepetkatnuitji: Yus nekasampita tusar nintimtau asar, ju nungkanam ainia nuka mash nepetkatnuitji. ⁵ ¿Yaachia ju nungkanam ainia nuna nepetkatnuita? Aints nekas Jesús Yuse Uchirintai tu nintimias pujauka ju nungkanam pasé aa nunaka mash nepetkatnuitai.

Yuse Uchiri pachisar etserkamuri

⁶ Jesucristo ju nungkanam taamtai, entsa imiaamunam Yus chichaak: Juka wína Uchiruitai timiayi. Nunia Jesús jaka, ni numpenka numparmiayi. Jesús entsa main asamtai, nuke nekau asar Yuse Uchirintai tatsuji. Antsu iin jarutramak ni numpe numparu asamtai, Jesúska Yuse Uchirintai tusar nekaji. Tura Yuse Wakanisha tuke nekas chicham aa nunaka nekamtikiartin asa, Jesucristo Yuse Uchirintai tusa iincha nekamtikramji. ⁷⁻⁸ Yuse Wakani nunia Jesúska imiaimuri, nunia ni numpe numparmauri kempatam aa nuka mash metek ainawai tusar, Jesús Yuse Uchirintai tusar nekaji. ⁹ Aints ujatmakakrincha, nu antukrikia nekasantai tuweaji. Tura Yuse etsermauri nuna nangkamasang nekas waitchau asamtai, ni Uchirin pachis ta nuka antuku asar nekasampita titinuitji.✠ ¹⁰ Aints Yuse Uchirin nekasampita tusa, ni nintijai tuke nekasampita tawai. Antsu Yusen nintimtichuka Yus ni Uchirin pachis tímia nunaka nekashawaitai tau asa: Yuska waitaitai tawai. ¹¹ Tura Yus ni Uchirin pachis iin ujatmaji nuka nuwaitai: Wína Uchir tuke iwiaaku pujau asamtai, atumsha nijai tuke tsaniasrum iwiaaku pujustinuitrume iinka turamji. ¹² Yuse Uchirin nintimsar pujuinauka tuke Yusnum iwiaaku pujusartin ainawai. Antsu Yuse Uchirin nintimtsuk pujuinauka tuke Yusnum iwiaakuka pujuschartin ainawai.✠

Inangnamu chicharkamuri

¹³ Yuse Uchiri nekasampita tusaram nintimtusrum pujau asaram, tuke Yusnum iwiaaku pujustinuitrume. Nu nekaataram tusan, ju chichamnaka atumin aatjarme.✠

✠ 4:15 (1.Juan 2.22-23) ✠ 4:21 (Mat. 5.44-46; Marc. 12.29-31) ✠ 5:3 (Mat. 11.30; Juan 14.15; 2.Juan 6) ✠ 5:9 (Juan 5.32-37) ✠ 5:12 (Juan 3.36) ✠ 5:13 (Juan 20.31)

¹⁴⁻¹⁵ Ni wakeramurijai metek iikia Yus seakrinka, niisha anturtamji. Tura asamtai Yus wi seamka mash anturtawapi tusar nekaji. Nu nekau asar, wi seaja nunaka Yus nekas surustatuapi tu nintimsar seaji. Nu nekau asar Yuska pengker nintimtaj. ☆

¹⁶ Aints jatan jurumakchatatiat tunaun takauka, tuke mengkakatnunam wechau asamtai, Yus ni tunaarin tsangkurat tusaram seattiarum. Turakrumningkia Yuska nu aintsun pujut nangkankashtinun susatnuitai. Antsu chikich aints jatan jurumaktias tunaun takauka tuke mengkakatnin asamtai, nu aints pachisrum Yus seattiarum tusanka tatsujrume. ¹⁷ Yus umirtsuk pujakur turutisha mash tunaawitai. Tura chikich tunau tuke jakatniunam wechatnusha ainawai.

¹⁸ Yuse uchiri ainautisha Yusnumia akiinau asar, tunaanumka tukeka pujatsji. Tura asakrin iwianch iincha takarmaschamnawaitji tusar nekaji. ¹⁹ Yuse aintsri ainautikia Yusnawaitji. Tura mash nungkanmaya Yusen umirchau ainauka Satanásnau ainawai. Iisha nusha nekaji.

²⁰ Yuse Uchiri Jesucristo yaanchuik ju nungkanam taa: Yus nekas puja nuka tu pujawai tusa nekantikramamijai. Tura asar Jesucristo nekas Yuse Uchiri aa nujai tsaniasar pujaji. Niisha tuke pujuu asa, iincha pujut nangkankashtinun suramji tusar nekaji. ☆

²¹ Uchichir ainautiram: Yuschau wainiatrum warí timiá anearme nuka atumi yusrintai. Tura asamtai chikich yuska atsuti tusaram wainkataram. Maaketai.

Juan Papin Ataksha Akupkamuri

Nekas chichaman tura anenitnasha pachis etserkamu

¹ Wiitjai Cristonu ainau juuntrinjai. Ju papinasha Yuse uchiri iruntrar pujuinamunam akupajai. Cristo atumin eatmaku asamtai, wisha nekasan atumin aneajrume. Antsu wikikia aneatsjarne. Antsu chikich ainausha nekas chicham aa nuna nekainauka atumniasha anenminawai. ² Nekas chicham aa nuka ii nintin ukusmau asamtai, tura iijai tuke pujustin asamtai, wisha atumniasha aneajrume. ³ Ii Apaachiri Yus tura ni uchiri Jesucristo nekas chichaman atumin nekamtikramau asa, ni anengkratairi atumniasha nekamtikramawarti tusan, tura atumniasha wait anentramrarti tusan, tura pengker nintimsaram angkan pujustinnasha suramsarti tusan aatjarne.

⁴ Ii Apaachiri Yus nekas chicham aa nuka umirtuktaram tusa, iin akupturmakmiaji nuna aints atumjai pujuinauka umirinawai. Tura asaramtai wikia nuna nekaan nukap warasmajai. ⁵ Yamaikia yatsur ainautirmin umaarutirmincha tajarme: Wait anearum aneenitaram. Chichaman akupaja juka yamarmachuitai. Antsu nu nangkamtaik antukmiaji nuketai. ⁶ Nekasar Yus aneakrikia: Wina akupamur umirtuktaram tusa, Yus akupturmakmiaji nu umirkur pujustinuitji. Tura nu chichamka nu nangkamtaik antukmiarume nuka juwaitai: Nekasrum aneenisrum pujustaram.✠

Anangkartinun pachis etserkamu

⁷ Ju nungkanam anangkartin untsuri irunui. Nuka Jesucristo aintsua nunisang akiinamiayi tinatsui. Aints tu pujuinauka aints ainaun anangkinau asar Cristo nemase ainawai.✠ ⁸ Yus atumin takatan suramsamia nuna mengkatrukai tusaram wainkataram. Antsu Yusnum tuke pujustaj tusaram aneartaram.

⁹ Aints Cristo nuikiarturmaurin inais: Nuna nangkamasnak nekajai tauka Yusjaingkia pujatsui. Antsu aints Cristo nuikiarturmaurin tuke umirak pujakka, nuka ii Apaachiri Yusjai tura ni Uchirijai tsanias pujawai. ¹⁰ Aints Cristo chichamen nuikiartichutiat wait chichaman atumin nuitamrartas wininamtaikia: Iijai pujusmi tiirap. ¹¹ Nu aints: Iijai pujusmi takurmeka ni pasé nuikiartamuri pachisrum: Nuka pengkeraitai titinuitrume. Turakrumka nu aintsua nunisrumek tunau wajastinuitrume.

Inangnamu chicham akupkamuri

¹² Chichaman untsuri atumin ujaktasan wakerayatun, ju papinumka mashkia aa-trashtatjarne. Antsu wiki atumin jiiastian nintimjai. Tura atumjai jinum ingkiunisar wainaikiar chichaakur warastinuitji.

¹³ Yuse uchiri ainau Yus eakmau asar chichaman akupturminawai. Maaketai.

✠ 1:6 (Juan 13.34; 14.15,23-24;15.12,17; 1,Juan 5.3) ✠ 1:7 (Mat. 7.15; 1,Juan 2.18;4.1-3)

Juan Papin Ukunam Akupkamuri

Gayon pachis pengker chichasmauri

¹ Wiitjai Cristonu ainau juuntrinjai. Gayoa, ameka wína aneetir amikur asakmin ju papin aatjame. Wisha nekas an amin aneajme.✠

² Ameka wína aneamur yatsur asakmin, wikia amin pachisan Yusen seatkun: Tuke pengker pujusat tusan, tura sungkurmatsuk pujusat tusan tura tuke Yusen nintimias pujusat tusan Yusen seatjame. ³ Cristonu ainau juni irasartas taar, ame nekas chicham umirmaun pachisar ujatkarantai, nuna antukan nukap warasmajai. ⁴ Cristonu ainau wi etsermaurun antuku asar, Yuse uchiri wajasarmia nuka wína uchirua nunisarang ainawai. Tura asar nuka nekas chichaman umirinak pujuinantai nukap waraajai. Nuna nangkamasnak timiá warasmintruka pengké atsawai.

⁵ Ameka wína aneamur yatsur asakmin, Cristonu ainau tuke pengker wainuyame. Tura chikich yaja nungkanmaya Cristonu ainau taaramtaisha nunismek pengker wainuyame. ⁶ Nu aints ainau juni taar amin pachitmasar: Iincha anenmau asa, pengker yainmakmaji tusar, Cristonu ainau iruntramunam etserkarmayi. Tura nuka ataksha amin jearantai, ni yuumamuri susam akupkarta. Nu turakum Yus pengker awajsatatme. ⁷ Nu aints ainau Jesucristo inatiri asar, Yuse chichamen etserinawai. Tura asar Yusen umirchau ainau kuikiarin jurutan nakitrarmayi. ⁸ Tura asarantai nekas chicham aa nuna angkan etserkarti tusar, Cristonu ainautikia yainiktinuitji, tura ni yuumamurisha susatnuitji.

Aints pasé turamuri pachis etserkamu

⁹ Wikia Cristonu ainaun mash papin aatran akuptukmiajai. Tura wainiat Diótrefes chikich ainaun inartas wakerau asa, iinu chichamenka pachiatstui. ¹⁰ Tura asantai wi winaknaka, ni turamurinha pachisan chicharkatatjai. Iin pachitmas waitrak tsanumu weawai. Tura Cristonu ainau Yuse chichamen etserkartas irainak taaramtaisha, juni wayaataratstui. Nuna turin asa chikich ainau: Iijai pujusmi tina nunasha turuwairap tusa surituweawai. Tura iijai pujusmi tinu ainaunka: Cristonu ainau iruntramunmaya jiinkitaram tawai.

¹¹ Aneamur yatsuru, nu turamuka amesha nuimiarai. Antsu pengker aa nuna turina nu nuimiarta. Pengker aa nuna turauka Yusnawaitai. Antsu tunau turauka Yusnaka nintimtsui.✠

¹² Aints ainau mash Demetrion pachisar: Pengke aintsuitai tinawai. Nu tinamuka nekasaintai. Iisha nunisrik Demetrion pachisar: Pengke aintsuitai takurin, amesha nuka nekasaintai tusam nekame.

Inangnamu chicham akupkamu

¹³ Amincha nukap titasan wakerayatun, ju papinumka mashkia aatrashtatjame. ¹⁴ Antsu wári amin jiiistan wakerau asan nuni jean, amijai jinum ingkunan chichas-tasan wakerajme.

¹⁵ Yatsuru, angkan pengker nintimsam pujusta. Ami amikrum juni pujuinau amincha chichaman akupturminawai. Ii amikri amijai pujuinaun kichkin kichkin wisha chichaman akuptinajai. Maaketai.

Judas Papin Akupkamuri

Chicham akupkamuri

¹ Wiitjai Judasaitjai. Jesucristo inatirinjai. Tura Santiago yachiinjai. Ju papin aaran akuptajrume. Ii Apaachiri Yus: Wina aintsur ataram tusa atumin anenmarme. Tura Jesucristojai tuke pujustaram tusa atumniaka waitmarme.✠ ² Yus atumin wait anentramak pengker nintimsaram angkan pujustinun tura ni anengkratairincha tuke suramsarti tusan tajarme.

Anangkartin ainaun pachis timiauri

(2 Pedro 2.1-7)

³⁻⁴ Aneetir ainautirmin, Yus atumniaka uwentikramrau asamtai, tura winasha uwentikruru asamtai, nuna pachisan atumin nukap aatratasan wakerukmiajai. Antsu tunau ainau atumin anangkraminak: Yuska timiá anengkratin asamtai, pachitsuk tunauka turamnawaitji tinu asaramtai, nunaka yamaikia aatrashtatjarme. Nu aints ainauka ii Apuri Jesucristoncha pengké umirinatsui. Tura asaramtai yaanchuik nu aints ainaun pachis: Tu wait wajakartin ainawai, Yuse chichame tu aarmau asamtai, yamaikia tajarme: Yuse chichame pengké yapajiachmin aa nuka Yuse aintsri ainautin suramsawaitji. Tura asamtai nu chichaman yapajiawarai tusaram surimkataram tusan tajarme.

⁵ Yaanchuik Yus ni aintsri ainaun Egipto nungkanmaya jiikmiao ainayat, ukunam Yusen umirkacharu asar jakarmiayi. Nusha yanchuk mash nekau arumning nu kajinmakiram tusan ataksha aatjarme. ⁶ Yuse awemamuri ainausha yaanchuik Yusen umirkariat, ni pujutirin nayaimpinmaya jiinkiaru asaramtai, Yus niincha jirujai jingkia, tee amanum tuke jiinkichminnum engkea, ni kintari jeamtai, ni wait wajaktrintrin susartinuitai. ⁷ Tura Sodoma yaktasha, tura Gomorra yaktasha, chikich yaktasha arakchichu armia nusha nintimratararam. Yuse awemamuri tunaun turawarmia nunisarang nu yaktanmaya ainau tunau turin asar, nuwan nuwatinachiat tuke tsanirmin armiayi. Tura mai aishmangtaksha tsanirmin armiayi. Tura asaramtai aints mash nintimrarat tusa, Yus nu yaktancha tuke mengkakarti tusa, jijai keemakmiayi. Yamaisha nu aintsua nunisarang Yusen umirtsuk pujuinauka ji kajintrashtinnum wait wajakartin ainawai.✠

⁸ Tura asar nu aints ainausha atumin winiarmia nuka Sodoma yaktanmaya aintsua nunisarang ainawai. Nuka karamrajai tinawai. Tura ni namangken pachitsuk pase-mamtikinawai. Tura Yusnasha umirtan nakitinawai. Tura apu ainaun pachisar pasé chichainawai. ⁹ Antsu Yuse awemamuri juuntri, Miguel naartin nunaka turachmiayi. Antsu Moisés jakamtai, ni namangken jukitas wakerayat, iwianchi apuri Satanás suritamasa jukitatkama tujinkamiayi. Tura suritamaitiat Miguel Satanásan jiyakchamiayi. Antsu chicharak: Yus aminka chichartamkati timiayi.✠ ¹⁰ Tura nu aints ainauka nekainachiat pachitsuk pasé chichainawai. Tura junia nungkanam aa nunak nekainau asar, tangku nintinchawa nunisarang ainawai. Tura tangkua nunisarang ni namangken ningki mesmaminawai.

¹¹ Maj, nu aints ainau Caín ni yachiin kakerak maamia nunisarang mengkakartin ainawai. Tura Balaama nunisarang kuikian wakerinau asar mengkakartin ainawai. Tura aints Coré naartinua nunisarang apu ainaun umirtan nakitinau asar mengkakartin ainawai.✠

¹² Atumka aneenimi tusaram, iruntraram fiesta najankurmeka, nu anangkartin ainau natsaamtsuk nakunakut nukap yuwinawai, tura nukap uminawai. Tura Yuse chichamen

✠ 1:1 (Mat. 13.55; Marc. 6.3) ✠ 1:7 (Gén. 19.1-24) ✠ 1:9 (Deut. 34.6; Dan. 10.13, 21; Zac. 3.2; Apoc. 12.7)

✠ 1:11 (Gén. 4.3-9; Núm. 16.1-35; Hebr. 11.4; 1.Juan 3.12; Apoc. 2.14)

etsernuitjai tinayat, Yuse aintsri ainauka waininatsui. Tura mukunit yumi jiturchatatiat nase nasentak mukuntiun juwawa nunisarang, nu aints ainausha nangkamiar chichaj pujuwenawai. Tura numi neretiri jeau wainiat, neretsuk waja nunisarang nangkamiar pujuwenawai. Tura asar numi kangkaptuk jaka kukarua nunisarang ainawai. ¹³ Nu anangkartin ainauka juun entsa tamparamuria nunisarang ainawai. Tura tuke natsanpiaku aa nuna turin asar, entsa tamparak sauran entsa yantamen ajapa ukukmiawa nunisarang japnatin ainawai. Tura yaa nayaimpinmaya teenam ayaarua nunisarang tuke mengkakartin ainawai.

¹⁴ Nu nangkamtaik Yus Adánkan najanamiayi. Nunia Adánka weari yajutmaki yajutmaki siete (7) amia nuka Enoc ayayi. Enocsha nu anangkartin ainaun pachis yaanchuik etsermia nuka nuwaitai: “Ii Apuri ni umirin untsuri warang ainaujai taratnuitai.”[☆]

¹⁵ Tura tunau ainau Yusen nakitinak tunau takatan tuke inaitsuk turinau asar, tura Yusen pachisar tuke pasé chichainau asaramtai, ii Apuri nu aints ainaun wait wajaktiniun susatas taratnuitai,” Enoc etserak timiayi. ¹⁶ Nu anangkartin ainauka mash ainia nuna pachisar pasé chichainawai. Tura ni namangke wakeramurinak najanin ainawai. Tura wikia miajuitjai tumaminawai. Tura wína pengker nintimtursarat tusar, chikich ainaun anangkawartas: Ameka pengke aintsuitme tinawai.

Cristonu ainaun chicham akatramuri

¹⁷ Atumsha aneetir ainautiram, ii Apuri Jesucristo nuiniatiri ainau chichaman eemkar etserkarmia nu nintimrataram. ¹⁸ Nusha atumin chichartaminak: “Nungka meseatsaing, aints ainau Yusen wishikinak pujusar, ni wakeramurin najanawartin ainawai,” tiarmiayi.[☆] ¹⁹ Nu aints ainau atumin metekchau nintimtikraminawai. Tura Yuse Wakani ni nintin engkemtuachmau asar, ju nungkanam aa nunak nintiminawai.

²⁰ Antsu atumka, aneetir ainautiram, Yus nekasampita tusaram tuke inaitsuk kakaram wajastaram. Tura Yuse Wakani kakarmarijai Yus seataram. ²¹ Tura Yuse anengkratairi tuke nintimsaram pujustaram. Turakrumin ii Apuri Jesucristo atumin wait anentramak pujut nangkankashtinun suramsatin kinta jeati tusaram nakastaram.

²² Tura chikich ainau tuke Criston nekasashi tinauka nekasampita tiarat tusaram wait anentratararam. ²³ Chikich ainau tunaunum pujuinau jinum epenau wakemtasrum wakerarme nunisrumek tunaanumia uwentikrataram. Antsu aintsu entsatiri pakui maatrau tsuutarme nunisrumek nu aintsu tunaari nakitau asaram: Iisha tunaanum jeai tusaram, chikich aints wait anentratararam.

Inangnamu Yus maaketai timiauri

²⁴⁻²⁵ Yuska kichkitai. Tura mash nekawaitai. Tura asa Yus iin Uwemtikramratin aa nu: Tunaunum jeiram tusa, ni kakarmarijai atumin yainmaktinuitrume. Tura ni pujamunam pengké tunaarinchau pujustaram tusa, atumin nukap waramtikramsatnuitrume. Tura asamtai ii Apuri Jesucristo pachisar Yuska pengker awajsarmi. Tura asar: Ameketme juuntam tura Ameketme kakarmam, tura Ameketme Apum tiarmi. Yaanchuiksha, tura yamaisha tuke mash aa nuna inakratnuitai. Tu atí.

☆ 1:14 (Gén. 5.18, 21-24) ☆ 1:18 (2.Tim. 3.1-5; 2.Ped. 3.3)

Jesucristo Juankun wantintukmauri (El Apocalipsis)

Jesucristo ni chichamen nekamtikiamuri

¹ Wiitjai Juankuitjai. Jesucristo inatirinjai. Ii Apaachiri Yus Jesucriston ukunam atin aa nuna nekamtikiamu asa, niisha: Wína umirtin ainau nekaawarat tusa, ni awemamurin akupak, wina ju chichamnaka nekamtikruami. ² Tura ni chichamen Jesucristo winaka nekamtikruau asamtai, wi wainkamja nunaka mash nekasaintai tajai.

³ Yus ju chichaman wári umiktin asamtai, aints ainau ju chichaman ukunam atiniun pachisar aujina nuka nekasar warasartinuitai. Tura ju chichaman antinauka, tura ju armaunaka mash umirinauka warasartinuitai.

Juan siete yaktanmaya ainaun aatramuri

⁴⁻⁵ Wiitjai Juankuitjai. Asia nungkanam siete (7) yaktanam Cristonu ainau iruntraram pujautirmin chichaman akuptajrume. Yus yaanchuik tuke pujumia nuka yamaisha pujawai. Tura tuke pjuwitai. Nuka ni siete (7) Wakanijai, tura ni Uchiri Jesucristojai atumin nekas pengker awajtamsarti. Tura angka pengker nintimratnuncha suramsarti tusan tajarme. Jesucristo chichaman umiu aa nuka ni Apaachiri chichamen nekamtikramamiaji. Nunia jakayat, chikich ainaun nangkamasang nuwá eemak jakamunmaya nantakmiayi. Tura tuke jakashtin asa, junia apu ainaun inartinuitai. Tura iin anenmau asa, waitnas jaka numpar, ni numpejai ii tunaarinka japitramramiaji. ⁶ Tura wína aintsur asaram, wijai metek aints ainau inartinuitrume turamiaji. Tura wína Apaachiru Yuse inatiri asaram, sacerdotea nunisrumek nijai chichastinuitrume turammiaji. Tura asamtai tuke inaitsuk Jesucristoka: Ameketme kakarmam tusar pengker awajsatnuitji. Tu atí.

⁷ Antuktaram. Cristoka yurangmijai taratnuitai. Turamtaí aints ainau mash niin wainkartinuitai. Tura Criston maawarmia nusha niincha wainkartinuitai. Tura mash nungkanmaya Yusen umirchau ainau niin wainkar, wait wajaktintrin shaminak juutiartinuitai. Nekas turunatnuitai. ⁸

Ii Apuri chichartak: “Wikia nu nangkamtaik mash najanamiajai. Tura nungka amuumunmasha tuke mash inartinuitjai. Wikia Yus asan tuke tujinkachuitjai. Yaanchuik pujumiaja nunisnak tuke pujajai. Tura tuke pujustinuitjai,” turutmiayi. ⁹

Juan karanma nunisang Criston wainkamuri

⁹ Wikia Jesúsnu asan atumi yachiinjai. Atumsha Jesucristonu asaram, wait wajarme nunisnak wisha wait wajajai. Tura ukunam iruntrar Jesúsnum pujusar chikich aints ainaun inartinuitji. Tura ni tati tusar, iisha nakaji. Jesucristo Yuse chichamen wína nekamtikruamia nuna etseru asamtai, isar Patmos tutainum achikmau pujajai. ¹⁰ Tura ii Apuri kintari Yuse Wakani wína nintirun piatruku asamtai, tuntuprunini pupun pupuntramua tumaun kakarman untsunmun antukmajai. ¹¹ Tura untsunmun antukmaja nuka nuwaitai: “Ame wainme nu papinum aarta. Tura Cristonu ainau siete (7) yakat ainamunam mash aatram akuptukarta. Nu yakta naaringkia nu ainawai: Efeso, nunia Esmirna, nunia Pérgamo, nunia Tiatira, nunia Sardis, nunia Filadelfia, nunia Laodicea,” turutun antukmajai.

¹² Turutmatai: ¿Yáki turuta? tusan, tuntuprunini pajasan jiimkaman, ji keaun kuri najanamun siete (7) aun wainkamjai. ¹³ Tura japen wajaun aintsutiat nayaimpinmaya akupkamua tumaun wainkamjai. Tura wejmak sarman nawejai metek entsar, tura kachumtain kuri najanamun netsepejai metek pea wajaun wainkamjai. ¹⁴ Ni intashisha uruchia tumau nekas puju aun wainkamjai. Tura ni jiisha ji kapawa tumaun wainkamjai. ¹⁵ Tura nawesha jiru jinum jiyamua nunisang newar wajaun wainkamjai. Tura ni

☆ 1:4-5 (Col. 1.18) ☆ 1:7 (Zac. 12.10; Mat. 24.30; Marc. 13.26; Luc. 21.27; Juan 19.34-37; 1.Tes. 4.17) ☆ 1:8 (Isa. 41.4; Apoc. 1.17;2.8;22.13) ☆ 1:13 (Dan. 10.5)

chichamesha túna uutua tumaun antukmajai. ¹⁶ Tura ni untsur uwejejai yaa tumaun siete (7) aun achik takakun wainkamjai. Tura saapia tumau yantamen mai ere tsakamun jangkenia jininun wainkamjai. Yapiisha tsaá tupin wajas tsantua tumaun wainkamjai. ✠

¹⁷ Tura wikia timianun wainkan, jakawa nunisnak ni nawen yaamsan iyaarmajai. Turamtai ni untsur uwejejai wína achirak: “Shamrukaip. Wiitjai. Wikia nu nangkamtaik tuke pujuyajai. Nungka mash amukamtaisha, wikia tuke pujustinuitjai. ¹⁸ Wikia tuke iwiaakuitjai. Wikia jakayatnak nantakin asan, yamaikia tuke iwiaaku pujajai. Tura jakar matsamsartin ainaun yawirinka wi takakjai. ¹⁹ Tura asamtai ame wainme nuka mash aarta. Tura yamai atata nusha, nunia ukunam atinua nusha mash aarta.

²⁰ “Yamaikia chicham nekaachmin aa nuna amin nekamtikiatjame. Yaa siete (7) ainia nuna wína untsur uwejejai achikian takakai waitkame nuka nuwaitai, nunia ji keau siete (7) wainkame nusha nuwaitai tusan yamaikia nekamtikiatjame. Yaa siete (7) ainia nuka wína aintsur ainu wainin siete (7) ainia nuwaitai. Tura ji keau siete (7) ainia nuka wína aintsur ainu mash iruntrar siete (7) yaktanam pujuina nuwaitai,” turutmiayi.

2

Siete yakat ainamunam chicham akupkamu Efesonam chicham akupkamu

¹ “Wína aintsur ainaun wainin Efeso yaktanam puja nuka ju chichaman nekaati tusam aarta: Ni untsur uwejejai yaan siete (7) takaka nuka, tura ji keaun siete (7) kuri najanamunam japen wekaa nuka tawai tita: ² Wikia atumi turamurin mash nekajai. Tuke inaitsuk atumi takatrin kakaram takakmakrum pimpiyatrum pengker nintimsaram takakmarume nunasha nekajai. Tura aints pasé aa nuna takainauka ijai iruntrarchati tusaram suritkamarume. Tura aints nangkamiar: Wikia Cristo akupkamuitjai tinawainiatrumek: Nangkamiar tinawai tusaram nusha nekaamarume. ³ Tura nekasrum winar asaram, tuke inaitsuk winaka nemartusmarume. Tura wait wajayatrumek, yawetsuk pengker nintimsaram wína umirtutka tukeka inaituschamarume. ⁴ Tura wainiatun nunasha tajarme: Nu nangkamtaik winaka miatrusrumek anenkuram pujumiarme nunisrumka yamaikia winaka anentsurme. Tura asakrumin winaka miatrusrumek nintimtursaram pujarme tatsujrume.

⁵ “Tura asamtai aneartaram. Turaram nu nangkamtaik wína anenkuram pujumiarme nunisrumek ataksha pujustaram. Turachkurminkia wikia atumin jean, atumi yaktarinia ji keaa nunaka juruktatjarme. Tura asamtai wína umirtuku ainu atumi yaktarin iruntrarchartinuitai. Antsu atumi ninti yapajiam, ataksha miatrusrumek wína anenkurminkia nunaka turashtinuitjarme. ⁶ Tura atumi pengker turamurmincha nekajai. Nicolaítas turamuri atum nakitarme nuna wisha nunisnak nakitajai. ⁷ Yuse Wakani ta nuna wina aintsur ainu antinauka nintimrarti. Tunau nepetkaru ainaun numi tuke pujutan sukartin Yuse pujutirin waja nuna neren yuwarti tusan tsangkatkatnuitjai. Tura nuna yuwinak nijai tuke pujusartinuitai, tawai tusam aarta,” turutun antukmajai. ✠

Esmirna yaktanam chicham akupkamu

⁸ “Wína aintsur ainaun wainin Esmirna yaktanam puja nuka ju chichaman nekaati tusam aatrata: Nu nangkamtaik tuke pujumia nuka, tura nungka amukamtaisha, tuke pujustata nuka jakayat ataksha nantakin asa, yamaikia tuke jatsuk puja nuka tawai tita: ✠ ⁹ Wikia nekajrume. Atumka wína umirtuku asaram wait wajarme. Tura asaram kuikiartichu ayatrumek, nekasrum kuikiartin ainu nangkamasrumek nayaimpinam yuumatsuk pujustinuitume. Tura aints judío ainayat, judío chua nunisarang Yuse chichamen umirtsuk pujuinauka, atumin pachitmasar pasé chichainu asar, nu aints ainu Satanasjai iruntrar pujuinawai. ¹⁰ Atumka wait wajaktin aa nuka shamkairap. Anturtuktaram. Satanas atumin mash nekapramsartas atumnia yaankesha achikiar kársernum engkewartinuitai. Turamtai atum diez (10) kinta wait wajaktinuitume.

✠ 1:16 (Dan. 10.5-6) ✠ 2:7 (Gén. 3.24; Eze. 28.13) ✠ 2:8 (Isa. 41.4; Apoc. 1.17;22.13)

Atumin mantaminamtai jaachkurmeka winaka inaitusairap. Tu pujakrumningkia, tuke pujustinun tsengkrutin susatnuitjarne. ¹¹ Yuse Wakani ta nuna wína aintsur ainau antinauka nintimrarti. Tunau nepetkaru ainau jakar, ataksha jakatniunmaka wait wajakchartinuitai, tawai tusam aarta,” turutun antukmajai.

Pérgamo yaktanam chicham akupkamu

¹² “Nunia wína aintsur ainaun wainin Pérgamo yaktanam puja nuka ju chichaman nekaati tusam aarta: Saapia tumaun yantamen mai eren tsakamun takakua nuka tawai tita: ¹³ Atumka tunía pujarme nunasha wikia nekajai. Satanás ni aintsrin inartas puja nuni atumka pujarme. Nunia wína nekas pengker umirtin, Antipas naartin atumjai pujus wína pachitas chichaman etsermia nunaka maawaru wainiatrumek, atumka tuke wína umirtakrum pujuyarume. Tura wína tuke umirtutka inaituschamarume. ¹⁴ Turin ayatrumek atumnia aints yaanchuik Yuse chichame etserin Balaam pasé nuikiarturmaun tuke metawar umirinawai. Nusha Israel ainaun tunaun turuawarat tusa, tangku namangken Moaba yusrin susamu yuwaarat tusa, apu Balacan nuiniarmiayi. Nuniasha tsanirmatnasha nuiniarmiayi. Atumi irutramuri nu tunaun turuwaru asaramtai, atumi turamuri mash pengkeraitai tatsujrume.✠

¹⁵ “Tura atumnia aints ainau Nicolaítasa nuikiarturmaurin wikia nakitaja nuna inaitan nakitinawai. ¹⁶ Tura asaram nintimaurum wári yapajiataram. Tura nu aints ainaujainkia iruntrairap. Turachkurminkia wikia atumin wári werin, saapia tumau wína jangkernia jiina nujai maaniktatjai. ¹⁷ Yuse Wakani ta nuna wína aintsur ainau antinauka nintimrarti. Tunau nepetkaru ainaun yutan maná tutain nayaimpinam uukmau aa nuna yuratnuitjai. Tura wína aintsur ainaunaka kayawach pújun susatnuitjai. Nu kayanam yamaram naaringkia aarmawaitai. Nuna naarinka kichkisha nekainatsui. Antsu ningki juwinak nekaawartin ainawai, tawai tusam aarta,” turutun antukmajai.✠

Tiatira yaktanam chicham akupkamu

¹⁸ “Nunia wína aintsur ainaun wainin Tiatira yaktanam puja nuka ju chichamnasha nekaati tusam aarta: Yuse Uchiri jiangkia ji kapawa tumau jiimiaj puja nuka, nawesha jiru jinum jiyamua nunisang newar waja nuka tawai tusam aatrata:✠ ¹⁹ Atumi turamur-incha wikia mash nekajrume. Tura atumi anengkratairinha nekajrume. Tura wína nekasampita turutú asaram, wína umirtakrum pujarme. Tura yuuminak pujuinausha pengker yayaarme. Tura wait wajayatrumek pengker nintimsaram pujarmin nekajrume. Tura nu nangkamtaik pengker turamiarume nuna nangkamasrumek yamaikia timiá pengker turarme tusan nekajrume. ²⁰ Turin ayatrumek nuwa Jezabel naartin atumjai pujusti tusaram tsangkatarme. Nuka atumin anangkramak: Wikia Yuse chichamen etsernuitjai, ta nuka wina umirtinak pujuinaun tsanirmatnuncha nuiniawai. Tura Yuschau waininayat, tangku namangken ni yusri susamu yuwaarti tusa nuiniawai. Atumka nu turati tusaram, tsangkatkau asakrumin, atumi turamuri mash pengkeraitai tatsujrume.✠

²¹ “Tura asan nu nuwaka ni tunaarin inaisati tusan nukap nakasmajai. Turamaitiat ni tunaarinka tuke inaiyatsui. ²² Anturtuktaram. Nu nuwanka peaknum tepesti tusan sungkuran susatatjai. Tura nijai tsanirmau ainauncha nijai metek nukap wait wajakarti tusan sungkuran susartatjai. Antsu ni tunaarin inaisaramtaikia turashtatjai. ²³ Tura nu nuwa tunaarin takainaunaka ni uchiria nunisarang asaramtai, nunaka maatnuitjai. Wi turamtai wína aintsur ainau iruntrar pujuinauka nunasha nekaawartinuitai. Aints ainau nintin nekarnunka wiitjai. Tura asan atumi pasé turamurijai metek wait wajaktinnasha susatatjarne.✠ ²⁴ Antsu Tiatira yaktanmaya ainautirmin, nu nuwa nemartsuk pujautirmin, tura Satanás uukmau aa nuka nekachu asakrumin, chikich

✠ 2:14 (Núm. 22.5,7,31;25.1-3;Jud. 11) ✠ 2:17 (Juan 6.48-51) ✠ 2:18 (Dan. 10.5-6) ✠ 2:20 (1.Rey. 19.1-2;21.5)
✠ 2:23 (Sal. 7.9;Mat. 16.27)

chicham umirkataram tusanka tatsujrume. ²⁵ Tura atum umirume nuka wi taatsaing tuke metaram umirkataram.

²⁶ Tunau nepetkaru ainaun, tura wi taatsaing wína wakeramurun tuke umirtin ainaun mash nungkanmaya ainau apuri arti tusan inaikiatnuitjai. ²⁷ Tura wína Apaachir winasha: Apu ata tusa, inaitukmia nunisnak apu ainaun inaikiertinuitjai. Turamu asar aints jirujai muitsan awatiar tsainawa nunisarang wína umirtinak pujuinauka wína kakarmarjai mash nungkanmaya ainaun inarartinuitai.✠ ²⁸ Tura tsaa tsapuatsaing, angkuaji eemak tsapuawa nunisnak wikia tatsuk, wína aintsur ainaun wína tatintrun nekawarti tusan nekamtairun susartinuitjai. ²⁹ Yuse Wakani ta nuna wína aintsur ainau antinauka nintimrarti, tawai tusam aarta,” turutun antukmajai.

3

Sardis yaktanam chicham akupkamu

¹ “Nunia wína aintsur ainaun wainin Sardis yaktanam puja nuka ju chichaman nekaati tusam aarta. Yuse Wakani siete (7) akupa nuka, tura yaa tumaun siete (7) aa nuna inawa nuka nunasha tawai tita: Atum turamurmin itieur awa tusan mash nekajrume. Atumek nintimtumasmusruka iwiaakuitji tarumning, wikia atumniaka jakawa nunisrumek pujarmin jiiajrume. ² Tura atumi turamurijaingkie Yuska pengkerka awajtsuk pujarmin jiiajrume. Tura atum kanurua nunisrumek pujau asaram shintartaram. Tura asaram Yuska pengker awajsataram. Aints wína umirtukchau asar, jakaartas ainawa nunisarang pujuinauka wína umirtutan tuke inaisarai tusaram kiakartaram. ³ Tura wína chichamur eemkaram antukmiarme nu chicham nintimraram metataram. Antsu atumi tunaaringkie inaisataram. Turachkurminkie kasa aneachmau winawa nunisnak wisha atumin winitin asamtai ¿warutik tat? tusarmeka nekaarachminuitrume.✠ ⁴ Antsu atumi yaktarin Sardisnum aints untsurinchu wína umirtukaru asar, wejmak pakuichau entsarina nunisarang ainawai. Tura asar wijai metek wejmak nekas pujun entsasar pujusartinuitai. ⁵ Tunau nepetkaru ainauka wejmak nekas pujun entsasar wijai pujusartinuitai. Tura nuna naaringkie wína papirun aatramu asaramtai pengké sakturchatnuitjai. Tura asan wína Apaachirnasha, tura ni awemamuri ainauncha: Juka wína aintsur ainawai titinuitjai.✠ ⁶ Yuse Wakani ta nuna wína aintsur ainau antinauka nintimrarti, tawai tusam aarta,” turutun antukmajai.

Filadelfia yaktanam chicham akupkamu

⁷ “Nunia wína aintsur ainaun wainin Filadelfia yaktanam puja nuka ju chichaman nekaati tusam aatrata: Nekas tunaarinchawa nu, tura nekas chichaman chichaa nu apu Davidta yawirin takaku asa, Yusnum wayaatnun urainamtaikia chikich ainauka pengké epenchamnawaitai. Tura Yus epeniamtaikia chikich ainauka uraichminuitai, ta nuka tawai tusam aarta:

⁸ “Atumi turamuri itieur awa tusan mash nekajai. Atumka jumchik ayatrume, atumi kakarmarisha atsau wainiatrumek, wína chichamur miatrusrumek umirtukmiarume, tura wikia Cristo umirkachuitjai tichamiarume. Tura asakrumin atumin waaitinka uratinuitjarme. Nuna urainamtaikia, aints kichkisha epenchamnawaitai. ⁹ Antuktaram. Aints waitrinak judío aintsuitjai tinayat, iwianchi apuri Satanásan umirinawai. Nuka atumsha waintrumning, winaka tikishmatruwarat tusan nunaka itatnuitjai. Wi atumin aneau asan, aints ainausha nekaawarti tusan turatnuitjai. ¹⁰ Atum wi timiaja nu tuke inaitsuk pengker nintimsaram umirtuku asakrumin, wisha nukap wait wajaktinumka uwemtikratnuitjarme. Mash nungkanmaya ainau nu wait wajaktiniun wainkartinuitai. Tura nekasash wína umirtina tusan nekapsatnuitjai. ¹¹ Wikia wári taratnuitjai. Tura asamtai tsengkrutin Yus atumin suramsamia nuna iwianch atantruki tusaram, wína tuke inaitutsuk umirtuktaram. ¹² Tunau nepetkaru ainauka wína Yusru jeen painia nunisarang tuke jiintsuk nuni pujusartin ainawai. Tura wína Yusru naarincha ni namangken

✠ 2:27 (Sal. 2.9) ✠ 3:3 (Mat. 24.43-44; Apoc. 16.15;20.12) ✠ 3:5 (Ex. 32.32-33; Apoc. 13.8)

aatrtnuitjai. Tura wína Yusru yaktarin Jerusalén yamaram aa nuka nayaimpinmaya taratnua nuna naarincha ni namangken aatrtnuitjai. Tura wína naarun yamaram aa nuna ni namangkencha aatrartnuitjai. ¹³ Yuse Wakani ta nuna wína aintsur ainau antinauka nintimrarti, tawai tusam aarta,” turutun antukmajai.

Laodiceanam chicham akupkamu

¹⁴ “Nunia wína aintsur ainaun wainin Laodicea yaktanam puja nuka ju chichaman nekaati tusam aarta: Nekas chichaman tuke chichaa nuka, ni chichamen paan nekamtikiartin asa, nu nangkamtaik Yus mash najanamia nuna apuri asa tawai tita: ¹⁵⁻¹⁶ Wikia atumi turamuri itiur awa tusan mash nekajrume. Atumka winaka tukeka inaituschamarume. Turayatrum wína chichamruka miatrusrumka umirtatsrume. Tura asaram yumi japapachikia tumawaitrume. Michatnasha michachu, tura tsuwertancha tsuwerchau pengké tsuutmai umurchamnawa tumawaitrume. Tura asakrumin aints yumi japapachik tseekmaun umur tsuutak inuktas wakerawa nunisnak wikia atumin japatasan wakerajrume. Antsu tsuwer akurmeka, turachkurmasha micha akurmasha timiá pengker achaintrumeash. ¹⁷ Atumka chichaakrum: Wikia kuikiartnuitjai. Tura asan warinchun untsurin takakjai. Tura asan pengké yuumatsuk pujajai tayatrum, wínaka umirtutsuk pujau asaram, kuikiartin ayatrumek, nekasrum yuumakrum pujarme. Tura nekasrum pengkerka pujatsrume. Tura wainmichua nunisrumek, tura misu wajawa nunisrumek pujarme. Antsu nuka nekapmamtsurme. ¹⁸ Tura asamtai nekasrum yuumatsuk pujustasrum wakerakrumka, wína seatkuram: Aints kurin jinum jiyamun sumawa nunisrumek tuke pujustin winaka seattiarum. Tura misu kuimiakan natsaarai tusaram, wína seatkuram tarachin nekas pujun entsarartas suminawa nunisrumek tunaarinchau wajastaram. Tura wainmichua nunisrumek pujau asaram, aints pengker wainmaktas, jii engketi irimin sumawa nunisrumek wína seattiarum. ¹⁹ Wína aneetir ainaun mash chicharkun: Chichamur miatrusrumek umirtuktaram tusan, wína umirtutsuk pujuinauncha wait wajaktinasha suajai. Tura asamtai atumi nintimauri yapajiarum, miatrusrumek umirtuktaram tajarme. ²⁰ Anturtuktaram. Wikia aints irastas taa, waitinam wajas untsumua nunisketjai. Tura asamtai aints wi untsumaurun antuk waitin uraawa nunisang: Nintirun wayaata tamatikia wikia wayaatatjai. Tura aints yutan yuwinawa nunisnak iruntratatajai. Tura wisha nijai tsaniasan pujustatajai. ²¹ Wisha tunaun nepetkau asan, wina Apaachirjai tsaniasan aints ainaun inartasan, apu keemtainum pujaja nunisarang tunau nepetkaru ainauka wijai tsaniasar aints ainaun inarartas keemsarti tusan tsangkatkatnuitjai. ²² Yuse Wakani ta nuna wína aintsur ainau antinauka nintimrarti tawai tusam aarta,” turutun antukmajai.

4

Nayaimpinmaka Yusen pengker awajinawai

¹ Nu nangkamaramtai pangkain jiimkaman nayaim uraniun wainkamjai. Tura nunia kakaram untsumaun antukmajai. Nu nangkamtaik pupun pupuntramua tumaun antukmaja nunisnak ataksha antukmajai. Tura wína chichartak: “Juni wakata. Turakmin ukunam atinua nuna inaktustatjame,” turutmiayi.

² Tura Yuse Wakani wína nintirun piatruku asamtai, arutsuk karanma nunisnak Yuse keemtainin nayaimpinam wainkamjai. Tura nu keemtainum ketun wainkamjai. ³ Tura nu keemtainum ketun wainkan, kaya akik wincha jiitsumir jaspe tutai, nuniasha kaya kapantin akik aa nuna wainkamjai. Nunia tungkiangkua tumau, antsu kingkia kaya esmeralda tumau Yuse keemtainin tenteaun wainkamjai. ⁴ Yuse keemtainin tentakar apu keemtainin veinticuatro (24) ainaun wainkamjai. Nu keemtainum juun ainau veinticuatro (24) ketinaun wejmakan pujun entsarinaun, nuniasha tsengkrutin kuri najanamun tsengkrakinaun wainkamjai. ⁵ Apu keemtaininia charpia tumau jiininaun wainkamjai. Tura nasea tumaun uutun, tura ipiamtasha ipiamtarun antukmajai. Tura

✠ 3:14 (Juan 1.3; Col. 1.15) ✠ 3:19 (Prov. 3.12; Hebr. 12.5-6) ✠ 3:21 (Juan 16.33; Apoc. 5.5)

Yuse keemtairin ayamas kantii keawa tumaun siete (7) ainaun wainkamjai. Nuka Yuse Wakani aa nuwaitai. ☆ 6 Nunia Yuse keemtairin ayamas juun kucha ispiya tumaun wincha miamian aun wainkamjai.

Nuniasha iwiaaku ainou cuatro (4) ama nu juun apu keemtairin tentainun wainkamjai. Tura netsepeninisha, tura tuntupeninisha jii untsuri ainoujai jiiimiam wajainau wainkamjai. 7 Kichik juun yawaaya tumaun wainkamjai. Tura kichka waaka uchiria tumaun wainkamjai. Tura kichnasha aintsu yapiya tumaun wainkamjai. Tura kichka kukui nanamua tumaun wainkamjai. 8 Tura nu iwiaaku ainou nanamtin asar, ni nanapesha seis (6) ainaun wainkamjai. Tura kichik kichik ni netsepeninisha jiisha untsuri, tura tuntupeninisha nunisarang jiisha untsuri aun wainkamjai. Tura tsawaisha tura kashisha tuke inaitsuk chichainak:

“Apu Yus mash aa nuna nangkamasang nekas kakarmaitai. Tuke pujuya nuka yamaisha nunisang pujawai. Tura tuke iwiaaku itai. Nekas pengkeraitai, nekas pengkeraitai, nekas pengkeraitai,” tinaun antukmajai. ☆

9 Tu chichainak apu keemtainum tuke iwiaaku puja nuna pachisar: Ameketme juuntam tusar, maaketai tinaun antukmajai. 10 Turinamtai juun ainou veinticuatro (24) ainia nuka juun apu keemtairin tentakar pinakumrurar tepersar, tuke iwiaaku puja nuna pachisar: Ameketme juuntam tiartas, ni tsengkrutirin kuakiar tuksar Yusen chicharinak:

11 “Ameketme Apum. Ameketme Yusem. Ameka iwiaaku ainou mash najanamiam. Tura ame wakerau asakmin, mash iwiaaku ainawai. Tura asamtai amincha tuke mash pengker awajtamsarti. Tura: Ameketme pengkeram turamiarti. Tura: Ameketme kakaram turamiarti,” tinaun antukmajai.

5

Papi aarmaun pachis timauri

1 Nunia juun apu keemtainum ketu papi mai yantamen aarmaun penuarmaun ni untsur uwejejai takus ketun wainkamjai. Nu papinka urakarai tusar, senta kantsejai siete (7) nujtukmaun wainkamjai. 2 Tura Yuse awemamuri nekas kakaram aa nu chichaun antukmajai. Nuka kakar chichaak: “¿Yaa miajuk ju papi kantsejai nujtukmauncha urakainta?” tu inintraun antukmajai. 3 Turamaitiat nayaimpinmasha, tura nungkanmasha, tura jakau ainamunmasha, timiá juunka kichkisha atsau asamtai, nu papi urakmin tura aujsamnaunaka wainkachmajai. 4 Tura nu papi urakminiun tura aujsamniun wainkachu asan, nukap juutmiajai. 5 Wi juutu pujamtai, kichik juun nuni ketun wainkamja nu wina chichartak: “Juutsuk asata. Anturtukta. Judánmaya ainou juun yawaaya nunisarang kakaram asaramtai, Cristo Judá weari asa, tura Apu Davidta weari asa, ni nemase ainaun mash nepetak, Yuse wakeramurin tuke mash miatrusang umikmia nuka, ju papi kantsejai nujtukmaun siete (7) aa nuna urak aujsamnawaitai,” turutun antukmajai. ☆

6 Tamati wikia jiiimkaman, juun apu keemtainum ayaamas Uwija Uchiri maamutiat iwiaaku wajaun wainkamjai. Nuka japen wajamtai, cuatro (4) iwiaaku ainou, tura veinticuatro (24) juun ainausha niin tentakarun wainkamjai. Uwija Uchiriya tumaun nuna antiri siete (7) aun wainkamjai. Tura ni jiisha siete (7) aun wainkamjai. Nuka Yus ni Wakanin mash nungkanmaya ainaun jiisat tusa, akupkamia nuwaitai tusan nekaamjai. ☆ 7 Tura Uwija Uchiri juun apu keemtairin weri, papin untsur uwejejai takus nuni ketun papirin juraun wainkamjai. 8 Tura papin juramtai, cuatro (4) iwiaaku ainou, tura veinticuatro (24) juun ainou Uwija Uchirin: Ameketme juuntam tiartas tikishmatinaun wainkamjai. Juun ainou kichik kichik kitarra tumaun takusar, tura piningkia tumaun kuri najanamun tákakinaun wainkamjai. Nu pining ainamunam kungkuti keeminaun

☆ 4:5 (Apoc. 8.5) ☆ 4:8 (Isa. 6.2-3) ☆ 5:5 (Juan 16.33; Apoc. 3.21) ☆ 5:6 (Isa. 53.7; Juan 1.29)

wainkamjai. Nu kungkutikia Yuse aintsri Yus seamuri taku tawai.^{✠ 9} Nunia juun ainau yamaram kantan kantaminak:

“Ameketme timiá juunmeka. Tura asam ju papi jukim papi nujtukmaurisha urakti-nuitme. Amincha mantamawaru asamtai, jakam ami numpemsha numparmi-ame. Tura asam mash nungkanmaya ainau, niish niish chichau ainausha mash Yusnum jearti tusam jakamiame.^{✠ 10} Tura iincha: Wína aintsur asaram, wijai metek aints ainau inartinuitrume tukartimiame. Tura Yuse inatiri asaram sacer-dotea nunisrumek Yusjai chichastinuitrume tukartimiame. Tura asaram mash nungkanmaya aints ainau inau atinuitrume tukartimiame,” tu kantamrinaun antukmajai.[✠]

¹¹ Tura ataksha pangkain jiihkaman, Yuse awemamuri untsuri juun apu keemtairin tentakar, tura iwiaaku ainau tentakar, tura juun ainausha tentakar kantamrinaun antukmajai. Tura timiá untsuri millón asaramtai, pengké nekapmarchamin iruntrarun wainkamjai. ¹² Nuka kakar chichainak:

“Uwija Uchiri maamuitiat timiá juun asa, tura timiá kakaram asa, nantaki mash aa nunaka inakratnuitai. Tura mash aa nuna nekau asamtai: Ameketme juuntam tusar, timiá pengker awajsartinuitji. Tura maaketai titinuitji,” tinaun antukmajai.[✠]

¹³ Turamtai Yus najanamu ainau mash nayaimpinmasha, tura nungkanmasha, tura nungka nitkarin pujuinausha, tura juun entsanam pujuinausha chichainak:

“Juun apu keemtairin keta juka Uwija Uchirijai metekaitai. Ni tuke maaketai timinuitji. Tura tuke: Ameketme juuntam timinuitji. Tura: Ameketme kakarmam tusar, tuke inaitsuk pengker awajsarminuitji,” tinaun antukmajai.

¹⁴ Tura cuatro iwiaaku ainau: “Tu atí,” tinaun antukmajai. Tinamtai veinticuatro (24) juun ainausha tuke iwiaaku puja nuna tikishmatrar maaketai tinaun wainkamjai.

6

Papi nujtukmauri siete urakmaun wainkamuri

¹⁻² Nunia Uwija Uchiri papi nujtukmaun kichik urakun wainkamjai. Tura urakamtai, nu cuatro iwiaaku ainamunmaya kichik ipiamta nunisang kakar chichartak: “Winim jiita,” turutun antukmajai. Tamati wisha jiihkman, kawai pujun wainkamjai. Tura kawainum ketu tishimkun takakun wainkamjai. Tura ni nemase ainaun nepetkatin asamtai, tsengkrutincha suwaun wainkamjai. Tura tuke nepetmaktas jiihkinun wainkamjai.

³ Nu kawai jiihmatai, Uwija Uchiri chikich papi nujtukmaun jimiar ama nuna urakun wainkamjai. Nuna urakamtai chikich iwiaaku aa nuka chichartak: “Winim jiita,” turutun antukmajai. ⁴ Turutmatai wisha jiihkman, chikich kawain kapanniun wainkamjai. Nu kawainum ketu mash nungkanam wekaas, aints ainau mesetan najanmantikiat tusa akupkamuitai. Turamtai aints ainau mash pengker nintimtunitsuk kajernaikiar maaniawarti tusa, kawainum ketun saapi sarman suwaun wainkamjai.

⁵ Nu kawai jiihmatai, Uwija Uchiri chikich papi nujtukmaun kampakam (3) ama nuna urakamtai, chikich iwiaaku chichaun antukmajai. Nuka chichartak: “Winim jiita,” turutmatai wikia jiihkman, chikich kawain shuwinnun wainkamjai. Tura nu kawai jiihmatai, kawainum ketu kilo nekapmati takakun wainkamjai. ⁶ Tura nu cuatro (4) iwiaaku ainamunmaya chichaamun antukmajai. Nu chichaamuka nuwaitai: “Yutai nukap akik atin asamtai, aints ainau tsukajai wait wajakartinuitai. Kichik kinta takak-masmaunum kuikian juwawa nu kuikijai trigon kichik kilon nunak sumakartinuitai. Nuna sumachkusha nu kuikijai cebada pang najantai kampakam (3) kilon nunak sumakartinuitai. Antsu olivo macharisha tura uva yumirisha mesrai tusam, tenapkesam wainkata,” turutun antukmajai.

✠ 5:8 (Apoc. 8.3) ✠ 5:9 (Sal. 33.3) ✠ 5:10 (Apoc. 1.6;20.6) ✠ 5:12 (1.Cor. 5.7)

⁷ Nunia Uwija Uchiri chikich papi nujtukmaun cuatro (4) ama nuna urakamtai, chikich iwiaaku chichaun antukmajai. Nuka chichartak: “Winim jiita,” turutun antukmajai.

⁸ Tamati wikia jiikman, kawain yangkutakun wainkamjai. Tura nu kawainum ketu jatan sukartin inaikiamuyayi. Tura nuna ukurin winauka aints ainaun juki, jakaru ainu matsatmaunum juyayi. Tura mash aints ainu iruntramunam aints cuatro (4) irunar pujuina nuni kichkin maati tusa kakarmarin susamuitai. Tura aints ainaun mesetjai, tura tsukajaisha, tura sungkurjaisha, tura pachim ainaujaisha jakrami tusa kakarmarin susamuitai.

⁹ Nunia Uwija Uchiri chikich papi nujtukmaun cinco (5) ama nuna urakamtai wikia jiikman, Yuse chichame etserin ainaun maawarmia nuna wakanin wainkamjai. Nuka tuke inaitsuk: Cristonuitji tinau asaramtai niincha maawarmiayi. Nu jakaru ainu wakanin misa kungkuti keemaktin aa nuna wamketinini ayaminak pujuinaun wainkamjai. ¹⁰ Nuka kakarar untsuminak: “Apuru, ameka nekasam tunaarinchau asam, ame tame nuka tuke umiame. Tura asam ¿warutam arusmek iin mantamawaru ainausha mash nungkanam pujuinausha yapaijkiatam?” tinaun antukmajai.

¹¹ Tinamtai Yuse awemamuri niincha wejmak pujun sarman suwinak: “Atumea nunisarang chikich Cristonu ainauncha maawartin ainawai. Nuna umisarti tusaram jumchik nákakrum ayamrataran,” tinaun antukmajai.

¹² Nunia Uwija Uchiri chikich papi nujtukmaun seis (6) ama nuna urakamtai, wisha jiikman uu kakarman uurun wainkamjai. Tura tsaasha tsantsuk tarach shuwinua tumau ketun wainkamjai. Nantusha numpa tumaun kapantin ketun wainkamjai. ¹³ Yaa ainausha kakeenaun wainkamjai. Numí kanawe nase kakarman nasentak peaam, unuts kuwirach nungkanam kakeenawa nunisarang yaa ainu yakiya nungkanam kakeenaun wainkamjai. ¹⁴ Tura nayaimpisha papi penuarar juwamua nunisang mengkakaun wainkamjai. Tura mura ainausha, tura isar ainausha muchitkar yaja pujnasarun wainkamjai. ¹⁵ Tura mash nungkanmaya apu ainausha, tura kuikiartin ainausha, tura suntara apuri ainausha, tura kakaram ainausha, tura aintsu inatiri ainausha, tura aintsu inatirinchu ainausha mash shaminak muranam waa amanum, nunia pampa juunum anuminaun wainkamjai. ¹⁶⁻¹⁷ Tura anumkar, mura ainaun tura pampa ainauncha chicharinak: “Mura ainautiram, tura pampa ainautirmesha anturtuktaram. Yus nekas wait wajaktiniun akupkatin kinta jeau asamtai ¿yamaikia yáki uwentikramrataij? Tura asamtai Yuse keemtairi keta nu iin waitmakai tusaram, tura Uwija Uchiri iin wait wajaktiniun suramsai tusaram, yakiya yumpunkaram iin uukratkataram,” tinaun antukmajai. [☆]

7

Israel ainu nijajin aatramuri

¹ Nunia ataksha pangkain jiikman, Yuse awemamurin cuatro (4) aun wainkamjai. Kichik tsaa taakmaunumanini wajaun, tura kitcha pajeninisha wajaun, tura kitcha atu pajeninisha wajaun, tura kitcha tsaa jeatinmanini wajaun wainkamjai. Tura nungkanam, nunia juun kuchanam, nunia numi wajamunam nase umpuini tusar suriminak wajainaun wainkamjai. ² Nunia chikich Yuse awemamuri tsaa taakmaunumanini winaun wainkamjai. Nuka Yus tuke pujawa nuna inatiri ainu nijajin aatratnun takus winaun wainkamjai. Tura chikich cuatro (4) Yuse awemamurin nungkancha, tura juun entsancha mesrartin ainaun kakar chicharak: ³ “Yuse inatiri ainu nijajin Yuse naari aatsrining, nungkasha tura juun entsasha, tura numi ainausha mesrairap,” tusa akatar akupaun antukmajai.

⁴ Tamati Yuse inatiri Israela weari ainu nijajin Yuse naarin aatrartin ainu ¿warutmak awa? tu iniam: Ciento cuarenta y cuatro mil (144,000) ainawai taun antukmajai.

[☆] 6:12 (Apoc. 11.13;16.18) [☆] 6:13 (Joel 2.31; Marc. 13.24-25; Luc. 21. 25-26) [☆] 6:16-17 (Isa. 2.10; Joel 1.15; Luc. 23.30)

⁵ Tura asamtai Judá weari doce mil (12,000) ainawai. Nunia Rubénka weari doce mil (12,000) ainawai. Nunia Gada weari doce mil (12,000) ainawai. ⁶ Nunia Asera weari doce mil (12,000) ainawai. Nunia Neftalía weari doce mil (12,000) ainawai. Nunia Manasésa weari doce mil (12,000) ainawai. ⁷ Nunia Simeónka weari doce mil (12,000) ainawai. Nunia Leviya weari doce mil (12,000) ainawai. Nunia Isacara weari doce mil (12,000) ainawai. ⁸ Nunia Zabulónka weari doce mil (12,000) ainawai. Nunia José weari doce mil (12,000) ainawai. Nunia Benjamínka weari doce mil (12,000) ainawai, taun antukmajai. Tura nu aints ainau nijajin Yuse naarin aatramun wainkamjai.

Yuse aintsri ainau nekapmarchamnaun wainkamuri

⁹ Nunia ataksha pangkain jiikman, aints timiá untsuri pengké nekapmarchamnaun wejmak pujun entsarar, nunia chapi nukea tumaun takusar, Uwija Uchirin naka wajatinaun wainkamjai. Nu mash nungkanmaya ainau ¹⁰ metek kakarar untsuminak: “Ii Apaachiri Yus juun apu keemtairin keta juka ni Uchirijai, Uwija Uchiriya tumau aa jujai, ii tunaun sakturmartas jarutramkau asamtai iin uwemtikramramiaji,” tinaun antukmajai.✠

¹¹ Tinamtai Yuse awemamuri ainau Yuse keemtairin tentakar, juun ainauncha tentakar, nunia nu cuatro (4) iwiaaku ainauncha tentakar Yusen: Ameketme juuntam tiartas, pinakumrar nungka tepesar, Yusen pengker awajsartas ¹² chicharinak: “Tu atí: Ii Yusrin tuke inaitsuk pengker awajsarmi. Tura ningkitai nekas nekau, tura ningkitai nekas kakaram, tura ningkitai nekas inakratin, tura ningki pengker asamtai, tuke inaitsuk maaketai tiarmi. Tu atí,” tinaun antukmajai.

¹³ Tu tinamtai juun ainamunmaya kichik wina chichartak: “¿Pujun entsarina ausha warí aintsua ainawa? ¿Tura tuniaya kaunkarma? ¿Ameka nekamek?” ¹⁴ Turutmatai, wi ayaakun: “Atsa juunta, ame nekau asam ujakata,” tama ni chichartak: “Ju aints ainauka Yusen umirkaru asar, nukap wait wajakar jakarmiayi. Tura asaramtai Uwija Uchiria tumau aa nuka aints ainaun mash uwemtikratas jaka, numpe numparmia nuka ni nintin japiramu asar, ni entsatiri nekas puju aa nuna entsarar, yamai nijarmawa nunisarang pengké tunaarinchau ainawai.✠

¹⁵ “Tura asar Yuse keemtairin tentakar nakasar pujuinawai. Tura tsawaisha, tura kashisha Yus seatai juun jean waininak Yusen maaketai tinawai. Tura asaramtai Yus ni keemtairin keta nuka tuke niin wainui.

¹⁶⁻¹⁷ “Uwija Uchiri juun apu keemtairi jopen puja nuka uwija wainua tumawaitai. Nuka uwijari ainaun entsa kanajin yumin aartas ayaakua nunisang ni aintsri jakaru ainaun wainak, tuke pujustinasha susatnuitai. Tura tuke juutsuk pujusarti tusa, Yus ni aintsri ainau neaikirin mash japiratnuitai. Turamtai tuke wait wajatsuk, tsukamtancha pengké tsukamtsuk, tura kitamtancha pengké kitamtsuk pujusartinuitai. Nuningkia tsaasha pengké sukuashtinuitai, tura seekijaisha waitka wajakchartinuitai,” turutun antukmajai.✠

8

Chikich papi nujtukmausha urakmauri

¹ Nunia Uwija Uchiri chikich papi nujtukmaun siete (7) ama nuna urakamtai, nayaimpinam japchiri ura pengké kichkisha chichaamuka atsumi. ² Antsu nu nangkamaramtai, nayaimpinam Yuse awemamuri siete (7) aa nu Yuse keemtairin nakainak wajainaun wainkamjai. Tura Yuse awemamuri siete (7) wajarma nuna kichik kichik pupunan suwaun wainkamjai. ³ Nuniasha Yuse awemamuri taa, kungkuti engketin kuri najanamun takus, misa kungkuti keematinam naka wajaun wainkamjai. Tura kungkutin nukap keemaktas wajaun wainkamjai. Tura juki, misa kungkuti keematinam kuri najanamunam kentsamu kungkuti keemamun wainkamjai. Nu kungkutikia Yuse aintsri ainau seamurintai taku tawai. Nu misa kungkuti keematingkia Yuse keemtairi ayamas

✠ 7:10 (Mat. 22.2-10) ✠ 7:14 (Marc. 13.19; 1.Juan 1.7) ✠ 7:16-17 (Sal. 23.2; Juan 4.10;7.37;10.11; Apoc. 21.4)

aun wainkamjai. ⁴ Yuse aintsri ainau Yusen seainamtai, Yuse awemamuri kungkuti engketi uwejejai takus, kungkutin keemakarmia nuna mukunturin Yusnum waakun wainkamjai. ⁵ Nunia Yuse awemamuri kungkuti engketin kuri najanamun ataksha achik, nunia misa kungkuti keematinam we, ji kaparun nuna kairin kungkuti engketinam chumpia, ji nungkanam ayaarti tusa nangkimun wainkamjai. Turamtai uutmausha uutun antukmajai, tura ipiamtasha charpijai nukap patinaun antukmajai. Tura uusha uurun wainkamjai.

Pupun pupuntramun pachis timiauri

⁶ Nunia Yuse awemamuri siete (7) ama nu kichik kichik pupunan pupuntruwartas amiinaun wainkamjai.

⁷ Yuse awemamuri kichik pupunan pupuntramtai, micha kaya tumaun, tura ji kapaun numpajai pachiramun nungkanam nangkimun wainkamjai. Turinamtai mash nungka ainau kempatam amanum kichik keaun wainkamjai. Tura numi kempatam ainamunam kichik keaun wainkamjai. Tura chirichrisha mash kapainaun wainkamjai.

⁸⁻⁹ Nuniasha chikich Yuse awemamuri jimiar ama nu pupunan pupuntramtai, juun mura jiya tumau kapaun juun entsanam nangkimia ujungkarun wainkamjai. Turamtai juun entsa kempatam amanum kichik numpa najanarun wainkamjai. Turamtai juun entsanam mash iwiaaku ainau kempatam ainamunam kichik kajingkiarun wainkamjai. Tura kanu kempatam ainamunmasha kichik meserun wainkamjai.

¹⁰ Nuniasha chikich Yuse awemamuri kempatam ama nu pupunan pupuntramtai, nayaimpinam yaan juuntan yakiiya ayaarun wainkamjai. Nuka kantiiya tumau kapau entsa ainamunam, tura entsa kanaji kempatam ainamunam chikichnum ayaarun wainkamjai. ¹¹ Nu yaa naaringkia Yapawaitai. Tura nu yaa entsa ainamunam iyaaramtai, entsa kempatam ainamunam kichik yapau najanaru asamtai, aints ainau nu entsanmaya yumin umurar untsuri jainaun wainkamjai.

¹² Nunia chikich Yuse awemamuri cuatro (4) ama nu pupunan pupuntramtai, tsaasha tura nantusha, tura yaa ainausha kempatam ainamunam kichik meseru asamtai, yaa ainausha tenap tsantinachun wainkamjai. Tura tsaasha mushatmar tsawai wainiat tenap tsanchaun wainkamjai. Tura kashi wainiat nantusha tenap tsanchaun wainkamjai.

¹³ Turamtai pangkain jikman, Yuse awemamuri kukuiya tumau nanaaki winaun wainkamjai. Nuka kakar chichaak:

“Maj, yamaisha chikich Yuse awemamuri kempatam pupunan pupuntrinamtai, aints nungka mash matsatinau yaanchuik wait wajakarmia nuna nangkamasarang nukap wait wajakartin ainawai,” taun antukmajai.

9

¹ Tura chikich Yuse awemamuri cinco (5) ama nu pupunan pupuntramtai, yaa kichik nayaimpinmaya nungka ayaarun wainkamjai. Tura nu yaa ayaarun yawin susa, waa juuntan jitamran kuna ama nuna tektutirin urakti taun antukmajai. ² Tamati jitamran waan urakamtai, nunia mukunit nekas shuwin jininun wainkamjai. Tura mukunit jininua nuka eper keemamua nunisang timia shuwin jinkin asamtai, tsaasha mushatmarun wainkamjai. ³ Nuniangka nu mukuntinmaya ijukratin manchia tumau nekas juuntan jininuaun wainkamjai. Tura jinkiar titing aints ainaun ijuinawa nunisarang aints ainaun ijuarti tusa kakarmarin susamuitai. ⁴ Tura Yuse awemamuri surimiak: Chirichrisha, tura nupaa samek ainausha, tura numi ainausha mesrairap. Antsu aints Yuse naarin ni nijajin aatrachmau ainau nuke ijutaram. ⁵ Tura ijuayatrumeak aints maatka maawairap, antsu cinco (5) nantuk aints titing ijum najaiminawa nunisarang najaimiawarti tusaram ijutaram, tu chichaun antukmajai.

⁶ Nu wait waktin kinta jeamtai, aints ainau jakartas wakerinayat jakartakamawar tujinkartinuitai.

⁷ Nu manchia tumaun wainkamja nuka nekasar kawai mesetnum wetasar umismawa tumaun wainkamjai. Tura tsengkruti kuri najanamua tumaun tsengkrakinaun wainkamjai. Tura yapiincha aintsu yapiiya tumaun wainkamjai. ⁸ Intashincha nuwa intashia tumaun wainkamjai. Antsu naingkia juun yawaa naiiya tumaun wainkamjai. ⁹ Tura wejmak jiru najanamun entsarinaun wainkamjai. Tura nanamtin asar nanaminaksha kawai mesetnum weenak, kárrun japinam teteer wajainawa tumaun antukmajai. ¹⁰ Tura jukencha titingki jukea tumaun wainkamjai. Nu jukejai aints ainaun cinco nantu ijuar waitkawartin ainawai. ¹¹ Nu manchi waanam matsamnu apuri naaringkia hebreo chichamejaingkia Abadón naartinuitai. Tura griego chichamejaingkia Apolión naartinuitai. Nuka ii chichamejaingkia “meskartin” taku tawai.

¹² Kichik wait wajakmauka yanchuk nangkamaruitai. Antsu chikich jimiar wait wajaktinka ataksha awai.

¹³ Nunia chikich Yuse awemamuri seis (6) ama nu pupunan pupuntramtai, misa kungkuti keemaktin kuri najanamu tsakarin cuatro (4) ama nunia chicham jiinun antukmajai. ¹⁴ Yuse awemamuri chichaak: “Entsa nampuram Eufrates tutainum Satanása awemamuri cuatro (4) jingkiamu pujuu ainau atiam akupkata,” taun antukmajai. ¹⁵ Turamtai nu horati, tura nu kintati, tura nu nantuti, tura nu musachti Satanása awemamuri jiinkiartin asaramtai, aints ainau mash irumramu kampatam ainaun kichik maawarti tusar, jiikiar akupkarun wainkamjai. ¹⁶ Tura ¿suntar kawainum entsamkaru ainau warutmak iruna? tu iniam: Jimia pachak millón (200’000,000) ainawai tinaun antukmajai.

¹⁷ Tura karanma nunisnak kawai ainauncha, tura kawainum ketinauncha wainkamjai. Kawainum ketinau wejmakri jiru najanamu kapantin, nunia kingkia, nuniasha takum ainaun wainkamjai. Tura kawai muuken juun yawaa muukea tumaun wainkamjai. Tura kawai jangkenia jiisha, tura mukuntiusha, tura azufresha timiá tsuwer keenak jiininaun wainkamjai. ¹⁸ Tura jiijaisha, tura mukuntiujaisha, tura azufrejaisha, nu kampatam wait wajamujai aints kampatam ainamunam kichik jakarun wainkamjai. ¹⁹ Tura nu kawai ainau jangkenia wait wajaktiniun akupinaun wainkamjai. Tura kawai juké ainausha napia nunisarang aints ainaun esainaun wainkamjai.

²⁰ Tura waininayat nu wait wajamunam jakacharu ainau ni tunaarin inaitsuk, tuke tunau takainaun wainkamjai. Tura iwianch ainaun tuke ameketme juuntam tinaun antukmajai. Tura ni yusri ainau kuri najanamusha, tura kuik najanamusha, tura jiru najanamusha, tura kaya najanamusha, tura numi najanamusha, wainmatnasha wainminachu, tura antutnasha antinachu, tura wekaatancha wekainachu waininayat tuke inaitsuk: Ameketme Yusem tinaun antukmajai.[✠] ²¹ Tura mangkartutnasha inaitsuk, tura wawekratancha inaitsuk, tura tsanirmatnasha inaitsuk, tura kasamtancha inaitsuk tuke turinaun wainkamjai.

10

Yuse awemamuri papichin itamun pachis etserkamu

¹ Nunia chikich Yuse awemamuri nekas kakaram aa nuna yurangminam pachinak, nayaimpinmaya taarun wainkamjai. Tura tsengkrutin tungkiangkua tumau ni muuken tenteaun wainkamjai. Tura yapiisha tsa tsantua timianun tsantun wainkamjai. Tura kujapesha ji keawa tumaun wainkamjai. ² Wi wainkamja nu papichin urakmaun takus, untsur nawejai juun entsanam najama, tura mena nawejai kukarnum najama wajaun wainkamjai. ³ Tura juun yawaa shinawa tumaun kakar untsunun antukmajai. Tura untsunmati, ipiamtancha siete (7) chichaun antukmajai. ⁴ Ipiamat siete (7) chichau asaramtai, wi antukmaja nuna aartasan wakerukmajai. Tura aartatkaman nayaimpinmaya chichaun antukmajai. Nu chichamka nuwaitai: “Ipiamat siete (7) chichakara juka aatsuk asata. Tura aints kichkisha ujakaip,” turutun antukmajai.

✠ 9:20 (Sal. 115.4-7)

⁵ Tura Yuse awemamuri chikich nawejai juun entsanam wajas, tura chikich nawejai kukarnum wajama nu untsur uwejen nayaimpinmanini takuinun wainkamjai. ⁶⁻⁷ Tura chichaak: “Yus tuke iwiaaku puja nuka nayaimpincha, tura nungkancha, tura juun entsancha najanamiayi. Tura wi umiktatjai tímia nunaka yamaikia miatrusang mash umiktatui. Tura Yuse awemamuri siete (7) ainia nu inangnamunam chikich pupunan pupuntramtai, Yuse chichame etserin ainau Yuse inatiri asar, aints ainau nekaachminun tiarmia nunaka yamaikia ukunam atinnaka mash umiktatui, Yusjai tajai” taun antukmajai.

⁸ Nayaimpinmaya wína chichartak: Nuka aatsuk asata turutmia nu ataksha wína chichartak: “Yuse awemamuri juun entsanam najama, tura atu nawejai kukarnum najama waja au werita. Turam papin urak takaka au jurukta,” turutun antukmajai.

⁹ Turutmatai Yuse awemamuri wajamunam werin: Ju papiwach surusta, tusan seamjai. Tu seam wína chichartak: “Pai jukita turam yuwata. Ju yuwamka apaam jangkemin wapasa tumau yumin wajatramkitatui. Antsu wakemin engkema yapau wajatramkitatui,” turutun antukmajai.

¹⁰ Turutmatai Yuse awemamurinia papichin jukin yuwamjai. Tura ni turutmia nunisang jangkerun yumin wajatrukmayi. Antsu yuwan umisan wakerun engkema yapau wajatrukmayi. ¹¹ Wi yuwan umisamtai Yuse awemamuri ainau ataksha chichartinak: “Ataksha waketkim, untsuri nungkanmaya ainau, niish niish chichau ainau, tura apu ainausha untsuri pachisam Yuse chichame etseruta,” turutinaun antukmajai.✠

11

Jimiar Yuse chichame etsernun pachis etserkamu

¹ Nunia nekapmatin wachia tumaun wína surusar chichartinak: “Wajakim Yus seatai juun jea ¿warutam sarmaita? tura tangku epetisha ¿warutam sarmaita? tusam nekapmarta. Tura aints Yusen pengker awajsartas nuni kaunina nuka ¿warutmak ainia? tusam nekapmarta. ² Antsu Yus seatai juun jea aarin Yusen umirchau ainau nuni pujusartin asaramtai nuka nekapmaraip. Nu aints ainau nekas pengker yaktancha Jerusalén tutain cuarenta y dos (42) nantu nuni pujusar mesrartinuitai. ³ Turinamtai wína pachitsar chichaman etserkatnun jimieran akupkatnuitjai. Wi akupkamu asar nuka jakmarar entsatin entsasar, aints ainau ni tunaarin inaisarat tusar, kichik warang nunia jimia pachak nunia sesenta (1,260) kinta wína pachitsar chichaman etserkartinuitai,” turutinaun antukmajai.

⁴ Nu Yuse chichame etserin jimiar ainauka ju nungkanam ii Apuri chichamen etserin asar, olivo machari keemati asamtai, numi olivo tutaiya tumau ainawai. Tura ji keemamua tumau ainawai. ⁵ Tura aints niin pasé awajsartas wakerinaunka ni jangkenia jiin akuptinawai. Tura nu jijai ni nemase ainaun amuinaun wainkamjai. Tura asaramtai aints niin pasé awajsartas wakerinauka jakartinuitai. ⁶ Nuniangka Yus ni chichame etsernun jimieran ni kakarmarin susamu asar, Yuse chichame etserinak pujuinau yumi jiturchati tusar surimkartinuitai. Tura entsa ainauka numpa najanartinuitai. Tura ni wakerinak aints ainaun wait wajakartiniun pachitsuk susartinuitai.✠

⁷ Tura Yuse chichame etsertan umisaramtai, páchimia tumau nekas kakaram aa nuka Satanás akupkamu asa, juun waanmaya jiinki mesetan najanak, Yuse chichame etsernun mai nepetak maatnuitai.✠ ⁸ Tura maawaramtai, juun yaktanam ii Apurin numi winangmanum maawarmia nuni nu jimiar aints maamu namangken tungkajin jintanam tuksartinuitai. Nu yaktanmaya ainau Yusen umirtan nakitinau asaramtai Sodoma tumawaitai. Tura nu yaktanam Yuse aintsri wait wajainau asaramtai, Egipto tumawaitai. ⁹ Tura kempatam kinta japchiri nu jakau namangken tungkajin jintanam tepaun mash nungkanmaya ainau niish niish chichau ainausha wainkartinuitai, antsu iwiarawarai tusar surimkartinuitai. ¹⁰ Tura nu jimiar aints Yuse chichamen etserinak

✠ 10:11 (Eze. 3.1-3) ✠ 11:6 (1.Rey. 17.1; Ex. 7.17-19) ✠ 11:7 (Apoc. 13.5-7)

mash nungkanmaya ainaun waitkasmay asar jakaramtai, tunau ainauka mash warasart-inuitai. Tura warainak waririn sunaisartinuitai.

¹¹ Antsu kempatam kinta nunia japchiri nangkamaramtai, Yus nu mai jakaru wakanin ataksha engketamu asar, jakamunmaya nantakiar iwiaaku wajasaramtai, aints ainau nuna wainkar nukap shamkarun wainkamjai. ¹² Turinamtai Yuse chichame etserin mai nayaimpinmaya: Juni wakataram, tusar untsuinamun antukarmayi. Tura antukar, ni nemasengka jiimiaj wajainai, yurangminam wakarun wainkamjai. ✠ ¹³ Ni wakaramtai, uu kakarman uurun wainkamjai. Tura uurak jea diez (10) amaunum kichik yumpunkaun wainkamjai. Tura jea yumpunmaunum siete mil (7,000) aints jakarun wainkamjai. Tura timiá untsuri jakaramtai ampintrau ainau shaminak: Yus nayaimpinam puja nuka timiá juuntaitai tinaun antukmajai. ✠

¹⁴ Jimiar wait wajamu nangkamaramtai, chikich wait wajaktincha wári jeatatu.

Yus mash aa nunaka inartinuitai timiauri

¹⁵ Nunia chikich Yuse awemamuri siete (7) ama nu pupunan pupuntraun antukmajai. Ni pupuntruamtai nayaimpinam kakar chichaun antukmajai. Tura wi antukmaja nuka nuwaitai.

“Ju nungkanmaya inamu ainia nuka yamaikia ii Yusrinuitai, tura ii apuri Cristonuitai. Nuka tuke inaitsuk mash ainia nunaka inartinuitai,” taun antukmajai. ¹⁶ Nunia veinticuatro (24) juun ainauka ni keemtairin Yusnumanini naka ketiarmia nu pinakumar tepesar, Yusen maaketai tinaun antukmajai. ¹⁷ Tura chicharinak:

“Apu Yus, ameka timiá kakaram asam pengké tujinkachuitme. Yaanchuiksha, tura yamaisha, tura tuke iwiaaku pujuwitme. Tura asam ami kakarmarmijai mash aa nuka inamat yamaikia nangkamame. Tura asakmin maaketai taji.

¹⁸ “Mash nungkanmaya amin kajertamin ainauka ame kajerkatin kinta jeayi. Tura jakaru ainau inankim, ni turamuri jistin kinta jeayi. Tura ami inatiram ainau, amin pachitmasar chichaman etserkarmia nu pengker awajsatin kinta jeayi. Tura ami aintsrum ainau aminak umirtaminak pujuarmia nusha mianchau ainausha, tura apu ainausha pengker awajsatin kinta yamaikia jeayi. Tura ju nungka pasemamtikin ainau ame amuktin kinta jeayi,” tinaun antukmajai.

¹⁹ Nunia Yus seatai juun jea nayaimpinam aa nuka ningki urankaun wainkamjai. Tura Yuse chichamen kayanam aarmau kajunam engkeamun wainkamjai. Tura uutmausha, tura charpisha, tura ipiamtasha patinaun antukmajai. Tura uusha uurun wainkamjai. Tura micha kaya tumaun juun yakiiya kakeenaun wainkamjai. ✠

12

Nuwa uchi jerermaun pachis etserkamu

¹ Tura nayaimpinmanini jikman nuwan wainchatin wainkamjai. Nu nuwa entsatiri tsaaya nunisang wincha jitsumir aun wainkamjai. Tura nu nuwaka nantunam tarimi wajaun wainkamjai. Tura yaa nayaimpinam doce (12) ketinaun tsengkrutia nunisarang ni muuken tenteawarun wainkamjai. ² Nu nuwaka jamtin asa uchin jatema kakar juutun antukmajai. ³ Nunia pangkain jikman, chikich wainchatin nayaimpinam wajaun wainkamjai. Wi wainkamja nuka juun pangkiya tumaun, turayat nawentin kapanniun wainkamjai. Tura siete (7) muuktinun kichik kichik muuken apu tsengkrutiria tumaun tsengkrakinaun wainkamjai. Turayat antiri diez (10) aun wainkamjai. ⁴ Ni juken waikmi yaa nayaimpinam ainia nuna kempatam ainamunam kichik nungkanam ujuarun wainkamjai. Nuniangka nuwa uchin jatemaun wainak, yamai uchi akiinamtai yuwataj tusa nuwan naka wajatun wainkamjai. ⁵ Turamtai nu nuwaka uchin aishmangkun jurerun wainkamjai. Nu aishmangka juun wajas nangkin jiru najanamun takus, mash nungkanmaya ainaun inaun wainkamjai. Tura nu nuwaka uchin jureru asamtai, uchin achikiar Yus pujamunam Yuse keemtairin iwiakarun wainkamjai. ✠ ⁶ Turuawaramtai

nu nuwanka aints atsamunam pujusti tusar, tura Yuse awemamuri niincha kichik warang nunia jimia pachak nunia sesenta (1,260) kinta yurawarti tusa, aints atsamunam tupikiaki nuni uukti tusa nuwan iwiakarun wainkamjai.

⁷ Nunia nayaimpinam maaninaun wainkamjai. Yuse awemamuri juuntri Miguel naartin chikich Yuse awemamuri ainaujai iruntrar Juun Pangkijai, tura ni inatiri ainaujai iruntrar maaninaun wainkamjai. ⁸ Tura maaninak Juun Pangkincha, tura ni inatiri ainauncha nepetkarun wainkamjai. Tura asar nepetkar nayaimpinmaya jiikiarun wainkamjai. ⁹ Tura nu Juun Pangki nawentin nu nangkamtaik napia tumau wantinkamia nuka juun iwianchitai, tura Satanás naartinuitai. Nuka mash nungkanmaya ainaun tsanukratin asamtai, nayaimpinmaya jiikiar ni inatiri ainaujai mash nungkanam ujuarinaun wainkamjai. ¹⁰

¹⁰ Nunia nayaimpinmaya kakarman untsumon antukmajai. Nu untsumauka nuwaitai: “Satanás tuke inaitsuk tsawaisha, tura kashisha ii yachí ainaun pachis Yusen: Nuka tunau ainawai, ta nunaka nungkanam ujuaruitai. Tura asamtai yamaikia ii Yusringkia ni kakarmarijai iin uwemtikramraji. Tura Yus ni Uchirin Criston pachis: Mash aa nuna inarti tinu asamtai, yamaikia mash aa nunaka inawai.

¹¹ “Tura Uwija Uchiriyá nunisang Cristo jaka numpen numparu asamtai, Cristonu ainau Cristo numpejai Satanásan nepetkarmiayi. Tura Cristo naarin pachisar aints ainaun ujakaru asar jatancha shamtsuk mantinaksha mantuwarti tusar, tuke nekas chichaman etserinak Satanásan nepetkaru armiayi.

¹² “Tura asamtai nayaimpinam pujuinautirmeka warastaram. Antsu juun iwianch nungkanam ujuarmau asa, ni pujustintri jumchik atin asamtai, nunaka nekau asa, nungkanam pujuinautirmin, tura juun entsanam wekautirmincha nukap kajertamau asamtai wait anentajrume,” taun antukmajai.

¹³ Nunia Juun Pangki nungkanam ujuarmau asa, nuwa aishmangkun jurerun papeaun wainkamjai. ¹⁴ Turamtai nu nuwaka aints atsamunam ni pujustintrin nanami jeati tusa, Yus kukui nanapea tumaun jimieran susamu asa, nujai ni pujustintrin jeatas nanaaki weaun wainkamjai. Tura nuni kempatam musach nunia japchiri yurtau asa uwemrawaitai. ¹⁵ Turamtai Juun Pangki jangkenia entsa nujangkruati tusa yumin inaun wainkamjai. Tura entsa nukap nujangkruk nu nuwanka amur jukiti tusa wakerukmayi. ¹⁶ Antsu entsa nuwan amurai tusa, nungka urani entsa Juun Pangki jangkenia jiinun mash kuyuaun wainkamjai. ¹⁷ Tura Juun Pangki nuwan kajerak, ni weari ampintrau ainaujai maanias weaun wainkamjai. Nu nuwa wearingkia Yus umirkatin chichaman umirinak, Jesucristo chichamenka tuke inaitsuk nekasampita tusar umirinawai.

13

Jimiar pachim pachisar etserkamu

¹ Nunia Juun Pangki juun entsa yantamen naikminam wajaun wainkamjai. Tura juun entsanmaya Juun Yawaaya Tumaun wainchati jiinkinun wainkamjai. Ni muuksha siete (7) aun tura antiri diez (10) aun wainkamjai. Tura kichik kichik antirin apu tsengkrutirin tsengkrakinaun wainkamjai. Tura kichik kichik muuken Yusen pachis pasé chicham aarmaun wainkamjai. ² Tura wi wainkamja nuka juun yawaaya tumau wajayat, nawe chayu nawea tumaun wainkamjai. Antsu jangken juun yawa jangkea tumaun wainkamjai. Nunia Juun Pangki aa nuka Juun Yawaaya Tumaun ni kakarmarin susa, niya nunisang aints ainaun inarti tusa, juun apun inaikiaun wainkamjai. ³ Tura chikich muukenka akakmawa tumautiat ataksha tsaarun wainkamjai. Tura tsaaru asamtai, mash nungkanmaya ainau nukap shaminak Juun Yawaaya Tumaun nemarkarun wainkamjai. ⁴ Tura Juun Pangkingkia Juun Yawaaya Tumaun ni kakarmarin susau asamtai, Juun Pangkincha aints ainau: Ameketme juuntam tinaun antukmajai. Tura nu Juun Yawaaya

☆ 12:7 (Jud. 9) ☆ 12:9 (Dan. 10.13; Luc. 10.18) ☆ 13:1 (Apoc. 17.3,7-12)

Tumauncha: Ameketme juuntam tusar: “¿Yáki jujai metek kakarmai? ¿Tura yáki jujaisha maanikminuit?” tinaun antukmajai.

⁵ Tura Juun Pangki Juun Yawaaya Tumaun ni kakarmarin susa, cuarenta y dos (42) nantu: Wikia miajuitjai tusa, Yusen pachis pasé chichasti tusa tsangkatkaun wainkamjai.

⁶ Turamu asa Juun Yawaaya Tumaun ama nu Yusen pachis pasé chichaun antukmajai. Tura Yuse naarincha pachis, tura Yuse jeencha pachis, tura nayaimpinam pujuinauncha pachis pasé chicharun antukmajai.

⁷ Tura Cristonu ainaujai maanikiat tusa, tura niincha nepetkat tusa, tura mash nungkanmaya ainauncha niish niish chichau ainauncha inarat tusa, Juun Pangkingkia nu Juun Yawaaya Tumaunka ni kakarmarin suwaun wainkamjai.✠

⁸ Turamtai mash nungkanmaya ainau Juun Yawaaya Tumaun: Ameketme juuntam tinaun antukmajai. Antsu Yus nungkanma najantsaing, tuke pujustinun aintsu naari papinum aatramu ainauka Juun Yawaanaka: Ameketme juuntam tinachun wainkamjai. Uwija Uchiri jakayat nantakmia nuka, nu papinka takakui.✠

⁹ Aints ju chichaman antinauka nintimrarti: ¹⁰ “Kársernum engkekratin ainaunka niincha kársernum engkewartin ainawai. Tura aints saapijai mangkartaunaka, niincha saapijai maawartin ainawai.” Tura asaramtai Juun Yawaaya Tumaun Yusen umirin ainaujai mesetan najaninamtai, Yuse aintsri ainauka wait wajainayat Yusen nintimsar: Yus jiisti tusar, pengker nintimsar pujusartin ainawai.

¹¹ Nuniasha chikich pachim nungkanmaya jiinun wainkamjai. Nuka uwija uchiriyá nunisang antirin jimiar aun wainkamjai. Turayat nu Juun Pangki chichawa nunisang nampurman chichaun antukmajai.

¹² Tura nu pachim nungkanmaya jiinki Juun Yawaaya Tumaun aa nuna ni kakarmarin suaun wainkamjai. Tura asamtai Juun Yawaaya Tumaun maamaitiat tsaarma nuna: Ameketme Yusem tiarat tusa, mash nungkanmaya ainaun inaun wainkamjai.

¹³ Tura Nungkanmaya Pachim iwianchi kakarmarijai wainchati takatnasha turaun wainkamjai. Tura aints jiiminamunam nayaimpinmaya ji keaun nungkanam ujuarun wainkamjai.

¹⁴ Tura Juun Yawaaya Tumaun wajamunam Nungkanmaya Pachim wainchatai takatan turati timiau asa, mash nungkanam pujuinaun anangkak, nu Juun Yawaaya Tumaun muuken saapijai akarkamaitiat, ataksha iwiaaku pujuma nuna nakumkamuri najanawarti tusa, aints ainaun inaun wainkamjai.✠

¹⁵ Tura nu Juun Yawaaya Tumaun nakumkamurin chichamtikiatas mayatairin engketati tusa, Nungkanmaya Pachim ni kakarmarin suaun wainkamjai. Tura nu nakumkamun: Ameketme Yusem tutsuk pujuinaunka maawarti tusa kakarmarin suaun wainkamjai.

¹⁶ Tura Nungkanmaya Pachim mash aints ainaun, mianchau ainauncha, tura apu ainauncha, tura kuikiartin ainauncha, tura kuikiartichu ainauncha, tura aintsu inatirin chu ainauncha, tura aintsu inatiri ainauncha untsur uwejen aatrarti tusa, tura nijajin aatrarti tusa, inaun wainkamjai.

¹⁷⁻¹⁸ Tura aints: ¿Nu aarmauka itiurak ainta? tusa nekaatas wakerakka, nukap nekatan yumiartinuitai. Juun Yawaaya Tumaun númeroirin nekau ainauka nekaawarti: Seiscientos sesenta y seis (666) aintsu númerointai. Nu númeroka aintsu nijajin tura uwejen aarchamu ainauka, tura nu páchimia naari ni uwejen tura ni nijajin aarchamu ainauka sumatnasha sumakchartinuitai, tura surutnasha surukchartinuitai tusa, Nungkanmaya Pachim nu aints ainaun surimiaun wainkamjai.

14

Uwemraru ainau kantamatnurun etserkamu

¹ Nuniangka ataksha jiimkaman, Uwija Uchirin Jerusalénnum, mura Sión tutainum wajaun wainkamjai. Tura níjai tsaniasar aints untsuri ciento cuarenta y cuatro warang (144,000) wajainaun wainkamjai. Nu aints ainau nijajin Uwija Uchiri naari, tura ni Apaachiri naari aatrarmaun wainkamjai.✠ ² Tura nuna wainkan, túna untsuri uutinawa tumaun, tura ipiamtasha kakarman patawa tumaun nayaimpinmaya antukmajai. Tura wi antukmaja nuka aints ainau kitarran tuntuinawa tumaun antukmajai. ³ Tura

✠ 13:7 (Apoc. 11.7) ✠ 13:8 (Apoc. 3.5) ✠ 13:14 (Mat. 24.24) ✠ 14:1 (Apoc. 7.3)

Yuse keemtairin ayamsar cuatro (4) iwiaaku ainauncha tura veinticuatro (24) juun ainauncha naka wajatsar, ciento cuarenta y cuatro mil (144,000) ainau yamaram kantan kantaminaun antukmajai. Tura nu kantanka aints kichkisha nuimiarchamin armiyai. Antsu mash nungka ainamunmaya nu ciento cuarenta y cuatro mil (144,000) aints Yus uwentikramu asar, nu yamaram kantanka nuimiaru armiyai. ⁴ Nu aints ainauka nuwajai tunaun takascharu asar pengker ainawai. Tura asar Uwija Uchiri tuni wekaawa nunisha niincha nemarsar wekajinawai. Nu aints ainauka ju nungkanmaya uwemraru asar, nuwá eemkar Yusnau tura Uwija Uchirinu armiyai. ⁵ Nuka wait chichaman pengké chichascharu asaramtai, nu aints ainaun pachisar: Tunaachawaitai tiartinuitai.

Kompatam Yuse awemamuri pachisar etserkamu

⁶ Nunia kichik Yuse awemamurin nayaimpinam nanaaki wekaun wainkamjai. Nuka mash nungkanmaya ainaun, niish niish chichau ainaun Yusnum uwemratin chichaman tuke etserkatin aa nuna etserkatas nanaaki wekaun wainkamjai. ⁷ Tura etserak kakarman chichaak: “Yus aints ainau tunaarin jiistin kinta jeau asamtai, Yus shamakrum pengker awajsataram. Tura asaram Yus nayaimpincha, tura nungkancha, tura juun entsancha, tura entsa kanaji ainauncha mash najanau asamtai, pengker awajsataram” taun antukmajai.

⁸ Tamati chikich Yuse awemamuri eemak nanaaki weaun nuna nemaras chichaak: “Babilonia yakat nekas juun aa nuka yanchuk yumpungmawaitai. Mash nungkanmaya ainau ni namangke wakerina nunak turuawarti tusa, tura ni umutirin umurar nampekarti tusa, pasemamtikin asamtai yumpungmawaitai, tuke yumpungmawaitai,” taun antukmajai. ⁹

Nunia chikich Yuse awemamuri kompatam ama nuka, eemak nanaaki weaun nuna nemaras kakarman chichaak: “Aints ainau Juun Yawaan tura ni nakumkamurincha: Ameketme Yusem tinauka, ni naarisha, tura ni númeroisha ni nijajin, tura ni uwejencha aamtikramu asaramtai, ¹⁰ nu aints ainau Yusen timiá nakitinau asaramtai, Yus kakarman kajerkatnuitai. Tura ni awemamuri ainauti wajamunam, tura Uwija Uchiri wajamunam, ji azufrejai tuke keamunam nukap wait wajaktinnum akupkartinuitai. ¹¹ Nu ji kapauka kajintsuk tuke mukuntiwai. Tura asamtai aints ainau Juun Yawaaya Tumaun Yuschau waininayat: Ameketme Yusem tinu ainauka, tura ni nakumkamurincha: Ameketme Yusem tinu ainauka ni naari ni uwejencha, tura ni nijajincha aatramu ainauka tsawaisha, tura kashisha ayamsuk wait wajakartin ainawai,” taun antukmajai. ¹² Tura asaramtai Yusnau ainauka ni chichamen umirkar Jesúsán tuke nemarkar asar, tuke inaitsuk pengker nintimsar wait wajakartin ainawai.

¹³ Nuniasha nayaimpinmaya chichaman antukmaja nuka nuwaitai: “Ju aarta. Ii Apurin umirinak yamai jakaru ainaunka, tura ukunam jakartin ainauncha Yus waramtikartinuitai,” taun antukmajai.

Tamati Yuse Wakani chichaak: “Nekasaintai. Yusen umirkaru asar, ni pengker turamurinka Yuska kajinmatsui. Tura Yuse takatrin takakmasaru asar ayamsartinuitai,” taun antukmajai.

Ju nungkanmaya ainaun juuktin kinta pachis etserkamu

¹⁴ Nunia jiihkaman yurangmin pújun wainkamjai. Tura yurangminam ketun wainkamjai. Nuka Yus ni awemamurin akupkau wainiatun, aintsua tumaun wainkamjai. Tura ni muuken tsengkrutin kuri najanamun tsengkrakun wainkamjai. Tura kuchín eren turayat tseengkan takakun wainkamjai. ¹⁵ Tura chikich Yuse awemamuri nayaimpinmaya Yuse jeenia jiihun wainkamjai. Nuka yurangminam keemas nunia kakar untsuak: “Nungkanam árak yanchuk tsamaku asamtai, juuktin kinta jeayi. Tura asamtai kuchírunjai charukam juukta,” taun antukmajai. ¹⁶ Tamati yurangminam ketun wainkamja nuka ju nungkanmaya aints arakan kuchíjai charur juwawa nunisang juwaun wainkamjai.

☆ 14:4 (Sant. 1.18) ☆ 14:8 (Apoc. 18.2) ☆ 14:10 (Sal. 11.6)

¹⁷ Nunia chikich Yuse awemamuri Yuse jeenia nayaimpinam wainkamja nunia jiinun wainkamjai. Nusha nunisang kuchín eren tseengkan takakun wainkamjai. ¹⁸ Nunia chikich Yuse awemamuri kungkuti keematinmaya jiinun wainkamjai. Nuka jiin akupunuyayi. Tura chikich Yuse awemamuri kuchí tseengkan ére aa nuna takakun kakar untsuak: “Nungkanam uva nere yanchuk tsamaku asamtai, kuchírum ere takakme nunajai charuram juukta,” taun antukmajai.

¹⁹⁻²⁰ Tamati Yuse awemamuri nungkanam tari ni kuchírijai uva neren charuk juwaun wainkamjai. Tura uva yumirin juukartas, yakta aarin uva nere irumtainum chumpiamu asamtai, uva neren nájainaun wainkamjai. Tura uva yumiri jiinun wainkatatkaman, numpa jiinun wainkamjai. Tura numpa entsa tumaun kempatam pachak (300) kilómetros pajamar kawai jangkejai metek kuna wajasun wainkamjai. Wi wainkamja nuka aints Yusen umirtan nakitin ainaunka Yus kajerak amuktinuitai taku tawai.✠

15

Inangnamu wait wajaktiniun pachis etserkamu

¹ Tura ataksha jiimkaman, chikich siete (7) Yuse awemamurin nekas shamrumtinun wainkamjai. Tura ataksha inangnamunam siete (7) wait wajaktinun nekas shamrumtinun wainkamjai. Nu wait wajaktin nangkamaramtai, nuniangka Yuska aints ainaunka kajerkashtinuitai.

² Nunia jiimkaman, juun entsa winchaan miamian ispiya tumaun, turayat jiya tumau keaun wainkamjai. Tura nuni aints ainau kitarra tumaun Yus susarma nuna takusar wajainaun wainkamjai. Nu aints ainauka iwianch Juun Yawaaya Tumauncha, tura ni nakumkamurinha: Ameketme Yusem ticharu asar, tura Juun Yawaaya Tumau naarisha, tura númeroisha ni nijajinha, tura ni uwejencha aatrachmau asar nuni wajainaun wainkamjai. ³ Tura Yuse inatiri Moisésa kantarín, tura Uwija Uchiri kantarín kantaminaun antukmajai. Nu kantaka nuwaitai:

“Apuru Yus, Ameka mash tujinkachuitme. Ami kakarmarmijai najanamiam nuka nekas shiirmaitai, tura nekas pengkeraitai. Ameka nekasam mash nungkanmaya ainau Apurinme, tura pengker aa nuke turau asam ameka nekasainme.✠

⁴ “Apuru Yus ¿yaachik amincha shamramtsuksha: Ameketme juuntam turamtsuksha inaitamsarti? Ameka pengké tunaarinchau asakmin, ame pengker turamurmin wainkaru asar, mash nungkanmaya ainau amin kautramkar: Ameketme juuntam turamiartinuitai,” tu kantaminaun antukmajai.✠

⁵ Nunia jiimkaman, nayaimpinam Yuse jeen nekas juun amia nuna uranniun wainkamjai. Yaanchuik Yuse ayamtairi tesaamu amia nu nayaimpinam aun wainkamjai. ⁶ Nunia siete (7) Yuse awemamuri Yuse jeenia jiininaun wainkamjai. Nuka wejmakan lino tutain najanamun entsarinaun wainkamjai. Tura ni wejmakrincha pakuichau wincha ainaun wainkamjai. Tura kachumtai kuri najanamun netsepea miami kachumawar wajainaun wainkamjai. Nuka siete (7) wait wajaktiniun akupkartin ainawai. ⁷ Nunia cuatro (4) iwiaaku ainaun nu nangkamchakun wainkamja nuna ataksha kichkin wainkamjai. Nuka Yuse awemamuri siete (7) ainia nuna piningkia tumau kuri najanamun kichik kichik suaun wainkamjai. Tura nu piningkia tumaunum Yus tuke iwiaaku puja nuna siete (7) wait wajaktintrin akupkatin aa nu engkeamun wainkamjai. ⁸ Nunia Yus paaniunam puja nuka timiá kakaram asamtai, ni jeen mukunit piakun wainkamjai. Turamtai nu siete (7) Yuse awemamuri wait wajaktiniun ukarar amuinatsaing, Yuse jeenka wayaachminuyayi.✠

16

Siete wait wajaktiniun pachis etserkamu

✠ 14:19-20 (Apoc. 19.15) ✠ 15:3 (Ex. 15.1-18) ✠ 15:4 (Sal. 86.9) ✠ 15:8 (Ex. 40.34; Isa. 6.4)

¹ Nunia chichaman kakarman Yuse jeenia Yuse awemamuri siete (7) ainia nuna akupkatas chicharun antukmajai. Nu chichamka nuwaitai:

“Yuse kajekmauri siete (7) piningnum engkeamu ainau nungkanam ukartaram,” taun antukmajai.

² Tu akatramu asa, Yuse awemamuri kichik we, piningnum engkeamun nungkanam ukaun wainkamjai. Nuna ukaramtai aints ainau Juun Yawaaya Tumaun naarincha tura númerorincha aamtikramu ainau, tura Juun Yawaaya Tumaun nakumkamurin: Ameketme Yusem tinu ainauka kuchap pasé najamin ainaujai wait wajainaun wainkamjai.✠

³ Nunia chikich Yuse awemamuri, jimiar aa nu, piningnum engkeamun juun entsanam ukaun wainkamjai. Nuna ukaramtai, juun entsaka aints maamua nunisang numpa najanarun wainkamjai. Tura asamtai juun entsanam mash iwiaaku ainausha jakarun wainkamjai.

⁴ Nunia chikich Yuse awemamuri, kempatam aa nu, piningnum engkeamun ukaramtai, entsa ainausha tura entsa kanaji ainausha numpa najanarun wainkamjai.✠

⁵⁻⁶ Nunia Yuse awemamuri entsan wainin aa nuna chichamen antukmajai. Nuka Yusen chicharak:

“Apuru Yus, yaanchuiksha tuke pujuyame. Tura asam yamaisha tuke iwiaakuitme. Ameka pengké tunaarinchau asam, tunaarintin ainau aitkamame nuka nekas pengkeraitai tajame. Aints ainau ami aintsrum ainauncha maawaru asaramtai, tura ami chichamin etserin ainauncha nunisarang maawaru asaramtai, nu aints ainauka numpan umurarat tusam, wait wajaktincha suame,” taun antukmajai.

⁷ Nunia kungkuti keematinmaya chicham jiinun antukmajai. Nu chichaman chichauka Yusen chicharak:

“Apuru Yus, Ameka pengké tujinkachuitme. Ameketme nekasam. Ameketme pengkeram. Tura asam tunau ainauka wait wajaktin suame” taun antukmajai.

⁸ Nunia chikich Yuse awemamuri, cuatro (4) aa nu, tsaá sukuam aints ainau seekijai wait wajakarti tusa, piningnum engkeamun tsaanam ukaun wainkamjai. ⁹ Turamtai aints ainau tsaá sukuam timiá wait wajainayat, ni tunaarinka inaisacharun wainkamjai. Tura Yusnaka: Juuntaitme tutsuk, antsu Yus nu wait wajaktiniun susarmaitiat, Yusen pasé chicharinaun antukmajai.

¹⁰ Nunia chikich Yuse awemamuri, cinco (5) aa nu, piningnum engkeamun Juun Yawaaya Tumaun keemtairin ukarun wainkamjai. Turamtai Juun Yawaaya Tumaun umirkaru ainau pujamurin tee wajakinun wainkamjai. Turamtai nu aints ainauka nukap wait wajainau asar, inajin esainiar pujuinaun wainkamjai.✠ ¹¹ Tura timiá najaiminau asar, tura kuchaprukar wait wajainau asar, Yus nayaimpinam puja nuna pachisar pasé chicharinaun antukmajai. Tura ni tunau turamurinja pengké inaisacharun wainkamjai.

¹² Nunia chikich Yuse awemamuri, seis (6) aa nu, piningnum engkeamun entsa nampuram Eufrates tutainum ukarun wainkamjai. Tura ukaramtai tsaá taakmaunumanini apu ainau ni suntarijai winiarat tusa, entsa kuyua mujukash wajaknun wainkamjai.

¹³ Nunia jiimkaman, Juun Pangki jangkenia, tura Juun Yawaaya Tumaun jangkenia, tura Nungkanmaya Pachim anangkartutai chichaman etsernu jangkenia kempatam pasé wakantrintin parungkachia tumaun jiininaun wainkamjai. ¹⁴ Nu pasé wakantrintin wainchatitakatnasha turinak, mash nungkanmaya ainau apuri: Yusjai maaniataram tiartas jiininaun wainkamjai. Nu maaniatin kinta jeamtai, Yus nekas kakaram asa nu apu ainau nepetkatnuitai.

¹⁵⁻¹⁶ Nunia mash nungkanmaya ainau apuri iruntrararatusar, kempatam pasé wakantrintin ainau nungka Armagedón tutainum iruntrararun wainkamjai. Nu nungkaka hebreo chichamejai tu inaikiamuitai.

✠ 16:2 (Ex. 9.10) ✠ 16:4 (Ex. 7.17-21) ✠ 16:10 (Ex. 10.21)

Nunia Cristo chichamen antukmajai. Nu chichamka nuwaitai: “Anearum pujustaram. Wikia kasa aintsua nunisnak aneachmau winitnuitjai. Tura asamtai aints kanutsuk ni entsatirin pengker wainua nunisang pujauka nekas warastinuitai. Tura ni entsatirin pengker wainu asamtai kasarkachartinuitai. Tura misu wajachu asa natsaarchatnuitai,” taun antukmajai.✠

¹⁷ Nunia chikich Yuse awemamuri siete (7) aa nuka piningnum engkeamun nasenam ukaun wainkamjai. Tura nasenam ukaram, Yuse jeen nayaimpinam amia nuna keem-tairinia kakarman untsurun antukmajai. Nu untsurauka nuwaitai: “Wait wajaktinka yanchuk umismawaitai.” ¹⁸ Nu chichaman wi antukamtai, uutmausha uutun antukmajai. Tura charpisha, tura ipiamtasha patinaun antukmajai. Nunia uu nekas kakarman uurun wainkamjai. Aints nu nangkamtaik pujuinausha, tura yamai pujuinausha timiá kakaram uurunka pengké wainkacharmiayi.✠ ¹⁹ Timiá kakarman uurmatai, juun yakat kempatam kanakarun wainkamjai. Tura chikich nungkanmaya yakat ainausha yumpuninaun wainkamjai. Tura juun yakat Babilonia tutain Yus timiá kajerau asa, ni nukap wait wajakartintrin akuptukun wainkamjai. ²⁰ Timiá kakarman uurmatai, isar ainausha, tura mura ainausha mengkakarun wainkamjai.✠ ²¹ Nunia micha kaya tumau mermari cuarenta (40) kilo jeatak nayaimpinmaya aints ainamunam iyaarinaun wainkamjai. Tura micha iyaaramtai, aints timiá wait wajainayat, Yusen kajerinak tuke pasé chicharinaun antukmajai.✠

17

Babilonia pachisar etserkamu

¹ Nunia siete (7) Yuse awemamuri wi wainkamja nuna ataksha kichik wainkamjai. Tura wi wainkam chichartak: “Winita. Juun kungkatip untsuri entsa ainamunam keta nuna wait waktintrin amin inaktustasan wakerajme. ² Untsuri nungkanmaya apu ainau nu nuwajai nekasar tunaun turin armiayi. Tura untsuri nungkanmaya ainau nu nuwa tunaarin wakerinau asar, ni umutiri vino tutajai nampekarua nunisarang puju armiayi,” taun antukmajai.

³ Tura Yuse Wakani nintirun piatruku asamtai, karanma nunisnak Yuse awemamuri aints atsamunam wina jurukin asamtai, nuwan ni entsamtairin kapanniunam entsamkaun wainkamjai. Tura ni entsamtairi namangken Yusen pachis pasé chicham aarmaun wainkamjai. Tura entsamtairi siete (7) muuktinun wainkamja nuna antirisha diez (10) aun wainkamjai.✠ ⁴ Tura nu nuwa wejmakrin yamakijai engkermawa tumaun, tura kapantin akik aa nuna entsar, kuri akiknasha tura kaya akiknasha, tura shaak akiknasha iwiarmamar, pining kuri najanamun takakun wainkamjai. Nu piningnum ni aintsjai tunau turutiri piakun wainkamjai. ⁵ Tura ni nijajin ni naaringkia aarmaun wainkamjai. Nu aarmauka nuwaitai: “Juun yakat Babiloniaka kungkatip ainau nukurintai. Tura mash nungkanmaya tsuutmai turin ainau nukurintai.” ⁶ Nu nuwaka Yuse aintsri ainauncha, tura Jesúsá chichamen etserkaru ainauncha mau asa, ni numpen umur nampekua tumaun wainkamjai.

Tura nuna wainkan nukap nintimramjai. ⁷ Wi nintimramtai, Yuse awemamuri wina chichartak:

“¿Waruka timiatcha nintimrame? Ju nuwaka ni entsamtairi siete (7) muuktin tura diez (10) antirintin aa nuka warimpita tusan, chikich ainaunka nekamtikiachmin ayatun, aminka paan nekamtikiatjame. ⁸ Ju nuwa entsamtairi wainkame nuka yaanchuik pujuya nuwaitai. Tura yamaikia juningkia pujachiat, nungka amumanum tuke jatsuk waa juunumia jiinkitnuitai. Tura jiinkiamtai, Yuse umirchau ainau ni naari nayaimpinam Yuse papirin nu nangkamtaik aatrachmau asar, nu nuwa entsamtairin wainkar nukap

✠ 16:15-16 (Mat. 24.43; 1.Tes. 5.2; 2.Ped. 3.10; Apoc. 3.3) ✠ 16:18 (Apoc. 6.12;8.5;11.13) ✠ 16:20 (Apoc. 6.12;11.13) ✠ 16:21 (Ex. 9.23; Apoc. 8.7;11.19) ✠ 17:3 (Apoc. 13.1)

nintimrartinuitai. Ju nuwa entsamtairingkia yaanchuik pujuutiat yamaikia atsawai, antsu ataksha wantinkatnuitai.✠

⁹ “Nekas nekau ainauka ju chichamnasha nintimrarti. Nu nuwa entsamtairi muuke siete (7) aa nuka siete (7) mura tumawaitai. Nu nuwa tumau aa nuka siete (7) muranam matsatui. ¹⁰ Nu nuwa entsamtairi muuke wainkame nuka siete (7) apua tumawaitai. Antsu siete (7) apu ainayat, cinco (5) apu ainauka yanchuk mengkakarua ainawai. Tura kichik yamaikia pujayat, kichka wantintsui. Antsu ni taasha jumchik arus mengkakatnuitai. ¹¹ Tura Juun Yawaaya Tumau yaanchuik pujumia nuka, nunia mengkakarua nuka chikich seis (6) apu ainaujai mash irumram siete (7) apu ainawai. Tura ataksha wantinak tuke mengkakatnunam wetinuitai.

¹² “Nunia antiri diez (10) wainkame nuka diez (10) apu ainawai. Nuka aintsun inatnaka nangkaminatsui. Tura aints inatan nangkamawar, Juun Yawaaya Tumaujai aints ainaun jumchik kintachik inarartinuitai. ¹³ Nu apu ainau mash metek nintimrar: Juun Yawaaya Tumau iincha mash inatmarti tusar wakeriartinuitai. ¹⁴ Tura Uwija Uchirijai maanikiartinuitai. Tura wainiat Uwija Uchiri mash juun ainau juuntri asa, tura mash apu ainau apuri asa, ni aintsri ainaujai tsanias nu apu ainauncha nepetkartinuitai. Tura Uwija Uchirijai tsaniasar pujuinauka Yus: Wina umirtuktaram tusa untsukmau asar, Criston miatrusarang umirinawai,” turutun antukmajai.✠

¹⁵ Nunia ataksha Yuse awemamuri wina chichartak: “Juun kungkatip untsuri entsa ainamunam ketu wainkame nuningkia nu juun entsa ainauka nuwaitai tusan nekamtiki-atjame. Nuka untsuri nungkanmaya aints ainawai. Tura untsuri asar, niish niish chichainawai. ¹⁶ Tura nu diez (10) antirintin wainkame nuka diez (10) apu asar, nu juun kungkatpin nakitrar, ninu aunaka mash atankiar jurukiar, misu kuimiakua nunisarang ukukiartinuitai. Tura ni namangken yuwar, nuniangka epewartinuitai. ¹⁷ Tura Yus timia nunaka mash umiatsaing, nu apu ainau mash iruntrar metek nintimsar: Juun Yawaaya Tumau iin inatmin ati tusar wakerukartinuitai. ¹⁸ Tura nuwa tumau ame wainkame nuka nekas juun yaktaitai. Nu juun yaktanam pujuinau mash nungkanmaya apurin inaminawai,” turutun antukmajai.

18

Babilonia yakat yumpungmauri

¹ Nunia jiiimkaman, chikich Yuse awemamurin nayaimpinmaya taarun wainkamjai. Ni kakarmari nukap au asamtai, nungkasha nukap paan wajaknun wainkamjai. ² Tura kakar untsusak:

“Babilonia yakat juun aa nuka mash yumpungmawaitai, tuke yumpungmawaitai.

Tura iwianchi jee najanari.

Tura pasé wakani pujutiri najanari.

Tura asamtai nanamtin pasé ainau tura tsuutmai ainau nuni pasungminawai.✠

³ Mash nungkanmaya ainau

Babilonianmaya ainaujai

metek tunau takainau asar,

ni umutirijai nampekarua nunisarang

nintinchau wajau armiayi. Tura chikich nungkanmaya apu ainau nu yaktajai tsanir-mawarua nunisarang puju armiayi.

Tura nu yaktanmaya warinchun surin ainau

nu yaktanmaya warinchurin surukar

kuikiartin wajau armiayi,”

taun antukmajai.

⁴ Nunia chikich chichaman nayaimpinmaya chichaun antukmajai. Nu chichamka nuwaitai:

✠ 17:8 (Apoc. 13.8) ✠ 17:14 (Apoc. 19.16) ✠ 18:2 (Apoc. 14.8)

“Wína aintsur ainautiram,
nu yaktanmaya tunau jurumakrum
wait wajakairam tusan
jiinkitaram tajarme.

⁵ Nu yaktaka tunau piaku asamtai,
tunaarintin ainau timiá untsuri asar,
ni tunaari nayaimpin antingkua nunisarang ainawai.
Tura asaramtai Yus ni tunaarinka kajinmatsui,” taun antukmajai.

⁶ Nunia Yuse awemamuri ainaun chicharak:
“Chikich ainaun wait waktiniun susarmia nuna nangkamasrumek
nu aints ainau nukap wait wajakarti tusaram yapaijkiataram.
Tura chikich aints ainaun
tunau timiá takamtiksaru asaramtai,
nuna nangkamasarang nukap wait wajakarti tusaram wenataram. ☆

⁷ Nuka ningki nintintumasar:
Wikia apu nuwaria nunisnak yuumatsuk pujajai.
Tura wajechuitjai.
Tura asan waitka wajakchatatjai.
Tura wikia miajuitjai tu nintimsar pujuinayat,
ni pasé turamuri wararsarmia nujai metek wait wajakartin susataram.

⁸ Aints timiá tunau asaramtai,
apu Yus timiá kakaram asa,
kichik kintatik wait waktiniun susatnuitai.
Tura asa jatancha,
tura nukap wait waktinnasha,
tura tsukancha akupkatnuitai.
Nunia ni yaktarinka jijai keemaktinuitai,” taun antukmajai.

⁹ Turamtai mash nungkanmaya apu ainau nu yaktanmaya aintsua nunisarang tunau
takainau asar, tura tuke ni wakeramurin najaninau asar, nu yakat keaun jiisar juutinak:
“Chaj ¿Warukaya nu yaktasha timiá shiiram aa nusha keawa?
¿Iisha warukatnukitaj?” tiartinuitai.

¹⁰ Tura mash nungkanmaya ainau apuri nu wait waktiniun shaminak arák wajasar:
“Chaj, juun yakat Babilonianmaya ainautirmin
wait anentajrume. Atum wait wajamuri aneachmau jeartamin asamtai,
kichik urajaing jeartamniurme,” tiartinuitai.

¹¹ Nunia juun yaktaka keemamu asamtai, mash nungkanmaya ainau waririn surin
ainauka wake mesekar juutkamaikiak: “¿Yamaikia yáki ii waririn sumakarat?” tiarti-
nuitai. ¹² Babilonia yaktanam itau armia nuka nuwaitai: Kurin, nunia kuikian, nunia
kaya shiiram ainia nuna, nunia shaak shiiram ainia nuna, nunia tarach akik lino tutain,
nunia tarach kapantaku tura kapantin ainia nuna, nunia tarach seda tutain, nunia numi
kungkuram ainia nuna, nunia irijánti nain akik aa nuna, nunia numi akik ainia nuna,
nunia jirun, nunia jiru yangku ijakmamchau aa nuna, nunia kaya mármol tutai aa nuna
itau armiai. ¹³ Nunia yutai pachimtai ishping najanamun, nunia chikich yutai pachimtai
kungkuram ainia nuna, nunia shirikip kungkuram aa nuna, nunia kungkuti mirra tutain,
nunia perfume akik aa nuna, nunia vinon, nunia olivo macharin, nunia pang najantain,
harina tutain, nunia trigon, nunia warin chu entsau ainaun, nunia uwija ainaun, nunia
kawai ainauncha, nunia kawai japitin kárru tutain, nunia aintsnasha chikich ainamunam
surukmi tusar itau armiai. ¹⁴ Tura nu yaktanmaya ainaun pachisar chichainak:
“Yurang ainaun wakerin armia nuka yamaikia atsuinawai.

Tura ni kuikiarisha,
tura timiá shiiram ainia nuka
tuke mengkakaruru asaramtai,

☆ 18:6 (Sal. 28.4)

yamaikia pengké wainkachartinuitai,” tiartinuitai.

¹⁵ Tura nu yaktanam wariri untsurin surukar kuikiartin wajasaruka nu wait wajaktiniun shaminak arák wajasar wake mesekar juutiartinuitai. ¹⁶ Tura chichainak:

“Chaj, nekas juun yaktanmaya ainauka

shiirman iwiarmamrartas

tarach akik lino tutain sumakar,

tura tarach kapantakun

tura kapantin aa nuna entsarar pujú armiayi. Tura kurijaisha, tura kaya timiá shiirma-
jaisha,

tura shaak akik ainia nujaisha shiirman iwiarmamin armiayi.

¹⁷ Turayat kakarmachu

ni kuikiari mash mengkakayi,”

tinaun antukmajai.

Tura juun kanu apuri ainausha, tura juun kanunam wekain ainausha, tura kanunam takamin ainausha, tura kanurtin ainausha mash arák wajasar, ¹⁸ juun yakat keamtai, mukunturin jiisar juutinak:

“¿Tu yaktak ju yaktajaisha meteksha at? Ju yaktajai metekka kichkisha atsuyi,” tinaun antukmajai.

¹⁹ Timiá wake mesemar pujuinak, nungka juyurin jukiar, muuken yukuuminak kakarar juutinak:

“Chaj, ju yaktaka timiá juun ayat yumpuunkayi.

Juun kanurtin ainauka

juun entsanam wekajinau asar,

waririn akik ainia nuna ju yaktanam jukiar

kuikiartin wajasarmiayi.

Turayat yamaikia kakarmachu mengkakayi,” tinaun antukmajai.

²⁰ Nunia ataksha nayaimpinmaya chichaun antukmajai. Nu chichamka nuwaitai:

“Nayaimpinam pujuinautiram,

tura Yus akupkamu ainautirmesha,

tura yaanchuik Yuse chichame etserin ainautirmesha,

tura Yusnau ainautirmesha,

ju yakat meseru asamtai

mash warastaram.

Nu yaktanmaya ainau atumin pasé awajtamsaru asaramtai,

Yus ni wait wajakartiniun susa

yapaijkiau asamtai warastaram,”

taun antukmajai.

²¹ Nunia chikich Yuse awemamuri nekas kakaram aa nuka, kaya juuntan merman juki, juun entsanam ujung chichaak:

“Ju kayaka juun entsanam ujungmawa nunisang

juun yaktasha Babilonia tutai mengkakatnuitai.

Tura asamtai atakka pengké wainakchatnuitai.

²²⁻²³ Nu yaktanmaya ainau

wariri surin mash nungkanmaya apuri ainayat,

wishin asar

nu yaktanam pujuinau mash nungkanmaya ainaun anangkawaru asaramtai,

yamaikia kitarr tuntuyamuncha,

tura nampeamuncha,

tura nangku umpuamuncha,

tura pupun pupuntramuncha,

tura jiru takainamuncha,

tura trigo neketai shinamuncha

pengké kichkisha antukchartinuitai.

Tura nu yaktanmaka kantiin kichkisha keemakchartinuitai.
Tura aints ainau nakurinamuncha pengké antukchartinuitai.

²⁴ Nu yaktanam yaanchuik
Yuse chichame etserin ainaun,
tura Yuse aintsri ainauncha
tura chikich nungkanmaya ainauncha nangkamiar maawaru asaramtai,
nu yaktaka mengkakatnuitai,” taun antukmajai.

19

¹ Nunia nayaimpinam aints untsuri kakarar chichainaun antukmajai. Wi antukmaja nuka nuwaitai:

“Ii Yusringkia paaniunam puja nuka ni kakarmarijai iin uwemtikramrau asamtai, maaketai tiarmi.

² Yuska nekas tunaarinchau asa
tupin nintimias,
tunaarintin ainaun ni tunaarijai metek wait wajaktiniun suawai.

Tura asa nu yaktanmaya ainausha
juun kungkatpia nunisarang
tuke mash nungkanmaya ainaun
tunau takamtikсарu asaramtai,
ni wait wajaktintrin susayi.
Tura Yuse inatiri ainaun
maawaru asaramtai,
niisha jakaarat tusa yapaijkiayi,” tinaun antukmajai.

³ Nunia ataksha chichainak:

“Nu yakta mukuntiuri
tuke nangkantsuk
yakí wakatin asamtai,
Yuska maaketai titaram,” tinaun antukmajai.

⁴ Nuniangka veinticuatro (24) juun ainau nayaimpinam wainkamja nuka, tura cuatro (4) iwiaaku ainau nayaimpinam wainkamja nujai tsaniasar, Yus ni keemtairin keta nunak: Ameketme juuntam tiartas pinakumrar tepesar: “Tu atí. Yus maaketai titaram,” tinaun antukmajai.

⁵ Nunia Yuse keemtairinia chichaman antukmajai. Wi antukmaja nuka nuwaitai:

“Yuse inatiri ainautiram,
uchi ainautirmesha tura juun ainautirmesha,
ni umirkuram pujau asaram,
mash iruntraram Yus pengker awajsataram,” taun antukmajai.

Uwija Uchiri nuwa nawantan nuwatkamuri

⁶ Nuniangka aints untsuri chichainawa tumaun antukmajai. Ni chichaamuringkia túna untsuri uutinawa tumaun tura ipiamat kakarman chichawa tumaun antukmajai. Nuka chichainak:

“Ii Apuri Yuska pengké tujinkachuitai.
Nekas mash aa nunaka inartinun nangkamau asamtai,
Yuska maaketai tiarmi.

⁷ Uwija Uchiri nuwenatin kintaka yanchuk jeayi.
Tura asamtai ni nuwaringkia yanchuk mash umisi.
Tura asamtai yamaikia warasarmi.

Tura nukap warasar
Yuska pengker awajsarmi.

⁸ Tura uwija Uchiri nuwari
entsatiri lino tutain wincha pakuichaun entsarti tusa,
Yuska tsangkatkayi.
Nu tarach akik lino najanamuka

Yuse aintsri ainau pengker turamuri ainawai taku tawai,” tinaun antukmajai.

⁹ Nunia Yuse awemamuri wína chichartak: “Jusha aarta, Uwija Uchiri nuwenmaunum untsukmau ainaun Yuska waramtikmartinuitai,” turutun antukmajai. Nunia ataksha chichartak: “Ju chichamka nekasar Yuse chichame ainawai,” turutun antukmajai.

¹⁰ Turutmatai ni wajamunam: Ameketme juuntam titasan tikishmatramjai. Turamaitiat wína chichartak: “Aitkarawaip. Antsu Yusek: Ameketme juuntam tita. Wisha amea nunisnak Jesús inatiri asan, ni chichamen etserina nujai metek Yuse inatirinjai. Yuse chichame etserin ainau Jesús tímia nuna antukaru asar, nusha nunisarang etserinawai,” turutun antukmajai.

Kawai pujunam entsamkaun pachis etserkamu

¹¹ Nunia jiimkaman nayaimpin uranniun wainkamjai. Tura kawai pújuncha wainkamjai. Tura kawainum entsamkaun wainkamjai. Ni naaringkia Yuse Chichamen Umirin tura Nekas Aa Nuna Turin naartinuitai. Tura mash aa nuna inakratin asa, tura tunaarinchau asa, ni umirchau ainaujai mesetan najanui. ¹² Ni jiingkia nekas ji kapawa tumaun wainkamjai. Tura ni muuken tsengkrutin untsurin tsengkrakun wainkamjai. Chikich naarisha aatramun wainkamjai. Antsu warina takua tawa nunaka ningki nekawai. ¹³ Ni entsatiri numpajai engkermaun kapanniun entsarun wainkamjai. Tura ni naaringkia Yuse Chichamentai.✠ ¹⁴ Tura ni suntari ainau nayaimpinmaya tariar, entsatiri pújun lino tutai najanamun pakuichaun entsarar, kawai pújunam keemsar namarinaun wainkamjai. ¹⁵ Tura saapi yantamen mai ere tsakamua tumaun nuwik wainkamja nuna jangkenia jiinun wainkamjai. Nu saapijai mash nungkanmaya ainaun nepetkatnuitai. Tura nangki jiru najanamujai mash nungkanmaya ainaun inartinuitai. Yuska timiá kakaram asa, tura tunaarintin ainau turamurin pengké nakitau asa, nu aints ainaun wait wajaktiniun nukap susatas akupkau asantai, aints uva yumirin juuktas, nawejai yurangken najawa nunisang, Yusen umirchau ainaun wait wajaktiniun suawai.✠ ¹⁶ Tura ni wejmakrin tura ni makuincha chikich naari aarmaun wainkamjai. Nu aarmauka nuwaitai: “Mash Apu Ainau Apurintai. Tura Mash Juun Ainau Juuntrintai.”✠

¹⁷ Nunia Yuse awemamuri tsaanam wajaun wainkamjai. Nuka nanamtin ainaun yakí nanaminaun kakar untsuak:

“Yus atum yuwatniunka umisu asantai kaunkataram.

¹⁸ Apu ainau namangkesha,
tura suntara apuri namangkesha,
tura mangkartin ainau namangkesha,
tura kawai ainau namangkesha,
tura kawainum keemsaru namangkesha yuwamnuram kaunkataram.
Jakaru ainau namangkesha,
tura inatichu ainau namangkesha,
tura inati ainau namangkesha,
tura mianchau ainau namangkesha,
tura apu ainau namangkesha
mash yuwitaram,” tusa untsuaun antukmajai.

¹⁹ Nunia Juun Yawaaya Tumau mash nungkanmaya apuri ainaujai, nunia ni suntarijai mash iruntrar Cristo kawai pújunam keemsau aa nujai, tura nuna suntarijai mesetan najanawartas iruntrarun wainkamjai. ²⁰ Nunia Juun Yawaaya Tumaun achikiar, nunia Anangkartin Chichaman Etsernu Juuntrincha achikiar, mai iwiaaku waininayat, kucha jiiya tumau azufrejai keamunam ujungkarun wainkamjai. Nu Anangkartin Chichaman Etsernu Juuntringkia Juun Yawaaya Tumau wajamunam wainchati takat turamujai aints ainaun anangkau asantai, Juun Yawaaya Tumau naaringkia aints ainau nijajin, tura ni uwejencha aatrarun wainkamja nuwaitai. Tura Juun Yawaaya Tumau nakumkamurin:

✠ 19:13 (Dan. 10.5-6; Juan 1.1, 14) ✠ 19:15 (Sal. 2.9; Apoc. 14.20) ✠ 19:16 (Apoc. 17.14)

Ameketme juuntam tinaun antukmaja nuwaitai. Tura aintsun untsurin anangkawaru asaramtai, kucha jiya tumau azufrejai keamunam mai ujungkarun wainkamjai. [☆] 21 Antsu chikich aints ainau kawai pújunam keemsaujai maaniawaru asaramtai, saapijai ni jangkenia jiinua nujai mash amuaun wainkamjai. Turamtai nanamtin ainau nu jakaru ainau namangken yuwaar tutuararun wainkamjai.

20

Kichik warang musach Cristo aints ainaun inartinri

¹ Nunia chikich Yuse awemamurin nayaimpinmaya taarun wainkamjai. Nuka waa jiitamran yawirin takus, tura cadenan sarman takus taarun wainkamjai. ² Tura nu Juun Pangki Nawentin nu nangkamtaik napia tumau wantinkamia nuka, iwianchi apuri Satanás naartinun ataksha wainkamjai. Nunia Yuse awemamuri Satanásan achik cadenajai jingkia, ³ waa jiitamranam engkea, nunia tektutirijai tektuk, yawijai yawikun wainkamjai. Turamtai mash nungkanmaya ainaun anangkawai tusa, kichik warang musach nuni engkeamu pujustinuitai. Tura kichik warang musach nangkamaramtai, ataksha jumchik kinta atía akupkatnuitai. [☆]

⁴ Nunia apu keemtairi ainamunam nuni ketinaun wainkamjai. Yus: Aints ainau turamuri atumka nekaataram tusa kakarmarin susamuitai. Nuningkia Jesúsua umirin Yuse chichamen etserkaru asar, jachajai muuken akarkar maamu ainau wakanin wainkamjai. Nuka Juun Yawaaya Tumaun, tura ni nakumkamurinha: Ameketme juuntam ticharu ainawai. Tura Juun Yawaaya Tumaun naaringkia ni nijajinha, tura ni uwejencha aatrachmau ainawai. Nu aints ainau maamaitiat ataksha iwiaaku wajasar, Cristojai kichik warang musach aints ainaun ínainaun wainkamjai. [☆] ⁵ Nuka nekasar nuwá eemkar nantakiartinuitai. Antsu kichik warang musach nangkamaramtai, Cristo umirchau ainauka ukunam nantakiartinuitai. ⁶ Nuwá eemkar nantakiartin ainauka Yuse aintsri asar nukap warasartinuitai. Tura ataksha pengké jakachartinuitai. Tura sacerdotea nunisarang Yusnasha, tura Cristoncha pengker awajsartinuitai. Tura kichik warang musach Cristojai tsaniasar aints ainaun inartinuitai. [☆]

Iwianchi apuri tuke mengkakatniuri

⁷ Nunia kichik warang musach nangkamaramtai, Satanás ni achikmau pujamurinia ataksha jiikir akupamu atinuitai. ⁸ Nunia mash nungkanmaya ainaun anangkatas jiinkitnuitai. Nu nungka apuringkia Gog naartinuitai. Tura ni aintsri ainau Magog naartinuitai. Nu aints ainau juun entsa naikmiria timiá untsuri asar, nujai mash iruntrar mesetan najanawartas jiinkartinuitai.

⁹ Tura Satanás waanmaya jiinkin asamtai, mash nungkanmaya ainau timiá untsuri kaunkar, paka nungkancha netkar mura wakaar, Yuse aintsri ainau pujutirin tentakar, Yuse aneetiri yaktancha Jerusalénasha tentakarun wainkamjai. Tura Yus nayaimpinmaya jiin akupak nu aints ainaunka mash amukun wainkamjai. ¹⁰ Nuniangka Satanás aints ainaun tuke anangmia nuka kucha ji azufrejai keamunam ujungmawaitai. Nuni Juun Yawaaya Tumausha, tura Anangkartin Chichaman Etsernu Juuntrisha tsawaisha, tura kashisha tuke nangkantsuk wait wajakarti tusar ujungkarun wainkamjai.

Juun keemtainum pújunam ketun wainkamu

¹¹ Nuniangka jiimkaman Yuse keemtairi juuntan nekas pújun wainkamjai, tura nu keemtainum ketun wainkamjai. Nu keemtainum keemsamtai, nungkasha tura nayaimpisha mengkakarun wainkamjai. Antsu nuniangka ataksha pengké wainkachmajai.

¹²⁻¹³ Nuniangka jiimkaman, juun entsanam jakaru ainaun tura nungkanam iwiansamu ainausha jiinkiarun wainkamjai. Aints tuning jakaria nuni ataksha nantakiar namangtuk wajainaun wainkamjai. Nuniangka papi ainaun urakmaun wainkamjai. Chikich papisha Yusnum tuke pujustin ainau naari aarmau aa nuna urakmaun wainkamjai. Chikich

☆ 19:20 (Apoc. 13.1-18) ☆ 20:3 (Gén. 3.1-15; 2.Ped. 2.4) ☆ 20:4 (Mat. 19.28; Luc. 22.30; Apoc. 6.9;13.16-17;14.9-10) ☆ 20:6 (Apoc. 1.6;5.10)

papinum aints ainau turamurisha mash aarmau asamtai, Yus nu aarmauncha jiis, apu ainausha tura mianchau ainausha Yuse keemtairin naka wajainamtai, ni tunaarijai metek wait wajakartintri tu awai tusar nekamtikun wainkamjai. ¹⁴⁻¹⁵ Nuniangka jakatin, tura jakaru ainau matsamtairincha ji kucha tumau keamunam ujungmaun wainkamjai. Tura tuke Yusnum iwiaaku pujustin papinum nu aints ainau naari aatrachmau asar, kucha jiya tumau keamunam ujuinaun wainkamjai. Nu aints ainauka Yusnum pengké jechartin asar, antsu ji kajintrashtinum tuke wait wajakartin asar, jimia jakatnua nunisarang ainawai.✠

21

Nayaimpisha tura nungkasha yamaram atinuitai

¹ Nunia jiimkaman, nayaimpisha tura nungkasha arut armia nuka mengkakaruru asamtai, nayaim yamarman tura nungkancha yamarman wainkamjai. Antsu juun entsaka atsau asamtai nunaka wainkachmajai.✠

² Wikia yamaram yakat Jerusalén tutain Yus nayaimpinmaya akupkau asamtai, nekas pengker aa nuna wainkamjai. Nuwa aintsun ninumkatas shiirman iwiamamrawa nunisang nu yaktaka nekas pengker aun wainkamjai.✠ ³ Nunia nayaimpinmaya kakarman untsun antukmajai. Nu untsunauka nuwaitai: “Jiista. Yamaikia Yuska aints ainamunam pujawai. Tura níjai tuke pujustin asamtai, ni aintsri artinuitai. Tura ni aintsri asaramtai, ni Yusrijai tuke iruntrar pujusartinuitai.✠ ⁴ Tura asa aintsu neaikirin mash jipiratnuitai. Yaanchuik amia nuka mash mengkaku asamtai jatasha atsutnuitai. Tura wake mesekar pujamusha, tura wait wajamusha, tura najaimiamusha pengké atsutnuitai.”✠

⁵ Nunia juun keemtainum ketuka wína chichartak: “Jiista, wikia mash aa nunaka yamarman najanuitjai. Ju chicham wi taja nuka nekas asamtai nuna pachisar nekasampita tiartinuitai. Tura asamtai jusha aattrurta,” turutun antukmajai.

⁶ Nunia ataksha wína chichartak: “Wi timiaja nuka mash umismawaitai. Wikia nu nangkamtaik tuke pujuyajai. Tura nungka mash amukamtaisha, wikia tuke pujustinuitjai. Yumi akikchaujajai suwina nunisnak aints kitaminawa nunisarang pujuinaunka wijai tuke iwiaaku pujusarti tusan surittsuk susatnuitjai.✠ ⁷ Tunau nepetkaruka wi pujaja nunisarang pujusartinuitai. Tura wikia ni Yusri atinuitjai. Wi turau asamtai nusha wína uchir artinuitai. ⁸ Antsu wait wajakartinuun shaminak wína umirtutan inaisaru ainauka, tura winaka nekasampita turutsuk pujuinausha, tura tuke tunau nintimsar pujuinausha, tura mangkartin ainausha, tura pachitsuk tsanirmin ainausha, tura wishin ainausha, tura Yuschau waininayat waring achat mash: Nuka wína Yusruitai tinu ainausha, tura wait chichaman etserin ainausha, kucha ji azufrejai tuke keamunam wait wajakartinuitai. Nu kuchaka jiya tumau keamunam ujungmau ainauka jimia jakawa nunisarang artinuitai,” turutun antukmajai.✠

Yamaram Jerusalén pachisar timiauri

⁹ Nunia Yuse awemamuri siete (7) aa nuka inangnamu wait wajakartinuun piningnum engkeamun takakun wi nuwik wainkamja nuka ataksha wína chichartak: “Winita. Uwija Uchiri nuwarin inaktustasan wakerajme,” turutun antukmajai. ¹⁰ Nunia Yuse Wakani karanma nunisang wína jiimtikrusma nuka nuwaitai: Yuse awemamuri mura juunnum iwiarak, nekas pengke yaktan Jerusalén tutain Yus nayaimpinmaya akupkamun inaktursami. ¹¹ Yus nuni tuke pujau asamtai, ni paaniuringkia kaya akik jaspé tutaiya tumaun wincha aun wainkamjai. ¹² Nu yakta wenukri juuntan, tura sarmancha wainkamjai. Tura wenuknum waiti doce (12) aa nuna wainkamjai. Tura Yuse awemamurin waitijai metek wajatinaun wainkamjai. Tura Israela uchiri doce (12) amia nuna naaringkia waitijai

✠ 20:14-15 (Mat. 25.41; Apoc. 21.8) ✠ 21:1 (2.Ped. 3.13) ✠ 21:2 (Gál. 4.26; Apoc. 3.12;19.7-8) ✠ 21:3 (Lev. 26.11-12) ✠ 21:4 (Apoc. 7.16-17) ✠ 21:6 (Isa. 55.1-2; Juan 4.10-14; 7.37-39; Apoc. 22.17) ✠ 21:8 (Mat. 25.41; Apoc. 20.14-15)

metek aatramun wainkamjai. ¹³ Tura kichik kichik yantamen kempatam waiti aun wainkamjai, tsaa taakmaunumaninisha kempatam, tura pajeninisha kempatam, tura tu pajeninisha kempatam, tura tsaa jeatinmaninisha kempatam aun wainkamjai. ¹⁴ Nu yakta wenukrin kaya juun doce (12) puusamuitai. Tura Uwija Uchiri nuiniatiri ainau doce (12) amia nuna naaringkia nu kayajai metek aatramun wainkamjai.

¹⁵ Tura Yuse awemamuri wijai chichama nuka nu yakta waitirincha, tura wenukrincha nekapmartas, nekapek kuri najanamun takakun wainkamjai. ¹⁶ Nu nekapkejai yakta aarin esantirin, tura wangkantirincha, tura yakiirincha jimia warang nunia jimia pachak (2,200) kilómetro metek waakchaun nekapmarun wainkamjai. ¹⁷ Nunia yakta wenukrin nekapmar yakiri sesenta y cuatro (64) metro jeaun nekapmarmayi. Nu yaktanka Yuse awemamuri nekapmarma nuka aintsti nekapma weaji nunisang nekapmaun wainkamjai.

¹⁸ Nu yakta wenukrin kaya wincha jaspe tutajai wenurmaun wainkamjai. Tura nu yaktaka kuria tumau jeamkamun ayat, nekas mutia tumaun winchaan wainkamjai. ¹⁹ Nu juun kaya doce (12) yakta wenukrin puusamun wainkamja nuka kichik kichik kaya shiiram akikjai iwiamun wainkamjai. Nu doce (12) kaya naaringkia nu ainawai: Jaspe, zafiro, ágata, esmeralda, ²⁰ ónice, cornalina, crisólito, berilo, topacio, crisoprasa, jacinto, amatista nu ainawai.

²¹ Nu yakta waitiri doce (12) kichkin kichkin winkan, kichik kaya juun entsanmaya jukimu, nekas akik najanamun wainkamjai. Tura nu yaktanam tungkajin jinta kuria tumau najanamutiat, nekas mutia tumaun winchaan wainkamjai.

²² Tura jiimkaman, nu yaktanam Yus nekas kakaram aa nuka Uwija Uchirijai nuni tuke pujuinau asaramtai, nu yaktaka Yuse jeea tumawaitai. Antsu Yus seatai juun jeaka nuni jeamkachmau asamtai nunaka wainkachmajai. ²³ Nu yaktanmasha Yuse paaniurijai mash paantin atin asamtai, tura Uwija Uchiri paaniurisha nukap atin asamtai, tsaa tsanmauncha tura nantu tsanmauncha yuumakchartinuitai. ²⁴ Mash nungkanmaya uwemraru ainau nu paaniunam wekainawai. Tura Yus apu ainaun ju nungkanmayan uwemtikramu asar, nekas apu ainayat nu yaktanam Yusen umirinak pujusartin ainawai. ²⁵ Nu yaktanmaka tee atsau asamtai, tsawaisha yakta waitiri pengké epenchartinuitai. ²⁶ Tura mash nungkanmaya uwemraru ainau pengker nintintin asar, nuni wayaawar warasartinuitai. ²⁷ Tura pasé nintintin ainau, tuke tunau nintimsar pujuinausha, tura wait chichaman etserin ainausha kichkisha nuningkia pengké wayaachartinuitai. Antsu tuke pujustin ainau naari Uwija Uchiri papirin aatramu asar nu yaktanmaka wayaawartinuitai.

22

¹ Nunia Yuse awemamuri entsa winchaan nekas pakuichaun inaktursami. Nu entsaka tuke iwiaaku pujustinun sukartawai. Nu entsanka Yus Uwija Uchirijai ketinamunmaya jiinun wainkamjai. ² Nu entsaka tungkajin jinta yantamen wearun wainkamjai. Tura nu entsa mai yantamen numi tuke pujutan sukartin wajaun wainkamjai. Nu numi ainauka doce (12) nantujai metek nerekartin ainawai. Tura nu numi nukéjaingkia mash nungkanmaya ainau tsuwamarartinuitai. ³⁻⁴ Tura Yus paseetai tauka nu yaktanmaka pengké atsutnuitai. Tura Yuse juun keemtairin, tura Uwija Uchiri keemtairin aa nunaka nu yaktanam wainkartinuitai. Tura Uwija Uchiri yapiincha waitkartinuitai. Tura ni naaringkia Jesúsa inatiri nijajin aatramu artinuitai. Turamtai nuni ni inatiri ainau Uwija Uchirin pengker awajartinuitai. ⁵ Nu yaktanmaka teeka atsutnuitai. Tura Apu Yuse paaniurijai nekas paantin asamtai, kantiinaka yuumakchartinuitai. Tura Yuse inatiri ainau tuke nuni apua nunisarang pujusartin ainawai.

Jesucristo tatintringkia jeatak wajasi

⁶ Nunia Yuse awemamuri wína chichartak:

“Ju chichamka wi amin aamtikramjame nuka nekasaintai. Tura asamtai juni mash aarmawa nunaka pachisar nekasampita tiartinuitai. Apu Yus ni chichame etserin ainaun

☆ 21:23 (Juan 8.12) ☆ 22:2 (Gén. 3.24; Sal. 17.15; 46.4; Mat. 5.8; 1Juan 3.2)

nintimtikramia nuka ni inatiri ainaun ukunam atiniun pachis nekamtikiatas: Wári umistajai tusa, ni awemamurin akupkami,” turutun antukmajai.

⁷ Nunia Jesucristo chichamen antukmajai. Nu chichamka nuwaitai:

“Wikia wári winitatjai. Ju papi aarmawa juna umirkaru ainaunka nekasan waramtik-sartatjai,” turutun antukmajai.

⁸ Wiitjai Juankuitjai. Wiki ju chichamnaka mash antuku asan, tura waintancha mash wainkau asan, Yuse awemamuri mash aa nunaka winaka inaktursau asamtai, ni wajamunam: Ameketme juuntam titasan pinakumran tepesmajai. ⁹ Turamaitiat nuka wína chichartak:

“Aitkarawaip. Yusek ameketme juuntam tita. Wisha amea nunisketjai. Tura chikich Yuse inatiri ainu ni chichamen etserina nujai metekaitjai. Tura ju papi aarmaun umirkaru ainujai metek Yuse inatirinjai,” turutun antukmajai.

¹⁰ Nunia ataksha wína chichartak:

“Ju papi aarmau aa nuka wári umiktin asamtai, ju chichamka uutsuk aints ainu mash nekamtikiata. ¹¹ Ju chichaman umitsuk pujuinauka, tuke tunau turuwarti tusam tsangkatkata, tura pasé nintimsar pujuinauka tuke pasé nintimsar pujusarti tusam tsangkatkata. Antsu pengke aints ainuka tuke pengker pujusarti tusam tsangkatkata. Tura Yusen umirin ainuka tuke Yusen umirkarti tusam tsangkatkata,” turutun antukmajai.

¹² Jesucristo ataksha chichaak:

“Nekasan wári winitatjai. Tura aints kichkin kichkin ni turamurijai metek tunau takau ainaunka pasé awajsartatjai. Tura pengker aa nuna takau ainaunka pengker awajsartatjai. ¹³ Wikia nu nangkamtaik tuke pujuyajai. Tura nungka mash amukamtaisha, tuke nunisnak pujustinuitjai. ¹⁴ “Aints ni entsatirin pakuichau ati tusar, tenap nijainawa nunisarang pengké tunaarinchau pujuinaunka Yuska waramtikartinuitai. Tura Yuse yaktari waitirin wayaawartinuitai. Tura numi tuke pujutan sukartinu neren yuwarti tusa Yus tsangkatkatnuitai. ¹⁵ Antsu Yusen umirchau ainuka, tura wishin ainausha, tura pachitsuk tsanirmin ainausha, tura mangkartin ainausha, tura Yuschau waininayat, waring achat: Nuka wína yusrutai tinu ainausha, tura aintsun anangtan wakerin ainausha, tura wait chichaman tuke etserin ainuka nu yaktanmaka pujuschartinuitai.

¹⁶ “Wikia Jesúsaitjai. Ju aarmaunaka wína aintsur ainaun nekamtikiawarti tusan, wína awemamurun akupkamjai. Wikia Davidta wearinjai. Tura tsawaatsaing angkuaji tsantua nunisnak wína aintsur ainaun wína paan waitkarti tusan wantintuktinuitjai,” taun antukmajai.

¹⁷ Tura Yuse Wakani tura Uwija Uchiri Nuwarisha: “Winitaram,” tinawai. Tinamtai ju chichaman antukaru ainausha chikich ainauncha untsukar: “Winitaram,” tiarti. Tura kitaminawa nunisarang pujuinausha winiarti. Tura wakerinakka, yumi tuke iwiaaku pujustinun sukarta nunaka akikchaujai umurarti. ¹⁸ Ju papi Yuse chichame aarmawa juna antukartin ainaun nunasha tajai: Pe wainkataram. Yuse chichame ju papin aarmaun aints ningki nintimias chikich chichaman patatkamtaikia, Yus ju papinum wait wajaktiniun pachis aarmawa nunaka niin susatnuitai. ¹⁹ Tura aints ningki nintimias, Yuse chichame ju papin aarmaun wainiat, jumchiksha mengkaramtaikia, pengker yaktan ju papinum pachis aarmawa nuningkia wayaashti tusa Yuska suritkatnuitai. Tura nu yaktanam numi tuke pujustinun sukarta nuna neren yuwái tusa suritkatnuitai.

²⁰ Jesucristo ju aarmaunaka pachis: Nekas juka wína chichamruitai ta nuka: “Nekasan wári winitatjai,” tawai.

Tamati wisha: “Tu atí, Apuru Jesús. Nekasam wári winita,” tajai.

²¹ Ii Apuri Jesucristo mash aints ainautirmin yainmakarti. Nuke atí. Maaketai.

☆ 22:12 (Jer. 17.10) ☆ 22:13 (Apoc. 1.8, 17;2.8) ☆ 22:14 (Gén. 3.24) ☆ 22:17 (Isa. 55.1-2; Juan 4.10-14; 7.37-39; Apoc. 21.6)